


Jém jomipic trato
jém iwatnewiip
tánomi Jesucristo



New Testament in Popoluca, Highland

Jém jomipic trato jém iwatnewip tánomi Jesucristo New Testament in Popoluca, Highland

copyright © 2009 Wycliffe Bible Translators, Inc.

Language: Popoluca, Highland

Translation by: Wycliffe Bible Translators, Inc.

Popoluca, Highland

poi

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoluca, Highland

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
da18b773-264a-519b-a8dd-012e48df725d

Contents

SAN MATEO	1
SAN MARCOS	57
SAN LUCAS	93
SAN JUAN	152
HECHOS	198
ROMANOS	247
1 CORINTIOS	270
2 CORINTIOS	291
GÁLATAS	305
EFESIOS	313
FILIPENSES	320
COLOSENSES	325
1 TESALONICENSES	330
2 TESALONICENSES	335
1 TIMOTEO	338
2 TIMOTEO	345
TITO	350
FILEMÓN	353
HEBREOS	355
SANTIAGO	371
1 PEDRO	376
2 PEDRO	383
1 JUAN	387
2 JUAN	393
3 JUAN	394
JUDAS	395
APOCALIPSIS	397

Jém wibic aṅmaṭi jém ijayñewiip jém Mateo

Jém Jesucristo jém ijatunḡewe jém wiñicpicyaj
(Lc. 3:23-38)

¹ Jaycámnetā yim jém lista de jém Jesucristo ijatunḡewe jém wiñicpicyaj. Jém Jesucristo jém David iocmanic y jém Abraham iocmanic.

² Jém Abraham imaníc jém Isaac. Jém Isaac imaníc jém Jacob. Jém Jacob imaníc jém Judá con itiwitam. ³ Jém Judá imaníc jém Fares y Zara, iapa jém Tamar. Jém Fares imaníc jém Erson. Jém Erson imaníc jém Aram. ⁴ Jém Aram imaníc jém Aminadab. Jém Aminadab imaníc jém Naasón. Jém Naasón imaníc jém Salmón. ⁵ Jém Salmón imaníc jém Booz, iapa jém Rahab. Jém Booz imaníc jém Obed, iapa jém Rut. Jém Obed imaníc jém Isaí. ⁶ Jém Isaí imaníc jém rey David. Jém rey David imaníc jém Salomón, jém iapa jém Urías iyomo idic. ⁷ Jém Salomón imaníc jém Roboam. Jém Roboam imaníc jém Abías. Jém Abías imaníc jém Asa. ⁸ Jém Asa imaníc jém Josafat. Jém Josafat imaníc jém Joram. Jém Joram imaníc jém Uzías. ⁹ Jém Uzías imaníc jém Jotam. Jém Jotam imaníc jém Acáz. Jém Acáz imaníc jém Ezequías. ¹⁰ Jém Ezequías imaníc jém Manasés. Jém Manasés imaníc jém Amón. Jém Amón imaníc jém Josías. ¹¹ Jém Josías imaníc jém Jeconías con itiwitam. Jeetim tiempo cuando nanicyajta preso itumpiy jém Israelpic pixiñtam hasta jém naxyucmi de Babilonia.

¹² Jesic cuando nanicneyajtaḡwum jém naxyucmi de Babilonia jém Jeconías imaníc jém Salatiel. Jém Salatiel imaníc jém Zorobabel. ¹³ Jém Zorobabel imaníc jém Abiud. Jém Abiud imaníc jém Eliaquim. Jém Eliaquim imaníc jém Azor. ¹⁴ Jém Azor imaníc jém Sadoc. Jém Sadoc imaníc jém Aquim. Jém Aquim imaníc jém Eliud. ¹⁵ Jém Eliud imaníc jém Eleazar. Jém Eleazar imaníc jém Matán. Jém Matán imaníc jém Jacob. ¹⁶ Jém Jacob imaníc jém José, jém Malía iwidaḡaya jém icnayñewiip jém Jesús, iñiyitim CRISTO.

¹⁷ Jesic it catorce jém Abraham iocmanictam hasta David. Ittim catorce jém David iocmanictam hasta cuando mu ininicyajta preso jém Israelpic pixiñtam jém naxyucmi de Babilonia. Ittim catorce jém Jeconías iocmanictam dende nanicyajta preso jém naxyucmi de Babilonia hasta cuando mu iñay jém Cristo.

Jutsap iñay jém Jesucristo
(Lc. 2:1-7)

¹⁸ Jesic yimpic nay jém Jesucristo. Cuando jém José iniwatneum trato jém woñi Malía iga napicyajtaḡ, antes que danam napicneyajta, manicomcaneum jém Malía con Dios iAnama ipimi. Da je jém José imaníc. ¹⁹ Jesic jém José, jém iwatnewiip trato jém Malía iga napicyajtaḡ, como wibic pixiñ, da ichaawattooba jém Malía. Jeeyucmi iyamtsactooaba jém woñi iga jém pixiñtam odoy ijodónayajiñ. ²⁰ Jesic iganam ijispa jempic jém José, imawíñix tum siñyucmipic pixiñ jém icutsatnewiip Dios. Iñimáy jém José:

—MiJosé, jém rey David miocmanic, odoy cñi iga impictsonpa jém Malía. Porque jém imaníc, jém ijúmpacnewiip, inimiñ jém Dios iAnama. ²¹ Jém woñi icnaypa tum jaychixi. Accámaayi iñiyi iga JESÚS porque iciacputpa jém ipixiñtam, iwitsagáypa jém itañca iga odoy ipictsonyajiñ jém castigo.

²² Jempigam iñasca jém Malía iga cupaguiñ juuts nimpā jém wiñicpic aṅmaṭciwiñ jém ipimiyñewiip jém tanjatunḡ Dios iga inmadiñ. Nimyajpa:

²³ Manicomca tum woñi jém ḡapic jaayiy.

Da queman ijyypát pixiñ.

Icnaypa tum jaychixi.

Accámaytáp iñiyi iga Emanuel.

Taichtam tanañmatimí nimtooba: tanwaganaittámpa Dios.

²⁴ Jesic cuando yus jém José iwat juuts iñímáy jém siñyucmipic p̄ixiñ jém icutsatnewiip jém tanjatun Dios. Ipictson jém Malía. ²⁵ Pero da inimon̄ hasta que icnay jém icoponmanic tum jaychixi. Jesic jém José iccámáy iñiyi iga Jesús.

2

Miñ ijóyayaj jém tsixi jém sabioyaj

¹ Nay Jesús jém attebet Belén jém naxyucmi de Judea cuando injacpa jém rey Herodes. Jesic jeetim tiempo núcyaj Jerusalén jém sabioyaj. Miñyaj anjamquimmi. ² Mu iñúcyaj, acwágoyyajpa. Nimyaj:

—¿Jut it jém tsixi jém nayñewiip, jém tsíypáppic juuts Rey iga injacpa jém judíos? Ánixayta imatsa jém anjamquimmi. Amiññeta iga acosteeñaytámpa y anjístámpa.

³ Jesic cuando jém rey Herodes ijodóna ti iñímáy jém juumipic p̄ixiñ, agui c̄in, da icutiíyí ti iwatpa. C̄inyajtím jém p̄ixiñtam jém ityajwiip jém attebet Jerusalén. ⁴ Jesic jém Herodes in̄tuumaawat itumpiy jém cobacpic panij anjagooyiyaj con jém escribaspic maestroyaj. Jém Herodes icwácpa jém panij anjagooyi jut naypa jém Cristo. ⁵ Jeeyaj iñímayyaj jém Herodes:

—Naypa jém attebet Belén jém naxyucmi de Judea porque jempigam ijaychacne jém wiñicpic anmatciwiñ. Nimpa Dios:

⁶ Mich miattebet Belén, miitw̄ip jém naxyucmi de Judá, agui mixutu, pero michíypa juuts tum mijpic attebet porque mimichtámanjom naypa tum mijpic anjagooyi. Iwatpa cuenta jém ampixiñtam jém attebet Israel.

⁷ Jesic jém Herodes iyámanwejay jém sabioyaj. Icwác iga juchis moj iixyay jém matsa. ⁸ Jesic ocmi jém Herodes icutsat jém sabioyaj jém attebet Belén. Nimpa:

—Nictaami jem̄ic. Wimétstaami jém tsixi. Jesic cuando impátnetámum, miñi acjodónaji. Ich nicpatim an̄costeeñay.

⁹ Jesic cuando yaj imatonyaj ti nimpa jém rey Herodes, moj niquiyaj jém Belén. Anjagoyñeeba iñic jém matsa jém iixñeyajwiip anjamquimmi. Núc jut it jém xutu tsixi, jemum teeñanjac. ¹⁰ Cuando iixyay jém matsa jut teeñanjac, tsam p̄imi maymayyaj.

¹¹ Jesic cuando tigíyyaj jém ticjom, iixyay jém jaychixi con iapa Malía. Jém sabio icosteeñayyaj jém tsixi. Ijisyajpa. Íñáy jém ibaúl, ixaiyyajpa oro, jém wibic incienso y jém mirra jém aguiptic c̄inpa. ¹² Ocmi Dios icmawíña jém sabioyaj iga odom nicyajiñ eyb̄ic jut it jém Herodes. P̄imiyta iga sediñ tunjac tunjom hasta núcpa iticmi.

Nicyajpa Egipto. Poyyaj jém José y Malía

¹³ Jesic ocmi mu iñicyajum jém sabio, jém José imawíñix tum siñyucmipic p̄ixiñ jém Diospic icutsatne. Iñímáy jém José:

—Napoyi jém xutu tsixi con iapa. Nictaami jém naxyucmi de Egipto. Jemum tsíytaami hasta que ich mannímáypa iga mixediñ porque jém Herodes imétspa jém xutu tsixi iga iccaaba.

¹⁴ Jesic tsucum jém José con jém Malía. Inipoyyaj jém xutu tsixi tsuucim. Nicyaj jém naxyucmi de Egipto. ¹⁵ Jemigam tsíyyaj hasta que ca jém Herodes. Iñasca jempic iga cupaguiñ juuts iñímáy Dios jém wiñicpic anmatciwiñ: “Ich anañwejaypa ammanic jém naxyucmi de Egipto.”

Jém Herodes ip̄imíy iga accaayajtaiñ jém tsixtam

¹⁶ Jesic tsam jóy jém Herodes mu iix iga jém sabio da icupicyaj juuts iñímáy. Ipimíy jém isoldado iga iccucaayyajiñ itumpiy jém jaychixtam jém ityajwiiip Belén con jém ityajwiiip nocojom. Ijisne jutsañ mayooyi oyñe iámyaj jém sabioyaj jém tsixi. Jeeyucmi iccucaayyaj itumpiy jém iniitwiiip dos amtíy hasta jém dapic núcne dos amtíy. ¹⁷ Jempigam cupac jém añmati juuts ijaychacne jém wiñicpic añmatcwiñ jém Jeremías. Nimpa:

¹⁸ Matontap tum jiyi jém attebet Ramá.

Tsam weyajpa, tsam anyácneyaj.

Tsam weyajpa jém Raquel, jém Israelpic yomtam,

iyaachanjampa jém imanictam.

Da ixunpa iga acpocsaytap ianama

porque accucaáyayyajta imanictam.

¹⁹ Jesic ocmi cuando caaneum jém Herodes, tanjatun Dios icutsat tum sinyucmicpic pixiñ iga icmawíñaiñ jém José jém naxyucmi de Egipto, nímayta:

²⁰ —Siip settaami jém iñicmi Israel. Naseti jém jaychixi con iapa. Porque siip caaneum jém anjagooyi jém iccaapáppic idic jém xutu tsixi.

²¹ Jesic mojum seti jém José. Iniseta jém xutu tsixi con iapa jém naxyucmi de Israel.

²² Pero tsam cñ jém José iga nicpa jém naxyucmi de Judea porque ijodóna iga jém Herodes imaníc jém Arquelao injacpa jém naxyucmi Judea jut injacpa idic jém ijatun. Jém José mawíña iga odoy niguiñ Judea. Ijspa iga nicpa jém naxyucmi de Galilea. ²³ Jesic núc jém Galilea, nic iti jém attebet Nazaret. Iñasca jempic iga cupacpa juuts nim jém wiñicpic añmatcwiñ iga Nazaretpic pixiñ jém Jesús.

3

*Najíyóypa jém Xiwan jém acchínoypaap titsinaxyucmi
(Mr. 1:1-8; Lc. 3:1-9, 15-17; Jn. 1:19-28)*

¹ Núc jém jama iga moj najíyooyi jém Xiwan jém acchínoypáppic. Najíyóypa jém titsinaxyucmi jut da ti idíyiy, jém naxyucmi de Judea. ² Nim jém Xiwan:

—Tsaci iga immalwatpa, cucaci iñixi porque núctooba jém tiempo iga injacpa Dios yíp naxyucmi.

³ Jém wiñicpic añmatcwiñ jém Isaías inmat de yíptim Xiwan. Nimpa:

Matontap tum añmatcwiñ jém tsampic najíyóypa jém titsinaxyucmi.

Nimpa iga:

“Witsagaayi jém tánomi itun.

Áñaayi tum tun numapic.”

⁴ Jém Xiwan iyooti tacne con jém camello ipic. Jém icinturón tum tsococuero. Icutpa jém awu. Iucpa jém jimñi chiñu. ⁵ Tsam jáyan pixiñtam nic imatonjaj jém Xiwan jut najíyóypa. Miñaj jém attebet Jerusalén, icuwiti jém naxyucmi de Judea, con jém ityajwiiip nocojom jém río Jordán. ⁶ Jém pixiñtam inmadayyajpa Dios itánca iga agui imalwatne. Ocmi jém Xiwan icchípa jém río de Jordán.

⁷ Jesic cuando jém Xiwan iix iga chintooba wati jém fariseopic pixiñtam y jém saduceopic pixiñtam, iñímáy:

—¿Que michtam impóyaytámpatim jém Dios icastigo? ¿Que incupicpa iga ich wiap manciacputta? Mijex juuts jém tsañ agui poypa cuando miñpa jém iccaapáppic. ⁸ Siiga numa inchacneum jém immalajixi, jesic wati juuts ixunpa Dios, jesic quejpa iga numa incucacneum iñixi. ⁹ Odoy jistaami iñanamanjom iga mimichtam tsam wibic mipixiñtam da mimalotam porque jém Abraham mimanictam. Da wi iga iñjistampa jempic porque Dios wiap icset yíp tsa juuts jém Abraham imanictam. ¹⁰ Witsacneum jém hacha.

Accámnetawum jém cuytichicyucmi. Itumpiy cuy dapic tím̄ap, tinquím̄ap, nooquettap juctj̄om. ¹¹ Ich n̄uma manacchin̄pa con n̄i iga quejiñ iga iñchacneum iga immalwatpa. Pero ocmi miñpa tungac p̄ixiñ antuuñian̄cim. Je más wiap̄ que aich. Da wiap̄ annasca. Da wiap̄ āncuwijáyáy jém iciac. Micchin̄pa con Dios iAnama y con jucti. ¹² Imatspacneum jém iyemcuy iga icutippa jém trigo. Cuando yajum icutip̄, iccáypa jém trigo graneroj̄om. Nooquettap jém trigo ipuchi juctj̄om j̄ut da nunca píchpa.

Acchin̄ta jém Jesús

(Mr. 1:9-11; Lc. 3:21-22)

¹³ Jesic Jesús put jém naxyucmi de Galilea. Nic jém río de Jordán iga icchíñiñ jém Xiwan jém acchíñoypaap. ¹⁴ Pero jém Xiwan da icchin̄tooba Jesús. Nímayta Jesús:

—Más w̄i iga mich anacchin̄pa aich. ¿T̄iiga mimiñpa iga manacchíñiñ?

¹⁵ Jesic Jesús icutson. Iñímáy jém Xiwan:

—Pero siip̄ w̄i iga anacchin̄pa. W̄i iga tanaccupacpa itumpiy juuts tapim̄iy Dios.

Jesic jém Xiwan icchin̄. ¹⁶ Cuando yajum icchin̄ta jém Jesús, put jém n̄icim. Jesic āñáy jém siñ, Jesús iix jém Dios iAnama. Quet juuts tum cuucu. Nummiñ, núc Jesúsycmi.

¹⁷ Jesic jém ityajw̄ip̄ jem imaton̄yaj tum j̄iyi siñycmi. Nimpa:

—Yíp̄ ich amManic jém tsampic antoypa. Tsam amaymay con je.

4

Cutitsta jém Jesús

(Mr. 1:12-13; Lc. 4:1-13)

¹ Ocmi jém Dios iAnama ininic Jesús jém titsinaxyucmi j̄ut da ti idíyiy. Nanicta iga icutíchiñ jém Wocciwiñ.

² Da wíc Jesús cuarenta jama y cuarenta tsuu. Jesic ocmi tsam p̄imi yuap. ³ Jesic jém Wocciwiñ icunúc Jesús iga icutítspa. Iñímáy:

—Siiga n̄uma Dios miManic, acseti yíp̄ tsa iga caxtánañi.

⁴ Jesic Jesús iñímáy jém Wocciwiñ:

—Nimpa jém Dios in̄mati jém jayñew̄ip̄: “Jém p̄ixiñtam da itpa no más con jém caxtánañi iga icútpa. W̄itpa jém p̄ixiñ siiga iwatpa itumpiy juuts iñímáy Dios.”

⁵ Jesic jém Wocciwiñ ininic Jesús jém atebet Jerusalén. Iniquim jém m̄ip̄ic mastican̄cobac. ⁶ Jesic jém Wocciwiñ iñímáy Jesús:

—Siiga n̄uma Dios miManic, yóyan̄queti. Porque nimpa jém Dios in̄mati:

Dios icutsat jém siñycm̄ip̄ic p̄ixiñtam iga mimatstson̄yajiñ icij̄om iga odoy coow̄añi impuy tsaayucmi.

⁷ Jesic Jesús iñímáy jém Wocciwiñ:

—Nimpatim jém Dios in̄mati: “Odoy cutitsi jém tanJatun̄ Dios siiga n̄uma wiap̄.”

⁸ Jesic jém Wocciwiñ eybic icutítspa jém Jesús. Ininic tum m̄ip̄ic cotsicyucmi tsam yucmi. Inquejáy itumpiy jém atebetyaj icuw̄iti yíp̄ naxyucmi iga tsam w̄ibic lugar. ⁹ Jém Wocciwiñ iñímáy Jesús:

—Manchiiba itumpiy ȳimp̄ic manan̄quejáy siiga āncosteeñáypa y anj̄ispa.

¹⁰ Jesic Jesús iñímáy:

—Nicsim, miWocciwiñ. Nimpa jém Dios in̄mati: “J̄istaami tanJatun̄ Dios icutum. Odoy cuyoxataami tungac.”

¹¹ Jesic nic jém Wocciwiñ. Ichac iga icutítspa Jesús. Jesic miñyaj jém siñycm̄ip̄ic p̄ixiñtam iga iyoxp̄atyajpa.

Mojpa iwat iyoxacuy jém Jesús Galilea

(Mr. 1:14-15; Lc. 4:14-15)

¹² Jesic cuando Jesús imaton iga pajta cárcel jém Xiwan, set eybic jém naxyucmi de Galilea. ¹³ Da tsíy jém attebet Nazaret. Nic iti jém attebet Capernaum jém laguna anñaca jém naxyucmi de Zabulón y Neftalí. ¹⁴ Iñasca jempic iga cupacpa jém anmati juuts ijaychacne jém wiñicpic anmatcwiñ jém Isaías. Nimpa:

¹⁵ Jém naxyucmi de Zabulón con jém naxyucmi de Neftalí

dende jém lamar anñaca hasta jém Jordán inwiñtuc,

jém naxyucmi de Galilea,

jut ityaj jém pixiñtam jém dapic je de Israel,

¹⁶ jém ityajwip piichcim;

iixyajpa tum wibic juctian̄tsoca.

Tsíyyaj juuts caaneyaj idic.

Cupiichane iti,

pero iyicquejyajpa tum wibic jucti.

¹⁷ Jesic cuando núc jém Capernaum, moj inmat Jesús jém Dios inmati. Nimpa:

—Tsaci iga immalwatpa, cucaci inñixi porque núcneum jém tiempo iga injacpa Dios yip naxyucmi.

Moj inwejay Jesús jém icuyujcwiñ

(Mr. 1:16-20; Lc. 5:1-11)

¹⁸ Jesic naspa Jesús jém laguna anñaca inñiyi Galilea. Iix tum pixiñ con itíwi. Tum jém Ximoy, inñiyitim Peto; tum jém Anti. Síp ipatsyaj ired jém laguna iga imatspa t̄ipi. Jeeyaj t̄ipteroyaj. ¹⁹ Jesic Jesús inñimáy jém wisten:

—Atún̄iytaami. Nicpa tamméts pixiñ juuts t̄ipi.

²⁰ Jesic jeeti rato ichacyaj ired, nic itún̄iyyaj jém Jesús.

²¹ Jesic nic Jesús uxan más juumi, ipát tungac wisten pixiñ. Jém Jacobo, jém Zebedeo iman̄ic, con itíwi jém Xiwan. Ityaj barcojom con ijatun̄. Síp in̄totsyaj ired. Jesic Jesús inwejay. ²² Jeeti rato ichacyaj jém ibarco y jém ijatun̄. Nic itún̄iyyaj Jesús.

Jáyan̄ pixiñ acpisyajta

(Lc. 6:17-19)

²³ Jesic nic Jesús icuw̄iti jém naxyucmi de Galilea. Accuyujóypa cada lugar jém sinagoga jut icuyujcayajpa jém Moisés inquímayooyi. Inmadáypa jém pixiñtam jém wibic anmati iga núcpa jém tiempo iga injacpa Dios yip naxyucmi. Icpis jém mimneyajwip jém imatsneyajwip itumpiy jém caacuy. ²⁴ Jodón̄ata icuw̄iti jém naxyucmi de Siria iga agui w̄iap jém Jesús. Jesic namíñayta Jesús itumpiy jém mimneyajwip, jém imatsneyajwip caacuy y jém toya. Namíñaytatim jém iniitw̄ip mal espíritu, jém imatsneyajwip ataque y jém tusacanew̄ip. Icpis itumpiy. ²⁵ Tsam jáyan̄ pixiñtam itún̄iyyajpa jém Jesús. Miñyaj de jém naxyucmi de Galilea, de jém attebet Decápolis y de jém attebet Jerusalén. Miñyajtim de jém naxyucmi de Judea y de jém Jordán inwiñtuc.

5

Accuyujóypa Jesús tum cotsicyucmi

(Lc. 6:20-23)

¹ Jesic cuando iix Jesús iga an̄tuumayajpa tsam jáyan̄ pixiñtam, quim tum cotsicyucmi. Jemum coñ Jesús. Jém icuyujcwiñ icunúcyaj. ² Jesic Jesús moj inquejay. Nimpa:

³ —Agui maymay jém ijodón̄aneyajwip titam itogóyayaj iga núcpa jut it Dios porque jeeyaj núcyajpa jut it Dios.

4'Agui maymay jém anyácneyajwɨp porque Dios icpocsáypa ianama.

5'Agui maymayyaj jém pɨxiñtam jém ðapɨc nacujíptap iyaac porque jeeyaj ipɨctsonɨyajpa yíp nas, jém ijyicámayñewɨp Dios iga ichiiba.

6'Agui maymay jém tsampɨc iwattooba juuts ixunpa Dios porque Dios iyoxpátpa iga wiñiñ iwatyaj jempɨc.

7'Agui maymay jém iyaachanjamyajpáppɨc jém itɨwɨtam porque Dios iyaachanjampatim jeeyaj.

8'Agui maymay jém cuáyñewɨp ianama porque jeeyaj iixyajpa Dios.

9'Agui maymay jém pɨxiñ jém injiyjacpáppɨc jém ányajpaap porque tsíypa juuts Dios imanɨc.

10'Agui maymay jém tsampɨc yaachwattap iga iwɨwatpa juuts ixunpa Dios porque jeeyaj núcyajpa jém wɨcom juɨ injacpa Dios.

11'Maymáyaami cuando jém malopɨc pɨxiñtam tsam mimalnámaytámpa, tsam miyaachwattámpa y tsam micumigoytámpa ich anɨcuyucmi. 12 Maymáyaami. Odoy anyátaami porque impɨctsonɨtámpa tum wɨbɨc xaja sɨnyucmi. Jistaami iga jém wiñɨcpɨc anɨmatcɨwiñ tsam pɨmi malwadayyajtatim.

Jém çana y jém jucti

(Mr. 9:50; Lc. 14:34-35)

13'Mimichtam mijex juuts jém çana para yíp naxyucmɨpɨc pɨxiñtam. Pero siiga da paac jém çana, çjutsap tanwɨtsac? Da ti mejcuy. Tampatsáypa. Iacunepnepquetyajpa jém pɨxiñtam.

14'Mimichtam mijex juuts tum wɨbɨc jucti iga iñyicquejpa jém ityajwɨp yíp naxyucmi. Tum mijpɨc atebet lumuyucmi da i wɨap inéc. 15 Da i iñooba tum nooquejcu y iga icujappa tum coñcucim. Itunpa yucmi iga iyicquejpa itumpɨy jém ityajwɨp jem. 16 Jesanetim mimichtam wɨtsoctaami juuts tum wɨbɨc jucti iga iñyicquejyajpa jém pɨxiñtam. Wɨwattaami jém pɨxiñtamanjom iga cuando iixyajpa, tsam icujípyajpa tanjatunɨ Dios jém itwɨp sɨnyucmi.

Da accaytap jém wiñɨcpɨc anquímayooyi

17'Odoy jisi iga ich miñ anaccáy jém Moisés inquímayooyi, ni da anaccáypa jém wiñɨcpɨc anɨmatcɨwiñ inquímayooyi. Ich amiñ anaccupac itumpɨy juuts nɨmpa jém wiñɨcpɨc anquímayooyi. 18 Numa, mannímáypa, da i nunca iccáypa jém wiñɨcpɨc anquímayooyi. Ni tum punto ni tum jiti da togoypa. Da cuyajpa jém sɨɨ ni jém nas hasta que cupacpa itumpɨy cosa juuts nɨmpa jém anquímayooyi. 19 Siiga tum pɨxiñ da iccupacpa tum jém anquímayooyi ðapɨc juchan y inquejáypatim jempɨc jém pɨxiñtam, jesic da ti mejcuy jém pɨxiñ. Da tigɨypa juɨ injacpa Dios. Pero siiga tum pɨxiñ iwatpa itumpɨy juuts nɨmpa jém wiñɨcpɨc anquímayooyi, y siiga inquejáypatim jém pɨxiñtam, jesic jém pɨxiñ tsíypa juuts tum mijpɨc anjagooyi cuando injacpa Dios yíp naxyucmi. 20 Pero mannímáypa mimichtam, siiga da más inwɨwattámpa que jém fariseoyaj y jém escribaspɨc maestroyaj, jesic da wɨap iññúc juɨ injacpa Dios.

Siiga tananit jém malopɨc jɨxi tánanamanjom, tammalwatpa

(Lc. 12:57-59)

21'Michtam immatonɨneta iga jém wiñɨcpɨc tanjatunɨwewetam nɨmyaj iga: "Odoy accaoyi porque chiitap castigo jém accaoyapaap." 22 Pero ich mannímáypa, siiga i ijóyixpa jém itɨwi, ipɨctsonɨpa jém castigo juuts tum accaoyapaap. Siiga i imalnámáypa jém itɨwi, cɨpɨntap jém cobacpɨc anjagooyicim, jém Sanhedrín; chiitap castigo. Siiga i iñímáypa jém

it̄iw̄i iga tsam bruto, jesic jem p̄ixiñ wiap icn̄icta jem infierno, jem juctjom jut da nunca p̄ichpa.

²³ 'Cuando ininicpa tum ofrenda iga in̄chiiba Dios jem altaryucmi, siiga in̄j̄ispa iga immalwadayne jem in̄t̄iw̄i, ²⁴ jesic odoyñam tsaci jem ofrenda jem altaryucmi. Wiñti niḡi cunucsaayi jem in̄t̄iw̄i, jesic wiap in̄chac jem ofrenda.

²⁵ Siiga i mijoyixpa y miquejajwadáypa, jesic w̄itsaci jem in̄asunto antes que miñúctampa jem juezc̄im porque una vez miñúcneum jem, mic̄ijun̄cottap jem policia ic̄ijom, mipajtap. ²⁶ Mannímáypa iga da miputpa hasta que yajpa in̄yoj.

²⁷ 'Michtam immaton̄neta iga jem wiñ̄cpic tanjatun̄wewetam n̄imyaip̄a iga: "Odoj pejooyi." ²⁸ Pero ich mannímáypa siiga i iámpa tum yomo iga tsam icusúniypa, jesic pejóypa ianamanjom.

²⁹ Siiga jem in̄ixcuy, jem an̄w̄im̄ipic, micwatpa t̄an̄ca, topi, patsaayi. Más w̄i iga togoypa tum parte jem imm̄ij̄tay que iga micottap in̄cumij jem juctjom jut da nunca p̄ichpa. ³⁰ Siiga in̄ci, jem an̄w̄im̄ipic, micwatpa t̄an̄ca, jesic jaci, patsaayi. Más w̄i iga togoypa tum jaca jem imm̄ij̄tay que iga micottap in̄cumij jem juctjom jut da nunca p̄ichpa.

Da w̄i jem ichacpaap iyomo

(Mt. 19:9; Mr. 10:11-12; Lc. 16:18)

³¹ 'Wiñgam n̄imyaip̄atim: "Siiga i ichacpa iyomo, tienes que iwatpa tum acta iga ichacneum jem yomo." ³² Pero ich mannímáypa siiga tum p̄ixiñ ichob̄iyhacpa iyomo da pejoyne, jesic icpejóypa jem yomo siiga ip̄icpa tun̄gac p̄ixiñ. Siiga tum p̄ixiñ ip̄icpa jem yomo jem tsacnetaw̄ip, jesic pejóypatim jem p̄ixiñ.

Jesús in̄quejáypa iga odoy tan̄wadiñ jem juramentos

³³ 'Immaton̄netaim iga jem wiñ̄cpic tanjatun̄wewetam n̄imyaip̄a iga: "Siiga miñ̄im̄pa, w̄ijodios, jesic accupaci titam in̄j̄ycám̄ayne Dios." ³⁴ Pero ich mannímáypa iga odoy tsaci ni tum cosa juuts testigo iga da mim̄igóypa. Odoj tsaci jem siñ juuts tum testigo iga da mim̄igóypa porque siñyucmi in̄jacpa Dios. ³⁵ Odoj tsaci jem nas juuts tum testigo iga da mim̄igóypa porque jem naxyucmi icteñne ipuy jem tan̄jatun̄ Dios. Odoj tsaci jem Jerusalén juuts tum testigo porque je jem más M̄ij̄pic Rey im̄ichi. ³⁶ Odoj tsaci juuts tum testigo jem in̄cobac iga da mim̄igóypa porque ni tum jem in̄way da w̄iap in̄icpooba ni datim w̄iap in̄icyiga. ³⁷ Cuando miñ̄mattampa, n̄imtaami "numa" o "da". Siiga in̄chacpa algun ti juuts testigo iga da mim̄igóypa, jesic da w̄i porque jexpic j̄ixi miñne de jem Woc̄iwiñ.

N̄im̄pa Jesús iga odoy cian̄seedaayi

(Lc. 6:29-30)

³⁸ 'Michtam immaton̄neta iga n̄imyaip̄a wiñgam: "Siiga i in̄áscutedáypa iixcuy tum p̄ixiñ, jesic jem p̄ixiñ ician̄seedáypa, in̄áscutedáypatim iixcuy. Siiga i in̄acxquímáypa it̄its tum p̄ixiñ, jesic ician̄seedáypatim, in̄acxquímáypatim it̄its." ³⁹ Pero ich mannímáypa: Siiga i mimalwadáypa, odoy cian̄seedaayi. Siiga i micótsáypa in̄acpac, jesic j̄igaayi iga micótsáyiñtim tun̄gac lado. ⁴⁰ Siiga i miquejajwadáypa iga mitobáypa jem in̄yooti, jesic ch̄it̄im jem in̄chamarra. ⁴¹ Siiga i mip̄im̄iypa p̄im̄im̄i iga in̄inigáyiñ algun ti tum kilómetro, nan̄igaayi dos kilómetro. ⁴² Siiga i miwágáypa algun ti, jesic ch̄i. Siiga i miñucsóypa alguna cosa, jesic acnúcsi, odoy n̄imaayi iga da manchiiba.

W̄i iga tantoytamiñ jem tán̄enemigoyaj

(Lc. 6:27-28, 32-36)

⁴³ 'Immaton̄neta juuts n̄imyaip̄a jem p̄ixiñtam: "Toytaami jem in̄amigo, pero j̄oyixtaami jem in̄enemigo." ⁴⁴ Pero ich mannímáypa iga: Toytaami jem in̄enemigoyaj. Odoj

malnımaytaami jém mimalnımayñewı̄p. Wı̄wadaytaami jém mijóyixpaap. Anı̄wejpáttáami Dios iga iwı̄wadáyı̄ñ jém pı̄xiñtam jém mimalwadayñewı̄p. ⁴⁵ Siiga inı̄wattámpa jempic, jesic michı̄ytámpa juuts tanı̄Jatunı̄ Dios mimanı̄ctam jém itwı̄p sı̄nyucmi. Porque jém tanı̄Jatunı̄ Dios icpijpa jama para jém malopic y para jém wı̄bic. Dios icchijóypa tuj para jém tsampic tı̄ncaı̄y y para jém dapic tı̄ncaı̄y. ⁴⁶ Siiga nada más inı̄foytámpa jém mitoyajpaap, ¿que inı̄jı̄spa iga Dios miwı̄wadáyı̄pa? Porque jém malopic pı̄xiñtam, jém ichécyajpáppic impuesto, itoypatim jém iamigoyaj. ⁴⁷ Siiga inı̄dioschiiba nada más jém inı̄tı̄witam, ¿que inı̄jı̄spa iga inı̄wı̄watpa? Jém dapic iixpı̄cpa Dios idioschı̄yajpatim jém itı̄witam. ⁴⁸ Siempre wı̄wattaami juuts iwı̄watpa jém tanı̄Jatunı̄ Dios jém itwı̄p sı̄nyucmi.

6

Jutsap tanyoxpát jém tantı̄witam

¹ Odoy nı̄manı̄taayajı̄ iga inı̄watpa juuts ixunpa Dios iga miı̄xyajı̄ñ jém pı̄xiñtam porque siiga inı̄watpa jempic, jesic jém tanı̄Jatunı̄ Dios jém itwı̄p sı̄nyucmi da michiiba jém inı̄coñwı̄yooyi. ² Jeeyucmi manı̄máypa cuando inı̄yoxpátı̄pa jém yaachayajpaap, odoy i anı̄madaayı̄ iga inı̄wı̄watne. Jém malopic pı̄xiñtam, jém nı̄manı̄taayapaap iga icupı̄cyajpa Dios, siiga iwı̄watı̄yajpa, tsam inı̄madayı̄yajpa i quej iga cujı̄ptaiñ. Inı̄matpatim anı̄sı̄cmi y jém sinagoga titam iwı̄watı̄yajpa. Tsam iwı̄anı̄jamyaj iga cujı̄pyajı̄ñ. Numa manı̄máypa iga jeeyaj ipı̄ctsonı̄neyajum jém ı̄coñwı̄yooyi. ³ Cuando inı̄chiiba algun ti jém yaachayajpaap, odoy jı̄ci iga jém anı̄nı̄mı̄pic inı̄ci ijodonı̄ ti iwı̄watpa jém anı̄wı̄mı̄pic inı̄ci. ⁴ Yamwatı̄, jesic tanı̄Jatunı̄ Dios icutum miı̄xpa. Je michiiba jém inı̄coñwı̄yooyi.

Jutsap tanaı̄wejpát Dios (Lc. 11:2-4)

⁵ Cuando inı̄ı̄wejpáttámpa Dios, odoy wattaami juuts iwı̄watı̄yajpa jém nı̄manı̄taayapaap iga icupı̄cyajpa Dios. Tsam iwı̄anı̄jamyajpa iga inı̄wejpátyajpa Dios jém sinagoga o jém calle anı̄naca iga iı̄xyajı̄ñ jém pı̄xiñtam. Numa manı̄máypa iga ipı̄ctsonı̄neum jém ı̄coñwı̄yooyi. ⁶ Pero mimichtam cuando inı̄ı̄wejpáttámpa Dios, tı̄gyı̄ jém inı̄tı̄cjom, anı̄pajı̄ jém inı̄tı̄c, anı̄wejpaati Dios jém miwaganaitwı̄p jı̄t da i miı̄xpa. Dios iı̄xpa itumpı̄y cosa jém inı̄yamwatnewı̄p, michiiba jém inı̄coñwı̄yooyi.

⁷ Cuando inı̄ı̄wejpátı̄pa Dios, odoy nı̄mi jeetim jeetim anı̄matı̄ jém dapic tayoxpátı̄pa juuts iwı̄watı̄yajpa jém tunı̄gac pı̄xiñtam jém iı̄ı̄syajpaap jém tunı̄gac dios jém watnas. Iı̄ı̄syajpa iga imatónı̄yapa jém watnas porque watcı̄y nı̄mpa jeetim jeetim anı̄matı̄. ⁸ Odoy watı̄ jempic juuts iwı̄watı̄yajpa jeeyaj porque tanı̄Jatunı̄ Dios ijodonı̄ titam mitogóyay antes que inı̄wágáypa. ⁹ Jeeyucmi manı̄máypa, cuando inı̄ı̄wejpáttámpa Dios, nı̄mı̄taami yı̄mpic: Manı̄Jatunı̄ Dios, miıtı̄wı̄p sı̄nyucmi, agui cuáyne mich inı̄ı̄yı̄.

¹⁰ Wı̄ iga mı̄ñı̄ñ jém jama iga inı̄ı̄jacpa yı̄p naxyucmi.

Watı̄ yı̄p naxyucmi juuts mich inı̄wı̄anı̄jam, juutstim inı̄watpa sı̄nyucmi.

¹¹ Achı̄ı̄taami yı̄p jama titam anı̄cúttámpa.

¹² Awadaytaami perdón jém antı̄nca juutstim aı̄chtam anı̄wadayñeta perdón jém amalwadayñewı̄p.

¹³ Awattaami cuenta iga odoy i wı̄ı̄ñ acutıtsta iga acmalwattámpa.

Agui miwı̄, manı̄Jatunı̄ Dios.

Mich más mı̄pı̄c mı̄njagooyi.

Inı̄it itumpı̄y jém impı̄mi.

Da nunca micuyajpa. Amén.

¹⁴ Porque siiga inwadáypa perdón jém mimalwadayñewiip, jesiç miwadáypatim perdón jém tanJatun Dios jém itwiip sinyucmi. ¹⁵ Pero siiga da inwadáypa perdón jém mimalwadayñewiip, jesiç tanJatun Dios datim miwadáypa perdón jém inñánca.

Jutsap tanwat jém ayuno

¹⁶ 'Cuando inwattámpa ayuno odoy anyáguiñ inñámooyi juuts iwatyaj jém nimanñtaayapaap iga iixpicyajpa Dios. Odoy nanquejtaji iga inwatne ayuno. Numa mannímáypa iga jeeyaj iniitum jém icoñwiyooyi. ¹⁷ Pero mimichtam cuando inwattámpa ayuno jetstaami inway, jíftaami inwiñpac, ¹⁸ iga jém pixiñtam odoy icutiñyíyíñ iga inwatne ayuno. Jém tanJatun Dios icutum ijodon iga inwatne ayuno, jesiç michiiba jém incoñwiyooyi.

Jém sinyucmic riqueza (Lc. 12:33-34)

¹⁹ 'Odoy anñtuumañwati jáyan riqueza yíp naxyucmi jut icútpa jém wechi, jut tsam jómpa, jut tigiyyajpa jém númyajpaap. ²⁰ Anñtuumañwati jáyan riqueza sinyucmi jut da icútpa jém wechi ni datim jómpa, jut da tigiyyajpa jém númyajpaap. ²¹ Porque jut inñtuumañwatne jém inñriqueza jemtim it inñanama.

Jém tánixcuy tum jucti para jém tammijtay (Lc. 11:34-36)

²² 'Jém inñixcuy jex juuts tum wibic juctianñsoça para jém immijtay. Siiga wi jém inñixcuy, jesiç itumpiy jém immijtay it jém juctianñsoçajom. ²³ Siiga da wi jém inñixcuy, itumpiy jém immijtay it piichcim. Siiga pichñe jém juctianñsoça, tsam pimi piichcim miit.

Da wiap tançuyoxap Dios y jém tumiñ (Lc. 16:13)

²⁴ 'Da i wiap icuyoxa wisten iomi. Porque siiga itoypa tum, jesiç ijóyixpa tungac. Siiga iwñanigáypa tum, jesiç tungac da iwñanigáypa. Da i wiap icuyoxa Dios siiga tsam itoypa jém itumiñ.

Dios iwatpa cuenta jém imanictam (Lc. 12:22-31)

²⁵ 'Jeeyucmi mannímáypa iga: Odoy jisi jut impicpa titam inçútpa ni titam inñucpa para miitpa yíp vida. Odoy jisi jut impicpa jém impuctucu para jém immijtay. Más wi jém invida que jém inwícuy. Más wi jém immijtay que jém impuctucu. ²⁶ Ixi jém jonyaj jém quecpaap. Da ñipyajpa, datim ipinyajpa jém cosecha iga icáypa tum ticjom. Pero icwícpa jém tanJatun Dios jém itwiip sinyucmi. Mich más miwi que jém jonyaj. ²⁷ Siiga tsam inñjisa, ¿que wiap inñyon uxan más?

²⁸ '¿Tiiga tsam inñjisa jut impicpa jém impuctucu? Jistaami jém wibic moya jém nayñewiip copjom. Je da yoxap ni da pitpa. ²⁹ Pero ni jém rey Salomón cuando tsam wicuyajne, da ictsíypa iwí juuts jém wibic moya. ³⁰ Dios tsam iwíaccuyajne jém moya, jém itwiip copjom, pero jomyi jípsquetpa. Mimichtam da inwícupicne Dios, pero je más mitoypa que jém moya. ³¹ Jeeyucmi mannímáypa odoy jisi jut impicpa titam inçútpa y titam inñucpa. Odoy jisi jut impicpa jém impuctucu. ³² Porque jexpic jixi iniit jém ñapic icupicyajpa Dios. Tsam imétsyajpa itumpiy jexpic cosa, pero mimichtam iniit tum inñjatun sinyucmi. Ijodon titam mitogóyay. ³³ Wiñti métstaami jutsap inñtigiya jut injacpa Dios y jutsap inwatta jém witampic cosa juuts ixunpa Dios, jesiç ocmi Dios michiiba titam mitogóyay. ³⁴ Odoy jisi titam mitogóyaypa para jomyi porque jomyi it tiempo iga inñjispatim. Cada jama iniit jém da wibic cosa.

7

Odoy jisi iga tsam táncay jém inñiwí
(Lc. 6:37-38, 41-42)

¹ Odoy jisi tungac pixin iga táncay, jesic Dios datim mijisáypa mich inñáncá. ² Siiga tsam inñispa iga táncay tungac pixin, jesic Dios mijisáypatim mimich inñáncá. Miquípsaytaptim con jeetim quipsóycuy jém impicnewhip iga inquips. ³ ¿Tiiga inñixáypa jém inñiwí tum xutu puchi iixcom? ¿Que da inñampa jém mijpic cuy inñixcom? ⁴ ¿Jutsap inñímáy jém inñiwí iga mantobáypa jém puchi inñixcom cuando michgacti iniittim tum mijpic cuy inñixcom? ⁵ Tsam minimigóyaytap inñaac. Wiñti topi jém cuy inñixcom, jesic inñiwixáypa jém puchi jém inñiwí iixcom.

⁶ Odoy chi jém wibic cosa jém Diospic imichi jém malopic pixinñtam juuts jém chimpayaj. Porque da iwixyajpa jém Dios imichi, mimalwadáypatim mex mimich. Odoy coti jém perla, jém wibic tsa, jut ityaj jém yoya. Wiap icunepnepquetyaj.

Jutsap tampictson titam tatogóyáy
(Lc. 11:9-13; 6:31)

⁷ Wágaytaami Dios titam mitogóyáy, je michiiba. Métstaami jém wítampic cosa, jesic impátámpa. Ticstaami jém tic ipuerta, mínáyaytap. ⁸ El que iwágáypa Dios algun ti, chiitap. El que imétsa jém wítampic cosa, ipátpa. El que iticspa jém tic ipuerta, anáyaytap.

⁹ Siiga miwágáypa immanic tum caxtánañi, ¿que inñchiiba tum tsa? ¹⁰ Siiga miwágáypa immanic tum tiipi, ¿que inñchiiba tum tsañ? ¹¹ Mimichtam tsam mimalotam, pero inñjodon jutsap inñchi immanic jém wítampic cosa. Pero jém tanjatun Dios, jém itwip sinyucmi, je da malo; ichiiba jém imanictam jém wítampic cosa jém iwágaypápic.

¹² Jesic mimichtam wíwadaytaami jém tungac pixinñtam juuts mimichtam inñxunpa iga miwíwadáypatim mex jeeyaj. Siiga inñwattámpa jempic, jesic cupacpa itumpiy jém Moisés inñquímayooyi con jém anñati ijaychacnewhip jém wiñicpic Dios inñmatciwiñ.

Jém wayappic puerta
(Lc. 13:24)

¹³ Tigiytaami jém wayappic puerta. Porque wíti jém puerta y tsam wíti jém tun jém nicpápic jut togoyajpa jém pixinñtam. Tsam jáyan nicyajpa jem. ¹⁴ Wayay jém puerta y wayaytim jém tun jém nicpápic jut ipictsonyajpa jém vida jém dapic cuyajpa. Da wati jém pixinñtam ipátayajpa jém tun iga tigiyajpa jem.

Ixpictap jém cuy por jém itim
(Lc. 6:43-44)

¹⁵ Nawattaji cuenta iga odoy mimigóyáyñ jém malopic pixinñtam, jém nimanñtaayapaap iga icuyoxap Dios. Miñpa juuts tum wibic pixin, pero miñpa imalwadáy jém Dios ipixinñtam. Juuts jém lobo icunumpa jém borrego. ¹⁶ Mimichtam wiap inñixpicta juutspic pixin cuando inñixtámpa ti iwatpa. Mich inñjodon iga da tantúcpa wibic uvas chicxchayyucmi. Da tantúcpa tsuj apitcuyyucmi. ¹⁷ Jém wibic cuy da chióypa malopic tim. Jém malopic cuy da chióypa jém wibic tim. ¹⁸ Jém wibic cuy da wiap ichiáy jém malopic tim. Jém malopic cuy da wiap ichiáy jém wibic tim. ¹⁹ Itumpiy jém cuy, jém dapic chióypa jém wibic tim, tinquímtap. Nooquettap juctjom. ²⁰ Jesic mimichtam inñixpictámpa juutspic pixin cuando inñxpa siiga iwíwatpa o imalwatpa.

Da itumpiy tigiyapa jut injacpa Dios
(Lc. 13:25-27)

21 'Wati jém p̄ixiñtam anímayyajpa iga: “Mán̄omi, mán̄omi”, pero da itump̄iy tigiyayjpa jūt injacpa Dios. Nada más tigiyayjpa jém iwatneyajw̄ip juuts ixunpa tanJatuj Dios jém itw̄ip siñyucmi. 22 Cuando núcpa jém jama, jesic jáyan jém p̄ixiñtam anímayyajpa: “Mán̄omi, mán̄omi, ¿que da anañmatta jém Dios in̄māti mich iññiȳimi, que da antopta jém mal espíritu mich iññiȳimi, que da an̄watta jáyan jém w̄ib̄ic milagro mich iññiȳimi?” 23 Jesic ich annímáypa jeeyaj: “Da mán̄ixpicpa. Nicstaami mimichtam, tsam immalwatneta.”

Jém wisten tic ibase

(Mr. 1:22; Lc. 6:47-49)

24 'Jém p̄ixiñ imaton̄pa ich anañmāti y iwatpa juuts annímáypa jex juuts tum p̄ixiñ tsampic j̄ixīy iga iwatpa tic. Icp̄im̄ap tum tsaayucmi. 25 Ocmi tsam p̄imi chijóypa tuj. Compa jém ni. Tsam p̄imi poypa jém sawa. Ictsiypa jém tic, pero da cutīpa porque p̄imane tsaayucmi. 26 Tun̄gac imaton̄pa ich anañmāti, pero da iwatpa juuts annímáypa. Je jex juuts tum p̄ixiñ ðapic j̄ixīy. Iwat tum tic, pero icp̄im̄ap pooyucmi. 27 Ocmi tsam p̄imi chijóy tuj, compa ni, p̄imi poypa jém sawa. Ictsiy jém tic, iccutīñ, da ti ts̄iy.

28 Jesic cuando yaj in̄mat Jesús jém in̄químayooyi tsam ipooñanj̄amyajpa jém p̄ixiñtam, 29 porque in̄quejáypa juuts tum an̄jagooyi da jex juuts jém escribasp̄ic maestroyaj.

8

Jesús icp̄is tum p̄ixiñ jém iniitw̄ip jém lepra caacuy

(Mr. 1:40-45; Lc. 5:12-16)

1 Cuando quet Jesús jém c̄otsicyucmi, itún̄iyyaj jáyan jém p̄ixiñtam. 2 Jesic miñ tum p̄ixiñ tsam mimne, cupúgayñe iñ̄aca, iniit jém lepra. Icosteeñáy jém Jesús. N̄impa jém mimnew̄ip:

—Mán̄omi, siiga in̄w̄ian̄jam, w̄iap anacp̄is.

3 Jesic Jesús ichiccunúc jém p̄ixiñ, iñímáy:

—An̄w̄ian̄jam. Micuáyñeum.

Jesic yaj n̄imi jém Jesús, pisum jém p̄ixiñ, w̄its̄iyum jém iñ̄aca. 4 Jesic Jesús iñímáy jém p̄ixiñ:

—Odoy i an̄madaayi iga ich manacp̄is, pero n̄igi an̄quejaayi jém pan̄ij iga michacneum jém caacuy. Jesic ch̄i Dios jém ofrenda juuts n̄impa jém Moisés in̄químayooyi iga miix̄tap iga n̄uma mip̄isneum.

Acp̄ist̄a jém capitán imozo

(Lc. 7:1-10)

5 Jesic núc Jesús jém atebet Capernaum. Tum Romap̄ic capitán icunúc Jesús, moj icunucsáy. 6 N̄impa jém capitán:

—Maestro, mimne actīñ tum woñ̄jych̄ixi anticc̄im, tum jém an̄cuyoxapaap. Tusacane icumuma. Tsam p̄imi yaach̄ap ix̄i.

7 Jesús iñímáy:

—Nicpa anacp̄is.

8 N̄impa jém capitán:

—Maestro, da w̄i iga miñ̄icpa anticc̄im porque mich agui w̄ib̄ic mip̄ixiñ, ich tsam at̄añcaíy. Nada más p̄im̄iyyi jém caacuy iga ichaguiñ jém an̄cuyoxapaap, jesic p̄ispa. 9 Porque ich anaittim tum anañjagooyi iga ap̄im̄iypa. Ich anaittim soldado jém amp̄im̄iypaap. Siiga annímáypa jém ansoldado iga n̄iguiñ, jesic tienes que nicpa. Siiga annímáypa iga miñ̄iñ, jesic tienes que miñ̄pa. Siiga amp̄im̄iypa tum jém acuyoxapaap iga iwadiñ alguna cosa, jesic tienes que iwatpa.

¹⁰ Jesic mimaton jém Jesús junimpa jém capitán, agui ipooñanjam. Iñímáy Jesús jém itúnjyayjaap:

—Numa mannímáypa, icuwíti tannación de Israel da ampát ni tum pxiñ wíap icupic Dios juuts yíp capitán. ¹¹ Mannímáypatim iga tsam jáyan pxiñtam jém dapic je de Israel miñyajpa jutquej yíp naxyucmi. Miñyajpa anñisaumipic y anyomsaumipic. Iwaganacoñyajpa jém wiñcpic anmatcwiñ jém Abraham, Isaac y Jacob jut injacpa Dios. ¹² Pero wati jém Israelpic pxiñtam jém iniitwip derecho iga tigíypa jut injacpa Dios, quebacputyajtap. Tsacyajtap anñicmi jém piichcím. Jemum tsam weyjajpa, tsam iñichyajpa ítits.

¹³ Jesic Jesús iñímáy jém capitán:

—Nicsim iñicmi. Mich inçupic iga Dios miwadáy juuts mich iñxunpa. Jempam iwat. Jeeti hora pisum jém icuyoxapaap.

Pis jém Peto imidapa

(Mr. 1:29-31; Lc. 4:38-39)

¹⁴ Cuando núc Jesús jém Peto iticcím, iix iga wone icheesmi jém Peto imidapa. Tsam pimi jawañy. ¹⁵ Jesic Jesús ichigáy jém yomo ici. Ichac jém jawañ, jeeti rato tsucum, moj icwícyaj jém Jesús con icuyujcwiñ.

Jesús icpis jáyan jém mimneyajwip

(Mr. 1:32-34; Lc. 4:40-41)

¹⁶ Jesic piichawum iti, jém pxiñtam inimíñayyaj Jesús jáyan jém iniitwip jém mal espíritu. Itop jém mal espíritu, nada más ijíyáypa iga pudiñ. Icpis itumpiy jém mimneyajwip. ¹⁷ Jempam iwat Jesús iga cupacpa jém anmatí juuts ijaychacne jém wiñcpic anmatcwiñ jém Isaías. Nimpa: “Je iyaac ipictson taichtam tancaacuy. Ipictson itumpiy jém yaachaji.”

Wati itúnjytooba Jesús

(Lc. 9:57-62)

¹⁸ Jesic cuando iix Jesús iga antuumayajpa tsam jáyan pxiñtam, iñímáy jém icuyujcwiñ:

—Tanictámpa jém laguna anwiñtuc.

¹⁹ Jesic miñ tum jém escribaspic maestro. Iacunuc jém Jesús, iñímáy:

—Maestro, mantúnjyapa jutquej jut miñicpa.

²⁰ Jesús iñímáy jém pxiñ:

—Jém zorra iniit ijos jut monpa. Jém jon iniittim ipeeñi. Pero ich, jém aMiññewip Siñyucmi, da anaj jut anaczejpa ançobac.

²¹ Jesic tunçac jém icuyujcwiñ iñímáy jém Jesús:

—Mánomi, ajígaayi iga wiñti nicpa ançum jém anjatun. Ocmi mantúnjyapa.

²² Pero Jesús iñímáy:

—Miñi atúnjyayi. Tsaci jém caaneyajwip iga nacumyajtap jeeyaj.

Jesús icteeñanjacpa jém sawa y jém nipoa

(Mr. 4:35-41; Lc. 8:22-25)

²³ Jesic Jesús tigíy tum barcojom. Tigíy tim mex jém icuyujcwiñ. ²⁴ Ocmi moj poyi jém sawa jém laguna. Tsam pimi poypa hasta tigíypa ni jém barcojom. Pero monpa Jesús.

²⁵ Jesic jém icuyujcwiñ nic ichicyus. Iñímayyaj:

—Mánomi, aciacputtaami porque tacumonjampam nñicím.

²⁶ Jesic Jesús iñímáy:

—¿Tiiga tsam micñtámpa? ¿Que da inçupicpa ni uxañ iga Dios miyoxpátpa?

Jesic tsucum Jesús, iñímáy jém sawa y jém niipoa iga teeñanjaguiñ. Jesic teeñanjac jém sawa y jém niipoa. Dam ti tsigóypa. ²⁷ Jém icuyujcñwiñ agui ipooñanjamyaj. Nanímayyajtā entre jeeyaj:

—¿Iapaap yíp pñxiñ iga iñímáy jém sawa y niipoa iga teeñiñ y icupicpa?

Jém Gadarapic pñxiñ jém imatsnewñp jém mal espíritu
(Mr. 5:1-20; Lc. 8:26-39)

²⁸ Jesic cuando núc Jesús jém laguna añwiñtuc jém naxyucmi de Gadara, ipát wisten pñxiñ jém imatsnewñp jém mal espíritu. Putyaj jém camposanto, icunúcyaj Jesús. Tsam pñimi maloyaj juuts tum jimñi animat. Tsam pñimi icñyaypa jém ityajwñp jem, da i wiap iñas jém tunjom. ²⁹ Jesic pñimi jyyaypa jém wisten. Nimyaj:

—¿Tiiga mitigycúmpa con aichtam? Mich miJesús jém Yucmipic Dios miManic. ¿Que mimiñ yim iga anyaachwattampa antes que danam núcpa jém iñanpñic jama?

³⁰ Jesic da más juumi ityaj tsam jáyan yoya. Wícpa ixñiyaj. ³¹ Jesic jém mal espíritu icunucsáy jém Jesús. Nimpa:

—Siiga antoptampa, ajigaytaami iga atigypa jém yoya iñanamanjom.

³² Jesic Jesús iñímáy:

—¡Nicsim!

Jesic putyajum jém mal espíritu. Tigyyaj jém yoya iñanamanjom. Jesic póyan̄tsucumyay jém yoya. Poyimi quetyaj jém tejayucmi, actñyay jém laguna, jicjiccayaj niñim.

³³ Tsam pñimi ichiganjécyaj jém iwatyajpáppic cuenta jém yoya. Poyimi nicyajpa iticmi. Cuando núcyaj, moj inmadayyaj los demás ti iñasca jém imatsnewñp idic jém mal espíritu. ³⁴ Jesic itumpiy jém ityajwñp jém atebet, nic iámyaj jém Jesús. Cuando iixyay, icunucsayyajpa iga cáyiñ de jém naxyucmi de Gadara.

9

Acpistap tum pñxiñ tusacanewñp
(Mr. 2:1-12; Lc. 5:17-26)

¹ Jesic tigiy Jesús tum barcojom, eybic jac jém laguna añwiñtuc. Nic iticmi. ² Jesic algunos inimiñayyaj Jesús tum mimnewñp, tusacane icumuma. Wone tum tseesyucmi mu inimiñyay. Cuando Jesús iix iga tsam icupicyajpa iga Dios wiap icpñs, jesic iñímáy jém mimnewñp:

—Manic, maymáyañi, miwadayñeta perdón jém iñtáñca.

³ Ittim jem jutēn escribapñic maestroyaj. Ijñsyajpa ijñxianjom: “Yíp pñxiñ icujypa tanDios.” ⁴ Pero Jesús ijōdoñ ti sñp ijñsyaj, jesic iñímáy:

—¿Tiiga iniit jém malopñic jñxi iñanamanjom? ⁵ ¿Júp más da táñca iga annímáypa yíp pñxiñ iga: “Manaccáyáypa iñtáñca”, o iga annímáypa: “Tsucumi, wñtim”? ⁶ Nñmtim Jesús:

—Pero iga iñjōdōñata iga jém Miññewñp Sñnyucmi iniit jém ipñmi iga wiap iccáyáy jém pñxiñ itáñca yíp naxyucmi (jesic iñímáy Jesús jém tusacanewñp): Tsucumi, pññim jém iñchees, nicsim iññicñim.

⁷ Jesic tsucum jém pñxiñ, nñcum iticñim. ⁸ Cuando iixyay jém pñxiñtam ti iwat Jesús, tsam cñnyaj, icujípyajpa Dios iga icutsat yíp naxyucmi jém ipñmi.

Jesús inwejay jém Mateo
(Mr. 2:13-17; Lc. 5:27-32)

⁹ Jesic moj nñqui Jesús. Iix iga jemum coñ jém calle aññaca tum pñxiñ ichécpa jém impuesto. Iññyi Mateo. Jesic Jesús iñímáy:

—Atñññyi.

Tsucum jém Mateo, nic itñññy jém Jesús.

¹⁰ Jesic ocmi iganam wícpa Jesús jém Mateo iticcim, núcyaj jáyan jém ichécyajpaap impuesto con tungac jém táncaywip. Miñ iwaganacoñyaj jém Jesús con jém icuyujcwiñ.

¹¹ Jesic cuando jém fariseoyaj iixyaj ti iwat jém Jesús, iñimayyaj jém icuyujcwiñ:

—¿Tíiga wagawícpa jém immaestro con jém ichécyajpaap impuesto y jém tungac táncaywip?

¹² Cuando imaton Jesús ti nimyajpa, iñimáy jém fariseoyaj:

—Jém dapic mimne da ixunpa jém tsóyoyopaap, pero jém mimneyajwip ixunpa jém tsóyoyopaap. ¹³ Nigi cuyujcai ti nimtooba jém Dios inmati jut jaychacneta: “Más wi iga iñtóiñ jém iñtíwítam que iga inwatpa jém sacrificio.” Jesaptim aich da miñ amméts jém dapic táncay. Miñ amméts jém táncaywip iga icucacyajñ jém ijxi.

Jématpa Jesús de jém ayuno

(Mr. 2:18-22; Lc. 5:33-39)

¹⁴ Jesic miñyaj jém Xiwan icuyujcwiñ jém acchíoyopaap. Miñ icwácyaj jém Jesús. Nimyaj:

—¿Tíiga aichtam con jém fariseopic pixiñtam tsam anwattámpa ayuno, pero mich inucuyujcwiñ da iwatyajpa ayuno?

¹⁵ Jesús icutson. Nimpa:

—¿Que wiap inyácneyaj jém anwejayñetawip jut it tum ancoomíoyocuy iganam it jém yoomiypaap? Pero núcpa jama cuando accáytaap jém yoomiypaap, jesic numa iwatyajpa ayuno.

¹⁶ Jesic Jesús inquejáytim iga jém jomipic anquímayooyi da iwínanigáypa jém wiñicpic jxi. Nimpa:

—Da i intótspa tum pecapic yooti con tum jaca jompuctucu. Porque siiga iwatpa jempic, nianxichpa jém jomipic puctucu, más pimí jacpa jém pecapic puctucu jut antótsne.

¹⁷ Da i icucompa jomvino jém pecapic cuero bolsajom. Porque siiga jempic iwatpa, to-jansajpa jém pecapic cuero bolsa, cutegáypa jém vino, togoypa jém cuero bolsa. Jeeyucmi cucomtaap jém jomvino jém jomipic cuero bolsajom, jesic da togoypa jém bolsa ni jém vino.

Jém Jairo iyommanic y jém yomo jém ichigaywip jém Jesús ipuctucu

(Mr. 5:21-43; Lc. 8:40-56)

¹⁸ Iganam inmatpa Jesús, núc tum Israelpic anjagooyi. Icosteeñáy jém Jesús. Iñimáy:

—Yaguiñ ca jém anyommanic. Nigi tsiccunuuci jém anyommanic iga pixiñ.

¹⁹ Tsucum Jesús. Iwagananicyaj jém anjagooyi con jém icuyujcwiñ. ²⁰ Iganam niquiyaj, tum yomo icunuc jém Jesús ituuñiancim. Tsam mimne. Doce amtíy imatsne jém caacuy iga quetpa iñipiñ, da nunca teñpa. Ichigáy jém Jesús iyooti inaca. ²¹ Ijspa jém yomo ijixianjom. Nimpa: “Siiga nada más antsigáypa jém iyooti, jesic apispa.” ²² Jesic ámsset Jesús, iix jém yomo. Iñimáy:

—Miyomo, odoy cñi. Tsam incupicpa iga Dios wiap micpis, jeeyucmi mipisneum.

Jeeti rato pisum jém yomo.

²³ Cuando núc Jesús jém anjagooyi iticcim, iix iga it jém susyajpaap iga nicpa icumta. Agui anyácneyaj jém pixiñtam. Agui weyjajpa. Tsam it bulla. ²⁴ Iñimáy Jesús jém ityajwip jém:

—Mimichtam puttaami ansicmi. Da nunta caane yíp woñi. Nada más monpa.

Pero tsam ixiccayajpa jém Jesús.

²⁵ Cuando cupudayyaj, jesic tigiy Jesús jém ticjom. Imatsáy jém woñi ici, tsucum jém woñi. ²⁶ Jesic icuwiñti jém naxyucmi jodónata ti iwat jém Jesús.

Jesús icpis wisten cáchí

²⁷ Jesic nic Jesús. Nas jut it wisten cáchtí. Moj itúnıyyaj. Pimi anweyjajpa. Nimyaj:
—Mich mirey David mimanic, ayaachanjami.

²⁸ Cuando tigiyne Jesús tum ticjom, tigiyajtim jem cáchtí. Icunúcyaj Jesús. Jesic Jesús moj icwác jem cáchtí. Inimáy:

—¿Que incupictámpa iga ich awiap?

Nimyaj jem cáchtıyaj:

—jı, mánomi!

²⁹ Jesic Jesús ichigáy iixcuy jem wisten cáchtí. Inimáy:

—Sip manwadáypa jempic porque mich tsam incupicpa iga Dios wıap miyoxpát.

³⁰ Jesic toj jem cáchtí iixcuy. Wıtsıyum. Jesic duro inquımpa Jesús iga odoy i inmadayıñ. Inimáy:

—Odoy i anmadaayi iga manacpis.

³¹ Pero cuando nicneyaj jem cáchtıpic idic, inmadayajpa i quej ti iwat Jesús icuwıti jem naxyucmi.

Jesús icpis tum uma

³² Cuando yaj nıquıyaj jem cáchtıyaj, namıñayta Jesús tum uma. Inıit tum mal espıritu jem pıxiñ. ³³ Cuando tobayta jem mal espıritu mojum jıyi jem uma. Agui ipooñanjımyaj jem itıyajwıp jem. Nimyaj:

—Da queman tánix yıcxpic cosa yıp naxyucmi Israel.

³⁴ Pero jem fariseoyaj tsam jóyneyaj. Nimyaj:

—Yıp pıxiñ wıap itop jem mal espıritu porque inıit jem Wocciwiñ ipımi.

Jesús iyaachanjampa jem pıxiñtam

³⁵ Nic Jesús itumpıy jem atebetyaj y jem tıganjoj. Accuyujóypa jem sinagoga jut icuyucayajpa jem Moisés inquımayooyi. Inmadáypa jem miñneyajwıp jutsap itıgıyyaj jut injacpa Dios. Icpis itumpıy jem mimneyajwıp y jem inıitwıp wıti jem caacuy. ³⁶ Pero cuando iix Jesús iga tsam jáyan miñneyaj, agui iyaachanjampa porque tsam yaachaneyaj, agui uuguayajtim juuts jem borregoyaj cuando da i iwatne cuenta. ³⁷ Jesic inimáy Jesús jem icuyucıwiñ:

—Nıma, juuts tum mıjpic cosecha, tsam jáyan jem pıxiñtam icupictooba Dios, pero jem yoxacıwiñ, jem inmatıyajpıppic jem Dios inmatı, da wıti. ³⁸ Jeeyucmi mannımaypa, wágaytaami jem cosecha iQmi iga icutsadıñ jáyan jem yoxacıwiñ iga ipınyajpa jem cosecha.

10

Jesús icupıj jem doce icuyucıwiñ

(Mr. 3:13-19; Lc. 6:12-16)

¹ Jesic Jesús inwejay jem doce icuyucıwiñ. Ichi jem pımi iga wıaiñ itopyaj jem mal espıritu y iga wıaiñ icpısyaj itumpıy jem mimneyajwıp y jem imatsnewıp caacuy.

² Yıpyaj inııyi jem doce icuyucıwiñ jem apóstolyaj: Wıñtı jem Xımoj, inııyıtım Peto; jem Anti, jem Peto itıwi; jem Jacobo, jem Zebedeo imanic; jem Xiwan, jem Jacobo itıwi; ³ jem Felipe; jem Bartolo; jem Tomax; jem Mateo, jem ichécpaap idic impuesto; jem Jacobo, jem Alfeo imanic; jem Tadeo; ⁴ jem Xımoj, jem itwıp con jem partido cananista; jem Judas Iscariote, jem iwadaypaap atraición Jesús.

Cutsatyajta iga inmatıyajpa Dios inmatı

(Mr. 6:7-13; Lc. 9:1-6)

⁵ Jesic Jesús icutsat jem doce icuyucıwiñ iga inmatıyajıñ jem wıbıc anmatı. Inimáy ti wıap iwatyaj. Nımayajta:

—Odooy nictaami jut it jém tungac pixiñtam jém dapic je de Israel. Odooy tigiyaami jém Samariapic iatbeteyaj. ⁶ Más wí iga miñictamiñ jut it jém Israelpic borregoyaj jém togoyñewiip. ⁷ Iganam miñicpa, anmati iga noco it jém tiempo iga Dios injacpa yíp naxyucmi. ⁸ Acpistaami jém cupúgayñewiip iñaca con itumpiy jém mimneyajwiip. Acpistaamitim jém caanewiip. Tobaytaami jém mal espíritu jém iniitwiip jém pixiñtam ianamanjom. Da mantségay cuando manchiita ampimi, jesic odooy tséctaami cuando inicpisa.

⁹ Odooy nanictaami tumiñ; ni plata, ni oro, ni cobre imbolsajom. ¹⁰ Odooy nanictaami immorral, ni wisten iñyoofí, ni tungac inçiac, ni imbastun, porque jém yoxaciwiñ wí iga chiitap jém iwíccuy.

¹¹ Cuando miñúctampa tum atebet o tum xutu tiganjoj, métstaami tum wibic pixiñ jut miñúctampa. Jemum tsíyaami hasta que miñictampa tungac tiganjoj. ¹² Cuando mitigiytampa tum ticjom, dioschi jém ityajwiip jem. Wágaayi Dios iga ichiñ bendición. ¹³ Siiga wibic pixiñ ityaj jém ticjom, jesic Dios ichiiba jém bendición. Pero siiga malopic pixiñ ityaj jém ticjom, jesic Dios da ichiiba bendición. ¹⁴ Siiga da mipictsonpa ni da imatontooba titam ininmadáypa, jesic cuando miputtampa jém ticjom o jém tiganjoj, cunebaayi jém impuy ipótpót iga quejiñ iga da i mipictson. ¹⁵ Numa mannímáypa cuando núcpa jém jama iga Dios ichiiba castigo jém malopic, jesic más mijpic castigo chiitap jém dapic ipictson ich ananquímayooyi que jém ityajwiip jém atebet de Sodoma y Gomorra.

Nímayyajtá jém doce iga tsam malwadaytap

¹⁶ Amatontaami. Mimichtam mancutsatpa juuts tum miborrejo jut tsam it jém pajo. Wí iga agui mijáyayanjichich juuts tum tsañ. Pero naiftaami jém wibic jixi juuts tum cuucu dapic malo. ¹⁷ Nawattamtaji cuenta porque jém malopic pixiñ tsam mimatstooba, micijunotpa jém Sanhedrín icijjom. Micótstap jém sinagoga. ¹⁸ Mininictamtap hasta jém más mijpic anjagooyicim hasta jut it jém gobernador y hasta jut it jém reyyaj ich ançuyucmi. Jempigam wiap ininmadáy ich ananmati jém anjagooyiyaj y itumpiy jém tungacpic pixiñtam jém dapic je de Israel. ¹⁹ Pero cuando mininictamtap jém anjagooyicim, odooy jisi jutsap inçutsonja jém anjagooyi o ti iññímáypa porque jeeti rato Dios michiiba jixi jutsap inçutson jém anjagooyi. ²⁰ Cuando inçutsonpa da mimichtam mijyapa. Jyapa jém Dios iAnama, michiiba jixi, jesic wiap inçutson jém anjagooyi.

²¹ Núcpa jama iga algunos iwadáypa atracción jém iñuntatiwi iga accaataiñ. Jém jatunpic iwadáypatim atracción jém imaníc. Jém manicpic iwadáypa atracción jém ijatun o jém iapa iga accaataiñ. ²² Itumpiy jém pixiñtam tsam mijóyixpa ich ançuyucmi. Pero siiga iñyaachíypa cuando miyaachwattap y da iñchacpa ich ananmati hasta jém inanpigam jama, jesic miciaçputpa Dios. ²³ Cuando miyaachwattap tum atebet, jesic poytaami, nictaami tungac atebet. Numa mannímáypa iga antes que da yajpa iññasca jém tiganjoj de Israel, núcpa jém Miññewiip Siñyucmi.

²⁴ Tum maestro icuyujciwiñ da wiap iñasca jém imaestro. Tum esclavo da wiap iñasca jém iomi. ²⁵ Itum wí siiga jém maestro icuyujciwiñ tsíy juuts jém imaestro, siiga jém esclavo tsíyapa juuts iomi. Siiga nímaytap jém jatunpic iga Beelzebú, jesic malnímaytapim jém ityajwiip iticcim.

I wiap tançij (Lc. 12:2-7)

²⁶ Odooy çinçtaami jém malopic pixiñtam. Dios inquejpa itumpiy jém jixi jém anyamnewiip. Jodónatap itumpiy jém jixi jém anécnewiip. ²⁷ Titam manyamnímáypa, mimichtam

añmattaami jém p̄ixiñtámanj̄om. Titam manyamnímáypa, añmattaami jutquej iga imatonjajiñ itumpiy jém p̄ixiñtam. ²⁸ Odoy c̄iñtaami jém p̄ixiñ jém wiapaap miccaáy jém immijtay porque jém íñanama da wiap miccaáy. Más wi iga in̄c̄iñtámpa Dios jém wiapaap miccaáy immijtay y jém íñanama icotpa jém juctj̄om jut da nunca p̄ichpa.

²⁹ 'Maytap wisten xuxut jon por tum centavo, pero ni tum de jém jonyaj da cutiñpa naxyucmi siiga jém tanjatun Dios da ijícpa. ³⁰ Dios imayñe itumpiy jém inway jutēn iniit jém in̄cobacyucmi. ³¹ Jeeyucmi mannímáypa, odoy c̄iñtaami. Más mitoypa Dios que jém xuxut jonyaj.

Jém dapic in̄nécpa iga icupicpa Cristo
(Lc. 12:8-9)

³² 'Itumpiy jém inmatyajpáppic jém p̄ixiñtámanj̄om iga acupicpa, jesic ampictsonpa siñyucmi jém anjatun Dios iwiñj̄om. ³³ Pero siiga tum p̄ixiñ in̄nécpa iga acupicpa jém p̄ixiñtámanj̄om, jesic da ampictsonpa siñyucmi jém anjatun Dios iwiñj̄om.

Nawécyajtap jém p̄ixiñtam jém Cristo icuyucmi
(Lc. 12:51-53; 14:26-27)

³⁴ 'Odoy j̄isi iga amiñ ȳip naxyucmi iga ananj̄iyjacpa jém añayajpáppic. Da anamiñ jém paz, anamiñ jém espada. Ich añcuyucmi tsam añayajpa ȳip naxyucmi p̄ic. ³⁵ Ich miñ anactsucum iga añayajiñ tum p̄ixiñ con ijatun, iga añayajpa tum yomo con iapa, iga tun̄gac yomo añayajpa con ixaqui. ³⁶ Jém ityajw̄ip in̄t̄icj̄om tsíyyajpa iga íñenemigoyaj.

³⁷ 'Siiga más in̄toypa in̄jatun o in̄apa que antoypa aich, da wiap in̄ch̄iy juuts ich mamm̄ichi. Siiga más in̄toypa jém in̄jaymanic o in̄yommanic que antoypa aich, da wiap in̄ch̄iy juuts ich mamm̄ichi. ³⁸ Jém dapic ijícpa iga yaachwattap juuts ich ayaachwattap y atún̄j̄yapa, da tsíyapa juuts ich amm̄ichi. ³⁹ Siiga tum p̄ixiñ tsam ij̄ispa jém ivida iga odoy togóyñ, jesic togoypa jém ivida. Pero siiga togoy tum p̄ixiñ ivida ich añcuyucmi, jesic iniitpa jém ivida.

Chiijajtap wibic coñw̄iyooyi jém ipictsonpáppic jém Dios in̄mátc̄iwiñ
(Mr. 9:41)

⁴⁰ 'Jém mipictsonpaap mimichtam, apictsonpatim aich. Jém apictsonpaap aich, ipictsonpatim jém anjatun Dios jém acutsatnew̄ip ȳip naxyucmi. ⁴¹ Jém ipictsonpaap tum jém Dios in̄mátc̄iwiñ porque icutsat Dios tienes que ipictsonpatim jexpictim coñw̄iyooyi juuts ipictsonpa jém Dios in̄mátc̄iwiñ. Jém ipictsonpaap tum wibic p̄ixiñ iga iw̄iwadáypa, je tienes que ipictsonpatim jexpictim coñw̄iyooyi juuts ipictsonpa jém wibic p̄ixiñ. ⁴² Siiga i ichiiba tum taza pagac ni tum jém añcuyujc̄iwiñ ich añcuyucmi, numa mannímáypa iga je ipictsonpa tum wibic coñw̄iyooyi.

11

Jém Xiwan jém acch̄iñoypaap
(Lc. 7:18-35)

¹ Jesic cuando yaj in̄ímáy Jesús jém doce icuyujc̄iwiñ ti wiap iwatyaj, moj niqui Jesús. Nic in̄quejáy jém p̄ixiñtam itumpiy jém atebetyaj jém naxyucmi de Galilea. Inmadáy jém Dios in̄máti.

² Jém Xiwan jém acch̄iñoypaap pajnetā cárcel. Cuando imaton̄ ti iwat jém tán̄omi Cristo, jesic icutsat wisten jém icuyujc̄iwiñ iga niguiñ icwácyaj Jesús. ³ Cuando núcyaj jut it Jesús, moj icwácyaj. N̄imyaj:

—¿Que micham jém miCristo jém miñpaap ȳip naxyucmi o ananj̄óctámpa tun̄gac?

⁴ Jesús icutson̄. In̄ímáy:

—Nigi nímaayi jém Xiwan ti íñixñeta y ti immatoñeta. ⁵ Anmadaytaami iga ixixóypam jém cáchtí, witpam jém cuxujpic idic, pisneum jém cupúgayñewiip idic íñaca, matóñóypam jém chajca, pisneum jém caaneyajwiiip idic y jém yaachayajpaap ipictsonyay jém wibic anmafi iga Dios iciacputpa. ⁶ Agui maymay jém pixiñ jém dapic ijícpa iga i ictsacpa ich anmafi.

⁷ Cuando nicyaj jém Xiwan icuyujcwiñ, jesic jém Jesús moj inmadáy jém pixiñtam iga wibic anmatcwiñ jém Xiwan. Nímayyajta:

—¿Tí oy íñámta jém titsinaxyucmi? ¿Que oy íñámta tum pixiñ dapic wiaap juuts tum poc jém aguipic ictsigóypa sawa? Da je. Oy íñámta tum pixiñ wiaapaap. ⁸ ¿Que oy íñámta tum pixiñ agui wicuyajne? Da je. Tanjodonam iga jém wicuyajnewiip ityaj jém rey iticcim. ⁹ ¿Que ti oy íñámta jém titsinaxyucmi? ¿Que oy íñámta tum Dios inmatcwiñ? Numa tum anmatcwiñ más wiaap que itumpiy jém wiñicpic anmatcwiñ. ¹⁰ Nimpa jém Dios inmati ti iwatpa jém Xiwan:

Dios icutsatpa tum anmatcwiñ iga iwitsagáypa jém Cristo itun.

Jém anmatcwiñ anjagoyñeeba íñic.

Ocmi ituuñiancim miñpa jém Cristo.

¹¹ Numa mannímáypa iga icuwiti yíp naxyucmi da i tunjac pixiñ más wiaap que jém Xiwan jém acchíoypaap. Pero cuando núc jém tiempo iga injacpa Dios, jém más xutupic jém Dios ipixiñtam más wiaap que jém Xiwan.

¹² Dende núc jém Xiwan, jém acchíoypaap, hasta siip jém pixiñtam tsam tigiyajtooba pimimi jut injacpa Dios. ¹³ Jém Moisés inquímayooyi con itumpiy jém wiñicpic anmatcwiñ inmatyay ti miñpa. Cuando núc jém Xiwan, moj iccupac ti nim jém anmatcwiñ. ¹⁴ Yíp Xiwan, jém acchíoypaap, jeetim jém Elías jém miñpáppic; siiga michtam incupicpa. ¹⁵ Siiga mitatsigiyta, matonataami.

¹⁶ Siip manaquejáypa juuts ti jém pixiñtam jém ityajwiiip siip. Jex juuts jém tsixtam jém michyajpáppic plaza. Íñimayyajpa jém iamigoyaj: ¹⁷ “Mansusáypa jém flauta, pero da mietstampa. Ocmi manwánáypa jém wañi anyácnewiip, pero datim miwejtampa.” ¹⁸ Porque cuando miñ jém Xiwan, da icútpa caxtánañi ni da iucpa vino, pero mimichtam miñimtampa iga iniit tum mal espíritu. ¹⁹ Ocmi ich anyaac amiñ sinyucmi. Awícpa, ánucca jém vino, pero mimichtam miñimtampa iga tsam awícpa, tsam ánucca jém vino y tsam ánamigo jém malopic pixiñtam con jém ichécyajpaap impuesto. Quejpa iga wí jém jixi siiga wiputpa jém yoxacuy.

Jém attebetyaj jém dapic icupicyajpa

(Lc. 10:13-15)

²⁰ Jesic jém Jesús moj iwogáy jém ityajwiiip jém attebetyaj jut oy iwat jáyan jém milagro porque jeeyaj da ichacyaj iga imalwatyajpa. Nimpa Jesús:

²¹ —¡Agui miuuguytim mimichtam miitwiiip jém attebet Corazín! Agui miuuguytim mimichtam miitwiiip jém attebet Betsaida. Jém ityajwiiip jém attebet Tiro y Sidón da iixñeyaj jém milagroyaj juuts siip íñix. Pero meega iixñeyaj, pecam ichacneyaj jém imalajixi, agui anyácneyaj iga táñcaiy. ²² Jeeyucmi mannímáypa, cuando núcpa jém jama iga Dios iciipinpa yíp naxyucmic pixiñtam, jesic más pimi michiitap castigo mimichtam que jém ityajwiiip jém attebet Tiro y Sidón. ²³ Mimichtam miitwiiip jém attebet Capernaum tsam micujípyajpa jém pixiñtam, pero tienes que mininictamtap jém piichcim jut it jém caaneyajwiiip. Porque meega anwatne jém milagro jém attebet Sodoma juuts anwatne mimichtamanjom, jesic da idic togoypa jém attebet hasta siip. ²⁴ Numa mannímáypa iga cuando núcpa jém jama iga cipíjópca Dios, más pimi michiitap castigo mimichtam que jém ityajwiiip jém attebet Sodoma.

Miñtaami con aich, manacjejpa
(Lc. 10:21-22)

²⁵ Jesic jém tiempo nim Jesús:

—Manjatun Dios, mich ininjacne jém sin y jém nas, tsam mancujíppa. Mich ininéc jém wibic jixi iga jém tsampic icutiyyajpa yíp naxyucmipic jixi da wíap icutiyyíy. Pero ininquejayñe jém wibic jixi jém pixiñtam jém dapic icuyucaneyaj yíp naxyucmipic jixi. ²⁶ Jempigam inwat, manjatun Dios, porque jempigam inwianjam.

²⁷ Jesic Jesús inímáy jém pixiñtam:

—Jém anjatun Dios acijunodáy itumpiy jém wítampic jixi. Da i ijodon jém Dios iManic ijixi, icutum ijodon jém iJatun ti ijispa iManic. Datim i ijodon jém anjatun Dios ijixi, icutum ijodon jém iManic con jém pixiñtam jém iwianjampáppic iManic iga icjodónap jém Dios ijixi. ²⁸ Miñtaami yim inítumpiytam mimichtam jém tsampic miyoxane, jém tsampic michimane, manacjejpa. ²⁹ Pictsonhtaami jém yugo jém ichpic manchiiba iga tawagayoxap. Cuyucataami ich ananquímayooyi porque je da tájca. Ich da malo ánana. Manyoxpátpa. Impátámpa jut wíap ijej jém inánama. ³⁰ Ich anyugo da tájca. Ich antsimi xejciy.

12

Jesús icuyuciwíñ itúcyaj trigo jém jejcuyjama
(Mr. 2:23-28; Lc. 6:1-5)

¹ Jesic tum jejcuyjama widañnaspá Jesús jut ñipnetá jém trigo. Jém icuyuciwíñ como tsam yuñeyaj, moj ijudayyaj jém trigo ipac, icútyaj. ² Pero cuando jém fariseoyaj iixyaj ti iwatyaj jém Jesús icuyuciwíñ, nímayta jém Jesús:

—Ixi jém inucuyuciwíñ. ¿Tiiga iwatyajpa contra jém tanaquímayooyi jém jejcuyjama?

³ Jesic Jesús inímáy jém fariseoyaj:

—¿Que da queman immay ti iwat jém David cuando tsam yuñeyaj con jém icompañeroyaj? ⁴ Tigíyyaj jém Dios iticjom. Icutyay jém caxtánañi jém tsacnetawíp altaryucmi. Tanjodon iga jém tanaquímayooyi da ijícpa iga icútyajpa jém David ni jém iwaganamiññewíp. Nada más jém panij wíap icútyaj. ⁵ ¿Que da immayñe junimpa jém Moisés inquímayooyi iga jém panij da jejaypa cuando yoxayajpa jém mijpic masticjom jém jejcuyjama? Pero da tájcawatpa siiga da jejaypa. ⁶ Numa mannímáypa iga jém itwíp yim con mimichtam más mij que jém mijpic mastic. ⁷ Mimichtam da incutiyyihta ti nimpá jém anmatí jut jaychacnetá. Nimpá: “Más iwianjam Dios iga inyaachanjamtámiñ jém inñiwitam que iniccaaba jém animat iga inchiiba ofrenda jém altaryucmi.” Meega incutiyyíyapa, jesic da inchiiba castigo jém pixiñtam jém dapic ti iwatne. ⁸ Ich, jém aMiññewíp Sinycmi, wíap anaquejáy jém pixiñtam ti wíap iwat jém jejcuyjama porque anaít jém autoridad.

Jém pixiñ jém titsnewíp ici
(Mr. 3:1-6; Lc. 6:6-11)

⁹ Jesic nic Jesús, tigíy jém sinagoga jut icuyucayajpa jém Moisés inquímayooyi. ¹⁰ Jem it tum pixiñ titsnewíp ici. Jesic jém fariseoyaj icwácyaj jém Jesús. Nímayta:

—¿Que wí iga tanacpíspa tum pixiñ jém jejcuyjama?

Porque tsam imétsyajpa jutsap iquejajwadayyaj jém Jesús. ¹¹ Jesic icutson Jesús. Inímáy:

—Siiga tum de mimichtam iniit tum borrego actiñne josjom tum jejcuyjama, ¿que da inñtoppa jeeti rato? ¹² Tum pixiñ más wí que jém borrego. Jesic quejpa iga wí iga tanwíwatpa jém jejcuyjama.

¹³ Jesic iñímáy jém p̄ixiñ jém titsnew̄ip ici:

—T̄imi in̄ci.

Jesic it̄im ici. W̄its̄iyum juuts jém tun̄gac jém ici. ¹⁴ Jesic putyaj jém fariseoyaj. Moj ijs̄iyaj jutsap iccaayaj jém Jesús.

Jém wiñ̄ic̄pic profeta nim ti iwat jém Jesús

¹⁵ Cuando ijodón̄a Jesús ti ijs̄iyajpa, jesic nic. Jáyan̄ jém p̄ixiñtam itún̄iyajpa. Icp̄is itump̄iy jém mim̄neyajw̄ip. ¹⁶ Ip̄im̄iy Jesús iga odoȳ i in̄madayyajiñ̄ iapaap icp̄isne. ¹⁷ Iwat jemp̄ic iga cupacpa juuts nim jém wiñ̄ic̄pic an̄mat̄c̄iwiñ̄ jém Isaías:

¹⁸ Ȳibam jém acuyox̄apaap, jém an̄cup̄in̄new̄ip.

Ts̄am antoȳpa, ts̄am amaymay con je.

Anchiiba án̄Anama iga inisīiba.

In̄madáypa jém tun̄gac p̄ixiñtam jém dap̄ic je de Israel iga:

Ich an̄w̄itsagáypa jém it̄an̄ca.

¹⁹ Da án̄apa, datim p̄imi j̄iypa.

Da ī imaton̄pa iga naj̄iyóypa calle.

²⁰ Jém acuyox̄apaap agūi w̄iap.

Da iquitpa tum̄ xutu waycuy jém quitp̄ápic, pero más iw̄itsacpa.

Datim icp̄ichpa jém mechaj jém yaguiñ̄pic juct̄imatsne.

P̄imi yox̄ap hasta que icoñ̄w̄iypa jém ienemigoyaj.

²¹ Jém tun̄gac p̄ixiñtam icuw̄iti ȳip naxyucmi ts̄am icup̄icyajpa iga jém acuyox̄apaap w̄iap iyox̄p̄atyaj.

N̄imyajpa iga Jesús iniit jém Woc̄c̄iwiñ̄ ip̄imi

(Mr. 3:20-30; Lc. 11:14-23; 12:10)

²² Jesic nam̄iñaȳt̄a Jesús tum̄ p̄ixiñ jém imatsnew̄ip tum̄ mal esp̄iritu. Cácht̄i jém p̄ixiñ, umaane. Icp̄is Jesús. Jesic ixixóypam, w̄iabam ijs̄iy. ²³ Itump̄iy jém it̄iyajw̄ip jém agūi ipooñ̄anj̄amyaj cuando iix̄yaj ti iwat Jesús. N̄imyaj:

—¿Tán̄anj̄am ȳibam jém rey David ioc̄manic?

²⁴ Pero cuando jém fariseoyaj imaton̄yaj ti iwat jém Jesús, p̄imi jóyñ̄eyaj. N̄imyaj:

—Ȳip p̄ixiñ w̄iap itop jém mal esp̄iritu porque iniit jém Beelzebú ip̄imi, jém mal esp̄iritu in̄jagooyi.

²⁵ Pero ijodon̄ Jesús ti s̄ip ijs̄iyaj jém p̄ixiñtam. Iñímáy:

—Siiga tum̄ gobierno nawécyaj̄tap y án̄ayajpa entre jeeyaj, jesic tienes que nayajyaj̄tap.

Siiga nawécyaj̄tap tum̄ at̄ebet y ts̄am án̄ayajpa jém p̄ixiñtam, da jáypa cuyajpatim. Siiga nawécyaj̄tap jém it̄iyajw̄ip tum̄ tic̄cim, jesic cuyajpatim. ²⁶ Jesanetim siiga jém Woc̄c̄iwiñ̄ natopt̄ap iyaac jém p̄ixiñ̄ ianaman̄jom, jesic nawéct̄ap iyaac jém Woc̄c̄iwiñ̄. Da jáyñe cuyajpa jém ip̄imi. ²⁷ Mich̄tam miñ̄imt̄ampa iga ich antoppa jém mal esp̄iritu con jém Beelzebú ip̄imi. Siiga numa an̄watpa jemp̄ic, ¿jesic ī ichiiba ip̄imi mich̄ in̄cuyujc̄iwiñ̄ iga w̄iñ̄ itop jém mal esp̄iritu? Cuando iwatpa jemp̄ic, jém in̄cuyujc̄iwiñ̄ min̄quejáypa iga togoyñe iñ̄j̄xi. ²⁸ Pero siiga ich antoppa jém mal esp̄iritu con Dios iAnama, jesic quejpa iga numa núcneum jém tiempo iga Dios in̄jacpa ȳip naxyucmi. Mimichtam w̄iap̄tim impict̄son̄ta.

²⁹ Jém númpaap da w̄iap it̄igiy tum̄ p̄imip̄ic p̄ixiñ̄ it̄ic̄jom iga icunúmaȳpa siiga da w̄iñ̄ti ichenpa jém tic̄ iomi. Pero siiga w̄iñ̄ti ichenpa, jesic w̄iap̄ iñ̄umáy itump̄iy jém iniitw̄ip̄ it̄ic̄cim.

³⁰ Jém dap̄ic acuyox̄ap it en contra de aich. Jém dap̄ic ayox̄p̄at̄pa iga anan̄tuum̄awatpa jém p̄ixiñtam, je iquep̄quebáypa.

³¹ 'Jeeyucmi mannímáypa iga Dios iwadáypa perdón jém p̄ixiñtam itump̄iy jém itánca. Wadaytaptim perdón jém p̄ixiñtam siiga icuj̄yypa tanjatun̄ Dios, pero siiga ì icuj̄yypa jém Dios iAnama, da ì wiap iwadáy perdón jém itánca. ³² Dios acutsat ȳip naxyucmi iga an̄cuyoxap Dios. Siiga ì amalnímáypa aich, jesic Dios wiap iwadáy perdón jém itánca. Pero siiga ì imalnímáypa jém Dios iAnama, da ì wiap iwadáy perdón jém itánca ni ȳip naxyucmi ni jém tun̄gac jém miñpaap.

*Jém wibic cuy tánixpicpa por itim
(Lc. 6:43-45)*

³³ 'Siiga wibic cuy, iwatpa wibic itim. Siiga malopic cuy, iwatpa malopic itim. Tánixpicpa jém cuy por itim. ³⁴ Michtam mijex juuts jém tsañ iga agui mimalo. ¿Jutsap in̄inmat jém w̄itampic cosa siiga tsam mimalotam? Jém an̄mañti jém iñtoppáppic iñj̄ipjom, tsucumpa iñanamanjom. ³⁵ Jém wibic p̄ixiñ in̄matpa jém w̄itampic cosa porque comne ianamanjom con jém wibic j̄ixi. Jém malopic p̄ixiñ in̄matpa jém malopic cosa porque comne ianamanjom con jém malopic j̄ixi. ³⁶ Siip mannímáypa mimichtam, cuando núcpa jém jama iga Dios ic̄ip̄in̄pa itump̄iy jém p̄ixiñtam, jesigam tségaytap itump̄iy jém malopic an̄mañti jém in̄matnew̄ip aunque da juchan̄. ³⁷ Con jém in̄inmañti mic̄ip̄in̄tap, con jeetim in̄inmañti miñquejpa siiga mitáncaiy o da mitáncaiy.

*Jém malopic p̄ixiñtam iwágayyajpa tum milagro
(Mr. 8:12; Lc. 11:29-32)*

³⁸ Jesic algunos jém fariseoyaj con jém escribaspic maestroyaj iwágayyaj tum milagro. Nímayta Jesús:

—Maestro, ánixtooba tum milagro, awadaytaami.

³⁹ Jesic Jesús iñímáy:

—Jém malopic p̄ixiñtam, jém ityajw̄ip siip jém dapic icupicyajpa Dios, tsam awágáypa milagro. Pero no más tum milagro iwadáypa Dios, jém milagro juuts iñasca jém Jonás. ⁴⁰ Juuts jém Jonás oy iyaj tucunajama y tucunatsuu jém mij̄pic t̄ip̄i ipuujom, jesaptim aich, jém aMiññew̄ip Sinyucmi, acumtap, anyajpa tucunajama y tucunatsuu jém nasc̄im. ⁴¹ Núcpa jama iga jém ityajw̄ip jém atebet Nínive tsucumyajpa jém in̄an̄pigam jama iga miquejajwadaytámpa mimichtam, miittan̄w̄ip cuando Dios ic̄ip̄in̄pa itump̄iy jém p̄ixiñtam. Porque jém ityajw̄ip Nínive icucacyaj ij̄ixi cuando jém Jonás in̄madáy jém Dios in̄mañti. Ȳim it con mimichtam tum p̄ixiñ más wiap que jém Jonás. ⁴² Tsucumpatim jém yom̄pic an̄jagooyi jém miññew̄ip an̄tsapsaumi jém in̄an̄pigam jama cuando Dios ic̄ip̄in̄pa itump̄iy jém p̄ixiñtam. Miquejajwadaytámpatim porque juumi miñ jém yomo. Miñ imaton̄ jém Salomón ij̄ixi, pero ȳim it con mimichtam tum más mij̄pic an̄jagooyi que jém Salomón.

*Jém da wibic espíritu jém setpáppic
(Lc. 11:24-26)*

⁴³ 'Cuando put jém mal espíritu tum p̄ixiñ ianamanjom, jesic siiba icutum jém titsinaxyucmi. Imétspa tum lugar juñ jejpa. Pero da ipátpa. Jesic n̄impa: ⁴⁴ “Eybiçtim asetpa antic̄im juñ aput.” Jesic mu ixet, eybic ipát jém p̄ixiñ juuts tum tic da oom̄iy, petnetawum, w̄itsacnetawum. ⁴⁵ Jesic inimiñ siete espíritu más p̄imi malo. Miñ it̄iyaj jém p̄ixiñ ianamanjom. Wiñti jém p̄ixiñ iniit idic nada más tum mal espíritu, pero ocmi más p̄imi malo jém p̄ixiñ. Jemp̄igam iñascaaba jém malopic p̄ixiñtam jém ityajw̄ip siip. Más p̄imi malojap.

*Miñ jém Jesús iapa con it̄iwitam
(Mr. 3:31-35; Lc. 8:19-21)*

⁴⁶ Iganam síp inmat Jesús, núcyaj iapa con ijáyuctam. Tsíyyaj anšicmi. Ijıypáttooba Jesús.

⁴⁷ Tum pıxiñ iñímáy Jesús:

—Miññe jém iñapa con iñtıwıtam, ityaj anšicmi. Mijıypáttooba.

⁴⁸ Jesic Jesús iñímáy jém pıxiñ jém inmadayñewıip iga miññe iapa:

—¿Pero i jém ánapa? ¿I jém antıwıtam?

⁴⁹ Jesús iquij icımi jém icuyujcıwiñ, iñímáy:

—Mimichtam jém mánapa y mantıwıtam. ⁵⁰ Porque itumpıy jém iwatpaap juuts ixunpa jém anJatun Dios jém itwıip sınyucmi, jeam jém antıwi, jém anyomtıwi y jém ánapa.

13

Jém iñıppápic jém trigo ipac

(Mr. 4:1-9; Lc. 8:4-8)

¹ Jesic jeetim jama put Jesús jém ticjom. Nic coñi jem laguna anñaca. ² Tsam jáyan pıxiñtam antuumaneyaj jut it Jesús. Jeeyucmi tigıy tum barcojom, jemum coñ. Itumpıy jém miññeyajwıip tsıyyaj jém laguna anñaca. ³ Jesic Jesús moj inquejáy jáyan jém wıbic jıxi por medio de cuento. Nımpa:

—Tum pıxiñ nic ñipi. Nic iyın jém trigo ipac icamjom. ⁴ Mu iyın jém pac, actın uxan jém tunjom. Miñyay jém jon, icútquet jém pac. ⁵ Actıntım uxan jém pac tsaanjom jut da i jáyan nas. Jesic jıcsıy nay jém pac porque da juchan jém nas. ⁶ Cuando pijpa jém jama, iñoonoca jém xuxut planta. Yaj cutıtsaayıyaj porque da tıchıgıy. ⁷ Actıntım uxan jém pac jém apıdanjom. Jıcsıy yón jém apıt, ixamsamca jém xuxut planta. ⁸ Pero actıntım jém pac jém wıbic naxyucmi. Wıtıma. Algunos chíóy cien, algunos chíóy sesenta, algunos chíóy treinta. ⁹ Siiga mitıtsıgıyta, amatonıtaami.

Nımayta icuyujcıwiñ tıiga anquejayıtap cuentujmi

(Mr. 4:10-12; Lc. 8:9-10)

¹⁰ Jesic icunúcyaj Jesús jém icuyujcıwiñ, icwácyaj. Nımayta:

—¿Tıiga inınmadáypa jém pıxiñtam por medio de cuento?

¹¹ Jesic Jesús icutson. Iñímáy:

—Dios miyoxpátámpa mimichtam iga wıap inıcutııyıyta jutsap injac Dios yıp naxyucmi. Mimichtam micjodónata jém jıxi anécnewıip idic, pero los demás da wıap icutııyıyay.

¹² Jém ipıctsonpaap jém Dios inmati, más ichıiba Dios jáyan wıbic cosa. Pero jém dapıc iwıpıctsonpa jém Dios inmati, da ti ichıiba Dios, más accáyayıtap jém cosa jém ijıspaap iga iniıt. ¹³ Jeeyucmi ananquejáypa jém pıxiñtam por medio de cuento. Iıxyaj, pero tsıyyaj juuts da iıxyaj. Imatonıyaj, pero tsıyyaj juuts da imatonıyaj ni datim icutııyıyay.

¹⁴ Iñascayajpa juuts nımpa jém wıncıpic anmatcıwiñ jém Isaías:

Mimichtam nıma immatonıtámpa, pero da inıcutııyıytámpa.

Nıma iñıxtámpa, pero da inıcupıctámpa.

¹⁵ Porque yıpyaj pıxiñtam tsam malo ianamayaj,

da matónóypa jém itatsıc, inıchıñeyaj jém iıxcuy.

Iwatıyajpa jemıpic porque da ixıxoytooba,

da matónoytooba,

da ijıspa ianamanjom iga tsam jáyan mal iwatneyaj iga ichaguiñ jém malatun iga ich anıwıtsagayıñ jém itánca.

¹⁶ Pero sıip mimichtam agui mimaymaytam porque miıxıxóypa y mimatónóypa.

¹⁷ Nıma mannımaypa iga wıti jém wıncıpic anmatcıwiñ y jém tunıgac wıbic pıxiñtam

tsam iixyajtooba titam ñixtámpa mimichtam, pero da wia. Tsam imatonyajtooba titam immatonjámpa, pero da wia.

Jesús inmadáypa jém cuento de jém iyinpaap jém trigo
(Mr. 4:13-20; Lc. 8:11-15)

¹⁸ Nimpa Jesús:

—Matonjaami ti nimtooba jém cuento cuando jém p̄ixiñ iyinpa jém pac icamjom. ¹⁹ Jém imatonpaap jém wibic anmati jutsap injac Dios yip naxyucmi, pero da icutiüyíypa, jex juuts jém pac jém actinewiip tunjom. Miñpa jém Wocciwiñ, iccáyáypa jém wibic jixi jém ñipnetawip jém p̄ixiñ ianamanjom. ²⁰ Jém pac, jém actinewiip jém tsaanjom, jex juuts jém p̄ixiñ cuando imatonpa jém wibic anmati, agui maymay mu ipictson. ²¹ Pero como da tichigíy, da jáypa. Jesic cuando cutitstap jém p̄ixiñ, tsam malwadaytap jém wibic anmati icuyucmi, ichacpa jém wibic tun. ²² Jém pac, jém actinewiip jém apidanjom, jex juuts jém p̄ixiñ jém imatonpaap jém wibic anmati, pero tsam ijspa jém cosa jém ityajwip yip naxyucmi. Jém riqueza tsam imigóyáypa jém p̄ixiñ. Ixamcaaba jém wibic anmati. Da tím̄ap. ²³ Pero jém pac, jém actinewiip jém wibic naxyucmi, jex juuts jém p̄ixiñ imatonpa jém wibic anmati, iwicutiüyíypa ti nimtooba. Jém p̄ixiñ juuts jém wibic nas. Ipictsonpa jém wibic anmati, jáyanap jém wibic jixi ianamanjom. Algunos chióy cien, algunos chióy sesenta, algunos chióy treinta.

Jém malapim waganayñe con jém trigo

²⁴ Jesic Jesús inmat tungac xutu cuento. Nimpa:

—Jém wibic anmati iga Dios injacpa yip naxyucmi jex juuts tum p̄ixiñ iñip jém wibic trigo icamjom. ²⁵ Pero jesic tsuucim cuando monyajpa jém p̄ixiñtam miñ tum enemigo. Oy iñip jém malopic pim icamjom jut ñipneta jém wibic trigo. ²⁶ Ocmi nay jém trigo, mijap, jesic moypan. Jesigam quej jém malopic pim jém ñipnetawip ocmi. ²⁷ Jesic jém p̄ixiñ iyoxaciwiñ nic iámyaj jém iomi. Iñimayyaj: “Mánomi, siiga wibic pac iñip jém incamjom, ¿jesic jutsa mu iñay jém malapim?” ²⁸ Jesic jém nas iomi iñimáy jém iyoxaciwiñ: “Tum enemigo iwat jempic.” Jesic acwácta, nímayta: “¿Iñxunpa iga nicpa anwixquím̄ta jém malapim?” ²⁹ Pero jém nas iomi iñimáy: “Da tanwixpa sip jém malapim porque químnamotpa jém trigo. ³⁰ Tsactaami jém malapim iga iwaganamijap jém trigo hasta tampiñpa jém cosecha. Jesic annimáypa jém ipinpaap jém cosecha iga wiñti iwixquímyajiñ jém malapim, ichenyajiñ iga tannooquetpa. Jesic ocmi tanaccáypa jém trigo jém granerojom.”

Jém cuento de jém mostaza ipac
(Mr. 4:30-32; Lc. 13:18-19)

³¹ Jesic Jesús inmat tungac xutu cuento. Nimpa Jesús:

—Jém wibic anmati iga Dios injacpa yip naxyucmi jex juuts tum mostaza ipac jém iñipnewiip tum p̄ixiñ icamjom. ³² Jém mostaza ipac tsam xutu, pero cuando mijap jém planta más mij que itumpiy jém ñipñibooyi. Mijap juuts tum mijpic cuy hasta jém jon iwatyajpa ipeeñi jém mostaza incisyucmi.

Jém cuento de jém levadura
(Lc. 13:20-21)

³³ Jesic inmatpaim Jesús tungac xutu cuento. Nimpa:

—Jém wibic anmati iga Dios injacpa yip naxyucmi jex juuts tum yomo inimotpa jém levadura con tucuten jepscuy de harina. Jesic pipa itumpiy jém jaapi.

Tiiga inmatpa Jesús jém xuxut cuentoyaj
(Mr. 4:33-34)

³⁴ Itumpiy yípyaj cosa inquejáypa Jesús jém p̄ixiñtam con jém xuxut cuentoyaj. Da ti inquejáypa sin cuento. ³⁵ Jempigam cupacpa jém an̄mati jém in̄matnewiip jém wiñicpic an̄matc̄wiñ cuando ijaychacne así:

Anaquejáypa jém p̄ixiñtam con jém xuxut cuentoyaj.

Anan̄madáypa jém j̄ixi jém an̄nécnewiip dende wiñigam cuando moj iwat Dios yíp nas.

Inquejáypa Jesús ti n̄imtooba tum xutu cuento

³⁶ Jesic Jesús in̄quím jém p̄ixiñtam. Tigiy eybic jém ticjom. Iacunúcyaj jém icuyujc̄wiñ. Iñimayyaj:

—An̄madaayi ti n̄imtooba jém xutu cuento cuando jém enemigo iñip jém malapim jém p̄ixiñ icamjom.

³⁷ Jesic Jesús iñimáy:

—Ich, jém aMiññewiip Siñyucmi, ich mismo an̄nipa jém wibic pac. ³⁸ Jém cama n̄imtooba yíp naxyucmi. Jém wibic pac jex juuts jém iwian̄jamyajpáppic iga in̄jacpa Dios. Jém malapim jex juuts jém p̄ixiñtam jém Wocciwiñ im̄ichi. ³⁹ Jém enemigo iñippa jém malapim, je jém Wocciwiñ. Jesic cuando piñtap jém cosecha, yíp n̄imtooba cuando cuyajpa yíp nas. Jém ipiñyajpaap jém cosecha jeeyaj jém siñyucmic̄pic p̄ixiñtam. ⁴⁰ Piñtap jém malapim iga iñooba juctjom, jempigam iñascayajpa jém malopic p̄ixiñtam cuando cuyajpa yíp nas. ⁴¹ Jém Miññewiip Siñyucmi icutsatpa jém siñyucmic̄pic p̄ixiñtam iga itopyajiñ jém Dios ip̄ixiñtamanjom itumpiy jém malopic p̄ixiñtam con itumpiy jém icmalwatneyajw̄ip it̄iwitam. ⁴² Matsyajtap, cotyajtap jém juctjom jūt da nunca p̄ichpa, jūt ip̄ictsonyajpa jém castigo. Jemigam tsam weyjajpa, tsam iñichyajpa itits. ⁴³ Cuando yajpa itopyaj itumpiy jém malopic p̄ixiñtam, jesic itumpiy jém p̄ixiñtam jém iwatyajpaap juuts ixunpa Dios, tsam tsocyjpa juuts jém jama jūt in̄jacpa tan̄jatun̄ Dios. Siiga mitatsigiyta, amaton̄taami.

Jém wibic riqueza jém an̄nécnewiip

⁴⁴ Jém wibic an̄mati iga Dios in̄jacpa yíp naxyucmi jex juuts tum caja tumiñ nécneta jūt it tum jaca nas. Cuando tum p̄ixiñ ipát jém tumiñ, jesic jemt̄im iñec eybic. Nic icumáyáy titam iniit iga ijuypa jém nas jūt nécneta jém tumiñ.

Jém m̄jpic perla tsampic tsoowíy

⁴⁵ Jém wibic an̄mati iga Dios in̄jacpa yíp naxyucmi jex juuts tum juyjúyoypaap. Ijuypa y imáypa jém w̄itampic xuxut tsa jém perla. ⁴⁶ Cuando ipát tum más wibic jém perla tsampic tsoowíy, jesic icumáyáypa itumpiy jém iniitw̄ip. Ijuypa jém wibic perla jém tsampic tsoowíy.

Jém red imats itumpiy clase jém t̄ipi

⁴⁷ También jém wibic an̄mati iga in̄jacpa Dios yíp naxyucmi jex juuts tum red, cuando ipatsyajpa lamar jém t̄iptero, imatspa itumpiy clase de t̄ipi. ⁴⁸ Jesic cuando comne jém ired, jém t̄iptero ijicputyajpa lamar an̄naca. Coñyajpa, mojpa icupíñayyaj jém t̄ipi. Icotyajpa iconjom jém w̄itampic t̄ipi. Jém dapic w̄itam ipatsayyajpa. ⁴⁹ Jempigam iñascayajpa jém p̄ixiñtam cuando cuyajpa yíp nas. Miñyajpa jém siñyucmic̄pic p̄ixiñtam iga icupíñáypa jém malopic p̄ixiñtam jém Dios ip̄ixiñtamanjom. ⁵⁰ Cotyajtap jém malopic p̄ixiñtam jém juctjom jūt ip̄ictsonyajpa jém castigo. Jemigam tsam weyjajpa, tsam iñichyajpa itits.

Jém pecapic y jém jomipic tesoro

⁵¹ Jesic Jesús icwácpa jém icuyujc̄wiñ. N̄imayyajta:

—¿Incutiïyïyta ti nimtooba itumpiy yíp xuxut cuento?

Nimyajpa jeeyaj:

—Ji, ancutiïyïyta.

⁵² Jesic nim Jesús:

—Cuando tum jem escribaspic maestro icutiïyïypa jem wibic anmati iga Dios injacpa yíp naxyucmi, jesic jem pixiñ jex juuts tum pixiñ tsam rico. Iniittim jem pecapic tesoro y jem jomipic tesoro.

Nic Jesús Nazaret

(Mr. 6:1-6; Lc. 4:16-30)

⁵³ Jesic cuando yaj inmat itumpiy jem xuxut cuento, nicum Jesús. ⁵⁴ Nic iticmi. Moj inquejáy jem pixiñtam jem sinagoga jut icuyujcayajpa jem wiñicpic anquímayooyi. Jeeyaj tsam pimi ipooñanjamyajpa. Nimyaj:

—¿Yíp pixiñ jut icuyujca yíp jixi? ¿Jutsap iwat yíp milagroyaj? ⁵⁵ Yíp pixiñ jem carpintero imaníc. Iapa jem Malía. Tánixpigaytampa jem itiwitam jem Jacobo, jem José, jem Ximoj y jem Judas. ⁵⁶ Jem iyomtiwítam ittim yim con taichtam. ¿Jut ipic yíp pixiñ itumpiy yíp jixi?

⁵⁷ Jeeyucmi tsam ijóyixyajpa Jesús. Jesic Jesús inímáy:

—Jutquej wipictsonatap jem Dios inmatciwiñ. Pero jem ityajwip iticmicpic lugar con jem ityajwip iticim da iwianjamyaj.

⁵⁸ Jesic da wati wibic milagro iwat Jesús iticmi, Nazaret, porque da icupicyajpa iga Dios imaníc.

14

Jutsap iccaata jem Xiwan jem acchínoypaap

(Mr. 6:14-29; Lc. 9:7-9)

¹ Jesic jeetim tiempo jem gobernador Herodes ijodóna ti iwatpa Jesús. ² Jesic jem Herodes inímáy jem icuyoxapaap:

—Yíp pixiñ jem Xiwan jem acchínoypaap. Pisneum. Jeeyucmi wíap iwat jem mijpic milagroyaj.

³ Da más pecam jem Herodes icám orde iga matstaiñ jem Xiwan. Tsenta, cotta cárcel. Matsta jem Xiwan porque iwogáy jem Herodes cuando itobáyáy jem itíwi Felipe iwichomo. Jem yomo iníyi Herodías. ⁴ Jem Xiwan inímáy jem Herodes:

—Da wí iga impigayñe iníwi iyomo.

⁵ Jem Herodes tsam iccaatooba jem Xiwan, pero icinpa jem pixiñtam porque nimyajpa iga jem Xiwan tum jem Dios inmatciwiñ. ⁶ Cuando núc jem Herodes icumpleaño, iwatpa tum sin. Miñ jem Herodías iyommaníc. Moj echi jem pixiñtam iwiñjom. Tsam iwianjam jem Herodes. ⁷ Jesic ijycámáy iga ichiiba jem woñi titam iwágáypa. ⁸ Jem iapa inímáy jem woñi iga iwágáyíñ jem Xiwan icobac. Jesic jem woñi inímáy jem Herodes:

—Ansunpa iga yimti achiaayi jem Xiwan icobac, jem acchínoypaap, tum mijpic chimajom.

⁹ Jesic pimi anyácne jem rey. Pero como ijycámáyñe iga ichiiba jem woñi titam iwágáypa y como imatonneyaj itumpiy jem ityajwip jem mesacim, jem Herodes ipimiy tum soldado iga ichiáyíñ jem Xiwan icobac jem woñi. ¹⁰ Icutsat cárcel iga tinjucagaytaiñ jem Xiwan iisci. ¹¹ Ocmi namíñayta jem icobac tum mijpic chimajom. Chiita jem woñi. Jesic jem woñi ininigáy iapa.

¹² Jesic miñyaj jem Xiwan icuyujciwiñ, ipínayyaj jem Xiwan imijtay, nic icumyaj. Ocmi nic inmadayyaj Jesús ti inasca jem Xiwan.

Acwíctajém cinco mil p̄ixiñtam
(Mr. 6:30-44; Lc. 9:10-17; Jn. 6:1-14)

¹³ Cuando imaton̄ Jesús ti iñasca jém Xiwan, nic icutum tum lugar jut da ti idíyíy. Nic barcojom. Jesic cuando ijodónayaj jém p̄ixiñtam iga nic Jesús, jeeyaj tsucumyay jém attebetayaj. Itún̄iyaypa puymi. ¹⁴ Jesic put Jesús jém barcojom, iix iga tsam jáyan̄ p̄ixiñtam an̄tuumaneyaj. Tsam p̄imi iyaachanjampa. Icpis jém mimneyajw̄ip jém ityajw̄ip jem. ¹⁵ Jesic piichabam̄ iti, miñyay jém Jesús icuyujc̄wiñ. Iñimayyay:

—S̄ip tsam tsuuyim. Ȳim da ti idíyíy. An̄químyaj̄i jém p̄ixiñtam. Nímaaȳi iga nicyaj̄iñnam hasta jut it jém tigan̄joj iga ijuyyaypa titam icútyajpa.

¹⁶ N̄impa Jesús:

—¿T̄iiga nicyajpa? Mimichtam acwíctaami.

¹⁷ Jesic n̄imyay jém Jesús icuyujc̄wiñ:

—Da ictsíypa. Anaitta cinco caxtánañi y wisten̄ t̄ipi.

¹⁸ N̄impa Jesús:

—Anamíñaaȳi ȳim.

¹⁹ Jesic iñímáy Jesús jém p̄ixiñtam iga coñyajiñ naxyucmi jém múgan̄jom. Jesic imatspac jém cinco caxtánañi con jém wisten̄ t̄ipi. Amquím̄ sin̄yucmi, moj in̄wejpát Dios. Iwenwenjac jém caxtánañi, ichi jém icuyujc̄wiñ. Jesic jeeyaj ichiiyay jém p̄ixiñtam. ²⁰ Jesic wícyaj itump̄iy hasta cusyajum w̄iqui. Ocmi icucomyay doce nacoon̄ con jém pedazo jém cutsíyw̄ip. ²¹ Wícyaj cinco mil p̄ixiñtam. Jém yomtam y jém tsixtam da i imayñe.

Witpa Jesús jém n̄wiñpacyucmi
(Mr. 6:45-52; Jn. 6:16-21)

²² Jesic jeeti rato Jesús ip̄imíy jém icuyujc̄wiñ iga t̄igiyajiñ barcojom. Jacyajpa idic jém laguna an̄wiñtuc wiñti que jém Jesús, iganam je in̄químpa jém p̄ixiñtam. ²³ Jesic cuando yaj mu in̄quím̄ jém p̄ixiñtam, quím̄ Jesús tum cotsicyucmi jut da ti idíyíy iga in̄wejpátpa Dios. Jesic piichawum̄ iti Jesús icutum it jém cotsicyucmi. ²⁴ Pero juumi nic jém barco. Núc cucmi jém laguna, moj poyi jém sawa, tsam pooba jém ni. Tsam p̄imi ictsíypa jém barco jém n̄ipoa y jém sawa. Tán̄caap̄ iñic. ²⁵ Jesic jeetim tsuu, cuquejtooba, núc Jesús jut it icuyujc̄wiñ. Witpa iñic jém n̄wiñpacyucmi. ²⁶ Cuando iixyay jém icuyujc̄wiñ iga witpa jém n̄wiñpacyucmi, tsam p̄imi ichigan̄jécyaaj. Como tsam c̄in̄neyaj, p̄imi an̄weyjajpa. N̄imyay:

—iMiñpa tum poñ!

²⁷ Pero jeeti rato ijíyáy Jesús, iñímáy:

—iCamamwattaami iñanama! ¡Aicham! ¡Odoy c̄in̄taami!

²⁸ Jesic jém Peto iñímáy:

—Mán̄omi, siiga numa mimich, ajígaaȳi iga awitpa jém n̄wiñpacyucmi hasta jut miit.

²⁹ Jesic n̄impa Jesús:

—Miñi.

Jesic cuando quet jém Peto jém barcojom, moj w̄iti jém n̄wiñpacyucmi. Nicpa idic hasta jut it Jesús, ³⁰ pero cuando iix iga tsam p̄imi jém sawa, c̄in̄pa jém Peto. Moj cumon̄i jém niicim, tsam p̄imi an̄wejpa. N̄impa:

—iMán̄omi, aciacputi!

³¹ Jesic jeeti rato jém Jesús imatsáy ici, iñímáy:

—Tsam uxan̄ in̄cupicpa. ¿T̄iiga iñj̄ispa iga da awiap?

³² Jesic cuando t̄igiyay jém barcojom, teñum jém sawa. ³³ Jesic jém ityajw̄ip jém barcojom costeñyay jém Jesús iwiñjom. N̄imyay:

—Numa mimich jém Dios miMan̄ic.

Jesús icp̄is jém ityajw̄ip Genesaret

(Mr. 6:53-56)

³⁴ Cuando yaj jaquiyaj jém laguna, núcyaj jém naxyucmi de Genesaret. ³⁵ Cuando jém Genesaretp̄ic p̄ixiñtam iixp̄icyaj iga Jesús, icutsat an̄mati icuw̄iti jém naxyucmi iga inimiñyajiñ itump̄iy jém mimneyajw̄ip iga icp̄ispa Jesús. ³⁶ Iacunucsayyajpa Jesús iga ijígyaiñ iga ichigayyajpa jém iyooti in̄aca. Jesic cup̄isayyaj itump̄iy jém ichigayñeyajw̄ip jém iyooti.

15

Jém táŋca tsucumpa jém p̄ixiñ ianamanjom

(Mr. 7:1-23)

¹ Jesic miñ iámyaj Jesús jém escribasp̄ic maestroyaj con jém fariseoyaj. Miñyaj Jerusalén. Icwácyaj jém Jesús. Nímayta:

²—Jém in̄cuyujc̄iwiñ, ¿t̄iiga da iwatyajpa jém costumbre jém ichacnew̄ip jém wiñicp̄ic tantúmm̄itam? Da icheeyajpa ici juuts n̄impa jém costumbre antes que w̄icpa.

³ Jesic Jesús iñímáy:

—¿t̄iiga mimichgacti in̄wattámpa contra jém Dios in̄químayooyi con mich in̄costumbre?

⁴ Porque n̄impa Dios: “W̄ixtaami jém iñjatun̄ y iñapa.” N̄imtim: “Siiga i imaln̄ímáypa jém ijatun̄ o iapa, jesic w̄i iga accaataiñ jexp̄ic p̄ixiñ.” ⁵ Pero mimichtam iniit tum̄ da w̄ib̄ic costumbre. Miñimtámpa: “Siiga i iñímáypa ijatun̄ o iapa iga da w̄iap manyoxpát porque itump̄iy jém anaitw̄ip, jém manchiipápp̄ic id̄ic, an̄jycámayñe Dios iga anchiiba.”

⁶ Jém n̄impaap jemp̄ic da iyoxpátpa jém ijatun̄ o iapa. Jemp̄igam iñchactámpa jém Dios in̄químayooyi juuts tum̄ cosa da para ti w̄i iga in̄cupictámpa mimichtamp̄ic in̄costumbre.

⁷ Tsam̄ minimigóyaytap̄ iñyaac. Iñjístámpa iga in̄watpa juuts ixunpa Dios, pero más immalwatpa. W̄i n̄im jém wiñicp̄ic an̄matc̄iwiñ jém Isaías cuando in̄matpa de mimichtam. N̄impa:

⁸ Yípyaj p̄ixiñtam tsam̄ acujípyajpa con ijip.

Pero ianamanjom̄ da acup̄icneyaj.

⁹ Xajatim̄ ajisyajpa.

In̄quejpa jém p̄ixiñtam̄ jém ijixquiimi juuts w̄ib̄ic an̄químayooyi.

¹⁰ Jesic Jesús p̄imi j̄yypa. Iñímáy los demás jém miññeyajw̄ip:

—Maton̄taami. Cut̄iyiytaami. ¹¹ Jém tiḡyypaap tum̄ p̄ixiñ ijipjom̄ iga icútpa, da icmalwatpa. Pero jém malop̄ic j̄xi y jém malop̄ic an̄mati jém putpaap ijipjom̄, je ictán̄cawatpa.

¹² Jesic icunúcyaj Jesús jém icuyujc̄iwiñ. N̄imyaj:

—¿Que iñjodon̄ iga tsam̄ p̄imi jóyñe jém fariseoyaj cuando imaton̄yaj ti iññímáy?

¹³ Jesic Jesús iñímáy:

—Itump̄iy jém planta jém dap̄ic je Dios iñipi tienes que wixquím̄tap. ¹⁴ Jesic odoy wadaayi caso jém maestroyaj de jém wiñicp̄ic an̄químayooyi. Cácht̄iyaj. Ijicneyaj tun̄gac cácht̄i. Siiga tum̄ cácht̄i ijicpa tun̄gac cácht̄i, jesic tsutpa icuistic jém pacusjom̄.

¹⁵ Jesic jém Peto iñímáy jém Jesús:

—An̄madaytaami ti n̄imtooba yíp xutu cuento.

¹⁶ Jesic n̄impa Jesús:

—¿Que mimichtam, datim in̄cut̄iyiytámpa? ¹⁷ ¿Que da in̄cut̄iyiytámpa iga itump̄iy cosa jém tiḡyypápp̄ic iñjipjom̄ n̄aspa impuujom̄ y ocm̄i putpa? ¹⁸ Pero itump̄iy jém malop̄ic an̄mati y jém malaj̄xi jém putpaap iñjipjom̄ tsucumpa jém iñanamanjom̄. Jexp̄ic cosa mictán̄cawatpa. ¹⁹ Porque jém p̄ixiñ ianamanjom̄ tsucumpa itump̄iy jém malop̄ic j̄xi. Jemum̄ tsucumpa jém j̄xi iga accaóypa, pejóypa, iwatyajpa jém da w̄itamp̄ic cosa, númpa,

migóypa y cumigóyóypa. ²⁰ Yípyaj malopic cosa ictánꞥawatpa jém p̄ixiñ. Pero siiga wícpa y da icheeba ici juuts nimpa jém wiñicpic costumbre, je da ictánꞥawatpa.

Tum jém juumipic yomo icupic Jesús

(Mr. 7:24-30)

²¹ Jesic Jesús put de jem, nic nocojom de jém atebet Tiro y Sidón. ²² Jemum miñ tum Cananeapic yomo. Jemtim tsucum nocojom de jém Tiro y Sidón. P̄imi j̄iypa jém yomo. Iñímáy Jesús:

—Ayaachanjami, mánomi. Mich jém David miocmanic. Jém anyommanic imatsne tum mal espíritu. Tsam p̄imi s̄ip iyaachwat.

²³ Pero Jesús da icutson. Jesic jém icuyujc̄wiñ miñ iñímayyaj Jesús:

—Ch̄i ti ixunpa ȳip yomo iga niguiñam porque tsam tamoogíypa.

²⁴ Jesic Jesús icutson, iñímáy:

—Dios acutsat iga anyoxpádiñ jém Israelpic borregoyaj jém togoyñew̄ip.

²⁵ Pero miñ jém yomo, icosteeñáy jém Jesús iwiñjom. Nimpa jém yomo:

—Mánomi, ayoxpaati.

²⁶ Nimpa Jesús:

—Da w̄i tantobáyáypa jém tsixtam icaxtánañi iga tanchiiba chimpa.

²⁷ Jesic nimpa jém yomo:

—Numa, mánomi, pero hasta jém chimpa icútyajpa jém ipaccanew̄ip jém iomi ime-sacucim.

²⁸ Jesic Jesús iñímáy jém yomo:

—Miyomo, tsam inꞥupicpa iga Dios w̄iap miyoxpát. S̄ip Dios miwadáypa juuts mich iñxunpa.

Jeeti rato pis jém iyommanic.

Jesús icpis tsam jáyan jém mimneyajw̄ip

²⁹ Jesic Jesús put de jem. Nas jém laguna aññaca de Galilea. Quím Jesús tum cotsicyucmi. Jemum nic coñi. ³⁰ Tsam jáyan p̄ixiñtam núcyaj jut it jém Jesús. Inimíñayyaj jém cuxuj, jém cácht̄i, jém uma, jém dapic w̄iane ici o ipuy, con jáyan tunꞥac más mimneyajw̄ip. Oy ichacyaj jém Jesús ipuycim. Jesic Jesús icpis itumpiy. ³¹ Jeeyucmi tsam ipooñanjamyaj jém añtuumaneyajw̄ip cuando iixyaj iga j̄iypam jém uma, w̄itsiyñeum jém dapic w̄i ici o ipuy, witpam jém cuxuj, ixixóypam jém cácht̄i. Jesic moj icujípyaj jém Dios de Israel.

Jesús icwíc jém cuatro mil p̄ixiñtam

(Mr. 8:1-10)

³² Jesic Jesús inꞥejáy jém icuyujc̄wiñ. Iñímáy:

—Tsam anyaachanjampa jém miññeyajw̄ip yim. Porque tucunajama tanwaganait̄, s̄ip da iniijay titam icútyajpa. Da añcutsattooba iga nicyajin̄ iticmi sin wiiqui porque w̄iap icupónaquetyaj, cutinꞥajpa tunjom.

³³ Jém icuyujc̄wiñ iñímayyaj Jesús:

—¿Jut tampicpa tsam jáyan caxtánañi iga tanacwícpa tsam jáyan p̄ixiñtam? Porque yim da ti idiyíy.

³⁴ Jesic Jesús icwác:

—¿Juten caxtánañi iniitta?

Nimyaj jém icuyujc̄wiñ:

—Siete, con juten jém xuxut t̄ipi.

³⁵ Jesic Jesús iñímáy jém añtuumaneyajw̄ip iga coñyajiñ naxyucmi. ³⁶ Ipic Jesús jém siete caxtánañi con jém t̄ipi, moj inꞥejpát Dios. Ocmi iwenwenjac jém caxtánañi, ichi

jém icuyujc̄wiñ. Iwégayyaj itump̄iy jém p̄ixiñtam. ³⁷ Cusum wiiquiyaj itump̄iy. Ocmi icucomyaj siete nacoñ jém caxtánañi con jém t̄ipi jém cutsíyñew̄ippigam. ³⁸ Wícyaj cuatro mil p̄ixiñtam, da maycumne jém yomtam y jém tsixtam. ³⁹ Ocmi Jesús inqúimayaj jém an̄tuumaneyajw̄ip, tigiy tum barcojom, nic jém laguna an̄naca noco jut it jém attebet Magdala.

16

Jém fariseoyaj con jém saduceoyaj iwácaypa tum milagro
(Mr. 8:11-13; Lc. 12:54-56)

¹ Jém fariseoyaj con jém saduceoyaj miñ íamyaj Jesús iga icut̄itsyajpa. Iwágayyajpa Jesús iga inquejáyiñ tum sin̄yucm̄ipic milagro. ² Jesic Jesús in̄ímáy:

—Jesic tsuáñam cuando in̄ixtámpa iga agui tsabats jém ucsi, miñimtámpa iga w̄icomap. ³ Jesic tsuuytim cuando agui tsabats jém ucsi, agui ucsjom, miñimtámpa iga da w̄icomap. Mimichtam tsam minimigóyayt̄ap in̄yaac porque in̄cut̄iyiytámpa ti miñpa cuando in̄ixpa jém ucsi, pero da w̄iap in̄cut̄iyiy jém seña jém s̄ippic in̄ixñeta iga miñpa jém in̄an̄pigam jama. ⁴ Jém ityajw̄ip s̄ip tsam imalwatyajpa, ichacneyaj jém Dios inqúimayooyi, tsam iwágayyajpa tum milagro. Pero tum seña no más iwadáypa Dios, jém milagro juuts in̄asca jém wiñic̄pic an̄matc̄wiñ jém Jonás.

Jesic nic Jesús. Jemum ichac jém miñneyajw̄ip.

Jém fariseop̄ic an̄químayooyi jex juuts jém levadura
(Mr. 8:14-21)

⁵ Jesic núcyaj jém Jesús icuyujc̄wiñ jém laguna an̄wiñtuc. Jeeyaj ijaaman̄notyaj jém caxtánañi. ⁶ Jesic Jesús in̄ímáy:

—Ix̄i, nawattamtaji cuenta iga odoy mimalwadáyiñ jém levadura jém in̄iitw̄ip jém fariseoyaj y jém saduceoyaj.

⁷ Jesic jém icuyujc̄wiñ moj nan̄imayyajtaji entre jeeyaj:

—Tan̄ímáy jem̄pic porque da tanamiñ jém caxtánañi.

⁸ Pero Jesús ijodon ti s̄ip ijisyajpa, in̄ímáy:

—A que mimichtam, tsam uxan̄ in̄cupic̄pa iga Dios w̄iap miyoxpát. ¿T̄iiga in̄j̄istámpa iga da in̄i jém caxtánañi? ⁹ ¿Que da in̄cut̄iyiȳpa, ni da in̄j̄ispa jém cinco caxtánañi cuando tanacw̄icta jém cinco mil p̄ixiñtam? ¿Juten coñ impin̄ jém cutsíyw̄ip? ¹⁰ ¿Que datim in̄j̄ispa jém siete caxtánañi cuando tanacw̄icta jém cuatro mil p̄ixiñtam y juten coñ impin̄ jém cutsíyw̄ip? ¹¹ ¿T̄iiga michtam da in̄cut̄iyiȳta iga da je caxtánañi s̄ip mann̄ímáy cuando manan̄madáypa de jém levadura jém in̄iitw̄ip jém fariseoyaj y jém saduceoyaj?

¹² Jesic icut̄iyiȳyaj iga da nimtooba Jesús iga cuidado con levadura jém in̄iitw̄ip jém caxtánañi, pero nimtooba cuidado con jém fariseoyaj inqúimayooyi y con jém saduceoyaj inqúimayooyi.

Nim̄pa jém Peto iga Jesús je jém Cristo
(Mr. 8:27-30; Lc. 9:18-21)

¹³ Cuando núc Jesús nocojom jém attebet Cesarea de Filipo, icwácayaj jém icuyujc̄wiñ, in̄ímáy:

—¿Junim̄pa jém p̄ixiñtam iga āiapaap aich, jém aMiññew̄ip Sin̄yucm̄i?

¹⁴ Nim̄yaj jém icuyujc̄wiñ:

—Algunos nim̄yajpa iga mich miXiwan jém micch̄inoypaap. Nim̄yajpatim algunos iga mich miElías. Más tungac nim̄yajpa iga mich miJeremías o tungac jém wiñic̄pic an̄matc̄wiñ.

15 Eybic j̄ȳpa Jesús, iñímáy:

—Pero mimichtam, ¿mijunimtámpa, āiapaap aich?

16 Jesic jém Ximoj Peto iñímáy:

—Mich miCristo jém vivopic Dios miManic.

17 Jesic Jesús iñímáy jém Peto:

—Dios miw̄wadáy miXimoj jém Jonás mimanic, porque ȳip j̄ixi da ī miñmadáy, pero jém anJatun̄ Dios jém itw̄ip̄ s̄nyucmī miñquejáy. 18 S̄ip̄ ich mannímáȳpa iga mich miPeto. Ich anacteñpa jém ammastic ȳip̄ tsaayucmi. Jém Wocciwiñ̄ ip̄imī da w̄iap̄ icoñw̄iy. 19 Manchiiba jém llave iga tigiȳyajiñ̄ jém p̄ixiñtam̄ jut̄ injacpa Dios. Titam̄ miñim̄pa iga da w̄iap̄ ȳip̄ naxyucmi, jesic datim̄ w̄iap̄ iwatyaj̄ s̄nyucmi. Titam̄ iñ̄j̄icpa ȳip̄ naxyucmi, jesic w̄iap̄tim̄ iwatyaj̄ s̄nyucmi.

20 Jesic iñímáy jém icuyujc̄wiñ̄ iga: “Odoy ī anmadaayī iga ich aCristo.”

Nim̄pa Jesús iga accaatap

(Mr. 8:31–9:1; Lc. 9:22-27)

21 Dende jesigam̄ moj̄ inmadáy Jesús jém icuyujc̄wiñ̄ ti iñascaaba. Nim̄pa:

—Anicpa jém atebet Jerusalén̄ jut̄ p̄imī ayaachwattap̄. Tsam̄ p̄imī amalwadáȳpa jém w̄idaytam̄, jém cobacpic̄ panijyaj̄, y jém escribaspic̄ maestroyaj̄. Ocmī accaatap̄ y jém tucunajamā ap̄ispa. 22 Jesic jém Peto inwejput̄ Jesús, iwogáy. Nim̄pa:

—Mán̄omi, odoy j̄ic̄i iga iñ̄ascaaba jempic̄.

23 Pero áms̄et̄ Jesús, n̄imayt̄a jém Peto:

—MiPeto, mich miwocciwiñ̄, acupóyaayi. Mich anact̄an̄cawattooba. Da inij̄ jém Dios ij̄ixi. Iniīt̄ jém p̄ixiñtam̄ ij̄ixi.

24 Jesic Jesús iñímáy jém icuyujc̄wiñ̄:

—Siiga ī atún̄ȳytooba, w̄i iga ichaguñ̄ iga iwatpa juuts̄ je ixunpa, w̄itim̄ iga iyaach̄iyiñ̄ cuando yaachwattap̄ juuts̄ ich anyaach̄iȳpa, jesic atún̄ȳiyi. 25 Siiga tum̄ p̄ixiñ̄ tsam̄ itoȳpa ivida iga itpa ȳip̄ naxyucmi, jesic togoȳpa jém ivida. Pero siiga accaatap̄ tum̄ p̄ixiñ̄ ich an̄cuyucmi, jesic jém p̄ixiñ̄ da togoȳpa ivida, itpa para siempre. 26 Da ti cuwat̄cuȳ siiga tum̄ p̄ixiñ̄ iniit̄ itump̄iȳ jém w̄ib̄ic̄ cosa jém itw̄ip̄ ȳip̄ naxyucmi, pero ocmī togoȳpa ianama. Tum̄ p̄ixiñ̄ da w̄iap̄ iyoj̄ con tumiñ̄ iga ip̄ictson̄pa eybic̄ jém ianama cuando caaneum. 27 Ich, jém aMiñ̄new̄ip̄ S̄nyucmi, eybic̄ amiñ̄pa con anJatun̄ Dios ip̄imī. An̄waganamiñ̄pa jém s̄nyucm̄pic̄ p̄ixiñtam̄. Anyojpa cada tum̄tum̄ jém p̄ixiñ̄ según̄ juuts̄ iwatne jém iyoxaji. 28 Numa, mannímáȳpa iga algunos de mimichtam̄ miñ̄tan̄w̄ip̄ ȳim̄ da micaaba hasta que iñ̄ixt̄ampa cuando amp̄ictson̄pa jém anJatun̄ ip̄imī iga ananjacpa jém Dios ip̄ixiñtam̄.

17

An̄c̄ac̄ jém Jesús iámooyi

(Mr. 9:2-13; Lc. 9:28-36)

1 Jesic cuando nasum seis día, Jesús inin̄ic̄ jém Peto, Jacobo y Xiwan, jém Jacobo it̄iw̄i, tum̄ mij̄pic̄ cots̄icyucmi. Icutum̄ n̄icyaj̄. 2 Jemum̄ iixyaj̄ iga an̄c̄ac̄ jém Jesús iámooyi. Aguī p̄imī tsocpa jém iámooyi juuts̄ jém jama. P̄imī popo jém ipuct̄ucu juuts̄ tum̄ juct̄ī ichoc̄a.

3 Jesic jeetī rato iixyaj̄ wisten̄ jém wiñ̄c̄pic̄ p̄ixiñ̄, jém Moisés y jém Elías, an̄matyaj̄pa con Jesús. 4 Jesic jém Peto iñímáy Jesús:

—Mán̄omi, aguī w̄i iga taift̄ampa ȳim̄. Siiga in̄w̄ian̄jam̄ an̄watpa tucuten̄ nacxt̄ic̄, tum̄ para mimich, tum̄ para jém Moisés, tum̄ para jém Elías.

5 Iganam̄ j̄ȳpa jém Peto, act̄in̄ tum̄ ucsī aguī tsocpa. In̄mon̄ itump̄iȳ. Jesic imatonyaj̄ tum̄ j̄iyī jém ucsanjom̄. Nim̄pa:

—Ȳip̄ ich amManic, tsam̄ antoȳpa. Matón̄aȳtaamī ti miñímáȳpa.

⁶ Cuando imatonɣaj jém j̄yi, jém icuyujc̄iwiñ tocsneactiɣaj naxyucmi. Tsam p̄imi c̄iɣaj. ⁷ Ocmi Jesús icunúc jém icuyujc̄iwiñ, ichicyaj, nímayyajt̄ap:

—Tsuc̄umi. Odoy c̄iɣtaami.

⁸ Cuando ámquím̄yaj jém icuyujc̄iwiñ, dam i iixyaj. Tsíy Jesús icutum.

⁹ Iganam quetyajpa jém cotsicyucmi, Jesús inqúimpa jém icuyujc̄iwiñ. Iñímáy:

—Odoy i anmadaayi ti íñix jém cotsicyucmi hasta que accaat̄ap y p̄ispa jém Miññew̄ip Siɣyucmi.

¹⁰ Jesic jém icuyujc̄iwiñ icwácyajpa Jesús. Nímayt̄ap:

—¿Jesic tiiga n̄impa jém escribasp̄ic maestroyaj iga miñpa wiñti jém Elías?

¹¹ Jesic Jesús icutson, nímayyajt̄a:

—Numa, wiñti miñpa jém Elías iga iw̄itsacpa itump̄iy cosa. ¹² Sīp mannímáypa iga oyñeum jém Elías, pero jém ityajw̄ip sīp da iixp̄icyaj. Imalwadayyaj juuts jeeyaj ixunyaipa. Jesaptim imalwadayyajpatim jém Miññew̄ip Siɣyucmi.

¹³ Jesic jém icuyujc̄iwiñ icutīiȳyay iga cuando n̄impa Jesús iga núcneum jém Elías, n̄imtooba iga jém Xiwan jém acch̄iɣoypaap.

*Jesús icp̄is tum jaych̄ixi jém imatsnew̄ip tum mal esp̄iritu
(Mr. 9:14-29; Lc. 9:37-43)*

¹⁴ Cuando núc̄gacum Jesús jut̄ an̄tuumaneyaj tsam jáyan p̄ixiñtam, tum p̄ixiñ icunúc Jesús, icosteeñáy iwiñjom. Iñímáy:

¹⁵ —Maestro, yaachanj̄ami jém amman̄ic. Tsam imatspa jém ataque. P̄imi iyaachwatpa. Watciy actiɣpa juctjom y jém n̄ic̄im. ¹⁶ Anamíñáy jém in̄cuyujc̄iwiñ iga icp̄isyaj, pero jeeyaj da w̄iap icp̄isyaj.

¹⁷ Jesic Jesús iñímáy jém ityajw̄ip jem:

—A que mimichtam, hasta sīp da in̄cupictámpa Dios. Jáyum tawagaiti con mimichtam, pero datim in̄cupicta. Tsam anyaach̄iyum iga manan̄quejáypa jém Dios in̄mat̄i, pero da in̄cutīiȳytámpa. Anamíñaayi jém ts̄ixi.

¹⁸ Jesús iwogáy jém mal esp̄iritu, jesic put̄ jém jaych̄ixi ianaman̄jom. Jeeti rato p̄is.

¹⁹ Más ocmi jém icuyujc̄iwiñ iyamnímáy Jesús. Icwácyaj:

—¿Tiiga da w̄ia antopta jém mal esp̄iritu?

²⁰ Jesic Jesús iñímáy:

—Da w̄iap iñtopta porque da in̄wicupicpa iga Dios miyoxpátpa. Numa mannímáypa siiga in̄cupicpa uxan̄ juuts tum xutu mostaza ipac, w̄iap iñímáy ȳip cotsic: “Caayi de ȳim, n̄ici jeexic.” Jesic cáypa jém cotsic. W̄iap in̄watta itump̄iy cosa siiga numa in̄cupicpa iga Dios miyoxpátpa. ²¹ Pero yicxp̄ic mal esp̄iritu w̄iap iñtopta siiga in̄in̄wejpátpa Dios y siiga in̄watpa ayuno.

*Eybīc n̄impa iga accaat̄ap Jesús
(Mr. 9:30-32; Lc. 9:43-45)*

²² Iganam wagas̄iyajpa Jesús con icuyujc̄iwiñ jém naxyucmi de Galilea, moj in̄madáy Jesús ti iñascaaba. N̄impa iga jém Miññew̄ip Siɣyucmi c̄iɣuɣcott̄ap jém malop̄ic p̄ixiñtam ich̄ijom. ²³ Ocmi accaat̄ap, pero jém tucunajama p̄ispa. Jesic cuando imatonɣaj jém icuyujc̄iwiñ tsam p̄imi anyácyaj.

Ts̄éct̄ap impuesto para jém mijp̄ic mast̄ic

²⁴ Cuando núcyaj jém at̄bet Capernaum jém Jesús con icuyujc̄iwiñ, jesic miñ jém ichécyajpaap impuesto para jém mijp̄ic mast̄ic. Miñ íamyaj jém Peto. Icwácyajpa. Nímayt̄ap:

—¿Que da iyojpa impuesto jém immaestro para jém mijp̄ic mast̄ic?

²⁵ Icutson jem Peto, nimpa:

—Ji, iyojpa.

Jesic cuando tigiy jem Peto jem ticjom jut it Jesús, wiñti jiy jem Jesús, nímaytap jem Peto:

—MiPeto, ¿ti iñjisa, jem reyyaj jem ityajwiip yíp naxyucmi, i ichégáypa jem impuesto? ¿Jem itiwitam o jem tungac pixiñ jem dapic jempic?

²⁶ Icutson jem Peto:

—Jem tungac pixiñ jem dapic jempic.

Jesic Jesús iñimáy:

—Jesic jem itiwitam da iyojpa. ²⁷ Pero iga odoy tajóyixiñ jem ichécyajpaap jem impuesto, nice jem laguna, coti jem iñaawi. Topi jem tiipi jem mojpaaap iñxuy. Impátpa ijipjom tum tumiñ. Ictsiypa jem tumiñ iga iñyojpa jem impuesto para mimich y para aich. Jesic nigijoji.

18

I tsíypa jem más mijpic anjagooyi
(Mr. 9:33-37; Lc. 9:46-48)

¹ Jeetim jama icunúcyaj Jesús jem icuyujcwiñ. Iñimayyaj:

—Cuando núcpa jem tiempo iga Dios injacpa yíp naxyucmi, ¿i tsíypa más mijpic anjagooyi de aichtam?

² Jesic Jesús injejáy tum xutu tsixi. Iñimáy:

—Miñi miteñi yim jem ancuyujcwiñ iwiñjom.

³ Jesic Jesús iñimáy jem icuyujcwiñ:

—Numa mannimáypa, siiga da incucacpa jem iñjixi y da michíypa juuts tum xutu tsixi, da wiap iñtigiy jut injacpa Dios. ⁴ Jem tsíypáppic juuts jem más mijpic anjagooyi, je jem nimpáppic iga da ti wiap, tsíypa juuts yíp xutu tsixi. ⁵ Siiga tum pixiñ iwipictsonpa tum jem ammichipic jem dapic juchan juuts yíp xutu tsixi, awipictsonpatim aich.

Wi iga tanawattap cuenta iga odoy tammalwadiñ
(Mr. 9:42-48; Lc. 17:1-2)

⁶ Siiga i icwatpa táñca tum pixiñ, jem yaguiñpic acupicpa aich, más wi iga cutsénaytaiñ isciyucmi tum mijpic molino icha iga jiccaiñ lamar jut tsam jojmi. ⁷ Agui uuguytim jem ityajwiip yíp naxyucmi porque siempre it jem malopic pixiñ jem icwatpáppic táñca jem itiwitam. Tienes que iñascaaba jempic, pero agui uuguytim jem pixiñ jem icwatpáppic táñca jem itiwí.

⁸ Siiga inji o impuy micwatpa táñca, jesic jaci, patsaayi. Más wi iga mitigiypa jut it jem vida micitaca o mipuytaca que iga micottap juctjom jut da nunca píchpa con icuistic inji o icuistic impuy. ⁹ Siiga iñixcuy micwatpa táñca, jesic topi jem iñixcuy, patsaayi. Más wi iga mitigiypa jut it jem vida con tum iñixcuy que iga micottap jem juctjom jut da nunca píchpa con icuistic iñixcuy.

Jem pixiñ iborrego jem togoyñewip
(Lc. 15:3-7)

¹⁰ Odoy jóyixi jem tsixtam y jem yaguiñpic icupicyajpa ich ananmati. Porque cada tumtum de jeeyaj iwatyajpa cuenta jem siñyucmic pixiñtam, jem ityajwiip jem tanjatun Dios iwiñjom. ¹¹ Jeeyucmi amiñ siñyucmi iga ancíacpudiñ jem togoyñeyajwiip.

¹² ¿Ti miñimpa mimichtam? Siiga tum pixiñ iniit cien borrego y togoypa tum, ¿jesic ti iwatpa jem iomi? Tienes que ipoychacpa jem noventa y nueve. Nicpa iméts jem togoyñewip cotsiganjoj. ¹³ Siiga ipátpa jem togoyñewip, más pimi maymáypa jem pixiñ

con jém tum jém ipátnewiip que con jém noventa y nueve jém dapic togoyñe. ¹⁴ Jesaptim jém tanJatun Dios, jém itwiip siñyucmi, da ixunpa iga togoypa ni tum jém xutupic.

Jutpic tanwadáy perdón jém tantiwitam
(Lc. 17:3)

¹⁵ Siiga tum iñtiwi mimalwadáy, jesic nigí aami incutum, wogaayi iga mimalwadáy. Siiga mimatóñaypa, jesic da togoypa jém iñtiwi. ¹⁶ Siiga da mimatóñaypa, jesic nanici tunḡac jém iñtiwi o wisten iga con wisten o tucuten testigo wiḡuejiñ ti miñimayñe y ti iññimáytim jém pxiñ jém mimalwadáyñewiip. ¹⁷ Siiga datim mimatóñaypa con jém testigo, jesic nigí nimaayi itumpiy jém Dios ipixiñtam jut antuumayajpa. Pero siiga jém pxiñ datim imatóñaypa itumpiy jém Dios ipixiñtam, jesic jém pxiñ tsíy juuts tum malopic pxiñ jém dapic icupicpa Dios, juuts tum jém ichécpáppic impuesto.

¹⁸ Numa mannímáypa jém dapic iñjictámpa iga wattap yíp naxyucmi, jesic datim i ijícpa iga wattaiñ siñyucmi. Jém iñjícáppic iga wattaiñ yíp naxyucmi, jictaptim iga wattap siñyucmi.

¹⁹ Mannímáypatim siiga wisten de mimichtam yíp naxyucmi miitta de acuerdo iga inwágaytámpa Dios titam iñxunpa, jesic michiitámpa jém anJatun Dios jém itwiip siñyucmi. ²⁰ Porque jut antuumaneyaj wisten o tucuten jém pxiñ ich anniyimi jemtum anwaganaitayaj jém ampixiñtam.

²¹ Jesic miñ jém Peto. Icwácpa jém Jesús. Nimpa:

—Mánomi, ¿juna veces anwadáypa perdón tum jém antiwi siiga amalwadáypa? ¿Hasta siete veces?

²² Jesic Jesús icutson. Nimpa:

—Da mannímáypa iga hasta siete veces, pero mannímáypa hasta setenta veces por siete.

Jém dapic iwadáypa perdón jém itwi

²³ Cuando injacpa Dios yíp naxyucmi, iwatpa juuts tum rey cuando itoppa icuenta con jém icuyoxayajpaap. ²⁴ Moj itop icuenta, inwejay tum jém icuyoxapaap jém icnucsnewiip diez mil jém tumiñ de plata iñiyi talento. ²⁵ Pero jém pxiñ da wiap icseedáy jém rey itumiñ. Jesic jém rey ipimíy iga máytaiñ jém pxiñ con iyomo con ichixtam con itumpiy jém iniitwiip iga icsetpa jém tumiñ. ²⁶ Jesic jém pxiñ icosteeñáy jém rey iwiñjom. Icnucsáypa. Nimpa: “Mánomi, apoyyaachiyi. Manacseedáypa jém iñtumiñ. Ich yajpa manyoj.” ²⁷ Jesic jém rey tsam iyaachanjam jém pxiñ. Icutsigáy, iwadáy perdón iga da icseedáy jém itumiñ. ²⁸ Cuando put de jem, ipát tum icompañero, icuyoxaptim jém rey. Icnucsne jém icompañero cien tumiñ de plata. Jesic imats jém pxiñ, inpenjagáypa iisci. Nimpa: “Acseedaaayi jém antumiñ jém manacnucsnewiip.” ²⁹ Jesic jém tunḡac jém icuyoxapaap jém rey, icosteeñáy jém pxiñ. Moj iwágáy perdón. Nimpa: “Apoyyaachiyi. Manacseedáypa jém iñtumiñ jém manucsayñewiip.” ³⁰ Pero jém pxiñ jém wadayñetawwip perdón diez mil jém talento, da iwadáypa perdón jém icompañero. Icot cárcel hasta icsetpa jém tumiñ. ³¹ Jesic cuando iixyay ti wat jém pxiñ, los demás jém icuyoxayajpaap jém rey, tsam toy ianama, nic inmadayyaj jém rey ti wat jém pxiñ. ³² Jesic jém rey eybic inwejay jém icuyoxapaap. Iñimáy: “Agui mimalo. Ich manwadáy perdón itumpiy jém tumiñ jém manacnucsnewiip iga da anáseedáypa porque tsam ancnucsáy iga manwadáyñiñ perdón. ³³ ¿Tiiga da iñyaachanjam jém incompañero jém inicnucsnewiip uxan tumiñ juuts ich manyaachanjam?” ³⁴ Jesic tsam pimi jóy jém rey. Icijunꞑcot jém policía icijom iga yaachwattaiñ cárcel hasta que icsetpa itumpiy jém tumiñ.

³⁵ Jesic Jesús yaj inmat jém cuento. Nimpa:

—Miwadáypatim jempic jém anJatun Dios jém itwip sɨnyucmi siiga da inwadáypa perdón inanamajom jém inñiwitam, jém mimalwadayñewip.

19

*Da wɨ iga ichacpa iyomo tum pɨxiñ
(Mr. 10:1-12; Lc. 16:18)*

¹ Jesic cuando yaj inmat Jesús, put jém naxyucmi de Galilea, nic jém naxyucmi de Judea. Jac jém ni anwiñtuc, jém río Jordán. ² Tsam jáyay pɨxiñtam itúnjyyajpa Jesús. Jemum icpis jém mimneyajwip.

³ Jesic miñyay algunos jém fariseoyaj iga icutitsyajpa jém Jesús. Nímyajpa:

—¿Que wɨap ichac iyomo tum pɨxiñ siiga da imalwatne?

⁴ Icutson Jesús. Inñímáy:

—¿Que da immayñe ti nɨmpa jém Dios inmati cuando moj iti itumpiy cosa: “Dios iwat tum pɨxiñ y tum yomo”? ⁵ Nɨmpatim jém Dios inmati: “Jeeyucmi tum pɨxiñ ichacpa jatun con iapa iga iwaganaitpa jém iyomo. Icuistic tsíypa tumti mɨjtay.” ⁶ Jesic jém pɨxiñ con iyomo dam wisten. Tsíy tumti mɨjtay. Jeeyucmi da wɨ iga ichacpa iyomo jém Diospic in tuumawatne.

⁷ Jesic jém fariseoyaj icwácyaj jém Jesús. Nímayta:

—¿Tiiiga nɨm jém Moisés iga tum pɨxiñ wɨap iwadáy jém iyomo tum acta iga natsacyajta con iwídaya?

⁸ Jesús inñímáy:

—Mimichtam, tsam malo innama, jeeyucmi jém Moisés ijícpa iga inñhactámiñ jém inyomo. Pero cuando moj iti itumpiy cosa, da iwatyajpa jempic. ⁹ Mannímáy-patim siiga j ichobychacpa jém iyomo jém dapic pejoyñe iga ipícpa tunyac yomo, jesic pejóypa jém pɨxiñ. Jém ipicpáppic jém yomo jém tsacnetawip, pejóypatim.

¹⁰ Jesic jém icuyujcɨwiñ inñímáy Jesús:

—Siiga tsam táñca iga ichacpa iyomo tum pɨxiñ, jesic más wɨ iga odoy yoomíyñ.

¹¹ Jesús inñímáy jém icuyujcɨwiñ:

—Da itumpiy pɨxiñ wɨap iit sin yomo, nada más jém icupinewip Dios. ¹² It algunos jém pɨxiñ da wɨap iyoomíy porque jempam nay. Ittim algunos da wɨap iyoomíy porque tunyac pɨxiñ icapunne. Ittim algunos jém pɨxiñ da yoomíypa iga más wɨañ iwat jém Dios iyoxacuy. Jém wɨapaap iwat jempic wɨ iga iwadiñ.

*Jesús ichiiba bendición jém tsixtam
(Mr. 10:13-16; Lc. 18:15-17)*

¹³ Jesic ocmi namíñayajta Jesús jém xuxut tsixtam iga ichicunúgáyñ icobac y iga inwejpádáyñ Dios para jeeyaj. Pero jém icuyujcɨwiñ iwogayyaj jém inimiññeyajwip jém tsixtam. ¹⁴ Pero nɨmpa Jesús:

—Jígaytaami iga míñiñ aámyaj jém xuxut tsixtam, odoy anjijyaci. Porque jém injjacyajpáppic Dios jex juuts yíp xuxut tsixtam.

¹⁵ Jesic Jesús ichicunúgáy jém tsixtam icobac. Ocmi nic.

*Tum ricopic pɨxiñ anmatpa con Jesús
(Mr. 10:17-31; Lc. 18:18-30)*

¹⁶ Jesic ocmi núc tum pɨxiñ danam tsami. Miñ íam jém Jesús. Nɨmpa jém pɨxiñ:

—Agui wɨbɨc miMaestro, ¿ti wɨap anwat iga anaitpa jém vida jém dapic cuyajpa?

¹⁷ Jesic Jesús inñímáy:

—¿Tiiiga miñimpa iga ich agui awi? It no más tum jém wibic, je jém tanjatun Dios. Siiga impictson̄tooba jém vida jém dapic cuyajpa, jesic wat̄i juuts nimpa jém Dios in̄químayooyi.

¹⁸ Jesic nimpa jém p̄ixiñ jém dapic tsami:

—¿Jupp̄ic an̄químayooyi?

Nimpa Jesús:

—Odooy accaoooyi, odooy pejooyi, odooy nuumi, odooy cumigóyooyi. ¹⁹ Naidaayi respeto jém in̄jatun y jém in̄apa. Toyi jém in̄t̄iwi juuts minitoytap in̄yaac.

²⁰ Nimpa jém p̄ixiñ:

—Ich jemp̄igam an̄watne dende ats̄ixiñam. ¿T̄i más atogóyáy?

²¹ In̄ímáy Jesús:

—Siiga caps̄pa in̄wat itump̄iy juuts ixunpa Dios, cumáyaayi itump̄iy jém iniitw̄ip, chíi jém tumiñ jém yaachayajpaap. Jesic iniitpa s̄nyucmi jáyan w̄ibic riqueza. Jesic miñi atún̄iyi.

²² Mu imaton̄ ti in̄ímáy Jesús, nic jém p̄ixiñ. Tsam p̄imi anyác porque tsam p̄imi rico.

²³ Jesic Jesús in̄ímáy jém icuyujc̄iwiñ:

—Numa man̄ímáypa, tsam p̄imi t̄ajca iga tiḡiypa tum ricop̄ic jut̄ in̄jacpa Dios. ²⁴ Eyb̄ic man̄ímáypa. Más da t̄ajca iga naspa tum camello tum núncuypac ij̄osjom que iga tiḡiypa tum rico jut̄ in̄jacpa Dios.

²⁵ Cuando imaton̄yay jém icuyujc̄iwiñ, tsam p̄imi ichigan̄jéc̄yay. Nimyay:

—¿Jesic i w̄iap ic̄iiput?

²⁶ Jesic Jesús iámmats jém icuyujc̄iwiñ. In̄ímáy:

—Numa, jém p̄ixiñtam da w̄iap iwatyay, pero Dios w̄iap iwat porque Dios w̄iap iwat itump̄iy cosa.

²⁷ Jesic nim jém Peto:

—Mán̄omi, aichtam antsacnetámum itump̄iy jém anaitw̄ip idic, mantún̄iyñetámum. ¿Jesic ti amp̄ictson̄támpa?

²⁸ Jesic Jesús icutson̄. In̄ímáy jém icuyujc̄iwiñ:

—Numa man̄ímáypa iga mimichtam, jém antún̄iytampaap, cuando joomasetpa yip nas, ich jém aMiññew̄ip S̄nyucmi acoñpa jém mijp̄ic coñcuyucmi con Dios ip̄imi. Jesic mimichtam micoñtámpa jém doce coñcuyucmi iga in̄injactámpa jém doce grupo de jém Israelp̄ic p̄ixiñtam. ²⁹ Itump̄iy jém ichacneyajw̄ip jém itic, o it̄iwitam, ijatun, iapa, iyomo, ichixtam, o in̄as ich an̄cuyucmi, Dios icseedáypa yip naxyucmi cien veces más. Ip̄ictson̄yajpatim jém vida jém dapic cuyajpa. ³⁰ Jáyan jém p̄ixiñtam, jém an̄jagoyñeyajw̄ip, ts̄iyyajpa tuuñian̄c̄im. Jém tuuñian̄c̄imp̄ic, an̄jagoyajpa.

20

Jutsap iyoj Dios jém iyoxac̄iwiñ

¹ Jém Dios iyoxacuy jex juuts tum p̄ixiñ nasiyw̄ip. Tum jama, joccuquej, nic iméts jém yoxac̄iwiñ iga icyoxayajpa jém ifinca de uvas. ² Ipát̄yay, iwat trato con jeeyaj iga iw̄iyojpa jém jama. Ocmi icutsat jém ifinca de uvas. ³ Jesic yucm̄im jama, como las nueve, eyb̄ic nic jém p̄ixiñ jém plaza. Jemum iix algunos da in̄iyaj yoxacuy. ⁴ In̄ímáy: “Mimichtam n̄ictaami miyoxajitam jém amfinca. Man̄w̄iyojpatim.” Jesic jeeyaj n̄icyajpatim yoxaji. ⁵ Eyb̄ic nic jém finca iomi jém plaza cugapjama y a las tres de la tarde. Jemp̄ictim iwat. ⁶ Jesic a las cinco de la tarde eyb̄ictim nic jém plaza. Ipát̄ algunos jém p̄ixiñtam da in̄iyaj yoxacuy. In̄ímáy: “¿T̄iiga miitta yim? ¿Muma jama da s̄ip in̄yoxata?” ⁷ Nimyajpa: “Da i oy amétsta iga niguiñ ayoxajitam.” Jesic nimpa jém finca iomi: “Jesic niḡi miyoxajitam jém amfinca. Man̄w̄iyojpatim.”

⁸ Jesic cuando tigiyñeum jama, jem finca iomi inímay jem cabo jem iwatpaap cuenta jem ifinca: “Siip anwejayyaji jem anyoxaciwiñ, vojyaji. Wiñti yoji jem ocmipic núcyaj. Jesic ocmi yojitim jem wiñtipic núcyaj.” ⁹ Cuando núcyaj jem miññeyajwip a las cinco, itumpiy wiyoyajta juustim yoxane muma jama. ¹⁰ Ocmi cuando núcyaj jem mojnewip miñi, ijisyajpa iga más jáyan vojyajtap. Pero jesañtim vojyajtap juuts jem tigiyñewip a las cinco de la tarde. ¹¹ Jesic yaj ipictsonyay jem icoñwiyooyi, moj icujyiyaj jem finca iomi. ¹² Jesic inímayyay jem finca iomi: “Jem ocmipic núcyaj yoxayaj tum hora no más, pero jesañtim ipictsonyay juuts aichtam. Tsam pimi ayoxata muma jama, anyaachiyta jem jampiji.” ¹³ Jesic jem finca iomi icutson. Inímay tum jem pixiñ jem icujiyñewip: “Amigo, da mammalwaday ni uxay. ¿Que da manawat trato iga manyojpa tum jama icoñwiyooyi?” ¹⁴ Jesic pici jem incoñwiyooyi, nicsim. Ich anyojtooba jem ocmipic núc jutsañtim mich manyoj. ¹⁵ ¿Que da wiap anwat juuts ich ansunpa con antumiñ? Tsam miñajajóypa porque ich anwíwadáypa jem tungac anyoxaciwiñ.” ¹⁶ Jem tuuñiançimpic anjagóypa. Jem anjagoyñewip tsíypa tuuñiançim. Jáyan jem pixiñtam anwejayyajtap, pero da wati jem cupineyajtawip.

Tucciy nimpa Jesús iga accaatap

(Mr. 10:32-34; Lc. 18:31-34)

¹⁷ Cuando niquiyaj Jesús tunjom iga nicpa Jerusalén, inwejay aparte jem icuyujciwiñ. Inímay:

¹⁸ —Matontaami. Siip tanictámpa Jerusalén. Ich, jem aMiññewip Siñyucmi, acijunçottap jem panij anjagooyi icijom y jem escribaspic maestroyaj icijom. Jeeyaj acipinpa, achiiba mijpic castigo. Ocmi ijisyajpa iga accaayajpa. ¹⁹ Acijunçottap jem tungac pixiñ icijom iga axiccayajpa, acótsyajpa y acunúnyajpa cunusyucmi. Accaayajpa, pero jem tucunajama apispa de jut it jem caaneyajwip.

Jem Jacobo y Xiwan iapa iwác tum favor

(Mr. 10:35-45)

²⁰ Ocmi icunúcyaj Jesús wisten jem icuyujciwiñ jem Jacobo y Xiwan. Iwaganamiñyay iapa, jem Zebedeo iyomo. Costeñ jem Jesús iwiñjom iga iwágáypa tum favor. ²¹ Jesic Jesús icwácpa jem yomo. Nimayta:

—¿Íi inxunpa?

Nimpa jem yomo:

—Cuando ininjacpa yíp naxyucmi, ansunpa iga yíp wisten ammanic ipictsoniñ tum mijpic cargo. Tum coñpa mich ininjwimi y tum ininjaymi.

²² Pero Jesús icutson, inímay:

—Mimichtam da injodontam ti inwácpa. ¿Que mimichtam wiap inyaachiy jem yaachaji jem ichpic ampictsonpa? ¿Wiap inuc jem copa jem ichpic ánucca?

Nimpa jem wisten:

—Awiatámpa.

²³ Jesic Jesús inímay:

—Numa inucpa jem copa jem ichpic ánucca y wiap impictson jem yaachaji juuts ampictsonpa aich. Ich da wiap manchi jem derecho iga nicpa micoñi ananjwimi y ananjaymi. Ichiiba anjatun Dios jem icupinewip.

²⁴ Jesic cuando imatonayaj jem diez icuyujciwiñ, tsam ijóyiyaj jem wisten. ²⁵ Pero Jesús inwejay los demás jem icuyujciwiñ iga inmadáypa. Nimpa:

—Michtam injodon iga jem juumipic pixiñtam injagooyiyaj tsam ipimíypa jem ipixiñtam. Jem más mijpic anjagooyi más pimi ipimíypa jem ipixiñtam. ²⁶ Pero mimichtam da inwattámpa jempic. Siiga mijpic minjagooyi, jesic inçuyoxap jem

iñt̄iwitam. ²⁷ Jém más mijpic anjagooyi entre mimichtam micuyoxap juuts tum esclavo. ²⁸ Inwattámpatim juuts aich. Ich amiñ sinyucmi iga ancuyoxap jém ityajwip yíp naxyucmi. Da amiñ iga acuyoxatap. Amiñ iga anchiiba amvida iga anyojáypa jáyan p̄ixiñtam itájca.

Jesús icpis wisten cácht̄i
(Mr. 10:46-52; Lc. 18:35-43)

²⁹ Jesic cuando putyaj jém attebet Jericó, tsam jáyan p̄ixiñtam itún̄iyajpa Jesús. ³⁰ Wisten cácht̄i coñyaj jém tun̄ añaca. Cuando imaton̄yaj iga naspa Jesús, jesic p̄imi j̄iyajpa jém cácht̄i. N̄imyaj:

—Mán̄omi, jém rey David mim̄anic, ayaachanjami aichtam.

³¹ Pero jém itún̄iyajpaap Jesús iwogayajpa jém cácht̄i. Iñimayajpa iga odoy j̄iyajiñ. Pero más p̄imi j̄iypa jém cácht̄i. N̄imyaj:

—Mán̄omi, mich jém rey David mim̄anic, ayaachanjami.

³² Jesic teeñanjac Jesús. Inwejáy jém wisten iga miñyajiñ. Cuando núc, iñímáy Jesús:

—¿T̄i iñxunpa iga man̄wadáypa?

³³ N̄imyaj jém cácht̄iyaj:

—Mán̄omi, ansunpa iga aixixóyiñ.

³⁴ Jesic iyaachanjampa Jesús. Ichigáy iixcuy. Jeeti rato ixixóypam. Mojum itún̄iyaj jém Jesús.

21

Tiḡiy Jerusalén jém Jesús
(Mr. 11:1-11; Lc. 19:28-40; Jn. 12:12-19)

¹ Cuando núcyajtooba Jerusalén, núcyaj wiñti jém attebet Betfagé nocojom jém Olivos cotsic. Jesic icutsat wisten jém icuyujc̄iwiñ tun̄gac xutu tigan̄joj. ² Iñímáy Jesús:

—Nictaami jém tigan̄joj jexpic it. Cuando miñúctámpa impáttámpa tum burroapa tsenne con im̄anic. W̄iji, anamíñaayi. ³ Siiga j̄ micwácpa iga: “¿T̄iiga in̄wijpa?” jesic nímaayi iga jém tán̄omi ixunpa y da jáypa micutsadáypa eybic.

⁴ Jempigam iwatyaj iga cupacpa jém añmat̄i jém ijaychacnew̄ip jém wiñicpic añmat̄c̄iwiñ. N̄impa:

⁵ Nímaayi jém ityajwip jém attebet Jerusalén:

“Ixtaami iga miñpa jém iñ̄Rey.

Da malo, da nacujíptap.

Iquím̄cane tum burro.

Miñpa tum mañburroyucmi, tum burroapa im̄anic.”

⁶ Jesic nic̄yaj jém wisten icuyujc̄iwiñ. Iwatyaj juuts iñímáy Jesús. ⁷ Inimiñyay jém burroapa con im̄anic. Icutócyaj con iyootiyaj. Jesic iquím̄ca Jesús jém mañburro. ⁸ Miñyay tsam jáyan p̄ixiñtam y yomtam. Itócyajpa iyooti tun̄jom jūt naspa Jesús. Tun̄gac it̄inyajpa jém cuy in̄cis y jém ay iga itócyajpatim tun̄jom. ⁹ Algunos anjagoyñeyaj iñic y algunos miñyajpa jém Jesús ituuñian̄c̄im. P̄imi añweyjajpa. N̄imyaj:

—Tan̄cujíptámpa jém rey David iM̄anic. Agui w̄i yíp tan̄anjagooyi jém tacutsadayñew̄ip Dios. Agui w̄i jém tan̄jatun̄ Dios.

¹⁰ Cuando tiḡiy Jesús jém attebet Jerusalén, tsam cujínayajpa itump̄iy jém p̄ixiñtam. Nacwácayta:

—¿Iapaap yíp p̄ixiñ?

¹¹ Jesic n̄imyajpa jém p̄ixiñtam jém miññeyajwip con Jesús:

—Yíp p̄ixiñ Jesús jém Dios in̄mat̄c̄iwiñ. Nazaretpic p̄ixiñ de jém naxyucmi de Galilea.

Jesús iccuáy jém mijpíc mastíc
(Mr. 11:15-19; Lc. 19:45-48; Jn. 2:13-22)

¹² Ocmi tigiy Jesús jém mijpíc mastícjom. Moj iquebacput itumpiy jém máymáyoyyajpaap con itumpiy jém juyjúyoyyajpaap. Ichiputseedáy jém imesayaj jém icucacyajpaap tumiñ. Imutsmutsseedáy jém icoñcuuyaj jém imáyyajpaap cuucu. ¹³ Iñímáy Jesús jém ityajwiiip jem:

—Nimpa jém Dios inmati jém jayñewiip: “Antsac antic jut iwatyajpa oración jém pixiñtam.” Pero mimichtam inicsetneta jém Dios imastic juuts tum tic jut it jém númyajpaap.

¹⁴ Jesic miñ iámyaj Jesús jém mijpíc mastícjom jém cáchti y jém cuxuyaj. Icpis. ¹⁵ Jém cobacpic panijyaj con jém escribaspic maestroyaj agui jóyñeyaj cuando iixyaj jém wibic milagro jém iwatnewiip Jesús y cuando imatonyaj iga pimi jiyaypa jém tsixtam mastícjom, nimyajpa: “Tanjucijptámpa jém rey David iManic.” ¹⁶ Jesic jém panijyaj iñímáy jém Jesús:

—¿Que da immaton ti nimpa yíp tsixtam?

Jesús icutson. Nimpa:

—Numa, ammaton. ¿Que da immayñe jém Dios inmati? Nimpa así: Dios ichiiba jixi jém xuxut tsixtam iga icujípyajiñ Dios juuts je iwianjam.

¹⁷ Jesic moj niqúi jém Jesús. Jemum ichac jém panij. Nic moñi jém xutu tiganjoj jém Betania.

Jesús imalnímáy jém tsuj
(Mr. 11:12-14, 20-26)

¹⁸ Jesic icuquejama, cuando setgacpa Jerusalén, tsam yuap jém Jesús. ¹⁹ Iix tum tsuj tunañaca. Nic icuámáy jém tsuj itim, pero da ipadáy. Nada más it jém iay. Jesic Jesús iñímáy jém tsuj:

—Da nunca mitímap eybic.

Jeeti rato tits jém tsuj. ²⁰ Cuando iixyaj jém icuyujcwiñ, agui ipooñanjamyaj. Icwácyaj jém Jesús. Nímayta:

—¿Tiiga tsam jicsciy tits jém tsuj?

²¹ Jesús icutson. Nimpa:

—Siiga tsam incupicpa iga Dios wiap iwat itumpiy cosa y siiga da iñjisa iñanamanjom iga da wiap, jesic da no más wiap inwat juuts ich añwadáy jém tsuj, pero wiaptim iñímáy yíp cotsic iga caayi de yim, nigí miniccántaji lamar, jesic miwadáypa Dios juuts inwágáypa. ²² Siiga numa incupicpa iga Dios wiap miyoxpát, jesic impictsonpa titam inwágáypa Dios.

Acwácta Jesús i icutsat
(Mr. 11:27-33; Lc. 20:1-8)

²³ Jesic tigiy eybic Jesús jém mijpíc mastícjom. Iganam accuyujóypa Jesús, icunúcyaj jém panij anjagooyiyaj con jém Israelpic wídaytam. Icwácyajpa. Nímayta Jesús:

—¿I michi jém pimi iga inwatpa juuts mich síp inwat? ¿I micutsat?

²⁴ Jesús icutson. Iñímáy:

—Ich manacwácpatim, siiga ancutsonpa, jesic mannímáypatim jut ampic jém pimi iga añwatpa juuts síp añwat. ²⁵ Anímaayi: ¿I icutsat jém Xiwan iga acchíñóypa? ¿Que Dios icutsat, o jém pixiñtam?

Jesic jém anjagooyiyaj nacwácyajta entre jeeyaj:

—Siiga tanimpa iga Dios icutsat jém Xiwan, jesic tanímáypa: “¿Tiiiga da inçupicta?”
²⁶ Pero siiga tannímáypa iga da je Dios icutsat jém Xiwan, jesic tsam tançinpa jém pïxiñtam porque icupicyajpa iga Dios icutsat jém Xiwan.

²⁷ Jesic icutsonyajpa. Nímaytap Jesús:

—Aichtam da anjodon i icutsat jém Xiwan.

Jesic Jesús iñímáy:

—Ich datim mannímáypa juť ampic jém autoridad iga anwatpa juuts síp anwat.

Jém cuento de jém pïxiñ con wisten imaníc

²⁸ Jesic Jesús inmadáy tum xutu cuento. Nimpa:

—¿Tí inñispa? Iniiť idic tum pïxiñ wisten ijaymaníc. Nic iñímáy jém tum: “Maníc, yíp jama nigí miyoxaji jém amfinca de uvas.” ²⁹ Jém imaníc iñímáy ijatun: “Da anicpa.” Pero ocmi icac ijixi, nic yoxaji. ³⁰ Jesic ocmi jém jatunpic nic iñímáy jém tungac imaníc: “Maníc, nigí miyoxaji yíp jama jém amfinca de uvas.” Jesic jém tungac imaníc iñímáy ijatun: “Ich anicpa.” Pero ocmi da nic. ³¹ Jesic anímaayi: ¿Juppic de jém wisten iwat juuts ixunpa ijatun?

Nimyaajpa jém anjagooyiyaj:

—Jém wiñtipic.

Nimpa Jesús:

—Numa mannímáypa iga jém malopic pïxiñtam jém ichécyajpaap impuesto y jém malopic yomtam tigiyajpa juť injacpa Dios wiñtitim antes que mimichtam. ³² Porque jém Xiwan jém acchinyopaap miñ iga minquejaytámiñ jutsap inwatta juuts ixunpa Dios, pero da inçupicta. Pero jém ichécyajpaap impuesto y jém malopic yomtam icupicyaj ti iñímáy jém Xiwan. Aunque iñixñeta iga jém malopic ichacyaj jém itánca, mimichtam da inçacta jém inñixi iga inçupictámpa jém Xiwan inmaťi.

Jém cuento de jém malopic yoxac#wiñ

(Mr. 12:1-12; Lc. 20:9-19)

³³ Nintim Jesús:

—Matontaami tungac xutu cuento: It idic tum pïxiñ nasiywip. Inñip tum finca de uvas. Icutanne. Iwat tum tsaajos juť itobáypa jém uvas iñi iga iwatpa jém vino. Iwattim tum torre juť iwatpa cuenta jém uvas.

’Cuando cupacneum, icnucs jém finca de uvas tungac pïxiñtam iga iyoxacaiñ. Ocmi nic jém nas iomi tungac naxyucmi juť tsam juumi. ³⁴ Cuando núc jém tiempo iga itúcyajpa jém uvas, jém finca iomi icutsat juten jém imozoyaj iga ipictsoniñ jém iomi imiichi. ³⁵ Pero jém iñucsneyajwip jém finca iga iyoxacaaba imatsyaj jém imozoyaj. Tum tsam icótsyaj, tum iccaayaj, tum iñácscayaj tsaami. ³⁶ Jesic eybic jém nas iomi icutsat tungac más jém imozo, pero jém iñucsneyajwip jém ifinca imalwadayyajpatim mex jeeyaj.

³⁷ Jesic ocmi jém nas iomi icutsat imaníc iga ipictsonpa jém ijatun imiichi. Nimpa: “Tienes que iwipictsonyajpa jém ammaníc.” ³⁸ Pero cuando jém iñucsneyajwip jém finca iixyaj iga miñpa jém iomi imaníc, moj nanímayyajtaji: “Yíbam ipictsonpa itumpiy jém ijatun imiichi. Tej tanacca, jesic taichtam tamichatámpa titam ichiiba jém ijatun.” ³⁹ Jesic imatsayyaj jém pïxiñ imaníc. Itopyaj anšicmi, iccaayaj.

⁴⁰ Jesic Jesús icwác jém panijyaj. Nimpa:

—Sip anímaayi: Cuando miñpa jém nas iomi, ¿tí iniwatpa jém iwatyajpáppic cuenta jém iñas?

⁴¹ Jesic jém panijyaj icutsonyaj, nimyaj:

—Accaayajtap itumpiy jém malopic p̄ixiñtam. Da iyaachanjampa ni uxaj jém finca iomi. Jesic ocmi icnucspa tungac p̄ixiñ, jém iwégaypaap jém cosecha cuando núcpa itiempo.

⁴² Jesic n̄impa Jesús:

—¿Que da immayñeta jém Dios in̄mati j̄ut jayñe? N̄impa:

Jém ticwatpaap ipatsaytip tum tsa.

Pero ocmi jeetim tsa piñta.

S̄ip jeetim tsa icóppacne jém tic.

Jempam iwat jém tanjatun Dios.

Cuando tánixtámpa, agui tampooñanjamtámpa.

⁴³ Jeeyucmi mannímáypa iga miccáyaytap jém w̄ibic an̄mati iga s̄ip Dios injacpa ȳip naxyucmi. Chiitap jém tungac p̄ixiñtam jém ichiipaap jém w̄ibic cosecha juuts ixunpa Dios. ⁴⁴ Siiga michutpa ȳip tsaayucmi, micusámáypa. Siiga ȳip tsa micuchijquetpa, jesic michíypa iga mipooti.

⁴⁵ Jesic cuando jém panij anjagooyiyaj con jém fariseoyaj imaton̄yay jém xuxut cuento, icutiyyiyaj iga jeeyaj icuyucmi in̄matpa Jesús jém xuxut cuento. ⁴⁶ Tsam imatsyajtooba Jesús, pero da w̄iap imatsyaj. Jém anjagooyiyaj tsam ic̄inyaj jém p̄ixiñtam porque jeeyaj icupicyajpa iga tum Dios in̄matc̄iwiñ jém Jesús.

22

Jém cuento cuando an̄coomíypa jém rey iman̄ic

(Lc. 14:15-24)

¹ Jesic Jesús in̄matpa tungac más cuento. N̄impa:

²—Jém tiempo cuando Dios injacpa jém p̄ixiñtam jex juuts tum rey cuando an̄coomíypa ijayman̄ic. Jém ijatun iwatpa tum mījpic s̄in. ³ Cuando yajum iw̄itsac itumpiy cosa, icutsat jém icuyoxayajpaap iga in̄wejayajpa jém p̄ixiñtam jém it̄ipneyajw̄ip. Pero jeeyaj da miñtooba. ⁴ Jesic eybic icutsat tungac más jém icuyoxayajpaap. In̄ímáy: “N̄imayyaji jém ant̄ipneyajw̄ip iga watneum jém w̄iccuy. Accaanetawum jém xix y jém borregoyaj jém anacp̄inew̄ip. S̄ip itum listo, miñyajiñ j̄ut it jém an̄coomíyóycuy.”

⁵ Pero jeeyaj da iwadáy caso. Tum nic icam̄jom, tum nic máymáyooyi. ⁶ Tungac imats jém icutsatneyajw̄ip jém rey, moj imalwadayyaj hasta iccaayaj algunos. ⁷ Jesic cuando imaton̄ jém rey ti iñasca jém icuyoxayajpaap, tsam p̄imi jóy. Icutsat jém soldado iga accaayajtaiñ jém accaoyñeyajw̄ip y iga nooquettaiñtim jém atebet j̄ut it jém malopic p̄ixiñtam. ⁸ Jesic eybic jém rey in̄ímáy jém icuyoxayajpaap: “Itum listo jém an̄coomíyóycuy, pero jém mojnew̄ip ant̄ip da w̄i iga miñpa. ⁹ Jesic nictaami j̄ut an̄wácne jém tun j̄ut nasyajpa jáyan jém p̄ixiñtam. N̄imayyaji itumpiy jém impátpáppic iga miñyajiñ j̄ut it jém an̄coomíyóycuy.” ¹⁰ Jesic nicyaj jém icuyoxayajpaap j̄ut nasyajpa jáyan jém p̄ixiñtam. In̄tuumawatyajpa itumpiy jém ipátneyajw̄ip, jém malopic y jém w̄ibic. Jempigam com jém tic j̄ut it jém an̄coomíyóycuy.

¹¹ Jesic tigiy jém rey iga iámpa jém an̄tuumaneyajw̄ip. Iix tum p̄ixiñ da ipictson̄ne jém w̄ibic yooti jém iccámaypáppic jém rey icuyoxapaap para jém sin̄jom. ¹² Jesic jém rey in̄ímáy jém p̄ixiñ: “Amigo, ¿jutsa mu in̄tigiy yim y da i miccámáy jém w̄ibic yooti para jém an̄coomíyóycuy?” Da jiy jém p̄ixiñ. ¹³ Jesic jém rey in̄ímáy jém icuyoxapaap: “Matstaami ȳip p̄ixiñ, tsénaytaami ici y ipuy. Cottaami jém piichc̄im jém itw̄ip an̄sicmi, j̄ut tsam wejaypa, j̄ut in̄ichyajpa itits.” ¹⁴ Porque tsam jáyan an̄wejayajtap, pero da w̄ati cupin̄eyajta.

I tanyojáypa jém impuesto
(Mr. 12:13-17; Lc. 20:20-26)

¹⁵ Jesic jém fariseoyaj moj ijisyaj jutsap iquejajwadáy jém Jesús con jeetim inquímayooyi jém inquejayñewiip jém pixiñtam. ¹⁶ Jeeyucmi icutsatyaj algunos jém fariseoyaj icuyujciwiñ con algunos jém Herodes ipixiñtam iga ininmatyajiñ jém Jesús. Nímaytap:

—Maestro, anjodónata iga siempre ininmatpa jém numapic anmati. Ininquejpa parejo jém Dios inmati, da i immigóyáypa. Da inwadap caso ti ninyajpa jém pixiñtam. Da i inçinpa. ¹⁷ Jesic anímaayi ti inñispa: ¿Wi iga tanyojpa impuesto jém Romapic anjagooyi o da wi?

¹⁸ Pero Jesús icutiñyáypa iga tsam iniityaj malopic jixi inamanjom. Inímáy:

—Mimichtam miñimanñaayap iga inwattooba juuts ixunpa Dios. ¿Tiiga ancutítspa?

¹⁹ Anquejaayi tum jém tumiñ jém inñoyócapaap jém impuesto.

Jesic namíñayta Jesús jém tumiñ. ²⁰ Jesic mu iix Jesús, icwácpa. Nímayyajtáp:

—¿I iwiñpac it yip tumiñyucmi? ¿I inñiyi jaycámayñeta?

²¹ Ninyajpa:

—Jém César jém Romapic anjagooyi.

Jesic nimpá Jesús:

—Chiitaami jém César jém Césarpic imichi. Chiitaami Dios jém Diospic imichi.

²² Cuando imatonayaj ti inímáy Jesús, tsam ipooñanjamyajpa jém miññeyajwiip. Ichacyaj Jesús, nicyaj.

Jutsap icpisyajta jém caaneyajwiip
(Mr. 12:18-27; Lc. 20:27-40)

²³ Jesic jeetim jama miñ íamyaj Jesús algunos jém saduceoyaj, jém dapic icupicyajpa iga pispá jém caaneyajwiip. Jeeyucmi miñ icwác Jesús. Ninyaj:

²⁴ —Maestro, nimpá jém Moisés, siiga caaba tum pixiñ y ichacpa iyomo, pero da ichac ni tum imaníc, jesic jém pixiñ itíwi ipigáyiñ jém iyomo iga inimanícwatpa. Jesic jém tsixi tsíypa juuts jém caanewiip imaníc. ²⁵ It idic con aichtam siete pixiñ tumti ijatun. Jesic yoomíy jém más achpic. Ocmi ca. Da ichac ni tum imaníc. Jesic jém ipiñtsi ipic jém icapay. ²⁶ Inascatim jempic jém ipiñtsi y jém tungac jém ijáyuc hasta que icusiete ipicyaj jém yomo. Caayaj itumpiyyaj. ²⁷ Ocmi caatim mex jém yomo. ²⁸ Jesic cuando Dios icpispá itumpiy jém caaneyajwiip, ¿juppic de jeeyaj tsíypa juuts jém yomo iwídaya? Porque icusiete inincoomiyyaj jém yomo.

²⁹ Jesic Jesús icutson. Nimpá:

—Mimichtam tsam mijixitogoyñeta porque da incutiñiytámpa jém Dios inmati ni datim incutiñiytámpa ti wiap iwat Dios con ipimi. ³⁰ Cuando acpisyajtáp jém caaneyajwiip, dam ancoomiyyajpa, dam napicyajtáp jém pixiñtam con jém yomtám. Tsíyyajpa juuts jém sinyucmipic pixiñtam. ³¹ Siip manañquejáypa iga numa acpisyajtáp jém caaneyajwiip. ¿Que da immayñe jém Dios inmati ti miñímáy Dios? Nimpá: ³² “Ich jém Abraham aDios, jém Isaac aDios y jém Jacob aDios.” Jesic quejpa iga jém tanjatun Dios da je jém caanewiip iDios, je jém vivopic iDios.

³³ Jesic jém miññeyajwiip jem agui ipooñanjamyajpa cuando imatonayaj jém Jesús inquímayooyi.

Jém más mijpic anquímayooyi
(Mr. 12:28-34)

³⁴ Cuando jém fariseoyaj ijodónayaj iga Jesús da icjiyyaj jém saduceoyaj, jesic eybic antuumayaj jut it Jesús. ³⁵ Tum de jeeyaj, jém maestro de jém wiñicpic anquímayooyi, tsam icutitstooba jém Jesús. Jesic inímáy:

³⁶—Maestro, ¿juppíc jém más mijpíc anquímayooyi de jém Moisés inquímayooyi?

³⁷ Jesús iñímáy:

—“Toyí jém tanjatun Dios con itumpiy iñanama y con itumpiy iñixi.” ³⁸ Yíbam jém mijpíc anquímayooyi jém wiñtipíc. ³⁹ Jém tungac anquímayooyi jextim. Nimpa: “Toyí jém iñtíwi juuts minitoytap iñyaac.” ⁴⁰ Siiga inwatpa juuts nimpa icuistic yíp anquímayooyi, jesic capsum inwat itumpiy jém anquímayooyi jém ichacnewip jém Moisés y itumpiy jém wiñicpic anmatciwiñ.

De i miñpa jém Cristo

(Mr. 12:35-37; Lc. 20:41-44)

⁴¹ Iganam antuumaneyaj jem jém fariseoyaj, Jesús icwác. ⁴² Iñímáy:

—Anímaayi ti iñjístampa, ¿i imaníc jém Cristo?

Nimyaj jém fariseoyaj:

—Jém David imaníc.

⁴³ Jesús iñímáy:

—Jém Dios iAnama ichi jixi jém David iga wiap inmat, ¿jesic tiiga nimpa jém David iga jém Cristo je jém iQmi? Porque nimpa jém David:

⁴⁴ Jém anjatun Dios iñímáy jém ánQmi Cristo:

“Coñi yim ananjwimi hasta que incoñwíypa jém mijóyixyajpaap.”

⁴⁵ ¿Pero jutsap ichiy jém Cristo juuts jém David imaníc, siiga nmtim jém David iga jém Cristo iQmi?

⁴⁶ Jesic da i wiá icutson jém Jesús. Dende jém jama dam i más icwác jém Jesús porque agui cinyajpa.

23

Jesús iwogáy jém fariseoyaj y jém escribaspíc maestroyaj

(Mr. 12:38-40; Lc. 11:37-54; 20:45-47)

¹ Jesic moj inmadáy Jesús itumpiy jém antuumaneyajwip con jém icuyujciwiñ. Nimpa:

² —Jém escribaspíc maestroyaj con jém fariseoyaj jexpictim anquímayooyi inmatpa juuts jém Moisés. ³ Jesic cupictaami mimichtam, wattaami itumpiy juuts miñimaytampa cuando minquejaytampa jém Dios inmati. Pero odoy wattaami juuts iwatyajpa jeeyaj. Porque iwianmatyajpa, pero da iwíwatyajpa. ⁴ Tsam jáyan inquímayooyi ijixquímajpa, tsam ictsímajajpa jém itíwítam, pero jeeyaj da iyoxpátpa con tum jém iwayci iga icuyagíyáypa ichimi. ⁵ Iwíwatyajpa iga ixtaiñ iga wibic pxiñ. Agui iwianjamyaj jém wítipic bolsa jut ininicpa jém Dios inmati. Agui wí accuyajne jém iyagats yooti inaca. ⁶ Cuando wattap jém mijpíc sin, agui iwianjamyaj jém coñcuy jut wícyajpa jém mjtampic anjagooyiyaj. Agui icusúnyajpa jém más wibic coñcuy jém sinagoga. ⁷ Iwianjampatim iga tandioschiiñ calle. Ixunpa iga jém pxiñtam iñiyíyiñ iga: “Rabí, Rabí”. Taichtam tanañmatimi nmtooba: “Mammaestro”.

⁸ 'Odoy jici iga i miñiyíyiñ iga miRabí, porque it tum jém imMaestro, je jém Cristo. Mimichtam mitíwítam. ⁹ Odoy nímaayi tum pxiñ iga “Manjatun” iga mipimíypa yíp naxyucmi, porque it tum jém tanjatun jém itwip sinyucmi. ¹⁰ Da wiap iñchíy juuts minjagooyi porque it tum jém ininjagooyi je jém Cristo. ¹¹ Jém más mijpíc anjagooyi entre mimichtam micuyoxatampa. ¹² Dios da iwíxpa jém pxiñ jém tsampic nacujíptap. Pero wíxtap tum pxiñ siiga da malo ianama.

¹³ 'Agui miuuguytim, mimichtam, miescribaspíc y mifariseopic. Tsam minimigóyaytap. Da nunca inwattampa juuts ininquejáypa jém incuyujciwiñ. Mimichtam

ininpajpa jém puerta jut tigiyaypa jém p̄ixiñtam jut injacpa Dios. Da mitigiyapa mimichtam, ni datim iñj ígáypa iga tigiyajiñ jeeyaj.

¹⁴ 'Agui miuuguytim mimichtam, miescribasp̄ic mimaestrotam y mifariseop̄ic. Tsam minimigóyayt̄ap. Da nunca inwattámpa juuts ininquejáypa jém p̄ixiñtam. Iñtóbáypa p̄imimi jém cunoya im̄ichi, jesic ocmi tsam yagatsp̄ic oración inwatpa iga immigóyáypa jém p̄ixiñtam. Jeeyucmi tsam mijp̄ic castigo michiitamt̄ap.

¹⁵ 'Agui miuuguytim, mimichtam, miescribasp̄ic mimaestrotam y mifariseop̄ic. Tsam minimigóyayt̄ap. Tsam incuámpa icuw̄iti ȳip naxyucmi hasta jém lamar anwiñtuc iga impát̄pa tum p̄ixiñ iga ininquejáypa michp̄ic ininquímayooyi. Cuando yaj ininmadáy, jesic jém p̄ixiñ más jáyan ip̄ictson̄pa castigo que mimichtam.

¹⁶ 'Agui miuuguytim, mimichtam, in̄jictámpa jém in̄t̄iw̄itam juuts cácht̄iyaj, pero micácht̄itim mimichtam. Porque miñimtámpa, siiga i ichacpa jém mijp̄ic mast̄ic juuts tum testigo iga iwatpa juuts ij̄ycámáy, jesic da ti in̄ascaaba siiga da iwatpa. Pero siiga i ichacpa jém oro jém itw̄ip mast̄icjom juuts tum testigo, jesic tienes que iwatpa juuts ij̄ycámayñe. ¹⁷ Mimichtam da mij̄ixiyyta. Micácht̄itam. Jém mijp̄ic mast̄ic más wiap̄ que jém oro porque jém mast̄ic iw̄itsacpa jém oro jém itw̄ip mast̄icjom.

¹⁸ 'Miñimtámpatim: "Siiga i ichacpa juuts tum testigo jém altar iga iwatpa juuts ij̄ycámayñe, jesic da ti in̄ascaaba siiga da iccupacpa juuts ij̄ycámayñe. Pero siiga ichacpa jém ofrenda jém itw̄ip jém altaryucmi juuts tum testigo, jesic tienes que iwatpa juuts ij̄ycámayñe." ¹⁹ Michtam da mij̄ixiyyta. Micácht̄itam. Jém altar más wiap̄ que jém ofrenda porque jém altar iw̄itsacpa jém ofrenda jém itw̄ip altaryucmi. ²⁰ Siiga i ichacpa juuts tum testigo jém altar, jesic ichacpatim juuts tum testigo itump̄iy jém itw̄ip jém altaryucmi. ²¹ Siiga i ichacpa juuts tum testigo jém mijp̄ic mast̄ic, jesic ichacpatim juuts tum testigo jém itw̄ip mast̄icjom porque jentim it jém tanJatun̄ Dios. ²² Siiga i ichacpa jém sin̄ juuts tum testigo, ichacpatim juuts tum testigo jém tanJatun̄ Dios jém itw̄ip sin̄yucmi.

²³ 'Agui miuuguytim, mimichtam, miescribasp̄ic mimaestrotam y mifariseop̄ic. Miñiman̄taayap iga in̄cupicpa Dios. Iñchiiba Dios jém décima parte jém menta, jém anís y jém comino, pero da inwadáypa caso jém más mijp̄ic an̄químayooyi. Más ixunpa Dios iga in̄w̄iwatpa y miyaachanjaamóypa y in̄cupicpa iga Dios wiap̄ miyoxpát. Numa w̄i iga inwattámpa juuts n̄impa jém más mijp̄ic an̄químayooyi y da in̄chactámpa iga inwatpatim jém xutupic an̄químayooyi.

²⁴ 'Mimichtam minjagooyítim, pero micácht̄itam. Tsam inwadáypa caso jém xutupic asunto jém dap̄ic juchan̄. Pero jém asunto tsam mijp̄ic da inwadáypa caso. Juuts n̄imyajpa, in̄toppa tum xutu usu jém invasojom iga odoy in̄guigni, pero ocmi imp̄itquetpa tum camello.

²⁵ 'Agui miuuguytim, mimichtam, miescribasp̄ic mimaestrotam y mifariseop̄ic, da inwattámpa juuts ininquejáypa jém p̄ixiñtam. Tsam in̄cujichaytámpa jém taza y jém ch̄ima iyucwiñ, pero joymi da in̄cujichayñeta, tsam it jém nuumi y jém cusúniyooyi. ²⁶ A que mifariseop̄ic, agui micácht̄itam. Wiñti cujichaayi jém taza ijoymi y jém ch̄ima ijoymi, jesic ocmi cujichayt̄aptim jém iyucwiñ.

²⁷ 'Agui miuuguytim miescribasp̄ic mimaestrotam y mifariseop̄ic, tsam minimigóyayt̄ap in̄yaac. Mijextam juuts tum tsúts ij̄os tsam w̄iwatneta, agui popo an̄s̄icmi. Agui w̄i tánix. Pero joymi tsam it jém tsúts ipac. Jáyan it jém da w̄itamp̄ic cosa, tsam puwa. ²⁸ Jesanetim mimichtam, cuando miixyajpa jém p̄ixiñtam, ij̄isyajpa iga w̄ib̄ic mip̄ixiñ, pero in̄anam̄an̄jom tsam it jém m̄igooyi y jém malop̄ic j̄ixi.

²⁹ 'Agui miuuguytim miescribasp̄ic mimaestrotam y jém mifariseop̄ic, da inwattámpa juuts ininquejáypa jém p̄ixiñtam. Inwatta jém mijp̄ic monumento jut cumyajt̄a jém wiñicp̄ic Dios in̄matc̄wiñ. Tsam in̄w̄iaccuyajnet̄a jém monumento jut cumyajt̄a jém

wiñicpic aṇmatc̄iwiñ. ³⁰ Ocmi miñimtámpa mimichtam: “Meega aitta cuando it jém wiñicpic antúmmítam, da idic anyoxpát iga accaata jém Dios inmatc̄iwiñ.” ³¹ Numa juuts mimichtam miñimta iga jém wiñicpic p̄ixiñtam mimichtam in̄jatun̄wewetam. Iccaayaj jém Dios inmatc̄iwiñ. Mimichtam mijextim juuts jém in̄jatun̄wewetam. ³² Jesic seguido w̄ati jempic hasta que cupacpa in̄wat juuts ictsucumyaj jém in̄jatun̄wewetam.

³³ Tsam malo jém in̄wewetam. Mimichtam tsam mimalotim juuts tum tsañ. Da w̄iap in̄ciputta de jém castigo. Tienes que miñicpa jém juctjom jut da nunca p̄ichpa. ³⁴ Jeeyucmi mañcutsadáypa tun̄gac aṇmatc̄iwiñ, y w̄ibic p̄ixiñtam j̄ixiyw̄ip, y jém nunta escribaspic maestroyaj. Pero algunos iniccaatámpa. Algunos in̄cunúntámpa cunusyucmi. Algunos in̄cótstámpa jém sinagoga. Algunos in̄icpoytámpa de tum attebet hasta tun̄gac attebet. ³⁵ Michtam impictson̄támpa tum mijpic castigo. Dios michégáypa icobac iga accaayajta itumpiy jém w̄itampic p̄ixiñtam, dende jém wiñtipic accaata jém Abel jém dapic ti iwatne, hasta jém Berequías iman̄ic, jém Zacarías, jém accaataw̄ip masticjom nocojom jut it jém altar. ³⁶ Numa mannímáypa iga itumpiy ȳip castigo ipictson̄yajpa jém ityajw̄ip s̄ip.

Wejpa Jesús jém Jerusalén aṇṇaca
(Lc. 13:34-35)

³⁷ Mimichtam, miittan̄w̄ip Jerusalén, iniccaata jém wiñicpic aṇmatc̄iwiñ. In̄ñácscata tsaami jém micutsadayñew̄ip Dios. Watciy anan̄tuum̄awattip jém imman̄ictam juuts jém piyuapa in̄tuum̄awatpa jém iman̄ictam jém ixajcucim, pero da in̄w̄ian̄jamta. ³⁸ Ixtaami mimichtam, ȳip attebet ts̄iypa juuts tum tic da oom̄iy. Icutum ts̄iypa. ³⁹ S̄ip mannímáypa mimichtam iga da eybic ánixtámpa hasta núcpa jém tiempo cuando miñimtámpa iga: “Agui w̄i jém tanan̄jagooyi jém tacutsadayñew̄ip tan̄jatun̄ Dios.”

24

Nimpa Jesús iga cujegáypa jém mijpic mastic
(Mr. 13:1-2; Lc. 21:5-6)

¹ Jesic put Jesús masticjom. Iganam nicpa, icunúcyaj jém icuyujc̄iwiñ. Moj in̄quejayyaj Jesús jém w̄ibic ticyaj jém mijpic mastic aṇṇaca, tsam w̄iwatne. ² Pero Jesús in̄imáy:

—Mimichtam, ixtaami ȳip ticyaj. Numa mannímáypa iga yajpa im̄iswatt̄a icutero ȳip mastic, da tatsneeba ich̄iy ni tum tsa. Itumpiy accujegayyajtap.

Jém seña cuando miñpa jém in̄an̄pigam jama
(Mr. 13:3-23; Lc. 21:7-24; 17:22-24)

³ Jesic nicyaj jém cotsicyucmi de Olivos. Cuando coñ Jesús, jém icuyujc̄iwiñ iyannimayyajpa:

—Anímaayi juch̄a nasp̄a itumpiy ȳipyaj cosa. ¿Júp seña ánixtámpa cuando mimiñgacpa ȳip naxyucmi iga iniccuyajpa ȳip nas?

⁴ Jesic Jesús icutson̄. In̄imáy:

—Nawattamtaji cuenta iga odoy i mimigóyayiñ. ⁵ Miñyajpa w̄ati jém migoypaap ich anniyimi. Nimyajpa iga: “Ich aCristo.” Imigóyayyajpa tsam jáyan̄ jém p̄ixiñtam. ⁶ Immaton̄támpa iga miñpa jém guerra. Wan̄pa iga tsam aṇayajpa jém naciónyaj. Pero odoy c̄in̄taami. Tienes que nasp̄a itumpiy ȳipyaj cosa, pero danam núcne jém in̄an̄pigam jama. ⁷ Tum nación aṇayajpa con tun̄gac nación. Tum naxyucmi aṇayajpa con tun̄gac naxyucmi. Miñpa jém mijpic yuu. Miñpa w̄ati jém malopic caacuy. Miñpa jém nasyixi jut quej. ⁸ Cuando miñpa itumpiy ȳipyaj cosa, yaguiñ tsucumpa jém mijpic yaachaji.

⁹ Jesic micijunçottamtap jem malopic anjagooyi icijom iga mimalwadaytamtap. Miccaatamtap. Icuwiti yip naxyucmi tsam mijoyixyajpa ich ancuyucmi. ¹⁰ Cuando núcpa jem tiempo, tsam jáyan pixiñtam ichacyajpa jem Dios inmati. Algunos iwadáypa atraición jem itiwí iga matstaiñ. Tsam najoyixyajtap. ¹¹ Miñyajpa jáyan jem migoyyajpaap, nimanñaayap iga Dios inmatciwiñ. Imigoyayyajpa tsam jáyan jem pixiñtam. ¹² Tsam jáyanap jem malopic jixi jeeyucmi jáyan jem pixiñtam ichacyajpa iga itoypa jem itiwitam. ¹³ Pero ciacputtap jem iyaachiyapaap jem yaachaji, jem dapic ichacpa jem Dios inmati hasta jem inañpigam jama. ¹⁴ Wiñti añmattap yip wibic añmati iga Dios injacpa jem ityajwip yip naxyucmi. Núcpa jutquej iga jodónataiñ jem Dios inmati. Ocmi núcpa jem inañpigam jama.

¹⁵ Jem wiñcipic añmatciwiñ jem Daniel ijaychac jem librojom iga miñpa tum anjagooyi tsam pimi malo, ijoyixpa tanjatun Dios. Miñpa iwat contra jem Dios inquímayooi. Cuando inix iga miñ iti jem anjagooyi jut da iwianjam Dios (el que imaypa yip libro wi iga icutiyyiñ ti annímáypa), ¹⁶ jesic miittañwip jem naxyucmi de Judea, poytaami, nictaami jem çotsiganjoj. ¹⁷ Siiga miquímne inñicyucmi jem tungac piso, jesic odoy queti iga nicpa impic inñtraste, pero nicsim poyimi. ¹⁸ Siiga miitta camjom cuando immaton iga núcneum jem malopic anjagooyi, jesic odoy settaami inñiccim iga miñpa impic impuctucu. Jemigam tsucumtaami. ¹⁹ Agui uuguytim jem yomtam jem manicomcanewip y jem ictsútpáppic jem xuxut tsixtam. Porque tsam jáyan yaachaji miñpa. ²⁰ Añwejpáttaami Dios iga odoy mictsiytámiñ jem tiempo de succuc ni jem jejucy jama cuando mipoytampa. ²¹ Cuando núc yip malopic anjagooyi, tsam pimi miyaachátampa. Da nunca oypa tánix jexpic yaachaji dende Dios iwat yip nas. Ni ocmi da eybic tánixpa jexpic yaachaji. ²² Jem tanjatun Dios da ijicpa iga jáypa jem malopic anjagooyi. Siiga jáypa, da i çiputpa, cucaayyajpa itumpiy jem icupinneyajwip Dios, jeeyucmi da ijicpa iga jáypa jem mijpic yaachaji.

²³ Siiga i miñímáypa iga: “Miñi aami, yim it jem Cristo”, o tungac miñímáypa: “Nigi aami jeexic it jem Cristo”, jesic odoy cupictaami. ²⁴ Porque miñyajpa tsam jáyan jem migoyyajpaap. Nimanñaayap iga: “Ich aCristo”, pero migóypa. Nimanñaayap iga: “Ich awibic jem Dios inmatciwiñ.” Iwatyajpa jem witampic seña y jem milagroyaj iga imigoyayyajpa jem icupinneyajwip Dios meega wip. ²⁵ Mannímayñeum wiñti ti miñpa antes que amiñgacpa. ²⁶ Jeeyucmi siiga i miñímáypa iga: “Nigi aami jem Cristo jem titsinaxyucmi”, odoy nigi aami. Siiga ninyajpa: “Miñi aami, yim it jem Cristo tum cuartojom añécne”, odoy cupici. ²⁷ Porque cuando ich, jem aMiññewip Sinyucmi, amiñgacpa yip naxyucmi, jesic i quej aixyajpa. Juuts quénpa jem majiywiñ dende aññisaumi hasta anyomsaumi, jesanetim tsam wiquejpa cuando amiñgacpa. ²⁸ Jut caane tum cawaj jemum antuumayajpa jem nuupu. Jesaptim tsam wiquejpa cuando núctooba jem inañpigam jama.

Jutsap imiñgac jem Dios iManic

(Mr. 13:24-37; Lc. 21:25-33; 17:26-30, 34-36)

²⁹ Jeeti rato cuando naspa jem yaachaji, pichpa jem jama ichoca y jem poya datim tsocpa. Jem matsa, jem itwip sinyucmi, cutinjaypa. Tsam tsigoyyajpa itumpiy jem ityajwip jem matsañjom. ³⁰ Quejpa jem seña sinyucmi iga miñpa jem icutsatnewip Dios. Tsam weyajpa itumpiy jem ityajwip icuwiti yip naxyucmi cuando iixyajpa iga miñgacpa jem Miññewip Sinyucmi jem ucsañjom con jem Dios ipimi juuts tum mijpic anjagooyi. ³¹ Cutsadayyajtap jem sinyucmipic pixiñtam yip naxyucmi. Sustap tum succuy. Agui pimi añjyapa iga intuumawatpa itumpiy jem icupinneyajwip Dios icuwoyo jem mundo dende sinyucmi hasta naxyucmi.

³² 'Cutiiyiytaami yíp ejemplo de jém tsuj. Cuando químpa jém inmaañay, jesic injodonjam iga núctooba jém cutujci. ³³ Jesaptim cuando inixtámpa iga naspa itumpiy jém mannímayñewiip iga miñpa, jesic injodonjam iga nocojom it jém jama cuando amiñgacpa yíp naxyucmi. ³⁴ Numa mannímáypa, cupacpa itumpiy yípyaj cosa antes que caayajpa itumpiy jém pixiñtam jém ityajwiip jém tiempo. ³⁵ Cuyajpa jém sin y jém nas, pero ich anajmatí da nunca cuyajpa.

³⁶ 'Da i ijodon júp jama ni juchis hora naspa itumpiy yípyaj cosa. Da ijodonjaj ni jém sinyucmiipic pixiñtam ni datim ijodon jém Dios iManic. Icutum ijodon jém tanjatun Dios.

³⁷ Juustim jém tiempo cuando it idic jém Noé, jesaptim jém tiempo cuando amiñgacpa yíp naxyucmi. ³⁸ Porque wiñgam cuando it idic jém Noé, cuando danam núcne jém diluvio, jém pixiñtam wícyajpatim y ucyajpatim. Ancoomíyoyajpatim y ichiyajpatim iyommanictam iga ancoomíyyajpa hasta que núc jém jama cuando jém Noé tigiy jém mijpic barcojom. ³⁹ Da icutiiyiyaj hasta que quím jém ni, inicunígayyaj itumpiy jém pixiñtam. Jempictim inascayajpa jém ityajwiip yíp naxyucmi cuando ich, jém aMiññewiip Sinyucmi, amiñgacpa yíp naxyucmi. ⁴⁰ Cuando núctooba jém inajpigam jama, wagayoxayajpa wisten pixiñ icamjom, tum nanictap, tum tsactap. ⁴¹ Wisten yomo widoyajpa tum molinoyucmi, tum nanictap, tum tsactap.

⁴² Ittaami al tanto porque da injodonjam juchis hora miñpa jém inomi, odoy monjaami mimichtam. ⁴³ Cutiiyiytaami, siiga tum pixiñ ijodon juchis hora núcpa tsuucim jém númpaap, jesic da monja iga odoy ijedáyiñ jém itic jém númpaap. ⁴⁴ Jeeyucmi mannímáypa, ittaami listo porque jém tiempo iga injisa iga ich, jém aMiññewiip Sinyucmi, da amiñgacpa, jesigam amiñpa.

Jém malopic cabo y jém wibic (Lc. 12:41-48)

⁴⁵ Siip mananquejáypa iapaap jém wibic cabo jém icutiiyiyapaap. Jém iomi ichacpa iga injaguñ jém ityajwiip iticim iga icwícyajiñ. ⁴⁶ Agui maymay jém cabo siiga sip iwat juuts ipimiyñe jém iomi cuando miñgacpa. ⁴⁷ Mannímáypa iga jém iomi iccámpa jém icabo juuts tum anjagooyi iga injacpa itumpiy jém inas y jém icuyoxayajpaap. ⁴⁸ Pero siiga malo yíp cabo, ijisa inamanjom iga da jobit miñgacpa jém iomi. ⁴⁹ Mojpa imalwadáy tungac jém icuyoxapaap jém iomi. Tsam wícpa, tsam ucpa con jém tungac ucciwiñ. ⁵⁰ Miñgacpa jém cabo iomi tum jama cuando da injócne. Miñpa tum hora cuando da ijodon. ⁵¹ Chiitap mijpic castigo con jém malopic pixiñtam jut tsam weyjajpa, jut inichiyajpa itits.

25

Jém cuento de jém diez woñtam

¹ Jesic jém tiempo cuando injacpa Dios yíp naxyucmi jex juuts diez jém woñtam nicyaj jut ancoomíyoyñimpa. Ipicay jém ijucti, nic ichonyaj jém ancoomíyapaap. ² Cinco jém woñtam da jixiíy y cinco jém woñtam agui jixiíy. ³ Jém dapic jixiíy ipicyaj ijucti, pero da ininicyaj jém aceite iga icucómáypa eybic jém ijucti. ⁴ Pero jém jixiíywip ininic jém aceite tum xanujom. Ininicpatim jém ijucti. ⁵ Tsam tanchaap inúc jém yoomíyapaap. Tsam monja iga jém woñtam. Ocmi monyaj. ⁶ Jesic cugaptsu imatonjaj tum mijpic jiyi. Nimpa: "Miñpa jém yoomíyapaap. Nigi tsonjaami." ⁷ Tsucumyaj itumpiy jém woñtam. Moj iwitsacyaj ijucti. ⁸ Jém cinco woñtam, jém dapic jixiíy, inímayyajpa jém jixiíywip: "Achiitaami uxaj aceite porque ich anjucti píchtoobam." ⁹ Pero jém jixiíywip icutsonjaj. Nimyaj: "Da manchiiba porque wip da actsíypa aich siiga manchiiba. Más wi nigi juytaami inyaac jut maytap." ¹⁰ Pero iganam nic ijuyyaj aceite jém cinco woñtam, jém

dapic jixiíy, jesigam núc jém yoomiypaap. Y jém cinco jém woñtam jém jixiíywip tigiyayaj jojmi jut it jém aŋcoomíyócy. Anpajta jém puerta. ¹¹ Ocmi setyay jém woñtam jém nicnewip ijuy aceite. Iñimayyajpa jém tic iomi: “Áŋaayi jém puerta.” ¹² Pero jém tic iomi iñimáy: “Numa mimichtam, da mánixpicpa.”

¹³ Jesic Jesús iñimáy:

—Odoy moŋtaami mimichtam, ittaami al tanto porque da iñjodon júp jama ni juchis hora amiñgacpa yíp naxyucmi jém aMiñnewip Siŋyucmi.

*Jém esclavoyaj iyoxacaaba jém iomi itumiñ
(Lc. 19:11-27)*

¹⁴ Jém wibic aŋmati iga Dios injacpa yíp naxyucmi jex juuts tum pixiñ tsam tumiñíy. Nicpa tungac naxyucmi. Jesic nicpa, inwejay jém iesclavoyaj iga ichi uxan tumiñ iga iyoxacayajiñ.

¹⁵ Tum jém iesclavo ichi cinco talento (tum talento ivale seis mil tumiñ de plata). Tungac ichi wisten talento. Tungac ichi tum talento. Chiita cada quien juuts wip iyoxaca. Jesic ocmi nic jém pixiñ. ¹⁶ Tum jém esclavo, jém chiiñetawip jém cinco talento, moj iyoxaca jém tumiñ. Icoñwíy tungac cinco talento. ¹⁷ Jempictim iwat jém tungac esclavo, jém chiiñetawip wisten talento. Icoñwíy con jém tumiñ tungac wisten talento. ¹⁸ Pero jém tungac esclavo, jém chiiñetawip tum talento, nic iñegáy jém iomi itumiñ. Itaj tum jos, jenum icum nascim.

¹⁹ Jesic pecam nicne jém iomi, set eybic. Moj itop cuenta con jém iesclavo. ²⁰ Wiñíi núc jém chiiñetawip jém cinco talento. Iciŋuŋcodáy iomi tungac cinco talento jém icoñwíyñewip. Iñimáy: “Mánomi, anchi cinco talento, pero yim it tungac cinco talento aŋcoñwíyñe.” ²¹ Jém iomi iñimáy: “It wi. Mich tum wibic miesclavo, agui wia inwat cuenta jém ammichi. Como mánix iga wia miŋwat cuenta jém uxanpic, sip manaccámpa juuts tum anjagooyi iga ininjacpa más jém jáyanpic. Sip tigiyi yim con aich jut it jém maymáyají.”

²² Ocmi núc jém tungac iesclavo jém chiiñetawip wisten talento. Nimpa: “Mánomi, anchi wisten talento. Yim it tungac wisten aŋcoñwíyñe.” ²³ Jém iomi iñimáy: “Wibic miesclavo, wip inwat cuenta jém ammichi. Como mánix iga wia miŋwat cuenta jém uxanpic, sip manaccámpa juuts tum miŋjagooyi iga ininjacpa jém más jáyanpic. Sip tigiyi yim con aich jut it jém maymáyají.”

²⁴ Ocmi núctim jém tungac esclavo jém chiiñetawip tum talento. Iñimáy: “Mánomi, ich anjodon iga tsam pimi mipimíyópa. Impictsonpa jém cosecha jut da oy iññip. Impiŋpa jém cosecha jut da oy iñyin. ²⁵ Jeeyucmi tsam acin. Oy mannegáy jém iñtumiñ nascim. Pero yim it jém iñtumiñ jém immichipic.” ²⁶ Jém iomi iñimáy jém iesclavo: “Tsam mimalopic miesclavo, tsam micutiñ. Siiga iñjodon iga ampictsonpa jém cosecha jut da oy aññip y ampŋpa jém cosecha jut da oy anyin, ²⁷ ¿jesic tiiga da incucom antumiñ jém banco? Jesic cuando asetpa, ampictsonpa antumiñ con jém icoñwíyooyi.”

²⁸ Jesic jém esclavo iomi iñimáy jém ityajwip jem: “Accáyaayi jém talento yíp pixiñ. Chi jém iniitwip diez talento. ²⁹ Porque jém iniitwip, chiitap más iga odoy ti itogóyajiñ. Pero jém dapic inií, accáyaytap hasta jém uxanpic iniit. ³⁰ Acnictaami yíp da wibic esclavo jém piichcim jém itwip aŋsicmi, jut tsam weyjajpa, iñichyajpa itits.”

Cüpiŋyajtap jém naciónyaj

³¹ Cuando miñgacpa jém Miñnewip Siŋyucmi, miñpa juuts tum anjagooyi. Iwaganamiñyajpa itumpiy jém siŋyucmipic pixiñtam. Coñ jém anjagooyi icoñcuyucmi iga injacpa yíp nas con jém Dios ipimi. ³² Itumpiy jém pixiñtam, jém ityajwip icuwiti yíp naxyucmi, aŋtuumayajpa jém anjagooyi iwiñjom. Jém anjagooyi icupínyappa jém tungac

píxiñtam juuts iwatpa jém borrego iomi. Itoppa jém chivo jém borregoanjom, ichacpa aparte. ³³ Jém borregoyaj tsacyajtap anwimi y jém chivoyaj tsacyajtap anaymi.

³⁴ 'Jesic jém Rey iñímáypa jém ityajwip inwimi: “Miñi mimichtam jém miwíwadayñewip anJatun Dios. Miñi, pictsonjaami jém lugar jém miwítsagayñetawip dende iwat Dios yíp nas. ³⁵ Porque tsam ayuap y mimichtam anacwícta. Tsam aníctitspa y michtam anacnícta. Ich juuts juumipic apíxiñ, pero mimichtam anacnúcsta tic. ³⁶ Da apuctugíy, pero mimichtam anchiíta. Amimne y mimichtam oy anámta. Apajta cárcel, pero mimichtam oy anámta.”

³⁷ 'Jesic jém wibic píxiñtam, jém iwípicsonjeyajwip jém anjagooyi, nimyajpa: “Mánomi, ¿juchá mánixta iga miyuap y manacwícta? ¿Juchá mánixta iga miñíctitspa y manacnícta? ³⁸ ¿Juchá mánixta juuts tum juumipic mipíxiñ y manacnúcsta tic, o iga da mipuctugíy y manchiíta? ³⁹ ¿Juchá mánixta mimimne o mipajnetá cárcel y oy mánámta?” ⁴⁰ Jém Rey icutson, iñímáy jém iwíwatneyajwip: “Numa, mannímáypa, titam inwadáy yíp antiwítam, jém dapic juchan, jesic ich mismo anwíwadáy.”

⁴¹ 'Jesic jém Rey iñímáy jém ityajwip inaymi: “Mimichtam tsam mimalo, impictsonjámpa jém castigo. Nictaami jém juctjom jut da nunca píchpa jém watnetawip para jém Wocciwiñ y jém mal espíritu. ⁴² Ich tsam ayuap y mimichtam da anacwícta. Tsam aníctitspa y mimichtam da anacnícta. ⁴³ Asiba juuts tum juumipic apíxiñ, pero mimichtam da anacnúcsta tic. Da apuctugíy y mimichtam da ti anchiíta. Amimne y apajta cárcel y mimichtam datim oy anámta.” ⁴⁴ Jesic nimyajpa jém malopic píxiñtam: “Mánomi, ¿juchis mánixta cuando miyuap, miñíctitspa, mixiba juuts tum juumipic píxiñ, da mipuctugíy, mimimne, o mipajnetá cárcel y da oy manyoxpátta?” ⁴⁵ Jesic jém Rey icutsonpa jém malopic píxiñtam. Nimayyajta: “Numa mannímáypa, como da inwíwadayta jém antiwítam dapic juchan, jesic ichtim mismo da anwíwadáy.” ⁴⁶ Ocmi nicyajpa yíp malopic píxiñtam jut ipictsonyajpa jém castigo jut da nunca yajpa iyoj. Pero jém wibic píxiñtam, jém iwíwatneyajwip, ipictsonpa jém vida jém dapic cuyajpa.

26

Ijisyaj jém ienemigoyaj jutsap imatsyaj Jesús (Mr. 14:1-2; Lc. 22:1-2; Jn. 11:45-53)

¹ Cuando yaj inmat Jesús, iñímáy jém icuyujcwiñ:

² —Mimichtam iñjodontam iga wisna jama naspá jém pascuasij y ich, jém aMiññewip sinyucmi, acijuncottap iga acunúntap cunusyucmi.

³ Jesic antuumayajpa jém cobapic panijyaj con jém escribapic maestroyaj y con jém Israelpic wídaytam. Antuumayajpa jém cobapic panij, jém Caifás, ipalacio. ⁴ Jemum moj ijisyaj jutsap icumigoyaj jém Jesús iga imatsyajpa iga iccaayajpa. ⁵ Pero nimyajpa jém anjagooyiyaj:

—Da tammatspa yíp sinjom, jesic da cujínayajpa jém píxiñtam.

Tum yomo iccámáypa jém perfume Jesús icobacyucmi (Mr. 14:3-9; Jn. 12:1-8)

⁶ It Jesús jém atebet Betania, núc jém Ximój iticcim, jém cupúgayñewip idic iñaca.

⁷ Icnúc tum yomo con tum tsaafresco comne jém aceite jém cinpáppic jém aguípic tsoowíy. Cuando coñ Jesús jém mesacim, jém yomo icutegáy jém aceite icobacyucmi.

⁸ Cuando iixyaj jém icuyujcwiñ agui jóyyaj. Nimyaj:

—¿Íiiga itecmichca yíp aceite? ⁹ Meega tammáypa, tampictsonpa jáyan tumiñ. Wiap tanyoxpátta jém yaachayajpáppic.

¹⁰ Jesic Jesús icuyujc̄wiñ ti síp iñimayaj jém icuyujc̄wiñ. Iñímáy:

—Odoy mooḡiyi yíp yomo. Síp awiwadáy. ¹¹ Jém yaachayajpáppic siempre inwaganaittámpa. Pero aich da siempre manwaganaittámpa. ¹² Acutegáy jém yomo jém aceite ammiytayyucmi juuts cuando cumtap tum tsúts. ¹³ Numa mannímáypa iga jutquej anmattap jém wibic anmati icuw̄iti yíp naxyucmi, anmattap tim ti awadáy yíp yomo iga jém p̄ixiñtam ijisyajiñ ti iwat yíp yomo.

Jém Judas ic̄ijun̄cot jém Jesús

(Mr. 14:10-11; Lc. 22:3-6)

¹⁴ Ocmi tum de jém docepic icuyujc̄wiñ iñiyi Judas Iscariote nic ininmat jém panij anjagooyiyaj. ¹⁵ Iñímáy jém panijyaj:

—¿Jutsan anyojpa siiga an̄c̄ijun̄cotpa jém Jesús?

Jesic jeeyaj iyoyaj treinta tumiñ de plata. ¹⁶ Dende jeeti rato moj ijis jém Judas jutsap ic̄ijun̄cot jém Jesús.

Wícmon̄pa jém tán̄omi iwatpa jém Santa Cena

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Núc jém siñ cuando cúttap jém caxtánañi sin levadura. Jesic jém wiñtipic jama jém Jesús icuyujc̄wiñ icunúcyaj. Icwácyaj, iñimayyaj Jesús:

—¿Juf iñxunpa iga an̄w̄itsacpa itumpiy cosa iga tawíctámpa jém pascuasñ?

¹⁸ Jesús iñímáy icuyujc̄wiñ:

—Nictaami jém atebet Jerusalén. Cuando miñúctámpa tum ticcim, impátpa tum p̄ixiñ. Nímaayi: “Nimpa jém amMaestro iga siip núcum jém hora iga cupacpa jém anyoxacuy. Anacnaspa jém pascuasñ mich iñticcim con an̄cuyujc̄wiñ.”

¹⁹ Jesús icuyujc̄wiñ iwatyaj itumpiy cosa juuts ip̄imíy. Iwatyajpa jém wícuy iga icnaspa jém pascuasñ.

²⁰ Jesic tsuuyawum̄ iti, coñyay Jesús jém mesacim con jém doce icuyujc̄wiñ. ²¹ Iganam wícaypa, nimpa Jesús:

—Numa mannímáypa, tum de mimichtam an̄c̄ijun̄cotpa jém ánenemigo ic̄ijom.

²² Jesic jém icuyujc̄wiñ tsam anyácyaj. Moj nacwácyajtaji entre jeeyaj. Cada tumtum nim:

—Mán̄omi, ¿que aicham?

²³ Icutson̄ Jesús. Nimpa:

—Jém anwaganasonpaap caxtánañi tumti chimajom, jeam jém ac̄ijun̄cotpaap ánenemigo ic̄ijom. ²⁴ Jém Miññew̄ip̄ Siñyucmi tienes que iñascaaba juuts nimpa jém Dios inmati jut jayñeta, pero agui uuguytim jém p̄ixiñtam jém ac̄ijun̄cotpáppic, w̄i idic meega da nay.

²⁵ Ocmi jiy jém Judas jém ic̄ijun̄cotpaap. Nimpa:

—MamMaestro, ¿que aicham?

Jesús iñímáy:

—Mimicham.

²⁶ Iganam wícaypa, Jesús imatspic jém caxtánañi. Cuando yaj inwejpát Dios, iwéc jém caxtánañi, ichi icuyujc̄wiñ. Iñímáy:

—Yíp caxtánañi ich ammiytay, cúttaami.

²⁷ Ocmi ipic tum copa jém uvas iñi, inwejpát Dios. Ichi jeeyaj. Iñímáy:

—Uctaami iñtumpiytam. ²⁸ Yíp ich ann̄ipiñ jém antegaypáppic iga anwatpa jém jomipic trato iga an̄w̄itsagáypa jáyan jém p̄ixiñtam itañca. ²⁹ Mannímáy-támpa mimichtam iga dende siip da ánucca jém uvas iñi hasta que núcca jém jama iga ánucca eybic con mimichtam jut injacpa an̄jatun̄ Dios.

³⁰ Jesic yaj iwanyaj tum wañi, nicayaj jém cotsicyucmi.

Inmatpa Jesús iga innécpa jém Peto
(Mr. 14:26-31; Lc. 22:31-34; Jn. 13:36-38)

³¹ Ocmi Jesús iníimáy icuyujcwiñ:

—Mimichtam inítumpiytam tsam micinítampa y ampoychactámpa ancutum yíptim tsuu. Porque nimpa así jém Dios inmatí jut jayñeta: “Accaatap jém iwatpáppic cuenta jém borregoyaj. Jém borregoyaj cupóyayyajpa.” ³² Pero ocmi cuando apispa, anjagoyñeeba annic jém naxyucmi de Galilea.

³³ Jesic Peto iníimáy jém Jesús:

—Aunque itumpiy tsam cinyajpa y michacyajpa incutum, más aich da acinpa y da mancupóyáypa.

³⁴ Jesic Jesús iníimáy:

—Numa mannímáypa iga yíptim tsuu antes que anwejpá jém cayu mich ananécpa tuciy.

³⁵ Jém Peto iníimáy:

—Aunque tawagaaccaatañ con mimich, ich da mananécpa.

Itumpiy jém icuyujcwiñ nimyajtí jempic.

Jesús inwejpát Dios jém lugar Getsemaní
(Mr. 14:32-42; Lc. 22:39-46)

³⁶ Jesic nicyaj Jesús con jém icuyujcwiñ tum lugar iníyi Getsemaní. Nimpa Jesús:

—Coñtaami yim iganam ich anicpa jemíc iga ananwejpátpa Dios.

³⁷ Jesic Jesús ininíc uxaj más juumi jém Peto y icuistic jém Zebedeo imanictam. Tsam pími anyác Jesús, tsam ijispa ti inascaaba. ³⁸ Jesic Jesús iníimáy jém tucuten icuyujcwiñ:

—Ich agui pími anyácne ananamanjom hasta quénam acaatooba. Tsíytaami yim, odoy monjaami, nawattamtaji cuenta.

³⁹ Jesic ocmi Jesús nic uxaj más juumi. Tocsneactin. Moj inwejpát Dios. Nimpa:

—Manjatun, siiga inwanjam odoy jici iga annascaaba yíp mijpic yaachaji. Pero odoy wati juuts ich ansunpa. Wati juuts mich inwanjam.

⁴⁰ Jesic set eybic Jesús jut ichac jém tucuten icuyujcwiñ. Monyajpa. Iníimáy jém Peto:

—¿Mimonpa Peto? ¿Que da wíap imvivoja con aich ni tum hora? ⁴¹ Odoy monjaami, nawattamtaji cuenta. Anwejpáttaami Dios iga odoy i wíañ micutitsta iga micmalwattámpa. Numa, jém inñanama iwattooba juuts ixunpa Dios, pero jém immijtay da iwianjam.

⁴² Jesic eybictim nic Jesús inwejpát Dios. Nimpa:

—Manjatun, siiga da wíap anciacput yíp mijpic yaachaji, jesic wati juuts mich inwanjam.

⁴³ Ocmi eybic set Jesús jut it icuyujcwiñ. Tsam monyajpa. Da tojtooba iixcuy porque tsam monjooba. ⁴⁴ Jemum ichac jém icuyujcwiñ. Eybictim nic inwejpát Dios tres vecesam. Nimpa jeetim anmatí. ⁴⁵ Jesic set eybic jut it jém icuyujcwiñ. Iníimáy:

—Sip numa monjaamim, jeitaamim. Sip núcum jém hora iga ich, jém aMiñnewip Sinyucmi, acijuncotpa jém malopic pixiñtam icijom. ⁴⁶ Tsucumtaamim, tanictámpam porque miñpam jém acijuncotpaap.

Matsta Jesús
(Mr. 14:43-50; Lc. 22:47-53; Jn. 18:2-11)

⁴⁷ Iganam sip ijy Jesús, núc jém Judas jém itwip idic con jém doce icuyujcwiñ. Iwaganamiñyaj tsam jáyan jém pixiñtam. Inimiñyaj espada y jém cuy iga icótspa. Icutsadayyaj jém panij anjagooyi y jém wídaytam. ⁴⁸ Jém Judas, jém icijuncotpaap Jesús, iwadáy jém pixiñtam tum seña. Iníimáy:

—Jém anaŋnacatsútspaap, jeam. Matstaami.

⁴⁹ Jesic jém Judas icunúc jém Jesús. Iñímáy:

—MamMaestro, xutsóy.

Jesic inŋnacatsúts. ⁵⁰ Jesús iñímáy:

—¿Amigo, ti miñ imméts?

Jesic icunúcyaj jém miññeyajwïp. Imatsyay jém Jesús. Nanictawum preso.

⁵¹ Pero tum jém iwaganaitwïp Jesús, itop tum espada, itinquímáy ítatsic jém cobacpic panij imozo. ⁵² Jesic Jesús iñímáy:

—Coti jém espada iñacjom. Porque itumpiy jém áŋayajpáppic con espada, con espadatim accaatap. ⁵³ ¿Que da injodon iga ich wiap anwágáy Dios iga acutsadáyiñ doce legiones jém sinyucmipic pixiñtam y yipti rato acutsadáypa? ⁵⁴ Pero siiga anwatpa jempic, ¿jutsap icupac jém anmatí jut jayñeta iga ayaachwattap?

⁵⁵ Jesic Jesús iñímáy jém miññeyajwïp:

—¿Que miñ ammatsta con espada y jém cuy juuts tum anúmpaap? Itumpiy jama accuyujóypa masticjom, da nunca ammatsta.

⁵⁶ Itumpiy yíp cosa iñascaaba Jesús iga cupacpa juuts ijaychacne jém wiñicpic anmatcïwiñ.

Jesic itumpiy jém icuyujcïwiñ yaj cupóyaayiyaj. Icutum tsíy jém Jesús.

Nanicta Jesús jém cobacpic panijcïm

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Jesic jém imatsneyajwïp Jesús ininicyaj jém Caifás iwiñjom, jém cobacpic panij anjagooyi. Jemum antuumaneyaj wati jém escribaspic maestroyaj y jém wídaytam. ⁵⁸ Jém Peto ijuumactúnyñe hasta jém cobacpic panij iaŋcïm. Jemum tigiy, cooñanjac jém Peto con jém policía. Iixtooba ti nawattap jém Jesús.

⁵⁹ Jém cobacpic panijyay con itumpiy jém wídaytam, jém Sanhedrín, imétsyajpa tum cumigoypaap iga accaataiñ Jesús. ⁶⁰ Pero da ipátyaj jém nïmyajpáppic iga imalwatne. Tsam jáyan pïxiñ icumigoyyajtooba idic jém Jesús, pero da wiap. Ocmi miñ wisten jém pïxiñ jém icumigoypaap. ⁶¹ Nïmyaj:

—Yíp pïxiñ nïmpa iga: “Ich wiap ammiswat jém Dios imastic, jesic tucunajama eybic anactsucumpa.”

⁶² Jesic teñchucum jém cobacpic panij, iñímáy Jesús:

—¿Que da inçutsonpa? ¿Da immaton ti síp iñimayaj contra mimich?

⁶³ Pero Jesús da jïypa. Jém cobacpic panij anjagooyi iñímáy:

—Odoy amigóyaayi porque jém vivopic Dios taixpa. Anuntanímaayi siiga numa mimicham miCristo jém Dios miManic.

⁶⁴ Jesic Jesús iñímáy:

—Juuts mich miñim. Pero mannímáypa iga dende siip ánixtámpa aich, jém aMiññewïp Siñyucmi, cuando acoñ jém tanjatun Dios inwimi, jém tsampic iniit ipimi. Ánixtámpatim cuando amiñgacpa siñyucmi jém ucsanjom.

⁶⁵ Jesic jém cobacpic panij ichicujac iyooti iga quejiñ iga icujïypa Dios. Nïmpa:

—Yíp pïxiñ icujïypa tanDios. ¿Tiiga tammétstámpa tungac testigo? Mimichtam siip immatoneta iga tsam icujïypa tanDios. ⁶⁶ ¿Tí iñjístámpa?

Nïmyajpa jém miññeyajwïp:

—Iniit la culpa. Wï iga tanaccaaba.

⁶⁷ Ocmi ichujcaayyaj iwiñpac. Ixonyaj. Tungac itojáy iwiñpac. ⁶⁸ Nïmyaj:

—Siiga micham miCristo, anímaayi i micóts.

*Jém Peto inñéc iga iixpic jém Jesús
(Mr. 14:66-72; Lc. 22:56-62; Jn. 18:15-18, 25-27)*

⁶⁹ Iganam coñ jém Peto añcim, miñ tum yomo jém icuyoxapaap jém panij. Inñímáy jém Peto:

—Mich inwaganasibatim jém Jesús, jém Galileapic pxiñ.

⁷⁰ Pero jém Peto inñéc iga iwaganasiba Jesús. Inñímáy jém yomo:

—Da anjodoñ ti sip inñim.

⁷¹ Cuando nic jém Peto jém corredor, tungac jém yomo iixpictim, inñímáy jém ityajwip jem:

—Yíp pxiñ iwaganasiba jém Jesús jém Nazaretpic.

⁷² Eybictim inñéc jém Peto. Nimpa:

—Wijodios, da ánixpicpa.

⁷³ Tum rato más, algunos jém ityajwip jem, icunúcyaj jém Peto, inñímáy:

—Numa mich tum jeepictim mipixiñ, tsam wiquejpa hasta ininmatí iga Nazaretpic mipixiñ.

⁷⁴ Jesic jém Peto moj malnimi. Nimpa:

—Wijodios, ich da ánixpicpa yíp pxiñ.

Jeeti rato añwej jém cayu. ⁷⁵ Jesic jém Peto ijis ti inñímáy Jesús cuando inñímáypa iga: “Mich anañécpa tres veces antes que añwejpa jém cayu.” Jesic put añsícmi jém Peto. Pimi wejpa porque agui anyácne.

27

*Cijunçotta Jesús jém Pilato icijom
(Mr. 15:1; Lc. 23:1-2; Jn. 18:28-32)*

¹ Jesic icuquejama añtuumayajpa itumpiy jém panij añjagooyiyaj y jém wídaytam iga iwatyajpa acuerdo jutsap iccaayaj Jesús. ² Tsenneta jém Jesús, nanicta jém gobernadorcim. Cijunçotta jém Poncio Pilato icijom.

Naccaata iyaac jém Judas

³ Jém Judas, jém iwadayñewiip atraición, iix iga accaatap jém Jesús. Jesic icucac ijixi, ichacset jém treinta tumiñ de plata jém panij añjagooyi con jém wídaytam. ⁴ Nimpa jém Judas:

—Ich tsam añwat táñca iga añcijunçot tum pxiñ dapic ti iwatne iga accaataiñ.

Pero jeeyaj nımyaj:

—Ich da anticutigiyi. Je cuestión de mimich.

⁵ Ocmi jém Judas ipatsquet jém tumiñ masticjom. Nic. Najúpcata iyaac.

⁶ Jém panij añjagooyi ipin jém tumiñ. Nımyajpa, yíp tumiñ da wıap tañcot jém cajonjom jut accáytaap jém ofrenda porque yíp tumiñ nıpiñ ichowa.

⁷ Ocmi iwatyaj acuerdo iga ijuyyajpa tum jaca nas con jém tumiñ. Jém lugar inñiyi jém suunascım. Ijuyyaj iga iniit lugar jut cumyajtap jém juumipic pxiñtam. ⁸ Jeeyucmi hasta sip inñiyi jém nas, jém Nıpiñ ichowa. ⁹ Jempam cupacpa juuts nımpa jém wiñicpic añmatciwiñ jém Jeremías: “Jém treinta tumiñ de plata tum pxiñ ichowa. Iccámáy jém precio jém Israelpic pxiñtam. Ipıgayyaj jém pxiñ ichowa. ¹⁰ Con jém tumiñ ijuyyaj jém nas jut wattaap suun juuts anímáy jém tanjatun Dios.”

*Nanicta Jesús jém Pilato iwiñjom
(Mr. 15:2-5; Lc. 23:3-5; Jn. 18:33-38)*

¹¹ Jesic nanicta Jesús jém gobernadorcim. Jém gobernador icwác Jesús. Nımayta:

—¿Micham miRey de jém judíos?

Jesús iñímáy jém gobernador:

—Aicham, juuts mich miñimpa.

¹² Jesic cuando jém panij anjagooyi con jém wídaytam iquejajwadáy Jesús, da ti icutson.

¹³ Jesic jém Pilato iñímáy Jesús:

—¿Que da immaton iga agui jáyan cosa síp iñimyaj en contra de mimich?

¹⁴ Pero Jesús datim icutson. Jesic jém gobernador agui ipooñanjampa.

Chiitq orde iga accaatap jém Jesús

(Mr. 15:6-20; Lc. 23:13-25; Jn. 18:38-19:16)

¹⁵ Cada naspa jém pascuasñ, iniit tum costumbre jém gobernador iga icutsigáypa tum preso para jém pìxiñtam juuts jeeyaj icupinjaypa. ¹⁶ Pajnetq idic tum pìxiñ iñiyi Barrabás. Jodónaneta iga agui malo. ¹⁷ Cuando anuumaneyaj itumpiy jém pìxiñtam, jém Pilato icwácaypa. Iñímáy:

—¿I iñxuntampa iga ancutsigáypa, jém Barrabás o jém Jesús, iñiyitim Cristo?

¹⁸ Porque ijodon jém Pilato iga jém Israelpic anjagooyiyaj agui ijóyixyaypa Jesús, agui icujóyiyaypa jeeyucmi icijunçotyaj.

¹⁹ Iganam coñ jém Pilato jut cìpínóypa, jém iyomo icutsadáy anmatì. Nímayta jém Pilato: “Odoy tigiyucumi con yíp wibic pìxiñ. Porque tsúmic agui amalmawíña yíbam pìxiñ icuyucmi.”

²⁰ Pero jém panij anjagooyiyaj con jém wídaytam iñimayyaypa jém pìxiñtam iga iwácayajñ iga cutsigaytaiñ jém Barrabás y accaataiñ jém Jesús, hasta ijicyaj jém pìxiñtam.

²¹ Jesic eybic jém gobernador iñímáy jeeyaj:

—¿Juppic de yíp wisten pìxiñ inwianjamta iga ancutsigáypa?

Nimyaj:

—Barrabás.

²² Jesic jém Pilato eybic icwácpa jém pìxiñtam. Nímayyajta:

—¿Íti inwianjamta iga anwadáypa yíp Jesús iñiyitim Cristo?

Itumpiy jém pìxiñtam icutsonyay. Nimyaj:

—¿Cunúntaami cunusyucmi!

²³ Jesic Pilato iñímáy jém pìxiñtam:

—¿Ítiiga? ¿Íti mal iwatne?

Pero más pimi jiyaypa jeeyaj. Nimyaj:

—¿Cunúntaami cunusyucmi!

²⁴ Cuando iix jém Pilato iga da ti wíap iwat iga síp icujíñayyaj jém pìxiñtam, iwác uxan ni, iche ici jém pìxiñtam iwiñjom. Nímpa:

—Ich da anaj la culpa iga accaatap yíp wibic pìxiñ. Da ti iwatne. Yíp cuestión de mimichtam.

²⁵ Nimyaj itumpiy jém miññeyajwip:

—Aichtam con jém ammanictam anaítta la culpa iga accaatap yíp pìxiñ.

²⁶ Jesic ocmi jém Pilato icutsigáy jém Barrabás. Ipimíy jém soldado iga cósttaiñ Jesús. Icijunçodáy jém soldado iga icunúnayajñ cunusyucmi.

²⁷ Jesic jém gobernador isoldado ininic Jesús tum mijpic cuarto jut anuumaneyaj tsam jáyan jém soldado. Itumpiy icuteñxetyaj Jesús. ²⁸ Tsodayta jém yagatspic iyooti. Accámayta jém tungac yooti jém tsabatspic. ²⁹ Jém soldado itagayyaj tum apit corona, icámayyaj icobacyucmi. Ichiiyaj tum cuy iga imatspa inwicimí juuts tum rey. Icosteeñayyaypa jém Jesús iwiñjom. Ixaayiyaypa. Nimyaj:

—¿Xutsóy miRey de jém judíos!

³⁰ Ichujcayajpa. Itobayyaj jém icuy iga iyígáyáypa icobac. ³¹ Cuando yaj ixaayíyyaj, iccáyáy jém tsabats yooti, icámáy eybic jém iyooti jém imichipic. Ocmi nanicta iga cunúntap cunusyucmi.

Cunúnta cunusyucmi jém Jesús
(Mr. 15:21-32; Lc. 23:26-43; Jn. 19:17-27)

³² Cuando niquiyaj tunjom, ipát tum Cirenepic pxiñ iníyi Ximój. Jém soldado ipimíy jém Ximój iga ininigáyiñ jém Jesús icunus.

³³ Jesic núcyaj tum lugar iníyi Gólgota. Nimtooba jém Tsútsco bacpacchim. ³⁴ Jemum ichiiyaj jém vino namotneta con chuxñiwi. Cuando icutits Jesús jém vino, da iuc.

³⁵ Cuando yaj icunúnyaj cunusyucmi jém soldado, iwatyajpa sorteo entre jeeyaj i iconwíypa iga imichap jém Jesús ipuctucu. Jempigam cupac juuts nimpa jém wiñicpic anmatciwiñ: “Iwécyajpa ampuctucu entre jeeyaj. Iwatyajpa sorteo.” ³⁶ Jesic coñyajpa jém soldado iga iwatyajpa cuenta. ³⁷ Jém icobacantim accámayta tum letrero jut nimpa tiiga accaata: “Yíbam jém Jesús jém judíos iRey.”

³⁸ Jesic cunúnaytatim wisten númyajpaap jeetim lugar jut cunúnta Jesús. Pánayta tum jém icunus jém Jesús inwimi y tum inaymi. ³⁹ Jém nasyajpáppic jem inwinyoyayajpa con icobac, tsam imalmalmayyajpa. ⁴⁰ Inímayyaj:

—Mich miñimpa iga immiswatpa jém mijpic mastic y tucunajama inictsucumpa eybic. Siiga Dios miManic, naciaputtaji inyaac. Nacunúnaytaji jém cunusyucmi, queti.

⁴¹ Agui ixaayíyyajpatim jém panij anjagooyiyaj, jém escribaspic maestroyaj, jém fariseoyaj y jém wídaytam. Nimyajtim jeeyaj:

⁴² —Yíp pxiñ iciacputpa tungac, pero iyaac da wíap iniciacputta. Siiga numa jém Israelpic iRey, nacunúnaytaiñ, jesic tancupictampa. ⁴³ Tsam icupicpa iga Dios wíap iyoxpát, jesic siip wí iga Dios iciacpudiñ siiga numa itoypa; como tanímayne iga Dios iManic.

⁴⁴ Hasta jém númyajpaap, jém cunúntawíip con Jesús, imalmalmaytim.

Ca jém Jesús
(Mr. 15:33-41; Lc. 23:44-49; Jn. 19:28-30)

⁴⁵ Jesic icuwiti jém naxyucmi cupiicha dende cugapjama hasta las tres de la tarde.

⁴⁶ Jesic jeetim hora pimi jiy jém Jesús. Nim:

—Elí Elí, ¿lama sabactani?

Yíp nimtooba: ManDios, manDios, ¿tiiga antsac ancutum?

⁴⁷ Algunos jém teññeyajwíip jem cuando imatonjayaj, nimyajpa:

—Yíp pxiñ síp inwejay jém wiñicpic anmatciwiñ jém Elías.

⁴⁸ Jeeti rato nic poyimi tum de jeeyaj. Nic ipic tum esponja juuts tum puqui. Imuj con jém tampic vino. Iccám tum waycuyucmi iga igucpa Jesús. ⁴⁹ Pero tungac nimyajpa:

—Tsaci, tánixpa siiga miñpa iciacput jém Elías.

⁵⁰ Eybictim pimi jiy Jesús, jesic caum. ⁵¹ Jeeti rato jém mijpic punctuctaani jém itwíip jém mijpic masticjom teeñansaj icucmi dende sinwiñ hasta naxwiñ. Tsam yis jém nas, pooyaj jém mijpic tsa. ⁵² Jém tsúts ijós ányayaj. Pisyaj jáyan jém pxiñtam jém icupicneyajwíip Dios, jém wiñicpic caaneyaj. ⁵³ Ocmi cuando acpista jém Jesús, putyaj ijósjom jém tsúts, nicyaj hasta jém atebet Jerusalén. Jemum tsam jáyan pxiñtam iixyaj.

⁵⁴ Jesic jém capitán con jém iwatyajpáppic cuenta jém Jesús, cuando iixyaj iga pimi yis jém nas y iixtim ti naspá jem, tsam pimi cinyaj. Nimyaj:

—Numa, yíp pxiñ jém Dios iManic.

⁵⁵ Ityajtim jem wati jem yomtam, juumi iixyajpa ti iñasca jem Jesús. Yípyaj yomtam iwaganamiñyaj Jesús jem naxyucmi de Galilea, jem iyoxpátneyajwip. ⁵⁶ Entre jeeyaj ittim jem Malía Magdalena, jem Malía jem Jacobo y José iapa, ittim jem Zebedeo iyomo.

Cumtap jem Jesús

(Mr. 15:42-47; Lc. 23:50-56; Jn. 19:38-42)

⁵⁷ Jesic tsuuyim miñ tum pixiñ tsam rico iñiyi José. Tsucum jem atebet Arimatea, jem Jesús icuyujcwiñtim. ⁵⁸ Jesic jem José nic íamy jem Pilato, iwágáy jem Jesús imijtay. Jesic jem Pilato ipimíy jem soldado iga ichiáyiñ jem imijtay. ⁵⁹ Jesic José ipigáy jem Jesús imijtay, inmónáy con tum wibic puctucu. ⁶⁰ Icot jem tsaajosjom, jem José imichi, jem yaguiñpic iwatne. Ocmi injopnúc jem tsaajos con tum mijpic tsa. Yaj iwat jempic, setum. ⁶¹ Ittim jem jem Malía Magdalena y jem tungac Malía. Coñyaj jem tsaajosañaca.

Jem soldado iwatyajpa cuenta jem tsaajos

⁶² Ocmi cuyaj jem jama iga iwitsacyajpa itumpiy cosa para jem jeycuy jama. Cuando tigiy jama, añtuumayajpa jem panij anjagooyi y jem fariseoyaj, nic íamyaj jem Pilato.

⁶³ Iñimayyaj:

—Manañjagooyi, anjista iga jem migoypaap cuando danam caane, nimpa iga: “Jem tucunajama ich apispa de jut cumneyajta jem caaneyajwip.” ⁶⁴ Jeeyucmi cutsati jem soldado iga iwatpa cuenta jem jos jut cumta hasta jem tucunajama. Wiap imiñyaj jem icuyujcwiñ tsuucim, ininigayyajpa jem imijtay. Ocmi ninyajpa iga: “Numa pisneum de jut cumneta jem caanewip.” Siiga iwatyajpa jempic, jesic jem ocmipic migoooyi más pimi malo que jem wiñtipic.

⁶⁵ Jem Pilato iñimáy:

—Yim it jem soldado. Wagananici. Nigi wattaami cuenta jutspiyam miwip.

⁶⁶ Jesic ocmi nicyaj iga iwatyajpa cuenta jem tsaajos. Icámáy tum sello jem jos innúccuyucmi iga quejiñ siiga i ináypa. Jemum ichacyaj jem soldado iga iwatyajiñ cuenta.

28

Pis jem Jesús

(Mr. 16:1-8; Lc. 24:1-12; Jn. 20:1-10)

¹ Cuando nasum jem jeycuyjama, tungagam cuqueja, joccuquej, jem wiñtipic jama de jem semana, jem Malía Magdalena con jem tungac Malía nic íamyaj jem jos. ² Jeeti rato miñ tum mijpic nasyixi. Quet tum sinyucmipic pixiñ jem icutsatnewip tanjatun Dios. Cuando núc jem tsaajoscim, iccáy jem tsa jem josannúccuy, ocmi icofca. ³ Tsam tsocha juuts quénpa majiywiñ. Tsam pimi popo jem ipuctucu juuts nieve. ⁴ Cuando jem soldado iixyaj, tsam pimi cinyaj, cuetsayyajpa. Tsíyyaj juuts caane. ⁵ Jesic jem sinyucmipic pixiñ iñimáy jem yomtam:

—Odooy cñtaami. Ich anjodon iga miñ imméts jem Jesús jem cunúntawip cunusyucmi.

⁶ Dam i yim. Pisneum, cupac juuts nim. Miñi aami jut tsacneta idic jem tánomi. ⁷ Nici jobit, añmadaayi jem icuyujcwiñ iga pisneum de jut it jem caaneyajwip. Sip anjagóypa iñic jem naxyucmi de Galilea. Jemigam mictsiytámpa. Jisi iga mannimayñeum.

⁸ Jesic jem yomtam cáyyaj de jem tsaajoscim. Tsam pimi cinyaj, pero agui maymayyaj. Póyanťsucum, nic inmadáy jem icuyujcwiñ iga pisneum jem Jesús. ⁹ Iganam niquiyaj jem yomtam, iwiñquejáy jem Jesús tunjom. Idioschi. Jesic jem yomtam icunúcyaj Jesús, icosteeñayyaj, iñuusayyaj ipuy iga ijisyajpa. ¹⁰ Jesic Jesús iñimáy jem yomtam:

—Odooy cñtaami. Nigi nímaayi jem antiwitam iga nicyajjiñ jem naxyucmi de Galilea, jemigam aixyajpa.

Ti iñimayyaj jém soldado jém anjagooyi

¹¹ Iganam nicyajpa jém yomtam algunos jém soldado jém iwatnewiip cuenta jém tsaajos, nic inmadayyaj jém panij anjagooyi ti iñascayaj. ¹² Jesic jém panij anjagooyiyaj nic iniñmat jém wídaytam iga iwatyajpa acuerdo. Jesic tsam jáyañ tumiñ chiiyajta jém soldado. ¹³ Nímayyajta jém soldado:

—Mimichtam nimtaami iga: “Tsuuciim iganam amonítampa, miñ jém Jesús icuyujc#wiñ; iñúmáy jém imíjtay.” ¹⁴ Siiga ijodónap jém gobernador, ich mancupujpa iga odoy michiñ castigo.

¹⁵ Jesic jém soldado ipíctsonyaj jém tumiñ, nic iwatyaj juuts ipimíy jém panij anjagooyi. Jempigam ninyajpa jém judíos hasta siip.

Jesús inquímpa jém icuyujc#wiñ

(Mr. 16:14-18; Lc. 24:36-49; Jn. 20:19-23)

¹⁶ Jesic jém once icuyujc#wiñ nicyaj jém naxyucmi de Galilea. Quím jém cotsicyucmi juuts iñimayñe Jesús. ¹⁷ Cuando iixyaj Jesús, icosteeñayyaj. Aunque algunos ijispa iga migooyi, da iwícupicpa. ¹⁸ Jesic Jesús icunúc jém icuyujc#wiñ. Iñímáy:

—Achiiñeta jém pími iga ananjacpa jém ityajwíip siñyucmi y naxyucmi. ¹⁹ Nigi anmadaayi Dios inmati itumpiy jém pixiñtam icuwiñti yíp naxyucmi. Anquejaayi jém wibic anmati iga tsíyyajiñ juuts ich ancuyujc#wiñ. Acchintaami jém acupicnewiip jém anjatun iñiyimi, jém Dios iManic iñiyimi y jém Dios iAnama iñiyimi. ²⁰ Anquejayyaji iga icupicyajiñ itumpiy jém ananquímayooyi jém mananmadayñewiip. Jodónataami iga ich manwaganaitpa itumpiy jama hasta cuyajpa yíp nas.

Jemum cuyaj.

Jém wibic aṇmaṭi jém ijayñewiip jém Marcos

Jém Xiwan jém acchíṇoypaap najíyóyapa jém titsinaxyucmi
(Mt. 3:1-12; Lc. 3:1-9, 15-17; Jn. 1:19-28)

¹ Yímpic tsucum jém wibic aṇmaṭi iga taciaputtámiñ jém tánṐmi Jesucristo.

² Jém wiñicpic profeta jém Isaías ijaychacne ti iñímáy jém tanJaṭuṇ Dios:
Wiñti aṇcutsatpa tum profeta, jém p̄ixiñ anjagoyñeeba iñic.
Miwitsagáyapa jém iñtuṇ.

³ Nicyajpa jém p̄ixiñtam jém titsinaxyucmi juṭ da ti idíyíy
iga imatonyajpa jém najíyoypaap.
P̄imi najíyóyapa jém p̄ixiñ.

Nimpa: “Áṇáyaayi jém tánṐmi ituṇ.

Tsaci iga immalwattámpa porque miñpa jém tánṐmi.”

⁴ Jesic tum jama núc jém Xiwan jém titsinaxyucmi juṭ da ti idíyíy iga inmatpa jém Dios
inmaṭi y icchinpa jém p̄ixiñtam, iñímáyapa:

—Tsaci iga immalwatpa y Dios miwadáyapa perdón jém iñtáṇca. Miñtaami, manac-
chintámpa iga quejiñ iga inçucacneum jém iñjixi.

⁵ Jesic itumpiy jém Judeapic p̄ixiñtam con jém Jerusalénpic p̄ixiñtam nicpa imatonyaj
jém Xiwan jém acchíṇoypáppic. Cuando jém p̄ixiñtam inmadayajpa Dios jém itáṇca, jém
Xiwan icchinpa jém río de Jordán.

⁶ Da wicuyajne jém Xiwan. Jém iyooti tacne con jém camello ipic, agui jutsóyapa. Jém
imijpactsencuy tum tsococuero. Icutpa jém awu, iucpa jém jimñi chiñu. ⁷ Jesic jém Xiwan
inmadáyapa jém p̄ixiñtam jém Dios inmaṭi. Nimpa:

—Miñpa antuuñiaṇc̄im tum p̄ixiñ más wiap que aich. Da wiap annasca, da wiap
aṇcuwijáyáy jém iciac. ⁸ Ich manacchintámpa con ni, pero jém miñpáppic micchintámpa
con Dios iAnama.

Acchintap jém Jesús
(Mt. 3:13-17; Lc. 3:21-22)

⁹ Jesic jeetim tiempo put iticmi jém Jesús jém atebet Nazaret jém naxyucmi de Galilea.
Jesic jém Xiwan icchin Jesús jém río de Jordán. ¹⁰ Iganam putpa niçim jém Jesús, iix iga
áṇáy jém siṇ. Quet jém Dios iAnama juuts tum cuucu, nummiñ, núc hasta Jesúsucmi.

¹¹ Jém ityajw̄ip imatonyaj tum j̄iyi siṇyucmi. Nímayṭa jém Jesús:

—Mich mammanic, tsam mantoypa. Siṇ agui amaymay con mimich.

Cutitstap jém Jesús
(Mt. 4:1-11; Lc. 4:1-13)

¹² Jesic jeeti rato jém Dios iAnama ininic jém Jesús jém titsinaxyucmi juṭ da ti idíyíy.
¹³ Nic it̄i cuarenta jama jém titsinaxyucmi juṭ ityaj jém jimñi animatyaj. Jesic jém
Woc̄iwiñ miñ icutits jém Jesús iga icmalwatpa idic. Jesic ocmi miñyaj jém siṇyucmic
p̄ixiñtam, icuyoxayajpa jém Jesús.

Jesús moypa iwat jém Dios iyoxacuy jém naxyucmi de Galilea
(Mt. 4:12-17; Lc. 4:14-15)

¹⁴ Oc̄mi matsta jém Xiwan, pajṭa cárcel. Iganam pajnetṭa jém Xiwan, nic Jesús jém
naxyucmi de Galilea iga inmatpa jém wibic aṇmaṭi iga núctooba jém jama iga Dios injacpa
ȳip naxyucmi. ¹⁵ Nimpa Jesús:

—S̄iip núcneum jém tiempo jém ininjócnetar̄w̄iip. Dam jáyñe Dios injacpa jém ityajw̄iip ȳip naxyucmi. Jesic tsaci iga immalwatpa, cucaci in̄jixi, cupictaami jém w̄ibic an̄mati iga miciaacputtam̄tañ.

Jesús in̄wejáy cuatro jém t̄iip̄tero
(Mt. 4:18-22; Lc. 5:1-11)

¹⁶ Cuando naspa Jesús jém laguna an̄naca in̄yi Galilea, iix jém Ximoy con it̄iwi Anti. S̄ip ipatsyaj jém ired jém laguna porque t̄iip̄teroyaj. ¹⁷ Jesic Jesús in̄imáy jeeyaj:

—Atún̄iytaami. S̄ip nicpa tamméts jém p̄ixiñtam juuts t̄iipi.

¹⁸ Jesic jeeti rato ichacyaj ired, nic itún̄iyyaj jém Jesús.

¹⁹ Jesic nic Jesús uxan̄ más juumi, ipát jém Jacobo, jém Zebedeo im̄anic, con it̄iwi jém Xiwan. Ityaj jém barcojom, s̄ip in̄tótস্যaj ired. ²⁰ Jesic jeeti rato in̄wejáȳtim jeeyaj.

Jesic Jacobo y Xiwan ichacyaj ījatun̄ jém Zebedeo jém barcojom con jém imozoyaj. Nic itún̄iyyaj jém Jesús.

Tum p̄ixiñ imatsne idic tum mal esp̄ritu
(Lc. 4:31-37)

²¹ Jesic nicyaj jém attebet Capernaum. Jeetim jeicuyjama, tigiy Jesús jém sinagoga. Moj in̄quejáy jém Dios in̄mati jém p̄ixiñtam. ²² Jesic jeeyaj tsam t̄ineanjacyaj cuando imaton̄yay ti nimpa jém Jesús. Porque naj̄yóypa juuts tum an̄jagooyi da juuts jém escribasp̄ic maestroyaj. ²³ Jém sinagoga it idic tum p̄ixiñ imatsne tum mal esp̄ritu. P̄imi an̄wejpa, n̄imayta Jesús:

²⁴ —MiJesús miNazaretp̄ic, ¿t̄iiga ammooḡiypa aichtam? ¿Que miñpa anactogoyta? Mánix̄picpa, mich jém Yucm̄ip̄ic Dios miM̄ichi.

²⁵ Jesic Jesús iwogáy jém mal esp̄ritu, in̄imáy:

—Odoy j̄iyi. Puti ȳip p̄ixiñ ianaman̄jom.

²⁶ Jém mal esp̄ritu iccutin̄ jém p̄ixiñ naxyucmi. P̄imi an̄wejpa jém mal esp̄ritu, ocmi put.

²⁷ P̄imi an̄jécneyaj jém p̄ixiñtam. Moj nacwácyajtaji entre jeeyaj:

—¿T̄iapaap? ¿Que tum jomip̄ic an̄químayooyi inimiññe ȳip p̄ixiñ? Wiap ip̄im̄iy jém mal esp̄ritu juuts tum an̄jagooyi y icup̄icyajpa.

²⁸ Jicscīy wan̄pa icuw̄iti jém naxyucmi de Galilea ti iwatpa jém Jesús.

Jesús icp̄is jém Ximoy im̄idapa
(Mt. 8:14-15; Lc. 4:38-39)

²⁹ Jesic cuando putyaj jém sinagoga jém Jesús con icuyujc̄iwiñ, nicyaj jém Ximoy y Anti iticc̄im, iwaganan̄icyajt̄im jém Jacobo y jém Xiwan. ³⁰ Mimne jém Ximoy im̄idapa. Tsam p̄imi jawan̄iy. Wone icheesmi. Cuando núc jém Jesús, an̄madayta iga mimne jém yomo.

³¹ Jesic Jesús icunúc jém yomo, imatsáy ici, īj̄ictsucum. Jeeti rato ichac jém jawan̄, mojum iwat jém w̄iccuy iga acw̄ictap Jesús con jém icuyujc̄iwiñ.

Jesús icp̄is jáyan̄ jém mimneyajw̄iip
(Mt. 8:16-17; Lc. 4:40-41)

³² Jesic tsuuyim cuando tigiyñeum jama, jém p̄ixiñtam inimiññayaj Jesús itump̄iy jém mimneyajw̄iip y jém imatsneyajw̄iip jém mal esp̄ritu. ³³ Itump̄iy jém ityajw̄iip jém attebet an̄tuum̄ayaj jém Ximoy itigan̄naca. ³⁴ Jesic Jesús icp̄is jáyan̄ jém mimneyajw̄iip, jém in̄iityajw̄iip w̄ati jém caacuy. Itoptim jáyan̄ jém mal esp̄ritu. Pero Jesús da ijigáy iga j̄iypa jém mal esp̄ritu porque jeeyaj īxp̄icpa īapaap jém Jesús.

Naj̄yóypa Jesús jém naxyucmi de Galilea
(Lc. 4:42-44)

³⁵ Jesic tsam tsuuytim, piichcimnam, yus jem Jesús. Put jem tiganjom, nic icutum tum lugar jut da i idiyiy. Nic inwejpát Dios. ³⁶ Jesic jem Ximoy con jem icompañeroyaj nic icuámyaj jem Jesús. ³⁷ Jesic ipátyaj, iñimayyaj:

—Síp mimétsyaj wati jem pixiñtam.

³⁸ Jesic Jesús iñimáy:

—Tanictámpa jem tungac tiganjojjaj jem ityajwip nocojom iga ananmatpatim jem wibic anmati. Jeeyucmi ich amiññe yip naxyucmi.

³⁹ Jesic nic Jesús itumpiy jem atebetyaj icuwiti jem naxyucmi de Galilea. Cada atebet najíyóypa Jesús jem sinagoga. Itoptim jáyan jem mal espíritu.

Jesús icpis tum pixiñ jem cupúgayñewip iñaca
(Mt. 8:1-4; Lc. 5:12-16)

⁴⁰ Jesic miñ tum pixiñ cupúgayñe iñaca, icunuc Jesús. Icosteeñáy jem Jesús ipuycim. Iacunucáypa jem Jesús iga iyoxpádiñ, nimpá:

—Siiga inwianjam, wip anacpis.

⁴¹ Jesic Jesús tsam iyaachanjám, ichicunuc jem pixiñ, iñimáy:

—Anwianjam. Micuáyñeum.

⁴² Jesic cuando yaj nimi Jesús, jeeti rato ichacum jem lepra caacuy, witsiyum jem iñaca.

⁴³ Jesic Jesús inquímá jem pixiñ, duro ipimiy, ⁴⁴ iñimáy:

—Odoj i anmadaayi iga ich manacpis, nigí anquejaayi jem panij iga michacneum jem caacuy. Nanigaayi jem ofrenda juuts nimpá jem Moisés inquímayooyi iga müxtaiñ iga numa mipisneum.

⁴⁵ Pero jem pixiñ da iwat jempic. Nic inmat jutquej ti iwadáy jem Jesús. Jeeyucmi da wip itigiy Jesús ni tum atebet jut ixtap porque jem pixiñtam tsam in tuumacayajpa. Jesic siiba ansicmi jut da ti idiyiy. Pero miñyajpa jem pixiñtam jutquej iga iixyajpa jem Jesús.

2

Jem Jesús icpis tum pixiñ tusacanewip
(Mt. 9:1-8; Lc. 5:17-26)

¹ Cuando nas juna jama, set eybic Jesús jem Capernaum. Cuando ijodónayaj jem pixiñtam iga setneum iticcim, ² jeeti rato antuumayajpa tsam jáyan pixiñtam hasta da cutigiyajpa jem tiganaca. Jesús inquejáypa jem Dios inmati. ³ Jesic cuatro pixiñ inimñayyaj Jesús tum cuxuj tusacane icumij. Cópnetá inimiñta. ⁴ Pero como tsam itñim, da wip ininas jem mimnewip iga icunúcpa Jesús. Jesic iniquímyaj tigançobac, ijetyaj jem tic itecho. Yaj ijetyaj, ijimquetyaj tipsyucmi jem cuxuj con ichees hasta jut it Jesús. ⁵ Jesic mu iix Jesús iga tsam icupicyaj iga wip icpisóy, iñimáy jem cuxuj:

—Manic, miwadayñeta perdón jem iñtánca.

⁶ Jemum coñyaj jem escribaspic maestroyaj. Moj ijisyaj ijixianjom: ⁷ “¿Yip pixiñ tiiga nimpá yimpic? Síp icujy tanDios. Jem tanjatun Dios iyaac wip iccáyáy tum pixiñ itánca.” ⁸ Pero Jesús ijodon ti síp ijisyaj, jesic iñimáy:

—¿Tiiga iñjstámpa jempic? ⁹ ¿Ti más da tánca iga annimáypa yip cuxuj iga “Miwadayñeta perdón jem iñtánca” o iga annimáypa iga: “Tsucumim, pinim iñchees, witim?” ¹⁰ Pero iga ijodónatamiñ iga jem Miññewip Sinyucmi iniit ipimi iga wip iccáyáy jem pixiñtam itánca yip naxyucmi (jesic Jesús iñimáy jem cuxuj): ¹¹ Mannimáypa, tsucumim, pinim jem iñchees, nicsim iñticmi.

¹² Iganam iamyajpa jem pixiñtam, tsucum jem cuxuj, jeeti rato ipin jem ichees, put jem ticjom. Jeeyaj agui ipooñanjamyaj, moj icujípyaj Dios. Nimyaj:

—Da queman tánix yicxp̄ic milagro.

Jesús inwejay jém Leví
(Mt. 9:9-13; Lc. 5:27-32)

¹³ Jesic eyb̄ic nic Jesús jém laguna aṅṅaca. Jesic aṅtuumayajpa tsam jáyan jém pixiñtam jut it Jesús. Moj inquejayajta jém Dios inṁati. ¹⁴ Jesic moj niq̄ui Jesús, naspa jut ichécyajpa jém impuesto. Iix iga jemum coñ jém Leví, jém Alfeo iman̄ic. Jesic Jesús in̄imáy jém Leví:
—Atún̄iyi.

Jesic tsucum jém Leví, nic itún̄iy jém Jesús.

¹⁵ Ocmi nic wiiqui Jesús con icuyujc̄iwiñ jém Leví iticc̄im. Iwaganacoñyay jáyan jém ichécyajpaap impuesto y jém tun̄gac jém tán̄caiyw̄iip. Tsam jáyan de jeeyaj itún̄iyayajpa jém Jesús. ¹⁶ Pero cuando jém fariseoyaj con jém escrib̄apic maestroyaj iixyay iga jém Jesús iwaganawícyajpa jém ichécyajp̄apic impuesto y jém tun̄gac tán̄caiyw̄iip, jesic in̄imayyajpa jém Jesús icuyujc̄iwiñ:

—¿T̄iiga wagawícyajpa jém immaestro con jém tán̄caiyw̄iip?

¹⁷ Cuando imaton̄ jém Jesús ti n̄imayajpa, jesic in̄imáy jeeyaj:

—Jém ḁapic m̄imne ḁa ixunpa jém tsóȳiyoypaap, pero jém m̄imneyajw̄iip ixunpa jém tsóȳiyoypaap. Ich ḁa amiñ iga anan̄wejaypa jém ḁapic tán̄caiy, pero miñ anan̄wejay jém tán̄caiyw̄iip iga ichacyajiñ jém it̄an̄ca.

Inmatpa Jesús de jém ayuno
(Mt. 9:14-17; Lc. 5:33-39)

¹⁸ Tum jama jém Xiwan icuyujc̄iwiñ y jém fariseoyaj iwatyajpa ayuno. Jesic tun̄gac miñ icwácayaj jém Jesús, n̄imayta:

—¿T̄iiga iwatyajpa ayuno jém Xiwan icuyujc̄iwiñ y jém fariseoyaj, pero mich in̄cuyujc̄iwiñ ḁa iwatyajpa ayuno?

¹⁹ Jesic Jesús in̄imáy jém miññeyajw̄iip:

—Cuando yoomíypa tum pixiñ, inis̄in̄ap jém iamigoyaj. Jesic iganam it jém yoomíypaap, ḁa w̄iap iwatyaj ayuno. ²⁰ Pero núcpa jém jama cuando nan̄icnet̄awum jém yoomíypaap, tsíyyajpa iamigoyaj icutum. Jesic numa iwatyajpa ayuno.

²¹ ḁa i in̄tótspa tum pecapic yooti con tum j̄aca jém j̄omipic puct̄ucu. Siiga i in̄tótspa jém pecapic yooti con j̄ompuct̄ucu, jesic n̄ian̄xichpa jém j̄omipic y ocm̄im jacpa jém pecapic yooti jut nún̄matsne jém in̄toochi. ²² ḁa i icucompa jém j̄omvino jém pecapic cuerobolsajom. Porque siiga jempic in̄watpa, jesic p̄ipa jém j̄omvino, tojan̄sajpa jém pecapic cuerobolsa, cutegáypa jém vino, togoypatim jém cuerobolsa. Más w̄i iga cucomtap jém j̄omvino jém j̄omipic cuerobolsajom.

Jém Jesús icuyujc̄iwiñ itúcyajpa trigo jém jejcuy jama
(Mt. 12:1-8; Lc. 6:1-5)

²³ Tum jejcuy jama widaṅnaspa Jesús jut ñipnet̄a jém trigo. Cuando widaṅnasyajpa jém icuyujc̄iwiñ, moj itúcyaj jém trigo ipac. ²⁴ Jesic jém fariseoyaj in̄imayyaj jém Jesús:

—Ixi jém in̄cuyujc̄iwiñ, ¿t̄iiga iwatyajpa jempic jém jejcuyjama contra jém tanaṅquímayooyi?

²⁵ Jesic Jesús in̄imáy jém fariseoyaj:

—¿Que ḁa immayñe ti iwatyaj jém David con icompañeroyaj cuando tsam yaachayajpa, tsam yuayajpa? ²⁶ Jém David con icompañeroyaj tigíyyaj jém Dios iticj̄om cuando it jém cobapic pan̄ij jém Abiatar. Jém David icút jém caxtánañi jém tsacnet̄aw̄iip altaryucmi. Ichiitim jém icompañeroyaj. Tanj̄odon̄ iga jém tanaṅquímayooyi ḁa ij̄cpa iga i icútpa jém masticj̄ompic caxtánañi, nada más jém pan̄ijyaj.

²⁷ Jesic Jesús iñímáytim jém fariseoyaj:

—Dios ichac jém jejcuy jama iga iwíwadayyajiñ jém pìxiñtam. Da iwat jém pìxiñtam iga ixutsyajpa jém jejcuy jama. ²⁸ Ich, jém aMiññewiip Sinyucmi, achiita jém pìmi iga wiap annímáy jém pìxiñtam ti wiap iwatyaj jém jejcuyjama.

3

Jém pìxiñ jém titsnewiip ici
(Mt. 12:9-14; Lc. 6:6-11)

¹ Jesic eybictim tìgy Jesús tum sinagoga. Jemum it tum pìxiñ titsne ici. ² Jesic jém Jesús ienemigoyaj tsam icuixyajpa siiga icpìspa jém pìxiñ jém jejcuyjama iga iquejajwadayya-jtooba jém anjagooyicim. ³ Jesic Jesús iñímáy jém pìxiñ jém titsnewiip ici:

—Teñchucumi. Miñi miteñi yíp pìxiñtam ançucmi.

⁴ Jesic icwácpa Jesús jém ityajwiip jem. Nímayyajta:

—¿Tì wiap tanwat jém jejcuyjama? ¿Wì iga tanwíwatpa o iga tammalwatpa? ¿Wì iga tançiacpuđáypa tum pìxiñ ivida o tannaccáyáypa?

Pero jeeyaj da jyyaj. ⁵ Jesic Jesús icuámset jém pìxiñtam, tsam jóyñe y anyácne iga agui maloyaj jém ianama. Jesic iñímáy jém pìxiñ, jém titsnewiip ici:

—Tìmi inçi.

Jesic jém pìxiñ itim jém ici, wìtsíyñeum. ⁶ Jesic putyaj jém fariseoyaj. Anatumayaj con jém Herodes ipìxiñtam, moj ijisyaj jutsap iccaayaj jém Jesús.

Núcyaj tsam jáyan jém pìxiñtam jém laguna añaca

⁷ Nicyaj jém Jesús con icuyujcwiñ jém laguna añaca. Tsam jáyan jém Galileapic pìxiñtam itúnjyyajpa Jesús. ⁸ Jut quej ijodónayaj jém pìxiñtam iga Jesús tsam iwíwatpa. Jesic nic íamyaj jém Jesús. Nicyaj jém Judeapic, jém Jerusalénpic y jém Idumeapic pìxiñtam. Nicyajpatim jém ityajwiip ni anwiñtuc jém río de Jordán y jém ityajwiip no-cojom de Tiro y Sidón. ⁹ Jeeyucmi Jesús iñímáy jém icuyujcwiñ iga inimíñiñ tum barco jut químpa iga jém pìxiñtam odoy icpìtsíyyajiñ. ¹⁰ Jesús icpìs jáyan jém mimneyajwiip. Jeeyucmi itumpiy jém mimneyajwiip icunúcyajtooba Jesús. Tsam ichicyajtooba iga pìsyajiñ. ¹¹ Cuando jém imatsneyajwiip jém mal espíritu iixyaj Jesús, jesic icosteeñayaj jém Jesús ipuycim, pìmi anweyjajpa. Nímyajpa:

—¡Micham Dios miManic!

¹² Jesic Jesús iwogáypa jém imatsneyajwiip jém mal espíritu. Iñímáy iga odoy nímiñ iapaap jém Jesús.

Jesús icupin jém doce icuyujcwiñ
(Mt. 10:1-4; Lc. 6:12-16)

¹³ Jesic ocmi quím Jesús tum cotsicyucmi. Inwejay jém icupinpaap juuts je iwianjam. Jesic jeeyaj miñ íamyaj jém Jesús. ¹⁴ Jesic Jesús icupin doce jém icuyujcwiñ iga iwa-ganasiba. Icutsattooba iga niguiñ inmat jém Dios inmati. ¹⁵ Chiitaptim jém Dios ipìmi iga icpìsyajiñ jém mimneyajwiip y iga itopyajiñ jém mal espíritu jém pìxiñtam ianamanjom. ¹⁶ Icupin doce jém icuyujcwiñ: jém Ximój, iccámáytim iñiyi iga Peto; ¹⁷ Jacobo, con itíwi jém Xiwan, icuistic Zebedeo imanictam, accámayta iñiyi jém wisten iga Boanerges, yíp anmati nimtooba iga tiñpa juuts majiywiñ. ¹⁸ Cupinyajtatim Anti; Felipe; Bartolo; Mateo; Tomax; Jacobo, jém Alfeo imaníc; Tadeo; Ximój, jém itwiip con jém partido cananista; ¹⁹ y Judas Iscariote, jém ichijunçotwiip jém Jesús.

Nímyajpa iga Jesús iniit tum mal espíritu
(Mt. 12:22-32; Lc. 11:14-23; 12:10)

Ocmi Jesús nic tum ticciim con jém icuyujciwiñ. ²⁰ Eybictim an̄tuumayaj tsam jáyan jém p̄ixiñtam. Da i lugar ni para wícyajpa jém Jesús con icuyujciwiñ. ²¹ Jesic cuando ijodónayaj jém it̄iwitam ti iwat jém Jesús, nic imatsyaj porque n̄imyajpa iga locojane Jesús.

²² Jém escribaspic maestroyaj miñyaj de Jerusalén. N̄imyajpa:

—Yip̄ p̄ixiñ iniit jém mal espíritu in̄jagooyi, jém Beelzebú, ianamanj̄om. Jeam ichi ip̄imi, jeeyucmi w̄iap itop jém mal espíritu jém p̄ixiñtam ianamanj̄om.

²³ Jesic Jesús in̄wejay jém maestroyaj. In̄quejay con tum cuento. N̄imayyajta:

—¿Jutsap̄ initoptā iyaac jém Wocciwiñ? ²⁴ Siiga nawéctap̄ tum gobierno y ts̄iypa wisten partido, y siiga añayajpa, jesic nayajyajtap̄ jém gobierno. ²⁵ Siiga najóyixyajtap̄ tum p̄ixiñ im̄nictam y añayajpa con it̄iw̄i, jesic nayajyajtap̄. ²⁶ Siiga nawécyajtap̄ jém Wocciwiñ idemonio y añayajpa, jesic da jáypa cuyajpa jém Wocciwiñ.

²⁷ Jém númpaap da w̄iap it̄igiy tum p̄imipic p̄ixiñ it̄icj̄om iga icunúmaypa siiga da wiñti ichenpa jém tic iomi. Pero siiga wiñti ichenpa, jesic w̄iap in̄úmáy itump̄iy jém iniitw̄ip̄ iticciim.

²⁸ Numa mannímáypa iga wadaytap̄ perdón jém p̄ixiñtam it̄añca. Wadaytaptim perdón siiga icuj̄ypa jém tan̄Jatun̄ Dios, ²⁹ pero siiga tum p̄ixiñ icuj̄ypa jém Dios iAnama, da nunca i iwadáypa perdón jém it̄añca. Chiitap̄ castigo jém dap̄ic nunca cuyajpa.

³⁰ N̄impa ȳimp̄ic jém Jesús porque n̄imyajpa jém p̄ixiñtam iga Jesús iniit tum mal espíritu ianamanj̄om.

*Miñyaj jém Jesús iapa con ijáyuctam
(Mt. 12:46-50; Lc. 8:19-21)*

³¹ Jesic ocmi núcyaj jém Jesús ijáyuctam con iapa. Ts̄iyyaj jém tic añn̄aca. An̄wejaytā Jesús iga míñiñ iám iapa. ³² Coñyaj jáyan p̄ixiñtam jém ticj̄om. Cucmi ts̄iy jém Jesús. Jesic jém p̄ixiñtam in̄imayyaj jém Jesús:

—Jém in̄apa con in̄t̄iwitam con in̄yom̄t̄iwitam núcneyaj jém tigan̄n̄aca. S̄ip̄ mimétsyaj.

³³ Jesic n̄impa Jesús:

—¿Pero i jém án̄apa, i jém ant̄iwitam?

³⁴ Jesic Jesús iámmats jém coñyajw̄ip̄ jem, jém icuwoyx̄etneyajw̄ip̄. In̄ímáy:

—Mimichtam jém mán̄apa y mant̄iwitam. ³⁵ Porque itump̄iy jém iwatpaap juuts ixunpa Dios, jeam jém ant̄iw̄i, anyom̄t̄iw̄i y án̄apa.

4

*Jém cuento de jém iȳinpáppic jém trigo ipac
(Mt. 13:1-9; Lc. 8:4-8)*

¹ Jesic eybictim moj in̄quejay Jesús jém p̄ixiñtam jém laguna añn̄aca. An̄tuum̄neyaj jut̄ it̄ Jesús tsam jáyan p̄ixiñtam. Jeeyucmi tigiy tum barcoj̄om, nic coñi Jesús iga in̄quejáypa jeeyaj jém ts̄iyñeyajw̄ip̄ nian̄n̄aca. ² Jesic Jesús in̄quejáypa jém p̄ixiñtam tsam jáyan w̄itamp̄ic j̄ixi cuentujm̄i. In̄quejáypa ȳimp̄ic:

³ —S̄ip̄ maton̄taami ti mannímayt̄ampa. Tum p̄ixiñ nic ñipi, nic iȳin jém trigo ipac icamj̄om. ⁴ Mu iȳin jém pac, act̄in̄ uxan̄ jém tunj̄om. Miñyaj jém jon, icútquet. ⁵ Act̄in̄tim uxan̄ jém pac tsaanj̄om jut̄ da i jáyan nas. Jesic j̄icsc̄iy nay jém pac porque da juchan̄ jém nas. ⁶ Cuando pijpa jama, in̄oonoca jém xuxut̄ planta. Yaj cutitsaayi porque da t̄ichiḡiy. ⁷ Act̄in̄tim uxan̄ jém pac jém ap̄idanj̄om. J̄icsc̄iy yón jém ap̄it̄, ixamsamca jém xuxut̄ planta. ⁸ Pero act̄in̄tim jém pac jém w̄ib̄ic naxyucmi. W̄it̄imap̄. Algunos chióy treinta, algunos chióy sesenta, algunos chióy cien.

⁹ Jesic n̄impa Jesús:

—Siiga mitatsigiyta amaton̄taami.

Tiiga in̄matpa Jesús cuentujmi
(Mt. 13:10-17; Lc. 8:9-10)

¹⁰ Ocmi cunigayyaj jém p̄ixiñtam. Cuando icutum tsíy jém Jesús, jém ityajw̄ip noco con jém doce icuyujc̄wiñ icwácyajpa jém Jesús ti n̄mtooba jém xutu cuento. ¹¹ Jesic Jesús in̄ímáy jém icuyujc̄wiñ:

—Mimichtam, Dios michiiba jém j̄ixi iga in̄cut̄iyiyt̄ampa jém j̄ixi jém aṅnécnew̄ip idic. Sīp in̄cut̄iyiyt̄ampa jutsap in̄jac Dios jém ityajw̄ip ȳip naxyucmi. Pero jém tun̄gac p̄ixiñtam, jém dap̄ic icup̄icneyaj Dios, jeeyaj anaṅmadáypa cuentujmi. ¹² Dios iwat jemp̄ic para jém p̄ixiñtam jém dap̄ic ichactooba jém it̄aṅca, jesic cuando iixyajpa, da icut̄iyiyyajpa. Cuando imaton̄yajpa, datim ijodón̄ayajpa iga odoy ichacyajiñ iga imalwatpa y odoy ī iwadáyiñ perdón jém it̄aṅca.

Jesús in̄madáypa ti n̄mtooba jém cuento
(Mt. 13:18-23; Lc. 8:11-15)

¹³ Jesic Jesús in̄ímáypa jém icuyujc̄wiñ:

—Siiga mimichtam da in̄cut̄iyiyt̄ampa ȳip xutu cuento, ¿jesic jutsap in̄cut̄iyiyta jém tun̄gac cuento siiga manaṅmadáypa? ¹⁴ Jém p̄ixiñ jém in̄ippaap jém pac jex juuts jém p̄ixiñ jém in̄matpaap jém Dios in̄mat̄i. ¹⁵ Jesic cuando ñiptap jém Dios in̄mat̄i algunos jém p̄ixiñtam jex juuts jém pac jém act̄iṅnew̄ip tun̄jom. Imaton̄yajpa jém aṅmat̄i, pero jém Woc̄c̄wiñ miñpa iccáyáy jém aṅmat̄i jém ñipnet̄aw̄ip jém p̄ixiñ ianaman̄jom. ¹⁶ Algunos jém p̄ixiñtam jex juuts jém pac jém act̄iṅw̄ip tsaan̄jom. Imaton̄yajpa jém aṅmat̄i. Agui maymayyaj mu ip̄ictson̄yaj jém Dios in̄mat̄i. ¹⁷ Jeeyaj como da t̄ichiḡiy, da jáypa. Cuando cut̄it̄stap, malwadaytap jém Dios in̄mat̄i icuyucmi, jesic jóypa jém p̄ixiñ, ichacpa jém Dios in̄mat̄i. ¹⁸ Algunos jém p̄ixiñtam jex juuts jém pac jém act̄iṅnew̄ip jém apidan̄jom. Imaton̄yajpa jém aṅmat̄i. ¹⁹ Pero jesic tsam ij̄ispa jém iyoxacuy, tsam iw̄ian̄jam jém tumiñ, tsam icusúnyapatim jém dap̄ic w̄i ȳip naxyucmi. Jesic jexp̄ic j̄ixi ixamsamcaaba jém w̄ib̄ic aṅmat̄i. Jém p̄ixiñ ichacpa jém Dios in̄mat̄i, da w̄iputpa, da t̄imap. ²⁰ Pero algunos jém p̄ixiñtam jex juuts jém pac jém act̄iṅnew̄ip jém w̄ib̄ic naxyucmi. Imaton̄yajpa jém Dios in̄mat̄i, icup̄icyajpa, w̄it̄imap. Algunos chióy treinta, algunos chióy sesenta, algunos chióy cien.

Jém cuento de jém jucti
(Lc. 8:16-18)

²¹ Jesic n̄mtim Jesús:

—Tannooba jucti iga tayicquejpa. Da tan̄cujappa cooṅcuc̄im ni da tantsacpa tsees-cuc̄im. Tantunpa yucmi jém jucti iga tayicquejpa. ²² Porque quejpa itump̄iy jém aṅnécnew̄ip idic. Itump̄iy jém yamn̄new̄ip, ocmi jodón̄atap. ²³ Siiga mitatsigiyta, maton̄taami ti mann̄ímáypa.

²⁴ Jesic Jesús in̄ímáytim jém icuyujc̄wiñ:

—Wadaayi caso iga in̄watpa ti mann̄ímáypa. Siiga tsam imp̄ictson̄tooba jém Dios in̄mat̄i, jesic Dios michiiba jáyan̄ jém w̄itamp̄ic j̄ixi. Pero jém p̄ixiñ jém dap̄ic ip̄ictson̄tooba, da ti ichiiba Dios. ²⁵ Siiga imp̄ictson̄ne jém w̄ib̄ic j̄ixi, jesic miyoxp̄atpa Dios iga más in̄cut̄iyiyiñ. Pero jém p̄ixiñ jém dap̄ic iw̄ian̄jam jém w̄ib̄ic j̄ixi, jesic Dios iccáyáypa eyb̄ic jém ij̄ixi jém uxan̄pic iniit.

Jutsap in̄pic jém w̄ib̄ic aṅmat̄i iga tan̄jacpa Dios

²⁶ Jesic n̄mtim Jesús:

—Jém wibic aṇmaṭi jutsap injac Dios yíp naxyucmi jex juuts tum p̄ixiñ iñiptsac tum pac icamjom. ²⁷ Jesic jém p̄ixiñ moṇpa y yuspa, tsuucim y siṇñi. Jém pac naypa, mijap. Pero jém p̄ixiñ da ijodon jutsap iñay ni jutsap imija. ²⁸ Jém nas wiap icmija jém ñipñibooyi, da tanyoxpátpa. Naypa jém pac, yónpa, mijap, ocmi tsampa. ²⁹ Jesic cuando tsamum jém itim, nicpa ipin jém iomi porque tsamneum.

³⁰ Jesic n̄imtim Jesús:

—Siip manañquejáypa juṭpic aṇpicpa jém wibic aṇmaṭi iga Dios injacpa yíp naxyucmi. Manañquejáypa cuentujmi. ³¹ Jém wibic aṇmaṭi jex juuts tum mostaza ipac ñiptap naxyucmi. Je jém más xutupic pac que itumpiy jém pacyaj. ³² Jesic ñipneum jém pac, yónpa, más mijap que itumpiy jém ñipñibooyiyaj. Iccámpa jém mijpic inçis y jém jonyaj nicpa itiyaj jém cuy inçisyucmi, jejyajpa jém icumuncom.

Tiiga accuyujóypa Jesús cuentujmi
(Mt. 13:34-35)

³³ Con waṭi jém cuento inquejáy Jesús jém p̄ixiñtam jém Dios inmaṭi hasta juṭpic wiñiñ icutuyiyaj. ³⁴ Jesús inmadáy cuentujmi itumpiy jém p̄ixiñtam. Pero cuando icutum it con jém icuyujc̄iwiñ, jesic inmadáy jeeyaj ti n̄imtooba itumpiy jém cuentoyaj.

Jesús icteñ jém sawa y jém n̄ipoa
(Mt. 8:23-27; Lc. 8:22-25)

³⁵ Jesic jeetim jama, tsuáṇam, Jesús iñímáy jém icuyujc̄iwiñ:

—Tanictámpa jém laguna aṇwiñtuc.

³⁶ Jesic Jesús inquímyaj jém aṇtuumaneyajwip. Jém icuyujc̄iwiñ tigiyaj barcojom con Jesús. Ininicyajpa Jesús jém laguna aṇwiñtuc. Iwagananicyajpatim tungac jém barcoyaj. ³⁷ Iganam n̄iquiyaj barcojom, moj poyi tum sawa tsam p̄imi. Jesic p̄imi pooba jém ni, tsam p̄imi tigiyajpa ni jém barcojom hasta comtooba. ³⁸ Moṇpa Jesús jém barco itutscim tum colchonyucmi. Jém icuyujc̄iwiñ ichicyusyaj, iñimayyaj:

—Mammaestro, ¿que da íñix iga tacumon̄toobam?

³⁹ Jesic yusum jém Jesús, iñímáy jém sawa iga teeñiñ. Iñímáytim jém lamar:

—¡T̄inei, odom t̄isigooyi!

Jesic teñum jém sawa y t̄ineum jém n̄ipoa. Dam ti t̄isigóypa. ⁴⁰ Jesic Jesús iñímáy jém icuyujc̄iwiñ:

—¿Tiiga tsam mic̄iṇtámpa? ¿Que da in̄cupictámpa iga Dios tawatpa cuenta?

⁴¹ Tsam p̄imi c̄iṇyaj jém Jesús icuyujc̄iwiñ. Nanímayyajtap:

—¿Iapaap yíp p̄ixiñ iga jém sawa y jém n̄ipoa icupicpa?

5

Jém Gadarapic p̄ixiñ imatsne idic jáyaṇ jém mal espíritu
(Mt. 8:28-34; Lc. 8:26-39)

¹ Jesic ocmi Jesús con icuyujc̄iwiñ núcyaj jém laguna aṇwiñtuc jém naxyucmi de Gadara. ² Jesic mu iput jém Jesús jém barcojom, ipát tum Gadarapic p̄ixiñ. Miñ jém p̄ixiñ jém camposanto. Imatsne jém mal espíritu. ³ Jém p̄ixiñ da ipa tiganjom, nicpa it̄i jém camposanto. Da i wiap ichen jém p̄ixiñ ni con cadena. ⁴ W̄atciy tsénayta jém p̄ixiñ ici y ipuy con cadena, pero siempre ijacpa jém cadena. Iccujagáypa jém t̄iṇcuy jém iñuusmatsayñewip ipuy. Tsam p̄imi malo, da i wiap imanxuwat jém p̄ixiñ. ⁵ Tsuucim y siṇñi siiba jém p̄ixiñ jém camposanto y jém cotsicjom. P̄imi aṇwejpa. Tsam naccoowaneta iyaac tsaami. ⁶ Jesic cuando jém p̄ixiñ juuminam iix jém Jesús, póyaṇtsucum, miñ icosteeñáy jém Jesús iwiñjom. ⁷ Jesic p̄imi j̄iypa jém p̄ixiñ. N̄impa:

—Mi Jesús, ¿tiiga miñpa ammoogíy? Mich jém Yucmipic Dios miManic. Mançunucsáypa por Dios iga odoy ayaachwatí.

⁸ Jempigam nimpa jém pixiñ porque Jesús iñimáy jém mal espíritu:

—Mimalespíritu, puti jém pixiñ ianamanjom.

⁹ Jesic Jesús icwác jém pixiñ, nimpa:

—¿Mich, miipaap?

Jém pixiñ icutson. Nímayta Jesús:

—Ich aLegión porque tsam ajáyanam.

Taich tanañmati jém legión nimtooba iga agui jáyan.

¹⁰ Jém mal espíritu icunucsáy Jesús iga odoy icutsadiñ tungac lugar. ¹¹ It idic jem jáyan jém yoya. Wícyajpa nocojom de jém cotsicciim. ¹² Jesic jém mal espíritu icunucsáypa jém Jesús. Nímayta:

—Acutsattaami jut it jém yoya. Ajígaayi iga atigiytámpa jém yoya ianamanjom.

¹³ Jesic Jesús ijigáy iga tigíyyaj jém yoya ianamanjom. Cuando putyajum jém mal espíritu jém pixiñ ianamanjom, nic tigíyyaj jém yoya ianamanjom. Ítyaj jem como dos mil yoya. Mu itigíyyaj jém mal espíritu, póyançsucumyaj jém yoya. Poyimi quetyaj jém tejajyucmi. Tigíyyaj jém niicim. Yaj jicjicaiyaj jém yoya.

¹⁴ Jesic poyyaj jém pixiñtam jém iwatyajpáppic cuenta jém yoya. Tsam pimi çnyaj. Nic inmadayyaj jém pixiñtam ti iñascayaj jém yoya. Nanicta jém añmati icuwiti jém atebet Gadara y hasta jut nice yoxajiyaj. Jesic jém pixiñtam miñ iámyaj ti iñascayaj jém yoya.

¹⁵ Núcyaj jut it jém Jesús. Iixyaj jém pixiñ jém imatsnewip idic jém mal espíritu tsam jáyan. Jemum coñ, puctugíyum, jixíiyum. Cuando iixyaj jém pixiñtam, tsam pimi çnyaj. ¹⁶ Jesic jém pixiñtam, jém iixñeyajwip ti iwat Jesús, moj inmadayyaj jém miññeyajwip ti iñasca jém pixiñ jém imatsnewip idic jém mal espíritu y ti iñasca jém yoya. ¹⁷ Jesic jém Gadarapic pixiñtam moj iñimayyaj jém Jesús iga niguiñam de jem.

¹⁸ Eybictim tigiy Jesús jém barcojom. Jém pixiñ, jém iniitwip idic jém mal espíritu, iñimáy jém Jesús:

—Ich anictoobatim. Ajígaayi iga awaganicpa con mimich.

¹⁹ Pero Jesús da ijigáy iga nicpa itúnjy jém pixiñ. Nimpa Jesús:

—Nicsim iñticmi. Nigi añmadaayi jém iñtiwitam ti miwadáy Dios iga tsam miyaachanjam.

²⁰ Jesic jém pixiñ nic jém naxyucmi Decápolis. Moj inmadáy jém pixiñtam ti iwadáy Jesús cuando itobáy jém mal espíritu. Tsam ipooñanjamyaj itumpiy de jeeyaj.

*Jém Jairo iyommanic y jém yomo jém ichiccunúcwip Jesús
(Mt. 9:18-26; Lc. 8:40-56)*

²¹ Jesic set eybic Jesús jém laguna añwiñtuc jém barcojom. Cuando núc Jesús jém ni añnaca, jesic inçtuumacayaj tsam jáyan jém pixiñtam. ²² Jesic miñ iám Jesús tum pixiñ iñiyi Jairo, tum sinagoga injagooyi. Cuando núc jut it Jesús, icosteeñáy ipuyçim. ²³ Jesic jém Jairo pimi icunucsáypa jém Jesús. Nímayta:

—Tsam pimi mimne jém anyommanic. Caatoobam. Nigi accámaayi inçi jém anyommanic icobacyucmi iga pixiñ iga odoy caiñ.

²⁴ Jesic jém Jairo iwagananic jém Jesús. Tsam jáyan pixiñtam nicyajtim, itúnjyyaj jém Jesús. Tsam icpitsiyaj. ²⁵ Jém pixiñtámanjom ittim tum yomo mimne. Doce amtij iniit jém caacuy iga quetpa iñipiñ. ²⁶ Watí jém tsóyíyoypaap ichóyiytip, pero tsam iyaachwatne jém yomo. Yajneum iwadáy gasto jém itumiñ, pero da pispá. Mástim pimi mimne. ²⁷ Jém yomo imatorne iga tsam wíap icpisóy jém Jesús. Jesic iganam

tsam icpitsiyajpa Jesús jem p̄ixiñtam, jem yomo icunúc jem Jesús ituuñiañc̄im, ichigáy jem Jesús iyooti. ²⁸ N̄impa jem yomo ij̄ixianj̄om: “Siiga antsigáypa iyooti con añci, jesic ap̄ispa.” ²⁹ Jesic jeeti rato teñ iga quetpa jem iñ̄ipiñ. Ijam jem yomo iga pisneum. ³⁰ Jesic Jesús icut̄iȳy iga icp̄is tum mimnew̄ip con ip̄imi, áms̄et jem p̄ixiñtamanj̄om, n̄impa:

—¿I atsigáy jem anyooti?

³¹ Jesic jem icuyujc̄iwiñ iñ̄imáy:

—Íñix iga jem p̄ixiñtam tsam p̄imi micp̄itsiyajpa. ¿T̄iiga micwágóypa iga i michic?

³² Pero Jesús icuámsetpa iga iixiñ i ichic. ³³ Jesic agui c̄iñe jem yomo, agui cuetsáypa porque ijodon̄ jutsa mu ip̄is. Miñ icosteeñáy jem Jesús iwiñj̄om, iñuuman̄madáy Jesús ti iñasca. ³⁴ Jesic Jesús iñ̄imáy:

—Miyomo, mip̄isneum porque tsam in̄cup̄icpa iga Dios wiap micp̄is. Siip michacneum jem caacuy. Chogoyñicsim.

³⁵ Iganam Jesús in̄imatpa jem yomo, núcyaj algunos jem p̄ixiñtam, miññeyaj jem Jairo iticc̄im. Iñ̄imayyaj jem anjagooyi:

—Caaneum jem iñyom̄añic. Odom más wadaayi molestia ȳip tammaestro.

³⁶ Pero Jesús da iwadáy caso ti iñ̄imáy jem miññeyajw̄ip. Iñ̄imáy jem Jairo:

—Odoy c̄iñi. Cup̄ici iga Dios wiap miyoxpát.

³⁷ Jesic da ij̄icpa Jesús iga nicpa it̄un̄iyay jem p̄ixiñtam. Ininic no más Peto, Jacobo, y Xiwan jem Jacobo it̄iwi. ³⁸ Cuando núcyaj jem sinagoga injagooyi iticc̄im, iix Jesús iga tsam it bulla, tsam weyjajpa, tsam anyácneyaj. ³⁹ Tigiy ticj̄om jem Jesús, iñ̄imáy jem p̄ixiñtam jem weyjajp̄ap̄ic:

—¿T̄iiga tsam miwejtámpa? ¿T̄iiga tsam in̄wattámpa bulla? Da caane jem woñi, moñpa.

⁴⁰ Pero jeeyaj agui ixiccayajpa jem Jesús. Jesic Jesús iquebacputyaj itump̄iy jem ityajw̄ip jem ticj̄om. Jesic iwagananicpa Jesús jem woñi ijatun̄ con iapa y jem icuyujc̄iwiñ. Tigiyay jem cuarto jut it jem woñi. ⁴¹ Jesic Jesús imatsáy jem woñi ici, iñ̄imáy jem woñi:

—Talita cumi.

Taichtam tanañmat̄imi n̄imtooba: Miwoñi, mann̄imáypa, tsucumi.

⁴² Jeeti rato tsucum jem woñi. Mojum w̄iti. Doce iam̄tiy iniit. Jem ityajw̄ip tsam p̄imi ipooñanj̄amyaj mu iixyaj ti iwat Jesús. ⁴³ Jesic Jesús tsam iwianquím jeeyaj iga odoy i in̄madáyñ iga icp̄is jem woñi. Iñ̄imáytim Jesús iga acwíctañ jem woñi.

6

Nicgacpa Jesús jem Nazaret

(Mt. 13:53-58; Lc. 4:16-30)

¹ Jesic put de jem jem Jesús, nic iticmi. Iwagananicayajpatim jem icuyujc̄iwiñ. ² Jesic cuando núc jem jejcuyjama, moj accuyujooyi Jesús jem sinagoga. Ityaj jáyan̄ p̄ixiñtam. Mu imaton̄yaj ti in̄matpa jem Jesús, jesic tsam ipooñanj̄amyajpa. N̄imayajpa:

—¿Jut cuyuj ȳip p̄ixiñ? ¿Jut ip̄ic ȳip wib̄ic j̄ixi? ¿Jutsap iwat con ici jem w̄itampic milagro?

³ ¿Da ȳip p̄ixiñ jem carpintero? Iapa jem Malía. Tánixpigáypatim jem it̄iwitam jem Jacobo, jem José, jem Judas y jem Ximój. Ityajt̄im ȳim jem iyom̄t̄iwitam con taichtam.

Jeeyucmi jem p̄ixiñtam ij̄oyixyajpa jem Jesús. ⁴ Jesic Jesús iñ̄imáy jeeyaj:

—Jutquej w̄ipictson̄tap tum jem profeta, pero cuando nicpa naj̄iyooyi iticmi, jesic jem iticm̄ipic p̄ixiñtam con jem it̄iwitam da iw̄ixyajpa.

⁵ Jesic jem Jesús da wiap iwat jem milagro iticmi. Ichic con ici nada más juten jem mimneyajw̄ip iga icp̄isyajpa. ⁶ Agui ipooñanj̄ampa Jesús iga jem p̄ixiñtam da icup̄icyajpa iga Dios wiap iwat jem milagroyaj. Jesic ocmi Jesús icuwit̄x̄etpa itump̄iy jem xuxut tiganj̄oj jem ityajw̄ip nocoj̄om iga in̄matpa jem Dios in̄mat̄i.

Jesús icutsat icuyujc#wiñ iga nicyajiñ najiyooyi
(Mt. 10:5-15; Lc. 9:1-6)

⁷ Jesic Jesús inwejáy jém doce icuyujc#wiñ. Icutsat wiswis iga nicyajiñ inmat jém Dios inmati jutquej. Chiiyajta jém Dios ipimi iga waiñ itopyaj jém mal espíritu jém pxiñtam ianamanjom. ⁸ Jesic Jesús inímáy jém icuyujc#wiñ iga odoy ti ininicyajiñ tunjom. Nímayyajtap:

—Nanictaami no más jém imbastun. Odoy nanictaami ni tumiñ, ni immoral ni titam inçútpa. ⁹ Accaami jém inçiac y tum jém inyooti. Odoy nanictaami tungac inyooti. ¹⁰ Cuando miñúctampa tum ticciim, jemum poychíytaaami hasta miñictampa tungac tiganjoj. ¹¹ Siiga miñúcpa tum tiganjoj, y da i miwipictsonpa, ni da i imatontooba jém Dios inmati, jesic puttaami ançicmi, cunebaytaami jém impuy iga cáyiñ jém pótpót. Jempigam ininquejáypa jém pxiñtam iga núctip jém Dios inmati. Numa mannímáypa iga cuando núcpa jém jama iga Dios ic#piñpa itumpiy jém malopic pxiñtam, jesic yípyaj pxiñtam jém ñapic iwianjamyaj jém Dios inmati, más chiitap castigo que jém malopic pxiñtam jém ityajwip jém atebet de Sodoma y Gomorra.

¹² Jesic nic najiyooiyaj jém Jesús icuyujc#wiñ. Inquímajpa jém pxiñtam iga ichacyajiñ iga imalwatpa y iga iwatyajiñ juuts ixunpa Dios. ¹³ Jém Jesús icuyujc#wiñ itopyajpatim jáyan jém mal espíritu jém pxiñtam ianamanjom. Iccámajyaj aceite icobacyucmi jáyan jém mimneyajwip. Acpiyajta.

Accaata jém Xiwan jém acchínoyapaap
(Mt. 14:1-12; Lc. 9:7-9)

¹⁴ Jém rey Herodes imaton ti iwatpa jém Jesús porque wanpa jutquej ti iwat. Ijisyajpa iga pisneum jém Xiwan jém acchínoyapaap, jeeyucmi wíap iwat jém wítampic milagro.

¹⁵ Pero tungac nimpa:

—Pisneum jém wiñicpic profeta jém Elías.

Tungagam nimpa:

—Yip pxiñ tum jém profeta jex juuts jém wiñicpic.

¹⁶ Mu imaton ti iwat jém Jesús, jesic nimpa jém Herodes:

—Yip jém Xiwan jém amp#miyñewip iga tinçujagaytaiñ iisci. Sip pisneum.

¹⁷ Porque yíptim Herodes ipimiy iga matstaiñ jém Xiwan. Pajta cárcel, tsentá con cadena porque iwogáy jém anjagooyi cuando ítobáyay jém itíwi Felipe iwichomo. Jém yomo iníyi Herodías. ¹⁸ Jém Xiwan inímáy jém Herodes:

—Mich da inwat juuts nimpa jém Dios inquímayooyi. Da wí iga impigayñe iníwi iyomo.

¹⁹ Jeeyucmi jém yomo Herodías tsam ijóyixpa jém Xiwan hasta iccaatooba, pero da wíap. ²⁰ Porque jém Herodes tsam icñpa jém Xiwan. Ijodon iga wíbic pxiñ y siempre iwatpa juuts ixunpa Dios. Jeeyucmi jém anjagooyi da ijícpa iga i imalwadáypa jém Xiwan. Tsam anyácpa jém anjagooyi cuando imaton jém Xiwan inmadayooyi, pero siempre imatontooba. Pero da icupicpa. ²¹ Jesic núc jém jama iga jém yomo Herodías ipát jutsap icca jém Xiwan. Núc jém anjagooyi Herodes icumpleaño. Iwatpa tum siñ jém Herodes. Iwadáy invitación itumpiy jém anjagooyiyaj con jém soldado injagooyiyaj y con jém pxiñtam jém iniityajwip jém miltampic cargo jém naxyucmi de Galilea. ²² Tigiy jém yomo Herodías iyommanic jut iwatyajpa jém siñ. Jém woñi etspa jém pxiñtámanjom. Jesic jém Herodes con jém ityajwip jém tsam iwianjamyaj jém woñi iga etspa. Jém rey inímáy jém woñi:

—Awágaayi titam inxunpa y ich manchiiba.

²³ Jesic jém Herodes ijıycámáy jém woñi iga ichiiba titam ixunpa hasta cucmi jém naxyucmi jut injacpa. ²⁴ Jesic jém woñi put jém cuarto jut sıñayajpa. Nic icwác jém iapa. Nımpa jém woñi:

—¿Ti anwágáypa jém Herodes?

Nımpa jém woñi iapa:

—Wágaayi jém Xiwan icobac jém acchıyoypaap.

²⁵ Jesic jıcsıy tıgıy eybıc jém woñi jut it jém rey. Nımpa jém woñi:

—Ansunpa iga sıptı achiaayi jém Xiwan icobac jém acchıyoypaap tum mıjpic chimajom.

²⁶ Jesic pımi anyác jém rey, pero como ijıycámáyneum iga ichiiba titam ixunpa jém woñi y como itumpıy jém inwejayñewıp imatonıyay, jesic da ti wıap iwat más que ichiiba juuts ijıycámáyne. ²⁷ Jesic jeeti rato jém rey icutsat tum soldado, jém accaoypaap, iga inimıñáyıñ jém Xiwan icobac. ²⁸ Jesic jém soldado nic jém cárcel, itıncujagáy jém Xiwan iısci. Jesic inimıñáy jém icobac tum mıjpic chimajom. Chiıta jém woñi. Jesic jém woñi ipıctson, ichi iapa.

²⁹ Cuando jém Xiwan icuyujcıwiñ imatonı ti iñasca jém Xiwan, jesic oy ipıñayay jém imıjtay, nic icúmayyay tum tsaajosjom.

Jesús icwíc jém cinco mil pıxiñtam

(Mt. 14:13-21; Lc. 9:10-17; Jn. 6:1-14)

³⁰ Jesic ocmi anıuumayay jém apóstolyay jut it Jesús. Inmadayyay Jesús titam iwatyay y titam inquejayyay jém pıxiñtam cuando oy najıyooyı. ³¹ Jesic Jesús iñımáy jém icuyujcıwiñ:

—Miñtaami mimichtam, tanıctámpa tum lugar jut da iñım. Tapoyejtámpa.

Porque tsam anıuumayajpa jém pıxiñtam, miñpa y nicpa hasta da i lugar para wıcyajpa jém Jesús icuyujcıwiñ. ³² Jesic Jesús con jém icuyujcıwiñ nicıyay tum barcojom. Nicıyay naps jeeyay jut da i idıyıy. ³³ Pero tsam jáyan jém pıxiñtam iıxyay iga nicıyajpa Jesús con icuyujcıwiñ. Iıxıcyay Jesús iga nıqui barcojom. Jesic póyanısucumıyay jáyan jém pıxiñtam, miñıyay wati jém tıganjoj. Icuwıtıxetyajpa jém laguna. Anıagóy miñúcyay antes que núcpa Jesús. ³⁴ Cuando núc Jesús, put jém barcojom, iıx iga anıtuumaneyay tsam jáyan pıxiñtam. Tsam iyaachanjampa porque jeeyay jex juuts jém borregoyay jém dapıc oomıy. Da i iwatpa cuenta. Jesic Jesús moj inquejay jáyan wıtampıc jıxi. ³⁵ Jesic tsuuyım, miñıyay jém Jesús icuyujcıwiñ, icunúcyay jém Jesús. Nımayta:

—Yım da i tıganjoj, sıp tsam tsuuyım. ³⁶ Nımaayi jém pıxiñtam iga nıguiñ ijuyyay titam icútyajpa. Nicıyajıñ yım jeexic jut it jém tıganjoj porque yım da i ti tanıctpa.

³⁷ Pero Jesús iñımáy jém icuyujcıwiñ:

—Mimichtam acwıctaami.

Jesic nımyajpa jém Jesús icuyujcıwiñ:

—¿Que aıchtam nicpa anıyúyayta doscientos tumiñ de plata jém caxtánañi iga anacwıcpa jém pıxiñtam?

³⁸ Jesic Jesús icwác jém icuyujcıwiñ. Nımayta:

—¿Juten caxtánañi iniıtta? Nıgi aami.

Cuando ijodónayay, iñımayyay:

—Anııta cinco caxtánañi y wısten tıpi.

³⁹ Jesic Jesús iñımáy itumpıy jém pıxiñtam iga anısaycoñıyajıñ naxyucmi jém múganjom.

⁴⁰ Anısaycoñıyay itumpıy jém pıxiñtam algunos cincuenta algunos cien. ⁴¹ Jesic Jesús ipıc jém cinco caxtánañi y jém wısten tıpi. Ámqım sınyucmi, moj inwejpát Dios. Jesic iwenwenjac jém caxtánañi. Ichi icuyujcıwiñ iga icwıcyajıñ jém pıxiñtam. Iwécım jém wısten tıpi iga ichııyajpa itumpıy jém pıxiñtam. ⁴² Itumpıy wıcyay hasta cusyay. ⁴³ Ocni

jém Jesús icuyujc̄iwiñ ipiñyay doce nacooy jém caxtánañi y jém t̄ipi jém cutsíyw̄ippic.
⁴⁴ Jém icútneyajw̄ip jém caxtánañi cinco mil jém p̄ixiñtam.

Witpa Jesús jém n̄iwiñpacyucmi
 (Mt. 14:22-27; Jn. 6:16-21)

⁴⁵ Jesic yajum wiiquiyaj, jeeti rato Jesús in̄imáy icuyujc̄iwiñ:

—Siip tigiytaami barcojom, nicstaami jém Betsaida jém laguna añwiñtuc. Jemigam manactsíypa. Siip apoychíypa ȳim iga anañquimpa jém p̄ixiñtam.

⁴⁶ Jesic yajum in̄quimay jém p̄ixiñtam, nic Jesús tum cotsicyucmi iga in̄wejpátpa Dios. ⁴⁷ Jesic piichawum, jém barco cucm̄im niqui jém laguna. Icutum tsíy Jesús jém naxyucmi jut̄ tsucumyay. ⁴⁸ Jesús iix iga sopsneyajum jém icuyujc̄iwiñ iga icwityajpa jém barco con jém remos. Porque poypa jém sawa, tsam ictsíypa jém barco, táñcaap̄ iñic. Jesic cuquejac̄im núc Jesús jut̄ niquiyaj jeeyaj. Witpa iñic Jesús jém n̄iwiñpacyucmi, in̄ascatooba idic jém barco. ⁴⁹ Pero cuando jém icuyujc̄iwiñ iixyajpa iga witpa n̄iwiñpacyucmi, ijisyajpa iga iixyay tum poñ. Tsam añweyajpa porque c̄iñneyaj. ⁵⁰ Itump̄iy jém icuyujc̄iwiñ iixyay. Tsam p̄imi c̄iñyay. Pero jeeti rato ijíyáypa Jesús, in̄imáy:

—¡Camamwattaami in̄añama! ¡Aicham! ¡Odoy c̄iñtaami!

⁵¹ Jesic tigiy barcojom jém Jesús con jeeyaj. Teeñanjac jém sawa. Mu iixyay jém icuyujc̄iwiñ, tsam p̄imi t̄ineanjacyaj, agui ipooñanjamyajpa. ⁵² Porque danam icut̄iyiyñeyaj jém milagro iga icjáyañá jém caxtánañi. Tsam camam iñama, danam icupicneyaj.

Jesús icp̄is jém mimneyajw̄ip jém naxyucmi de Genesaret
 (Mt. 14:34-36)

⁵³ Mu ijacyaj jém laguna añwiñtuc, núcya jém naxyucmi Genesaret. Ichenyaj ibarco jém playa aññaca. ⁵⁴ Jesic putyay jém barcojom Jesús con icuyujc̄iwiñ, jém Genesaretp̄ic p̄ixiñtam iixpicaypa jém Jesús. ⁵⁵ Jesic jém p̄ixiñtam nicyay poyimi ȳim jeexic. Moj inimiñyay tseesyucmi jém mimneyajw̄ip hasta jut̄ it Jesús. ⁵⁶ Jut̄quej nicpa Jesús jém xutupic tiganjoj o jém m̄ijpic atebetyaj, jém p̄ixiñtam inimiñyajpa jém mimneyajw̄ip. Ichacyajpa jém calle aññaca jut̄ naspá Jesús. Cuando núc Jesús, jesic jém p̄ixiñtam icunucsáypa iga icp̄isyajiñ jém mimneyajw̄ip. N̄imayajpa:

—Jígaaȳi nada más iga michigayyajpa jém in̄yooti jém mimneyajw̄ip.

Porque siiga ichigáypa iyooti in̄ñaca, p̄isyajpa itump̄iy jém mimneyajw̄ip.

7

Jém táñca tsucumpa jém p̄ixiñtam iñamanjom
 (Mt. 15:1-20)

¹ Ocm̄i añtuumayaj jut̄ it Jesús algunos jém fariseoyaj con algunos jém escribasp̄ic maestroyaj. Miñyay Jerusalén. ² Iixyay iga jém Jesús icuyujc̄iwiñ da icheeyajpa ici juuts jém Israelp̄ic p̄ixiñtam icostumbre antes que wícpa. Ijisyay siiga da iwatyajpa jém costumbre jém Jesús icuyujc̄iwiñ, ictañcawatpa. ³ Porque jém fariseoyaj y itump̄iy jém Israelp̄ic p̄ixiñtam da wícya jpa siiga da wac̄iy icheeba ici juuts n̄im jém wiñicp̄ic costumbre, jém ichacnew̄ip jém wiñicp̄ic w̄idaytam. ⁴ Cuando set de jém mercado, da ti ic̄ispa hasta que icheeba ici juuts n̄impa jém wiñicp̄ic costumbre. Iniityaj jáyan costumbre jut̄pic icheeyajpa itaza, jém majcuy y jém t̄iñcuyxuuy y jut̄pic icheeba jém ichees. ⁵ Jesic jém fariseoyaj con jém escribasp̄ic maestroyaj icwácya jpa jém Jesús. N̄imayta:

—¿T̄iiga jém in̄cuyujc̄iwiñ da iwatyajpa juuts n̄impa jém costumbre jém ichacnew̄ip jém wiñicp̄ic p̄ixiñtam? Da icheeyajpa ici antes que wícya jpa juuts n̄impa jém costumbre.

⁶ Jesic Jesús iñímáy jeeyaj:

—Da miǵóypa jém wiñicpic Dios inmatc̄wiñ jém Isaías cuando miñmadayta. Quejpa iga minimiǵoyat̄p iñyaac juuts nim jém Isaías. Ijaychacne ȳimpic:

Nimpa Dios:

Yípyaj p̄ixiñtam acujípyajpa con ij̄ip.

Pero ianamanj̄om da acupicneyaj.

⁷ Xajatim ajisyajpa.

Inquejayyajpa jém p̄ixiñtam ij̄ixquiimi juuts w̄ibic anquímayooyi.

⁸ Jesic Jesús iñímáytim jém p̄ixiñtam:

—Michtam iñchacneta jém Dios inquímayooyi. Inwattámpa s̄ip juuts jém p̄ixiñtam icos-tumbre iga iñcheeba immajcuy, jém imvaso, y tunḡac más jáyan jexpic cosa. ⁹ Jeeyucmi mimichtam tsam iñchactámpa jém Dios inmat̄i. Inw̄ianjamta iga inwattámpa jém wiñicpic costumbre. ¹⁰ Nimpa jém Moisés inquímayooyi: “W̄ixtaami jém iñjatun y iñapa. Siiga i imalnímáypa jém ij̄atun o iapa, jesic w̄i iga accaataiñ jexpic p̄ixiñ.” ¹¹ Pero mimichtam iniitta tum da w̄ibic costumbre. Miñimtámpa siiga i iñímáypa ij̄atun o iapa iga: “Da w̄iap manyoxpát porque itumpiy jém anaitw̄ip, jém manchiipáppic idic, tsíy juuts Corbán.” (Taichtam tanañmat̄imi nimtooba iga ij̄ycámáypa Dios iga ichiiba.) ¹² Siiga iwatpa así tum p̄ixiñ, jesic miñimtámpa iga da malo jém p̄ixiñ iga da iyoxpátpa jém ij̄atun o iapa. ¹³ Jempigam inictogoytámpa jém Dios inquímayooyi porque mich inwattámpa jexpic costumbre, jém ichacnew̄ip jém p̄ixiñtam dende wiñigam. Tsam jáyan jexpictim cosa inwattámpa.

¹⁴ Jesic eybic inwejay Jesús itumpiy jém p̄ixiñtam. Iñímáypa:

—Amaton̄taami iñtumpiytam. Cut̄iȳiytaami titam mannímaytámpa. ¹⁵ Titam in̄cútpa, jém tiḡiypaap iñ̄ip̄j̄om, da mictán̄caíypa. Pero jém malopic j̄ixi, jém putpáppic iñ̄anamanj̄om, je numa mictán̄caíypa. ¹⁶ Siiga mitats̄iḡiyta, amaton̄taami.

¹⁷ Jesic cuando yaj inquímaj jém p̄ixiñtam, tiḡiy Jesús jém tic̄j̄om. Jém icuyujc̄wiñ moj icwácayaj ti nimtooba jém an̄mat̄i. ¹⁸ Jesic Jesús iñímáy jém icuyujc̄wiñ:

—¿Que mimichtam datim in̄cut̄iȳiytámpa? Que da in̄j̄odon̄ iga jém tiḡiypáppic tum p̄ixiñ ij̄ip̄j̄om da ictán̄caíypa. ¹⁹ Jém icútpáppic tum p̄ixiñ da tiḡiypa ianamanj̄om porque itumpiy naspa ipuuj̄om y ocmi putpa.

Cuando nimpa ȳimpic, nimtooba Jesús iga itumpiy w̄iccuy w̄i tan̄cút, da tactán̄caíypa.

²⁰ Nimitim Jesús:

—Jém malopic j̄ixi jém tsucumpáppic jém p̄ixiñ ianamanj̄om je numa ictán̄caíypa.

²¹ Porque jém p̄ixiñ ianamanj̄om tsucumpa itumpiy jém malopic j̄ixi. Jemum tsucumpa jém j̄ixi iga ich̄icpa jém yomtam, iga pejóypa, iga accaóypa, ²² iga númpa, iga icusúníyáypa tunḡac p̄ixiñ im̄ich̄i, iga imalwadáypa tunḡac p̄ixiñ, iga icumigóypa it̄iwitam, iga tsam icusúníyapa jáyan malopic cosa, iga cujóyíyóypa, iga icujíypa it̄iwitam, iga da j̄ixíy, iga agui nacujípt̄ap iyaac jém p̄ixiñ. ²³ Itumpiy yípyaj malopic j̄ixi tsucum jém p̄ixiñ ianamanj̄om. Yip malopic j̄ixi ictán̄caíypa jém p̄ixiñ.

*Tum jém juum̄ipic yomo icupic Jesús
(Mt. 15:21-28)*

²⁴ Jesic nic Jesús jém naxyucmi nocoj̄om de jém Tiro y Sidón. Jemigam tiḡiy Jesús tum tic̄j̄om iga odoy i iixiñ. Pero da w̄ia miyam porque ixta. ²⁵ Tum yomo mu imaton̄ iga núc jém Jesús, j̄icsc̄iy miñ, icosteeñáy jém Jesús ipuyc̄im. Miñ iám porque jém iyomman̄ic imatsne tum mal espíritu. ²⁶ Tum griegopic yomo, da je de Israel. Tsucum jém naxyucmi

Sirofenicia. Jesic jém yomo icunucsáy Jesús iga itobáyíñ jém mal espíritu jém iyommanic ianamanjom. ²⁷ Pero Jesús inímáy jém yomo:

—Wí iga wiñí cuspa wiiquiyaj jém tsixtam. Da wí iga tantobáyáypa jém tsixtam icaxtánañi iga tanchiiba chimpa.

²⁸ Jesic jém yomo icutson, inímáy jém Jesús:

—Numa, mánomi, pero jém chimpa icútyajpa jém ipaccanewip jém tsixtam mesacucim.

²⁹ Jesic Jesús inímáy jém yomo:

—Numa miwinim. Siip nicsim iníccim. Jém inyommanic ichacum jém mal espíritu.

³⁰ Jesic cuando setum iticcim jém yomo, ipát iyommanic wone icheesmi. Ichacneum jém mal espíritu.

Jesús icpis tum chajca

³¹ Jesic jém Jesús mojjacum seti, put jém naxyucmi de Tiro, nas jém Sidón, nastim jém naxyucmi iníyi Decápolis, eybic núc jém laguna de Galilea. ³² Jesic namíñayta Jesús tum chajca iga icpixiñ. Datim jaya wíap ijy. Cunucsayta iga iccámiñ ici jém chajca icobacyucmi. ³³ Jesic Jesús ininic jém pixiñ tum áñeymi. Icodáy iwayci jém pixiñ itatsicjom. Ocmi ichujca Jesús iwayci, ichigáy jém pixiñ itots. ³⁴ Jesic ámquím Jesús sinjucmi, jejquet, inímáy jém chajca:

—Efata.

Yíp anmati nimtooba: Áñaayi. ³⁵ Jesic áñáyum jém chajca itatsic. Matónóypam. Wítsiyñeum jém itots. Wíabam ijy parejo. ³⁶ Jesic inquím Jesús jém pixiñtam iga odoy anmadiñ iga icpis jém chajca. Pero aunque tsam pími inquímpa Jesús, mástim anmatyajpa jém pixiñtam iga Jesús icpis jém chajca. ³⁷ Tsam pími ipooñanjamyajpa. Nímyaj:

—Yíp pixiñ tsam iwíwatpa. Icmatónóypa jém chajca, icjyipa jém uma.

8

Jesús icwícpa cuatro mil pixiñtam

(Mt. 15:32-39)

¹ Jesic jeetim tiempo antuumayaj tsam jáyan jém pixiñtam. Da iniijay jém iwíccuy. Jesic Jesús inwejay jém icuyujcwiñ. Inímáy:

² —Tsam anyaaachanjampa jém pixiñtam jém antuumaneyajwip yim. Tanwaganait tucunajama y sip da ti iniijay iga icútpa. ³ Siiga ancutsatpa iticmíyay sin wiiqui, jesic cupónaquetyajpa tunjom porque algunos miññeyaj tsam juumi.

⁴ Jesic jém Jesús icuyujcwiñ icutson, nímyaj:

—Yim jut tait da ti idíyíy. ¿Jutsap tampát wíccuy iga tanacwícpa itumpiy yípyaj pixiñtam?

⁵ Jesic Jesús icwác jém icuyujcwiñ. Nímayta:

—¿Juten caxtánañi iniifta?

Nímyajpa jém icuyujcwiñ:

—Siete.

⁶ Jesic Jesús inímáy jém antuumaneyajwip iga coñyajiñ naxyucmi. Jesic ipic jém siete caxtánañi, inwejpát Dios, moj iwenwenjac jém caxtánañi. Jesic ichi jém icuyujcwiñ iga icwícyajiñ jém pixiñtam. Jempigam iwatyaj. ⁷ Iniityajtim juten xuxut tíipi. Jesic Jesús eybictim inwejpát Dios. Ipimíy jém icuyujcwiñ iga ichiijajiñtim jém tíipi jém pixiñtam.

⁸ Jesic wícyaj hasta cusyaj. Ocmi jém Jesús icuyujcwiñ ipiñyaj jém wíccuy jém cutsíywip. Icuomyaj siete nacoñ. ⁹ Ityaj jem como cuatro mil pixiñtam. Cuando yajum wiiquiyaj, jesic Jesús inquím jeeyaj.

¹⁰ Jeeti rato tigiy Jesús tum barcojom con icuyujc#wiñ. Nicyaj jém naxyucmi Dalmanuta.

Jém fariseoyaj iwácyajpa tum milagro

(Mt. 16:1-4; Lc. 12:54-56)

¹¹ Miñyaj jém maestroyaj de jém fariseopic anquímayooyi. Moj icwácyaj Jesús. Miñ icutítsyaj. Nimyajpa iga: “Anquejaayi tum sinyucmipic seña.” ¹² Jesic agui anyácne Jesús. Pimi jejquet. Nimpa:

—¿Tiiiga yípyaj pixiñtam awágáypa tum seña? Numa mannímáypa iga Dios da ichiiba ni tum seña.

¹³ Jesic Jesús ichac jém pixiñtam, eybic quím tum barcojom. Nic jém laguna anwiñtuc.

Jém fariseopic anquímayooyi jex juuts jém levadura

(Mt. 16:5-12)

¹⁴ Jesic jém Jesús icuyujc#wiñ ijaamanotyaj iga ininicyajpa jém caxtánañi. No más tum caxtánañi iniityaj barcojom. ¹⁵ Jesic Jesús ipimíy jém icuyujc#wiñ:

—Cuidado. Nawattamtaji cuenta iga odoy impiguiñ jém fariseoyaj ilevadura o jém Herodes ilevadura.

¹⁶ Jesic moj nanímayyajtaji entre jeeyaj:

—Tanímáy jempic porque da tanamiñ jém caxtánañi.

¹⁷ Jesic Jesús icutiíyíy ti síp ijisyaj, iñímáy:

—¿Tiiiga miñimtámpa iga da iniita jém caxtánañi? ¿Que da incutiíyiyta? ¿Que da mijixiyta? ¿Que tsam malotim iñanama? ¹⁸ Miixcuyiyta, ¿que da miixixoytámpa? Mitatsigiyta, ¿que da mimatónoyotámpa? ¿Que da iñjístámpa cuando ¹⁹ mu anwéc jém cinco caxtánañi con jém cinco mil pixiñtam? ¿Juna coon impineta jém cutsíywíppic?

Jesic jém icuyujc#wiñ icutsonyaj. Nimyaj:

—Doce.

²⁰ Jesic nintim Jesús:

—Cuando mu anwéc jém siete caxtánañi con jém cuatro mil pixiñtam, ¿jesic juna coon impineta jém cutsíywíppic?

Jesic nimyaj icuyujc#wiñ:

—Siete.

²¹ Jesic Jesús iñímáy jém icuyujc#wiñ:

—¿Que mimichtam danam incutiíyiyñeta?

Jesús icpis tum cáchtí jém attebet Betsaida

²² Ocmi nicyaj Jesús con icuyujc#wiñ jém attebet Betsaida. Mu iñúcyaj jem, algunos inimíñayyaj jém Jesús tum cáchtí. Iacunacsayyaj jém Jesús iga ichiguiñ jém cáchtí. ²³ Jesic Jesús imatsáy jém cáchtí ici, ijicteñ anšicmi de jém tiganjoj. Jesic Jesús iccámáy uxan ichuyñi jém pixiñ iixcuyyucmi. Iccámáy ici jém pixiñ icobacyucmi. Jesic icwác jém cáchtí. Nímayta:

—¿Siip miixixóypam?

²⁴ Jesic jém cáchtí ámquím. Iñímáy jém Jesús:

—Ánixpa jém pixiñtam quénam cuyyaj, pero wityajpa.

²⁵ Jesic Jesús eybictim iccámáypa ici jém pixiñ iixcuyyucmi, ipimíy iga ichídiñ iixcuy. Jesic wítsiyum jém iixcuy, wí ixixóypam. ²⁶ Jesic Jesús iñímáy jém cáchtipic idic:

—Siip nicsim iñticmi. Odoy nasi yíp tiganjoj. Odoy i anmadaayi iga manacpis.

Nimpa jém Peto iga Jesús je jém Cristo

(Mt. 16:13-20; Lc. 9:18-21)

²⁷ Jesic nicyaj Jesús con icuyujc̄iwiñ jém tiganjjojyaj jém ityajw̄ip nocojom jém atebet Cesarea de Filipino. Iganam nicyajpa tunjom, jém Jesús icwácpa jém icuyujc̄iwiñ. Nimpa:

—Anímaayi junimyajpa jém p̄ixiñtam iga aipapaap aich.

²⁸ Jesic icutsonyaj jém icuyujc̄iwiñ. Nimyajpa:

—Algunos nimpa iga mich miXiwan jém acchínjopyaap. Tunjac nimpa iga mich miElías. Tunjac nimpa iga mich tum wiñc̄pic miprofeta.

²⁹ Jesic Jesús icwác jém icuyujc̄iwiñ. Nímayyajt̄ap:

—¿Mimichtam, mijunimtampa iga aipapaap?

Jesic jém Peto icutson. Iñímáy:

—Mich miCristo.

³⁰ Jesic Jesús ip̄imíy jém icuyujc̄iwiñ iga odoy i inmadayyajiñ iga je jém Cristo.

Jesús inmatpa iga accaatap

(Mt. 16:21-28; Lc. 9:22-27)

³¹ Jesic moj inquejáy Jesús jém icuyujc̄iwiñ iga jém Miññew̄ip Sinyucmi tsam p̄imi yaachwattap. Tsam ijóyixyajpa jém wídaytam, jém cobac̄pic panijyaj y jém escribasp̄ic maestroyaj. Ocmi accaatap, pero jém tucunajama Dios icp̄ispa.

³² Iñuntawianmadáy Jesús jém icuyujc̄iwiñ. Pero jém Peto da iwianjam, inwejput Jesús, moj iwogáy. ³³ Jesic jém Jesús íamseedáy jém icuyujc̄iwiñ, iwogáy jém Peto. Nimpa:

—MiPeto, acupóyaayi miWoc̄c̄iwiñ. Mich da iniñ jém Dios ij̄ixi iñj̄ixianjom. Iniit jém p̄ixiñtam ij̄ixi.

³⁴ Jesic Jesús inwejáy jém icuyujc̄iwiñ con itump̄iy jém antuumaneyajw̄ip jem. Moj inquejáy. Nímayyajt̄a:

—Siiga i atún̄iytooba, tsaci iga inwatpa juuts iñxunpa iñyaac, yaach̄iyi cuando miyaachwattap ich añcuyucmi, jesic atún̄iyi. ³⁵ Siiga tum p̄ixiñ tsam itoypa ivida iga itpa ȳip naxyucmi, jesic togoypa jém ivida. Pero siiga accaatap tum p̄ixiñ ich añcuyucmi iga iwatpa juuts nimpa ich anañmati, jesic jém p̄ixiñ da togoypa ivida, itpa para siempre.

³⁶ Da ti cuwacuy tum p̄ixiñ siiga iniit itump̄iy jém wib̄ic cosa jém itw̄ip ȳip naxyucmi y togoypa ianama. ³⁷ ¿Con jutsañ tumiñ w̄iap iyoj tum p̄ixiñ iga ip̄ictsonpa eyb̄ic jém ianama cuando caaneum? ³⁸ Siiga michaap iga iniñmatpa ich anañmati y siiga mich antsaaxpa, jesic ichgacti, jém aMiññew̄ip Sinyucmi, mantsaaxpatim cuando amiñgacpa ȳip naxyucmi con añjatun̄ Dios ip̄imi y con jém sinyucm̄ipic p̄ixiñtam.

9

¹ Jesic n̄imtim Jesús:

—N̄uma mannímáypa iga algunos de mimichtam miñtanw̄ip ȳim, da micaaba hasta que iñixtampa iga núcpa jém tiempo cuando Dios injacpa jém p̄ixiñtam con ip̄imi.

Añc̄ac jém Jesús íamooyi

(Mt. 17:1-13; Lc. 9:28-36)

² Jesic cuando nasum seis día, Jesús inin̄ic jém Peto, Jacobo, y Xiwan tum mij̄pic cotsicyucmi. Icutum nicyaj. Jemum iixyaj iga añcac jém Jesús íamooyi. ³ Agui tsoipa ipuctucu. Tsam p̄imi popo juuts nieve. Icuw̄iti ȳip naxyucmi da i w̄iap iche jém puctucu jutsp̄iy ipopo jém Jesús ipuctucu. ⁴ Jesic jém Jesús icuyujc̄iwiñ iixyaj iga wiñquej wisten jém wiñc̄pic Dios inmatc̄iwiñ jém Elías y jém Moisés. S̄ip inmatyaj con Jesús. ⁵ Jesic jém Peto iñímáy jém Jesús:

—Mammaestro, agui w̄i iga taittampa ȳim. S̄ip manwadaytampa tucuten nacxt̄ic. Tum para mimich, tum para Moisés y tum para Elías.

⁶ Jempic nimpa jém Peto porque da icutiŷiŷyipa ti nimpa porque tsam pimi ciŷneyaj jém Jesús icuyujcŷiwiñ. ⁷ Jesic actiŷ tum ucsi. Inmontogoyyay jém ucsi. Jesic imatoŷyay tum jŷiŷi jém ucsanjom. Nímayyajtá:

—Yíbam ich ammanic, tsam antoypa. Matoŷtaami ti miñímáypa.

⁸ Jesic jeeti rato ámámóypa jutquej jém icuyujcŷiwiñ. Da iixyay ni tum pxiñ. Icutum it jém Jesús con jeeyaj.

⁹ Iganam quetyajpa jém cotsicyucmi, Jesús inquímpa jém icuyujcŷiwiñ iga odoy i inmadáŷiñ ti iixyay jém cotsicyucmi hasta que jém Miññewiŷ Sinyucmi piŷpa de jut it jém caaneyajwŷiŷp. ¹⁰ Jesic da inmatyajpa jém Jesús icuyujcŷiwiñ ti iixyay, pero nacwácyajtap entre jeeyaj ti nimtooba Jesús cuando nimpa iga piŷpa de jut it jém caaneyajwŷiŷp. ¹¹ Jesic acwáctá jém Jesús, nímaytá:

—¿Tüiga ninyajpa jém escribaspic maestroyaj iga wiñti miñpa jém Elías?

¹² Jesic Jesús icutsoŷ, iñímáy:

—Nüma, wiñti miñpa jém Elías iga iwŷtsacpa itumpiy cosa. Nímtim jém Dios inmati, jém jayñewiŷp, iga tsam yaachwattá, tsam jóyixtá jém Miññewiŷ Sinyucmi. ¹³ Siŷp mannímáypa iga núcneum jém Elías y jém pxiñtam tsam imalwadayyay juuts ixunyajpa jeeyaj. Iñasca jém Elías juuts nimpa jém Dios inmati jém jayñewiŷp.

*Acpista tum jaychixi jém imatsnewiŷp jém mal espíritu
(Mt. 17:14-21; Lc. 9:37-43)*

¹⁴ Jesic setyay jut it los de más jém Jesús icuyujcŷiwiñ. Iixyay iga tsam jáyan pxiñtam inuumaçayajpa jeeyaj. Jém escribaspic maestroyaj aŷayajpa con icuyujcŷiwiñ. ¹⁵ Jesic jém pxiñtam, mu iixyay iga miñpa Jesús, tsam ipooñanjamyajpa. Jeeti rato itumpiy de jeeyaj póyanŷucumyay, nic ichoŷyay. ¹⁶ Jesic Jesús icwáçpa jém icuyujcŷiwiñ. Nímayyajtá:

—¿Tí síp ininçacata con jém escribaspic maestroyaj?

¹⁷ Jesic tum pxiñ, jém itwŷiŷp jem, iñímáy jém Jesús:

—Maestro, mannamíñáy jém anjamyanic. Iniit tum mal espíritu. Iumawatne.

¹⁸ Cuando pimi imatspa jém mal espíritu iccutiŷpa naxyucmi. Anxacamoypa iŷiŷp, iñichpa itits. Jeeyucmi tsam flaco jém ammanic. Annímáy jém inçuyujcŷiwiñ iga itobáŷiñ jém mal espíritu, pero jeeyaj da wiá mitobayyay.

¹⁹ Jesic Jesús iñímáy jém pxiñtam:

—A que mimichtam hasta siŷp da inçupictámpa Dios. Jáyum tawagaŷti con mimichtam, pero datim inçupictámpa. Tsam anyaachiyum iga manañquejáypa jém Dios inmati, pero datim inçutiŷiytámpa. Anamíñaayi jém tsixi.

²⁰ Jesic inimíñayyay Jesús jém tsixi. Cuando jém mal espíritu iix jém Jesús, jeeti rato eybictim imats jém jaychixi. Actiŷ naxyucmi, tsam cujoppa, anxacamoypa iŷiŷp. ²¹ Jesic Jesús iñímáy jém tsixi iŷatun:

—¿Juchixam moj imats yŷp caacuy?

Nimpa jém tsixi iŷatun:

—Moj imats dende xutunam. ²² Watciŷ iccutiŷpa juctjom o niicim iga iccaaba. Siiga wiáŷp inicpiŷ, ayaachanjami aichtam, ayoxpaati.

²³ Jesic Jesús iñímáy jém pxiñ:

—Siiga mich wiáŷp inçupic iga Dios miyoxpátpa, jesic ich awiáŷp. Porque Dios wiáŷp iwat itumpiy cosa para jém icupicneyajwŷiŷp.

²⁴ Mu imatoŷ jém pxiñ ti iñímáy Jesús, jesic pimi jŷyapa. Nimpa:

—Ançupicpa iga Dios wiáŷp iwat. Ayoxpaati iga más parejo ançupicpa.

²⁵ Jesic Jesús iix iga tsam anjuumayajpa jem pixiñtam. Miñyajpa poyimi. Jesic Jesús iwogáypa jem mal espíritu. Nímayta:

—Mich mialespíritu, iñchajcawatne yíp tsixi, iñumawatne, siip mannímáypa, puti yíp tsixi ianamanjom. Odoy tigiyi eybic.

²⁶ Jesic pimi anweja jem mal espíritu, eybic iccutiñpa naxyucmi jem tsixi. Jesic jeeti rato put jem mal espíritu. Tsíy jem tsixi juuts caane. Hasta nimaajpa wati jem pixiñtam iga caaneum. ²⁷ Pero Jesús imatsáy ici, ijictsum. Jesic teñum jem tsixi. ²⁸ Ocmi tigiy Jesús tum ticjom. Jem icuyujciwiñ iyamacwácyajpa:

—¿Tiiga aichtam da wiap antopta jem mal espíritu?

²⁹ Jesic Jesús iñímáy jeeyaj:

—Da wiap iñtopta yicxpíc mal espíritu siiga da iniñwejpáttampa Dios y siiga da inwattampa ayuno.

Eybictim iñmatpa Jesús iga accaatap

(Mt. 17:22-23; Lc. 9:43-45)

³⁰ Jesic Jesús con icuyujciwiñ putyaj jem tiganjoj. Moj niquiyaj. Widañnasyajpa jem naxyucmi de Galilea. Da iwianjam Jesús iga ijodónayajiñ jem pixiñtam jut nicpa.

³¹ Porque inmadáy jem icuyujciwiñ ti iñascaaba. Nimpa Jesús:

—Ich, jem aMiññewiip Siñyucmi, aciiñcotta jem malopic pixiñtam icijom. Accaayajpa jem pixiñtam, pero ocmi jem tucunajama acpiatap.

³² Pero jem icuyujciwiñ da icutiyyiyajpa ti nimpa Jesús. Tsam cñyajpa iga icwácyajpa.

I jem más mijpic anjagooyi

(Mt. 18:1-5; Lc. 9:46-48)

³³ Ocmi núcyajum jem atebet Capernaum. Cuando tigiyaj jem ticjom, Jesús icwác jem icuyujciwiñ. Nímayyajta:

—¿Ti síp iniñacata tunjom?

³⁴ Jesic dam jyyaj porque tsam áñaneyaj tunjom iga i tsíypa juuts jem más mijpic anjagooyi. ³⁵ Jesic coñ jem Jesús, inwejay jem doce icuyujciwiñ, moj iñímáy:

—Siiga i tsíytooba juuts jem más mijpic anjagooyi, jesic tsíypa juuts jem inñepic pixiñ, icuyoxap jem itiwitam juuts tum mozo.

³⁶ Ocmi Jesús inwejay tum xutu tsixi jem icuyujciwiñ iwiñjom. Iñuuspac Jesús jem xutu tsixi. Iñímáy jem icuyujciwiñ:

³⁷ —Siiga tum pixiñ iwipictsonpa tum xutu tsixi ich anniyimi, jesic jem pixiñ awipictsonpatim aich. Y siiga awipictsonpa aich, jesic wipictsonpatim jem anjatun Dios jem acutsatnewiip yíp naxyucmi.

Jem dapic it en contra de taichtam, je tayoxpátpa

(Mt. 10:42; Lc. 9:49-50)

³⁸ Jesic Xiwan iñímáy jem Jesús:

—Mammaestro, ánixñeta tum pixiñ iga itoppa jem mal espíritu mich iñiyimi. Jesic aichtam ananjyacta porque jem pixiñ da siiba con taichtam.

³⁹ Jesic Jesús iñímáy jem icuyujciwiñ:

—Odoy anjyactaami porque siiga tum pixiñ iwatpa tum mijpic milagro ich anniyimi, jesic da jobit wiap amalímáy. ⁴⁰ Jem dapic it en contra de taichtam, tayoxpátpa. ⁴¹ Siiga i michiiba tum taza ni ich anniyimi porque mich jem Cristo mimichi, numa mannímáypa iga wiyojtap jem pixiñ.

Jem táñca wiap tactsac jem Dios inmatí

(Mt. 18:6-9; Lc. 17:1-2)

⁴² Siiga i icwatpa táŋca tum p̄ixiñ jém yaguiñpic acupicpa aich, jesic chiitap mijpic castigo jém p̄ixiñ. Más w̄i iga cutsénaytaiñ tum mijpic molino icha iisciyucmi y acpatsiytaiñ lamar. ⁴³ Jesic siiga in̄ci micwatpa táŋca y mictsacpa jém Dios in̄mati, jesic jaci jém in̄ci. Más w̄i iga mitigiypa jut it Dios con tum in̄ci que iga con icuistic in̄ci mininictap jém juctjom jut da nunca píchpa, jut ipictsonyajpa jém castigo. ⁴⁴ Jut da nunca caayajpa jém tsuuquiñ, jut da nunca píchpa jém jucti. ⁴⁵ Siiga impuy micwatpa táŋca hasta mictsacpa jém Dios in̄mati, jesic jaci jém impuy. Más w̄i iga mitigiypa jut it Dios con tum impuy que iga con icuistic impuy mininictap jém juctjom jut da nunca píchpa, jut ipictsonyajpa jém castigo, ⁴⁶ jut da caayajpa jém tsuuquiñ, jut da nunca píchpa jém jucti. ⁴⁷ Siiga tum in̄xcuy micwatpa táŋca hasta mictsacpa jém Dios in̄mati, jesic topi jém in̄xcuy, patsaayi. Más w̄i iga mitigiypa con tum in̄xcuy jut injacpa Dios que iga con icuistic in̄xcuy micnictap jém juctjom jut ipictsonyajpa jém castigo. ⁴⁸ Jut da nunca caayajpa jém tsuuquiñ, jut da nunca píchpa jém jucti.

⁴⁹ 'Porque itumpiy canaiytap con jucti. Itumpiy jém sacrificio codaytap jém cana.

⁵⁰ 'W̄i jém cana, tsam tayoxpátpa. Pero siiga jém cana misap, togoypa ipaac, jesic dam para ti w̄i. Jém w̄ibic j̄ixi jex juuts jém cana. Naittaami jém w̄ibic j̄ixi in̄anamanjom. Odoy an̄ataami con jém in̄tiwitam, nawinanigaytamtaji.

10

Da w̄i iga ichacpa iyomo tum p̄ixiñ (Mt. 19:1-12; Lc. 16:18)

¹ Jesic put Jesús jém atebet Capernaum. Nic jém naxyucmi Judea. Jac hasta jém ni an̄wiñtuc jém río de Jordán. Eybictim an̄tuumayajpa tsam jáyan jém p̄ixiñtam. Miñ iámyaj jém Jesús. Jesic eybic in̄quejay jém p̄ixiñtam jém Dios in̄mati juuts iwatpa siempre. ² Jesic miñyaj algunos jém fariseoyaj, icunúcyajpa Jesús. Icutitsyajtooba. Jeeyucmi icwácpa, nímaytap:

—¿Que w̄i iga tum p̄ixiñ ichacpa iyomo?

³ Icutson Jesús. N̄impa:

—¿Junimpa jém an̄químayooyi jém michiiñew̄ip jém Moisés?

⁴ N̄imyajpa jém p̄ixiñtam:

—Jém Moisés in̄químayooyi ijícpa iga tum p̄ixiñ w̄iap ictsucum tum acta iga ichacpa iyomo.

⁵ Jesic Jesús in̄imáy jém fariseoyaj:

—Yípyaj Israelpic p̄ixiñtam tsam maloyaj ianama jeeyucmi ijaychac yíp an̄químayooyi jém Moisés. ⁶ Però wiñigam cuando Dios iwat itumpiy cosa, iwat tum p̄ixiñ y tum iyomo.

⁷ Jeeyucmi jém p̄ixiñ ichacpa ijatun̄ y iapa iga nicpa iwaganait iyomo. ⁸ Icuistic tsíypa tumti mijtay. Jeeyucmi da tsíypa iga wisten. Tumti imijtay. ⁹ Jesic siiga Dios iwat iga tum p̄ixiñ wagaityajpa con iyomo, w̄i iga seguido wagaityajiñ. Da w̄i iga tum p̄ixiñ ichacpa iyomo.

¹⁰ Jesic cuando tigiyaj jém ticjom jém Jesús icuyujc̄iwiñ, eybictim icwácayajpa ti nimtooba jém an̄químayooyi. ¹¹ Jesic Jesús in̄imáy:

—Siiga tum p̄ixiñ ichacpa jém iyomo y ipicpa tungac yomo, jesic pejóypa jém p̄ixiñ. Ipejpa jém iyomo jém wiñtipic. ¹² Siiga tum yomo ichacpa jém iwídaya y ipicpa tungac p̄ixiñ, jesic pejóypatim jém yomo.

Jesús ichiiba bendición jém tsixtam (Mt. 19:13-15; Lc. 18:15-17)

13 Jesic namíñayta Jesús xuxut tsixtam iga ichiñ bendición. Pero jém icuyujc#wiñ iwogayyaj jém inimiññeyajw#p jém tsixtam. 14 Jesic p#mi jóy jém Jesús cuando iix ti iwat jém icuyujc#wiñ. Iñímáy:

—Jígaytaami iga míñiñ aámyaj y#p tsixtam. Odoy anj#yjac#i porque jém tigiyyajpaap ju# injacpa Dios jex juuts jém tsixtam. 15 Numa mannímáypa siiga da iñ#j#cpa iga minjacpa Dios juuts tum xutu tsixi, jesic da w#ap iñ#igiy ju# injacpa Dios.

16 Jesic Jesús iñuuspacpa jém tsixtam. Iccámáy ici icobacyucmi, ichi bendición.

*Tum p#xiñ tsam rico in#matpa Jesús
(Mt. 19:16-30; Lc. 18:18-30)*

17 Jesic tum jama moygacum niqui Jesús. Jeeti rato miñ poyimi tum p#xiñ, icosteeñáy jém Jesús iwiñjom. Acwágóypa jém p#xiñ. Nímayta Jesús:

—Agui w#b#ic miMaestro, ¿ti w#ap anwat iga ampictsonpa jém vida jém dapic cuyajpa?

18 Jesic Jesús iñímáy jém p#xiñ:

—¿Tiiga miñ#mpa iga ich aw#i? It tum jém w#b#ic, je jém tanjatun Dios. 19 Mich iñjodon jém Dios inquímayooyi. N#mpa: “Odoy accaooyi, odoy pejooyi, odoy nuumi, odoy cumigooyi iñ#witam, odoy migóyaayi tum jém iñ#wi iga iñ#úmáypa titam iniit, naidaayi respeto jém iñjatun y jém iñapa.”

20 Jesic jém p#xiñ iñímáy jém Jesús:

—Maestro, ich jempigam anwatne itump#y dende ats#xiñam.

21 Jesic Jesús iámmats jém p#xiñ, tsam p#mi itoypa. Iñímáy:

—No más tum cosa mitogóyáy. Cumáyaayi itump#y jém iniitw#p, ch#i jém tumiñ jém yaachayajpáppic, jesic iniit jáyan jém w#b#ic riqueza s#nyucmi. J#ici iga miyaachwattap, atún#yi.

22 Mu imaton ti iñímáy jém Jesús, nic jém p#xiñ. P#mi anyác porque tsam p#mi rico.

23 Jesic Jesús iámanpoy jém ityajw#p, iñímáy jém icuyujc#wiñ:

—Tsam tánca iga tum ricop#ic p#xiñ núcpa ju# injacpa Dios.

24 Jém icuyujc#wiñ agui ipooñanj#myajpa ti n#mpa jém Jesús. Jesic eybictim n#mpa jém Jesús:

—Mammanictam, tsam p#mi tánca iga núcyajpa ju# injacpa Dios jém tsamp#ic itoypa itumiñ. 25 Más da tánca iga naspá tum camello tum núncuypac ijosjom que iga tigiypa tum rico ju# injacpa Dios.

26 Jesic p#mi ichiganj#cyaj jém Jesús icuyujc#wiñ. Moj nacwácyajtaji entre jeeyaj. N#myaj:

—¿Jesic i w#ap ic#put?

27 Jesic Jesús iámmats jém icuyujc#wiñ, iñímáy:

—Numa, jém p#xiñtam da w#ap iwat, pero Dios w#ap porque je w#ap iwat itump#y cosa.

28 Jesic jém Peto moj in#mat Jesús. Nímayta:

—Mán#mi, aichtam antsacnetámum itump#y jém anaitw#p id#ic iga nicpa mantún#y.

29 Jesic Jesús iñímáy jém icuyujc#wiñ:

—Numa mannímáypa, siiga i ichacpa it#ic, it#witam, iapa, ijatun, iyomo, ichixtam, o iñas ich ancyucmi iga in#matpa jém w#b#ic an#m#ti, jesic Dios iw#yojpa. 30 Jesic y#ptim naxyucmi Dios icseedáypa más jáyan cosa que jém ichacneyajw#p jém it#ic, it#witam, iapa, ichixtam, o iñas. Pero tsam yaachwattaptim y#p naxyucmi. Jesic ocmi cuando núcpa ju# it Dios, iniitum jém vida jém dapic cuyajpa. 31 W#ati jém anjagoypáppic ts#y#pa tuuñianc#m, jém tuuñianc#mpic, anjagóypa iñic.

Tucciy inmatpa Jesús iga accaatap
(Mt. 20:17-19; Lc. 18:31-34)

³² Nicyajpa Jerusalén Jesús con icuyujc̄wiñ. Jém Jesús anjagoyñe iñic, jém icuyujc̄wiñ miñyajpa ituuñianc̄im. Tsam c̄inneyaj. Tsam ipooñanjamyajpa iga nicpa Jesús Jerusalén. Jesic eybic inwejput jém doce icuyujc̄wiñ, moj inmadáy titam iñascaaba Jerusalén.

³³ Nimpa Jesús:

—Maton̄taami. Siip tanictámpa Jerusalén. Ich jém aMiññew̄ip Siñyucmi ac̄ijun̄cottap jém cobacpic pan̄ij ic̄ijom y jém escribaspic maestroyaj ic̄ijom. Jeeyaj achiiba mijpic castigo. Ocmi ij̄isyajpa jutsap accaayaj. Ac̄ijun̄cottap jém tungac pixiñtam ic̄ijom jém dapic je de Israel. ³⁴ Jeeyaj axiccayajpa, atsujcayajpa, p̄imi acótsyajpa. Accaayajpa. Pero jém tucunajama ap̄ispa de jut it jém caaneyajw̄ip.

Jém Jacobo y Xiwan iwácyajpa tum favor
(Mt. 20:20-28)

³⁵ Jesic ocmi jém Jacobo y jém Xiwan, jém Zebedeo iman̄ictam, icunúcyaj Jesús. Iñimayyajpa:

—Mic̄cuyujoypaap, awadaytaami tum favor.

³⁶ Jesic Jesús iñimáy jém wisten:

—¿T̄i iñxunpa iga man̄wadaytámpa?

³⁷ Jeeyaj n̄imyaj:

—Cuando núcpa jém tiempo iga ininjacpa ȳip naxyucmi con Dios ip̄imi, achiitaami derecho iga nicpa acoñi tum ininjw̄imi y tum ininj̄aymi.

³⁸ Pero Jesús iñimáy jém wisten:

—Michtam da iñjodon̄tam ti an̄wágaytámpa. ¿Que mich iñyaachíypa iga miyaachwattap juuts aich ayaachwattap? ¿Que wiap̄ iñuc jém copa jém ichpic ánuca? ¿Que wiaptim micch̄intamt̄a juuts ich acch̄intap?

³⁹ Jesic jém wisten iñimáy jém Jesús:

—Awiātámpa.

Jesic Jesús iñimáy:

—N̄uma, mimichtam miyaachwattamt̄aptim juuts aich. Íñuctámpa jém copa jém ichpic ánuca. Micch̄intamt̄aptim juuts aich acch̄intap. ⁴⁰ Pero ich da wiap̄ manchi derecho iga nicpa micoñi tum anan̄w̄imi y tum anan̄̄aymi. Jém an̄jatun̄ Dios ichiiba derecho jém icup̄in̄neyajw̄ip.

⁴¹ Jesic cuando imaton̄yaj los de más jém Jesús icuyujc̄wiñ, jém diezpic, tsam ij̄oyixyajpa jém Jacobo y Xiwan. ⁴² Jesic Jesús inwejaȳ itump̄iy jém icuyujc̄wiñ. Iñimáy:

—Michtam in̄w̄ijodon̄ iga jém juum̄ipic pixiñtam in̄jagooyiyaj tsam ip̄imíypa jém ip̄ixiñtam. Jém más mijpic an̄jagooyi más p̄imi ip̄imíypa jém ip̄ixiñtam. ⁴³ Pero mimichtam da in̄wattámpa jem̄pic. Siiga mijpic min̄jagooyi, in̄cuyoxap̄ jém iñt̄iw̄itam.

⁴⁴ Jém más mijpic in̄injagooyi mic̄cuyoxap̄ juuts tum esclavo. ⁴⁵ Wattaam̄itim juuts aich. Amiñ siñyucmi iga an̄cuyoxap̄ jém ityajw̄ip ȳip naxyucmi. Ich da amiñ iga acuyoxayajiñ jeeyaj. Ich amiñ iga anchiiba amvida iga anyojáypa jáyan̄ jém pixiñtam it̄añca.

Jesús ictojoy jém Bartimeo iixcuy
(Mt. 20:29-34; Lc. 18:35-43)

⁴⁶ Ocmi núcyaj jém attebet Jericó. Jesic cuando putyajpa jém Jericó jém Jesús con icuyujc̄wiñ iwagananic̄yajpa jáyan̄ jém pixiñtam. Jemum coñ tun̄añnaca tum cácht̄i iñ̄yi Bartimeo jém Timeo iman̄ic. Iwácpa tumiñ. ⁴⁷ Jesic cuando jém cácht̄i imaton̄ iga naspa Jesús jém Nazaretpic, jesic p̄imi j̄iypa jém cácht̄i. Nimpa:

—Jesús, jém rey David miman̄ic, ayaachanj̄ami.

⁴⁸ Jém itúnjyayjpaap Jesús iwogayyajpa jém cáchtí iga odoy jíyíñ. Pero más pimi jiyapa jém cáchtí. Nimpa:

—Jém rey David mimanic, ayaachanjami.

⁴⁹ Jesic teeñanjac Jesús. Iñímáy jém ityajwip:

—Añwejaayi jém pxiñ.

Jesic jeeyaj inwejayyaj jém cáchtí. Nímayta:

—Maymáayi. Tsucumi, porque síp miñwejay jém tamMaestro.

⁵⁰ Jesic jém cáchtí ipatsquet naxyucmi jém icapa de lana, jicsciy tsucum, nic íám jém Jesús. ⁵¹ Jesic Jesús iñímáy jém cáchtí:

—¿Tí iñxunpa iga manwadáypa?

Jesic jém cáchtí icutson. Nimpa:

—MamMaestro, ansunpa iga actojaayi ánixcuy.

⁵² Jesic Jesús iñímáy jém cáchtí:

—Siip nicsim. Tsam incupicne iga Dios wíap miyoxpát, jeeyucmi mipisneum.

Jesic jeeti rato toj iixcuy jém cáchtí, mojum itúnjy jém Jesús jut nicpa.

11

*Tigiy Jesús Jerusalén juuts tum anjagooyi
(Mt. 21:1-11; Lc. 19:28-40; Jn. 12:12-19)*

¹ Jesic núcyajpa nocojom jém Jerusalén tomi jut it jém wisten tiganjoj jém Betfagé y jém Betania, cotsic aññaca, jém cotsic iñiyi Olivos. Jesic Jesús icutsat wisten jém icuyujcwiñ tum tiganjoj nocojom. ² Iñímáy jeeyaj:

—Nictaami jém tiganjoj jeexpic it. Cuando miñúctampa jem, impáttampa tum mañburro tsenne. Da i queman iquímca jém burro. Wijí, anamíñaayi. ³ Siiga i miñímáypa iga tiiga inwijpa jém burro, jesic nímaayi: “Jém tánomi ixunpa. Da jáypa micseedáy.”

⁴ Jesic nicyaj jém wisten. Ipátyaj tum mañburro tsenne calle tum puerta aññaca. Iwijyaj.

⁵ Jesic jém ityajwip jem iñímáy jém Jesús icuyujcwiñ:

—¿Tí inwatpa? ¿Tíiga inwijpa jém burro?

⁶ Jesic jém icuyujcwiñ icutsonyaj jém ityajwip juuts iñímáy jém Jesús. Jesic ichi lado iga ininigiñ jém burro. ⁷ Jesic ininigayyaj Jesús jém burro, icutógayyaj jém burro con iyooti. Jesús iquímca. ⁸ Wati jém pxiñtam itócyaj iyooti tunjom jut witpa jém burro. Tunjac itúcyaj jém cuy incis y jém ay iga itócyajpatim tunjom.

⁹ Algunos jém pxiñtam anjagoyñeyaj iñic y algunos nicyajpa tuuñiancim. Pimi añweyajpa. Ninyajpa:

—¡Hosanna! Agui wí jém tanjatun Dios. Tanjuciptápatim yíp tanaanjagooyi jém tacutsadayñewip Dios. ¹⁰ Agui wí yíp tanaanjagooyi. Miñpa injac tannación juuts jém wiñicpic rey jém David. ¡Hosanna! Agui wí jém tanjatun Dios jém itwip sinyucmi.

¹¹ Jesic núc Jerusalén jém Jesús. Tigiy jém mijpic masticjom, íám itumpiy cosa jém ityajwip jem. Ocmi nic tsiiyiyaj Betania jém Jesús con jém doce icuyujcwiñ porque tsuuyim.

*Jesús imalnímáy jém tsuj iga da tímāne
(Mt. 21:18-19)*

¹² Jesic icuquejama cuando put Jesús jém Betania, tsam yuap. ¹³ Jesic juumi iix Jesús tum tsuj tsam áyiy. Jesic nic icuámáy jém tsuj itim. Pero da ipadáy jém itim no más it jém iay porque da it tiempo iga tímāp. ¹⁴ Jesic Jesús iñímáy jém tsuj:

—Ich mannímáypa iga da nunca i micudáypa jém iñtim.

Jém icuyujc#wiñ imatonjaj ti nimpaj Jesús.

Jesús iquebacputpa jém máymáyoyyáppic jém mijpic masticjom
(Mt. 21:12-17; Lc. 19:45-48; Jn. 2:13-22)

¹⁵ Jesic ocmi nicjaj Jerusalén. Eybic tigiy Jesús jém mijpic masticjom. Moj iquepquebacput jém máymáyoyyajpaap y jém juyjúyoyyajpaap jém mijpic masticjom. Jesús ichiputseedáy jém imesajaj jém icucacyajpaap tumiñ. Imutsmutsseedáy jém icõñcuyaj jém imáyyajpaap cuucu. ¹⁶ Datim ijícpa Jesús iga i ininícpa algun carga jém mijpic masticjom.

¹⁷ Jesic Jesús moj inquejáy jém pixiñtam. Nímayyajta:

—Jaychacnetawum jém Dios inmati: “Ich antic jut iwatyajpa oración. Je para itumpiy jém pixiñtam.” Pero michtam impicneta yíp antic juuts tum mercado, tsam it jém númyajpaap.

¹⁸ Jém cobapic panijaj con jém escribaspic maestroyaj imatonjaj ti nimpaj jém Jesús. Moj ijisyaj jutsap iccaayaj. Jém anjagooyiyaj icinjayajpa jém Jesús porque itumpiy jém pixiñtam tsam ipooñanjamyajpa cuando imatonjaj jém wibic inquímayooyi. ¹⁹ Jesic tsuñam putyaj Jerusalén jém Jesús con icuyujc#wiñ.

Titsneum jém tsuj
(Mt. 21:20-22)

²⁰ Jesic icuquejama cuando nicgacpa Jesús Jerusalén, nasyajpa jut it jém tsuj. Iixyaj iga titsneum jém tsuj hasta itichicyucmi. ²¹ Jém Peto ijis iga imalnímáy Jesús jém tsuj, jesic iñímáy:

—MamMaestro, aami jém tsuj jém immalnímáyñew#p. Siip titsneum.

²² Jesic Jesús iñímáy jém icuyujc#wiñ:

—Cupictaami iga tsam wíap jém tanjatun Dios. ²³ Numa mannímáypa, siiga i iñímáypa yíp cotsic iga: “Caayi de yim, nigí miniccámataji lamar”, jesic tienes que miwadáypa Dios juuts inwágáypa siiga da iniñi duda y incupicpa iñanamanjom iga Dios wíap miyoxpát.

²⁴ Jeeyucmi mannímáypa iga cuando inwattámpa oración iga inwágáypa Dios algun ti, si iga incupicpa iga impictsonpa, jesic Dios michiiba. ²⁵ Cuando ininwejpátámpa Dios, wiñti wadaytaami perdón siiga i mimalwadáy. Jesic jém tanjatun Dios, jém itw#p sinyucmi, miwadaytámpatim perdón mimichtam itumpiy jém iñtáñca. ²⁶ Siiga da inwadáypa perdón jém mimalwadayñew#p, jesic jém tanjatun Dios jém itw#p sinyucmi datim miwadáypa perdón mimichtam iñtáñca.

Acwáctaj Jesús jut ipic jém autoridad
(Mt. 21:23-27; Lc. 20:1-8)

²⁷ Jesic eybictim nic Jesús Jerusalén con icuyujc#wiñ. Cuando siiba Jesús jém mijpic masticjom, miñyaj jém cobapic panijaj con jém escribaspic maestroyaj y jém wídaytam. Iacunúcyaj jém Jesús. ²⁸ Jesic jeeyaj icwácyaj jém Jesús. Nímayta:

—¿I micutsat iga inwatpa juuts mich síp inwat? ¿I michi jém impimi?

²⁹ Jesic Jesús iñímáy jeeyaj:

—Siip manacwácpatim tum cosa. Siiga wíap ancutsonpa, jesic ichgam mannímáypa i achi jém pimi iga anwatpa juuts síp anwat. ³⁰ Anímaytaami, ¿i ichi ipimi jém Xiwan iga acchínóyapa? ¿Que Dios ichi jém ipimi o pixiñ ichi?

³¹ Jesic jém anjagooyiyaj moj nacwácyajtaji entre jeeyaj. Nanímayyajta:

—Siiga tannímáypa iga Dios icutsat jém Xiwan, jesic tannímáypa iga: “¿Tiiga da incupictámpa?” ³² Pero siiga tannímáypa iga da je Dios icutsat jém Xiwan, jesic da ti wíap tanwat.

Jém anjagooyiyaj icin̄yajpa jém p̄ixiñtam porque itump̄iy de jeeyaj ijodon̄yaj iga jém Xiwan tum nunta profeta. ³³ Jesic jém anjagooyiyaj icutson̄yaj. In̄imayyaj Jesús:

—Da anjodon̄tam.

Jesic Jesús in̄imáytim jém anjagooyiyaj:

—Ich datim mannímáypa i achi jém p̄imi iga an̄watpa juuts s̄ip an̄wat.

12

Jém cuento de jém malopic mozo

(Mt. 21:33-46; Lc. 20:9-19)

¹ Jesic Jesús moj in̄quejáy jém p̄ixiñtam cuentujmi. Nímayyajtá:

—It idic tum p̄ixiñ in̄ip tum finca de uvas. Icutánne. Iwat tum tsaajos jut itobáypa jém uvas in̄i iga iwatpa jém vino. Iwattim tum torre jut iwatpa cuenta jém finca.

’Jesic ocmi icnucs jém ifinca tun̄gac p̄ixiñtam iga itúcyajpa jém uvas y iwatpa jém vino. Jesic jém nas iomi nic joyi tun̄gac naxyucmi tsam juumi. ² Jesic cuando núc jém tiempo iga tiim̄ap jém uvas, jém finca iomi icutsat tum imozo iga niguiñ iám jém icnucsneyajw̄ip jém ifinca iga iwégáyiñ jém cosecha. ³ Pero cuando núc jém imozo, matstá, tsam cótstá. Acsetta eybic jut miñ. Da ti ichiiyaj. ⁴ Jesic jém finca iomi icutsat tun̄gac jém imozo. Pero in̄nacsjedayyaj jém icobac. Tsam p̄imi imalmalnímayyaj. Acsetta eybic jut miñ. ⁵ Jesic icutsat tun̄gac jém imozo, pero accaaytá jém imozo. Asíam in̄ascayaj w̄ati jém imozoyaj. Algunos p̄imi cótstá y algunos accaata.

⁶ ’Ocmi núc tum jama iga tsíy no más jém p̄ixiñ imanic jém tsampic itoypa. Jesic ocmi icutsattim jém imanic. Ijspa: “Tienes que iniidayyajpa respeto ammanic.” ⁷ Pero cuando núc jém p̄ixiñ imanic, jesic jém p̄ixiñtam moj nanímayyajtaji: “Yíbam jém imanic jém ipictson̄páppic itump̄iy jém ijatun̄pic im̄ichi. S̄ip tanaccaaba, jesic taichtam tamm̄ichatámpa jém herencia.” ⁸ Jesic matsaytá jém p̄ixiñ imanic, accaata, patsaytá an̄s̄icmi de jém finca.

⁹ Jesic Jesús in̄imáy jém p̄ixiñtam:

—S̄ip anímaayi: ¿Tí iwatpa jém finca iomi? Miñpa iccucaáy jém iwatyajpáppic cuenta jém uvas. Jesic ocmi ichiiba jém finca tun̄gac p̄ixiñtam.

¹⁰ ’¿Que da immayñe jém Dios in̄matí jut jayñeta? Nimpa:

Jém ticwatpaap ipatsaytip jém tsa.

Pero ocmi jeetim tsa piñtá.

S̄ip jeetim tsa icóppacne jém tic.

¹¹ Yíbam jém tan̄jatun̄ Dios iw̄ati.

Cuando tánixtámpa, agui tampooñan̄jamtámpa.

¹² Jesic jém anjagooyiyaj tsam imatsyajtooba jém Jesús porque icutīiyiyay iga jeam icuyucmi in̄mat Jesús jém xutu cuento. Pero tsam icin̄yajpa jém p̄ixiñtam. Jesic ichacyajpa iga imoogíypa jém Jesús. Nicyajum.

Acwáctá Jesús siiga w̄i tanyoj jém impuesto

(Mt. 22:15-22; Lc. 20:20-26)

¹³ Jesic ocmi cutsadaytá Jesús algunos jém fariseoyaj y jém anjagooyi Herodes ip̄ixiñtam. Nic icutitstá Jesús iga iccutin̄pa con jém in̄matí iga w̄iñ in̄iqueyajwadayyaj.

¹⁴ Jesic núcyaj in̄imayyaj jém Jesús:

—Maestro, anjodon̄ata iga siempre in̄in̄matpa jém numapic an̄matí y da in̄wadáypa caso ti n̄imayjpa jém p̄ixiñtam. Mich da i in̄c̄in̄pa. Siempre in̄in̄matpa parejo jém Dios in̄matí. Jesic anímaayi, ¿w̄i iga tanyojpa jém impuesto jém César o da w̄i? ¿Tanyojtámpa o da tanyojtámpa?

¹⁵ Pero Jesús icutiꞥyíy iga jeeyaj da icuyujcatooba jém Dios inꞥmati, no más miñ icutiꞥts. Jesic iñimáy:

—¿Tíiga anꞥcutítstampa mimichtam? Anamíñaayi tum tumiñ iga ánampa.

¹⁶ Jesic inimíñayyaj Jesús tum tumiñ. Jesic Jesús iñimáy:

—¿I iwiñpac, i iñiyi accámayñeta yíp tumiñyucmi?

Jesic nĩmyajpa jém pĩxiñtam:

—Jém César jém Romapic anꞥjagooyi.

¹⁷ Jesic Jesús iñimáy jém pĩxiñtam:

—Jém Césarpic imĩchi, chiitaami jém César. Jém Diospic imĩchi, chiitaami Dios.

Tsam pĩmi ipooñanꞥjamyajpa jém pĩxiñtam cuando imatonꞥyaj ti nĩmpa jém Jesús.

*Jutsap icpĩsyajta jém caaneyajwĩp
(Mt. 22:23-33; Lc. 20:27-40)*

¹⁸ Miñyajtim algunos jém saduceoyaj iga iámyajpa jém Jesús. Jeeyaj da icupĩcyajpa iga pĩsyajpa jém caaneyajwĩp. Jesic icwácyajpa Jesús. Nĩmyajpa:

¹⁹ —Maestro, wiñigam jém Moisés tajaychagáy yíp anꞥquímayooyi. Nĩmpa siiga caaba tum pĩxiñ y ichacpa iyomo, pero da ichac ni tum imaníc, jesic jém pĩxiñ itĩwi tienes que ipigáyñ jém iyomo iga inimanícwatpa. Jesic tsíypa jém tsixi juuts jém caanewĩp imaníc.

²⁰ It idic tum pĩxiñ, iniit siete ijaymaníc. Yoomíy jém más achpic. Ocmi ca, da ichac ni tum imaníc. ²¹ Jesic jém ipĩtsi ipic jém icapay, jém cunoya. Ocmi jém pĩxiñ caatim mex je. Datim inimanícwat jém yomo. Jesic ocmi jemꞥictim iwat jém tungac ijáyuc. ²² Jempam iwatyaj icusiete, ipĩcyaj jém icapay, ni tum da inimanícwat jém yomo. Ocmim caatim mex jém yomo. ²³ Jesic cuando acpĩsyajtap jém caaneyajwĩp, ¿juppic de jeeyaj tsíypa juuts jém yomo iwĩdaya porque icusiete anꞥcoomĩyyaj con jém yomo?

²⁴ Jesic Jesús icutson, nĩmpa:

—Mimichtam tsam mijĩxitogoyñeta. Da inꞥcutiꞥyiytámpa jém Dios inꞥmati jém jaychacnetawĩp. Datim inꞥcutiꞥyiytámpa ti wiap iwat Dios con ipĩmi. ²⁵ Cuando acpĩsyajtap jém caaneyajwĩp, dam anꞥcoomĩyyajpa. Dam napĩcyajtap jém pĩxiñtam con jém yomtám. Jeeyaj tsíyyajpa juuts jém siñyucmĩpic pĩxiñtam. ²⁶ Siip mananꞥquejáypa iga nũma acpĩsyajtap jém caaneyajwĩp. Michtam immayñeta jém libro jém ijayñewĩp jém Moisés juꞥ inꞥmatpa jém cuento de jém xutu cuy jém jípsápꞥpic idic. Da iñjĩspa ti nĩmpa Dios cuando ijíyáy jém Moisés juꞥ agui yótpa jém xutu cuy. Nĩmpa así Dios: “Ich jém Abraham aDios, y jém Isaac aDios, y jém Jacob aDios.” ²⁷ Jesic quejpa iga jém tanꞥatunꞥ Dios da je jém caanewĩp iDios, je jém vivopic iDios. Mimichtam tsam mijĩxitogoyñeta.

*Jém más mijpic anꞥquímayooyi
(Mt. 22:34-40)*

²⁸ Jesic núctim jem tum jém escribapic maestro. Imatonꞥ iga anꞥayajpa jém saduceoyaj con Jesús. Jém maestro iix iga Jesús tsam iwĩcutson jém ienemigoyaj, jesic icwác. Nĩmaytap:

—¿Juppic jém más mijpic anꞥquímayooyi?

²⁹ Jesic Jesús iñimáy:

—Nĩmpa así jém más mijpic anꞥquímayooyi: “Matonꞥtaami miIsraelpic mipĩxiñtam. Jém tanꞥatunꞥ Dios tum. Da i tungac. ³⁰ Toyi jém tanꞥatunꞥ Dios con itumpiy iñanama, con itumpiy iñjixi y con itumpiy impĩmi.” Yíbam jém más mijpic anꞥquímayooyi. ³¹ It tungac anꞥquímayooyi jexpictim. Nĩmpa así: “Toyi jém iñtĩwi juuts minitoypa iñyaac.” Da i tungac anꞥquímayooyi más mij que yíp wisten.

³² Jesic jém escribapic maestro iñimáy Jesús:

—Numa, miMaestro, agui inwianmat. Numa juuts miñim iga tum Dios it, da i tunjac.
³³ Wi iga tantóyñ Dios con itumpiy tánanama, con itumpiy tanjixi y con itumpiy tampimi. Wi iga tantóyñ tantiwi juuts tanatoytap tanyaac. Siiga tanwatpa yimpic, más iwianjam Dios que itumpiy jém ofrenda y jém sacrificio jém noonetawip altaryucmi.

³⁴ Jesic Jesús iix iga agui jixiíy jém maestro. Tsam iwicutson. Jeeyucmi nimpa así jém Jesús:

—Da juchan mitogóyáy iga miñúcpa jut injacpa Dios.

Jesic cinyajpa jém pixiñtam iga eybic icwácyajpa jém Jesús.

Jém Cristo jém Dios iManic

(Mt. 22:41-46; Lc. 20:41-44)

³⁵ Jesic ocmi iganam accuyujóypa Jesús jém masticjom, nimpa así:

—¿Tiiga ninyajpa jém escribaspic maestroyaj iga jém Cristo je jém David imaníc?

³⁶ Jeetim David ijaychacne así porque jém Dios iAnama ichi jém jixi. Nimpa:

Jém tanjatun Dios iñímáy jém tánomi Cristo iga:

“Coñi yim anawimi hasta que incoñwíypa jém mijóyixyajpaap.”

³⁷ ¿Pero jutsap ichiy jém Cristo juuts jém David imaníc siiga nintim jém David iga jém Cristo je jém iQmi?

Jemum antuumaneyaj tsam jáyan jém pixiñtam. Agui maymayyaj cuando imatonyaj ti nimpa jém Jesús.

Jém maestroyaj jém iccámneyajwip jém yagatsyooti

(Mt. 23:1-36; Lc. 11:37-54; 20:45-47)

³⁸ Jesic inmadápatim Jesús jém pixiñtam. Nímayyajtap:

—Cuidado iga incupicpa jém jixi jém dapic wi jém iniitwip jém escribaspic maestroyaj. Je iwianjamyaj iga iccámnyajpa jém yagatsyooti. Iwianjamyajtim iga jém pixiñtam idioschiyajñ cuando siyajpa calle. ³⁹ Iwianjamyajtim jém más wibic coñcuy jém sinagoga. Cuando nicpa sñajiyaj, icusúniyyajpa jém coñcuy jut wícpa jém más mijpic anjagooyi. ⁴⁰ Iccáyáypa jém cunoya itic. Jesic ocmi tsam jáypa hora iwatyajpa jém oración iga tamigóyáypa. Ipicsonyajpa tsam mijpic castigo cuando nicpa iyoj itañca.

Tum cunoya tsam pobre ichi Dios ofrenda

(Lc. 21:1-4)

⁴¹ Tum jama coñ Jesús jém mijpic masticjom noco jut it jém cajon jut cottap jém ofrenda. Iix Jesús jém pixiñtam cuando icotyajpa jém ofrenda cajonjom. Iix iga wati jém ricoyaj, icotyaj jáyan tumiñ. ⁴² Ocmi núctim tum yomo tsam pobre. Cunoyam. Icot cajonjom wisten xuxut tumiñ. ⁴³ Jesic Jesús inwejáy icuyujciwiñ iga míñiñ iámyaj. Iñímáy:

—Numa mannímáypa, yip cunoya tsam pobre más chióy que itumpiy jém pixiñtam jém icotneyajwip itumiñ jém cajonjom. ⁴⁴ Porque los de más, jém tumiñiywip, ichiiyaj no más uxan jém itumiñ jém iniitwip idic. Yip cunoya tsam pobre, pero icuchiáy Dios itumpiy jém iniitwip. Dam ti initsiy iga wícpa jém yomo.

13

Nimpa Jesús iga miswattap jém mijpic mastic

(Mt. 24:1-2; Lc. 21:5-6)

¹ Jesic iganam putyaj Jesús jém mijpic masticjom con icuyujciwiñ, tum jém icuyujciwiñ iñímáy:

—Mammaestro, aami yip tammastic. Agui wíwatne con jém wítampic tsa.

² Jesic Jesús iñímáy jém icuyujciwiñ:

—Numa, siip ñixtámpa yíp mįjtampic mastic, pero núcpa jama iga miswattap. Da cutatsquetneeba ichiy ni tum tsa. Itumpiy accujegayyajtap.

Ti tánixpa antes que núcpa jém ñhąpįgam jama
(Mt. 24:3-28; Lc. 21:7-24; 17:22-24)

³ Nįcyaj Jesús con icuyujcwiñ jém cotsicyucmi de Olivos. Jemum coñyay jém mįjpic mastic ñuma, jém pacus aņwiñtuc. Jesic jém Peto, jém Jacobo, jém Xiwan y jém Anti icunúcyaj jém Jesús. Iyamacwacyajpa:

⁴ —¿Anįmaytaami juchis naspa yįpyaj cosa? ¿Jup seña tánixtámpa cuando naspa itumpiy yįpyaj cosa?

⁵ Jesic Jesús moj ñímáy jeeyaj:

—Nawattamtaji cuenta iga odoy i mimigóyaytámiñ. ⁶ Miñyajpa wati jém migoyyajpaap ich anniyimi. Nįmyajpa iga: “Ich aCristo.” Imigóyayyajpa tsam jáyan jém pįxiñtam.

⁷ Jesic cuando immatonťampa iga it jém guerra y wanpa iga tsam áņayajpa jém nacińyay, odoy cįntaami; tienes que naspa itumpiy yįpyaj cosa, pero đanam núcne jém ñhąpįgam jama. ⁸ Tum naciń áņayajpa con tungac naciń. Tum naxyucmi áņayajpa con tungac naxyucmi. Miñpa jém nasyixi jutquej. Miñpatim jém mįjtampic yuu. Tsam cujįñayyajpa jém pįxiñtam. Cuando ñixtámpa itumpiy yįpyaj cosa, ñįjodonťam iga tsucumneum jém mįjpic yaachaji.

⁹ Cuando moįpa ñixta itumpiy yįpyaj cosa, nawattamtaji cuenta. Mimatstamtap, minictamtap jut aņtuumayajpa jém Sanhedrín iga micįpįntap. Minictamtap jém sinagoga iga micótstamtap. Ich aņcuyucmi minictamtap jém gobernador iwiñjom y hasta jém rey iwiñjom. Jesic jempįgam inicjodóņap jeeyaj ich anaņmati. ¹⁰ Antes que núcpa jém ñhąpįgam jama, tienes que aņmattap jém wįbic aņmati icuwįti yíp naxyucmi. ¹¹ Cuando minictamtap jém aņjagooyicim, antes que miñúctámpa, odoy jįsi jutsap įncutsoņ jém aņjagooyiyaj. Aņmadaayi juuts miñímáy Dios jeeti rato porque da mich ñįxquimi. Dios iAnama michiiba jém aņmati. ¹² Algunos jém pįxiñtam icįjįncotpa jém ñuntatiwi jém aņjagooyicim iga accaataiñ. Tum pįxiñ icįjįncotpa jém imanic jém aņjagooyicim iga accaataiñ. Algunos jém tsįxtam ijóyixyajpa jém įjatų o įapa hasta icįjįncotyajpa jém aņjagooyicim iga accaayajtaiñ. ¹³ Itumpiy jém pįxiñtam tsam mijóyixtámpa ich aņcuyucmi. Pero siiga da ñįchactámpa jém Dios įņmati y siiga ñįyaachįypa cuando mimalwadaytamtap, jesic Dios micįacputtámpa.

¹⁴ Jém wiñicpic profeta, jém Daniel, įjychac jém librojom iga miñpa tum aņjagooyi tsam pįmi malo, tsam ijóyixpa tanjatų Dios. Miñpa iwat contra jém Dios įņquįmayooyi. Cuando ñįxpa iga miñpa įti jém aņjagooyi jut da iwįanjam Dios (el que imaypa yíp libro wį iga icutiįyįiñ ti annímáypa), jesic miįttanwįp jém naxyucmi de Judea, poytaami, nictaami cotsįganjom. ¹⁵ Siiga miquįmne ñńcicyucmi jém tungac piso, jesic odoy queti iga nicpa impic ñįtraste, pero nicsim poyimi. ¹⁶ Siiga miįtta camjom cuando immatonť iga núcneum jém malopic aņjagooyi, jesic odoy settaami ñńcicim iga miñpa impic impuctucu. Jemįgam tsucumtaami. ¹⁷ Agui uuguytim jém yomtam jém manicomcaneyajwįp y jém icsútsyajpaap jém xuxut tsįxtam. Porque tsam jáyan yaachaji miñpa. ¹⁸ Aņwejpáttaami Dios iga odoy mictsįytámiñ jém tiempo de succuc cuando mipoytámpa. ¹⁹ Cuando núcpa jém malopic aņjagooyi, tsam pįmi miyaachatámpa. Da nunca oįpa tánix jexpic yaachaji dende Dios iwat yíp mundo. Ni ocmi da eybic tánixpa jexpic yaachaji. ²⁰ Jém tanjatų Dios da įjįcpa iga jáypa jém malopic aņjagooyi. Siiga jáypa, da į cįputpa, cucaayyajpa itumpiy jém icupįņeyajwįp Dios. Jeeyucmi da įjįcpa iga jáypa jém malopic aņjagooyi.

²¹ Siiga i miñímáypa iga: “Miñi aami, yim it jém Cristo”, o tungac miñímáypa iga: “Nigi aami, jeexic it jém Cristo”, jesic odoy cupictaami. ²² Porque miñyajpa tsam jáyan jém migoypaap. Niman̄taayap iga je jém Cristo, pero migóypa. Niman̄taayap iga je jém wibic profeta. Iwatyajpa jém wítampic seña y jém milagroyaj iga meega wíap imigóyayajpa jém icupin̄neyajwíip Dios. ²³ Jesic mimichtam nawattamtaji cuenta porque mannímayñe ti miñpa antes que núcpa jém jama.

Ti naspa yíp naxyucmi cuando miñgacpa jém Cristo
(Mt. 24:29-35,42,44; Lc. 21:25-36)

²⁴ Jesic jém tiempo cuando nasum jém yaachaji, píchpa jém jama ichoca. Jém poya datim tsocpa. ²⁵ Jém matsa jém itwíip sin̄yucmi, cutin̄yajpa. Tsam tsigóypa itumpiy jém ityajwíip jém matsaanjom. ²⁶ Cuando nasum itumpiy yípyaj cosa, jesic itumpiy jém p̄ixiñtam iixyajpa jém Miññewíip Sin̄yucmi cuando miñgacpa yíp naxyucmi. Miñpa uc-sanjom. Miñpa juuts tum mijpic anjagooyi con Dios ipimi. ²⁷ Cutsadaytap jém sin̄yucmipic p̄ixiñtam icuwoyo yíp naxyucmi iga in̄tuumawatyajiñ itumpiy jém icupin̄neyajwíip Dios. Nicyajpa hasta jém más juumipic tiganjoj iga in̄tuumawatyajpa itumpiy jém amp̄ixiñtam dende sin̄yucmi hasta naxyucmi.

²⁸ Cutiyyitaami yíp ejemplo de jém tsuj. Cuando químpa jém in̄maañay, jesic tanjodon̄ iga nocojom miñpa jém cutujci. ²⁹ Jesaptim cuando in̄ixtámpa iga naspa jém mannímayñewíip, jesic in̄jodon̄tam iga nocojom it jém in̄an̄pic jama cuando amiñgacpa yíp naxyucmi. ³⁰ Numa, mannímaypa, itumpiy yípyaj cosa naspa antes que caayajpa jém p̄ixiñtam jém ityajwíip yíp naxyucmi cuando mojp̄a miñi itumpiy yípyaj seña. ³¹ Cuyajpa jém sin̄ y jém nas, pero ich anan̄mati da nunca cuyajpa.

³² Da i ijodon̄ jup jama ni juchis hora núcpa itumpiy yípyaj cosa. Da ijodon̄yay ni jém sin̄yucmipic p̄ixiñtam ni datim ijodon̄ jém Dios iManic. Icutum ijodon̄ jém tanjaton̄ Dios.

³³ Nawattamtaji cuenta, ittaami al tanto, seguido an̄wejpátaami Dios porque da in̄jodon̄tam juchis núcpa jém in̄an̄pic jama. ³⁴ Cuando núcpa jém jama jextim juuts tum p̄ixiñ cuando nicne joyi juumi. Ichacpa itic con algunos jém imozoyaj iga iwadáyiñ cuenta. In̄quím̄tsacpa jém imozoyaj. Cada tumtum ichi iyoxacuy. Ichac tum iga iwatpa cuenta jém puerta. In̄ímáy iga idiñ al tanto. ³⁵ Mannímaytámpatim mimichtam, ittaami al tanto porque da in̄jodon̄tam juchis hora amiñpa, siiga amiñpa cuando jocpiichabam, o cugaptsu, o cuando an̄wejpa jém cayu, o hasta cuquejacim. ³⁶ Jesic anjóctaami iga odoy man̄cupiichciytámiñ cuando amiñgacpa. ³⁷ Siip anan̄madáypa itumpiy p̄ixiñtam juuts mannímayñeta mimichtam iga ityajjiñ al tanto.

14

Jém anjagooyiyaj iwatyajpa trato iga matstap jém Jesús
(Mt. 26:1-5; Lc. 22:1-2; Jn. 11:45-53)

¹ Togoy wisna jama iga naspa jém pascuas̄in̄ cuando cúttap jém caxtánañi sin levadura. Jesic jém cobacpic pan̄iyaj entre jém escribaspic maestroyaj imétsyajpa jutsap iyammats jém Jesús iga iccaaba. ² Pero algunos jém anjagooyiyaj nimyajpa:

—Da tammatstámpa sinjom iga odoy cujíñayajjiñ jém p̄ixiñtam.

Tum yomo icutecquet Jesús con wibic perfume
(Mt. 26:6-13; Jn. 12:1-8)

³ It idic Jesús jém attebet Betania jém Ximoj iticim, jém cupúgayñewíip idic in̄aca. Iganam coñ Jesús jém mesacim jut wícyajpa, tum yomo inimiñ tum tsaafresco comne de jém wibic aceite. Naps nardo jém aceite jém tsampic tsoowíy. Jesic jém yomo ipo jém

frasco, icutecquet jém aceite Jesús icobacyucmi. ⁴ Pero algunos pimi jóy iga iwat jempic jém yomo. Nanímayyajta entre jeeyaj:

—¿Íiiga itecmichca yíp wibic aceite? ⁵ Meega tammáypa yíp aceite, ivale más de trescientos tumiñ de plata. Jesic wiap tanyoxpát jém yaachayajpaap.

Jesic moj iwogayyaj jém yomo.

⁶ Pero Jesús ínímáy:

—Tsaci yíp yomo. ¿Íiiga immoogíypa? Tsam awiwadáy. ⁷ Jém yaachayajpaap siempre inwaganaittámpa. Wiap inyoxpátta juchis mich inxunpa. Pero aich da siempre manwaganaittámpa. ⁸ Yíp yomo awiwadáy con jém iniitwíp. Danam acaane, pero miñ acutegáy jém wibic aceite ammijtayyucmi juuts cuando cumtap tum tsúts. ⁹ Numa mannímáypa, jutquej anmattap jém wibic anmati icuwiti yíp naxyucmi, anmattaptim ti awadáy yíp yomo iga jém pxiñtam ijisyajiñ yíp yomo.

Jém Judas icijunçot jém Jesús

(Mt. 26:14-16; Lc. 22:3-6)

¹⁰ Jesic jém Judas Iscariote, tum de jém Jesús icuyujcwiñ, jém doceplic, nic iniñmat jém panij anjagooyi. Nic iwat trato jutsap icijunçot Jesús jém anjagooyi icijom. ¹¹ Jesic agui maymayyaj jém panij anjagooyiyaj cuando ijodóna tiiga miñ jém Judas. Inímayyaj iga ichiyajpa tumiñ jém Judas iga icijunçotpa jém Jesús. Jesic jém Judas moj iméts jutsap iwat.

Jém wiñtipic Santa Cena

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Jesic tsucúmum jém siñ iga jém Israelpic pxiñtam icútyajpa jém caxtánañi jém dapic iniñ levadura. Jesic jém wiñtipic jama cuando accaayajtap jém xuxuf borregoyaj para jém pascuasñ, jém Jesús icuyujcwiñ icwácayaj, ínímayyaj:

—¿Jut inxunpa iga nicpa anwitsacta itumpiy cosa iga tawictámpa jém pascuasñ?

¹³ Jesic Jesús icutsat Jerusalén wisten jém icuyujcwiñ. Inímay:

—Nictaami jém atebet Jerusalén. Jemic impáttámpa tum pxiñ jém ininicpaap tum majcuy ni. Jesic túñiytaami, ¹⁴ hasta tigíypa tum ticjom. Nímaytaami jém tic iomi iga: “Nimpa jém ammaestro: ¿Jut if jém cuarto jut anacnasma jém pascuasñ con ançuyujcwiñ?” ¹⁵ Jesic jém tic iomi minquejáypa tum mijpic cuarto jém yucmic piso. Witsacneum jém cuarto. Iniitum titam tansunpa. Jemigam wíwattaami jém tanwiccuy iga tasñatámpa.

¹⁶ Jesic jém wisten icuyujcwiñ nicyaj jém atebet Jerusalén. Cuando núcyaj jemic, ipát jém tic juuts inímayñe jém Jesús. Jesic jém cuarto iwatyaj jém wiccuy iga icnasyajpa jém pascuasñ.

¹⁷ Jesic tsuuyawum iti, núcyaj Jesús con jém doce icuyujcwiñ. ¹⁸ Jesic iganam síp iwícyaj, nimpaj jém Jesús:

—Numa mannímáypa, tum de mimichtam, jém anwaganawícpaap, ançijunçotpa jém anenemigo icijom.

¹⁹ Jesic tsam anyácayaj jém Jesús icuyujcwiñ. Cada tumtum moj icwácayaj jém Jesús. Nímyajpa:

—¿Aicham?

²⁰ Jesic Jesús ínímáy:

—Numa, tum de mimichtam, jém midoceplic mançuyujcwiñ, jém anwaganasonpaap jém caxtánañi tumti chimajom, jeam açijunçotpa. ²¹ Ich jém aMiññewíp Siñyucmi, tienes que accaatap juuts nimpaj jém Dios inmati. Pero agui uuguytim jém pxiñ jém açijunçotpaap. Más wí meega da idic nay jém pxiñ.

²² Jesic iganam wícyajpa, jém Jesús imatspic t̄um caxtánañi. Cuando yaj in̄wejpát Dios, iwéc jém caxtánañi, ichi jém icuyujc̄iwiñ, iñímáy:

—Yíp caxtánañi ich ammiytay. Cúttaami.

²³ Ocmi ipic t̄um copa jém uvas iñi. Cuando yaj in̄wejpát Dios, ichi jeeyaj. Iucyay it̄umpiyaj. ²⁴ Jesic Jesús iñímáy jém icuyujc̄iwiñ:

—Yíp ich anniipiñ, con jeam aṅwatpa jém j̄omipic trato. Antegáypa anniipiñ por jáyaṅ p̄ixiñtam. ²⁵ Numa mannímáypa, da eybic ánuropa jém uvas iñi hasta que núcpa jém jama iga ánuropa jém j̄omipic vino juṫ in̄jacpa Dios.

Nimpa Jesús iga Peto iñécpa
(Mt. 26:30-35; Lc. 22:31-34; Jn. 13:36-38)

²⁶ Jesic yaj iwanyaj t̄um wañi, nicayaj jém c̄otsicyucmi iñiyi Olivos. ²⁷ Jesic iñímáy Jesús jém icuyujc̄iwiñ:

—Mimichtam iñt̄umpiytam tsam mic̄iñt̄ampa, ampoychact̄ampa aṅcut̄um yíptim tsuu. Porque nimpa así jém Dios in̄maṫi juṫ jayñeta: “Accaatap jém pastor. Cupóyayajpa jém iborregoyaj.” ²⁸ Pero ocmi cuando apispa, jesic an̄jagoyñeeba annic jém naxyucmi de Galilea.

²⁹ Jesic jém Peto iñímáy jém Jesús:

—Aunque it̄umpiy tsam c̄iñyajpa y michacpa in̄cut̄um, más aich da ac̄iñpa y da maṅcupóyáypa.

³⁰ Jesic Jesús iñímáy jém Peto:

—Numa mannímáypa iga yíptim tsuu antes que wisciy aṅwejpá jém cayu, mimich anañécpa tres veces.

³¹ Pero jém Peto duro iñímáy:

—Aunque tawagacaiñ con mimich, ich da manañécpa.

It̄umpiy jém icuyujc̄iwiñ j̄emp̄ictim n̄imyaj.

Jesús iwatpa oración Getsemaní
(Mt. 26:36-46; Lc. 22:39-46)

³² Jesic núcyaj t̄um lugar iñiyi Getsemaní. Jesús iñímáy jém icuyujc̄iwiñ:

—Coñtaami ȳim iganam ich nicpa anañwejpát Dios.

³³ Jesic Jesús in̄inic jém Peto, Jacobo, y Xiwan uxaj más juumi. Tsam p̄imi anyácne jém Jesús, tsam ij̄ispa iṅnaman̄jom ti iñascaaba. ³⁴ Jesic Jesús iñímáy jém tucuten̄ icuyujc̄iwiñ:

—Ich agui p̄imi anyácne áṅnaman̄jom hasta quénam acaatooba. Tsíytaami ȳim. Odoy moṅtaami. Nawattamtaj̄i cuenta.

³⁵ Jesic nic icut̄um Jesús uxaj más juumi. Tocsne act̄iñ naxyucmi. Moj in̄wejpát Dios. Iwágay siiga wiap, iga odoy ij̄iguiñ iga iñascaaba jém mījpic yaachaji, jém sīppic ictsíy.

³⁶ Nimpa Jesús:

—Man̄jat̄uñ Dios, mich wiap in̄wat it̄umpiy cosa. Ayoxpaati iga odoy annascain̄ yíp mījpic yaachaji. Pero odoy waṫi juuts ich ansunpa. Waṫi juuts mich in̄wian̄jam.

³⁷ Ocmi set eybic Jesús juṫ ichac jém tucuten̄ icuyujc̄iwiñ. Moñyajpa. Iñímáy jém Peto:

—¿Mimon̄pa Peto? ¿Que da wiap imvivoj̄a ni t̄um hora? ³⁸ Odoy moṅtaami, nawattamtaj̄i cuenta. Añwejpáttaami Dios iga odoy i wiain̄ micut̄itsta iga micmalwatt̄ampa. Numa jém iñanama iwattooba juuts ixunpa Dios, pero jém immiytay da iwian̄jam.

³⁹ Jesic eybictim nic in̄wejpát Dios con jeetim aṅmaṫi. ⁴⁰ Jesic cuando set Jesús juṫ it̄ jém icuyujc̄iwiñ, eybictim moñyajpa porque tsam p̄imi moṅtooba. Da tojtooba jém iixcuy. Da icut̄iypa juṫpic icutson̄pa jém Jesús. ⁴¹ Jesic tres vecesam setpa Jesús juṫ it̄ jém icuyujc̄iwiñ. Ipát̄im juṫ moñyajpa. Nimpa Jesús:

—S̄iip mon̄taamim, jejt̄aamim. Yajum aṅwat jém oración. Núcneum jém hora iga ich, jém aMiññew̄iip S̄iṅyucm̄i, ac̄iḷjuṅcottap jém malop̄ic p̄ixiñtam ic̄iḷjom. ⁴² Tsucumtaami, tan̄ict̄ampam. S̄iip miñpa jém ac̄iḷjuṅcotpaap.

Matsta Jesús

(Mt. 26:47-56; Lc. 22:47-53; Jn. 18:2-11)

⁴³ Jesic jeeti rato iganam j̄iypa ix̄i jém Jesús, núc jém Judas jém itw̄iip id̄ic con jém doce icuyujc̄iwiñ. Iwaganamiñyajpa tsam jáyaṅ p̄ixiñtam. Inimiñyajpa espada y jém cuy para cótsóypa. Icutsatyaj jém cobac̄p̄ic pañijyaj con jém escribasp̄ic maestroyaj y jém w̄idaytam. ⁴⁴ Jém Judas, jém ic̄iḷjuṅcotpaap Jesús, iwadáy jém p̄ixiñtam tum seña. Iñímáy:

—Jém anaṅnacatsútsapaap jeam jém p̄ixiñ. Matstaami, nan̄ict̄aami, da iñch̄icpoyt̄ampa.

⁴⁵ Jesic cuando núc jém Judas juṭ it Jesús, icunúc, iñímáy:

—MamMaestro.

Jesic in̄nacatsútsáy iac̄pac. ⁴⁶ Jesic matsta Jesús, nan̄ict̄a preso.

⁴⁷ Pero tum p̄ixiñ, jém iwaganaitw̄iip Jesús, itop jém espada, it̄iṅquímáy it̄atsic jém cobac̄p̄ic pañij imozo. ⁴⁸ Jesic Jesús iñímáy jém p̄ixiñtam:

—¿T̄iiga miñ ammatsta con espada y con cuy juuts tum anúmpaap? ⁴⁹ Cada jama jáy accuyujooyi māsticjom y da nunca ammatsta. Pero s̄iip michtam jem̄pigam in̄watta iga cupaguiñ jém Dios in̄māti juṭ jayñeta.

⁵⁰ Jesic itump̄iy jém icuyujc̄iwiñ ichacyaj icutum, cupóyayyaj.

⁵¹ Pero tum woñjaych̄ixi itúñȳypa jém Jesús. Naṅmonnet̄a con tum manta. Matstātim jém woñjaych̄ixi. ⁵² Pero ichac jém in̄mónóycuy, icus̄ic̄i poy.

Nanicta Jesús juṭ aṅtuumayajpa jém Israelp̄ic an̄jagooyiyaj

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Jesic nan̄ict̄a Jesús juṭ it jém cobac̄p̄ic pañij an̄jagooyi. Jemum aṅtuumayaj jém cobac̄p̄ic pañijyaj, con jém w̄idaytam y con jém escribasp̄ic maestroyaj. ⁵⁴ Jém Peto ijuumacpoyñe jém Jesús. Jesic núctim mex je jém cobac̄p̄ic pañij it̄ic̄c̄im. Iwaganacoñ jém policía aṅc̄im. Sampa jém Peto con jeeyaj jém juctic̄im.

⁵⁵ Jesic jém cobac̄p̄ic pañijyaj con jém más m̄iḷp̄ic an̄jagooyiyaj, jém Sanhedrín, imétsyajpa tum icum̄igoypaap Jesús iga accaataiñ. Pero da ipádáy jém it̄aṅca. ⁵⁶ Tsam wāti jém testigo icum̄igóypa jém Jesús, pero jeeyaj da tum̄tia jém in̄mātiyaj. ⁵⁷ Algunos jém p̄ixiñtam teñchucum iga icum̄igóypa jém Jesús. N̄imyaj:

⁵⁸ —Ammatoṅta ȳip p̄ixiñ iga n̄impa: “Ich ammiswatpa ȳip m̄iḷp̄ic māstic jém watnetaw̄iip c̄imi, jesic tucunajama ich aṅwatpa tun̄gac māstic jém dap̄ic watne c̄imi.”

⁵⁹ Pero jém p̄ixiñtam datim tum̄tia jém in̄māti.

⁶⁰ Jesic teñchucum jém cobac̄p̄ic pañij jém p̄ixiñtam aṅcucm̄i. Icwácpa jém Jesús. Iñímáypa:

—¿Que da in̄cutson̄pa ti s̄ip iñimyaj contra mimich?

⁶¹ Pero jém Jesús da j̄iypa. Da ti icutson̄pa. Jesic eyb̄ic jém pañij an̄jagooyi icwác jém Jesús. Iñímáy:

—¿Que mich miCristo? ¿Que micham jém Yucm̄ip̄ic Dios miMañic?

⁶² Jesic Jesús icutson̄. Iñímáy:

—Aicham. Michtam ánixt̄ampa aich, jém aMiññew̄iip S̄iṅyucm̄i, cuando acoñpa jém tan̄Jatun̄ Dios in̄w̄imi. Ánixt̄ampatim cuando amiñgacpa s̄iṅyucm̄i jém ucsanjom.

⁶³ Jesic jém cobac̄p̄ic pañij ichobiych̄ic̄cujac iyooti iga agui jóyñe. N̄impa:

—¿T̄iiga tamméts̄pa tun̄gac testigo? ⁶⁴ Mimichtam immatoṅneta iga tsam icuj̄ȳypa tan̄Dios. ¿Jesic ti iñj̄ist̄ampa? ¿Jup castigo tanchiiba?

Jesic itump̄iy jém an̄jagooyiyaj n̄imyaj iga accaataiñ jém Jesús.

⁶⁵ Jesic algunos moj ichujcayaj jém Jesús. Inmónayaj iixcuy. Moj ixonɣaj. Nímayta Jesús:

—Siiga numa mixabio, anímaayɨ i mixonɣ.

Ciɨjunɔotta Jesús jém mastic ipolicía icɨjɔm. Jeeyaj itojayajpa iwiñpac.

Jém Peto inécpa iga iixpicpa Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Jém Peto tsíy naxwiñ, tsíy aɳɨm. Miñ tum yomo, jém paɳij aɳjagooyi imozo. ⁶⁷ Mu iix iga sampa jém Peto, jesic jém yomo iámmats, iñímáy:

—Mich mixiibatim con jém Jesús jém Nazaretpic pɨxiñ.

⁶⁸ Jesic jém Peto inécpa. Nimpa:

—Da ánixpicpa jém pɨxiñ. Ni da anjodonɣ ti síp iññim.

Jesic nic jém Peto jém puerta aɳnaça. Jesigam aɳwejpa tum çayu. ⁶⁹ Jém yomo eybictim agui iámpa jém Peto, moj iñímáy jém ityajwɨp jem:

—Yíp pɨxiñ tum de jeeyaj.

⁷⁰ Pero eybictim inéc jém Peto iga da iixpicpa jém Jesús. Jesic ocmi tunɣagam pɨxiñ nimpa:

—Numa mimich tum de jeeyajpic. Quejpa iga Galileapic mipɨxiñ. Jempictim miɳmatpa juuts jeeyaj.

⁷¹ Jesic jém Peto pimi jóyñe. Moj malmaljɨyi. Nimpa:

—Wijodios iga da ánixpicpa jém pɨxiñ, jém miñimpaap.

⁷² Jesic jeeti rato eybic aɳwej jém çayu. Jém Peto iɳis ti iñímáy jém Jesús iga: “Antes que wiscíy aɳwejpa jém çayu, mimich anaɳnécpa túccíy iga da ánixpicpa.” Cuando iɳis jém Peto ti iñímáy jém Jesús, moj weji.

15

Nanicta Jesús jém Pilato iwiñjɔm

(Mt. 27:1-2, 11-14; Lc. 23:1-5; Jn. 18:28-38)

¹ Jesic icuquejama aɳtuumayajpa jém cobacpic paɳijayaj, con jém wídaytam, con jém escribapic maestroyaj y itumpɨy jém más miɳpic aɳjagooyiyaj, jém Sanhedrín. Moj iɳisyaj ti wɨap iwatyaj con jém Jesús. Jesic ocmi ipɨmiyyaj jém ipolicía iga ichenyajiñ jém Jesús y iga niɳuiñ icɨjunɔotyaj jém Pilato icɨjɔm. ² Jesic jém Pilato icwácpa jém Jesús. Nímayta:

—¿Que micham jém judíos miRey?

Jesic Jesús icutson, iñímáy:

—Mich miñimpa.

³ Jesic jém cobacpic paɳijayaj iñímayaj jém Pilato iga Jesús tsam pimi imalwatne. ⁴ Jesic jém Pilato eybictim icwác jém Jesús. Iñímáy:

—¿Que da inɳcutsonpa? Ixi jutsaɳ quejaj ampictson acontra de mimich.

⁵ Pero jém Jesús da ti más icutson. Jesic jém Pilato tɨneanjac porque da jɨy jém Jesús.

Jém aɳjagooyi ipɨmiyya iga accaataiñ jém Jesús

(Mt. 27:15-31; Lc. 23:13-25; Jn. 18:38-19:16)

⁶ Jém Pilato iniit tum costumbre iga icutsigáypa tum preso jém pascuasɨ. Icutsigáypa jém preso jém icupiɳneyajwɨp jém pɨxiñtam. ⁷ Jesic it idic cárcel tum pɨxiñ iñɨyi Barrabás. Wagapajneyajta con jém rebeldeyaj jém accaoyñeyajwɨp cuando icɨsucumyajtɨp tum bulla. ⁸ Jesic aɳtuumayajpa tsam jáyaɳ pɨxiñtam jut it jém Pilato, mojpá iwágayyaj iga icutsigáyiñ tum preso juuts siempre iwatpa. ⁹ Jesic jém Pilato iñímáy jém pɨxiñtam:

—¿Inwianjamta iga aɳcutsigáypa jém judíos iRey?

10 Jém Pilato icutiíyíy iga jém panij anjagooyiyaj iciñjunꝓotyaj Jesús porque agui icujóyíyyajpa. 11 Jesic jém panij anjagooyiyaj moj iccujíñayyaj jém p̄ixiñtam. Iñímayyaj iga iwágáyiñ jém Pilato iga icutsigáyiñ jém Barrabás. 12 Jesic jém Pilato eybictim iñímáy jém p̄ixiñtam:

—¿Jesic ti inwianjamta iga anwadiñ con yimpic inicniyaneta jém judíos iRey?

13 Jesic eybictim icutsonyajpa. P̄imi jiyaypa. Nímyajpa:

—¡Cunuuntaami cunusyucmi!

14 Jesic jém Pilato iñímáy jém p̄ixiñtam:

—¿Tiiga? ¿Ti mal iwatne?

Jesic mástim p̄imi jiyaypa. Nímyajpa:

—¡Cunuuntaami cunusyucmi!

15 Jesic jém Pilato ijispa iga iwatpa juuts iwianjamayaj jém p̄ixiñtam, icutsigáy jém Barrabás. Ip̄imíy iga cóstaiñ jém Jesús, iciñjunꝓot jém soldado iciñjom iga cunúntaiñ cunusyucmi.

16 Jesic nanicta Jesús jém palacio iançim jut antuumaneyaj itumpiy jém soldado.

17 Iccámayyaj Jesús tum moradopic puctucu. Itagayyaj tum apitcorona, iccámayyaj icobacyucmi. 18 Jesic jém soldado moj idioschiyaj jém Jesús juuts tum rey. Nímyajpa:

—Xutsóy miRey de jém judíos.

19 Jesic icótsayyajpa Jesús icobac con tum cuy. Ichujcayajpa. Icosteeñayyajpa Jesús juuts ijisyajpa tum dios. 20 Jesic cuando yaj ixaayíyyaj jém Jesús, accáyayta jém moradopic puctucu, eybictim accámayta jém iyooti jém imichipic. Ocmi ininicyajum jém Jesús iga cunúntaiñ cunusyucmi.

Cunúnta cunusyucmi jém Jesús

(Mt. 27:32-44; Lc. 23:26-43; Jn. 19:17-27)

21 Jemum naxi idic tum Cirenepic p̄ixiñ iñiyi Ximoj. Jém imanictam Alejandro y Rufo. Seti idic icamjom. Imatsyaj jém soldado, ip̄imiyyaj iga ininigáyiñ jém Jesús icunus.

22 Nanicta Jesús tum lugar iñiyi Gólgota. Nímtooba jém tanañmatimi, jém Tsútsçobacpacçim. 23 Jesic chiita Jesús jém vino namotnetawip con jém tsoy iñiyi mirra. Pero da iuc. 24 Jesic jém soldado icunúnyaj cunusyucmi jém Jesús. Iwégayyaj jém Jesús ipuctucu. Iwatyaj tum sorteo iga iixyajiñ titam ictsíypa cada tumtum jém soldado iga ininicyajpa.

25 A las nueve de la mañana micunúnta Jesús cunusyucmi. 26 Accámayta tum letrero icunusyucmi iga quejiñ tiiga accaata jém Jesús. Jayñeta yimpic: “Jém judíos iRey.”

27 Jeetim lugar cunúnyajtam cunusyucmi tungac wisten p̄ixiñ, númyajpaap. Pánayta tum jém icunus jém Jesús inwimi y tum inaymi. 28 Jempigam cupac jém Dios inmati jém jayñetawip juuts nimpic: “Chiitap castigo jém wibic p̄ixiñ juuts tum criminal.”

29 Jesic jém p̄ixiñtam nasyajpa jem, imalmalnímayyajpa jém Jesús. Ixiccayajpa. Inwíñóyayyajpa con icobac. Nímyajpa:

—Ja, ¿da mich miñimpa iga wiap immiswat jém mijpic mastic y ocmi iniccupacpa eybic en tucunajama? 30 Sip nacupujtaji iñyaac. Queti in��unusyucmi.

31 Jesic jém cobacpic panijyaj con jém escribaspic maestroyaj tsam ixaayíyyajpatim jém Jesús. Moj nanímayyajtaji entre jeeyaj:

—Yip p̄ixiñ iciacputpa tungac, pero iyaac da wiap iniciacputta. 32 Siiga yíbam jém Cristo jém Rey de Israel, quetpa yipti rato jém icunusyucmi, jesic numa tançupictámpa.

Jesic jém cunúnetawip con Jesús imalmalnímayyajpatim.

*Accaata jém Jesús**(Mt. 27:45-56; Lc. 23:44-49; Jn. 19:28-30)*

³³ Núc cugapjama. Cupiicha icuwiti jém naxyucmi. Pimi piichi hasta las tres de la tarde. ³⁴ Jesic jeetim hora pimi jiyja jém Jesús. Nimpa:

—Eloi, Eloi, ¿lama sabactani?

Taichtam tanañmatimi nimtooba: ManDios, manDios, ¿tiiga antsac añcutum?

³⁵ Jesic algunos jém ityajwip jem, cuando imatonyaj, nimyaj:

—¿Immatoñta? Siip inwejay jém wiñicpic profeta jém Elías.

³⁶ Jesic tum de jeeyaj poyimi nic ipic tum esponja juuts tum puqui, imuj con jém tampic vino, iccám tum waycuyucmi iga igucpa jém Jesús. Nimpa jém pixiñ:

—Jocinam, tañcuixpa siiga da miñpa jém Elías iga icquetpa jém cunusyucmi.

³⁷ Jesic pimi añwej jém Jesús, caum. ³⁸ Jesic jém punctuctaani jém itwip jém mijpic masticjom teeñañsaj dende siñwiñ hasta naxyucmi. ³⁹ Jesic jém soldado icapitán jemum teñ jut cunúnnetā cunusyucmi jém Jesús. Mu imatoñ iga añweypa jém Jesús y iix jutsa mu icca, nimpa jém capitán:

—Numa, yip pixiñ jém Dios iManic.

⁴⁰ Miñajtim algunos jém yomtam, tsíyyaj juumi, pero iixyaj ti iñasca jém Jesús. It jém Malía Magdalena. Ittim jém tungac Malía jém segundo Jacobo y José iapa. Ittim jém yomo jém Salomé. ⁴¹ Yipyaj yomtam itúñyyaj Jesús cuando oy iti jém naxyucmi de Galilea. Jemum tsam iyoxpátaypa, icwícyajpa jém Jesús. Ityajtim jem jáyan jém Galileapic yomtam jém iwaganamiñnewip Jesús Jerusalén.

*Cumta jém Jesús**(Mt. 27:57-61; Lc. 23:50-56; Jn. 19:38-42)*

⁴² Jeetim jama jém Israelpic pixiñtam iwitsacyajpa itumpiy cosa para jém jejucyjama. Jesic tsuuyim ⁴³ tum pixiñ iñiyi José moj ijs iga icquedáypa cunusyucmi jém Jesús imijtay. Arimateapic pixiñ, tsíy juuts tum mijpic añjagooyi de Israel. Tsam injócpatim jém tiempo cuando Dios injacpa itumpiy jém pixiñtam. Jesic jém José icamamwat ianama, nic iam jém Pilato, iwágáypa permiso iga icquedáypa jém Jesús imijtay. ⁴⁴ Jém Pilato injisjac siiga numa caaneum jém Jesús o da caane. Jesic inwejay jém capitán, icwác siiga numa caaneum. ⁴⁵ Cuando jém capitán nimpa iga numa caaneum, jesic jém Pilato ichi permiso jém José iga ininigáyiñ jém Jesús imijtay. ⁴⁶ Jesic José ijuy tum jomipic punctucu, jém lino. Nic icquedáy jém Jesús imijtay, inmon con jém jompunctucu, nic icot tum tsaajosjom. Watnetā jém tsaajos. Jesic ocmi jém José injopnúc jém tsaajos con tum mijpic tsa. ⁴⁷ Jém Malía Magdalena con jém tungac Malía, jém José iapa, iixyaj jut cumta jém Jesús.

16*Acpista jém Jesús**(Mt. 28:1-10; Lc. 24:1-12; Jn. 20:1-10)*

¹ Jesic jém tungac jama cuando nasum jém jejucyjama, jém yomtam nic ijuy jém especia jém cñpáppic iga icamáypa jém Jesús imijtay. Ityaj jém Malía Magdalena, jém Salomé y jém Jacobo iapa jém Malía. ² Jesic icuquejama, jém wiñtipic jama de jém semana, joccuquej, nicyaj jém tsaajoscim jém yomtam. ³ Iganam niquiyaj tunjom jém yomtam moj ijsyaj, nanímayyajtāp:

—¿Pero i wiap injoobáy jém mijpic tsa, jém jos añnúccuy?

⁴ Pero cuando núcyaj jém tsaajoscim iixyaj iga jém mijpic tsa, jém jos añnúccuy, añjoobayñetawum. ⁵ Jesic tigiyyaj jém yomtam jém tsaajosjom. Jemum iixyaj iga coñ tum woñjaychixi jém josjom jém añwimipic lado. Iccámne tum yagats yooti agui popo. Jém yomtam tsam añjécyaj. ⁶ Pero jém pixiñ iñimáy jém yomtam:

—Odoy c̄iṅtaami. Michtam s̄ip immétsta jém Jesús, jém Nazaretp̄ic p̄ixiñ, jém cunúntaw̄iṅ cunusyucmi. Pero s̄ip acp̄isnetawum. Dam̄ ī ȳim. Ámtaami juṭ tsagayñetā id̄ic jém im̄ijtay. ⁷ S̄iṅ n̄igi n̄ímaayi jém icuyujc̄iwiñ y jém Peto iga: “An̄jagóypa iñic jém Jesús jém naxyucmi de Galilea. Jem̄igam̄ iñixtámpa juuts miñimayñeta.”

⁸ Jesic putyaj jém tsaajosjom̄ jém yomtam. Nic̄ poyimi. Tsam̄ an̄jécneyaj. Agui cuetsayyajpa. Dā ī in̄madayyaj ti iñascayaj porque tsam̄ c̄iṅneyaj.

Jesús iwiñquejáy jém Malía Magdalena
(Jn. 20:11-18)

⁹ Jesic cuando acp̄istawum jém Jesús, icuquejama, tsuuytim, jém wiñtip̄ic jama de la semana, iwiñquejáy jém Malía Magdalena, jém itobayñew̄iṅ Jesús jém siete mal espíritu. Jém yomo jém moiw̄iṅ iwiñquejáy Jesús. ¹⁰ Jesic jém Malía Magdalena nic̄ iám jém icuyujc̄iwiñ. Jeeyaj agui anyácneyaj, agui wejyajpa. Jém Malía in̄madayyaj iga iwiñquejayñe jém Jesús. ¹¹ Cuando imaton̄yaj iga p̄isneum jém Jesús y iga jém Malía iixñeum, jesic jém Jesús icuyujc̄iwiñ dā icup̄icyajpa.

Jesús iwiñquejáy w̄isten̄ jém icuyujc̄iwiñ
(Lc. 24:13-35)

¹² Jesic ocm̄i Jesús iwiñquejáy w̄isten̄ jém icuyujc̄iwiñ cuando nic̄yajpa tunjom̄. An̄cacne iámooyi. Dā iixp̄icyaj. ¹³ Jesic jém w̄isten̄ nic̄ in̄madayyaj los de más iga p̄isneum jém Jesús, pero datim̄ icup̄icyajpa.

Jesús icutsat jém icuyujc̄iwiñ iga n̄iguiñ naj̄yooyi
(Mt. 28:16-20; Lc. 24:36-49; Jn. 20:19-23)

¹⁴ Jesic ocm̄i iwiñquejáy Jesús jém once icuyujc̄iwiñ iganam̄ w̄icpa ix̄iyaj. Iwogáy Jesús jém icuyujc̄iwiñ porque tsam̄ maloyaj ianama y dā icup̄icyajpa iga acp̄isnetawum jém Jesús juuts n̄im̄yajpa jém iixñeyajw̄iṅ. ¹⁵ Iñimáy jeeyaj:

—Nictaami icuw̄iti ȳip naxyucmi. An̄madayyaj̄i jém w̄ib̄ic an̄mat̄i itump̄iy jém p̄ixiñtam̄ iga Dios iciacputtooba. ¹⁶ Siigā ī icup̄icpa jém w̄ib̄ic an̄mat̄i y acch̄iṅtap, jesic Dios iciacputpa. Jém dap̄ic icup̄icyajpa jém w̄ib̄ic an̄mat̄i, ip̄ictson̄pa jém m̄ijp̄ic castigo. ¹⁷ Como tum̄ seña anchiiba jém amp̄imi jém acup̄icneyajw̄iṅ iga w̄iañ̄ itopyaj jém mal espíritu ich̄ ann̄iyimi. Wiaptim̄ in̄mat̄iyaj tun̄gac an̄mat̄imi. ¹⁸ Siigā imatspa tum̄ tsañ o siiga iucpa algun veneno, dā ti iwadáypa. Siigā ich̄igáypa icobac jém m̄im̄neyajw̄iṅ, jesic p̄ispa.

Jesús químpa eyb̄ic s̄iṅyucmi
(Lc. 24:50-53)

¹⁹ Jesic jém tán̄omi Jesús cuando yaj in̄madáy jém icuyujc̄iwiñ, nanict̄a s̄iṅyucmi, nic̄ coñi jém tan̄jatun̄ Dios in̄w̄imi. ²⁰ Jesic jém Jesús icuyujc̄iwiñ nic̄yajpa naj̄yooyi juṭquej. Jém tán̄omi tsam̄ iyoxpát iga w̄iañ̄ iwatyaj jém milagro. Jesic quejpa iga Dios icutsat jém w̄ib̄ic an̄mat̄i. Jemum̄ cuyaj.

Jém wibic anmati jém ijayñewiip jém Lucas

Jém Lucas ijáyáy jém iamigo Teófilo

¹ Waṭi jém p̄ixiñ iṭis iga ijaypa titam nasne aichtámanjōm juuts tum historia w̄itsacnetaw̄iip, ² juuts tanquejáy jém tant̄iwitam jém iixñeyajw̄iip iixcuymi dende wiñti. Jeeyaj iwaganasiiba jém inimiññewiip jém wibic anmati. ³ Ich anj̄ispatim iga w̄i iga manjáyáypa tum historia, numtsacneum. An̄wic̄iipin̄ itump̄iy cosa jém nasnewiip dende wiñti. Jeeyucmi siip manjáyáypa, wibic miTeófilo, ⁴ iga iñjodón̄aiñ iga da je miigooyi jém miñquejayñetaw̄iip.

Jut̄pic naypa jém Xiwan jém acchiñoypaap

⁵ Jesic jém tiempo cuando jém rey Herodes injacpa Judea, it idic tum Israelpic panij iñ̄iyi Zacarías. Yoxap idic jém miip̄ic masticjōm. Wagayoxayajpa con jém grupo de jém Abíaspic panijyay. Jém iyomo iñ̄iyi Elisabet. Jém yomo itúmmiyaj con jém wiñ̄icpic panij Aarón. ⁶ Icuistic iw̄i watyajpa tanjatun̄ Dios iwiñjōm. Icupicyajpatim Dios in̄químayooyi y jém in̄madayooyi. Da i wiap ipadáy jém it̄an̄ca. ⁷ Pero jém Zacarías con iyomo da man̄iḡiyay. Da wiap in̄pic jém yomo. Siip ts̄amiyajam icuisticayaj.

⁸ Jesic tum jama icts̄iy iturno jém Zacarías ipixiñtam iga yoxayajpa jém miip̄ic masticjōm. Cupin̄ta jém Zacarías iga iwatpa jém panij iyoxacuy jém Dios iwiñjōm. ⁹ Metsta por sorteo juuts jém panij icostumbre iga iñooba jém poma jém tanjatun̄ Dios imasticjōm jém miip̄ic. ¹⁰ Iganam s̄ip iño jém poma, itump̄iy jém p̄ixiñtam jém it̄yajw̄iip jém mastic an̄naca in̄wejp̄atyajpa Dios. ¹¹ Jesic Dios icutsat tum siñyucm̄ipic p̄ixiñ iga iwiñquejáy jém Zacarías. Iix iga jemum teñ jém siñyucm̄ipic p̄ixiñ jém altar an̄w̄imi jut̄ iñooba jém poma. ¹² Agui ichiganj̄ec jém Zacarías cuando iix. Ts̄am p̄imi c̄in̄. ¹³ Jesic jém siñyucm̄ipic p̄ixiñ iñ̄imáy:

—MiZacarías, odoy c̄in̄i. Siip mannímáypa iga Dios mimatón̄ayñeum cuando in̄wágáy Dios iga miman̄iḡiyt̄amiñ. Jeeyucmi man̄iḡiypa jém iñyomo Elisabet. Icnaypa tum jaych̄ixi, accámaayi iñ̄iyi iga Xiwan. ¹⁴ Mich agui mimaymáyp̄a iga naypa jém imman̄ic. Ts̄am in̄wian̄jamta. Jáyan̄ p̄ixiñtam maymáyp̄ajpatim iga naypa ȳip ts̄ixi. ¹⁵ Wiixtap jém imman̄ic tanjatun̄ Dios iwiñjōm. Da iucpa vino ni ojo. Chiitap jém Dios iAnama cuando it̄ iapa ipuujōm. ¹⁶ Jém imman̄ic icucagáyáypa ij̄ixiyaj jáyan̄ jém Israelpic p̄ixiñtam iga eyb̄ic ij̄isyajpa Dios. ¹⁷ Dios icutsatpa jém imman̄ic iga icjodón̄aiñ jém p̄ixiñtam iga miñpa jém tán̄omi. Jextim ij̄ixi y jextim ip̄imi jém imman̄ic juuts jém wiñ̄icpic an̄mat̄c̄iwiñ jém Elías. Jém imman̄ic in̄j̄iyjacpa jém an̄ayajp̄appic iga odoy an̄ayajiñ jém jatun̄pic con iman̄ic. In̄quejáypa jém dap̄ic icup̄icpa Dios iga icup̄icyajiñ. In̄quejáypa jém p̄ixiñtam iga ip̄ictson̄yajiñ jém tán̄omi cuando miñpa.

¹⁸ Jesic jém Zacarías icwác jém siñyucm̄ipic p̄ixiñ. Iñ̄imáy:

—¿Jutsap̄ an̄cut̄iȳiy iga numa ȳim̄pic annímáy? Ich ts̄am aw̄idayam, ts̄amim mex jém anyomo.

¹⁹ Jesic jém siñyucm̄ipic p̄ixiñ iñ̄imáy jém Zacarías:

—Ich aGabriel. An̄cuyoxap̄ Dios. Acutsat ȳim̄ iga manan̄madáypa ȳip wibic anmati.

²⁰ Pero iga da in̄cupic ti mannímáy, siip michajcaap, miumaap. Da wiap in̄j̄iy hasta que naypa jém imman̄ic. Iñ̄nascaaba así porque da in̄cupic ti mannímáy. Cuando núcpa jém jama tienes que cupacpa juuts mannímáyne.

²¹ Jesic jém p̄ixiñtam jém it̄yajw̄iip jém mastic an̄naca in̄jócyajpa jém Zacarías. Da icut̄iȳiyaj tiiga ts̄am jáyñeum jém miip̄ic masticjōm. ²² Jesic cuando putum jém Zacarías

da wíap ijíyáy jém pìxiñtam. Jesic icutiyyaj iga iix tum poñ masticjom. Iwatpa seña icimi, pero da wíap ijíy, umaane.

²³ Ocmi cuando cupacneum jém tiempo iga iwat jém iyoxacuy masticjom, set jém Zacarías iticim. ²⁴ Ocmi manigíyum jém iyomo Elisabet. Jesic tsíy jém yomo iticim cinco meses juuts icostumbre. Pero agui maymay jém yomo. Nimpa: ²⁵ “Tsam awíwadáy jém tanJatun Dios porque ijodon iga da awíxyajpa jém pìxiñtam iga da amanigíyapa.”

Acjodónatap iga naypa jém Jesús

²⁶ Cuando núcum seis meses iga manicomcane jém Elisabet, jesic Dios icutsat tum sinyucmipic pìxiñ, jém Gabriel, hasta tum Galileapic atebet iníyi Nazaret. ²⁷ Cutsatta jém sinyucmipic pìxiñ iga ininigáyíñ anmati tum woñi iníyi Malía. Jém woñi da queman ijíypát pìxiñ. Iniiitum tum trato iga napicyajtap con tum pìxiñ iníyi José, jém rey David iocmanic manic. ²⁸ Jesic cuando núc jém sinyucmipic pìxiñ jém Malía iticim, inímáy:

—¡Xutsóy, miwíxpáppic jém tanJatun Dios! Tsam miwíwadáypa más que itumpiy jém yomtám.

²⁹ Jesic tineanjac jém Malía cuando imaton ti inímáy. Ijísapa ijíxianjom iga: “¿Tíiga jempic adioschi?” ³⁰ Jesic jém sinyucmipic pìxiñ inímáy:

—Malía, odoy cñi. Dios tsam miwíxpa. ³¹ Da jáypa mimanigíyapa. Iniiitpa tum jaychixi. Accámaayi iníyi iga JESÚS. ³² Tsam iniiitpa ipimi. Accámáytap iníyi iga jém Yucmipic Dios iManic. Jém tanJatun Dios iccampa juuts Rey jex juuts jém wíñicpic ijatunwewe jém David. ³³ Accámatap iga Rey iga itumpiy tiempo injaguíñ jém nación de Israel. Da nunca cuyajpa ipimi iga anjagooyi.

³⁴ Jesic jém Malía icwác jém sinyucmipic pìxiñ. Inímáy:

—¿Jutsap ammanigíy? Danam ajaayíy. Da queman ajíypát pìxiñ.

³⁵ Jesic jém sinyucmipic pìxiñ inímáy jém Malía:

—Jém Dios iAnama miñpa iti con mimich. Impictsonpa jém Dios ipimi. Jeeyucmi da tñcaíy jém immanic jém inicnappáppic y accámáytap iníyi iga Dios iManic. ³⁶ Síp manigíypatim mex jém inchitsi jém Elisabet jém dapic idic manigíyapa. Tsamim jém yomo, pero núcneum seis meses iga manicomcane. ³⁷ Porque Dios wíap iwat itumpiy cosa.

³⁸ Jesic nimpa jém Malía:

—Síp ich atsíyapa juuts jém tanJatun Dios imichi. Síp jempigam iwadiñ juuts mich annímayñe.

Cuando yaj inmat jém Malía, jesic nic jém sinyucmipic pìxiñ.

Nicpa joyi Malía jém Elisabet iticim

³⁹ Jesic jeetim tiempo jém Malía anjeega nicpa tum atebet jém naxyucmi de Judea jém cotsic anaca. ⁴⁰ Tíy jém Zacarías iticjom. Idioschiiba jém ichitsi Elisabet. ⁴¹ Cuando imaton jém Elisabet iga idioschi jém Malía, jesic tsigóyapa jém tsixi jém Elisabet ipuujom. Jém yomo ipictson jém Dios iAnama. ⁴² Jesic pimi jiy jém yomo. Inímáy jém ijáyuc:

—Mich más miwíwadáypa Dios que itumpiy jém yomtám. Dios tsam pimi iwíwadáypatim jém immanic jém inicnappáppic. ⁴³ ¿Ich ajapaap iga miñpa ajóyáy jém tánQmi iapa? ⁴⁴ Cuando mich andioschi, jeeti rato tsigóyapa jém ammanic ampuujom, agui maymay iga mimiññe. ⁴⁵ Agui miwíwadáyñe Dios porque incupicne iga je wíap iccupac ti miñímayñe.

⁴⁶ Jesic nimpa jém Malía:

Ich ancujíppa jém tanJatun Dios.

⁴⁷ Tsam amaymay ananamajom cuando anjísapa Dios jém taciaputpáppic.

⁴⁸ Ich da ajutsañ, pero Dios acupin iga ancuyoxap,

Jesic dende s̄ip para siempre jém p̄ixiñtam jém ityajw̄ip icuw̄iti ȳip mundo n̄imyajpa iga Dios ts̄am aw̄iwadayñe.

49 Porque aw̄iwadayñe jém Ts̄ampic iniit ip̄imi.

Agui w̄i cuáyñe jém iñ̄iyi.

50 Siempre iyaachanj̄ampa itump̄iy jém p̄ixiñtam jém s̄ippic it con jém miñp̄áppic ocmi, jém ic̄inyajp̄áppic Dios.

51 Ts̄am iniit ip̄imi.

Wiap imiswadáy jém p̄ixiñtam ij̄ixi jém nacuj̄iptap̄áppic.

52 Iccáypa jém m̄j̄tampic anjagooyi jém ts̄ampic iniit ip̄imi.

Iccámpa tun̄gac jém dap̄ic nacuj̄iptap̄.

53 Jém ts̄ampic yuap icw̄ícpa hasta cuspa.

Pero jém ricoyaj jém ij̄ispáppic iga da ti itogóyáy, da ti ichiiba Dios.

54 Iyoxp̄átpa jém imozo Israel.

Da ijaaman̄notpa iga iyaachanj̄ampa jém ip̄ixiñtam jém icuyoxayajp̄áppic,

55 juuts ij̄ycámáy jém tan̄jatun̄wewe ij̄atun̄ jém Abraham iga iyaachanj̄amyajpa jém im̄an̄ictam para siempre.

56 Jesic yaj in̄mat jém Malía. Jemum ts̄iy tres meses con jém ich̄itsi Elisabet. Ocmi set it̄icmi jém Malía.

Naypa jém Xiwan jem acch̄in̄oyp̄áppic

57 Jesic núc jém j̄ama iga nay jém Elisabet im̄anic. Icnay tum̄ jaych̄ixi. 58 Jesic cuando jém it̄iwitam con jém ivecinoyaj imaton̄yay iga nay jém im̄anic, icuj̄ipyajpa Dios con jém yomo iga ts̄am iyaachanj̄ampa. Agui maymáayajpa con jém Elisabet. 59 Cuando núc ocho día nayñe jém ts̄ixi, wadayt̄a jém marca de circuncisión juuts jém Israelp̄ic icostumbre. Iccámayyajtooba id̄ic iñ̄iyi iga Zacarías juuts ij̄atun̄. 60 Pero n̄impa iapa:

—Da tanaccámáypa iñ̄iyi iga Zacarías. Tanaccámáypa iñ̄iyi iga Xiwan.

61 Jesic n̄imyajpa jém p̄ixiñtam:

—¿T̄iiga iniccámáypa iñ̄iyi iga Xiwan porque ni tum̄ jém iñ̄t̄iwitam da inij̄ jexpic iñ̄iyi?

62 Jesic jém ityajw̄ip jem icw̄áyajpa jém ts̄ixi ij̄atun̄ con seña. Acwáct̄a jém Zacarías jup n̄iyi iccámáypa jém im̄anic. 63 Jesic jém Zacarías iwác tum̄ jaca toto. Ijaycámáy jém im̄anic iñ̄iyi totyucmi. N̄impa: “Iñ̄iyi Xiwan.” Jesic itump̄iy jém p̄ixiñtam agui ipooñanj̄amyajpa.

64 Jeeti rato wiawum̄ ij̄iy jém Zacarías. Mojum icuj̄ip Dios. 65 Jesic mu iixyay jém ityajw̄ip jem, p̄imi c̄inyaj. Acjodónayajtap̄ ti iñ̄asca jém Zacarías itump̄iy jém ityajw̄ip jém naxyucmi de Judea jém cotsigan̄jom. 66 Itump̄iy jém p̄ixiñtam jém imaton̄neyajw̄ip, ts̄am ij̄isyajpa ti iñ̄asca jém Zacarías. Nacw̄áyajtap̄ entre jeeyaj. Nanímayyajtap̄:

—¿T̄i iwatpa ȳip ts̄ixi, jesic m̄ijap?

Porque ts̄am w̄iquejpa iga iniit jém Dios ip̄imi.

Jém an̄mat̄i ch̄iñ̄eta jém Zacarías

67 Jém ts̄ixi ij̄atun̄, jém Zacarías, ip̄ictson̄ jém Dios iAnama. Moj in̄mat jém an̄mat̄i jém ichiñ̄ew̄ip Dios. N̄impa jém Zacarías:

68 W̄i iga tan̄cuj̄iptamiñ̄ jém tan̄jatun̄ Dios, jém Israel iOmi, porque miñ̄ tacutsigayta taichtam.

69 Tacutsadayt̄a tum̄ wiapaap taciapputta, jém wiñ̄icp̄ic itúmmi jém David jém icuyoxap̄áppic tan̄jatun̄ Dios.

70 S̄ip tawadayta juuts taj̄ycámáyñe ts̄am wiñ̄igam cuando in̄matyay jém w̄ib̄ic profeta.

71 N̄impa iga taciapputtámpa jém tánenemigoyaj ic̄ij̄jom, itump̄iy jém taj̄oyixyajp̄áppic.

72 Ts̄am tayaachanj̄ampa juuts iwadayñeyaj jém wiñ̄icp̄ic tantúmmitam.

Jempam ij̄ispa jém w̄ib̄ic trato jém iwatnew̄ip wiñ̄igam,

73 cuando ij̄ycámáy jém Abraham, jém wiñ̄icp̄ic tan̄jatun̄,

⁷⁴ iga taciacputtámpa jém tánenemigoyaj icijòm iga tançuyoxatámpa Dios y da ti tançinpa,
⁷⁵ iga tanwíwattámpa tanJatun Dios iwiñjòm y tantsactámpa iga tammalwattámpa itumpiy jama iga taítpa vivo.

⁷⁶ Jesic jém Zacarías moj inmadáy jém xutu tsixi. Inímáy:

Mich mammanic, michíypa juuts jém yucmipic Dios iprofeta.

Cuando miñpa jém tánQmi, minjagoyñeeba inñic iga inwitsagáypa jém itun.

⁷⁷ Inicjodónayajpa jém Dios ipixiñtam iga siip Dios iwadaytooba perdón jém itánca iga iciacputyajpa.

⁷⁸ Porque wibic tóyooyi iniit jém tanJatun Dios, tsam tayaachanjampa.

Jém jixi miñpa juuts químpa jém jama

⁷⁹ sinyucmi iga iyicquejpa jém ityajwip piichcim, jém caanewip icumucom.

Miñpa tanquejáy jém tun jém nicpáppic jut tawixpa Dios.

⁸⁰ Jesic yaj inmat jém Zacarías. Ocmi mijap jém imanic. Tsam iniit Dios iAnama, iwicutiyíy ti ixunpa Dios. Jáy iti jém titsinaxyucmi jut da ti idiyíy hasta núc jém jama iga Xiwan anquejaytap jém Israelpic pixiñtam.

2

Naypa Jesús

(Mt. 1:18-25)

¹ Jeetim tiempo jém Romapic anjagooyi jém César Augusto icutsat tum orde iga wattaiñ censo itumpiy jém naxyucmiyaj jém injacpáppic jém Romapic anjagooyi. ² Watta jém wiñtipic censo cuando jém gobernador Cirenio injacpa jém naxyucmi de Siria. ³ Jesic cada pixiñ nicpa nacámyajtaji jut tsucum jém wiñicpic itúmmyaj. ⁴ Jeeyucmi set Belén jém José. Porque nicne iti tum attebet inñiyi Nazaret jém naxyucmi de Galilea. Pero iticmi jém Belén jém naxyucmi de Judea. Porque jemum it idic jém ijatunwewe ijatun jém wiñicpic anjagooyi jém David. ⁵ Jesic nic nacámyajtaji jém José con Malía jém iwatnewip trato iga ancoomyajpa. Danam napicneyajta con jém José, pero jém woñi manicomcaneum. ⁶ Iganam ityaj jém Belén, núc jém tiempo iga naypa jém tsixi. ⁷ Jesic icnay Malía jém icoponmanic, tum jaychixi. Inmon con puctucu, icmonpa tum cawajticjom. Como tsam itñim, da j icnucs tic.

Jém iwatyajpáppic cuenta jém borregoyaj iixyaj jém sinyucmipic pixiñtam

⁸ Da más juumi de jém Belén ityaj idic jém iwatyajpáppic cuenta jém borrego. Inmonyajpa jém iborregoyaj copjom iga iwatpa cuenta. ⁹ Jesic jemum iwiñquejáy tum sinyucmipic pixiñ jém icutsatnewip jém tanJatun Dios. Icunooquejpa jém tanJatun Dios ichoca jut ityaj jém iwatyajpáppic cuenta jém borrego. Jesic tsam pimi cinjay jém pixiñtam. ¹⁰ Pero jém sinyucmipic pixiñ inímáy:

—¡Odoy cinntaami! Ich miñ manañmadáy tum wibic anmati. Tsam maymáayajpa itumpiy jém pixiñtam cuando imatonayajpa. ¹¹ Mannímáypa iga yípti jama nay jém Ciacpudoypáppic. Je jém tánQmi CRISTO. Nay jém tsixi jém David iattebet jém Belén. ¹² Siip juuts tum seña manañmadáypa jut impáttámpa jém tsixi; anmonnetá con puctucu, wone tum cawajticjom.

¹³ Iganam inmatpa jém sinyucmipic pixiñ, jeeti rato miñyaj tsam jáyan jém sinyucmipic pixiñtam. Wanyajpa, icujípyajpa Dios. Nimyajpa:

¹⁴ Siip tançujíptámpa jém tanJatun Dios jém más yucmipic it.

Siip iwínanigáypa jém pixiñtam jém Diospic iwixyajpa.

¹⁵ Jesic cuando nicgacum sinyucmi jém sinyucmipic pixiñtam, nanímayyajta jém iwatyajpáppic cuenta jém borregoyaj:

—Siip tanicpa jém Belén. Nicpa tánám ti naspa jem juuts tacjodónata jém tanJatun Dios.

16 Jesic anjeega nicyaj. Cuando núcyaj, ipátyaj jém Malía con jém José, ipátyajtim jém tsixi wone jém cawajticjom. 17 Cuando iixyaj jém tsixi, jesic moj inmadayyaj jém ityajwip jem ti inímáy jém sinyucmipic pixiñ de jém tsixi.

18 Itumpiy jém pixiñtam ipooñanjamyajpa cuando imatonyaj ti inmatyajpa jém iwatyajpáppic cuenta jém borregoyaj. 19 Pero jém Malía da ijaamañnotpa ti inímayyaj jém pixiñtam. Tsam ijspa ianamajom. 20 Ocmi setgacum jém iwatyajpáppic cuenta jém borregoyaj. Agui maymayyaj. Inwejpátyajpa Dios, icujípyajpa iga wiap imatonyaj y iixyaj itumpiy cosa juuts inímáy jém sinyucmipic pixiñ.

Acwiñquejta jém tsixi Jesús jém mijpic masticjom

21 Jesic núc ocho día iga nayñe jém tsixi. Jém José y Malía iwadáy jém marca de circuncisión juuts jém Israelpic pixiñtam icostumbre. Accámayta iníyí iga JESÚS juuts iccámáy jém sinyucmipic pixiñ cuando danam manigiy jém Malía.

22 Ocmi cuando capsum jém jama iga accuáyta jém yomo, juuts nimpa jém Moisés inquímayooyi, jesic ininicyajpa Jerusalén jém xutu tsixi iga icwiñquejpa Dios iwiñjom. 23 Iwatyajpa jempic porque jayñetawum jém tanjatun Dios inquímayooyi iga: “Chí tanjatun Dios jém incoaponmanic, jém jaypic, iga tsíyíñ juuts jém tanjatun Dios imichi.” 24 Jesic ininicyajtim tum sacrificio iga ichiiba Dios juuts jayñetawum jém Dios inquímayooyi. Nimpa jém anquímayooyi: “Chí tanjatun Dios wisten cuucu o wisten mañpichona.”

25 Jesic jeetim tiempo it idic Jerusalén tum pixiñ iníyí Ximój. Tum wibic pixiñ. Tsam ijspa Dios. Tsam injócpa jém jama iga Dios iciacputpa jém nación de Israel. Jém Ximój tsam iniit jém Dios iAnama. 26 Jém Dios iAnama icjodóna jém Ximój iga antes que caaba jém widaya, iixpanam jém Cristo jém icutsatpáppic Dios. 27 Jém Dios iAnama ichi jixi jém Ximój iga tigíyíñ jém mijpic masticjom. Jesic jeeti rato núc jém José y Malía. Inimiñ masticjom jém xutu tsixi iga iwadáyíñ juuts nimpa jém wiñicpic anquímayooyi. 28 Jesic jém Ximój inuuspac jém tsixi, moj icujíp Dios. Nimpa jém Ximój:

29 Manjatun Dios, sip cupacneum juuts anjycámayñe wiñic.

Da anwadap caso siiga sip acaabam.

30 Sip ich ánixcuymi ánixñe jém Ciacpudoypáppic.

31 Sip moj inwat itumpiy jém pixiñtam iwiñjom icuwiti yíp naxyucmi.

32 Tsíy juuts tum jucti iga iyicquejpa jém tunjac pixiñtam jém dapic je de Israel.

Chiitaptim jém wibic juctiantsoca jém Israelpic pixiñtam jém michpic immichi, manjatun Dios.

33 Jesic jém iapa con jém José agui ipooñanjamyajpa iga inímáy jempic jém Ximój.

34 Jesic jém Ximój ichi ibendición. Inímáytim jém Malía:

—Dios tacutsadáy yíp tsixi. Tsam wiityajpa jém icupicyajpáppic. Pero jém dapic icupicyajpa tsam yaachwattap. Dios icutsat yíp tsixi juuts tum señal iga icjodónap jém Israelpic pixiñtam iga Dios taciacputtooba. Pero wati jém tantiwitam da icupicyajpa. Tsam imalmalnimayyajpa. 35 Jesic quejpa jém malopic jixi jém anécnewip jém pixiñtam ijixianjom. Mich, miMalía, tum mijpic anyaaqui injampa juuts tum espada icutsenaspaspa jém inánama.

36 Jesic ittim jem tum chomo. Dios inmatciwiñ jém yomo. Iníyí Ana. Jém ijatun iníyí Fanuel. Jém wiñicpic itummiyaj jém tribu de Aser. Tsam chomom. Jém yomo it idic con iwidaya siete amtiy dende ancoomyñe. Ocmi ca jém iwidaya. 37 Pecam cunoyane, núcneum ochenta y cuatro amtiy. Sip da putpa de jém mijpic masticjom. Iwatpa ayuno y oración. Icuyoaxap Dios tsuucim y siñi. 38 Jeeti rato núc jém chomo jut it jém tsixi.

Moj icujíp Dios iga wia miix jém tsixi. Ocmi inmadayyaj itumpiy jém pxiñtam iga nay jém tsixi jém Ciapudoypaap. Porque jáyan jém pxiñtam injócyajpa iga ciapputap jém atebet Jerusalén.

Setgacpa Nazaret jém José y Malía

³⁹ Cuando jém Malía y jém José yajum iwatyaj juuts nimpá jém Dios inquímayooyi, jesic setyaj iticmi jém atebet Nazaret jém naxyucmi de Galilea. ⁴⁰ Jesic mijap jém tsixi. Tsam iniit ipimi, wíap iwat jém iyoxacuy. Tsam jixíiy. Iniittim Dios itóyooyi.

Jém jaychixi it con jém maestroyaj jém mijpic masticjom

⁴¹ Cada amtíy nicyajpa jém Malía y José Jerusalén. Nicpa iwatyaj jém pascuasín. ⁴² Jesic cuando iniit doce iamtiy jém Jesús, nicpa síñajiyaj Jerusalén juuts icostumbreyaj. ⁴³ Cuando cuyajum jém síñ, setyajpam iticmi. Jém jaychixi Jesús tsíy Jerusalén. Jém iapa con jém José da ijodon iga jemigam tsíy jém imaníc. ⁴⁴ Jeeyaj injampa iga iwaganamiñpa jém iamigoyaj. Jesic moj seti. Witñeyajum tum jama. Jesic moj imétsyaj jém jaychixi jut it jém itiwitam con jém iamigoyaj. ⁴⁵ Pero da ipát, jesic eybic set Jerusalén iga icuámyajpa. ⁴⁶ Cuando nasum tucunajama, jesigam ipát jém Jesús jém mijpic masticjom. Jemum wagacoñyaj con jém maestroyaj de jém Israelpic anquímayooyi. Jém jaychixi imatonpa jém maestroyaj, icwácpatim jeeyaj. ⁴⁷ Itumpiy jém imatonneyajwíip agui ipooñanjamyajpa iga tsam jixíiy jém jaychixi iga tsam wíap icutson jém maestroyaj, acwágóypatim mex je. ⁴⁸ Jesic jém José con jém Malía tineanjac cuando iixyaj ti iwatpa jém jaychixi. Jém iapa inímáy jém Jesús:

—¿Mammaníc, tiiga anwadayta jempic? Jém injatun con aich agui manjís pa porque da mii. Tsam síp mancuámta.

⁴⁹ Jesic Jesús inímáy iapa:

—¿Tiiga ancuámta? ¿Que da injodon iga tienes que anwatpa juuts ixunpa anjatun Dios?

⁵⁰ Pero jém Malía con jém José da icutiyyiyaj ti inímáy jém Jesús.

⁵¹ Jesic setum iticmi Nazaret jém Jesús con jeeyaj. Seguido iwatpa juuts ipimiyajpa. Jém iapa tsam ijspa ianamanjom titam iwatpa jém Jesús. ⁵² Ocmi mijap jém Jesús, más jixíiyum. Dios tsam iwixpa. Iwixyajpatim itumpiy jém pxiñtam.

3

Najíyóypa titsinaxyucmi jém Xiwan jém acchinoypáppic (Mt. 3:1-12; Mr. 1:1-8; Jn. 1:19-28)

¹ Jesic capsum quince amtíy iga injacpa jém Romapic anjagooyi jém Tiberio César. Jesic jém Poncio Pilato injacpa jém naxyucmi de Judea como gobernador. Jém Herodes injacpa jém naxyucmi de Galilea. Jém Herodes itiwí jém Felipe injacpa jém Iturea y jém Traconite. Jém anjagooyi jém Lisnias injacpa jém naxyucmi Abilinia. ² It idic wisten jém cobacpic panij anjagooyi jém más mijpic. Tum jém Anás y tum jém Caifás.

Jesic jeetim tiempo it idic jém titsinaxyucmi jém Xiwan, jém Zacarías imaníc. Jemum chiitá jém Xiwan tanjatun Dios inmadayooyi. ³ Jesic nicpa najíyooyi icuwíti jém naxyucmi nocojom jém ni iníyi Jordán. Inímáy jém pxiñtam:

—Tsaci iga immalwatpa. Miñi manacchintámpa, jesic Dios miccáyáypa jém inñáñca.

⁴ Iwatpa jém Xiwan juuts ijaychacne librojom jém Isaías jém wiñicpic profeta. Nimpá: Tammatonpa tum najíyoypáppic jém titsinaxyucmi:

“Áñáyaayi jém tánQmi itun,
numtsagaytaami.”

⁵ Anꝑujnúctaami jém pacusyaj, tajquettaami jém cotsic y jém lumu iga nóñaiñ.

Númtsactaami jém tun jém wotnewiip,
anꝑujtaamitim jém tun icuaja.

⁶ Jesic cuando miñpa jém taCiacputpáppic,
itumpiy jém pìxiñtam iixyajpa jém icutsatnewiip Dios.

⁷ Jesic tsam jáyan pìxiñtam nic íamyaj jém Xiwan iga acchiniyajtaiñ. Pero jém Xiwan iñímáy:

—¿Michañtam, i micjodóna iga impóyaytámiñ jém tsam mijpic castigo jém icmiñpáppic jém tanjatun Dios? ⁸ Siiga numa iñchacneum jém immalajixi, jesic wati juuts ixunpa Dios. Jesic quejpa iga cacneum iñjixi. Odoy nimtaami iga: “Ich da amalo porque jém Abraham tsíy juuts ich anjatunwewe ijatun.” Odoy nimtaami jempic porque Dios wíap icset yíp tsa juuts jém Abraham imanictam. ⁹ Siip Dios itinquímtooba jém cuyyaj jém dapic tímá. Itinquímpa jém cuy, ocmi iñoquetpa.

¹⁰ Jesic jém pìxiñtam icwácayajpa jém Xiwan. Nimyajpa:

—¿Tí wíap anwatta iga anwattámpa juuts ixunpa Dios?

¹¹ Jém Xiwan iñímáy jeeyaj:

—Siiga iniit wisten iñyooti, jesic chi tum jém dapic yoodíy. Siiga iniit inwíccuy, jesic chi jém dapic ini i wíccuy.

¹² Jesic jém ichécyajpáppic impuesto miñyajtim iga acchiniyajtaiñ. Icwácpatim jém Xiwan, iñímáy:

—Maestro, ¿tí wíap anwatta?

¹³ Jém Xiwan iñímáy:

—Tseeci jém impuesto juuts nimpa jém anquímayooyi. Odoy tseeci más jáyan.

¹⁴ Miñyajtim algunos jém soldado iga icwácayajpa jém Xiwan. Nimyaj:

—¿Tí wíap anwatta aichtam?

Jém Xiwan iñímáy:

—Odoy tobaayi tum pìxiñ imichi pimimi. Odoy cumigooyi jém pìxiñtam iga iñtobáypa itumiñ. Maymáyaj con jém incoñwiyoooyi jutsan miyojpa jém gobierno.

¹⁵ Tsam wiñigam injócyajpa jém pìxiñtam iga miñpa jém Cristo jém icutsatnewiip Dios. Jesic moj ijsyay ijixianjom, ¿tananjam iga yíp Xiwan yíbam jém Cristo jém tacut-sadayñewiip Dios? ¹⁶ Pero jém Xiwan iñímáy jém pìxiñtam:

—Ich manacchintámpa con ni. Pero miñpa tunjac, je más pimi wíap que aich, da wíap annasca. Da wíap anꝑuwijáyáy jém icíac. Jém miñpáppic micchintámpa con Dios iAnama y con jucti. ¹⁷ Icipinpa jém pìxiñtam juuts tum pìxiñ icutippa jém trigo. Iccáypa jém trigo granerojom. Nooquettap jém trigo ipuchi juctjom jut da nunca píchpa.

¹⁸ Jesic jém Xiwan tsam wí najíyóypa. Seguido inquímpa jém pìxiñtam iga ichacyajiñ jém malopic jixi iga ipictsonyajiñ jém wibic anmati. ¹⁹ Jém Xiwan iwogáytim jém gobernador Herodes porque ipigáy jém ijáyuc jém Felipe iwichomo. Ininic iticcim. Iñiyi jém yomo Herodías. Wogayta jém Herodes porque tsam jáyan táñca iwat. ²⁰ Jesic tunjac más malopic cosa iwat. Ipimíy iga matstaiñ jém Xiwan, cottap cárcel.

Acchinta Jesús

(Mt. 3:13-17; Mr. 1:9-11)

²¹ Cuando acchiniyajta itumpiy jém pìxiñtam, acchintatim mex jém Jesús. Jeeti rato iganam inwejpátpa Dios, áñáy jém sin. ²² Quet Dios iAnama sinyucmi. Jém pìxiñtam iixyaj iga quet juuts tum cuucu, nummiñ, núc hasta jém Jesúsuyucmi. Imatonyaj tum jiyi sinyucmi. Nimayta Jesús:

—Mich mamManic, mantoypáppic. Agui amaymay con mimich.

Jém Jesús jém wiñicpic itúmmiyaj
(Mt. 1:1-17)

²³ Jém Jesús iniit treinta iamtíy cuando moj iwat jém iyoxacuy. Ijisyajpa idic jém p̄ixiñtam iga Jesús ijatun jém José. Jém ijatunwewe jém Helí. ²⁴ Jém Helí ijatun jém Matat. Jém Matat ijatun jém Leví. Jém Leví ijatun jém Melqui. Jém Melqui ijatun jém Jana. Jém Jana ijatun jém José. ²⁵ Jém José ijatun jém Matatías. Jém Matatías ijatun jém Amós. Jém Amós ijatun jém Nahum. Jém Nahum ijatun jém Esli. Jém Esli ijatun jém Nagai. ²⁶ Jém Nagai ijatun jém Maat. Jém Maat ijatun jém Matatías. Jém Matatías ijatun jém Semei. Jém Semei ijatun jém José. Jém José ijatun jém Judá. ²⁷ Jém Judá ijatun jém Joana. Jém Joana ijatun jém Resa. Jém Resa ijatun jém Zorobabel. Jém Zorobabel ijatun jém Salatiel. Jém Salatiel ijatun jém Neri. ²⁸ Jém Neri ijatun jém Melqui. Jém Melqui ijatun jém Adi. Jém Adi ijatun jém Cosam. Jém Cosam ijatun jém Elmodam. Jém Elmodam ijatun jém Er. ²⁹ Jém Er ijatun jém Josué. Jém Josué ijatun jém Eliezer. Jém Eliezer ijatun jém Jorim. Jém Jorim ijatun jém Matat. ³⁰ Jém Matat ijatun jém Leví. Jém Leví ijatun jém Simeón. Jém Simeón ijatun jém Judá. Jém Judá ijatun jém José. Jém José ijatun jém Jonán. Jém Jonán ijatun jém Eliaquim. ³¹ Jém Eliaquim ijatun jém Melea. Jém Melea ijatun jém Mainán. Jém Mainán ijatun jém Matata. Jém Matata ijatun jém Natán. ³² Jém Natán ijatun jém David. Jém David ijatun jém Isaí. Jém Isaí ijatun jém Obed. Jém Obed ijatun jém Booz. Jém Booz ijatun jém Salmón. Jém Salmón ijatun jém Naasón. ³³ Jém Naasón ijatun jém Aminadab. Jém Aminadab ijatun jém Aram. Jém Aram ijatun jém Esrom. Jém Esrom ijatun jém Fares. Jém Fares ijatun jém Judá. ³⁴ Jém Judá ijatun jém Jacob. Jém Jacob ijatun jém Isaac. Jém Isaac ijatun jém Abraham. Jém Abraham ijatun jém Taré. Jém Taré ijatun jém Nacor. ³⁵ Jém Nacor ijatun jém Serug. Jém Serug ijatun jém Ragau. Jém Ragau ijatun jém Peleg. Jém Peleg ijatun jém Heber. Jém Heber ijatun jém Sala. ³⁶ Jém Sala ijatun jém Cainán. Jém Cainán ijatun jém Arfaxad. Jém Arfaxad ijatun jém Sem. Jém Sem ijatun jém Noé. Jém Noé ijatun jém Lamec. ³⁷ Jém Lamec ijatun jém Matusalén. Jém Matusalén ijatun jém Enoc. Jém Enoc ijatun jém Jared. Jém Jared ijatun jém Mahalaleel. Jém Mahalaleel ijatun jém Cainán. ³⁸ Jém Cainán ijatun jém Enós. Jém Enós ijatun jém Set. Jém Set ijatun jém Adán. Jém Adán ijatun jém Dios.

4

Cutitsta jém Jesús
(Mt. 4:1-11; Mr. 1:12-13)

¹ Jesic Jesús tsam iniit jém Dios iAnama iganam setpa de jém río Jordán. Dios iAnama ininic Jesús jém titsinaxyucmi. ² Jemum nic ití cuarenta jama. Jém Wocciwiñ miñ icutits iga icmalwatpa idic. Cuarenta jama da wíc Jesús, jesic núc jém cuarenta jama, p̄imi yua.

³ Jesic jém Wocciwiñ iñímáy Jesús:

—Siiga numa Dios mimanic, acseti yíp tsa iga caxtánañi.

⁴ Jesic jém Jesús iñímáy jém Wocciwiñ:

—Nimpa jém Dios inmati, jém jayñetaw̄ip: “Da no más iga inçútpa caxtánañi miitpa. Tamatspacpatim itumpiy jém Dios inmati.”

⁵ Ocmi jém Wocciwiñ ininic jém Jesús tum m̄ipic cotsicyucmi. Tumti rato inquejáy itumpiy jém naxyucmiyaj icuw̄iti de jém mundo juť injacyajpa jém anjagooyiyaj. ⁶ Jesic jém Wocciwiñ iñímáy jém Jesús:

—Itumpiy yípyaj naxyucmiyaj ich amm̄chi. S̄ip manchiiba mich porque ich ac̄ijun̄codayñeta. I ansunpa iga anchiiba, w̄iap anchi. Jesic itumpiy jém p̄ixiñtam

micujípyajpa iga más mijpic minjagooyi. ⁷ Siiga mich ançosteeñáypa y anjísipa juuts ich adios, jesic immiichi itumpiy jém manañquejayñewiip.

⁸ Pero Jesús iñímáy:

—Nicsim, miWocciwiñ. Jayñeta_wum jém Dios in_mati: “W_i iga tanjísipa tanJatun Dios, je icutum tançuyoxap.”

⁹ Ocmi jém Wocciwiñ ininic jém Jesús Jerusalén. Iniquim jém mijpic mastic inçobac. Jém Wocciwiñ iñímáy Jesús:

—Siiga Dios mimanic, yóyanqueti hasta naxyucmi. ¹⁰ Porque jayñeta_wum jém Dios in_mati iga:

Dios icutsatpa jém sinyucmipic pixiñtam iga miwadiñ cuenta

¹¹ iga mimatstonpa icijom iga odoy coowaiñ impuy tsaayucmi.

¹² Pero Jesús iñímáy jém Wocciwiñ:

—Nimpatim jém Dios in_mati: “Odoy cutiitsi jém tanJatun Dios siiga numa wiap.”

¹³ Jesic jém Wocciwiñ yaj icutits jém Jesús iga icmalwatpa idic. Ipoychac hasta tunçac jama.

Mojpa iwat Jesús jém Dios iyoxacuy

(Mt. 4:12-17; Mr. 1:14-15)

¹⁴ Jesic set eybic Galilea jém Jesús. Tsam iniit jém Dios iAnama iga wiap iwat juuts ixunpa Dios. Wanpa icuwiti jém naxyucmi de Galilea iga setne jém Jesús. ¹⁵ Jesic cada tiganjoj jém Jesús nicpa accuyujooyi jém sinagoga, jém judíos imastic. Jeeyaj tsam icujípyajpa.

Nicpa Jesús Nazaret

(Mt. 13:53-58; Mr. 6:1-6)

¹⁶ Jesic tum jama núc Jesús jém atebet Nazaret jut mija. Jesic jém jejcuyjama, tigiy jém sinagoga juuts icostumbre. Teñchucum jém Jesús iga imaypa jém Dios in_mati jém jayñewiip. ¹⁷ Chiita Jesús jém libro, jém ijaychacnewiip jém profeta Isaías, iga imaypa. Jesic Jesús ináy jém libro, ipát jut jayñeta:

¹⁸ Tsam anaít jém Dios iAnama, achiiñeta iga anañmadáyiñ jém wibic an_mati jém yaachaneyajwiip.

Acutsatta iga anacpocsáyiñ ianama jém anyácneyajwiip.

Acutsatta iga anañmadáyiñ jém presoyaj iga cutsigayyajtap y jém cáchtiyaj iga acpisyajtap.

Acutsatta iga anaccutsigáypa jém pixiñtam jém tsampic malwadayñeyajta.

¹⁹ Acutsatta iga anañmatpa jém an_mati iga núcneum jém amtiy iga Dios iwíwadáypa jém pixiñtam.

²⁰ Jesic Jesús innúc jém libro, ichi jém maestro imozo. Jesic coññeactin jém Jesús. Itumpiy jém ityajwiip jém sinagoga agui íamyajpa. ²¹ Jesic Jesús moj inmadáy jém pixiñtam. Nimpa:

—Yíbam jama íñixtámpa iga cupacneum yíp an_mati jém jayñewiip.

²² Jesic itumpiy jém pixiñtam agui iwianjamyaj jém Jesús. Agui ipooñanjamyaj cuando imatonjaj jém wibic an_mati jém inmatnewiip Jesús. Jesic moj nanímayyajtaji:

—¿Que da yíbam jém José imaníc?

²³ Jesic Jesús iñímáy jém pixiñtam:

—Ich anjodon iga mimichtam síp annímáypa tum refran: “¿Michóyíyoypáppic tiiga da minitsóyiytap iñyaac?” Annímáy_tampatim iga: “Watí yim iñticmi jém wítampic cosa juutstim inwatne jém Capernaum.”

²⁴ Iñímáy_tim jeeyaj:

—Wipictson̄tap tum profeta tungac attebet, pero cuando nicpa najíyooyi iticmi, jesic jem itiwitam da iwipictson̄yajpa. ²⁵ Numa, mannímáypa iga wiñigam it idic jem naxyucmi de Israel tsam jáyan jem yomtam jem cunoytam cuando najíyóypa jem Dios inmatciwiñ jem Elías. Jeetim tiempo cuando da chijóy tuj tres año y seis meses. Jesic tigiy tum mijpic yuu itumpiy jem attebetay icuwiti jem naxyucmi. ²⁶ Pero Dios da icutsat jem Elías iga iyoxpádiñ jem Israelpic yomtam jem cunoytam. Dios icutsat jem Elías iga iyoxpádiñ jem tungac cunoya jem dapic je taich yomo. Jem yomo Sareptapic yomo de jem naxyucmi de Sidón. ²⁷ Ittim idic jem naxyucmi de Israel tsam jáyan pixiñtam jem cupúgayñewip iñaca cuando inmatpa jem wiñicpic anmatciwiñ jem Eliseo. Pero jem Eliseo da icpis ni tum de jeeyaj. Nada más icpis jem Naamán tum Siriapic pixiñ, da je taich pixiñ.

²⁸ Jesic tsam pimi jóyyaj itumpiy jem ityajwip jem sinagoga cuando imaton̄yaj ti nimpa jem Jesús. ²⁹ Tsucumyay jem pixiñtam, iquebacputyaj jem Jesús an̄sicmi de jem attebet, nanicta tum tejajyucmi jut watnet̄a jem attebet. Jemum icyágiyyajtooba idic jem Jesús. ³⁰ Pero widañnasp̄a Jesús jem pixiñtam an̄cucmi. Da i wiã miimats. Nic jem Jesús.

Tum mal espíritu imats tum pixiñ
(Mr. 1:21-28)

³¹ Jesic nic Jesús jem attebet Capernaum, jem naxyucmi de Galilea. Jemum cada jejcuyjama nicpa inquejáy jem Dios inmati jem pixiñtam. ³² Tsam ipooñanjamyajpa cuando imaton̄yajpa ti inquejáypa jem Jesús. Porque anmatpa juuts tum anjagooyi.

³³ Jesic jem sinagoga it tum pixiñ imatsne tum mal espíritu. Pimi anwejpa, nímayta Jesús:

³⁴ —Atsaci, miJesús miNazaretpic, ¿tiiga ammoogíypa? ¿Que miñpa anactogoyta? Mánixpicpa, anjodon̄ iga mich jem Yucmipic Dios miMíichi.

³⁵ Jesic Jesús iwogáy jem mal espíritu. Iñímáy:

—Odoy jiyi. Puti yip pixiñ ianamanjom.

Jesic jem mal espíritu iccutin̄ jem pixiñ naxyucmi jeeyaj iwiñjom. Put jem mal espíritu, da ti iwadáy. ³⁶ Itumpiy jem ityajwip agui anjécyaaj. Nanímayyajt̄ap entre jeeyaj:

—¿Tiapaap yip anmadayooyi? Yip pixiñ inmatpa juuts tum anjagooyi. Con ipimi wiap itop jem mal espíritu.

³⁷ Jesic wan̄pa jut quej icuwiti jem naxyucmi ti iwat jem Jesús.

Jesús icpis jem Peto im̄dapa
(Mt. 8:14-15; Mr. 1:29-31)

³⁸ Jesic put Jesús jem sinagoga. Nic jem Peto iticcim. Mimne actin̄ jem Peto im̄dapa. Tsam pimi jawañiy. Iacun̄csayyaj jem Jesús iga icpixiñ jem yomo. ³⁹ Jesic nocojom teñ jem Jesús jut wone jem yomo. Injijyac jem jawañ. Jem yomo ichac jem jawañ, jeeti rato tsucum, moj icwíc jem miññeyajwip.

Jesús icpis jáyan jem mimneyajwip
(Mt. 8:16-17; Mr. 1:32-34)

⁴⁰ Jesic cuando tigíyum jama, jem pixiñtam inimíñayyaj Jesús itumpiy jem mimneyajwip. Jesic Jesús ichiccunúgáy icobac cada tumtum. Jempigam icpisyaaj itumpiy. ⁴¹ Tobayyajt̄apim jem mal espíritu wati jem pixiñtam ianamanjom. Agui anwejpa cuando putyaj. Nímayta jem Jesús:

—Mich jem Dios miManic.

Pero Jesús iwogáy jem mal espíritu. Da ijicpa iga jiyipa porque jem mal espíritu ijodon̄ayaj iga je jem Cristo.

*Najíyóypa Jesús jém naxyucmi de Galilea
(Mr. 1:35-39)*

⁴² Jesic cuquejtooba, put Jesús jém attebet. Nic tum lugar jut da ti idíyíy. Pero jém p̄ixiñtam, jém ityajw̄ip jém attebet, tsam imétsyaj, icunúcyaj. Iacunucsayyaj iga tsíyíñ con jeeyaj.

⁴³ Pero Jesús iñímáy:

—Tienes que anañmadáypa jém tungac attebetyaj jém wibic aṇmaṭi jutpic injacpa Dios jém ityajw̄ip yíp naxyucmi. Jeeyucmi acutsat Dios.

⁴⁴ Jesic Jesús nicpa najíyooyi itumpiy jém sinagoga icuw̄iti jém naxyucmi de Galilea.

5

*Jém milagro cuando matsta jáyan jem t̄ipi
(Mt. 4:18-22; Mr. 1:16-20)*

¹ Jesic tum jama oy inmat Jesús jém Dios inmaṭi tum laguna aṇṇaca. Jém laguna iñiyi Genesaret. Tsam jáyan p̄ixiñtam y yomtam miñ imatonyaj hasta nacpitsiyyajtap. ² Jesic Jesús iix wisten barco playa aṇṇaca. Putneyaj iomi. Icheeyajpa jém ired niaṇṇaca. ³ Jesic núc Jesús jut it jém barco, quim barcoyucmi. Imiichi jém Peto. Jesic Jesús iñímáy iga icniñguiñ uxaj jojmi jém ibarco. Jesic coñ Jesús jém barcoyucmi. Moj inquejáy jém p̄ixiñtam jém Dios inmaṭi. ⁴ Cuando yajum najíyooyi, iñímáy jém Peto:

—Nan̄ici imbarco jut jojmi jém ni. Patscumi jém iñred niicim. Tammatspa t̄ipi.

⁵ Jém Peto iñímáy:

—MamMaestro, muma tsuu ayoxata, da ammatsta ni tum t̄ipi. Pero siiga mich miñimpa, aṇcotpa eybic jém anred.

⁶ Jesic mu icotum jém ired, imatsyaj tsam jáyan t̄ipi hasta jactip jém ired. ⁷ Jesic jém Peto iwadáy seña jém it̄iwitam jém ityajw̄ip jém tungac barcojom iga míñiñ iyoxpát. Jesic miñyaj, icucomyaj icuistic jém barco hasta cumon̄tooba. ⁸ Mu iix, jém Peto icosteeñáy jém Jesús ipuycim, iñímáy:

—Mán̄omi, acupóyaayi porque tsam atañcaíy.

⁹ Jém Peto con jém ityajw̄ip imbarcojom agui ámanjacyaj iga imatsyaj tsam jáyan jém t̄ipi.

¹⁰ Agui ámanjacyaj̄tim jém ityajw̄ip jém tungac barcojom, jém Jacobo con jém Xiwan, jém Zebedeo iman̄ictam. Jeeyaj iwaganayoxayajpa jém Peto. Jesic Jesús iñímáy jém Peto:

—Odoy c̄iñi, tsacim iga immatspa t̄ipi. Nicpa tamméts p̄ixiñ juuts t̄ipi iga icupicyajiñ jém Dios inmaṭi.

¹¹ Jesic ininicyaj ibarco niaṇṇaca. Ichacyaj itumpiy jém iniitw̄ip. Nic itún̄iyyaj jém Jesús.

*Jesús icpis tum p̄ixiñ jém cupúgayñew̄ip iñaca
(Mt. 8:1-4; Mr. 1:40-45)*

¹² Cuando it Jesús jém tungac attebet, ictsíy tum p̄ixiñ tsam cupúgayñe iñaca. Mu iix Jesús, jém p̄ixiñ icosteeñáy ipuycim. Iacunucsaypa iga icp̄ixiñ. Nímayta:

—Mán̄omi, siiga inw̄ianjam, acp̄isi.

¹³ Jesic Jesús ichiccunúc jém p̄ixiñ, iñímáy:

—Aṇw̄ianjam. Micuáyñeum.

Jesic jeeti rato ichacum jém p̄ixiñ ipuuca, w̄itsíyum. ¹⁴ Jesic Jesús iñímáy jém p̄ixiñ:

—Odoy i aṇmadaayi iga ich manacpis, pero niñi wiñquejaayi jém panij iga inquejáiñ iga numa mipisneum. Jesic ocmi ch̄i Dios tum ofrenda juuts n̄impa jém Moisés inquímayooyi iga miixtap iga numa mipisneum.

¹⁵ Pero jutquej wanpa iga acpisóypa jém Jesús. An̄tuumayajpa tsam jáyan̄ p̄ixiñtam iga imaton̄yajpa jém Jesús in̄madayooyi. Miñyay jém mimneyajw̄ip iga acpisyajt̄añ. ¹⁶ Pero put Jesús jém attebet, nic icutum jut da ti idīȳy iga in̄wejpát̄pa Dios.

Jesús icpis̄ tum̄ p̄ixiñ̄ tusacane icumuma
(Mt. 9:1-8; Mr. 2:1-12)

¹⁷ Jesic tum̄ jama cuando accuyujóypa Jesús, coñyajt̄im jem̄ jém fariseoyaj con jém maestroyaj de jém wiñ̄cpic̄ an̄químayooyi. Jeeyaj miñyay de itump̄iȳ jém tigan̄jojay de jém naxyucmi de Galilea y Judea. Miñyajt̄im de jém attebet Jerusalén. Jém Jesús tsam̄ iniit̄ jém Dios ip̄imi. Wiap̄ icpis̄ jém mimneyajw̄ip. ¹⁸ Jesic núcyaj jut̄en̄ jém p̄ixiñ̄, icópneyaj tseesyucmi tum̄ p̄ixiñ̄ tsam̄ mimne. Tusacane icumuma, da tsigóypa. Tigiytooba idic̄ jém ticjom̄ iga iámpa jém Jesús. ¹⁹ Pero da ipát̄yay jut̄ wiap̄ itigiȳ porque tsam̄ it̄ñ̄im̄. Jesic químyaj jém ticyucmi, ijetyaj jém tic̄ iñ̄ecxi. Ij̄im̄quetyaj tseesyucmi jém mimnew̄ip jém Jesús iwiñ̄jom̄ jém p̄ixiñ̄tam̄ an̄cucmi. ²⁰ Jesic cuando iix̄ Jesús iga tsam̄ icupicyajpa jeeyaj, iñ̄ímáy jém mimnew̄ip:

—Mip̄ixiñ̄, miwadayñ̄etā perdón̄ jém iñ̄t̄añca.

²¹ Jesic jém escribaspic̄ maestroyaj con jém fariseoyaj ij̄isyajpa ij̄ixian̄jom̄ iga: “¿Quē iapaap̄ ȳip̄ p̄ixiñ̄? S̄ip̄ icuj̄iȳ tan̄Dios. Porque Dios icutum̄ wiap̄ taccáyáy tant̄añca.”

²² Pero Jesús ij̄odon̄ ti s̄ip̄ ij̄isyaj ij̄ixian̄jom̄, jesic iñ̄ímáy jeeyaj:

—¿T̄iigā iñ̄j̄ist̄ampā jempic̄? ²³ ¿Jup̄ más̄ da t̄añca iga annímáȳpa ȳip̄ p̄ixiñ̄ iga: “Miwadayñ̄etā perdón̄ jém iñ̄t̄añca”, o iga annímáȳpa: “Tsucumi, w̄it̄im̄”? ²⁴ S̄ip̄ manañ̄quejáypa iga jém Miñ̄new̄ip̄ S̄inyucmī numā iniit̄ jém p̄imi iga wiap̄ iccáyáy jém p̄ixiñ̄tam̄ it̄añca ȳip̄ naxyucmi.

Jesic Jesús iñ̄ímáy jém p̄ixiñ̄ jém tusacanew̄ip̄:

—Mannímáȳpa, tsucumim̄, p̄in̄im̄ jém iñ̄chees, nicsim̄ iñ̄t̄ic̄im̄.

²⁵ Jesic iganam̄ iámyajpa jém it̄yajw̄ip̄, jeeti rato tsucum̄ jém p̄ixiñ̄. Ipin̄um̄ jém ichees jut̄ w̄onē idic̄. Nic̄ it̄icmī. Tsam̄ icuj̄ippa Dios. ²⁶ Itump̄iȳ jém p̄ixiñ̄tam̄ ipooñ̄anj̄amyaj. Icūj̄ipyajpat̄im̄ Dios. Tsam̄ c̄inyaj. Nanímayyajt̄ap̄:

—Ȳip̄ jamā t̄anix̄tā tum̄ cosā dapic̄ queman̄ oypa t̄anix̄.

Jesús in̄wejáȳ jém Leví
(Mt. 9:9-13; Mr. 2:13-17)

²⁷ Cuando cuyaj jém asunto, moj̄ n̄iqui jém Jesús. Iix̄ tum̄ p̄ixiñ̄ jém ichécpáppic̄ impuesto, iñ̄iyi Leví. Coñ̄ jut̄ ichécpa jém impuesto. Jesús iñ̄ímáy jém p̄ixiñ̄:

—Atún̄iyi.

²⁸ Jesic tsucum̄ jém p̄ixiñ̄, ichac̄ jém iyoxacuy, nic̄ itún̄ȳy jém Jesús.

²⁹ Jesic ocmī jém Leví inis̄in̄ap̄ jém Jesús it̄ic̄im̄. Tum̄ mij̄pic̄ s̄in̄ iwat. An̄wejayyajt̄a tsam̄ jáyan̄ jém ichécyajpáppic̄ impuesto con tunḡac más̄ jém p̄ixiñ̄tam̄. Iwaganaw̄icyajpa jém Jesús mesac̄im̄. ³⁰ Jesic jém fariseoyaj con jém maestroyaj de jém fariseo in̄químayooyi moj̄ in̄wejcayaj jém Jesús icuyujc̄iwiñ̄. Nímayyajt̄ap̄:

—¿T̄iigā miwagaw̄ict̄ampā y miwagan̄ict̄ampā con jém ichécyajpáppic̄ impuesto y con jém tunḡac t̄añcaiyw̄ip̄?

³¹ Jesic Jesús iñ̄ímáy jém fariseoyaj:

—Jém dapic̄ mimne da ixunpa jém tsóȳyoȳpaap. Pero jém mimneyajw̄ip̄ ixunpa jém tsóȳyoȳpaap. ³² Ich̄ da amiñ̄ iga anañ̄wejáypa jém dapic̄ t̄añcaiȳ. Amiñ̄ iga anañ̄wejáypa jém t̄añcaiyw̄ip̄ iga ichacyaj̄iñ̄ jém it̄añca.

*Acwácta Jesús tiiga da iwatyajpa ayuno jém icuyujc#wiñ
(Mt. 9:14-17; Mr. 2:18-22)*

³³ Jesic jém miññeyajw#ip icwácyaj jém Jesús. Nímayta:

—¿Tiiga jém Xiwan icuyujc#wiñ con jém fariseoyaj siempre iwatyajpa ayuno, iwatyajpa jém oración? Pero mich jém inçuyujc#wiñ siempre wícyajpa, nícyajpa, da iwatyajpa ayuno.

³⁴ Jesic Jesús iñímáy jeeyaj:

—Siempre wícyajpa jut añcoomíoyñ#mpa. Da i iwatpa ayuno cuando it jém yoomiypaap. ³⁵ Pero núcpa jama cuando da i jém yoomiypaap. Jesic numa iwatyajpa ayuno.

³⁶ Jesic Jesús inmadayaj jém p#ixiñtam tum xutu cuento. Inquejáypa jém p#ixiñtam iga jém jomipic jixi jém inimiññew#ip Jesús da iw#inanigáypa jém wiñ#cpic jixi. Nimpa Jesús:

—Da i ijacpa tum jomyooti iga intótspa tum pecapic yooti. Siiga iwatpa jempic, misap jém jomyooti. Jém jomipic puctucu datim iw#inacuti#pa jém pecapic. ³⁷ Da i icotpa jomvino jém pecapic cuerobolsajom. Porque siiga iwatpa jempic, jesic p#ipa jém jomvino, tojansajpa jém pecapic cuerobolsa. Tegáypa jém vino. Togoypa jém cuerobolsa.

³⁸ Jeeyucmi cottap jém jomvino jém jomipic cuerobolsajom. ³⁹ Numa, jém iucpápic jém pecapic vino da iuctooba jém jomvino porque nimpa iga: “W#i jém pecapic.”

6

*Jesús icuyujc#wiñ itúcyaj trigo jém jejcuyjama
(Mt. 12:1-8; Mr. 2:23-28)*

¹ Tum jejcuyjama wida#naspa Jesús jut #ipneta jém trigo. Jém icuyujc#wiñ ij#udayyajpa jém trigo ipac, icútyajpa. ² Jesic algunos jém fariseoyaj iwogayyaj jém Jesús icuyujc#wiñ. Nímayta:

—¿Tiiga in#wattámpa contra jém tana#químayooyi jém jejcuyjama?

³ Jesic Jesús iñímáy jém fariseoyaj:

—¿Que da queman immay ti iwat jém David cuando tsam yuayajpa con jém icompañeroyaj? ⁴ Tigiy David jém Dios it#icjom. Ip#ic jém caxtána#ni jém tsacnetaw#ip altaryucmi. Icut jém David, ichiitim jém icompañeroyaj. Tanjodon iga jém tana#químayooyi nimpa iga nada más jém panij w#iap icút jém caxtána#ni jém tsacnetaw#ip altaryucmi.

⁵ Jesic ocmi jém Jesús iñímáy jém fariseoyaj:

—Jém Miññew#ip Si#nyucmi im#chitim jém jejcuyjama, w#iap iñímáy jém p#ixiñtam ti w#iap iwatyaj jém jejcuyjama.

*Pis jém p#ixiñ jém titsnew#ip ici
(Mt. 12:9-14; Mr. 3:1-6)*

⁶ Jesic tungagam jejcuyjama nic Jesús jém sinagoga. Moj inquejáy jém p#ixiñtam. Iitim jem tum p#ixiñ mimne. Titsne jém in#w#ici. ⁷ Jesic jém escribaspic maestroyaj con jém fariseoyaj icuixyajpa jém Jesús siiga numa acp#isóypa jém jejcuyjama. Imétsyajpa jut#pic iquejajwadayyajpa jém Jesús. ⁸ Pero Jesús ijodon ti s#ip ij#isyaj. Iñímáy jém p#ixiñ jém titsnew#ip ici:

—Teñchucumi, mi#ni mite#ni y#ip p#ixiñtam añ#cucmi.

Jesic tsucum, nic te#ni. ⁹ Jesic Jesús iñímáy jém p#ixiñtam jém ityajw#ip jem:

—Si#ip manacwáctámpa: ¿Ti w#iap ta#wat jém jejcuyjama? ¿Ta#w#iwatpa o tammalwatpa? ¿W#i iga ta#nci#cpudáypa tum p#ixiñ ivida o tanaccáyaypa?

¹⁰ Jesic Jesús icuáms#et jém p#ixiñtam icuwoyo, iñímáy jém p#ixiñ jém titsnew#ip ici:

—i#imi in#ci!

Jempam iwat jém p̄ixiñ, w̄itsiyum ici. ¹¹ Jesic tsam p̄imi jóyyaj jém fariseoyaj. Moj nacwácyajtaji entre jeeyaj ti w̄iap iwadayyaj jém Jesús.

Jesús icupin jém doce icuyujc̄wiñ

(Mt. 10:1-4; Mr. 3:13-19)

¹² Jesic tum jama nic Jesús tum cotsicyucmi. Nic inwejpát Dios muma tsuu. ¹³ Icuquejama inwejáy jém icuyujc̄wiñ. Icupin doce de jeeyaj, iccám juuts “apóstolyaj”. Taich tanañmat̄imi nimtooba jém cutsatnetaw̄ip. ¹⁴ Icupin jém Ximój, Jesús icagáy in̄iyi, icámáy iga Peto; jém Anti, je jém Ximój it̄iw̄i; jém Jacobo; jém Xiwan; jém Felipe; jém Bartolo; ¹⁵ jém Mateo; jém Tomax; jém Jacobo, je jém Alfeo iman̄ic; jém tungac Ximój, jém in̄iyit̄im jém Zelote; ¹⁶ jém Judas, je jém Jacobo it̄iw̄i; y jém Judas Iscariote jém ic̄ijun̄cotw̄ip jém Jesús.

Accuyujóypa Jesús jém w̄it̄ipic nonjom

(Mt. 4:23-25)

¹⁷ Jesic quet Jesús jém cotsicyucmi con icuyujc̄wiñ. Nic accuyujooyi tum w̄it̄ipic nonjom. An̄tuumayaj tsam jáyan jém p̄ixiñtam. Miñyay icuw̄iti jém naxyucmi de Judea, jém Jerusalén y jém lamar an̄naca jut it̄im jém atebet Tiro y Sidón. Miññeyaj jem iga imaton̄yajpa jém Jesús in̄químayooyi, iga acp̄isyajt̄añ jém mimneyajw̄ip. ¹⁸ P̄isyajtim jém tsampic iyaachwat̄yaj jém mal espíritu. ¹⁹ Jém p̄ixiñtam tsam icunúcyajpa Jesús iga ich̄icpa porque tsam putpa jém ip̄imi iga icp̄ispa it̄ump̄iy.

Maymáyaataami porque mich̄iy juuts Dios miman̄ictam

(Mt. 5:1-12)

²⁰ Jesic jém Jesús iámmats jém icuyujc̄wiñ. In̄ímáy:
—Maymáyaataami siiga s̄ip tsam miyaachap porque mit̄igiyñeta con Dios, s̄ip minjactámpa mimichtam.

²¹ ‘Maymáyaataami siiga s̄ip miyuatámpa porque ocm̄im custámpa miwiiquitam.

‘Maymáyaataami siiga s̄ip miwejtámpa porque ocm̄i mixictámpa.

²² ‘Maymáyaataami siiga s̄ip mijóyixtamtap, miquebacputtamtap, mimaln̄imaytamtap y da i miw̄ixtamta. P̄imi mimalwadaytamtap porque mimichtam an̄cupictámpa aich jém aMiññew̄ip S̄inyucmi. ²³ Maymáyaataami cuando núcpa jém jama, miyóypa juuts tum ts̄ixi, porque in̄jodon̄ iga Dios michiiba jáyan jém w̄itampic cosa s̄inyucmi. J̄isi iga jém wiñ̄icpic p̄ixiñtam imalwadáȳtim jém wiñ̄icpic Dios in̄matc̄wiñ.

²⁴ ‘Agui miuuguytim jém ricopic mip̄ixiñtam porque s̄ip mimaymáyatámpa, pero ocm̄i da ti michiiba Dios.

²⁵ ‘Agui miuuguytim siiga s̄ip cuspa miwiiqui. Ocm̄i miyuatámpa.

‘Agui miuuguytim siiga tsam mixictámpa s̄ip porque ocm̄i minyáctámpa, miwejtámpa.

²⁶ ‘Agui miuuguytim siiga it̄ump̄iy jém p̄ixiñtam micujiptámpa s̄ip, porque jém wiñ̄icpic p̄ixiñtam icuj̄ipyajtim jém malopic an̄matc̄wiñ jém migoyyajp̄appic.

W̄i iga tantóȳiñ jém tánenemigoyaj

(Mt. 5:38-48; 7:12)

²⁷ Jesic Jesús in̄ímáȳtim jém p̄ixiñtam:

—Pero s̄ip man̄imaytámpa mimichtam iga toȳi jém in̄enemigoyaj. W̄iwadaayi jém mijóyixyajp̄appic. ²⁸ An̄wejpaati Dios iga iw̄iwadáȳiñ jém mimaln̄imayp̄appic y jém mimalwadayp̄appic. ²⁹ Siiga i micótsáypa tum in̄acpac, j̄igaayi iga micótsáȳiñ̄tim tungac lado, odoy cian̄seedaayi. Siiga i mitobáyáypa jém in̄chamarra, j̄igaayi iga mitobáyáyiñ̄tim mex jém in̄yooti. ³⁰ Siiga i miwágáypa tum cosa, ch̄i. Siiga i mitobáyáypa tum cosa jém imm̄ichipic, odom wágaayi iga micseedáȳiñ. ³¹ W̄iwadaayi jém tungac juutstim mich in̄xunpa iga miw̄iwadayt̄añ.

³² Siiga no más iñtoypa jém mitoypáppic, odoy jisi iga micujíptap. Porque jém malopic pixiñtam itoypatim jém iamigoyaj. ³³ Siiga inwawadáypa no más jém miwawadaypáppic da micujíptap porque jém malopic pixiñtam iwawadáypatim jém iwawadaypáppic. ³⁴ Siiga inicnucspa tumiñ no más jém pixiñ jém wapaap micseedáy jém iñtumiñ, jesic da micujíptap. Porque jém malopic pixiñtam icnucspatim tumiñ jém iamigoyaj jém wapaap icseedayyaj. ³⁵ Pero mannímaytámpa: Toytaami jém mijóyixpáppic. Wawadaytaami jém mimalwadaypáppic. Siiga miñucsáypa tumiñ, chítim. Odoy wadaayi caso siiga da wap micseedáy jém iñtumiñ. Siiga inwatpa jempic, Dios miwiyojpa. Quejpa iga Dios mimanictam. Porque Dios iyaachanjampatim jém malopic y jém táncaiywip. ³⁶ Yaachanjamtaami itumpiy jém pixiñtam juutstim tanjatun Dios miyaachanjamtámpa mimichtam.

Odoy tanjixiñ tum tantíwi iga táncaiy
(Mt. 7:1-5)

³⁷ Odoy jisi tum iñtíwi iga táncaiy, jesic Dios datim mijisáypa mich iñtánca. Siiga tum pixiñ mimalwadáypa, odoy tseeci, jesic Dios da michégáypa mich iñtánca. ³⁸ Siiga j miwágáy alguna cosa, siiga wí iñanama, chí jém dapic ini, jesic Dios jeetim quípsi mipigáypa iga micseedáypa mimich.

³⁹ Jesic Jesús inmadáypa jém pixiñtam yíp xutu cuento:

—Tum cáchtipic pixiñ da wap iniwit tungac cáhti porque tsutyajpa icuisticayaj jém pacusjom. ⁴⁰ Tum cuyujciwiñ da wap iñasca jém imaestro, cuando yajum cuyuji da ictsiypa jém imaestro.

⁴¹ Tiiga iñnímaypa jém iñtíwi iga táncaiy siiga da jutsan jém itánca juuts tum xutu puchi iniit iixcom. Pero mich tsam jáyan tánca iniit jex juuts tum mijpic cuy iniit iñixcom. ⁴² Siiga da iñjampa jém cuy jém iniitwip iñixcom, tiiga iñjisa iga wap iñtóbáy jém puchi jém iñtíwi iixcom. Minimigóyaytap iñyaac. Wiñti topi jém cuy jém michpic iniit iñixcom, jesic ocmi wap iñtóbáy jém puchi jém iñtíwi iixcom.

Cuando tímup tum cuy, jesic tánixpicpa
(Mt. 7:17-20; 12:34-35)

⁴³ Jém wibic cuy da wap iwat jém malopic itim. Jém malopic cuy da wap iwat jém wibic itim. ⁴⁴ Cada cuy tánixpicpa con itim. Da tantúcpa tum tsuj jém apífcuyucmi. Da tantúcpa uvas jém chicxchayucmi. ⁴⁵ Tum wibic pixiñ iwatpa wibic cosa porque iniit jém wibic jixi ianamanjom. Jém malopic pixiñ iwatpa jém cosa dapic wítam porque iniit jém malopic jixi ianamanjom. Jém anmati jém putpáppic tanjpjom tsucum jém tánanamanjom. Siiga tum pixiñ inmatpa wibic cosa, jesic quejpa iga da malo. Pero siiga inmatpa tum cosa dapic wí, jesic quejpa iga malo.

Jém wisten jém ticwatpáppic
(Mt. 7:24-27)

⁴⁶ Jesic Jesús iñímáytim jém pixiñtam:

—¿Tiiga miñímtámpa iga, “Mánomi, mánomi”, pero da inwattámpa juuts mannímaypa? ⁴⁷ Wí iga miñpa immaton ich ananmati y iga inwadiñ juuts mannímaypa. Sip mananquejáypa juutspic mipixiñ siiga inwatpa juuts mannímaypa. ⁴⁸ Mijex juuts tum pixiñ wapaap iticwat. Wiñti iwítajcúmpa jojmi iga icpimup jém tic tsaayucmi. Jesic ocmi cuando compa jém ni, pimi ictsiy jém nícoma jém tic. Pero da wap ictsigóy ni imiswatpa porque acpimaneta tsaayucmi. ⁴⁹ Siiga tum pixiñ imatonpa ich ananmati, pero da icupicpa, jesic jém pixiñ jex juuts tum pixiñ jém dapic wap iticwat. Jém pixiñ da

iwitajcúm jojmí iga icpimáap jém tic jém tsaayucmí. Naxyucmí no más icpimáne. Jesic ocmí com jém ní, pími ictsíy jém níicoma jém tic, jeeti rato cutiñ, da ti tsíy.

7

Jesús icpís jém Romapic capitán imozo (Mt. 8:5-13)

¹ Jesic yaj inmadáy Jesús jém píxiñtam, nic Capernaum. ² It idic jem tum jém Romapic capitán. Iniit idic tum imozo jém tsampic itoypa. Pero ocmí mimneactiñ jém imozo. Tsam pími mimne. Caatoobam. ³ Jesic cuando jém capitán ijodóna iga jém Jesús wíap icpísóy, icutsadáy jutén jém Israelpic wídaytam iga icunucsáypa jém Jesús iga míñiñ icpís jém imozo.

⁴ Jesic jém wídaytam nic íám jém Jesús. Iacunucsáy, iñímáy:

—Awadaayi tum favor, jém capitán tum wíbic píxiñ, yoxpaati. ⁵ Porque tsam itoypa jém tannación. Tawadáytim tum jém tammastic jém sinagoga.

⁶ Jesic jém wídaytam iwagananicaypa jém Jesús. Iganam núcyajpa nocojom jém capitán iticcim, jém capitán icutsadáy anmati jém Jesús con tungac iamigoyaj. Iñimayyaj:

—Jém capitán miñímáy iga: “Mánomi, da más mañcobacpijpa. Da wí iga miñúcpa anticcim porque mich wíbic mipíxiñ, ich tsam atañcaíy.” ⁷ Jeeyucmí ich da nic mamméts anyaac. Siip no más nímaayi jém caacuy iga ichaguiñ jém ammozo, tienes que píspa. ⁸ Porque ich anaittim tum ananjagooyi iga apimíyapa. Ich anaittim soldado jém ampimíyapaap. Siiga annímáypa jém ansoldado iga niguiñ, jesic tienes que nicpa. Siiga annímáypa jém ansoldado iga míñiñ, jesic tienes que miñpa. Siiga annímáypa jém ammozo iga iwadiñ tum cosa, jesic tienes que iwatpa.

⁹ Jesic miimaton jém Jesús junimpa jém capitán, ipooñanjampa. Íamseedáy jém píxiñtam jém miñyajpáppic ituuñiañcim. Iñímáy:

—Numa, mannímáypa, da ampátne ní tum píxiñ icuwíti yíp Israel iga icupicpa Dios juuts yíp capitán.

¹⁰ Jesic jém capitán iamigoyaj setyajum iticcim. Iixyajum iga písnem jém capitán imozo.

Jesús icpís tum caanewip, jém cunoya imanic

¹¹ Jesic jém tungac jama nic Jesús tum attebet iñiyi Naín. Waganicyajpa con wati jém icuyujcwiñ. Nicyajpatim jáyañ jém píxiñtam. ¹² Iganam núcyajpa jém attebet anñaca, iix iga nanictap tum tsúts. Jém caanewip tum cunoya ijaymanic. Jém yomo da iniñ tungac imanic. Icutum tsíy. Jáyañ jém píxiñtam iwagananicaypa jém cunoya. ¹³ Mu iix jém tánomi, iyaachanjampa jém yomo. Iñímáy:

—Odoy weji.

¹⁴ Jesic Jesús icunúc nocojom jém tsúts, ichigáy icaja. Jém icópneyajwíip teeñanjacyaj. Jesic Jesús iñímáy jém caanewip:

—¡Miwoñjaychixi, mannímáypa, tsucumí!

¹⁵ Jesic jém caanewip idic coñchucum. Mojum jiyi. Jesic Jesús icijunçodáy iapa. ¹⁶ Mu iixyaj, pími cñyaj itumpiy jém ityajwíip jem. Moj icujípyaj Dios. Nímyajpa:

—Tawiñquejayñe tum mijpic profeta.

Nímyajpatim:

—Dios tsam tayaachanjampa, jeeyucmí tacutsadayñe yíp píxiñ iga tayoxpáttamiñ.

¹⁷ Jesic ocmí jodónata ti iwat jém Jesús icuwíti jém naxyucmí de Judea con jém tungac naxyucmí jém nocojompic.

*Jém Xiwan icutsat icuyujc̄wiñ iga icwácyajñ jém Jesús
(Mt. 11:2-19)*

¹⁸ Ocmi acjodónat̄atim jém Xiwan jém acchíñoypaap ti iwat jém Jesús. Jém Xiwan icuyujc̄wiñ inmadáy. Jesic ocmi inwejáy wisten de jeeyaj. ¹⁹ Icutsat iga niguiñ icwácyaj jém Jesús. Nímayta jém icuyujc̄wiñ:

—Nigi acwaaci jém Jesús iga: “¿Que micham miCristo jém micutsatnew̄ip Dios o ananjóctampa tungac?”

²⁰ Jesic ocmi jém Xiwan icuyujc̄wiñ ipát jém Jesús. Inímayyaj:

—Jém Xiwan, jém acchíñoypáppic, acutsatta iga manacwáguiñ siiga micham miCristo jém micutsatnew̄ip Dios o ananjóctampa tungac.

²¹ Jesic jeetim hora cuando núcyaj jém Xiwan icuyujc̄wiñ, jém Jesús icp̄ispa jáyan jém p̄ixiñtam jém iniitw̄ip caacuy, jém mimneyajw̄ip y jém imatsnew̄ip jém mal espíritu. Icp̄istim jáyan jém cácht̄iyaj. ²² Jesic Jesús inímay jém Xiwan icuyujc̄wiñ:

—Nigi nímaayi jém Xiwan ti iníxñeta y ti immaton̄eta. Anmadaytaami iga ixixóypam jém cácht̄i, witpam jém cuxujpic idic, pisneum jém cupúgayñew̄ip idic in̄aca, matónóypam jém chajca, pisneum jém caaneyajw̄ip idic y jém yaachayajpaap ipictson̄yaj jém wibic an̄mat̄i iga Dios iciacputpa. ²³ Agui maymay jém p̄ixiñ jém dapic ijícpa iga i ictsacpa ich an̄mat̄i.

²⁴ Jesic nicyajum jém Xiwan icuyujc̄wiñ. Moj inmadáy Jesús jém p̄ixiñtam iga jém Xiwan tum Dios inmat̄c̄wiñ. Nimpa:

—¿Ti oy in̄amta jém titsinaxyucmi? ¿Que oy in̄amta tum p̄ixiñ dapic w̄iap juuts tum poc jém aguipic ictsigóypa sawa? Da je. Oy in̄amta tum p̄ixiñ w̄iapaap. ²⁵ ¿Que oy in̄amta jém p̄ixiñ agui w̄icuyajne? Da je. Tanjodon̄ iga jém w̄icuyajnew̄ip it̄yaj jém rey it̄ccim. ²⁶ ¿Que ti oy in̄amta jém titsinaxyucmi? ¿Que oy in̄amta tum nunta profeta? Numa tum profeta más w̄iap que itump̄iy jém wiñicpic Dios inmat̄c̄wiñ. ²⁷ Nimpa jém Dios inmat̄i ti iwatpa jém Xiwan:

Dios icutsatpa tum anmat̄c̄wiñ iga iw̄itsagáypa jém Cristo itun̄.

Jém anmat̄c̄wiñ anjagoyñeeba in̄ic.

Ocmi ituuñian̄c̄im miñpa jém Cristo.

²⁸ Jesic Jesús inímaytim jém p̄ixiñtam:

—Numa mannímáypa iga icuw̄iti ȳip naxyucmi da i tungac más wibic profeta que jém Xiwan jém acchíñoypaap. Pero cuando núcpa jém tiempo iga injacpa Dios, jém más xutupic más w̄iap que jém Xiwan.

²⁹ Mu imaton̄yaj ti nimpa jém Jesús, jesic itump̄iy jém p̄ixiñtam agui maymáypaj. Agui maymáypajpatim jém ichécyajpáppic jém impuesto. Nimyajpa:

—Agui w̄i tanDios iga tanquejáypa ȳip numapic an̄mat̄i.

Porque casi itump̄iy jém p̄ixiñtam oy icchin̄yajta jut̄ acchíñoypa jém Xiwan. ³⁰ Pero jém fariseoyaj con jém maestroyaj de jém Israelpic anquímayooyi da icupicyajpa jém Dios inmat̄i jém inimiññew̄ip jém Xiwan. Dios iw̄iwadaytooba idic, pero jeeyaj da iw̄ian̄jamyaj. Jeeyucmi jém fariseoyaj da ijícpa iga icchin̄yajpa jém Xiwan. ³¹ Jesic tán̄omi Jesús inímay jém antuum̄aneyajw̄ip:

—Jém p̄ixiñtam jém ityajw̄ip sip̄ ³² jex juuts jém tsixtam jém m̄ichyajpáppic plaza. Inímayyajpa jém iamigoyaj iga: “Mansusáypa jém flauta, pero da mietstampa. Ocmi manwánáypa jém wañi jém anyácnew̄ip, pero datim miwejtampa.” ³³ Porque cuando miñ jém Xiwan jém acchíñoypáppic, da icútpa caxtánañi, da iucpa vino; miñimtampa iga jém Xiwan iniit tum mal espíritu. ³⁴ Ocmi ich anyaac amiñ sin̄yucmi. Awícpa y anícpa, pero michtam miñimtampa iga tsam awícpa y tsam ánucca vino. Miñimtampatim iga ich

aṇcompañero jém ichécyajpáppic jém impuesto y jém táŋcaiywɨp. ³⁵ Quejpa iga wɨ jém jixi siiga wɨputpa jém yoxacuy.

Oy joyi Jesús tum fariseopic pɨxiñ iticcim

³⁶ Tum fariseo inwejay Jesús iga niguiñ wiiqui. Jesic nic jém Jesús, tigiy iticjom, coñ jém mesacim. ³⁷ Ittim jém attebet tum yomo witwidoypáppic idic. Jesic jém yomo ijodon iga nic wiiqui jém Jesús jém fariseopic iticcim. Nictim mex jém yomo. Ininic tum wibic tsaafiasco comne de pomada cɨnpáppic. ³⁸ Jesic jém yomo icunuc jém Jesús. Icɨsteeñay ipuycim. Wejpa jém yomo. Icheáya jém Jesús ipuy con iixcañi. Ocmi jém yomo icujicháyáya jém ipuy con jém iway. Innacatsútsáya ipuy. Ocmi icámáy jém pomada jém Jesús ipuyyucmi. ³⁹ Jesic jém fariseo, jém inwejayñewɨp Jesús, iix ti iwatpa jém yomo. Jém pɨxiñ ijispa ijixianjom. Nimpa iga: “Siiga numa yíp pɨxiñ tum profeta, ¿tiiga da icutiyyáya iga yíp yomo tsam táŋcaiy? Porque yíp yomo tum witwidoypáppic.” ⁴⁰ Jesic Jesús iñímáy jém fariseopic pɨxiñ:

—MiXimoy, mannímáytooba tum aṇmaṭi:

Jesic jém pɨxiñ iñímáy jém Jesús:

—Maestro, anímaayi.

⁴¹ Jesic nimpa Jesús:

—It idic wisten pɨxiñ. Oy icacyaj tumiñ. Tum icac quinientos tumiñ de plata, tum icac cincuenta tumiñ de plata. ⁴² Ocmi icuistic da wɨap icsetyay jém tumiñ. Jesic jém ichiiñewɨp jém tumiñ iwadáya perdón icuistic. Dam ichécpa jém pɨxiñ. Sɨp, miXimoy, ¿anímaayi juppíc más itoypa jém ichiiñewɨp jém tumiñ?

⁴³ Jesic jém Ximoy icutson. Nímáyta Jesús:

—Jém más jáyaṇpic icacne jém tumiñ.

Jesús iñímáy jém Ximoy:

—Numa, aṇwɨcutson.

⁴⁴ Jesic Jesús iámseedáy jém yomo jut sɨp icheáy jém ipuy, iñímáy jém Ximoy:

—Aami yíp yomo ti sɨp iwat. Cuando atigiy iñticjom mich da anchi ni iga antseeba ampuy. Pero yíp yomo atseáya ampuy con iixcañi. Acujicháyáya ampuy con iway.

⁴⁵ Mich da anañnacatsútsa, pero yíp yomo tsam aṇnacatsútsáya ampuy. ⁴⁶ Mich da anaccámáy aceite aṇcobacyucmi, pero yíp yomo acámáy tum frasco jém pomada jém cɨnpáppic ampuyyucmi. ⁴⁷ Jesic mannímáypa iga Dios iccáyáy yíp yomo itáŋca tsam jáyaṇ. Jeeyucmi tsam pimi itoypa Dios. Pero siiga Dios iccáyáya tum pɨxiñ itáŋca dapic jutsaṇ, jesic jém pɨxiñ uxantim itoypa Dios.

⁴⁸ Jesic Jesús iñímáy jém yomo:

—Miccáyayta jém iñtáŋca.

⁴⁹ Jesic jém ityajwɨp jém mesacim con Jesús moj nanímáyajtaji entre jeeyaj:

—¿Iapaap yíp pɨxiñ iga wɨap iccáyáy jém yomo itáŋca?

⁵⁰ Pero jém Jesús iñímáy jém yomo:

—Incupicne Dios jeeyucmi micɨputneum. Chogoyñicsim.

8

Jém yomtam jém iyoxpáyaajpáppic Jesús

¹ Ocmi Jesús oy joyi waṭi jém attebet y jém tiganjoj. Oy najíyooyi. Inmatpa jém wibic aṇmaṭi jutpic Dios injacpa yíp naxyucmi. Itúñiyyaj jém doce icuyujcɨwiñ.

² Iwagananicyajpatim jém yomtam jém mimneyajwɨp idic con jém iniitwɨp idic jém mal espíritu. Jesús icpis jém yomtam. Tum de jeeyaj jém Malía, iñiyitim Magdalena, tobayta

siete jém mal espíritu. ³ Ittim jém Xiwana, jém iwídaya iñiyi Chuzo. Jém p̄ixiñ icuyoxap jém gobernador Herodes. Ittim jém Susana. Yípyaj con wāti más jém yomtam icwícyajpa jém Jesús con icuyujc̄wiñ, ichiiyajpa titam iniityaj.

Dios in̄mati jex juuts jém pac jém tanyin̄páppic
(Mt. 13:1-9; Mr. 4:1-9)

⁴ Tum jama an̄tuumayajpa tsam jáyan̄ p̄ixiñtam. Putyaj de wāti jém attebetyaj. Miñ íamyaj jém Jesús. Jesic Jesús in̄madáy tum xutu cuento iga in̄quejáypa jém an̄tuumaneyajw̄ip. Iñímáy:

⁵ —It idic tum p̄ixiñ. Nic ñipi. Nic iyin̄ jém pac icam̄jom. Jesic mu iyin̄ jém pac, actin̄ uxan̄ tun̄jom jém cam̄naca. Jém nasyajpaap icunepnepquetyaj. Jém jon icútquetyaj. ⁶ Actin̄tim uxan̄ jém pac jém tsaan̄jom. Mu iñay, jobittim tits porque da mujajom. ⁷ Actin̄tim uxan̄ jém pac apidan̄jom. Jém apit iwagananay jém pac, ocmi ixamca. ⁸ Actin̄tim jém pac jém wibic naxyucmi. Nay, w̄it̄map. Cada tumtum jém pac chióy cien. Jesic yaj in̄mat jém cuento. P̄imi j̄iy Jesús. Iñímáy jém p̄ixiñtam:
—Siiga mitatsigiyta, amaton̄taami.

Tiiga in̄quejáypa jém icuyujc̄wiñ con jém xutu cuento
(Mt. 13:10-17; Mr. 4:10-12)

⁹ Jesic jém icuyujc̄wiñ icwácyaj jém Jesús ti nimtooba jém xutu cuento.

¹⁰ Jesús iñímáy:

—Dios michiñe jém j̄ixi iga w̄iap in̄jodón̄ata jém cosa anyamnetaw̄ip idic. Siip w̄iap in̄cutiñȳy j̄up̄tic in̄jacpa Dios jém ityajw̄ip ȳip naxyucmi. Pero ich anan̄quejáypa jém tungac̄pic p̄ixiñtam con ȳip xutu cuento. Jesic cuando iixyajpa, da ijodón̄ayajpa ti iixyaj. Cuando imaton̄yajpa, da icutiñȳyayajpa ti imaton̄yaj.

Jém Jesús in̄matpa ti nimtooba jém xutu cuento
(Mt. 13:18-23; Mr. 4:13-20)

¹¹ Siip manan̄madáypa ti nimtooba ȳip xutu cuento. Jém pac jém Dios in̄mati. ¹² Jém actin̄new̄ip tun̄jom jex juuts jém p̄ixiñtam jém imaton̄neyajw̄ip jém Dios in̄mati. Pero ocmi jém Woc̄c̄wiñ miñ iccáyáy in̄anam̄jom iga odoy icup̄icyajiñ, iga odoy c̄iputyajiñ. ¹³ Jém pac, jém actin̄new̄ip tsaan̄jom, jex juuts jém p̄ixiñtam cuando imaton̄ jém Dios in̄mati, agui maymay, iw̄ipictson̄yaj. Pero da p̄imi t̄ichiḡiy, da jáypa icup̄icyaj, pero cuando cutit̄stap, ichacyajpa jém an̄mati. ¹⁴ Jém pac, jém actin̄new̄ip apidan̄jom, jex juuts jém imaton̄neyajw̄ip Dios in̄mati, mojp̄a iwat juuts ixunpa Dios, pero da iyaach̄yipa. Icup̄ictooba idic, pero tsam ij̄ispa iyoxacuy. Ij̄ispatim jém itumiñ con jém maymáyaj̄i. Jém j̄ixi dap̄ic w̄i ixamcaaba jém wibic j̄ixi. Da w̄i t̄im̄ap. ¹⁵ Pero jém pac, jém actin̄new̄ip jém wibic naxyucmi, jex juuts tum p̄ixiñ w̄i in̄ama, imaton̄pa jém Dios in̄mati, iwadáypa caso. Icup̄icpa jém an̄mati, da nunca ichacpa. W̄it̄map jém p̄ixiñ. Siempre iwatpa juuts ixunpa Dios.

Jesús in̄mat jém jucti icuento
(Mr. 4:21-25)

¹⁶ Jesic n̄impatim Jesús:

—Da i iñooba tum jucti iga icujappa coon̄cuc̄im o iga ichacpa tseescuc̄im. Tannooba jucti iga tantunpa yucmi iga iixixóypa jém tiḡiyppáppic. ¹⁷ Jesanetim quejpa itump̄iy cosa an̄nécne idic. Quejpatim jém dap̄ic quejne idic.

¹⁸ Wadaayi caso mimichtam, aw̄imaton̄taami. Siiga in̄w̄ipictson̄pa jém Dios in̄mati, jesic Dios michiiba jáyan̄ w̄it̄amp̄ic cosa. Pero siiga da in̄w̄ipictson̄pa jém Dios in̄mati, jesic da ti w̄iap michi Dios, más miccáyáypa jém cosa jém iñ̄j̄ispáppic idic iga iniit.

Miñyaj jém Jesús itiwitam con iapa
(Mt. 12:46-50; Mr. 3:31-35)

¹⁹ Jesic jém Jesús itiwitam con iapa miñyaj. Pero da wíap itigíyyaj juť it jém Jesús porque tsam itñim. ²⁰ Anmadayta Jesús:

—Miññeum jém iñapa con iñtiwítam. Jemum it anšicmi. Miixtooba. Mijyypáttooba.

²¹ Pero Jesús iñímáy jeeyaj:

—Jém icupicneyajwíp jém Dios inmati, jeam ánapa, jeam antiwítam.

Jesús icteeñajac jém sawa con jém niipoa
(Mt. 8:23-27; Mr. 4:35-41)

²² Tum jama tigiy Jesús barcojom con icuyujcwiñ. Iñímáy:

—Tanictámpa jém laguna anwiñtuc.

Jesic nicyajum barcojom. ²³ Iganam jacyajpa jém laguna, moñpa Jesús jém barcojom. Miñúcyaj cucmi jém laguna, mojum poyi jém sawa tsam pimi. Agui poobatim jém ni. Moj tigiyi ni jém barcojom hasta cumon̄toobam jém barco. ²⁴ Jesic nic ichicyusyay jém Jesús. Nímayta:

—¡Maestro! ¡Maestro! ¡Tatogoytámpa!

Jesic yus Jesús, tsucum. Iwogáy jém sawa con jém niipoa. Iñímáy iga teeñiñ. Jesic teeñajac jém sawa con jém niipoa. Dam ti tsigóypa. ²⁵ Jesic iñímáy jém icuyujcwiñ:

—¿Tiiiga da incupictámpa iga Dios wíap?

Pero agui anjécneyaj jém icuyujcwiñ. Ipoañajamyajpa. Nacwácyajtap entre jeeyaj:

—Que iapaap yíp pxiñ iga iñímáy jém sawa iga teeñiñ y icupicpa.

Jém Gadarapic pxiñ jém iniitwíp jém mal espíritu
(Mt. 8:28-34; Mr. 5:1-20)

²⁶ Ocmi núcyaj jém naxyucmi de Gadara jém nianwiñtuc de jém Galilea. ²⁷ Jesic miquet jém Jesús jém barcojom, miñ tum Gadarapic pxiñ, icunúc Jesús. Jáyan tiempo iniit jém mal espíritu. Icusici siiba. Da puctugíy, da tigíy. Nicne iti juť cumtap tsúts. ²⁸ Mu iix jém Jesús, jém pxiñ costeññeactiñ ipuycim. Pimi anwejpá. Nimpa:

—¿Tiiiga mitigíycúmpa con aichtam? Mich miJesús jém Yucmipic Dios miManic. Man̄cunucsáypa, odoy ayaachwati.

²⁹ Iñímáy jempic porque Jesús iquebacputpa jém mal espíritu jém pxiñ ianamanjom. Waciy jém mal espíritu imats jém pxiñ. Jém ityajwíp jém attebet ichénayñeyaj idic ici y ipuy con cadena. Pero ijacpa jém cadena y jém tñcuy jém iñuusmatsayñewíp ipuy. Jém mal espíritu ichicpoypa jém pxiñ hasta jém titsinaxyucmi. ³⁰ Jesic Jesús icwác jém pxiñ, iñímáy:

—¿Mich, i iññiyi?

Icutson. Nimpa:

—Ich aLegión.

Taich tanañmatimi nimtooba jém jáyanpic. Icniiya jempic porque tsam jáyan iniit jém mal espíritu. ³¹ Jém mal espíritu icunucsáy Jesús iga odoy icniguiñ jém mijpic josjom juť pajtap jém mal espíritu. ³² Jesic it idic jem tsam jáyan yoya. Wícyajpa jém lumuyucmi. Jém mal espíritu iñímáy Jesús:

—Ajígaytaami iga atigíytámpa jém yoya ianamanjom.

Jesic Jesús ijigáy. ³³ Jém mal espíritu ichacum jém pxiñ. Putum ianamanjom. Tigiy jém mal espíritu jém yoya ianamanjom. Jesic jém yoya póyan̄sucumyay, jooban̄nasyaj jém tejajyucmi. Actiñyaj jém n̄icim. Jicjiccayaj jém yoya.

³⁴ Jesic jém iwatyajpaap cuenta jém yoya, iixyay ti iñasca jém yoya. Tsam cɨneyaj jeeyaj. Póyan̄sucumyay. Nicpa in̄matyay jém attebet Gadara y jém ityajwɨp nocojom ti iñasca jém yoya. ³⁵ Jesic miñ iámyaj itumpiy jém pɨxiñtam ti iñasca jém yoya. Miñúcyaj jūt it jém Jesús, jūt jicjicca jém yoya, ipátayaj jém pɨxiñ jém iniitwɨp idic jém mal espíritu. Jemum coñ jém Jesús ipuycim, puctugíyum, jixíyum. Jesic tsam cɨneyaj jém pɨxiñtam. ³⁶ Jém iixyajwɨp ti iwat Jesús, in̄madayyajpa jém pɨxiñtam jém miññeyajwɨp jutsa micpista jém iniitwɨp idic jém mal espíritu. ³⁷ Jesic itumpiy jém Gadarapic pɨxiñtam tsam icɨnyajpa jém Jesús. Nímayta jém Jesús iga cáyiñ de jem. Jeeyucmi tigiy Jesús jém barcojom, eybic set jūt tsucum. ³⁸ Pero jém pɨxiñ jém iniitwɨp idic jém mal espíritu icunucsáy Jesús iga nicpa itúñiy.

Pero Jesús da ijigáy. Ipimíy iga tsíyiñ. Iñímáy:

³⁹ —Nicsim iñticim. An̄madaayi jém iñtɨwɨtam ti miwadáy Dios.

Jesic nic jém pɨxiñ. Nic in̄mat icuwɨti jém attebet ti iwadáy jém Jesús.

Acpisyajta jém yomo jém ichigaywɨp jém Jesús iyooti
(Mt. 9:18-26; Mr. 5:21-43)

⁴⁰ Jesic setgacum Jesús jém laguna an̄wiñtuc. Jém pɨxiñtam, jém ityajwɨp jem, iwɨpictsonyay. Agui maymayyay porque itumpiy injócneyaj idic. ⁴¹ Jesic núc tum pɨxiñ iñiyi Jairo. Sinagoga an̄jagooyi jém pɨxiñ. Costeññeactɨj jém Jesús ipuycim. Iacunucsáy iga niguiñ iticcim. ⁴² Jém Jairo iniit tum iyommanic, doce iamtiy. Tsam pimi mimne jém woñi hasta caatoobam.

Iganam nicpa Jesús, tsam jáyan jém pɨxiñtam icpitsiyaypa. ⁴³ It con jeeyaj tum yomo mimne doce amt̄iy con jém caacuy iga quetpa iñipiñ. Jém yomo yaj miwadáy gasto itumpiy itumiñ iga iyoj jém tsóyoyopaap. Pero da i wia micpis. ⁴⁴ Jesic jém yomo icunúc Jesús ituuñian̄cim. Ichigáy jém Jesús iyooti in̄naca. Jeeti rato teñ jém iñipiñ.

⁴⁵ Jesic acwágóypa Jesús. Nimpa:

—¿I atsic?

Nimayajpa itumpiy iga da i michic.

Jesic jém Peto con jém tungac icuyujcɨwiñ iñimayyay Jesús:

—MamMaestro, tsam jáyan pɨxiñtam micpitsiyaypa, micyágíypa. ¿Tiiga micwágóypa iga i michic?

⁴⁶ Pero Jesús nimpa:

—Atsicta. An̄cutiyyíy iga anacpis tum mimnewɨp con ampimi.

⁴⁷ Jém yomo iix iga cutiyyiyta. Agui cɨne, agui cuetsáypa imiñ. Costeññeactɨj jém Jesús ipuycim. Nimpa jém yomo jém pɨxiñtam iwiñjom:

—Ich mantsigáy iñyooti iga apixiñ. Jeeti rato apis.

⁴⁸ Jesic Jesús iñímáy:

—Miyomo, mipisneum porque in̄cupicne Dios. Sɨp chogoyñicsim.

⁴⁹ Iganam in̄químpa Jesús jém yomo, jesigam núc tum de jém Jairo iticcim. Miñ in̄madáy jém Jairo. Nímaytap:

—Caaneum jém iñyommanic. Odom más cobacpiji yíp tamMaestro.

⁵⁰ Pero cuando Jesús imaton, iñímáy jém Jairo:

—Odoy cɨni. Cupici Dios. Pɨspa iñyommanic.

⁵¹ Jesic núc Jesús jém Jairo iticcim, da ijic iga i tigiy. Icutum tigiy Jesús con jém Peto, Jacobo, Xiwan y jém woñi ijatun con iapa. ⁵² Agui weyjajpa jém ityajwɨp jem. Pimi anyácneyaj iga caaneum jém woñi. Pero Jesús iñímáy:

—Odoy wejtaami. Da caane yíp woñi, monpa.

⁵³ Pero jém p̄ixiñtam ixiccayajpa jém Jesús porque iñuntawijodon̄ iga caaneum jém woñi. ⁵⁴ Pero jesic Jesús imatsáy jém woñi ici. P̄imi ijíyáy. Iñímáy jém woñi:

—Miwõñi, tsucumi.

⁵⁵ Jesic eybictim miñ ianama, jeeti rato tsucum jém woñi. Jesic jém Jesús iñímáy iapa iga icwíguiñ. ⁵⁶ Ipoañanjamyajpa ijatun̄ con iapa. Jesús iñímáy iga odoy i inmadáyíñ ti iñasca jém woñi.

9

Jesús icutsatpa jém doce icuyujc̄wiñ
(Mt. 10:5-15; Mr. 6:7-13)

¹ Jesic tum̄ jama jém Jesús in̄tuumawat jém doce icuyujc̄wiñ. Ichi ip̄imi iga w̄iañ̄ itop jém mal espíritu y iga w̄iañ̄ icp̄isyaj jém mimneyajw̄ip. ² Icutsat iga niguiñ̄ in̄matyaj jém an̄mat̄i jut̄pic̄ in̄jacpa Dios yíp̄ naxyucmi. Icutsat iga icp̄isyajiñ̄ jém mimneyajw̄ip. ³ Jesic Jesús iñímáy jém icuyujc̄wiñ:

—Odoy nan̄ictaami ni ti tun̄jom, ni imbastun, ni imbolsa, ni añi, ni tumiñ. Nan̄ictaami no más tum̄ iñyoóti. ⁴ Cuando miñúctampa tum̄ ticciim, jemum michíypa hasta miñ̄icpa tun̄gac tigan̄joj. ⁵ Siiga da i miw̄ipictson̄tampa, puttaami jém attebet. Cunebaytaami impuy iga cáyíñ̄ jém pótpót. Wattaami jem̄pic̄ iga in̄inquejáypa iga tsam̄ maloyaj jém ityajw̄ip jem.

⁶ Jesic moj̄ niquiyaj jém icuyujc̄wiñ, nasyajpa itump̄iy jém tigan̄joj. In̄matyajpa jém w̄ibic̄ an̄mat̄i iga taciacputtampa Dios. Jut̄quej icp̄isyajpatim̄ jém mimneyajw̄ip.

Jém Herodes da icut̄iyíypa iapaap jém Jesús
(Mt. 14:1-12; Mr. 6:14-29)

⁷ Jém gobernador Herodes ijodón̄a ti iwatpa Jesús. Pero da icut̄iyíypa iapaap jém Jesús porque n̄imyajpa algunos iga pisneum̄ jém Xiwan̄ jém it̄in̄cujagayñew̄ip̄ iisci. ⁸ Pero tun̄gac n̄imyajpa iga wiñquejne jém Elías, tun̄gac n̄imyajpa iga pisnegacum̄ tum̄ jém wiñ̄icpic̄ profeta. ⁹ Pero jém Herodes n̄impa:

—Aich̄ anyaac amp̄im̄iy iga tin̄cujagayt̄aiñ̄ iisci jém Xiwan. ¿Jesic iapaap yíp̄ p̄ixiñ̄ jém ammaton̄new̄ip̄ iga w̄iap̄ iwat̄ jáyan̄ jém w̄itamp̄ic̄ cosa?

Jesic jém Herodes agūi iixtooba jém Jesús.

Jesús icwíc̄pa jém cinco mil p̄ixiñtam
(Mt. 14:13-21; Mr. 6:30-44; Jn. 6:1-14)

¹⁰ Jesic mixetyaj jém apóstolyaj, in̄madayyaj jém Jesús ti iñascayaj. Jesic iwagananicyaj jém doce icuyujc̄wiñ tun̄gac lugar jut̄ da ti idíyíy, nocojom̄ jém attebet Betsaida.

¹¹ Pero ijodón̄ayaj jém p̄ixiñtam̄ jut̄ nic̄ Jesús, jesic nic̄ icpoyyaj. Jesic Jesús ipictson̄ jém p̄ixiñtam̄. Moj̄ in̄quejáy jut̄pic̄ in̄jacpa Dios jém ityajw̄ip̄ yíp̄ naxyucmi. Icp̄ispatim̄ jém mimneyajw̄ip.

¹² Jesic tsuuyim̄. Tigiytoobam̄ jama. Jém doce icuyujc̄wiñ icunúcyaj jém Jesús. Iñímayyaj:

—An̄quím̄yaji jém p̄ixiñtam̄ iga niguiñam̄ mon̄iyaj iga niguiñ̄ imétsyaj jém wíc̄cuy jém tigan̄joj y jém ranchoyaj jém ityajw̄ip̄ nocojom̄. Porque yim̄ da ti idíyíy.

¹³ Pero Jesús iñímáy icuyujc̄wiñ:

—Acwíctaami mimichtam̄.

N̄imyajpa jeeyaj:

—Da ti anaítta más que cinco caxtánañi y wisten̄ t̄ipi. ¿Ti iñxunpa, iga nic̄pa tan̄juy wíc̄cuy iga tanacwíc̄pa itump̄iy jém ityajw̄ip̄ yim̄?

¹⁴ Porque ityaj como cinco mil jém p̄ixiñtam̄. Pero Jesús iñímáy jém icuyujc̄wiñ:

—Siip accoñyajì como cincuenta cada grupo.

¹⁵ Jesic jem pam iwatyaj jém icuyujcìwiñ. Accoñyajtà naxyucmi itumpiy jém pixiñtam.

¹⁶ Jesic Jesús ipic jém cinco caxtánañi y jém wisten tìipi. Amquím sinyucmi, inwejpát Dios. Jesic mojum iwenwenjac jém caxtánañi y jém tìipi. Ichi icuyujcìwiñ, ipimíy iga ichiiyajiñ jém pixiñtam. ¹⁷ Jesic itumpiy wícyaj, cusyajum. Ocmi ipinyaj doce nacoon jém caxtánañi y jém tìipi jém cutsíywìip.

Jém Peto inmatpa iga Jesús je jém Cristo

(Mt. 16:13-19; Mr. 8:27-29)

¹⁸ Jesic tum jama icutum tsíy Jesús con icuyujcìwiñ iga inwejpátpa Dios. Jesic acwágóypa Jesús, inímáy jeeyaj:

—¿Junimyajpa iga ajapaap aich?

¹⁹ Jesic icutsonyaj jém icuyujcìwiñ:

—Nimyajpa iga mich miXiwán jém acchínoyapaap. Tungac nimyajpa iga mich miElías. Tungac nimyajpa iga mich jém wiñicpic profeta jém pisnewìip.

²⁰ Jesic Jesús eybictim icwác jém icuyujcìwiñ. Nimpa:

—¿Mimichtam, mijunimtámpa iga ajapaap aich?

Jém Peto inímáy jém Jesús:

—Mich miCristo jém micutsatnewìip Dios.

²¹ Pero Jesús inquím icuyujcìwiñ:

—Odoy ì anmadaayi iga icham aCristo.

Nimpa Jesús iga accaatap

(Mt. 16:20-28; Mr. 8:30-9:1)

²² Jesic nìmtim Jesús:

—Ich, jém aMiññewìip sinyucmi, tsam pìmi ayaachwattap. Tsam pìmi ajóyixyajpa jém wídaytam, jém panij anjagooyiyaj y jém escribaspic maestroyaj. Da awìpictsonyajpa. Ocmi accaatap, pero jém tucunajama acpístap.

²³ Jesic Jesús inímáy itumpiy de jeeyaj:

—Siiga michtam antúnìytamtooba, jesic odoy natoytajì inyaac. Yaachìyì cuando miyaachwattap, atúnìyì. ²⁴ Pero siiga tum pixiñ tsam itoypa ivida iga itpa yíp naxyucmi, jesic togoypa ivida. Siiga miccaatap ich ançuyucmi, jesic da togoypa imvida, micìacputtap. ²⁵ Da ti cuwatcuy siiga tum pixiñ iniit itumpiy cosa jém itwìip yíp naxyucmi, pero ocmi caaba y togoypa ianama. ²⁶ Siiga michaap iga ininmatpa ich ananmatì o siiga mich antsaaxpa, jesic ichgacti jém aMiññewìip sinyucmi mantsaaixpatim cuando amiñgacpa yíp naxyucmi con jém sinyucmìpic pixiñtam y con jém tanjatun Dios ipìmi. ²⁷ Numa mannímáypa iga algunos de mimichtam da micaaba hasta que inìixpa jutpic injacpa Dios yíp naxyucmi.

Ançacpa Jesús iámooyi

(Mt. 17:1-8; Mr. 9:2-8)

²⁸ Ocmi cuando yaj inmat Jesús, tungac ocho día, quím tum cotsicyucmi. Iwaganasiiba jém Peto, Jacobo y Xiwán. Nic inwejpát Dios. ²⁹ Jesic iganam inwejpátpa Dios, ançac jém Jesús iámooyi. Pìmi popo ipuctucu, tsam pìmi tsocpa. ³⁰ Jeeti rato núc wisten jém wiñicpic pixiñ, jém Moisés y jém Elías, miñ inmatmatneyaj con jém Jesús. ³¹ Agui tsocpatim mex jeeyaj. Anmatyajpa con Jesús jutsap iccupac jém Dios iyoxacuy cuando accaatap Jerusalén. ³² Tsam montooba idic jém Peto con jém icompañeroyaj. Ocmi cáy jém imonji, mu iixyaj iga agui tsocpa jém Jesús iámooyi con ipuctucu y tsocyajpatim jém wisten pixiñ jém miññewìip. ³³ Jesic iganam nìctooba jém Moisés y Elías, jém Peto inímáy jém Jesús:

—MamMaestro, agui w_i iga taitpa y_im. Siip manwadaytámpa tucuten nacxtic. Tum para mimich, tum para Moisés y tum para Elías.

Jém Peto cumon ij_ixi. Da icuti_iy_iypa ti n_im_pa. ³⁴Iganam j_iypa jém Peto, acti_n tum ucsi. In_monyaj. Jesic tsam p_imi c_inyaj jém Peto con jém icompañeroyaj iga ts_iy jém ucsuc_im. ³⁵Jesigam imaton_yajpa tum j_iy_i jém ucsanjom. N_im_pa:

—Y_ibam ich amMa_nic, jém tsampic antoypa. Maton_taami ti miñ_imáypa.

³⁶ Cuando cuyajum jém j_iy_i, jesic jém icuyujc_iwiñ iixyaj iga icutumtim ts_iy jém Jesús. Jesic jém icuyujc_iwiñ da ti ij_iyyaj. Jém tiempo da j_i in_madayajpa ti iixñeyaj.

Jesús icp_is tum jaych_ixi imatsne idic jém coñxus caacuy
(Mt. 17:14-21; Mr. 9:14-29)

³⁷ Jesic tun_gagam jama quetyaj jém cotsicyucmi jém Jesús con icuyujc_iwiñ. Tsam jáyan p_ix_iñtam miñ imétsy_y Jesús. ³⁸ Jesic tum p_ix_iñ p_imi ij_iyá yém Jesús jém p_ix_iñtam an_cucmi. N_im_pa:

—Maestro, awadaay_i tum favor. Aámaay_i y_ip ammanic porque nada más tum anait.

³⁹ Imatsne tum mal espíritu. Agui imalwadáypa. Tsam p_imi an_wejpa. Imatspa jém coñxus caacuy. An_moyacpa ij_ip. Da ichacpa, p_imi iyaachwatpa. ⁴⁰ An_cunucsayt_ip jém in_cuyujc_iwiñ iga itobáy_iñ jém mal espíritu, pero jeeyaj da w_ia mitobáy.

⁴¹ Jesic Jesús in_imá yém p_ix_iñtam:

—A que mimichtam, ¿tiiga da in_cupictámpa iga Dios w_iap? ¿Tiiga da in_cuti_iy_iytámpa? Jáyum tawagajti con mimichtam, tsam manyaach_iyum, pero hasta siip datim an_cupictámpa.

Jesic Jesús in_imá yém ts_ixi ijatun:

—Namiñ_i y_im jém immanic.

⁴² Iganam núcpa jém jaych_ixi, imats jém mal espíritu. Icuti_n naxyucmi. Eybictim imats jém coñxus caacuy. Jesic Jesús iwogáy jém mal espíritu, itobáy. Icp_is jém jaych_ixi. Ichi_ncodáy ijatun. ⁴³ Agui ipooñan_jamyajpa itump_iy jém ityajw_ip jém, cuando iixyaj iga tsam p_imi w_iap jém tan_jatun Dios.

Jesús in_matpa eyb_ic iga accaatap
(Mt. 17:22-23; Mr. 9:30-32)

Jesigam agui áman_jacyaj jém iixñeyajw_ip ti iwat jém Jesús. N_imyajpa jeeyaj iga da queman tánix yicxp_ic cosa. Pero Jesús in_imá icuyujc_iwiñ:

⁴⁴—W_imaton_taami iga odoy in_jaaman_nodiñ. Ich, jém aMiññew_ip Si_nyucmi, ac_ijun_cottap jém malop_ic p_ix_iñtam ic_ijom.

⁴⁵ Pero jém icuyujc_iwiñ da icuti_iy_iypa ti n_im_pa Jesús. Dios da ij_icpa iga icuti_iy_iyaj_iñ. C_inyajpa iga icwácyajpa ti nimtooba.

I ts_iypa jém más m_ijp_ic an_jagooyi
(Mt. 18:1-5; Mr. 9:33-37)

⁴⁶ Jesic Jesús icuyujc_iwiñ moj nacwácyajtaji entre jeeyaj iga j_i ts_iypa jém más m_ijp_ic an_jagooyi. ⁴⁷ Pero Jesús icuti_iy_iy_i ti s_ip ij_isyaj jém icuyujc_iwiñ, jesic in_wejáy tum xutu ts_ixi. Inimiñ jut coñ Jesús. ⁴⁸ In_imá yém icuyujc_iwiñ:

—Siiga tum p_ix_iñ iw_ipictson_pa tum xutu ts_ixi juuts y_ip ts_ixi iga in_quejáypa anan_mati, jesic jém p_ix_iñ aw_ipictson_patim mex aich. Siiga aw_ipictson_pa aich, jesic iw_ipictson_patim jém an_jatun Dios jém acutsatnew_ip y_ip naxyucmi. Jém p_ix_iñ, jém dap_ic nacuj_iptap, ts_iypa juuts jém m_ijp_ic an_jagooyi.

*Jém dapic nicpa acontra con taich, tayoxpátpa
(Mr. 9:38-40)*

⁴⁹ Jesic jém Xiwan iñímáy Jesús:

—MamMaestro, ánixñeta tum p̄ixiñ itoppa jém mal espíritu mich iññiyimi. Jesic ananjyacta porque jém p̄ixiñ da siiba con taichtam.

⁵⁰ Pero Jesús iñímáy:

—Odoy anjyactaami porque jém dapic nicpa en contra de taichtam, tayoxpátpa.

Jesús iwogáy jém Jacobo y jém Xiwan

⁵¹ Jesic núcpa jém tiempo iga químgacpa siñyucmi jém Jesús. Duro ijispa iga nicpa iccupac jém Dios iyoxacuy jemigam Jerusalén. ⁵² Jesic Jesús icutsat wisten icuyujc̄wiñ iga niguiñ tum Samariapic attebet iga iw̄tsacpa tum tic jut núcpa.

⁵³ Pero jém Samariapic p̄ixiñtam da ipictson, da ichiiba lugar porque iixyaj iga nicpa Jesús Jerusalén. ⁵⁴ Jesic cuando jém icuyujc̄wiñ jém Xiwan y jém Jacobo iix iga jém Samariapic p̄ixiñtam da ipictsonpa Jesús, n̄mpa jém icuyujc̄wiñ:

—Mánomi, siiga iñxunpa, anacquettámpa jém siñyucmic̄pic jucti iga anactogoypa yíp attebet. Wiaptim anwatta juuts iwat jém wiñicpic anmatc̄wiñ jém Elías.

⁵⁵ Jesic Jesús iámmats jém Xiwan y Jacobo. Iwogáy. Nímayyajtap:

—Mimichtam, da incutīiyitámpa jupp̄ic j̄ixi tanait. ⁵⁶ Ich jém aMiññew̄ip Siñyucmi da amiñ iga anactogoypa jém ityajw̄ip yíp naxyucmi, miñ anciacput.

Ocmi nicyaj tunḡac tiganjoj.

*Tucuten p̄ixiñ itúñytooba idic jém Jesús
(Mt. 8:19-22)*

⁵⁷ Iganam niquiyaj tunjom, tum p̄ixiñ iñímáy jém Jesús:

—Mánomi, ich nicpa mantúñy. Siempre jut miñicpa ich anicpatim.

⁵⁸ Jesic Jesús iñímáy jém p̄ixiñ:

—Jém zorra iniit ijos jut monpa. Jém jon iniit ipeeñi. Pero ich, jém aMiññew̄ip Siñyucmi, da anai jut wiap anaczej ancobac.

⁵⁹ Jesic Jesús iñímáy tunḡagam p̄ixiñ:

—Atúñyi.

Pero jém p̄ixiñ n̄mpa:

—Mánomi, ach̄i lado iga nicpa ancum jém anjatun, jesic nicpa mantúñy.

⁶⁰ Jesús iñímáy jém p̄ixiñ:

—Tsaci jém caaneyajw̄ip iga nacumyajtap jeeyaj. Pero mich niḡi anmadaayi jém p̄ixiñtam jutsap injac Dios.

⁶¹ Jesic tunḡagam p̄ixiñ iñímáy:

—Mánomi, ich n̄ctooba mantúñy, pero wiñti aj̄igaayi iga nicpa ananquím jém ityajw̄ip anticc̄im. Jesic nicpa mantúñy.

⁶² Pero Jesús iñímáy:

—Siiga tum p̄ixiñ imatscunúcpa jém arado y ámsetpa ituuñianc̄im, da wiap icuyoxa Dios.

10

ICUTSATPA Jesús jém setenta icuyujc̄wiñ

¹ Ocmi tánomi icupin setenta más icuyujc̄wiñ. Icutsat wiswis cada attebet jut jém Jesús n̄ctooba inmat jém Dios inmat̄i. Wiñti nicyajpa jém icuyujc̄wiñ, ocmi nicpa Jesús.

² Jesic Jesús iñímáy jém icuyujc̄wiñ:

—Como tum mijpic cosecha tsam jáyan p̄ixiñtam icupicyajtooba jém Dios in̄mati. Pero da i w̄ati jém yoxaciwiñ jém in̄matyajpáppic jém Dios in̄mati. Siip cunucsaayi Dios iga icutsadiñ jém yoxaciwiñ iga ipiñpa jém cosecha. ³ Siip nicsim. Mimichtam mijextam juuts tum mimañborrego. Siip mañcutsattámpa jūt it jém loboyaj. ⁴ Odoy nanictaami immorral, ni iñtumiñ accáycuy, ni tungac in̄ciac. Odoy teeñanjaci tunjom iga algun i iñdioschiiba. ⁵ Jesic mitigiytámpa tum ticjom, wiñti dioschioytaami. Nimtaami iga: “Dios miw̄iwadáyíñ, miitw̄ip yíp ticc̄im.” ⁶ Siiga jemum it jém itoypáppic Dios, jesic miw̄iantson̄pa. Pero siiga it jém ijóyixpáppic Dios, jesic da miw̄iantson̄pa. ⁷ Jesic tsíytaami jeetim ticc̄im jūt miw̄ipictson̄tamta. Siiga micw̄ictamtap, jesic w̄ictaami, níctaami. Wī iga yojtap jém yoxaciwiñ, wiap ipictson̄ icoñwiyooyi. Pero odoy w̄ictaami ȳim jeexic tic por tic. ⁸ Jesic miñúctámpa tum attebet jūt miw̄ipictson̄tap, cúttaami titam michiitamtap. ⁹ Acpiستاami jém mimneyajw̄ip jém ityajw̄ip jem. Nimaytaami iga núctooba jém tiempo iga Dios injacpa jém ityajw̄ip yíp naxyucmi. ¹⁰ Pero cuando miñúcpa tum attebet jūt da i miw̄ipictson̄pa, jesic níctaami calle, añmadaayi jém ityajw̄ip. Nímaayi: ¹¹ “Siip añcunebáypa ampuy iga antsacpa ȳim jém pótpót jém anaitw̄ip ampuyyucmi. Añwatpa jem̄pic iga manañquejáypa iga da i aw̄ipictson̄ta. Pero jodón̄ataami iga manañquejaytooba idic jutsap injac Dios jém ityajw̄ip yíp naxyucmi.” ¹² Pero mannímaytámpa, mañcuyj̄c̄wiñ, iga cuando núcpa jém jama iga Dios ic̄ipiñpa jém ityajw̄ip yíp naxyucmi, jesic más p̄imi chiitap castigo jém attebet, jém dapic miw̄ipictson̄ta, que jém malopic attebet jém Sodoma.

*Jém attebetyaj jém dapic icupicyajpa jém Dios in̄mati
(Mt. 11:20-24)*

¹³ ¡Agui miuuguytim mimichtam, miitw̄ip jém attebet Corazín! ¡Agui miuuguytim mimichtam miitw̄ip jém attebet Betsaida! Jém ityajw̄ip jém attebet Tiro y jém Sidón da iixñeyaj jém milagro juuts siip iñixpa. Pero meega iixñeyaj, pecam ichacneyaj jém imalaj̄xi, agui anyácneyaj iga t̄añcáiy. ¹⁴ Pero núcpa jém jama iga Dios ic̄ipiñpa jém ityajw̄ip yíp naxyucmi. Cuando mic̄ipintámpa, jesic michiitamtap más p̄imi castigo que jém w̄isten malopic attebet jém Tiro y jém Sidón. ¹⁵ Mimichtam, Capernaumpic mipixiñtam, tsam minicujíptamtap, iñj̄spa iga mininictamtap s̄nyucmi, pero micquetamtap hasta jém infierno.

¹⁶ Jesic Jesús iñímáy icuyujc̄wiñ:

—Siiga tum p̄ixiñ mimaton̄pa mimichtam, jex juuts ich amaton̄pa. Pero siiga tum p̄ixiñ mijóyixpa mimichtam, ajóyixpatim aich. Siiga tum p̄ixiñ ajóyixpa aich, ijóyixpatim jém añjatun̄ Dios jém acutsatnew̄ip.

Setyaj jém setenta

¹⁷ Jesic oc̄mi setyaj jém setenta jém icuyujc̄wiñ. Agui maymayyaj. Nímyajpa:

—Mán̄omi, wiaptim antop jém mal espíritu mich iññiyimi.

¹⁸ Jesic Jesús iñímáy:

—Ich ánix iga coñw̄iyta jém Wocciwiñ. Actiñ dende s̄nyucmi juuts tum majywiñ.

¹⁹ Siip maton̄taami. Manchiiba jém p̄imi iga wiap in̄cunepquet jém t̄añ y jém cacwi. Manchiibatim jém p̄imi iga in̄coñw̄iyiñ itumpiy jém Wocciwiñ ip̄imi iga odoy w̄iañ mimalwadáy. ²⁰ Pero odoy maymáyaataami iga wiap iñtop jém mal espíritu. Maymáyaataami iga mijaycámayñeta iññiyi s̄nyucmi.

*Maymay jém Jesús
(Mt. 11:25-27; 13:16-17)*

²¹ Jesic jeeti rato agui maymay Jesús porque jém Dios iAnama icmaymáya. Moj inwejpát Dios. Nímpa:

—ManJatun, itumpiy jém ityajwip sinyucmi y naxyucmi mich immichi. Manjúpá iga da injígáya jém sabioyay iga icutiíyíya jém wibic jixi. Pero agui miwí iga inchiiba jixi jém pixiñtam jém dapic nacujíptap iyaac iga wíaiñ icutiíyíy jém wibic jixi. Numa quejpa siip iga jempigam inwianjam.

²² Jesic Jesús inímáy jém icuyujcwiñ:

—AnJatun Dios acijunodáy itumpiy cosa. Da i ijodon japaap jém Dios iManic, jém anJatun icutum ijodon. Da i ijodon japaap jém anJatun Dios, ich, Dios aManic, anjodon. Ijodonjim jém pixiñtam, jém anquejayñewip japaap Dios.

²³ Jesic Jesús icuámsét jém icuyujcwiñ. Inímáy naps jeeyaj:

—Agui miwíttámpa porque siip inixta titam iwatpa Dios. ²⁴ Mannímáyttámpa iga jáyan jém wiñcipic profeta y jém reyyaj iixyajtooba idic titam síp inixta. Pero da wíá miixyaj. Imatonyajtooba idic titam síp immatonja, pero da wíá mimatonyaj.

Jém cuento de jém wibic Samariapic pixiñ

²⁵ Jesic teñchucum tum maestro de jém Israelpic anquímayooyi iga icutitpa Jesús. Inímáy:

—Maestro, ¿ti wíap anwat iga ampictsonpa jém vida jém dapic cuyajpa?

²⁶ Jesic Jesús inímáy jém pixiñ:

—¿Junimpa jém Dios inmati jém jayñewip? ¿ti immay jem?

²⁷ Jesic jém maestro de jém anquímayooyi icutson jém Jesús. Nímpa:

—Tantóyiñ jém tanJatun Dios con itumpiy tánanama, con itumpiy tampimi y con itumpiy tanjixi. Tantóyiñ tantíwi como taich mismo.

²⁸ Jesic Jesús inímáy jém pixiñ:

—Numa, mich anwicutson. Siiga inwatpa jempic, jesic impátpa jém vida jém dapic cuyajpa.

²⁹ Pero jém pixiñ nanquejtatooba iyaac iga da malo. Jesic eybictim icwác Jesús. Nímpa:

—¿Japaap jém antiwi?

³⁰ Jesic Jesús inmadáy yíp xutu cuento iga inquejáya japaap jém itíwi. Inímáy:

—Tum Jerusalénpic pixiñ nicpa idic naxwiñ jém atebet Jericó. Pero jém númyajpaap iteeñanjacyaj tunjom. Cunúmayayta itumpiy jém iniitwip, pimi cótsta, tsacta tunjom. Por uxañ caaba. Jesic nic jém númyajpáppic. ³¹ Ocmi miñpa jeetim tunjom tum Israelpic panij. Cuando iix jém coowanewip, icuwidáy, da icunúc, nic jém panij. ³² Jesic naspatim tum Levitapic pixiñ. Iacunúc, iám jém coowanewip, icuwidáytim. ³³ Ocmi miñpa jeetim tunjom tum Samariapic pixiñ, tungac pixiñ. Mu iix jém coowanewip, iyaachanjam.

³⁴ Iacunúc jém pixiñ. Ichóyíyáy icoowaji con aceite y vino. Inmónáy punctucmi. Icuím icawajyucmi. Ininic tum ticcim jut wattap cuenta. ³⁵ Jesic tungagam jama moj niqui jém Samariapic pixiñ. Itop wisten tumiñ de plata, ichi jém tic iomi. Inímáy: “Wati cuenta yíp pixiñ. Siiga más jáyan gasto inwatpa, miñpa manyojáy cuando anaspa eybic.”

³⁶ Jesic yaj inmat jém cuento. Jesús icwác jém maestro de jém anquímayooyi, inímáy:

—¿I itíwi jém coowanewip? ¿Jupic de jém tucuten, jém nasnewip jém tunjom?

³⁷ Jém maestro inímáy Jesús:

—Jém iyaachanjamnewip, jeam itíwi.

Jesic Jesús inímáy jém pixiñ:

—Siip nicsim. Wati jempic mex mich.

Oy joyi Jesús jém Malía y Marta iticcim

³⁸ Jesic moĵgacum niq̄ui Jesús. Núc tunĵac at̄tebet. Jemum ipát tum yomo iñiyi Marta. Jém yomo iñimáy Jesús:

—Miñi miwiiqui anticcim.

³⁹ Jém Marta ijáyuc iñiyi Malía. Jém jáyucpic coñ jém tánomi ipuycim iga imatonpa jém inmafi. ⁴⁰ Pero jém Marta tsam jáyañ mandajo iniit. Iacunú Jesús, iñimáy:

—¿Mánomi, que da inwadáypa caso iga da ayoxpát̄pa jém anjáyuc? Atsacne ancutum con jáyañ mandajo. Cutsati jém anjáyuc iga ayoxpádiñ.

⁴¹ Jesic Jesús iñimáy jém yomo:

—Marta, Marta, mich tsam inwadáypa caso. Agui iniit sip̄ jém cobacp̄ji. ⁴² Wi iga tanwadáypa caso de tum cosa no más. Jém Malía ipátne jém wibic cosa iga imatonpa ich ananmafi. Da i wiap̄ iccáyáy.

11

*Jesús inquej jutpic tananwejpáttámpa Dios
(Mt. 6:9-15; 7:7-11)*

¹ Jesic tum jama it idic Jesús con icuyujc̄wiñ, inwejpát̄pa Dios. Cuando yaj iwat oración jém Jesús, tum jém icuyujc̄wiñ iñimáy:

—Mánomi, anquejaytaami iga wiañ̄ ananwejpát̄ta Dios juuts jém Xiwan, jém achinoypaap, inquejáy jém icuyujc̄wiñ.

² Jesic Jesús iñimáy jém icuyujc̄wiñ:

—Cuando ininwejpáttámpa Dios, nimtaami yimpic:

Manjatun̄ Dios, miitw̄ip̄ sinyucmi.

Agui cuáyne mich iñiyi.

Wi iga míñiñ̄ jém jama iga ininjacpa yip̄ naxyucmi.

Wat̄i yip̄ naxyucmi juuts mich inwianjam̄, juutstim inwatpa sinyucmi.

³ Achiitaami cada jama titam ancuttámpa.

⁴ Awadaytaami perdón jém antañca juutstim aichtam anwadayñeta perdón jém amalwadayñew̄ip̄.

Awattaami cuenta iga odoy i wiañ̄ acutitsta iga acmalwattámpa.

⁵ Jesic Jesús iñimáytim icuyujc̄wiñ:

—Siiga tum de mimichtampic iniit tum amigo, nicpa iñám tsuucim, iñimáȳpa:

⁶ “Amigo, accaci tucuten caxtánañi. Yaguiñ núc anticcim tum ánamigo. Da ti anaif iga anacwíc̄pa.” ⁷ Pero jém itw̄ip̄ ticjom micutsonpa, nimp̄a: “Odoy awadaaȳi molestia. Sip̄ anpajneum antic. Awagamontámpa con ammanictam. Da wiap̄ antsucum iga manchiiba

algun ti.” ⁸ Mannimáȳpa, jesic teguet tsucumpa jém iñamigo iga michiiba jém caxtánañi.

Pero da porque tsam mitoypa. Michiiba porque da iñchacpa iga inwadáypa molestia.

Duro inwágáypa hasta que michiiba itump̄iy juuts inxunpa. ⁹ Jeeyucmim annimaytámpa

iga wágaytaami Dios, jesic michiiba titam mitogóyay. Métstaami jém witampic cosa,

impáttámpa. Ticstaami jém puerta, miháyayt̄ap. ¹⁰ Porque jém iwágaypáppic, chiit̄ap. Jém

imétspáppic, ipát̄pa. Jém iticspaap jém puerta, aháyayt̄ap.

¹¹ Mimichtam, siiga immanic miwágáypa tum caxtánañi, ¿que iñchiiba tum tsa? Siiga

miwágáypa tum tiipi, ¿que iñchiiba tum tsañ? ¹² Siiga miwágáypa tum cánpu, ¿que iñchiiba

tum cacwi? ¹³ Michtam, tsam mimalo, pero inñodon̄ jutsap̄ iñchi immanictam tum wibic

xaja. Pero tanjatun̄ Dios, jém itw̄ip̄ sinyucmi, da malo; ichiiba jém Dios iñama jém

iwágaypáppic.

*Nimyajpa iga Jesús iniit acuerdo con jém malopic espíritu injagooyi
(Mt. 12:22-30; Mr. 3:20-27)*

¹⁴ Tum jama Jesús itop tum mal espíritu. Jém mal espíritu iumawatne idic tum p̄ixiñ. Da w̄iap ij̄iy. Pero cuando topta, mojum j̄iyi jém uma. Itump̄iy jém p̄ixiñtam, jém it̄yajw̄iip jem, agui ipooñanj̄amyaj. ¹⁵ Pero algunos jém it̄yajw̄iip n̄im̄yaj:

—Ȳip p̄ixiñ w̄iap itop jém mal espíritu porque iniidáy jém Beelzebú ip̄imi, jém malopic espíritu in̄jagooyi.

¹⁶ Tun̄gac jém it̄yajw̄iip icutitsyajpa jém Jesús. N̄im̄ayt̄ap:

—An̄quejaayi tum milagro. An̄quejaayi tum seña iga quejiñ iga Dios micutsatne.

¹⁷ Pero Jesús ijodon̄ ti s̄ip ij̄isyaj. In̄im̄áy:

—Siiga tum gobierno nawécyajt̄ap, añ̄ayajpa entre jeeyaj, jesic nayajyajt̄ap. Siiga nawécyajt̄ap jém it̄yajw̄iip tum ticciim, añ̄ayajpa, jesic nayajyajt̄aptim. ¹⁸ J̄emp̄ictim in̄ascaaba jém Wocciwiñ siiga nawécyajt̄ap entre jeeyaj, añ̄ayajpa, jesic da jáȳpa cuyajpa. Mann̄im̄áȳpa j̄emp̄ic porque miñ̄im̄t̄ampa iga w̄iap antop jém mal espíritu porque ich anait̄ jém Beelzebú ip̄imi. ¹⁹ Siiga ich antoppa jém mal espíritu con jém Beelzebú ip̄imi, ¿jesic mich in̄cuyuj̄c̄iwiñ, ī ichiiba jém ip̄imi iga itoppatim jém mal espíritu? Jeeyaj iyaac min̄quejáȳpa iga mij̄ixitogoyñeta. ²⁰ Siiga antoppa jém mal espíritu con jém Dios ip̄imi, jesic ts̄am w̄iquejpa iga núcneum jém tiempo iga Dios in̄jacpa ȳip naxyucmi.

²¹ Siiga tum p̄ixiñ ts̄am p̄imi iwatpa cuenta jém itic con jém espada y jém lejon, da ī w̄iap in̄um̄áy jém iniitw̄iip iticciim. ²² Pero siiga miñ̄pa tun̄gac p̄ixiñ más p̄imi iga añ̄ayajpa con jém tic iomi y icoñw̄iypa, jesic iccáyáȳpa jém iespada y jém ilejon, jém ij̄ispáppic idic jém tic iomi iga nacupujt̄ap. W̄iap itobáyáy itump̄iy jém iniitw̄iip. Nicpa iwéc con jém it̄iw̄itam.

²³ Jesic n̄im̄tim Jesús:

—Jém dapic awaganayoxa aich, iwatpa en contra. Jém dapic ayoxpátpa iga anan̄tuum̄awatyajpa jém p̄ixiñtam, je más aquepquebáyáȳpa.

Miñ̄gacum eybic tum mal espíritu

(Mt. 12:43-45)

²⁴ Put tum mal espíritu tum p̄ixiñ in̄anaman̄jom. Siiba jém titsinaxyucmi. Iméts̄pa jūt jeypa. Pero da ipát. N̄im̄pa iga: “Eybic asetpa jém ticciim jūt aput.” ²⁵ Jesic mu ixetum, ipát jém p̄ixiñ juuts tum tic petneum y w̄itsacneum. ²⁶ Jesic inimiñ siete espíritu más p̄imi malo. Nic it̄iyaj jém p̄ixiñ in̄anaman̄jom. Sīp más p̄imi malo que wiñ̄ti.

W̄iit̄pa jém icupicneyajw̄iip jém Dios in̄mat̄i

²⁷ Cuando naj̄yóȳpa Jesús, p̄imi j̄iypa tum yomo jém p̄ixiñtam an̄cucmi. Jém yomo in̄im̄áy jém Jesús:

—Agui w̄iit̄pa jém yomo jém micnayw̄iip, jém mic̄tsútsw̄iip iga mic̄tsam.

²⁸ Pero Jesús in̄im̄áy jém yomo:

—Más w̄iit̄pa jém imaton̄páppic jém Dios in̄madayooyi y iwatpa juuts in̄im̄áȳpa.

Wágaȳta Jesús iga iwadiñ tum milagro

(Mt. 12:38-42; Mr. 8:12)

²⁹ Jesic jém p̄ixiñtam ts̄am icutuum̄acayaj jém Jesús. Moj j̄iyi Jesús. N̄im̄pa:

—Ts̄am malo jém it̄yajw̄iip sīp porque awágáȳpa tum milagro iga anan̄quejáȳiñ iga Dios acutsatne. Pero Dios iwatpa no más tum seña juuts jém iwadayñew̄iip jém profeta Jonás. ³⁰ Dios iwadáy jém Jonás tum seña iga jém N̄inivepic p̄ixiñtam w̄iañ̄ iixyaj. Jesaptim aich jém aMiñ̄new̄iip Sīnyucmi ats̄iy juuts tum seña para jém it̄yajw̄iip sīp. ³¹ Jesic cuando núcpa jém jama iga Dios ic̄ip̄in̄pa itump̄iy jém p̄ixiñtam, miñ̄pa jém an̄tsapsaum̄ipic reina. Tsucumpa iga iquejajwadáȳpa jém p̄ixiñtam jém it̄yajw̄iip sīp. Porque juumi miñ̄ jém yomo iga imaton̄pa jém an̄jagooyi jém Salomón ij̄ixi. Pero

yim it con mimichtam tum más mijpic anjagooyi que jém Salomón, pero michtam da inçupictámpa. ³² Cuando núcpa jém jama iga çipínóypa Dios, tsucumyajpa jém Nínivepic pxiñtam. Iquejajwadayyajpa jém ityajwip sip. Porque jeeyaj ichacyaj iga imalwatpa cuando najíyóypa jém Jonás. Sip yim it con mimichtam tum profeta más wiapaap que jém Jonás, pero michtam da inçhactámpa jém malajixi.

Jém wibic jucti

(Mt. 5:15; 6:22-23)

³³ 'Da i inooba tum nooquejucuy iga ichacpa jut da i iixpa ni tum cajoncucim. Pero accám̄ap yucmi iga ixixóyiñ jém tigiyáp̄pic. ³⁴ Jém tánixcuy juuts tum wibic jucti antsōca. Siiga w̄i jém tánixcuy, jesic itump̄iy jém tammij̄tay it jém wibic jucti antsōcaj̄om. Pero siiga da w̄i jém tánixcuy, itump̄iy jém tammij̄tay cupiichane. ³⁵ Wat̄i cuenta jém jucti jém iniitw̄ip iga odoy ts̄iyiñ juuts piichi. ³⁶ Siiga itump̄iy jém immij̄tay it jém wibic jucti antsōcaj̄om, da i ni uxaj̄ piichi, tsam w̄iquejpa cuando tum nooquejucuy yicquejóypa con jém ichōca.

Jesús iwogáy jém fariseoyaj y jém escribaspic maestroyaj

(Mt. 23:1-36; Mr. 12:38-40; Lc. 20:45-47)

³⁷ Ocmi cuando yaj an̄mat̄i Jesús, tum fariseopic pxiñ in̄wejáy iga nicpa wiiqui it̄cc̄im. Jesic tigiy Jesús, coñ jém mesac̄im. ³⁸ Pero agui áman̄jac jém fariseo porque iix iga Jesús da iche ici antes que w̄icpa juuts n̄mpa jém fariseoyaj icostumbre. ³⁹ Pero tán̄omi Jesús in̄imáy jém fariseo:

—Mimichtam mifariseopic, inçujicháypa jém imvaso y jém inçhima iyucwiñ, pero in̄anam̄j̄om tsam it nuumi con jáyan̄ malopic j̄ixi. ⁴⁰ Mimichtam, tsam micuixitam. Siiga in̄jodon̄ iga Dios miwadáy jém inç̄i, ç̄tiiga da in̄j̄ispa iga Dios miwadáȳtim jém in̄anama? Dios iw̄ian̄jam iga cuáȳñeiñ inç̄i, pero más iw̄ian̄jam iga cuáȳñeiñ in̄anama. ⁴¹ Siiga in̄chiiba tum limosna jém yaachayajpaap porque wibic j̄ixi iniit in̄anam̄j̄om, jesic quejpa iga micuáȳñeum inçutero.

⁴² 'Agui miuuguytim mifariseopic mip̄ixiñtam. In̄chiitámpa Dios jém in̄diezmo de jém yerba buena, de jém ruda y itump̄iy jém in̄ñip̄ñibooyi. Pero da in̄j̄istámpa iga in̄yoxpáttámpa jém in̄t̄iw̄itam jém yaachayajp̄appic. Datim in̄j̄istámpa iga in̄toytámpa Dios. W̄i iga in̄yoxpátpa jém in̄t̄iw̄itam y in̄toypa Dios y odoy in̄chaguiñ iga in̄chiiba Dios jém in̄diezmo.

⁴³ 'Agui miuuguytim, mifariseopic mip̄ixiñtam, porque inçusún̄iypa jém más wibic coñcuy jém sinagoga. Tsam in̄w̄ian̄jam̄tim iga itump̄iy jém pxiñtam midioschiiyajpa calle.

⁴⁴ 'Agui miuuguytim miescribaspic mimaestrotam y mifariseopic mip̄ixiñtam. In̄yaac minimigóyayt̄ap. Inicwatpa t̄an̄ca jém tant̄iw̄itam porque ij̄isyajpa iga wibic mip̄ixiñtam, pero tsam malo in̄anama. Mimichtam mijex juuts tum tsúts ijos. Da iixyajpa jém pxiñtam, wityajpa jém tsúts̄cumiyucmi, pero da ijodon̄yaj.

⁴⁵ Jesic tum maestro de jém Israelpic an̄quím̄ayooyi in̄imáy Jesús:

—Maestro, cuando miñ̄mpa jempic, jesic mich anan̄im̄aycúmpa aichtam.

⁴⁶ Pero Jesús in̄imáy jém pxiñ:

—Agui miuuguytim mimichtam. Tsam in̄inçodíypa jém in̄inçquím̄ayooyi, je puro in̄j̄ixquiimi. Sip in̄ic̄ts̄im̄atámpa jém tant̄iw̄itam con jém in̄inçquím̄ayooyi. Da iciyyajpa. Pero mimichtam da inçuyágíyáypa jém ich̄imi con tum in̄wayci iga in̄yoxpátpa.

⁴⁷ 'Agui miuuguytim mimichtam, in̄wattámpa jém mijpic monumento jut cumyajt̄a jém wiñ̄cpic profeta. Pero jém wiñ̄cpic in̄t̄um̄mitam iccaayaj jeetim profeta. ⁴⁸ Jesic quejpa iga in̄w̄ian̄jam ti iwatyaj jém wiñ̄cpic in̄t̄um̄mitam. Jeeyaj iccaayaj jém wiñ̄cpic profeta,

mimichtam inwattámpa jém monumento juť cumyajta. Quejpa iga iniit de acuerdo con jém wiñicpic iñtúmmítam.

⁴⁹ Jeeyucmi nimpá Dios, jém tsampic jixiíy: “Ancutsat jém profetayaj y jém apóstolyaj, pero jém malopic pixiñtam iccaayaj algunos, tungac icpóyiyajpa.” ⁵⁰ Pero mimichtam, miitwip sip, Dios michiitámpa tsam mijpic castigo. Michégaytámpa iñipiñ iga accaayajta itumpiy jém Dios iprofetayaj dende watnetá yíp mundo. ⁵¹ Mimichtam, miittanwip, michégaypa iñipiñ itumpiy jém anmatciwiñ dende jém mojawip iccaata, jém Abel, hasta jém Zacarías, jém accaanetawip jém altar incucmi con jém santuario jém mijpic masticjom.

⁵² Agui miuuguytim miccuyujoyapaap de jém Israelpic anquímayooyi. Ininéc támpa jém Dios inmati iga jém Israelpic pixiñtam odoy wiañ icutiyyaj. Mimichtampic da incutiyyatámpa jém Dios inmati, da iñjigaytámpa jém Israelpic pixiñtam iga wiañ icutiyyaj.

⁵³ Jesic yaj anmati Jesús. Put jém ticjom. Jém escribaspic maestroyaj con jém fariseoyaj tsam ijóyiyajpa Jesús. Jesic icwacyajpa Jesús jáyan cosa iga icutitsyajpa. ⁵⁴ Tsam icunumyajpa. Inmattopyajpa jém Jesús iga wiañ iquejajwadayyaj.

12

Jém malopic anquímayooyi jex juuts jém levadura

¹ Ocmi antuumayajpa tsam jáyan pixiñtam hasta napitsyajta. Jesic moj inmadáy Jesús jém icuyujciwiñ. Nimayyajta:

—Cuidado. Odoy cupici jém fariseopic inquímayooyi. Porque mimigóyáypa hasta namigóyayta iyaac. Jáyanap jém malopic anquímayooyi jex juuts jém levadura icpípa jém jaapi. ² Porque Dios inquejpa itumpiy jém jixi jém inyamneyajwip. Jodonatap itumpiy jém jixi jém anécnetawip. ³ Itumpiy jém anmati jém ininmatnewip piichcim, matontap juctiantsoajom. Jém anmati jém miyamnimnewip ticjom, juť wianpajne, anmattap tigançobac jém yucmipic piso.

Tañcñiñ Dios porque je wíap tachi castigo (Mt. 10:26-31)

⁴ Mánamigotam, mannímáypa iga odoy cñtaami jém pixiñtam jém miccaatampáppic. Porque ocmi da ti wíap miwadáy. ⁵ Pero mannímáypa i wíap inçñ, cñtaami Dios porque despues de que micaaneum, wíap micnic jém juctjom juť da nunca píchpa, juť impictsonpa incastigo. Numa mannímáypa, cñtaami Dios.

⁶ Máytap cinco xuxut jon por wisten tumiñ. Pero Dios ijspa jém xutu jon iga iwatpa cuenta. ⁷ Dios ijodon juten inway iniit incobacyucmi. Jeeyucmi mannímáyta: Odoy cñtaami. Porque Dios tsam miwíwattámpa cuenta. Mítoytámpa más que jém xuxut jonyaj.

Jém Cristo ipictsonpa jém ipixiñtam (Mt. 10:32-33; 12:32; 10:19-20)

⁸ Nimpatim Jesús:

—Siiga ininmadáypa jém iñtiwitam iga mich incupic iga Dios acutsat yíp naxyucmi, jesic cuando miñúcpa sinyucmi, mampictsonpatim jém sinyucmipic pixiñtam iwiñjom. ⁹ Pero siiga tum pixiñ inécpa iga acupicne, jesic ich anañécpatim jém sinyucmipic pixiñtam iwiñjom.

¹⁰ Siiga tum pixiñ amalnimáypa aich, jém aMiñnewip sinyucmi, wadayta perdón. Pero siiga tum pixiñ imalnimáypa jém Dios iAnama, da nunca i iwadáyta perdón.

11 'Cuando mininictamtap iga miquejajwadaytamtap jem juezcim, jem anjagooyicim, o jem sinagoga, jesic odoy jistaami jutpic incutsonampa o jutpic minicupujtamtap. 12 Porque cuando nucpa jem rato iga incutsonpa, jesic Dios iAnama michiiba jixi jutpic incutsonpa.

Siiga pimi intoyta inñumiñ, da wiap inñuc jut it Dios

13 Tum pixiñ inñimáy Jesús:

—Maestro, nimaayi jem anachi iga awégayin jem anjatun imichi jem atsagayñetawip.

14 Pero Jesús inñimáy jem pixiñ:

—Mipixiñ, ¿i accámne como ajuez o awégoyapa para mimichtam?

15 Nintim Jesús:

—Wadaayi caso mich inyaac iga odoy incusuniyiñ jáyan cosa. Da tanaitpa tamvida iga jáyan cosa tanaitpa.

16 Jesic Jesús inmadáypa tum xutu cuento iga inquejáypa jem pixiñtam. Inñimáy:

—It idic tum ricopic pixiñ. Agui jáyan cosecha chióy jem inñas. 17 Jesic moypa ijis jem rico. Nimpa: “¿Ti wiap anwat? Da anai jut anaccáypa jem an cosecha.” 18 Jesic ijis ti wiap iwat. Nimpa: “Anjodon ti anwatpa sip. Ammiswatpa jem antic jut anaccáypa jem an cosecha. Anwatpa tungac más mijpic. Jemum wiap anaccáy itumpiy jem an cosecha con itumpiy jem anaitwip. 19 Jesic anjisa ananamanjom: Sip anait wiccuy y titam ansunpa para jáyan amtay. Sip ajeypa, awicpa, aucpa, amaymáypa.” 20 Pero Dios inñimáy jem rico: “Agui micuxi, ¿que da injodon iga yibam tsuu micaaba? ¿Jesic jem iniccáyñewip, i inñagáypa?”

21 Jesic yaj inmat jem xutu cuento, Jesús inñimáy jem icuyujcwiñ:

—Jempigam inñascaaba jem pixiñ jem inñuumaawatpáppic itumiñ para je iyaac. Tsam pimi yaachap cuando caaneum porque da wiap ininic jem itumiñ, datim nucpa jut it Dios.

Dios iwatpa cuenta jem icupicneyajwip

(Mt. 6:25-34)

22 Ocmi Jesús inñimáy icuyujcwiñ:

—Mannimáypa iga odoy wadaayi caso iga miwittamiñ. Odoy wadaayi caso iga iniittamiñ jáyan inwiccuy o impuctucu. 23 Jem invidia más vale que jem inwiccuy. Jem immijtay vale más que jem impuctucu. 24 Jistaami jem jonyaj. Da ñippa, da ichicpa, da inii jut iccáypa jem cosecha, pero Dios icwicpatim. Numa, mimichtam más mivale que jem jonyaj. 25 Siiga pimi inñispa, da wiap inñyon ni tum quipsi más. 26 Siiga da wiap inwat tum cosa dapic jutsan iga pimi inñispa, ¿tiiga inwadáypa caso iga jut impicpa jem inwiccuy con jem impuctucu?

27 Jistaami jutpic mijap jem wibic moya jem lirio. Da yoxap ni da pitpa. Pero mannimáypa ni jem rey Salomón cuando tsam wicuyajne, da ictsíypa jem wibic moya. 28 Dios iwaiaccuyajpa jem moya, pero da jáypa xichpa, nooquettap. Jeeyucmi mannimáypa: Cupici iga Dios wiap miwatta cuenta. Michiiba titam mitogóyay. 29 Odoy wadaayi caso jut impicpa titam incútpa y titam inucpa. Odoy jisi titam mitogóyay. 30 Itumpiy jem pixiñtam icuwiñti yip naxyucmi imétsyajpa titam icútyajpa. Pero mimichtam injatun ijodon titam mitogóyay. 31 Meetsi wiñti jut injacpa Dios, jesic ocmi Dios michiiba titam mitogóyay.

Jutsap tanaccáy tantumiñ sinyucmi

(Mt. 6:19-21)

32 'Odoy cinñtaami. Mimichtam mamborregotam. Da miwatitam, pero tanjatun Dios iwianjam iga mimichap iga minjacpa. 33 Maytaami titam iniitta iga wiañ inñiita jem tumiñ jem yaachayajpáppic. Watí jem Dios iyoxacuy con jem inñumiñ. Jempam iniccáypa

jém iñtumiñ siñyucmi jut da nunca yajpa. Jém númpaap da wíap itigíy. Jém wechi da wíap ictogoy. ³⁴ Porque jut it jém iñriqueza, jemum ittim jém iñanama.

Ittaami listo porque miñgacpa jém Jesucristo

³⁵ 'Ittaami listo mimichtam juuts tum pxiñ iyoxaciwiñ. ³⁶ Injócaypa iomi. Oy siñaji jut añcoomíyoyñiampa. Setpa tsuucim. Jesic da moñpa jém iyoxaciwiñ. Jicsciy iñáypa jém puerta cuando iticspa jém iomi. ³⁷ Agui maymay jém yoxaciwiñ siiga da moñpa cuando setpa jém iomi. Numa mannímáypa iga jém iomi tsam itoypa jém iyoxaciwiñ. Mojpa iwat wíccuy jém iomi, icwícpa jém iyoxaciwiñ. ³⁸ Siiga núcpa cugaptsu o hasta cuquejacim y da moñpa jém iyoxaciwiñ, jesic agui maymayyaj jeeyaj porque jém iomi pimi iwíixpa.

³⁹ Jesic nimitim Jesús:

—Cutíiyihtaami, siiga tum pxiñ ijodon juchis hora núcpa jém númpaap, jesic da moñpa jém pxiñ. Da ichacpa jém itic iga cunúmaytaiñ. Jesaptim mimichtam. ⁴⁰ Ittaami listo cuando ich, jém aMiññewiip Siñyucmi, amiñgacpa yíp naxyucmi. Porque cuando ninyajpa iga da amiñpa, jesigam amiñpa.

Jém malopíc mayordomo y jém wibic (Mt. 24:45-51)

⁴¹ Jesic Peto icwác Jesús. Iñímáy:

—Mánomi, ¿iiga iniñmat yíp xutu cuento, para aichtam o para itumpiy jém pxiñtam?

⁴² Jesic tánomi iñímáy:

—Siip manañquejáypa iapaap jém wibic mayordomo jém icutiyyáppic. It idic tum pxiñ iccám iga mayordomo tum jém iesclavo iga injacpa itumpiy jém imozoyaj. Iwécpatim jém wíccuy. ⁴³ Agui maymay jém mayordomo siiga iwatpa juuts ipimíy jém iomi cuando miñgacpa. ⁴⁴ Numa mannímáytaampa iga jém iomi iccampa jém pxiñ juuts tum anjagooyi iga injacpa jém iñas y itumpiy jém iniitwíip. ⁴⁵ Pero siiga jém mayordomo ijispa iga da jobit setpa jém iomi, jesic mojpa imalwadáy jém imozoyaj jém pxiñtam y jém yomtám. Moj wíiqui jém mayordomo. Moj uqui hasta uquiap. ⁴⁶ Ocmi núc jém jama iga set jém iomi. Pero jém mayordomo da injócne. Ni da ijodon juchis núcpa jém iomi. Jesic mu iñúc jém iomi, itoppa jém pxiñ. Ichiiba miñpíc castigo con itumpiy jém dapic injócneyaj.

⁴⁷ Siiga tum esclavo iwíjodon ti ixunpa jém iomi pero da iwatpa ni da icupicpa, jesic jém iomi pimi ichiiba castigo. ⁴⁸ Pero jém pxiñ jém dapic icutiyyáypa ni da ijodon ti ixunpa jém iomi, siiga imalwatpa jém pxiñ, jém iomi ichibatim castigo, pero da más pimi. Siiga tum pxiñ iwícutiyyáypa itumpiy jém Dios inmatí, jesic Dios iwíañjam iga iwadiñ itumpiy juuts je ixunpa. Siiga jáyan jixi michiiba Dios, jesic je ixunpa iga más injcuyoxaiñ.

Nawecyajtáp jém pxiñtam jém Jesús icuyucmi (Mt. 10:34-36)

⁴⁹ Nimitim Jesús:

—Ich anamiñ yíp naxyucmi tum wibic jixi. Pero da ipictsonyajpa itumpiy jém pxiñtam. Jém malopíc pxiñtam tsam ijóyixyajpa jém iwíipictsonyajwíip jém wibic jixi. Tsam nawecyajtáp jém pxiñtam. Siip agui ansunpa iga núguiñ jém tiempo cuando mojpa nawecyajtaji. ⁵⁰ Ich amiñ iga ampictsonpa jém yaachaji. Tsam pimi anyácne hasta que cupacpa ti ixunpa Dios. ⁵¹ Odoy jisi iga ich amiñ iga anañiyjacpa jém áñayajpáppic. Porque ich añcuyucmi nawecyajtáp jém ityajwíip yíp naxyucmi. ⁵² Dende siip tsucumpa iga nawecyajtáp. Siiga ityaj cinco pxiñ tum ticcim, jesic jém tucutenpíc áñayajpa con wisten. ⁵³ Jém pxiñ áñayajpa con ijaymanic. Jém yomo áñayajpa con iyommanic. Tunyac yomo áñayajpa con ixaqui.

Jém seña tanquejáypa ti miñpa
(Mt. 16:1-4; Mr. 8:11-13)

⁵⁴ Jesús iníimáypatim jém p̄ixiñtam:

—Mu iníix iga químpa jém ucsi an̄n̄isaumi, miñimtámpa iga miñtooba tuj. Numa miñpa.

⁵⁵ Cuando poypa jém tsapsawa, miñimtámpa iga miñpa p̄iji. Numa miñpa. ⁵⁶ Odoy namigóyaytaji. In̄jodon̄ ti miñpa cuando in̄ixtámpa jém ucsi y in̄jampa jém sawa. Jesic cuando in̄ixpa jém milagro jém sīppic an̄watpa, ¿tiiga da in̄cut̄iyíypa iga núcum jém tiempo iga Dios in̄jacpa yíp naxyucmi?

W̄inanigaayi jém mijóyixpáppic
(Mt. 5:25-26)

⁵⁷ ¿Mimichtam, tiiga da w̄iap in̄cip̄inta jup jém malopic y jup jém w̄ibic? ⁵⁸ Jesic siiga mijóyixpa tum̄ p̄ixiñ y miñwejáypa jém an̄jagooyic̄im iga miquejajwadáypa, jesic w̄itsaci jém asunto antes que miñúctámpa jém an̄jagooyic̄im. Jesic da miñúctámpa jém juezc̄im. Porque siiga miñúctámpa jém juezc̄im, jesic jém juez mic̄ijun̄cotpa jém policía ic̄ijom. Jém policía micotpa cárcel. ⁵⁹ Mannímáypa iga da miputpa hasta que yajpa in̄yoj.

13

W̄i iga tantsacpa jém malaj̄ixi

¹ Jesic jeetim tiempo núcyaj algunos jém p̄ixiñtam iga in̄madayyajpa Jesús tum̄ asunto. Nimyajpa:

—Jém an̄jagooyi Pilato icca jut̄en jém Galileap̄ic p̄ixiñ. Accaayajta jem̄tim jut̄ iwat sacrificio, mot jém in̄ipiñ con jém an̄imat in̄ipiñ.

² Jesic Jesús iníimáy:

—¿Tiiga in̄j̄spa iga yípyaj más p̄imi táncaíy que itump̄iy jém Galileap̄ic p̄ixiñtam?

³ Siiga mimichtam da in̄chactámpa jém malaj̄ixi, jesic mitogoytámpatim in̄tump̄iytam.

⁴ Danam más pecam caayaj dieciocho p̄ixiñ cuando act̄ij jém torre jém atebet Siloé, icuchijquetyaj. Odoy j̄staami iga jém caaneyajw̄ip más táncaíy que itump̄iy jém ityajw̄ip Jerusalén. ⁵ Mannímáypa siiga mimichtam da in̄chactámpa jém malaj̄ixi, jesic mitogoytámpatim in̄tump̄iytam.

Jém tsuj jém dap̄ic tím̄ap

⁶ Jesic Jesús in̄mattim yíp xutu cuento iga in̄quejáypa jém p̄ixiñtam. Iníimáy:

—It idic tum̄ p̄ixiñ iniit tum̄ finca de uvas. Jém uvasan̄jom ñiptatim tum̄ tsuj. Cuando núc ititempo, n̄cpa iám siiga tím̄aneum jém tsuj, pero da tím̄ap. ⁷ Jesic jém nas iomi iníimáy jém iwatpáppic cuenta jém uvas: “Cada āmtiy miñpa ammétsáy jém tsuj itim, pero da ampadáypa. Sīp iniitum tres āmtiy, da queman tím̄a jém tsuj. Sīp w̄iti jém tsuj. Anxajañpne.” ⁸ Jém iwatpáppic cuenta jém nas iníimáy jém iomi: “Mánomi, tsacinam yíp āmtiy. Ampuusáypa jém nas, an̄codáypa abono. ⁹ Siiga tím̄ap, it w̄i. Siiga datim tím̄ap, jesic tan̄witquímpam.”

Acp̄ist̄a tum̄ yomo cómne ituuñi

¹⁰ Tum̄ jejcuyjama accuyujóypa Jesús jém sinagoga jut̄ icuyujcayajpa jém Dios in̄m̄ati.

¹¹ Jemum it tum̄ yomo. Mimne dieciocho āmtiy. Tum̄ mal espíritu iccómáy ituuñi. Da w̄iap in̄umteñ. ¹² Cuando iix Jesús, in̄wejáy jém yomo. Iníimáy:

—Miyomo, sīp Dios mic̄ispa. Mictsacpa jém caacuy.

¹³ Jesic Jesús ichiccunúc jém yomo. Jeeti rato numtsíy jém ituuñi. Jém yomo moj icujíp Dios. ¹⁴ Pero agui jóy jém sinagoga injagooyi iga acpisóypa jém Jesús jém jejcuyjama. Iñímáy jém ityajw#p jem:

—Tanait seis día iga tayoxap. Miñi minicpistaji jém yoxacuyjama. Odoy miñi jém jejcuyjama.

¹⁵ Jesic tánQmi iñímáy jém anjagooyi:

—Tsam minimigóyaytáp. Siiga níctitspa jém imbuey o imburro jém jejcuyjama, jesic tienes que injijpa, nicpa inicnic. ¹⁶ Yíp yomo taich yomo, jém Abraham iocmanic. Jém Wocciwiñ icmatsne idic yíp caacuy dieciocho amtíy. ¿Tiiga da wiap tanaccutsigáy yíp yomo de jém caacuy jém jejcuyjama?

¹⁷ Jesic cuando imatonyaj ti nim Jesús, pimi tsaayaj jém dapic iwixyajpa Jesús. Pero los de más jém pixiñtam agui maymayyaj mu iixyaj ti iwat Jesús. Iwanjamyaj jém wibic milagro.

Jesús inquejáy iga jáyanap jém Dios ipixiñtam
(Mt. 13:31-32; Mr. 4:30-32)

¹⁸ Jesic Jesús iñímáy jém pixiñtam:

—Siip manaquejáypa jutsap inpic jém Dios injuímayooyi. ¹⁹ Jém Dios injuímayooyi jex juuts tum mostaza ipac. Tum pixiñ iñip jém pac icamjom. Nay jém pac, mijap juuts tum mijpic cuy hasta jém jon iwatpa ipeeñi jém mostaza injisyucmi.

²⁰ Nimtim Jesús:

—Siip manaquejáypa jutpic jáyanap jém Dios injuímayooyi. ²¹ Jém Dios injuímayooyi jex juuts levadura. Tum yomo inimot uxaj jém levadura con tucuna jepe de harina. Jesic pipa itumpiy jém jaapi.

Jém xutupic puerta
(Mt. 7:13-14, 21-23)

²² Mojcacum niqui jém Jesús Jerusalén. Oy najíyooyi jém mijpic atebet y jém xutupic tiganjoj. ²³ Jesic tum pixiñ icwác jém Jesús. Nimpa:

—MánQmi, ¿que da wati jém iciacputyajpáppic Dios?

Jesic Jesús iñímáy:

²⁴—Wattaami empeño iga mitigiytámpa jém xutupic puerta. Mannímaytámpa iga tsam jáyan pixiñtam tigiyajtooba, pero da wiayajpa.

²⁵ 'Porque cuando núcum jém hora, jesic jém tic iomi injajpa jém itic. Cuando anpajneum jém itic, dam wiap iñtigiyta. Michiytámpa ansicmi. Iñicstámpa jém puerta. Miñimtámpa: “¡Áñaayi jém puerta!” Pero miñímáypa jém tic iomi: “Da mánixpicpa. Da anjodon jutpic mipixiñ.” ²⁶ Jesic michtam moypa iññimayta: “Tawagawícne y tawaganícne con mimich. Mich oyñe miccuyujooyi jém ánattebet.” ²⁷ Pero eybictim nimpa jém tic iomi: “Mimichtam da mánixpicpa, da anjodon jutpic mipixiñtam. Tsam mimalotam, acupóyaytaami.” ²⁸ Núcpa jama iga tsam pimi miwejtámpa y iññichpa iññits. Pimi minyáctámpa cuando iñixtámpa iga iwaganaityajum Dios jém Abraham, jém Isaac, jém Jacob y itumpiy jém wiñicpic profeta; pero mimichtam michactamta ansicmi. ²⁹ Nicpa itiyaj jém anñisaumipic pixiñtam, jém anyomsaumipic, jém anwixaumipic y jém antsapsaumipic pixiñtam. Nicpa wiiquiyaj jemum jut injacpa Dios. ³⁰ Jém ocmipic jém pixiñtam tsíypa iga wiñti y jém wiñtipic tsíypa iga ocmi.

Tsam anyácne Jesús cuando iix Jerusalén
(Mt. 23:37-39)

³¹ Jesic jeetim jama núcyaj juten jém fariseoyaj. Nímayta Jesús:

—Nicsim, puti de yim porque jem Herodes miccaatooba.

³² Pero Jesús inimáy jeeyaj:

—Aguí jáyayanjichich jem Herodes juuts tum zorra, nigí nímaayi, iga antoppa jem mal espíritu, anacpispa jem mimnewip yip jama y joymi. Jesic wisticmi cuyajpa jem anyoxacuy. ³³ Seguido anwatpa jem anyoxacuy hasta cupacpa. Da jáypa anaccupacpa. Ich da ançinpa jem Herodes porque da i wiap icca tum profeta ançicmi de jem Jerusalén.

³⁴ 'Mimichtam, miittanwip Jerusalén, tsam iniccaata jem Dios iprofeta. Inñáscata tsaami jem icutsatneyajwip Dios. Ich tsam mançiacputtamtooba idic, pero da inwianjamta. Watciy manantuumawattamtip juuts jem piyuapa inuumawatpa jem imaníc ixajcucim. Pero mimichtam da inwianjamta. ³⁵ Como da inwianjamta iga manyoxpátámpa, jesic Dios michacum. Sip da michíypa juuts jem Dios mipixiñtam. Mannimáypa iga da eybic ánixtámpa hasta que núcpa jem tiempo iga ançujíptámpa aich, jem acutsatnewip jem tanjatun Dios.

14

Jesús icpis tum pixiñ cuxinayñewip

¹ Jesic tum jejcuyjama nic wiiqui Jesús tum fariseopic anjagooyi iticcim. Algunos jem fariseo iyamcuixyajpa jem Jesús siiga imalwatpa. ² Jesic tum pixiñ miñ iám jem Jesús. Imatsne jem caacuy iga cuxinayñe. ³ Jesic Jesús icwác jem maestro de jem Israelpic anquímayooyi y jem fariseoyaj, inimáy:

—¿Junimpa jem anquímayooyi? ¿Wiap tanacpis yip pixiñ jem jejcuyjama o da wiap?

⁴ Pero jeeyaj da jyyaj. Jesic Jesús ichicunuc jem mimnewip. Icpis. Jesic inimáy:

—Chogoyñicsim.

⁵ Jesic Jesús inimáy jem fariseoyaj:

—Siiga joppa tum pacusjom jem imburro o imbuey, jesic inñtoppa jeeti rato. Da inwadap caso siiga jejcuyjama.

⁶ Jeeyaj da wia miicutsonyaj jem Jesús.

Da i iwixpa jem nacujíptapáppic

⁷ Jesic Jesús iix iga jem anwejayñetawip tsam imétsyajpa jem más wibic coñcuy mesacim. Jesic Jesús inmat tum ejemplo iga ichi jixi. Nimpa:

⁸ —Siiga minwejayñeta iga niguiñ mixinaji jut ancoomíoyñimpa, odoy meetsi jem coñcuy más wibic. Odoy coñi jut it noco jem anjagooyi porque wiap imiñ tum pixiñ más wiapaap que mich. ⁹ Jesic jem minwejayñewip miñimáypa: “iTsucumi! Chi yip tungac pixiñ jem incoñcuy.” Jesic mich pimi michaap, nicpa micoñi jem inanpigam coñcuyucmi.

¹⁰ Pero jesic cuando minwejaytap jut wattap jem sin, nicsim micoñi jem lugar más juumi. Jesic cuando miñpa jem minwejayñewip, miñimáypa: “Amigo, yim it más wibic coñcuy.” Jesic jem tungac pixiñtam jem coñyajwip jem mesacim miwixyajpa. ¹¹ Da i iwixpa jem nacujíptapáppic. Pero jem dapic nacujíptap, iwianigayyajpa jem itiwitam, icujípyajpa jem pixiñ.

¹² Jesic Jesús inimáytim jem pixiñ jem iwatpáppic jem sin. Nimpa Jesús:

—Cuando mixinap, da wi iga seguido ininwejáypa jem inamigoyaj, jem inñiwitam y jem ricopic imvecino. Porque ocmi jeegagam minwejáypa. Jempictim micseedáypa. ¹³ Pero cuando mixinap, anwejaayi jem yaachayajpáppic, jem cñtaca, jem cuxuj y jem cáchtí. ¹⁴ Jesic maymáyaj por que jeeyaj da wiap micseedáy iga nicpa micwíc. Pero Dios miyojpa jem jama cuando acpisyajtap jem icupicneyajwip Dios jem caaneyajwíppic.

*Jém ejemplo de jém mijpic siñ
(Mt. 22:1-10)*

¹⁵ Jesic tum p̄ixiñ, jém iwaganaitw̄ip jém mesaciim, imaton junimpa jém Jesús. Jesic jém p̄ixiñ iñímáy:

—Agui maymayyaj jém nicpaap s̄iñaji juť injacpa Dios.

¹⁶ Jesic moj inmadáy Jesús yíp ejemplo. Nimpa:

—It idic tum p̄ixiñ. Iwatpa tum mijpic siñ. Inwejáypa tsam jáyan p̄ixiñtam. ¹⁷ Jesic cuando yajum iwat jém wícuy, icutsat tum icuyoxapaap iga niguiñ inwejáy jém iñímáynew̄ip idic. Nimpa: “N̄ici miwiiquitam. Siip watneum jém wícuy.” ¹⁸ Pero nimyajpa itumpiy iga da wiap iñic. Tum jém p̄ixiñ nimpa: “Yaguiñ anjuy tum jaça nas. Siip nicpa ánám. Nímaayi jém iñomi iga da wiap iga nicpa as̄iñaji.” ¹⁹ Jesic nimpa jém tunḡac p̄ixiñ: “Yaguiñ anjuy cinco par de jém buey. Siip nicpa ancutits siiga yoxap. Nímaayi jém iñomi iga da wiap annic.” ²⁰ Nimpa jém tunḡac p̄ixiñ: “Yaguiñ ancoomyñe. Jeeyucmi da wiap annic.” ²¹ Cuando set jém icuyoxapaap, inmadáy iomi junimpa itumpiy jém iñímáynew̄ip idic. Jesic agui jóy jém iomi. Iñímáy jém icuyoxapaap: “N̄igi anwejaayi jém ityajw̄ip calle. N̄ici hasta jém xutupic calle icuw̄iti yíp atebet. Nam̄iñi yim jém yaachayajp̄appic, jém cuxujyaj, jém cáchtijyaj, jém c̄itaca y jém puytaca.” ²² Ocmi jém icuyoxapaap iñímáy jém iomi: “Mánomi, anwatum juuts annímáyne, pero itñam lugar iga tanacw̄icyajpa.” ²³ Jesic jém iomi eybictim iñímáy jém icuyoxapaap: “N̄igi meetsi más p̄ixiñtam jém tunḡom y jém taañi anḡaca juť coñyajpa jém yaachayajpaap. Nímaayi iga míñiñ wiiqui anticciim. Ansunpa iga cómiñ yíp antic. ²⁴ Mannímáypa, da anwianjam iga miñyajpa wiiqui jeeyaj jém mojn̄ew̄ip annímayyaj.”

*Ti wiap tanwat iga tatsíypa juuts jém Jesús icuyujc̄iwiñ
(Mt. 10:37-38)*

²⁵ Jesic itún̄iyajpa Jesús tsam jáyan p̄ixiñtam. Áms̄et Jesús. Iñímáy:

²⁶ —Siiga más iñtoypa iñjatun, iñapa, iñyomo, iñchixtam, iñachi, iñjáyuc o iñch̄itsi que iñtoypa Dios, da wiap iñch̄iy juuts ich man̄cuyujc̄iwiñ. Siiga más minitoyp̄ap iñyaac que iñtoypa Dios, da wiap iñch̄iy juuts ich an̄cuyujc̄iwiñ. ²⁷ Siiga da iñyaachíypa iga miyaachwattap, jesic da wiap iñch̄iy juuts ich an̄cuyujc̄iwiñ. ²⁸ Siiga tum p̄ixiñ iwattooba tum torre, wiñti ij̄ispa jutsan̄ gasto ininicpa. Ij̄ispa siiga ictsíypa itumiñ. ²⁹ Siiga ictsucum jém torre y da wiap iccupac, jesic agui ixiccayajpa jém iixyajp̄appic. ³⁰ Nimyajpa: “Yíp p̄ixiñ ictsucum iga iwatpa jém torre, pero da wiap̄ miiccupac.” ³¹ Siiga tum rey an̄atooba con tunḡac rey, wiñti ij̄ixiñ siiga wiap icoñw̄iy. Nimpa jém rey: “¿Que wiap an̄coñw̄iy con jém diez mil soldado siiga jém anenemigo iniit veinte mil soldado?” ³² Jesic jém rey ij̄ispa iga da wiap icoñw̄iy. Jesic cuando itñam juumi jém ienemigo, icutsadáypa tum representante iga icunucsáypa iga odoy an̄ayajiñ. ³³ Jesap̄tim mimichtam, siiga da iñchactámpa itumpiy jém iniitw̄ip, da wiap iñch̄iy juuts ich an̄cuyujc̄iwiñ.

*Jém cana jém dapic paac
(Mt. 5:13; Mr. 9:50)*

³⁴ Jesic Jesús iñímáytim:

—W̄i jém cana. Pero siiga da paac, jesic da wiap tanw̄itsac. ³⁵ Da w̄i ni para jém nas, ni datim w̄i iga tan̄codáypa juť cumnet̄a jém abono. Jesic tampatsáypa. Siiga mitatsiḡiyta, amaton̄taami.

15

*Togoy tum p̄ixiñ iborrego
(Mt. 18:10-14)*

¹ Jesic tum jama miñyay jáyan jem p̄ixiñtam jem ichécyajpáppic jem impuesto y jem t̄añcaiyw̄iip. Miñ imaton̄yay jem Jesús in̄químayooyi. ² Jeeyucmi agui jóyñeyaj jem fariseoyaj y jem escribaspic maestroyaj. Icujiyyajpa jem Jesús. Nimyajpa:

—Yíp Jesús ipictson̄pa jem malopic p̄ixiñtam, iwaganawícyajpa.

³ Jesic Jesús in̄madáy yíp xutu cuento iga in̄quejáypa jeeyaj, in̄ímáy:

⁴ —Siiga tum de mimichtam iniit cien borrego y siiga togoypa tum jem iborrego, ¿que da ichacpa jem noventa y nueve jem itw̄iip copjom y nicpa iméts jem togoyñew̄iip? Ich an̄impa iga seguido icuámpa hasta que ipátpa. ⁵ Jesic cuando ipátum, icónneebea inimiñ iqueeweyucmi. Agui maymay. ⁶ Cuando núcpa iticc̄im, in̄tuumaawatpa iamigoyaj con jem ityajw̄iip nocojom. In̄ímáypa: “Maymáyaataami con aich, porque ampátum jem amborrego jem togoyñew̄iip idic.” ⁷ Jesap̄tim mannímaytámpa iga tsam it maymáyaj̄i siñyucmi cuando tum p̄ixiñ t̄añcaiyw̄iip ichacpa it̄añca iga icupicpa Dios. Jem ityajw̄iip siñyucmi más maymáyaajpa con tum p̄ixiñ cuando ichacpa it̄añca que con jem noventa y nueve jem wibic p̄ixiñtam jem dapic t̄añcaíy.

Togoy tum yomo itumiñ

⁸ Jesanetim siiga tum yomo iniit diez tumiñ de plata y togoypa tum, ¿que da ictsocpa jucti, ipetpa itic y iw̄icuámpa hasta ipátpa? ⁹ Jesic cuando ipátum jem itumiñ, in̄tuumaawatpa jem iamigoyaj y jem ivecino. N̄impa jem yomo: “Maymáyaataami con aich porque ampátum jem antumiñ jem togoyñew̄iip idic.”

¹⁰ J̄empictim mannímáypa iga maymáyaajpa jem siñyucmic̄ic p̄ixiñtam jem ityajw̄iip con Dios cuando tum p̄ixiñ t̄añcaiyw̄iip icucacpa ij̄ixi.

Togoy tum p̄ixiñ ijaymanic

¹¹ N̄impatim Jesús:

—It idic tum p̄ixiñ. Iniit wisten ijaymanic. ¹² Jem jáyucpic in̄ímáy ijatun̄: “Manjatun̄, awégaaȳi jem annímayñew̄iip iga anchiiba.” Jesic jem ijatun̄ iwégáy jem itumiñ y itump̄iy jem iniitw̄iip. ¹³ Jesic da wat̄ña jama jem jáyucpic icumáyáy jem im̄ichipic jem ichiww̄iip ijatun̄. Ipic jem itumiñ, nic juumi. Jem tungac attebet im̄ichca jem itumiñ con jem yomtam y jem ojo. ¹⁴ Yaj im̄ichca itump̄iy jem itumiñ. Ocmi núc tum m̄ijpic yuu jem naxyucmi. Yajneum jem itumiñ, agui yuap jem p̄ixiñ. ¹⁵ Jesic nic iám tum p̄ixiñ jem itw̄iip jem attebet. Nic iméts yoxacuy. Jem p̄ixiñ ichi tum yoxacuy. Icutsat irancho iga iwadáyñ cuenta jem iyoya. ¹⁶ Jesic jem p̄ixiñ tsam icúttooba jem algarrobas, jem yoya iwíccuy. Pero ni ti da i ichiiba. ¹⁷ Jesigam jem p̄ixiñ moj ijs̄ iga tsam cuixi. N̄impa ij̄ixianjom: “Jem anjatun̄ iniit jáyan iyoxac̄wiñ iticc̄im. Jeeyaj tsam jáyan wíccuy iniityaj hasta cuspa wiiquiyaj. Pero ich ȳim ayuucatoobam. ¹⁸ Siip asetpa jut it anjatun̄, annímáypa: Manjatun̄, tsam jáyan t̄añca an̄wat contra Dios y contra mimich. ¹⁹ Como tsam ammalwatum, da w̄i iga atsíypa juuts tum immanic. Atsíttooba juuts tum in̄yoxac̄wiñ.” ²⁰ Jesic mojum seti ijatun̄c̄im.

Jesic cuando danam núcne, juuminam miñi, ámp̄ut jem ijatun̄, iix iga setpam jem iman̄ic. Agui iyaachanj̄am. Póyan̄sucum, nic in̄nuusáy. In̄nacatsúts. ²¹ Jesic n̄impa jem iman̄ic: “Manjatun̄, tsam jáyan t̄añca an̄wat contra Dios y contra mimich. Como tsam ammalwatum dam w̄i iga atsíypa juuts tum immanic.” ²² Pero ijatun̄ in̄ímáy tum jem icuyoxapaap: “Imp̄imi namiñi jem más wibic yooti, accámaaȳi yíp ammanic. Accámaaȳitim tum cucuma ic̄iyucmi y jem wibic ciac ipuyyucmi. ²³ Namiñi jem mañix jem tanacp̄inew̄iip. Accaataami. Jesic tawíctámpa, tas̄in̄atámpa. ²⁴ An̄jisne idic iga

caaneum yíp ammanic, pero sîp vivojam. Togoyñe idic, pero sîp quejum.” Jesic mojum sînjajiyaj.

²⁵ Pero jém iachi nicne idic camjom. Jesic settim. Cuando nuuquim tomi iticcim, imaton iga anjiypa música, etsnîmpa. ²⁶ Jesic inwejay tum jém icuyoxapaap. Moj icwác. Iñímáy: “¿Tîiga ticsoyyajpa? ¿Tîiga etsyajpa?” ²⁷ Jesic jém icuyoxapaap nîmpa: “Setum jém injayuc. Jém injatun ipimíy iga accataiñ jém mañxix jém tanacpînewîp porque setum jém injayuc. Da ti inasca.” ²⁸ Jesic tsam pîmi jóy jém achpic. Da tigiytooba jém iticjom. Jesic put jém ijatun. Nic icunucsáy iga tigíyîñ. ²⁹ Pero jém achpic imaníc inímáy ijatun: “Mich injodon iga tsam jáyan amtiy mancuyoxane. Siempre anwat juuts annímáypa. Pero da nunca anchiñe ni tum xutu chivo iga anasînap jém ánamigoyaj. ³⁰ Sîp núc yíp immanic jém imalmichcanewîp jém inñumiñ con jém yomtam jém witwidoypáppic. Mich iniccaáy jém mañxix jém tanacpînewîp.” ³¹ Jesic ijatun inímáy: “Mammanic, mich siempre miit con aich. Itumpiy jém ammichipic, immichitim mich. ³² Pero sîp agui wî iga tasînatámpa, tamaymáyatámpa porque caane idic jém injayuc, pero sîp vivojam. Togoyñe idic, pero sîp quejneum.”

16

Agui jáyayanjichich jém rico imayordomo

¹ Jesic jém Jesús inímáytim icuyujcîwiñ:

—It idic tum ricopic pîxiñ. Iniit tum mayordomo icuyoxap. Iwadáypa cuenta jém rico imîchi. Pero ocmi jém rico ijodóna iga síp imichcaáy jém itumiñ. ² Jesic jém rico inwejay jém pîxiñ. Iñímáy: “¿Tîi yîmpic ammatonpa iga síp inwat? Sîp wîtsaci inuenta, acîjunçodaayi titam inwatne con jém anyoxacuy. Porque sîp mantoppam. Dam je mammayordomo.” ³ Jesic jém icuyoxapáppic jém rico moj ijîs: “¿Sîp, ti wîap anwat siiga accáyaytap yíp yoxacuy? Da wîap anwat tunçac yoxacuy. Atsaaptim iga anwácpa tumiñ. ⁴ Sîp anjodon ti wîap anwat iga anaidiñ i apictsonpa iticcim cuando dam anai anyoxacuy. Ananécpa icuenta jém ijatsneyajwîp jém ánomi. Jesic jeeyaj apictsonpa iticcim cuando atoptawum jut ayoxap.” ⁵ Jesic jém pîxiñ moj inwejayaj jém ijatsneyajwîp jém iomi. Icwác jém mojjwîp miñi. Iñímáy: “¿Jutsan injatsne jém ánomi?” ⁶ Nîmpa: “Anjatsne cien barril de aceite.” Jesic jém icuyoxapaap jém rico inímáy jém ijatsnewîp: “Yîm it jém invale. Miñi micoñi yîm, wati tunçac vale. Accaami no más cincuenta barril.” ⁷ Ocmi icwác jém tunçac pîxiñ, inímáy: “¿Mich, jutsan injatsne jém ánomi?” Jesic nîmpa jém pîxiñ: “Ich anjatsne cien carga de trigo.” Jesic jém icuyoxapaap jém rico inímáy: “Yîm it jém invale, wati tunçac vale. Accaami no más ochenta carga.” ⁸ Ocmi cuando imaton jém rico, nîmpa: “Tsam jáyayanjichich jém acuyoxapaap idic.”

Jesic Jesús inímáy jém icuyujcîwiñ:

—Jém ityajwîp yíp naxyucmi, jém dapic icupicyajpa Dios, jeeyaj más jáyayanjichich que jém icupicneyajwîp Dios. ⁹ Jeeyucmi mannímáypa iga wîwadaayi jém yaachayajpáppic con jém inñumiñ jém iniitwîp yíp naxyucmi. Jesic iniit amigo iga mipictsonpa sînyucmi cuando micaaba.

¹⁰ Siiga tum pîxiñ iwîwatpa cuenta tum cosa dapic jutsan, jesic wîaptim iwat cuenta tum cosa jáyanpic. Pero siiga tum pîxiñ da iwîwatpa cuenta tum cosa dapic jutsan, jesic datim wîap iwat cuenta tum cosa jáyanpic. ¹¹ Siiga mimichtam da wîap inwatta cuenta jém riqueza jém itwîp yíp naxyucmi, jesic Dios datim michiiba jém sînyucmîpic riqueza. ¹² Siiga da inwîwadap cuenta jém tunçac pîxiñ imîchi, jesic da i michiiba jém cosa iga wîap immichâ porque da inwatpa cuenta.

13 'Tum esclavo, tum p̄ixiñ juyñew̄ip, da wiap icuyoxa wisten iomi. Porque tum itoypa y tum ijóyixpa. Tum iw̄inanigáypa y jém tunḡac da iw̄ixpa. Da wiap in̄cuyoxata Dios siiga tsam in̄toypa in̄tumiñ.

14 Jém fariseoyaj como tsam itoypa itumiñ, ixiccayajpa jém Jesús cuando imaton̄ ti nim.

15 Pero Jesús in̄imáy jém fariseoyaj:

—Mimichtam in̄yaac minin̄quejt̄ap iga w̄ibic mip̄ixiñ. Miñim̄an̄taayap iga w̄ibic mip̄ixiñ. Wiap immigóyayaj jém in̄t̄iw̄itam, pero Dios miixp̄igáypa in̄anama, tsam p̄imi ijóyixpa jém m̄igooyi.

Da i wiap iccuyaj jém Dios in̄mat̄i

16 'Wiñti it idic jém an̄químayooyi jém tachiiñew̄ip jém Moisés y jém wiñ̄cp̄ic profeta. Ocmi miñ jém Xiwan jém acch̄iḡoyp̄app̄ic. Moj in̄mat̄i jém w̄ibic an̄mat̄i juṡp̄ic in̄jacpa Dios ȳip naxyucmi. Siip tsam p̄imi t̄igiyajtooba jém p̄ixiñtam juṡ in̄jacpa Dios.

17 'Da i wiap iccuyaj jém Dios in̄mat̄i. Meega cuyajpa jém siḡ y jém nas, jém Dios in̄mat̄i tienes que iccupacpa, da togoypa ni tum t̄imi ni tum j̄iti.

Odoy tsaci in̄yomo iga imp̄icpa tunḡac yomo

(Mt. 19:1-12; Mr. 10:1-12)

18 'Siiga tum p̄ixiñ ichacpa iyomo y ip̄icpa tunḡac yomo, jesic pejóyapa. Siiga tunḡac p̄ixiñ ip̄icpa jém yomo, jém tsacnet̄aw̄ip, jesic pejóypatim.

Jém ricop̄ic p̄ixiñ y jém Lázaro

19 'It idic tum p̄ixiñ tsam rico. Siempre w̄icuyajpa con jém w̄ibic puctucu jém tsoowiyw̄ip. Cada jama s̄iḡap, maymáyp. Tsam w̄i it. 20 Ittim idic tum p̄ixiñ agui yaachap, in̄iyi Lázaro. Agui iquím̄cane puuci in̄acyucmi. Nicpa coñi jém Lázaro jém rico itic an̄naca. 21 Tsam yuap jém Lázaro. Icuttooba idic jém ipaccapaap jém rico imesac̄im. Jém chimpa icunúcyajpa jém Lázaro, in̄émáypa ipuuci. 22 Ocmi ca jém Lázaro. Jém s̄iḡyucmip̄ic p̄ixiñtam in̄inic s̄iḡyucmi jém w̄icom juṡ it jém Abraham. Jesic ocmi caatim mex jém rico. Cumta. 23 Jém ianama nic it̄i juṡ tsam yaachayajpa jém caaneyajw̄ip. P̄imi yaachap jém rico. Cuando ámn̄ic, juumi iix jém Lázaro wagaityaj con jém Abraham. 24 Jesic p̄imi an̄weypa jém rico. Nimpa: “Man̄jatun̄ Abraham, ayaachan̄jami. Acutsadaayi jém Lázaro iga imujiñ ician̄quiñi con ni iga m̄iñiñ amujáy antots iga cupagagaiñ porque siip p̄imi ayaachap juctjom.” 25 Jesic Abraham in̄imáy: “Man̄ic, j̄isi iga tsam miw̄it̄idic cuando danam micaane. Pero jém Lázaro tsam yaachap idic. Pero siip w̄i itum jém Lázaro, maymay. Mich tsam miyaachap. 26 Mannimáypatim iga it tum mijp̄ic pacus entre aichtam y mimichtam. Da i wiap ijac. Siiga ȳimp̄ic nic̄tooba jem̄ic, da wiap in̄as. Siiga jem̄icp̄ic miñtooba ȳim datim wiap in̄as.” 27 Jesic nimpa jém rico: “Man̄jatun̄ Abraham, man̄cunucsáypa, cutsat̄i jém Lázaro an̄jatun̄ itic̄im. 28 Anait cinco ant̄iw̄i. Accutsadaayi jém Lázaro iga in̄imáyiñ jém ant̄iw̄itam iga odoy m̄iñiñ ȳim juṡ tsam ayaachap ansi.” 29 Pero Abraham in̄imáy jém rico: “Jeeyaj iniit̄i jém Dios in̄mat̄i jém ijayñew̄ip jém Moisés y jém wiñ̄cp̄ic profeta. Wiap icupicyaj.” 30 Pero nimpa jém rico: “Da icupicyajpa, man̄jatun̄ Abraham, pero siiga nicpa tum jém caanew̄ip, jesic icucacpa ij̄ixi jém ant̄iw̄itam.” 31 Pero jém Abraham in̄imáy: “Siiga da icupicyajpa jém Dios in̄mat̄i jém ijayñew̄ip jém Moisés y jém wiñ̄cp̄ic profeta, jesic datim icupicyajpa siiga miñ in̄madáy tum caanew̄ip idic.”

17

Odoy acmalwat̄i tum in̄t̄iw̄i
(Mt. 18:6-7, 21-22; Mr. 9:42)

¹ Jesic Jesús iñímáy icuyujc#wiñ:

—Jutquej it jém malopic cosa iga micmalwatpa. Pero agui uuguytim jém p̄ixiñ jém ictán̄cawatpaap it̄iwitam. ² Tsam jáyan castigo ichiiba Dios jém icmalwatpáppic jém Dios ip̄ixiñtam. Más w̄i iga cutsénaytaiñ iisciyucmi tum molino icha y acpatsiytaiñ lamar jém malopic p̄ixiñ iga jiccaiñ que iga icmalwatpa tum jém yaguiñpic icupicne Dios. ³ Jesic cuidado iga immalwatpa.

'Siiga tán̄caiy tum iñ̄twi, an̄jijyaci iga ichaguiñ jém it̄anca. Siiga icacpa ij̄ixi, wadaaȳi perdón. ⁴ Siiga iñ̄twi mimalwadáypa siete veces tum jama, pero siete veces miñpa miñímáy iga: “Awadaaȳi perdón, an̄cucacum an̄jixi”, jesic wadaaȳi perdón siete veces.

Tañcupiguiñ iga Dios w̄iap iwat juuts taj̄ycámayñe

⁵ Jesic jém doce apóstolyaj miñ iñímayyaj jém Jesús:

—Mán̄omi, ayoxpátaami iga más an̄cupictámiñ iga Dios w̄iap iwat juuts aj̄ycámayñe.

⁶ Jesic tán̄omi iñímáy icuyujc#wiñ:

—Siiga uxan̄ in̄cupicpa iga Dios w̄iap iwat juuts mij̄ycámayñe, jesic ocmi más in̄cupicpa. Jex juuts tum mostaza ipac. Da jutsan̄ jém pac, pero ocmi naypa, mij̄ap. Numa meega in̄cupicpa uxan̄, jesic w̄iap iñ̄ímáy jém sicómoro cuy: “Nawixquím̄taji, niḡi miñ̄ayi lamar.” Jesic jém cuy mimaton̄pa. Iwatpa juuts iñ̄ímáypa.

Jém esclavo iwatpa juuts ip̄im̄íypa iomi

⁷ 'Siiga iniit mich tum esclavo oy ij̄it nas o oy iwat cuenta jém imborrego, jesic cuando setum iñ̄icc̄im, da iñ̄ímáypa jém íñesclavo iga miñ̄i miwiiqui. ⁸ Pero mich imp̄im̄íypa jém íñesclavo. Iñ̄ímáypa iga: “Awadaaȳi jém an̄wícuy. Accaami jém indelantal. Nam̄iñ̄i jém wícuy, tun̄i mesayucmi. Wiñ̄ti acwiici ich, acniici, jesic ocmi miwícpa y miñ̄icpatim mex mich.” ⁹ Datim in̄cuj̄ippa jém íñesclavo porque no más iwat juuts ip̄im̄íypa iomi. ¹⁰ Jesap̄tim mimichtam cuando yaj in̄wat juuts mip̄im̄iyñe Dios, jesic más w̄i iga iñ̄ímáypa Dios ȳim̄pic: “Aich mich ánesclavo. Da w̄i iga mich an̄cuj̄ippa porque no más an̄wat juuts mich amp̄im̄iyñe.”

Jesús icp̄is diez jém p̄ixiñ jém iniitw̄ip jém lepra

¹¹ Jesic iganam nicpa Jesús Jerusalén, naspa jém naxyucmi Samaria y Galilea. ¹² Núc tum xutu tiganjoj an̄ñaca. Iganam tiḡiy, ipát diez p̄ixiñ cupúgayñeyaj iñ̄aca. Juumi ts̄íyyaj iga odoy i icmachiñ jém caacuy. ¹³ Jesic p̄imi an̄weyaypa jém mimneyajw̄ip, n̄im̄yajpa:

—MiJesús, mamMaestro, ayaachan̄jamtaami.

¹⁴ Jesic Jesús iámmats, iñímáy:

—Niḡi wiñ̄quejaaȳi jém pan̄ijyaj.

Jesic mojum n̄iquiyaj. Iganam nicyaypa, jeeti rato w̄its̄iyum jém iñ̄aca, cuáyñeum. ¹⁵ Jesic tum de jeeyaj cuando iix iga pisneum, set eybic jut it Jesús. P̄imi j̄iypa, agui icuj̄ippa Dios. ¹⁶ Jesic jém p̄ixiñ costeñ̄neact̄in̄ jém Jesús ipuyc̄im. N̄im̄ayta Jesús: “Iyucup̄dios iga anacp̄is.” Jém p̄ixiñ Samariapic. ¹⁷ Jesic n̄im̄pa Jesús:

—¿Que da midieztam mip̄ista? ¿Jut it jém nueve? ¹⁸ ¿Set no más ȳip Samariapic p̄ixiñ iga icuj̄ippa Dios? Ȳip tun̄gac p̄ixiñ, da je de Israel.

¹⁹ Jesic Jesús iñímáy jém p̄ixiñ:

—Tsucumi, n̄icsim. Mich in̄cupicum iga Dios w̄iap micp̄is jeeyucmi micuáyñeum.

Juch̄is núcpa jém tiempo iga Dios in̄jacpa ȳip naxyucmi (Mt. 24:23-28, 36-41)

²⁰ Jém fariseoyaj icwácayaj jém Jesús: Iñímayyaj:

—¿Jup jama tsucumpa Dios iga in̄jacpa ȳip naxyucmi?

Jesic Jesús iñímáy:

—Cuando núcpa jém jama iga Dios injacpa yíp naxyucmi da ti iñixtámpa ni da ti quejpa.

²¹ Da i miñímáypa iga yim injacpa Dios o jeexic injacpa Dios porque siip núcneum iga injacpa Dios jém pixiñtam ianamanjom.

²² Ocmi Jesús inmadáy icuyujcwiñ:

—Ich amiñ siñyucmi iga aņwatpa jém Dios iyoxacuy. Núcpa jém tiempo iga michtam tsam iñixtamtooba jém jama iga amiñgacpa yíp naxyucmi. Pero da iñixtámpa. ²³ Núcpa jém migoyyajpaap, miñímáypa iga yim it o jeexic it. Odoy cupici. Odoy nigí aami. ²⁴ Jex juuts quénpa jém majywiñ, quejpa jutinquej. Jesabam aich, jém aMiññewiip Siñyucmi, cuando amiñgacpa yíp naxyucmi, itumpiy jém ityajwiip wiap aixyaj. ²⁵ Pero wiñti tsam pimi ayaachwattap. Jém pixiñtam, jém ityajwiip siip, tsam ajóyixyajpa; da awixyajpa. ²⁶ Juustim jém tiempo cuando it idic jém Noé, jesaptim jém tiempo cuando amiñgacpa yíp naxyucmi. ²⁷ Cuando it idic jém Noé, wicyajpatim, ucyajpatim. Aņcoomiyyajpatim, ichiyajpatim iyommanictam iga aņcoomiyyajpa hasta que tigiy jém Noé ibarcojom. Jesic quím jém ni, cumon icutero yíp naxyucmi. Actogoyyajta itumpiy. ²⁸ Jesanetim jém tiempo cuando it idic jém Lot. Jém pixiñtam wicyajpa y ucyajpatim, juyjúyoyajpatim y máymáyoyajpatim, ñipyajpatim y tigayajpatim. ²⁹ Pero cuando put jém Lot de jém atebet de Sodoma, actiñ siñyucmi jucti y azufre juuts chijóypa tuj. Actogoyyajta itumpiy jém Sodomapic pixiñtam. ³⁰ Jesanetim aich jém aMiññewiip Siñyucmi cuando eybic awiñquejpa yíp naxyucmi, da i ijodon jucha amiñpa.

³¹ Jesic cuando núcum jém jama, siiga químne algunos jém tigançobac, jesic odoy quediñ iga itoppa itraste jém itwiip iticjom. Jém nicnewiip icamjom odoy sediñ iga miñpa ipic itraste. ³² Jistaami ti iñasca jém Lot iwichomo. ³³ Jém pixiñ jém tsampic itoypa ivida yíp naxyucmi tienes que togoypa jém ivida. Pero jém dapic ijispa ivida yíp naxyucmi, je da togoypa ivida.

³⁴ Mannímáypa iga jeetim tsuu, wisten wagamonayajpa tseesmi. Tum nanictap, tum tsactap. ³⁵ Wagawayyajpa wisten yomo. Tum nanictap, tum tsactap. ³⁶ Wagayoxayajpa wisten pixiñ icamjom. Tum nanictap, tum tsactap.

³⁷ Mu imatonayaj icuyujcwiñ icwacyaj jém Jesús. Iñímayyaj:

—¿Mánomi, jut iñascayajpa jempic?

Jesic Jesús iñímáypa:

—Tsam wiñquejpa jut caane tum animat, jemum antuumaneyaj jém nuupuyaj. Jesaptim cuando núcpa jém jama, itumpiy pixiñtam wiap iixyaj.

18

Jém cunoya iwágáypa justicia jém juez

¹ Jesic Jesús inmat tum xutu cuento iga inquejáypa jém icuyujcwiñ iga inwejpátyajiñ Dios cada jama y odoy cutíñaiñ. ² Nimpa Jesús:

—It idic tum atebet tum juez. Da icinpa Dios, datim iwixpa ni tum pixiñ. ³ Iftim jém atebet tum cunoya. Tsam nicpa iám jém juez iga iwitsaguiñ jém ipleito. Nimpa: “Anjiyjací jém amalwadaypáppic iga odom más amoogíyíñ.” ⁴ Jém cunoya waciy oy iám jém juez, pero jém juez da imatónáypa. Pero ocmi ijispa icobacjom jém juez: “Ich da aņcinpa Dios ni datim aņwixpa ni tum pixiñ, ⁵ pero como yíp cunoya tsam miñpa acobacpij, siip anyoxpátpa. Da wiap anyachiy siiga seguido miñpa quejajwati.”

⁶ Nimpatim tánomi:

—Jistaami ti iwat jém malopic juez. ⁷ Pero da jex jém tanjatun Dios. Tsam iyoxpátpa jém icupinneyajwiip. Da jáypa iyoxpát jém inwejpátpáppic tsuucim y siñni. ⁸ Mannímáypa iga

Dios da jáyñe iyoxpátpa ipixiñtam. Pero cuando ich, jém aMiññewiip Siñyucmi, amiñgacpa yíp naxyucmi, da ampátpa wati jém icupicneyajwiip Dios.

Wisten pxiñ inwejpátyajpa Dios

⁹ It algunos ijisyajpa iga da táñcaíy. Jeeyaj tsam ijóyixyajpa los de más. Jesic Jesús moj inmat tum xutu cuento iga inquejáypa jeeyaj iga táñcaíy itumpiy jém pxiñtam. Inímáy:

¹⁰ —Nicyaj wisten pxiñ jém mijpic masticjom iga iwatyajpa oración. Tum jém fariseopic pxiñ. Tungac jém ichécpáppic impuesto. ¹¹ Jém fariseopic teñchucum, iyaac iwat oración. Nimpa: “ManDios, iyucuipdios iga ich da ajex juuts jém tungac pxiñtam jém táñcaiyçiwiñ, jém númpáppic y jém pejoypáppic. Ich da ajex juuts yíp ichécpáppic impuesto. ¹² Cada ocho día ich anwatpa ayuno wisciy. ManDios, manchiiba jém décima parte de itumpiy ancoñwiyooyi.” ¹³ Jesic jém ichécpaap impuesto tigiyñetim masticjom, pero da núcpa jut inwejpátyajpa Dios. Da wiap iámquím siñyucmi. Tsam ixonpa ipecho porque pimi anyácne iga imalwatne contra jém Dios inquímayooyi. Nimpa jém ichécpáppic impuesto: “ManDios, ayaachanjami, tsam atáñcaíy.”

¹⁴ Jesic nimitim Jesús:

—Mannímáypa iga Dios iccáyáy yíp pxiñ itáñca. Jesic setum iticciim, dam táñcaíy. Pero Dios da iccáyáy jém fariseopic itáñca. Porque jém innécpáppic jém itáñca, Dios da ipictsonpa. Pero jém dapic innécpa jém itáñca, Dios ipictsonpa.

Jesús ichi bendición jém xuxut tsixtam

(Mt. 19:13-15; Mr. 10:13-16)

¹⁵ Jesic tum jama namiñyajta jém xuxut tsixtam jut it Jesús iga ichigáyiñ icobac iga ichiñ bendición. Pero cuando iixyaj jém icuyujçiwiñ, iwogayyaj jém inimiññeyajwiip jém tsixtam. ¹⁶ Pero Jesús inwejáypa jém tsixtam. Inímáy icuyujçiwiñ:

—Ich anwianjam iga míñiñ aamyaj jém xuxut tsixtam. Odoy anjijyaci. Porque jém tigiyajpaap jut injacpa Dios jex juuts yípyaj xuxut tsixtam. ¹⁷ Numa mannímáypa siiga tum pxiñ da ijícpa iga injacpa Dios juuts tum xutu tsixi, jesic da wiap iñúc jut injacpa Dios.

Tum ricopic anjagooyi icwácpa Jesús

(Mt. 19:16-30; Mr. 10:17-31)

¹⁸ Jesic miñ tum Israelpic anjagooyi iga icwácpa Jesús. Inímáy:

—Wibic Maestro, ¿ti wiap anwat iga ampictsonpa jém vida jém dapic cuyajpa?

¹⁹ Jesic Jesús inímáy jém pxiñ:

—¿Tiiga miñimpa iga ich awi? It tum jém wibic, je jém tanjatun Dios. ²⁰ Inwijodon jém Dios inquímayooyi: “Odoy pejooyi; odoy accaoyi; odoy nuumi; odoy cumigooyi tungac pxiñ; toyi jém injatun con jém iñapa.”

²¹ Jesic jém pxiñ inímáy Jesús:

—Ich jempigam anwatne dende atsixiñam.

²² Mu imaton, Jesús inímáy:

—No más tum cosa mitogóyáy. Cumáyaayi itumpiy jém iniitwip, çhi jém tumiñ jém yaachayajpáppic. Jesic iniitpa jáyan wibic riqueza siñyucmi. Jesic miñi atunjiyi.

²³ Cuando imaton jém pxiñ, tsam pimi anyác porque tsam tumiñiy. ²⁴ Cuando Jesús iix iga tsam anyác jém pxiñ, jesic inímáy los de más:

—Tsam táñca iga jém ricopic núcyajpa jut injacpa Dios. ²⁵ Más dá táñca iñas tum camello jém núncuypac ijosjom que iga tigiyapa tum ricopic jut injacpa Dios.

²⁶ Jesic jém imatonneyajwiip inímayyajpa Jesús:

—¿Jesic i wiap iciiput?

²⁷ Jesús inímáy:

—Jém dapic wíap iwat jém p̄ixiñtam, wíap iwat Dios.

²⁸ Jesic jém Peto iñímáy Jesús:

—MánŌmi, aichtam antsacneum itumpiy jém anaitw̄ip iga mantún̄j̄ȳpa.

²⁹ Jesic Jesús iñímáy jém icuyujc̄wiñ:

—Numa mannímáȳpa, siiga iñchacpa iñtic o iñjatun̄ o iñapa o iñt̄iw̄itam o iñȳomo o imman̄ictam iga nicpa in̄wat juuts mip̄im̄áȳpa Dios, ³⁰ jesic Dios miw̄iyoȳpa ȳip naxyuc̄mi, ocm̄i nicpa miñti con Dios para siempre.

Eybic in̄mat̄pa Jesús iga accaat̄ap

(Mt. 20:17-19; Mr. 10:32-34)

³¹ Jesic Jesús in̄wejput jém doce icuyujc̄wiñ, iñímáy:

—Maton̄taami, s̄ip tan̄icpa Jerusalén. Jém wiñ̄ic̄pic profeta ijaychacne ti annascaaba aich jém aMiñ̄new̄ip S̄in̄yuc̄mi. Jemic Jerusalén cupacpa itumpiy juuts ijaychacne.

³² Ac̄ijun̄cottap jém tun̄gac p̄ixiñtam ic̄ijom̄ jém dapic je de Israel. Jeeyaj asaaȳyyaj̄pa, amal̄n̄imaȳyaj̄pa y at̄sujcayaj̄pa. ³³ P̄imi acótsyaj̄pa, ocm̄i accaayaj̄pa jém malopic p̄ixiñtam. Pero jém tucunaj̄ama ac̄p̄ist̄ap de jut̄ it̄ jém caaneyajw̄ip.

³⁴ Jém icuyujc̄wiñ da wíap icut̄iȳȳyaj ti iñímáy jém Jesús. Porque Dios da ij̄ic̄pa iga w̄iñ̄ icut̄iȳȳy. An̄écne jém j̄ixi para jeeyaj.

Jesús ic̄p̄is tum̄ cácht̄i de Jericó

(Mt. 20:29-34; Mr. 10:46-52)

³⁵ Jesic cuando núc noco Jesús jém at̄tebet Jericó, jemum coñ̄ tum̄ cácht̄i tun̄añ̄naca iga iwác̄pa tumiñ. ³⁶ Mu imaton̄ iga naspa ts̄am̄ j̄ayañ̄ p̄ixiñtam, jém cácht̄i icwác̄pa ti naspa.

³⁷ Jesic jém it̄yajw̄ip iñimaȳyaj jém cácht̄i:

—Naxi jém Jesús jém Nazaretp̄ic p̄ixiñ.

³⁸ Jesic p̄imi an̄wejpa jém cácht̄i. N̄impa:

—¡MiJesús, jém rey David miM̄anic, ayaachan̄jam̄i!

³⁹ Jesic jém an̄jagoyñ̄eyajw̄ip iñ̄icyaj iwogaȳyaj̄pa jém cácht̄i. Ip̄im̄iȳyaj iga odoy j̄iyiñ. Pero jesic más p̄imi j̄iȳpa jém cácht̄i. N̄impa:

—Jém rey David miM̄anic, ayaachan̄jam̄i.

⁴⁰ Jesigam̄ teeñ̄añ̄jac Jesús. Ip̄im̄iȳ jém it̄yajw̄ip iga inim̄iñ̄áyiñ̄ jém cácht̄i.

Cuando nanúct̄a jut̄ it̄ Jesús, jesic iñímáy:

⁴¹ —¿T̄i iñxun̄pa iga man̄wadáȳpa?

N̄impa jém cácht̄i:

—MánŌmi, ansun̄pa iga actojaaȳi ánixcuy.

⁴² Jesic Jesús iñímáy:

—Manactoj̄áȳpa iñixcuy. Iga ts̄am̄ in̄cup̄icne, Dios mic̄p̄is.

⁴³ Jeeti rato toj jém cácht̄i iixcuy. Ixixóypam. Mojum̄ it̄ún̄j̄ȳ jém Jesús. Icujíppa Dios. Jesic cuando itumpiy jém p̄ixiñtam iixyaj ti iñasca, icuj̄íppaȳpat̄im̄ Dios.

19

Jesús y Zaqueo

¹ Jesic tiḡiȳ Jesús Jericó, naxi id̄ic̄ jém at̄tebet. ² Jemum it̄ id̄ic̄ tum̄ p̄ixiñ̄ iñ̄iyi Zaqueo. An̄jagooyi id̄ic̄ de jém impuesto. Ts̄am̄ p̄imi rico. ³ Agui iixtooba jém Jesús, pero da wíap porque ts̄am̄ it̄ñ̄im̄. Agui chapa jém Zaqueo. ⁴ Jesic póyan̄tsucum̄ jém Zaqueo, an̄jagóȳ miñ̄ic, quim̄ tum̄ sicómoro cuyyuc̄mi iga w̄iñ̄ iix̄ Jesús porque jem̄igam̄ naspa. ⁵ Cuando naspa Jesús, iámquímáȳpa cuyyuc̄mi jut̄ it̄ jém Zaqueo. Iñímáy:

—MiZaqueo, impimi queti. Yíp jama nicpa manjójáy iñticiim.

⁶ Jesic jicsciy quet jém Zaqueo. Nic ichon jém Jesús, iwagananicpa iticciim. Tsam maymay jém Zaqueo. ⁷ Pero jém pixiñtam da iwianjamyaj iga nicpa Jesús con jém Zaqueo. Moj icujyyaj jém Jesús. Nimyaj:

—Da wí iga nicpa tanjójáy tum táncaywíp iticciim.

⁸ Ocmi teñchucum jém Zaqueo iticciim, iñímáy Jesús:

—Mánomi, sip anwécpa itumpiy jém anaitwíp. Cuccumi anchiiba jém yaachayajpápic. Siiga i ammigóyayñe iga annúmáy itumiñ, jesic anáseedáypa cuatro veces.

⁹ Jesic nimpa Jesús:

—Yíp jama ciacputtap jém ityajwíp yíp ticiim. Táncay idic, pero taich pixiñ, imanictim jém Abraham. ¹⁰ Ich, jém aMiññewíp Sinyucmi, miñ amméts jém togoñeyajwíp iga anciacputpa.

*Jesús inmat jém cuento de jém diez esclavo
(Mt. 25:14-30)*

¹¹ Iganam imatonyajpa, Jesús inmadáypatim jeeyaj tum xutu cuento. Porque da juumi jém Jerusalén y jém pixiñtam ijisyajpa iga dam jáyñe núcpa jém tiempo iga Dios injacpa yíp naxyucmi. ¹² Jesic Jesús iñímáy:

—It idic tum wibic pixiñ. Anwejaytap iga niguiñ iccámta juuts tum mijpic anjagooyi. Juumi nicpa ipic jém icargo. ¹³ Pero antes que nicpa, inwejay diez jém icuyoxapaap. Ichi cada tumtum cien tumiñ de plata. Iñímáy jeeyaj: “Nigi mimáymáyooyi iga iñyoxacaiñ yíp tumiñ hasta amiñgacpa.” Ocmi nic jém pixiñ. ¹⁴ Pero jém ityajwíp jém iñaxyucmi tsam ijóyxyajpa jém wibic pixiñ. Jesic jeeyaj icutsatyaj anmati hasta jut nicpa ipic jém icargo. Nimyajpa iga: “Da ansuntampa iga accámta yíp pixiñ juuts ananjagooyi.” ¹⁵ Pero jém wibic pixiñ oy ipic jém icargo. Eybic set iticmi. Mu iñúc, inwejayyaj jém icuyoxayajpaap, jém ichiñewíp jém tumiñ. Ijodónatooba jutsan icoñwiyñe jém itumiñ. Icwác cada tumtum de jeeyaj. ¹⁶ Núc jém wiñtipic. Nimpa: “Mánomi, jém cien tumiñ de plata icoñwiy mil tumiñ de plata.” ¹⁷ Jém anjagooyi iñímáy: “Agui wibic miyoxaciwiñ. Iga inwiyoxaca jém tumiñ, jesic manaccámpa como tum minjagooyi de diez attebet.” ¹⁸ Ocmi núc jém tungac icuyoxapaap. Iñímáy: “Mánomi, jém cien tumiñ de plata icoñwiy quinientos tumiñ de plata.” ¹⁹ Jém anjagooyi iñímáy: “Jesic manaccámpa como minjagooyi iga ininjacpa cinco attebet.” ²⁰ Jesic núcpa tungac jém icuyoxapaap. Nimpa: “Mánomi, yim it jém cien tumiñ de plata. Manaccáyayñe idic tum pañuelojom ²¹ porque agui acinpa. Ich anjodon iga tsam impimíypa jém iñyoxaciwiñ. Mich iñtobáyáy jém tungac pixiñ imichi pimimi. Tungac inippa jém cama, pero mich ininpa jém cosecha.” ²² Jesic nimpa jém anjagooyi: “Mich tsam mimalo. Sip mancipinpa con micham ininmati. Siiga injodon iga tsam ampimíypa jém anyoxaciwiñ y antobáypa jém tungac pixiñ imichi pimimi y iga ininpa jém cosecha jém dapic anñipne, ²³ ¿jesic tiiga da incucom antumiñ jém banco iga ich ampictsonpa antumiñ con icoñwiyoyi cuando asetum?” ²⁴ Jesic jém anjagooyi iñímáy jém ityajwíp: “Accáyaayi yíp pixiñ itumiñ. Chi jém iniitwíp jém mil tumiñ de plata.” ²⁵ Jesic nimyajpa jeeyaj: “Mánomi, iniitum mil tumiñ de plata.” ²⁶ Pero jém anjagooyi iñímáy: “Jém iniitwíp, anchiiba más. Jém dapic jutsan iniit, más anaccáyáypa jém uxanpic iniit. ²⁷ Sip namiñi yim jém dapic ixunyajpa iga ich accámta juuts anjagooyi iga ananjacpa. Accaayaji yim anwiñjom jém malopic pixiñtam.”

*Tigy Jesús jém Jerusalén
(Mt. 21:1-11; Mr. 11:1-11; Jn. 12:12-19)*

28 Jesic cuando yaj aḅmaṭi Jesús, moĵgacum niḅui Jerusalén, anĵagóypa iñic. 29 Jesic núcyajtoobam jém wiṣṭen attebet jém Betfagé y Betania. Coṭsic aḅnaça, jém coṭsic iñiyi Olivos. Jesic Jesús icutsat wiṣṭen jém icuyujc̄iwiñ iga iwatpa tum mandado.

30 Nímayyajta:

—Nictaami jém tiganĵoj jém tánámmocnewiip. Cuando miñúctámpa, impáttámpa tum burro tsenne. Jém burro da i queman iquímca. Wiji, anamíñaayi. 31 Siiga i micwácpa iga tiiga inwija, jesic nímaayi iga jém iñomi ixunpa.

32 Jesic nicyaj jém icutsatneyajw̄ip, ipátyaj juuts iñímáy Jesús. 33 Cuando iwijyajpa jém burro, jém iomi acwágóypa, iñímáy:

—¿Tiiga inwija amburro?

34 Jesic jém Jesús icuyujc̄iwiñ icutsonyay. Iñímayyaj:

—Porque jém tánomi ixunpa.

35 Nanigaytap Jesús jém burro. Jesic jém icuyujc̄iwiñ icutócyajpa jém burro con iyooti. Acquímta Jesús burroyucmi. 36 Iganam nicpa jém Jesús, jém ityajw̄ip itógayyajpa iyooti tunĵom juṭ witpa jém burro. 37 Jesic núcyajpa nocoĵom Jerusalén. Nasyajpa jém coṭsicaḅnaça iñiyi Olivos. Itúñiyyajpa itump̄iy jém icupicneyajw̄ip Jesús. Agui maymayyaj. Pimi jiyyajpa. Icujípyajpa Dios iga agui jáyan wib̄ic milagro iixyaj. 38 Nímyajpa jém Jesús icuyujc̄iwiñ:

—Tanĵatun Dios tacutsadáy tum Rey, w̄i iga iw̄iwadáyin Dios. Maymáayyajpa jém ityajw̄ip siñyucmi. Siip agui cujíptap tanĵatun Dios jém yucm̄ic it.

39 Jesic algunos jém fariseoyaj jém ityajw̄ip jém p̄ixiñtamanĵom, iñímayyaj jém Jesús:

—Maestro, anĵiyjaci jém inçuyujc̄iwiñ porque icujiyyajpa Dios.

40 Pero Jesús iñímáy jém fariseoyaj:

—Mannímaytámpa siiga jeeyaj da icujípyajpa Dios, jesic jiyyajpa jém tsa jém itw̄ip tun aḅnaça.

41 Cuando núc nocoĵom jém Jerusalén, mu iix jém attebet, agui wejpa Jesús. 42 Nímpa:

—Agui miuuguytim mimichtam miittanw̄ip ȳip Jerusalén. Núctip jém wib̄ic aḅmaṭi iga miciaçputpa Dios, pero mimichtam da inw̄ianĵamta. Siip nasum jém ĵama iga impictsonĵámpa jém wib̄ic aḅmaṭi. 43 Núcpa jém ĵama iga miyaachwattamtap. Jém iñenemigoyaj micuteñx̄etpa icuwoyo ȳip attebet. Micunúcyajpa cada lado hasta da juṭ w̄iap imput. 44 Miccutinĵamtap naxyucmi. Miswattaptim itump̄iy jém t̄icyaj, cujegáypatim jém tsaataañi. Da ts̄iypa ni tum jém tsa juṭ cutatsquetne. Yajpa miccucaaytamta iñtump̄iytam. Miñtip Dios iga miciaçputtámpa, pero michtam da inw̄ianĵamta.

Jesús iw̄itsac jém m̄ijpic m̄astic

(Mt. 21:12-17; Mr. 11:15-19; Jn. 2:13-22)

45 Jesic t̄igiy Jesús jém m̄ijpic m̄asticĵom. Iquebacput an̄sicmi itump̄iy jém máymáyoyp̄ap̄ic y jém juyjúoyp̄ap̄ic.

46 Jesús iñímáy:

—Jempam jaychacnetā jém Dios inmaṭi, nímpa Dios iga: “Ich antic juṭ jém amp̄ixiñtam inwejpátyajpa Dios. Pero siip jém númyajpaap yamyajpa jém Dios iticĵom.”

47 Jesic ocmi accuyujóypa jém Jesús cada ĵama jém m̄ijpic m̄asticĵom. Pero jém panij anĵagooyiyaj con jém escribasp̄ic maestroyaj con jém Israelp̄ic anĵagooyiyaj ts̄am imétsyajpa jutsap iccaayaj jém Jesús. 48 Pero da ipátyajpa jutsap icca. Porque itump̄iy jém p̄ixiñtam p̄imi iw̄ianĵamyaj iga imatonyajpa jém Jesús inmaṭi.

20

*Acwácta Jesús i icutsat**(Mt. 21:23-27; Mr. 11:27-33)*

¹ Tum jama accuyujóypa Jesús jém mijpic masticjom. Inmadáypa jém p̄ixiñtam jém wibic añmati iga Dios taciaputpa. Jesic núcyaj jém panij añjagooyiyaj con jém escribaspic maestroyaj. Wagamiñyaj con jém wídaytam. ² Nímayta Jesús:

—Anímaayi: ¿I miñímáy iga inwatpa ȳimpic? ¿I mip̄imíy?

³ Jesic Jesús icutson. Iñímáy:

—Ichgacti manacwácpa. Anímaayi: ⁴ ¿I ip̄imíy jém Xiwan jém acchínóypaap? ¿Dios ip̄imíy o jém p̄ixiñtam?

⁵ Jesic jém añjagooyiyaj moj nanímayyajtaji entre jeeyaj:

—Siiga tannímáypa iga Dios ichi ip̄imi jém Xiwan iga acchínóypa, jesic wiap tanímáy iga: “¿Jesic tiiga da incupicta?” ⁶ Pero siiga tannímáypa iga Dios da ichi ip̄imi jém Xiwan, jesic itumpiy jém p̄ixiñtam tanácscaaba tsaami porque jeeyaj icupicyajpa iga nunta profeta jém Xiwan.

⁷ Jesic jém añjagooyiyaj icutsonyaj iga da ijodon̄ i ichi ip̄imi jém Xiwan.

⁸ Jesic Jesús iñímáy:

—Ich datim mannímáypa jut ampic jém ampimi iga añwatpa juuts s̄ip añwat.

*Jém malopic yoxac̄wiñ**(Mt. 21:33-44; Mr. 12:1-11)*

⁹ Jesic Jesús moypa inmat tum xutu cuento iga inquejáypa jém p̄ixiñtam. Iñímáy:

—It idic tum p̄ixiñ. Iniiit tum jaca nas. Iñip tum finca de uvas. Ocmi icnucs jém iñas tunḡac jut̄en yoxac̄wiñ. Jesic jém nas iomi nic̄ iti tunḡac naxyucmi. ¹⁰ Ocmi núc jém tiempo iga itúcyajpa jém uvas. Jém nas iomi icutsat tum jém icuyoxapaap iga iwéguiñ jém uvas con jém acnucsnetaw̄ip jém nas. Pero p̄imi cótsta, acsetta, da ti ichiiyaj. ¹¹ Jesic jém nas iomi icutsat tunḡac jém icuyoxapaap. Pero cótst̄atim, malnámayt̄atim. Datim i ichi jém uvas. ¹² Jesic jém nas iomi tuc̄iy icutsat tunḡagam jém icuyoxapaap, pero accoowata, quebacputt̄atim.

¹³ ‘Ocmi ijs̄ jém nas iomi: “¿T̄i wiap añwat? Añcutsatpa jém ammanic jém tsampic antoypa. Ich animpa iga w̄ixtap jém ammanic.” ¹⁴ Jesic jém p̄ixiñ iman̄ic nic̄ ipic jém uvas. Pero mu iixyaj jém icnucsneyajw̄ip jém nas, nanímayyajt̄ap: “Ȳibam ipictson̄pa jém ijatun̄ im̄ichi. S̄ip tanaccaaba. Jesic taichtam tamm̄ichap ȳip nas.” ¹⁵ Jesic matsta jém p̄ixiñ iman̄ic, quebacputta, accaatā añs̄icmi.

Jesic Jesús icwác jém p̄ixiñtam:

—S̄ip anímaayi: ¿T̄i iwatpa jém nas iomi con jém malopic p̄ixiñtam? ¹⁶ Ich animpa iga miñpa iccucaáy itumpiy jém icnucsnew̄ip jém iñas. Iméts̄pa tunḡac iga iyoxac̄aiñ jém finca de uvas.

Cuando imatonyajpa junimpa Jesús, jesic n̄imyaaj jém añjagooyiyaj:

—iNi Dios da ixunpa iga tannascaaba jempic!

¹⁷ Jesic Jesús p̄imi iámmats jeeyaj. Iñímáy:

—¿Jesic ti n̄imtooba jém Dios inmati jém jayñew̄ip?

Jém ticwatpaap ipatsáy jém tsa.

Ocmi eybictim pin̄ta,

accám̄ta jut tsucumpa jém tigan̄taana.

S̄ip jeetim tsa icópacne jém tic.

¹⁸ N̄imtim Jesús:

—Siiga michutpa yíp tsaayucmi, micusámáypa juuts tum majcuy. Siiga micuchij-quetpa yíp tsa, michíypa juuts pooti.

I tanyojáypa jém impuesto

(Mt. 22:15-22; Mr. 12:13-17)

¹⁹ Jém panij anjagooyiyaj con jém escribaspic maestroyaj imatsyajtooba idic jém Jesús jeeti rato. Porque icutiyyiyaj iga jeeyaj icuyucmi inmatpa jém xutu cuento. Pero da wiap imatsyaj. Icinjaypa jém pixiñtam. ²⁰ Jesic agui icuixyajpa jém Jesús. Icutsatyajpa jém icusutsyajpáppic. Jeeyaj nímanṭaayayajpa iga icuyujcayajpa jém Jesús inquímayooyi. Pero migóypa. Imétsyajpa jutpic wiap iquejajwadayyaj, icijunṭocotyajtooba Jesús jém gobernador icijom. ²¹ Jeeyucmi icwácyajpa Jesús, nímayṭa:

—Maestro, anjodónata iga ininmatpa jém wibic jixi. Tsam wi jém íñanama. Mich da ammigóyáypa, siempre ininquejpa jém numapic anquímayooyi jém tachiiñewip Dios.

²² Jesic anímaayi: ¿Wi iga tanyojáypa impuesto jém Romapic anjagooyi o da wi?

²³ Pero Jesús icutiyyiyaj iga agui jáyayanjichich jém icusutsyajpaap. Inímáy:

—¿Tiiiga ancutitstámpa? ²⁴ Anquejaayi tum jém tumiñ. ¿I iwiñpac, i iniyi accámayñeta yíp tumiñyucmi?

Jesic nímyaj jém pixiñtam:

—Jém César, jém Romapic anjagooyi.

²⁵ Jesús inímáy:

—Jesic jém Césarpic imichi, chiitaami jém César. Jém Diospic imichi, chiitaami Dios.

²⁶ Pero Jesús da ti inmat jém pixiñtamanjom iga jém ienemigoyaj da wiap iquejajwadayyaj. Ipooñanjamyajpa iga agui wiap icutson Jesús. Jém icutitsyajpáppic dam más jiy.

Jutsap icpisyajta jém caaneyajwip

(Mt. 22:23-33; Mr. 12:18-27)

²⁷ Ocmi miñ iámyaj Jesús algunos jém saduceoyaj. Jeeyaj da icupicyajpa iga Dios icpíspa jém caaneyajwip. Icwácyajpa jém Jesús, nímyajpa:

²⁸ —Maestro, jém Moisés tajaychagayñe iga siiga caaba tum pixiñ y ichacpa iyomo da manigíy, jesic jém pixiñ itiwí ipigáypa jém iyomo iga inimanicwatpa. Tsíypa jém imaníc juuts jém caanewip imaníc. ²⁹ Jesic it idic tum pixiñ con siete ijaymaníc. Ancoomíypa jém más achpic. Ocmim ca. Da ichac ni tum imaníc. ³⁰ Jesic jém ipiitsi ipic jém icapay, jém cunoya. Ocmi jém pixiñ caatim mex je. Datim inimanicwat jém yomo. ³¹ Jesic jém tunṭac ijáyuc ipictim jeetim yomo. Jempigam iwatyaj icusiete. Ca itumpiy. Ni tum da inimanicwat jém yomo. ³² Ocmi caatim mex jém cunoya.

³³ Jesic acwácta Jesús:

—Anímaayi cuando acpisyajtap jém caaneyajwip, ¿jup de jeeyaj tsíypa iga jém yomo iwídaya? Icusiete inincoomiñeyaj jém yomo.

³⁴ Jesic Jesús icutson. Nimpa:

—Jém ityajwip yíp naxyucmi jém pixiñtam y jém yomtam ancoomiyyajpa, napicyajtap.

³⁵ Pero jém wiapaap inicyaj sinyucmi, jém icpisyajpáppic Dios de jém caaneyajwip, dam ancoomiyyajpa, dam napicyajtap jém pixiñtam con jém yomtam. ³⁶ Jém nícyajpáppic sinyucmi da eybic caayajpa. Tsíyyajpa juuts jém sinyucmic pixiñtam. Jeeyaj Dios imanictam porque Dios ichiiyaj jém jomipic mjtay. ³⁷ Jém Dios inmati, jém ijaychacnewip jém Moisés, tanquejaytámpa iga acpístap jém caaneyajwip. Nimpa iga cuando jípsa jém xutu cuy, Dios inímáy jém Moisés iga: “Ich jém Abraham aDios, jém Isaac aDios y jém Jacob aDios.” ³⁸ Quejpa iga tanjatun Dios da je jém caanewíppic iDios, je jém vivopíc iDios.

³⁹ Jesic jém escribaspic maestroyaj inímayyaj jém Jesús:

—Maestro, miw_ini_m.

⁴⁰ Da eyb_ic icwácyajpa. Ici_inyaj.

I imanic jém Cristo

(Mt. 22:41-46; Mr. 12:35-37)

⁴¹ Jesic jém Jesús iñimáy jém p_ixiñtam:

—¿Jutsap iñimayaj iga jém Cristo jém rey David imanic? ⁴² Pero jém David ijaychacne jém Salmoj_om:

Jém tanJatuj Dios iñimáy jém tán_omi Cristo:

“Coñi y_im anan_wi_mi

⁴³ hasta que incoñw_iy jém mijóyixyajpaap.”

⁴⁴ ¿Pero jutsap icháy jém Cristo juuts jém David imanic siiga n_imtim jém David iga jém Cristo je jém i_omi?

Wogayta jém maestro de jém Israelpic anquímayooyi

(Mt. 23:1-36; Mr. 12:38-40; Lc. 11:37-54)

⁴⁵ Iganam imaton_yajpa it_ump_iy jém p_ixiñtam, Jesús inquejáy_{pa} jém icuyujc_iwiñ. Iñimáy:

⁴⁶ —¡Nawattaji cuenta! Odoy wat_i juuts iwatyajpa jém escribasp_ic maestroyaj. Agui iw_ianj_yamyaj iga iccámyajpa jém yagatsyooti. Agui iw_ianj_yamyaj iga tandioschiiñ calle. Imétsyajpa jém más yucm_ip_ic coñcuy jém sinagoga. Cuando nicpa sín_yaji icusúniyyajpa jém más w_ib_ic coñcuy jut w_icyajpa. ⁴⁷ Agui jáy_{pa} inwejpát Dios iga tamigóyáy_{pa}. Pero ocmi iccáyáy_{pa} jém cunoya itic. Yíp malop_ic p_ixiñtam ipictson_yajpa tsam mijp_ic castigo cuando nicpa iyoj itánca.

21

Jém pobrepic cunoya inimíñáy Dios tum ofrenda

(Mr. 12:41-44)

¹ Jém mijp_ic masticj_om ámquím Jesús, iix jém ricop_ic icotyajpa tumiñ jém cajonj_om jut cottap ofrenda. ² Iixtim tum pobrepic cunoya. Icot cajonj_om w_isten xuxut tumiñ.

³ Nimpa Jesús:

—N_uma, mannímáy_{pa} iga yíp pobrepic cunoya más chióy que it_ump_iy jém miññeyajw_ip. ⁴ Yípyaj rico icotyajpa cajonj_om no más jém cutsíyñew_ip. Pero yíp yomo aunque tsam yaachap, icuchiáy Dios it_ump_iy jém iniitw_ip. Dam ti initsíy iga ijuypa iwíccuy.

Nimpa Jesús iga miswattap jém mijp_ic mastic

(Mt. 24:1-2; Mr. 13:1-2)

⁵ Nimyajpa jém icuyujc_iwiñ:

—Agui w_iwatneta yíp mijp_ic tammastic. Agui w_itamp_ic tsa accamayñeta. Agui w_itamp_ic xaja jém inimíñew_ip jém p_ixiñtam iga ichiiba Dios.

Jesic nimpa Jesús:

⁶ —Núcpa jém jáma iga miswattap yíp mijp_ic mastic. Da cutatsquetnee_{ba} icháy ni tum tsa. It_ump_iy accujegayyajt_{ap}.

Jém seña iga tánixpa antes que cuyajpa yíp nas

(Mt. 24:3-28; Mr. 13:3-23)

⁷ Jesic jém icuyujc_iwiñ icwácyaj jém Jesús. Nímayta:

—¿MamMaestro, juchis naspa yípyaj cosa? ¿Jup seña tánixtampa cuando núctooba it_ump_iy yípyaj cosa?

⁸ Nimpa Jesús:

—Nawattamtají cuenta iga odoy í mimigóyáyiñ. Porque miñyajpa wati jém migoyyajpaap ich anniyimi. Ninyajpa iga: “Ich aCristo”; y “Siip núcum jém tiempo.” Pero odoy cupici. Odoy túnyiyi. ⁹ Cuando immatontámpa iga miñpa jém guerra y miñpa jém bulla, odoy cñi. Porque wiñti naspá itumpiy jexpic cosa. Pero danam jobit togoypa yíp nas.

¹⁰ Iñimáytim Jesús:

—Tum nación ányajpa con tungac nación. Tum naxyucmi iwatyajpa guerra con tungac naxyucmi. ¹¹ Miñpa jém mijpic nasyixi. Miñpa mijpic yuu, miñpa tsam jáyan caacuy jutinqej. Miñpa jém cosa agui michiganjécpa. Quejyajpa jém mijpic seña sinyucmi.

¹² Pero wiñti mimatstamtap mimichtam. Mimalwadaytamtap. Mininictamtap jém sinagoga iga miquejajwadaytamtap. MicUcomtamtap cárcel. Mininictamtap jém rey iwiñjom y jém gobernador iwiñjom. Mijóyixtamtap ich añcuyucmi. ¹³ Jesic cuando miñúctámpa jém anjagooyicim wiap ininmadayta jém wibic añmati. ¹⁴ Odoy wadaayi caso jutsap inicupujta iñyaac, ¹⁵ porque manchiiba añmati jutpic inçutsonpa. Manchiiba jém wibic jixi. Jém mijóyixpaap da wiap micoñwiy. Da wiap micseedáy jém ininmati. ¹⁶ Algunos de michtam mijóyixtámpa jém injatun o inapa o inñwi o inamigo. Mimatstamtap iga micñjunçottap jém anjagooyicim. Miccaatamtap algunos de mimichtam. ¹⁷ Itumpiy jém pixiñtam jém ityajwip yíp naxyucmi mijóyixtámpa ich añcuyucmi. ¹⁸ Pero da togoypa ni tum inway jém iniitwip inçobacyucmi. ¹⁹ Siiga iñyaachíypa cuando pimi mimalwadaytap, jesic inçoñwiy jém invida.

²⁰ Pero cuando inixtámpa iga cutánsetneum Jerusalén con soldado, jesic inñjodonam iga jobit togoypa jém attebet. ²¹ Siiga miit jém naxyucmi de Judea, jesic poytaami, nictaami jém çotsiganjom. Siiga miit jém attebet de Jerusalén, jesic puttaami, poytaami. Siiga miit añsícmi, jesic odoy tigiyi jém attebet. ²² Porque núcum jém jama iga Dios ichiiba castigo jém Jerusalénpic pixiñtam. Cupacpa jém añmati jém ijaychacnewip jém wiñcpc añmatciwiñ. ²³ Agui uuguytim jém yomtam jém maniccomcanewip y jém ictsútspáppic jém xuxut tsixtam. Porque miñpa tsam jáyan anyaaqui yíp naxyucmi. Jém Israelpic pixiñtam ipictsonyajpa tsam mijpic castigo. ²⁴ Cuando miñpa jém guerra tsam jáyan accaayajtap, matsyajtap, nanicyajtap juumi hasta icuwiti yíp naxyucmi. Jém juumipic pixiñtam miñpa iti yíp Jerusalén, imichap hasta cupacpa jém tiempo iga Dios ijigáypa iga tsíyyajpa jem.

Jutpic miñgacpa jém tánomi Jesús

(Mt. 24:29-35, 42-44; Mr. 13:24-37)

²⁵ Jesic quejpa jém seña jém jamyucmi, jém poyayucmi y jém matsaanjom. Itumpiy jém pixiñtam icuwiti yíp mundo tsam pimi cñyajpa cuando imatonyajpa iga pimi jupa y tsigóypa jém lamar. Da icutiyyiyajpa ti wiap iwatyaj. ²⁶ Iga agui cñyajpa, jém pixiñtam cupónaquetyajpa cuando iixyajpa ti naspá yíp naxyucmi. Tsigoyyajpa jém matsa jém ityajwip sinyucmi. ²⁷ Cuando amiñgacpa, aich jém aMiñnewip Sinyucmi, jesic itumpiy jém pixiñtam jutquej yíp naxyucmi wiap aixyaj. Amiñgacpa ucsiyucmi juuts tum mijpic añjagooyi, anamiñpa jém Dios ipimi. ²⁸ Cuando moypa naxi yípyaj cosa, maymáyaj, agámquiimi inçobac, porque dam jáyñe miciaçputtámpa Dios.

²⁹ Inmattim Jesús yíp xutu cuento:

—Ámtaami jém tsuj y jém tungac cuyyaj. ³⁰ Siiga inixtámpa iga químpa jém mañipic iay, jesic inñjodon iga da jáypa naspá jém cujamsin, miñtooba jém cutujci. ³¹ Jesanetim cuando

iñixtámpa iga naspa yíp cosa, iñjodoñtam iga núctoobam jém jama iga Dios iñjacpa yíp naxyucmi.

³² 'Numa mannímaytámpa iga da yajpa cucaaayiyaj jém ityajwip jém tiempo hasta cupacpa itumpiy juuts mannímayñe. ³³ Cuyajpa jém siñ y jém nas, pero ich anañmati cupacpa, da nunca cuyajpa.

³⁴ 'Cuidado iga mancupiichciyapa cuando amiñgacpa. Da wi siiga tsam it jém malopic jixi iñanamanjom, tsam miucpa, tsam iñjspa jém iniitwip yíp naxyucmi. ³⁵ Jém jama miñpa juuts wimpa tum trampa, ichiganjécaypa jém pixiñtam icuwiti yíp naxyucmi, jém dapic anjócneyaj. ³⁶ Nawitsacnetamtaji, odoy tsaci iga iniñwejpáttámpa Dios iga Dios miyoxpádiñ iga odoy immalnascañ cuando miñpa jém jama. Jesic wiap iññuc ich añwiñjom jém aMiññewip Siñyucmi.

³⁷ Jesic siñni Jesús inquejáypa jém ityajwip jém mijpic masticjom. Tsucim nicpa iti jém cotsicyucmi, jém cotsic iñyi Olivos. ³⁸ Cada cuqueja nicaypa jáyan jém pixiñtam jém mijpic masticjom iga imatoñyajpa jém Jesús.

22

*Jém ienemigoyaj iñisyajpa jutsap imatsyaj jém Jesús
(Mt. 26:1-5, 14-16; Mr. 14:1-2, 10-11; Jn. 11:45-53)*

¹ Jesic núctooba jém siñ iga icútyajpa jém caxtánañi sin levadura, iñyi jém pascuasñ. ² Jém panij anjagooyiyaj con jém escribaspic maestroyaj imétsyajpa jutsap iccaayaj jém Jesús. Pero da wiap imatsyaj porque icñyajpa jém pixiñtam.

³ Jesic ocmi jém Wocciwiñ tigy jém Judas Iscariote iñanamanjom. Je tum de jém docepic icuyucwiñ. ⁴ Jesic jém Judas nic inmadáy jém panij anjagooyi y jém comandante de jém masticjompic policia jutsap icñjuncot jém Jesús. ⁵ Jesic agui maymayyaj jeeyaj. Iñimayyaj iga ichiiba tumiñ jém Judas cuando icñjuncotpa jém Jesús. ⁶ Jesic jém Judas iwat trato con jeeyaj. Moj iméts jutpic icñjuncotpa jém Jesús cuando da iyaj jém pixiñtam.

*Jém tánomi ictsucum jém Santa Cena
(Mt. 26:17-29; Mr. 14:12-25; Jn. 13:21-30; 1 Co. 11:23-26)*

⁷ Jesic núcum jém jama iga iwatyajpa jém siñ iga icútyajpa jém caxtánañi sin levadura, jém pascuasñ cuando accaayajtap jém mañborrego. ⁸ Jesús icutsat jém Peto con jém Xiwan iga iwitsacpa jém wíccuy. Nímayyajta:

—Nigi wattaami jém wíccuy iga tanacnaspá jém pascuasñ.

⁹ Icwacyajpa jeeyaj, nímayta Jesús:

—¿Jut iñxunpa iga tasñatámpa?

¹⁰ Icutsonpa Jesús, nímaytap jém Peto y jém Xiwan:

—Cuando mitigiytámpa jém atebet, impáttámpa tum pixiñ ininicpa tum majcuy ni. Túnjyaami hasta núcpa jém ticim jut tigyapa. ¹¹ Nímaayi jém tic iomi iga jém imMaestro iñimáypa iga: “¿Jut it jém cuarto jut asñatámpa con jém añcuyucwiñ?” ¹² Jesic jém tic iomi minquejáypa tum mijpic cuarto jém yucmipic piso, witsacneum, jut it itumpiy cosa iga tawícmonjámpa. Jemum wattaami jém wíccuy.

¹³ Jesic nicyaj, ipátyaj jém tic juuts iñimáy Jesús. Jemum iwatyaj jém wíccuy iga wícmonyajpa jém pascuasñ.

¹⁴ Jesic núcum jém hora iga wícyajpa. Coñyajum Jesús jém mesacim con jém doce apóstolyaj. ¹⁵ Jesic iñimáy jeeyaj:

—Tsam ansunpa iga anwatpa yíp siñ con mimichtam antes que ayaachwattap. ¹⁶ Mannímaytámpa iga da eybíc tawagawícpa jém pascuasíñ hasta que núcpa jém jama iga Dios injacpa yíp naxyucmi.

¹⁷ Jesic Jesús ipíc tum copa icíjóm. Inwejpát Dios.

Jesigam iñímáy jém icuyujcwiñ:

—Píctaami yíp copa. Wéctaami entre mimichtam. ¹⁸ Mannímaytámpatim iga da eybíc ánuropa yíp uvas iñi hasta que miñpa jém jama iga Dios injacpa yíp naxyucmi.

¹⁹ Jesic imatspic tum caxtánañi. Cuando yaj inwejpát Dios, iwéc jém caxtánañi, ichi jém icuyujcwiñ. Iñímáy:

—Yíp caxtánañi ich ammijtay. Anchiiba ammijtay iga accataiñ para mimichtam. Wattaami yimpic iga anjístámpa mimichtam.

²⁰ Ocmi jempectim iwat con jém copa. Cuando yajum wiiqui, iñímáy icuyujcwiñ:

—Yíp copa jém jomipic trato jém anwatpáppic con mimichtam iga manwitsagáypa iñtáñca cuando antegáypa anniipiñ.

²¹ 'Siip yim it con taichtam jém acíjuncotpáppic. It ici yíp mesayucmi. ²² Numa ich accaatap, jeeyucmi jém anjatun Dios acutsat yíp naxyucmi. Pero agui uuguytim jém pxiñ jém acíjuncotpaap jém malopic pxiñtam icíjóm.

²³ Jesic moj nacwácyajtaji entre jeeyaj iga i icíjuncotpa jém iMaestro.

I tsíypa juuts jém más mijpic anjagooyi

²⁴ Ocmi moj añajiyaj jém icuyujcwiñ. Nacwácyajta entre jeeyaj iga i tsíypa juuts jém más mijpic anjagooyi de jeeyaj.

²⁵ Pero Jesús iñímáy:

—Yíp naxyucmic rey tsam pími iccámpa orde. Tsam ipimíypa jém ipxiñtam. Pero jeeyaj icujípyajpa jém irey aunque agui ipimíy. ²⁶ Pero mimichtam odoy watí jempic. Da wí iga tsam impimíypa jém iñtíwítam. Entre mimichtam jém más mijpic anjagooyi tienes que tsíypa juuts jém más mañipic. Jém más mijpic tienes que micuyoxatámpa iñtumpiytam. ²⁷ ¿I más iniit ipimi, jém coññewip mesacim o jém icuyoxapaap, jém inimiñpáppic jém wíccuy? Mannímáypa iga ich amiñ iga mancuyoxap.

²⁸ Nímtim Jesús:

—Mimichtam siempre miitta con aich cuando tsam acutítsta. ²⁹ Jeeyucmi manchiiba jém pími iga michíytamiñ juuts minjagooyítam cuando ich miñpa ananjac jém ityajwip yíp naxyucmi. Siip manchiiba jém ampimi porque ich achiiñe jém anjatun Dios. ³⁰ Tawagaittámpa cuando miñpa ananjac jém pxiñtam yíp naxyucmi. Miwíctámpa y miñíctámpa ammesacim. Miwagacoñtámpa jém anjagooyi icóñcuyucmi iga inçipintámiñ jém doce tribu de jém Israelpic pxiñtam.

Nimpa Jesús iga Peto inécpa (Mt. 26:31-35; Mr. 14:27-31; Jn. 13:36-38)

³¹ Jesic Jesús iñímáy jém Peto:

—MiPeto, ixi iga jém Wocciwiñ miwácneta iñtumpiytam. Tsam micutítspa siiga numa inçupicneta Dios. Micuxicstámpa juuts trigo. ³² Pero ananjepátpa Dios para mimich iga odoy inçaguiñ iga inçupicpa Dios. Pero ocmi cuando eybíc inçupicsetpa Dios, jesic yoxpaati jém iñtíwítam iga iwícupicyajiñ.

³³ Jém Peto iñímáy Jesús:

—Mánomi, aít listo iga tawaganicpa cárcel con mimich. Wiaptim tanwagaca.

³⁴ Pero jém Jesús iñímáy:

—MiPeto, mannímáypa iga yíptim jama antes que aṇwejpa jém cayu anaṇécpa túcciy, miñimpa iga da ánixpicpa.

Núcum jém jama iga yaachwattap jém Jesús

³⁵ Jesic Jesús iñímáy jém icuyujcñwiñ:

—Cuando maṇcutsatta sin morral, ni jém iñtumiñ accáycuy, ni tunḡac inçiac; ¿jesic ti mitogóyáy?

Nimyaj jém icuyujcñwiñ:

—Da ti.

³⁶ Jesic Jesús iñímáy jeeyaj:

—Siiga sñp inimiññe jém immorral o jém iñtumiñ accáycuy, jesic wiap ininíc. Siiga da iniñ tum espada, maayí jém iñchamarra iga iñjuypa. ³⁷ Mannímáypa iga numa anaccupacpa jém Dios inḡati jém jaychacnetawñp. Nimpa así: “Matstap jém Cristo, chiitap castigo juuts tum accaoyñewñp.” Cupacpa itumpiy juuts jaychacnetā jém Dios inḡati.

³⁸ Jesic nimyaj jém icuyujcñwiñ:

—Mánomi, yñim it wisten espada.

Nim Jesús:

—Itum wñ.

Jesús inḡejpát Dios jém lugar Getsemaní

(Mt. 26:36-46; Mr. 14:32-42)

³⁹ Jesic put Jesús, nic juuts icostumbre jém Olivos cotsic. Itññyyaj jém icuyujcñwiñ.

⁴⁰ Cuando núcyaj jém cotsicyucmi, Jesús iñímáy jém icuyujcñwiñ:

—Aṇwejpáttaami Dios iga odoy ñ wññ micutitsta.

⁴¹ Jesic Jesús ichac icuyujcñwiñ, nic uxañ más juumi, jutspiy tañwípnica tum tsa. Jemum costeññeactñ, moj inḡejpát Dios. ⁴² Nimpa Jesús:

—Manjatun, siiga mich inḡañjam, odoy jñci iga annascaaba yíp miñpic yaachaji. Pero odoy wañi juuts ich ansunpa, wañi juuts mich inḡañjam.

⁴³ Jesic miñ iwiñquejay tum siñyucmiñ pic piññ iga iccamamwadáypa jém Jesús iñama.

⁴⁴ Pero tsam pñmi iñspa iga accaatap, jesic más pñmi inḡejpátpa Dios. Agui pñmi cupijpa hasta witspa naxyucmi juuts niñpiñ.

⁴⁵ Jesic yaj inḡejpát Dios. Tsucum, nic jut it jém icuyujcñwiñ. Ipát iga moñyajpa jeeyaj porque tsam pñmi anyácnayaj. ⁴⁶ Jesic Jesús iñímáy jém icuyujcñwiñ:

—¿Tñiga mimonñtampa? Tsucumtaami. Aṇwejpáttaami Dios iga odoy ñ wññ micmalwat.

Matstā jém Jesús

(Mt. 26:47-56; Mr. 14:43-50; Jn. 18:2-11)

⁴⁷ Iganam jñypa ixñ jém Jesús, jesigam núcyaj tsam jáyan piññtam. Jém Judas, jém itwñp idic con jém docepic icuyujcñwiñ, inimiñ jém piññtam iga icñjunçotpa jém Jesús, icunúc, ichútsáy iacpac. ⁴⁸ Jesic Jesús iñímáy:

—MiJudas, ¿que mich aṇwadáypa atracción aich, jém aMiññewñp Siñyucmi, con tum aṇñacatsuuchi?

⁴⁹ Jesic cuando icuyujcñwiñ iixyaj iga matstā jém Jesús, iñímayyaj:

—Mánomi, ¿mañcupujpa con jém espada?

⁵⁰ Tum de jeeyaj itñ jém cobacpic pañij imozo. Itñquímáy itatsic jém aṇwñmipic. ⁵¹ Pero nimpa Jesús:

—Odoy wañi jempic.

Jesic Jesús itóbáy eybic jém piññ itatsic. ⁵² Siñbatim mex jém pañij aṇjagooyiyaj con jém miñpic mañtic inḡagooyi y jém wiḡdaytam. Miñpa imatsyay Jesús. Pero Jesús iñímáy:

—¿Tiiga miñ ammatsta con jém espada y con jém cuy? ¿Que ich anúmpaap? ⁵³ Jáyum tawagai ti jém mijpic masticjom, pero da i ammats. Pero siip Dios ijícpa iga wiap ammatsta. Núc jém hora, wiap inwatta juuts ixunpa jém piichc#mpic ipimi.

Jém Peto inécpa jém Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Jesic matsta jém Jesús, nanicta jém panij anjagooyi iticcim. Jém Peto ijuumactúny. ⁵⁵ Jesic jém ityajw#p jém tigan#aca icnúcyaj jucti, coñyay iga samyajpa. Jém Peto iwanacoñtim. ⁵⁶ Jesic tum yomo, jém panij imozo, iix jém Peto iga coñ jut acnúcnetaj jucti. Tsam iámpa jém Peto, iixpic. Nim jém yomo:

—Yíp p#ixiñ siiba idic con je.

⁵⁷ Pero jém Peto inéc. Iñimáy jém yomo:

—Miyomo, ich da ánixpicpa jém p#ixiñ.

⁵⁸ Ocmi tun#gagam p#ixiñ iix jém Peto. Nímayta:

—iMich, tum de mijeetim!

Pero jém Peto iñimáypa jém p#ixiñ:

—iMip#ixiñ, da ánixpicpa!

⁵⁹ Ocmi como tum hora, tun#gagam p#ixiñ nimpatim:

—N#uma, yíp p#ixiñ it idic con je, quejpa iga Galileapic.

⁶⁰ Jesic Peto iñimáy:

—Mip#ixiñ, da anjodon ti s#ip iññimta.

Jesic jeeti rato iganam j#yipa jém Peto, jesigam anwej jém cayu. ⁶¹ TánQmi iámseedáy, iix jém Peto. Jesic Peto ijs ti iñimay#ne jém tánQmi cuando miñimayta jém Peto iga: “Antes que anwejpa jém cayu, mich ananécpa tucciy.” ⁶² Jesic put jém Peto. Tsam p#imi wejpa. Agui anyácne.

Jém imatsneyajw#p Jesús ixaay#yyajpa

(Mt. 26:67-68; Mr. 14:65)

⁶³ Jesic jém imatsneyajw#p Jesús ixaay#yyajpa. Ixon#yajpa. ⁶⁴ An#mónayta jém Jesús iixcuy con tum puctucu. Jesic icwácayaj Jesús, nímayta:

—Siiga mixabio, anímaayi i mixon#.

⁶⁵ Jesic p#imi imalmalnímayyajpa jém Jesús.

Nanicta Jesús jut antuum#neyaj jém cobacpic panij anjagooyiyaj

(Mt. 26:59-66; Mr. 14:55-64; Jn. 18:19-24)

⁶⁶ Jesic cuquejum, antuum#ayajpa jém wídaytam jém Israelpic anjagooyiyaj. Ityajtim jém panij anjagooyiyaj con jém escribaspic maestroyaj. Nanicta Jesús jut antuum#neyaj jém wídaytam, jém Sanhedrín. Jesic jém anjagooyiyaj icwácayaj jém Jesús. Nímayta:

⁶⁷ —Siiga miCristo, jém micutsatnew#p Dios, jesic an#mati.

Jesic Jesús iñimáy:

—Siiga mannímáypa iga ich aCristo, datim in#cupictámpa. ⁶⁸ Siiga mannímáypa iga tiiga micwágoytampa, jesic mich datim an#cutson#támpa ni datim an#cutsigaytámpa. ⁶⁹ Pero ich, jém aMiñnew#p S#nyucmi, siip nicpa acoñi jém Dios in#wimi, jém iniitw#p itumpiy ipimi.

⁷⁰ Jesic itumpiy jém ityajw#p icwácayajpa Jesús. Nímyajpa:

—¿Que mich Dios miManic?

Jesic jém Jesús icutson#. N#impa:

—Mich miñ#mpa iga aicham.

⁷¹ Jesic nímyajpa jém p#ixiñtam:

—Dam tammétstámpa tun#gac testigo, iyaagam nan#matcata#.

23

Nanicta jém Jesús iga icüpiñpa jém Pilato
(Mt. 27:1-2, 11-14; Mr. 15:1-5; Jn. 18:28-38)

¹ Jesic tsucumyaj itumpiy jém Israelpic anjagooyiyaj. Nanicta jém Jesús jém anjagooyi Pilato iwiñjom. ² Jemum moj iquejajwadayyaj. Nímayta jém Pilato:

—Yíp pìxiñ tsam iccujíñayñe jém pìxiñtam jém ityajwip yíp naxyucmi. Nímpa iga da wí tanyojpa jém impuesto para jém Romapic anjagooyi. Nímtim iga je jém Cristo, tum Rey.

³ Jesic jém Pilato icwác jém Jesús. Nímayta:

—¿Que mich miRey de jém judíos?

Jesús icutson, iñímáy:

—Numa juuts mich miñim.

⁴ Jesic Pilato iñímáy jém panij anjagooyiyaj con jém antuumaneyajwip jem:

—Da ampádáy ni tum itañca yíp pìxiñ.

⁵ Pero jém pìxiñtam más pimi jyyajpa. Nímyajpa:

—Yíbam tsam icujíñayñe itumpiy jém ityajwip yíp naxyucmi de Judea con jém inquímayooyi. Moj inmat jém inquímayooyi jém naxyucmi de Galilea. Sip núcneum hasta yim.

Nanicta jém Jesús iga icüpiñpa jém anjagooyi Herodes

⁶ Jesic cuando Pilato imaton, acwágóypa. Nímpa:

—¿Pero que yíp tum Galileapic pìxiñ?

⁷ Cuando icutiyyíy iga Galileapic pìxiñ, jesic jém Pilato ipimíy iga nanictaiñ Jesús jut it jém Herodes, jém Galileapic gobernador, porque noco it jém Herodes. Miññe joyi Jerusalén. ⁸ Jesic cuando jém Herodes iix Jesús, agui maymay. Dende pecam iixtooba porque imatonne iga wíap iwat jém milagro. Sip ixunpa jém Herodes iga iwadiñ Jesús tum milagro. ⁹ Tsam pimi icwácpa jém Herodes, pero Jesús da icutsonpa. ¹⁰ Ittim idic jém panij anjagooyiyaj con jém escribaspic maestroyaj. Pimi iquejajwadayyajpa Jesús. ¹¹ Jesic jém Herodes con jém isoldado da iwixiyajpa jém Jesús. Ixaayyyajpa, iccámayyajpa wibic punctucu juuts tum rey. Jesic eybictim nanicta Jesús jém Pilatocim. ¹² Jesic jeetim jama tsíyyaj juuts amigo jém Herodes con jém Pilato, porque wiñti pimi najóyixyajtáp idic.

Pimiyta iga accaataiñ jém Jesús

(Mt. 27:15-26; Mr. 15:6-15; Jn. 18:39-19:16)

¹³ Jesic jém Pilato intuumawatpa jém cobapic panij con jém anjagooyiyaj y jém pìxiñtam jém ityajwip jem. ¹⁴ Nímpa jém Pilato:

—Mimichtam anamíñayta yíp pìxiñ. Miñimtámpa iga tsam iccujíñayñe itumpiy jém pìxiñtam jém ityajwip yíp attebet. Ich anwicüpiñ. Sip iñixñeta iga da ampádáy itañca tiiga inquejajwadayñeta. ¹⁵ Icüpiñtim jém Herodes. Datim ipádáy itañca porque eybictim acutsadáy yim. Tsam wiquejpa iga da ti mal iwatne, da wíap anacca. ¹⁶ Sip anchiiba castigo, jesic ancutsigáypa.

¹⁷ Jém Pilato siempre icutsigáypa tum preso cuando naspá jém sin. Jém pìxiñtam wíap icupin jup preso icutsigáypa. ¹⁸ Pero itumpiy jém pìxiñtam, jém ityajwip jem, pimi jyyajpa. Nímyaj:

—¡Accai yíp pìxiñ! ¡Cutsigaayi jém Barrabás!

¹⁹ Yiptim Barrabás cotta cárcel porque ictsucum tum rebelión jém attebet Jerusalén y porque accaoyñe. ²⁰ Jém Pilato icutsigaytooba idic jém Jesús. Eybictim iñímáy jém pìxiñtam iga icutsigaytooba. ²¹ Pero jeeyaj más pimi jyyajpa. Nímyajpa:

—¡Cunuuntaami cunusyucmi! ¡Cunuuntaami cunusyucmi!

²² Jesic eybictim jém Pilato iñímáy jém p̄ixiñtam:

—¿Íiiga? ¿Íi mal iwatne? Ich da ampádáy itánca iga accaataiñ. Siip anchiiba castigo, jesic añcutsigáypa.

²³ Pero más p̄imi j̄iyyajpa jém p̄ixiñtam. N̄imyajpa iga cunúntaiñ cunusyucmi. Jesic jém Pilato imatónáy jeeyaj. ²⁴ Iwat juuts iw̄ianjamyaj. ²⁵ Icutsigáy jém Barrabás jém cot-netaw̄iip idic cárcel porque tum rebelde, tsam accaóypa. Cutsigayta juuts ixunyajpa jém p̄ixiñtam. Jém Pilato icij̄un̄codáy Jesús jém malopic p̄ixiñtam icij̄om iga imalwadayyajiñ juuts iw̄ianjamyaj.

Cunúnta Jesús cunusyucmi

(Mt. 27:32-44; Mr. 15:21-32; Jn. 19:17-27)

²⁶ Jesic nanicta Jesús iga cunúntap cunusyucmi. Iganam n̄iquiyaj, jém soldado ipátayaj tum p̄ixiñ iñ̄iyi Ximoj. Cirenepic p̄ixiñ, seti idic icam̄jom. Matsta jém Ximoj, accónteñta jém cunus. Itutsapacpa jém Jesús.

²⁷ Itún̄iyyajpatim tsam jáyan jém p̄ixiñtam. N̄icyajpatim jáyan jém yomtam. P̄imi weyjajpa jém yomtam, añyácneyaj iga yaachwattap jém Jesús. ²⁸ Iámseedáy jém Jesús. Iñímáy:

—MiJerusalénpic miyomtam, odoy anawejetaami ich iga ayaachwattap. Wejetaami iga miyaachwattamtap mimichtam con jém immanictam. ²⁹ Porque miñpa jém jama iga n̄imyajpa: “Tsam maymay jém yomo jém dapic maniḡiy, jém dapic manicomcane y jém dapic ictsútspa tum tsixi.” ³⁰ Jesic jeetim jama jém ityajw̄iip iñ̄imayyajpa jém cotsic: “Acujécqueti.” Iñ̄imayyajpatim jém lumu: “Accucumqueti.”

³¹ N̄imtim Jesús:

—Siiga jempigam iñasca jém tsococuy, ¿jesic ti naspá con jém titsnew̄iip?

³² Nanictaptim wisten malopic p̄ixiñ iga accaayajtap tumti lugar con jém Jesús. ³³ Jesic núcyaj tum lumuyucmi, iñ̄iyi jém Tsútscōbacpac̄cim. Jemum cunúnta jém Jesús cunusyucmi. Cada lado cunúnyajtatim jém wisten malopic p̄ixiñ, tum jém in̄wimi, tum jém in̄naymi. ³⁴ Iganam cunúntap jém Jesús, in̄wejpát Dios. Iñímáy:

—Man̄jatun̄, wadaayi perdón ȳipyaj p̄ixiñtam porque da ijodon̄ ti s̄ip iwatyaj.

Jém soldado iwécyaj jém Jesús ipuctucu. Iwatyaj tum sorteo i icoñw̄iypa jém iyagatsyooti. ³⁵ Jém p̄ixiñtam jém ityajw̄iip jem, iámayajpa jém Jesús. Jém Israelpic anjagooyiyaj p̄imi ixaaȳiyyajpatim. N̄imyaj:

—Yip p̄ixiñ n̄impa iga wiap iciacput tungac p̄ixiñ. Jesic siiga n̄uma je jém Cristo, jém icutsatnew̄iip Dios, w̄i iga naciaputtaiñ iyaac.

³⁶ Ixaaȳiyyajpatim jém soldado. Iacunú, ichi jém catsupic vino iga iuguiñ, pero Jesús da iuc. ³⁷ Jesic jém soldado iñ̄imayyaj jém Jesús:

—Siiga mimicham jém judíospic miRey, naciaputtaji iñyaac.

³⁸ Accámayta tum letrero icobacant̄icmi. Jayñe jém letrero tucuten̄ añmat̄imi, jém griego, jém latín y jém hebreo. Ȳimpic n̄impa: “Yibam jém judíos iRey.”

³⁹ Jesic tum de jém wisten malopic p̄ixiñ, jém cunúnnetaw̄iip, p̄imi imaln̄ímáy jém Jesús. Iñímáy:

—Siiga mich miCristo, naciaputtaji iñyaac. Aciaputtaam̄itim aichtam.

⁴⁰ Pero jém tungac iwogáy it̄iwi. Iñímáy:

—¿Que mich da in̄cin̄pa Dios? Siip tampictson̄netim jexpictim castigo. ⁴¹ Taichtam tanaif razon iga tayaachwattap porque siip tanyojpa jém tantánca. Pero yip p̄ixiñ da ti mal iwatne.

⁴² N̄imtim jém p̄ixiñ:

—Mi Jesús, ajisi cuando núcpa jém jama iga michiypa juuts anjagooyi.

⁴³ Jesic Jesús iñimáy:

—Numa mannimáypa iga yiptim jama nicpa tawagai paraíso.

Accaata jém Jesús

(Mt. 27:45-56; Mr. 15:33-41; Jn. 19:28-30)

⁴⁴ Núc cugapjama. Cupiicha icuwiti yip naxyucmi. Pimi piicha hasta las tres de la tarde. ⁴⁵ Jém jama cupiichane. Jém mijpic masticjom teeñajsajtim jém punctuañi icuyagats. ⁴⁶ Jesic Jesús pimi jiy. Nim:

—Manjatun, mancijun codápa ánanama.

Jesic yaj nimi, caum jém Jesús.

⁴⁷ Cuando jém Romapic capitán iix ti iñasca, moj icujip Dios. Nimpa:

—Numa, yip tum wibic pixiñ. Da ti mal iwatne.

⁴⁸ Itumpiy jém pixiñtam, jém antuumaneyajwip, cuando iixyay ti acnascata jém Jesús, ixonyajpa ipecho porque pimi anyacneyaj. Ocmi setyajum iticciim. ⁴⁹ Pero itumpiy jém Jesús iamigoyaj con jém Galileapic yomtam jém miñneyajwip con Jesús, tsíyyaj juumi iganam iamyajpa ti acnascata jém Jesús.

Cumta Jesús tum tsaajosjom

(Mt. 27:57-61; Mr. 15:42-47; Jn. 19:38-42)

⁵⁰ Jesic ittim jem tum wibic pixiñ iñiyi José, Israelpic anjagooyitim. Siempre iwatpa juuts ixunpa Dios. ⁵¹ Sip injóc jém jama iga Dios injacpa yip naxyucmi. Jém pixiñ tsucum jém atebet Arimatea, jém naxyucmi de Judea. Je da tigiyúm con jém tungac anjagooyiyaj cuando ijisyaj iga accaatap jém Jesús. ⁵² Jesic jém José nic íám jém Pilato. Iwágáy jém Jesús imijtay. ⁵³ Oy icquedáy jém imijtay jém cunusyucmi. Inmon con wibic punctucu de lino. Icum tum tsaajosjom, watnetawip, jut da i queman icum tum tsúts. ⁵⁴ Yiptim jama jém Israelpic pixiñtam iwatyajpa jém iwíccuy iga wíap ijejjay jém jejjuyjama. Jesic cuando cumta jém Jesús, tsucumtooba jém jejjuyjama.

⁵⁵ Jém yomtam, jém miñneyajwip de Galilea con Jesús, itúnyyay jém José iga iamyajpa jém tsaajos y juuts cotnetá jém Jesús imijtay. ⁵⁶ Jesic jém yomtam setyaj iticciim, iwítsacyajpa jém pooti jém cínppic y jém wibic pomada. Ocmi jejjaypa jém jejjuyjama juuts nimpa jém anquímayooyi.

24

Acpisnetawum jém Jesús

(Mt. 28:1-10; Mr. 16:1-8; Jn. 20:1-10)

¹ Jesic jém wiñtipic jama de jém semana, tsam tsúytim, nicgac jém yomtam jém tsaajoscim. Ininicyaj jém pooti cínpaap jém iwatnewip. Iwagananicyajtim jém tungac yomtam. ² Cuando núcyaj jém tsaajoscim, iixyay iga áháyñeum jém tsaajos. Anjoobayñetawum jém jos annúccuy. ³ Tigiyay jém yomtam jém tsaajosjom. Dam ipádáy jém tánomi Jesús imijtay. ⁴ Agui cínayaj, da icutiyyi ti nasne jem. Jesic iixyay iga jemum teñ wisten pixiñ, agui tsoipa jém ipuctucu. ⁵ Tsam pimi ichiganjécya jém yomtam, ámquetneyaj naxyucmi. Jesic jém sinyucmic pixiñ iñimáy jém yomtam:

—¿Tiiga miñ immétsta jém vivopic yim jut cumnetá jém caaneyajwip? ⁶ Je dam i yim. Acpisnetawum. Jistaami juuts miñimayta cuando it idic jém Galilea. ⁷ Miñimáy iga jém Miñnewip sinyucmi cijnucottap jém malopic pixiñtam icijom, cunúntap cunusyucmi, jesic jém tucunajama acpistap.

⁸ Jesic jém yomtam ijisyajpa jém anmati juuts inímayñe jém Jesús. ⁹ Jesic setyaj jém yomtam de jém tsaajos hasta jut antuumaneyaj jém once con jém tungac jém Jesús icuyujcwiñ. Inmadayyaj ti iixyaj. ¹⁰ Siiba jém Malía Magdalena, jém Xiwana y jém Malía jém Jacobo iapa. Jeeyaj con jém tungac más yomtam inmadayyaj jém apóstolyaj ti iixyaj jém tsaajosjom. ¹¹ Pero jém Jesús icuyujcwiñ ijisyaj iga migooyi. Da icupicyaj ti inmadáy jém yomtam.

¹² Jesic póyan̄tsucum jém Peto, nic jém tsaajoscim. Ámcúm jém tsaajosjom, iix no más jém inmónocyuy, tsacneta tum añeymi. Ocmi set jém Peto. Agui tineanjac, ijispa ijixianjom ti nasne.

Jém Emaús cutuñ
(Mr. 16:12-13)

¹³ Jesic jeetim jama nicyajpa jém tiganjoj Emaús wisten jém Jesús icuyujcwiñ. Jém Emaús como once kilómetro ijuumi de jém Jerusalén. ¹⁴ Iganam niquiyaj jém wisten icuyujcwiñ, sip inmatyaj ti inasca jém Jesús. ¹⁵ Iganam anmatyajpa jém wisten, jesigam núc Jesús jut niquiyaj; mojum iwagananicyaj. ¹⁶ Dios da ijicpa iga iixpiguiñ jém icuyujcwiñ. ¹⁷ Jesic Jesús moj icwác jém wisten, inímáy:

—¿Ti sip ininmatta iganam miñiquitam tunjom? ¿Tiiga minyácneta?

¹⁸ Tum de jeeyaj, iníyi Cleofas, icutson. Inímáy:

—¿Mioy Jerusalén y da injodon ti nasne jemíc? ¿Que juumipic mipixiñ?

¹⁹ Jesic Jesús inímáy jém pxiñ:

—¿Ti nasne jemíc?

Nimpa jém Cleofas:

—Tsam jáyan cosa inasca jém Jesús jém Nazaretpic pxiñ. Je tum profeta tsam wiap, agui wiaptim inmat jém Dios iwiñjom. Itumpiy jém pxiñtam tsam iwixyapatim. ²⁰ Pero jém cobacpic panijyaj con jém aichtampic ananjagooyiyaj icijun̄cotyaj jém Jesús jém Romapic anjagooyi icijjom iga accaatañ. Jenum cunúnta cunusyucmi. ²¹ Ichtam anjístampa idic iga jém Jesús wiap taciaputta taichtam jém taIsraelpic tapixiñtam. Sip nasneum tucunajama iga accaata. ²² Juten de jém aichtampic yomtam oy iámyaj jém tsaajos tsúytim. Agui atsiganjécta, ²³ porque anmadayyaj iga dam i jém tsúts jém tsaajosjom. Anímayta iga iixyaj wisten sinyucmipic pxiñ. Nimpatim jém yomtam iga anmadaytatim iga pisneum jém Jesús. ²⁴ Algunos de aichtam oy iámyaj jém tsaajos. Numa iixyaj jém cosa juuts nim jém yomtam. Pero da iixyaj jém Jesús.

²⁵ Jesic Jesús inímáy jém wisten icuyujcwiñ:

—Odoy cuixataami. Agui mijixicumon̄neta iga da incupictámpa itumpiy juuts ijaychacneyaj jém wiñicpic profeta. ²⁶ ¿Que da injjspa iga yaachwattap jém Cristo y ocmi químpa sinyucmi?

²⁷ Jesic jém Jesús moj inquejáy jém Dios inmati jém ijaychacnewip jém Moisés y jém wiñicpic profetayaj. Inquejáypa itumpiy jut jaychacneta de jém Cristo.

²⁸ Jesic núcyajum jém wisten icuyujcwiñ jém tiganjoj jut nicyajpa. Injamyajpa iga jém Jesús nicpanam más juumi. ²⁹ Jesic jém icuyujcwiñ inímayyaj Jesús iga tsíyiñ con jeeyaj. Nímayta:

—Tsíyim yim con aichtam porque tsuuyim, piichabam iti.

Jesic jenum tsíy jém Jesús con jeeyaj. ³⁰ Wagacoñyajum mesacim. Ipic Jesús tum caxtánañi, moj inwejpát Dios. Ocmi iwéc jém caxtánañi con jém wisten icuyujcwiñ. ³¹ Jesic Dios ijigáy jém wisten iga iixpiguiñ jém Jesús. Pero jeeti rato coñtogoy, da iixyaj jut inj. ³² Jesic nacwácyajtap jeeyaj. Nimpa:

—¿Que da iñj̄ispa iga agui imatspa tánanama cuando tanmadáypa tunjom y cuando tanquejáypa jém Dios inmat̄i?

³³ Jesic jeeti rato setyaj jém wisten Jerusalén. Tigiy jém ticjom jut antuumaneyaj jém once con jém tunjac jém Jesús icuyujc̄iwiñ. ³⁴ Nímayyajta jém oyñew̄ip jém Emaús.

—Numa, pisneum jém tánomi. Dios icpis. Jém Peto iixñe.

³⁵ Jesic jém wisten inmatyajt̄im ti iñascayaj tunjom y jutsa miixpic̄iyaj jém Jesús cuando iwécpa jém caxtánañi.

Jesús iwiñquejáy jém icuyujc̄iwiñ

(Mt. 28:16-20; Mr. 16:14-18; Jn. 20:19-23)

³⁶ Iganam síp inmatyaj jém icuyujc̄iwiñ, jesigam núc jém Jesús, iwiñquejáy jut antuumaneyaj. Idioschi jeeyaj, iñímáy:

—Xutsóytam.

³⁷ Pero jeeyaj agui anjéc̄iyaj, c̄inyaj. Ij̄isyaj iga iixyay tum anama. ³⁸ Jesic Jesús iñímáy:

—¿T̄iiga minjéc̄neta? ¿T̄iiga iniitta jexpic̄ j̄ixi iñanamanjom? ³⁹ Aámaayi jém anci y ampuy. Icham aJesús. Atsictaami iga incut̄iyyit̄amiñ iga da je aanama. Porque tum anama da maayiy ni da pagiy juuts ich anait.

⁴⁰ Iganam inmadáy jém icuyujc̄iwiñ, inquejáy ici y ipuy. ⁴¹ Agui maymayyaj jém icuyujc̄iwiñ. Como danam iw̄icupic̄ne, agui t̄ineanjacyaj. Jesic Jesús iñímáy jém icuyujc̄iwiñ:

—¿Iniitta uxan wíccuy iga anciispa?

⁴² Jesic chiita tum jaca t̄ipi jaasnew̄ip. Chiit̄atim tum jaca chiñu con iñayi. ⁴³ Ipic̄tson jém Jesús. Moj ic̄is.

⁴⁴ Ocmi iñímáy:

—S̄ip accupacnetawum jém anmat̄i jém mannímayñew̄ip cuando ait idic con mimichtam. Mannímayñe iga tienes que anaccupacpa itumpiy juuts ajaychagayñe jém Moisés, jém wiñicpic̄ profetayaj y jém Salmojom.

⁴⁵ Jesic jém Jesús ichi j̄ixi jém icuyujc̄iwiñ iga w̄iañ icut̄iyyiyaj jém Dios inmat̄i jém jayñew̄ip. ⁴⁶ Jesús iñímáy jém icuyujc̄iwiñ:

—Jém wiñicpic̄ anmat̄c̄iwiñ ijaychacne iga tienes que accaatap jém Cristo jém icutsatnew̄ip Dios. Ocmi acp̄istap jém tucunajama de jut it jém caaneyajw̄ip. ⁴⁷ Jesic yiptim Cristo icutsatpa jém icuyujc̄iwiñ iga inmadayyajiñ jém p̄ixiñtam jém w̄ibic̄ anquímayooi. Mojpa inmatyaj jém attebet Jerusalén. Ocmi núcpa ȳip anmat̄i itumpiy jém naciónyaj icuw̄iti jém naxyucmi. Anmadayyajt̄ap jém malopic̄ p̄ixiñtam iga icucaguiñ jém ij̄ixi dapic̄ w̄i. Cuando cucacum ij̄ixi, jesic Dios iccáyáypa jém it̄anca. ⁴⁸ Mimichtam w̄iap ininmadayta jém p̄ixiñtam porque iñixñeta ti annascane. ⁴⁹ ¡Maton̄taami! Mancutsadáypa jém Dios ip̄imi juuts mij̄yc̄amayñe anjatun̄ Dios. Jesic ts̄iytaami ȳip attebet Jerusalén hasta imp̄ictson̄tampa jém siñyucm̄ipic̄ p̄imi.

Químpa Jesús siñyucmi

(Mr. 16:19-20)

⁵⁰ Jesic Jesús ininic jém icuyujc̄iwiñ hasta jém tiganjoj Betania. Icuím ici, inwejpát̄pa Dios iga iw̄iwadáyñiñ jém icuyujc̄iwiñ. ⁵¹ Jesic yajum inwejpát̄ Dios, nic Jesús. Nanicta siñyucmi. ⁵² Costeñyaj jém icuyujc̄iwiñ iga ij̄isyajpa Jesús. Ocmi setyajum Jerusalén. Agui p̄imi maymayyaj. ⁵³ Seguido wagaityaj jém mij̄pic̄ mast̄icjom. Icujípyajpa Dios.

Jemum cuyaj.

Jém wibic anmati jém ijayñewiip jém Xiwan

*Jém Dios iManic oy iti yíp naxyucmi juuts tum pxiñ
(1 Jn. 1:1; Ap. 19:13)*

¹ Wiñigam cuando moj iti itumpiy cosa, jesic ittim idic jém Dios iManic, iñiyitim jém Anmati. Jém Dios iManic iwaganait tanjatun Dios. Jém Dios iManic jeetim jém Dios. ² Cuando moj iti itumpiy cosa, jesic jém Dios iManic iwaganait jém tanjatun Dios. ³ Wagayoxayaj iga iwatyajpa itumpiy cosa. Da i ni tum cosa dapic je iwati. ⁴ Je iniit jém vida iga tachiiba. Jém vida je jém jucti jém tsocáppic jém pxiñtam ianamanjom. ⁵ Tsocpa jém jucti piichcim y jém piichi da wiap icpich jém jucti.

⁶ It idic tum pxiñ jém icutsatnewiip Dios, iñiyi Xiwan. ⁷ Cutsatta jém Xiwan iga inmadáyñ jém pxiñtam iga miñpa jém Dios iManic juuts tum jucti. Oy inmadáy jém pxiñtam iapaap jém miñpáppic iga icupicyajiñ cuando miñpa. ⁸ Jém Xiwan da je jém jucti, pero oy inmadáy jém pxiñtam iapaap jém jucti jém miñpáppic. ⁹ Je jém numapic jucti. Miñ yíp naxyucmi iga iyicquejyajpa itumpiy jém pxiñtam.

¹⁰ Oy iti yíp naxyucmi. Iwaganayoxa jém tanjatun Dios iga iwatyaj yíp nas con itumpiy jém itwiip yim, pero jém pxiñtam, yíp naxyucmic, da iixpicyaj jém Dios iManic. ¹¹ Oy iti iticmi, jém naxyucmi de Israel, pero jeeyaj da ipictsonyaj. ¹² Pero jém ipictsonyeyajwiip, jém icupicneyajwiip, chiiyajta derecho iga tsíyyajiñ juuts jém Dios imanictam. ¹³ Da jex juuts tum pxiñ imanictam jém iwatnewiip yomyucmi, juuts iwianjam jém jatunpic, pero Dios imanigayajpa. Tsíyyaj juuts Dios imanictam.

¹⁴ Oy iti yíp naxyucmi jém Dios iManic juuts tum pxiñ. Maayítim juuts taichtam. Oy iti yíp naxyucmi con aichtam. Ánixayñeta iga inimiñ jém ipimi jém iJatunpic ichiñe jém tumpic iManic. Jém Dios iManic tsam tóyóypa, siempre nuumanmatpa, da migóypa. ¹⁵ Jém Xiwan oy inmadáy jém pxiñtam iapaap jém miññewiip. Nim jém Xiwan:

—Yíbam jém mannímayñewiip iga ocmim miñpa tum pxiñ más wiap que aich porque ittim idic dende wiñigam cuando danam anayñe aich.

¹⁶ Jém Dios iManic tsam tawiwadayñeta tantumpiytam. Tsam tawíitta porque inimiñ jém wibic tóyooyi iga tayaachanjamtámiñ Dios. ¹⁷ Chiita jém Moisés jém wiñicpic anquímayooyi iga anmadayajtañ jém pxiñtam. Jesic ocmi jém Jesucristo oy yíp naxyucmi iga tanquejay jutsap tayaachanjamta Dios y iga tanquejáypa jém numapic anquímayooyi. ¹⁸ Da i queman oypa iix jém tanjatun Dios; pero jém Dios iManic, jém tumpic, jém iwaganaitwiip Dios, tanquejayta juutspic Dios jém tanjatun Dios.

*Jém Xiwan jém acchíoyopaap inmatpa de Jesucristo
(Mt. 3:11-12; Mr. 1:7-8; Lc. 3:15-17)*

¹⁹ Algunos jém judíos, jém ityajwiip jém Jerusalén, icutsatyaj jém panijyaj con jém levitapic pxiñtam iga icwácyajiñ jém Xiwan. Nímayta:

—Nigi acwaaci jém Xiwan: “¿Mich, miapaap?”

²⁰ Jesic cuando núcyaj jut it jém Xiwan, je da inyam. Iñímáy jeeyaj:

—Ich da je aCristo jém acutsatnewiip Dios.

²¹ Jesic nímyaj jém panijyaj:

—¿Jesic miapaap? ¿Que mich jém miElías jém wiñicpic miprofeta?

Pero jém Xiwan icutson. Iñímáy:

—Ich da aje.

Nímyaj jém panijyaj:

—¿Que mich jém miprofeta jém mananjóctampaap?

Jém Xiwan iñímáy:

—Ich datim aje.

²² Jesic jém pañijyaj iñímayyaj jém Xiwan:

—¿Mich, miḡapaap? Anímaayi iga wiḡaiñ anañmadayta jém acutsatnewiip. ¿Mich iñyaac, ti wiḡap anañmadáy?

²³ Jesic jém Xiwan iñímáy jém pañijyaj:

—Icham oy anajíyooyi jém titsinaxyucmi. Oy anañmadáy jém p̄ixiñtam iga: “Áḡaayi jém tun, numtsaci, porque miñpa jém tánQmi”, juuts n̄impa jém profeta jém Isaías.

²⁴ Jém fariseoyaj icutsatyajtim jém icwácyajpáppic jém Xiwan. ²⁵ Acwáctatim jém Xiwan, n̄imayta:

—¿Jesic tiiga micchíḡóypa siiga mich da je miCristo, ni da je miElías ni da je miprofeta jém miñpáppic?

²⁶ Jém Xiwan iñímáy jeeyaj:

—Ich acchíḡóypa con ni. Pero yim it mimichtámanjōm tum p̄ixiñ jém dapic iñixpicneta.

²⁷ Ocmim miñ jém p̄ixiñ, pero más wiḡap que aich. Ich da wiḡap antsíy ni juuts tum imozo iga aḡcuwijáyaypa jém iciac.

²⁸ Jempigam iñasca jém Xiwan jém attebet Betábara, aḡwiñtuc de jém río Jordán juḡ acchíḡóypa.

Jém Jesús je jém Dios iCordero

²⁹ Jém tunḡac jama jém Xiwan iix iga miñpa Jesús, iñímáy jém p̄ixiñtam:

—Ixi, jém p̄ixiñ jeexic miñpa, je jém Dios iCordero. Accaatap iga iccáyaypa itumpiy jém p̄ixiñtam itánca. ³⁰ Yíbam jém p̄ixiñ jém mannímayñewiip iga: “Ocmim miñpa tum p̄ixiñ, pero más wiḡap que aich, porque ittim dende wiñigam cuando danam anayñe aich.” ³¹ Ich da idic anjodon japaap jém p̄ixiñ, pero ich miñ acchíḡooyi con ni iga jém ityajw̄iip Israel wiḡaiñ ijodónayaj japaap jém Cristo.

³² N̄imtim jém Xiwan:

—Ich ánix jém Dios iAnama juuts tum cuucu cuando quet dende siḡyucmi. Miñ iti con je. ³³ Jesic ich da idic anjodon japaap jém p̄ixiñ jém miñpáppic, pero cuando Dios acutsat iga acchíḡóypa con ni, anímáy iga: “Cuando iñixpa iga jém Dios iAnama quetpa siḡyucmi y miñ iti con tum p̄ixiñ, jesic iñjodon iga jeam jém ininjócpáppic. Acchíḡopatim mex je con jém Dios iAnama, da je con ni.” ³⁴ Ich ánix iga jempigam iñasca yíp p̄ixiñ, jeeyucmi wiḡap mannímáy iga yíbam p̄ixiñ jém Dios iManic.

Jesús icupin jém wiñtipic icuyujc̄wiñ

³⁵ Jesic tunḡagam jama jemtim ityaj jém Xiwan con wisten jém icuyujc̄wiñ. ³⁶ Iix jém Xiwan iga widaḡnaspá jém Jesús. Jesic iñímáy jém icuyujc̄wiñ:

—Ixtaami jém p̄ixiñ. Yíbam jém Dios iCordero.

³⁷ Jesic jém wisten icuyujc̄wiñ imaton ti iñímáy, moj itúḡíy jém Jesús. ³⁸ Jesic Jesús iámseedáy, iix iga itúḡíyypa jém wisten, iñímáy:

—¿Ti miñ immétsta?

Nimyaj jém wisten:

—¿Rabí, (taichtam tanaḡmat̄im̄i nimtooba, Maestro), juḡ miit?

³⁹ Jesic Jesús iñímáy jeeyaj:

—Miñi aami.

Jesic nic iámyaj juḡ it Jesús. Jemum iyaj jém jama, núcyaj a las cuatro.

⁴⁰ Tum de jém wisten jém imatonneyajwɨp junimpa jém Xiwan, jém itúnɨywɨp jém Jesús, iñiyi Anti. Itiwɨ jém Ximój Peto. ⁴¹ Jesíc jém Anti wiñti nic iméts itiwɨ jém Ximój, iñímáy:
—Ampátneum jém Mesías. (Taichtam tanaɨmatimi nimtooba jém Cristo.)

⁴² Ocmi jém Anti ininic jém Ximój jut it Jesús. Jesíc Jesús iwíámpa jém Ximój, iñímáy:
—Mich miXimój, jém Jonás mimanic, pero siip manacniyap iga miCefas. (Taichtam tanaɨmatimi nimtooba iga Peto.)

Jesús inwejáypa jém Felipe y jém Natanael

⁴³ Jesíc tungagam jama nictooba idic Jesús jém naxyucmi de Galilea. Ipát jém Felipe. Nímayta:

—Miñi atúnɨyi.

⁴⁴ Yíp Felipe jém Betsaidapic pɨxiñ, jeetim atebet jut tsucum jém Anti y Peto. ⁴⁵ Jesíc jém Felipe nic iméts jém Natanael, iñímáy:

—Ampátneta jém pɨxiñ jém tanímayñewɨp iga miñpa jém Moisés y jém tungac jém wiñicpic profeta jém ijayñewɨp Dios inmati. Je jém Jesús, jém Nazaretpic, jém José imaníc.

⁴⁶ Nimpa jém Natanael:

—¿Que wiap iput tum wibic pɨxiñ de jém atebet de Nazaret?

Nimpa Felipe:

—Miñi aami.

⁴⁷ Cuando Jesús iix iga icunúcpa jém Natanael, iñímáy:

—Yim miñpa tum nunta Israelpic pɨxiñ, jém dapic inij migooyi.

⁴⁸ Jesíc jém Natanael icwác jém Jesús, iñímáy:

—¿Jutsa mánixpic?

Nimpa Jesús:

—Antes que danam miñwejayñe jém Felipe, mánix jut miit jém tsujcucim.

⁴⁹ Jesíc jém Natanael iñímáy jém Jesús:

—Rabí, micham jém Dios miManíc. Micham miRey de Israel.

⁵⁰ Jesíc Jesús icutson, iñímáy:

—Siip mich ancupicpa porque mannímáy iga mánixñe jém tsujcucim. Núcpa jama iga iñixpa jém más mijpic milagro. ⁵¹ Numa mannímáypa iga iñixtámpa iga ányáypa jém sin y químpa y quetpa jém sinyucmipic pɨxiñtam aichyucmi, jém aMiññewɨp Sinyucmi.

2

Jém ancoomíyóycuy jém atebet de Caná

¹ Ocmi nas tucunajama, it tum ancoomíyóycuy jém atebet de Caná jém naxyucmi de Galilea, ittim jém Jesús iapa. ² Anwejayajtatim jém Jesús con icuyujcɨwiñ iga niguiñ jut it jém ancoomíyóycuy. ³ Yaj jém vino, jesíc Jesús iapa iñímáy:

—Siip yajneum jém vino.

⁴ Jesíc jém Jesús iñímáy:

—Yomo, ¿tiiga annímáy iga yajneum jém vino? Danam núcne jém hora iga anwatpa jém milagro.

⁵ Jesíc jém Jesús iapa iñímáy jém icuyoxayajpaap jém tic iomi:

—Wattaami itumpiy juuts miñímáypa.

⁶ Jemum it seis jém tsaamajcuy. Cucómayñeta ni iga icheeyajpa ici juuts jém judíos icostumbre. Cada jém majcuy iyajpa ochenta o cien litro de ni. ⁷ Jesíc Jesús iñímáy jém mozo:

—Comtaami yípyaj majcuy con ni.

Jesic moj icomyaj jém seis majcuy hasta wí com. ⁸ Jesic Jesús iñímáy jém mozo:

—Siip topi uxaj, nigí chíi jém mayordomo de jém siñ.

Jempigam iwatyaj. ⁹ Jesic jém mayordomo iuc uxaj jém ni jém acsetnetawíip iga vino, pero da ijodon juf ipicyaj jém vino. Pero jém mozo, jém itopneyajwíip jém ni, ijodon juf ipic jém vino. Jesic jém mayordomo inwejáy jém pxiñ jém yoomiypaap. ¹⁰ Iñímáy:

—Jesic nawattap siñ, itumpiy ichiiba wiñti jém más wibic vino iga iuguiñ jém iamigoyaj. Jesic ocmi cuando iucneyajum jáyan jém wibic vino, jesic chiijajtap jém vino dapic jáya wí. Pero mich iniccáyñe jém más wibic vino hasta siip.

¹¹ Jempam moj iwat Jesús jém milagro jém atebet de Caná, jém naxyucmi de Galilea. Anquejajyaja jém pxiñtam iga iniit jém Dios ipimi. Jém icuyujcwiñ tsam icupicyaj jém Jesús.

¹² Jesic ocmim, nic Jesús jém atebet Capernaum. Iwagananicayaj iapa, itiwitam y jém icuyujcwiñ. Pero jemum da watña jama tsíyyaj.

Jesús iquebacputpa jém númyajpaap jém mijpic masticjom
(Mt. 21:12-13; Mr. 11:15-18; Lc. 19:45-46)

¹³ Jesic jeetim tiempo núctooba jém pascuasíñ jém iwatyajpáppic jém judíos. Nic Jesús Jerusalén juf iwatyajpa jém siñ. ¹⁴ Y jém mijpic masticjom ipát jém imáyyajpáppic jém xix, jém borrego y jém cuucuyaj. Jemum coñajtim imesacim jém icucacyajpáppic tumiñ.

¹⁵ Jesic Jesús ipic tum tixi, iwat tum cótsóycuy. Iquebacput itumpiy jém pxiñtam jém itwíip masticjom con jém xixyay y jém borregoyaj. Ipatspatsquedáy itumiñ naxyucmi jém icucacyajpáppic tumiñ. Ichiputseedáy jém imesayaj. ¹⁶ Iñímáy jém pxiñtam jém imáyyajpaap jém cuucuyaj:

—Toptaami jém cuucuyaj anšicmi. Odoy acsettaami anjatun itic juuts tum mercado.

¹⁷ Jesic jém Jesús icuyujcwiñ ijsyajpa juuts jayñeta jém Dios inmati. Nimpa: “Ich tsam pimi anwatpa cuenta mich iñtic, manjatun Dios.”

¹⁸ Jesic jém judíos icwacyajpa. Nímayta Jesús:

—¿I mipimíy iga inquebacput jém pxiñtam? Siiga Dios mipimíy, jesic anquejaayí aichtam tum milagro.

¹⁹ Jesús iñímáy jeeyaj:

—Miswattaami yíp mastic, jesic jém tucunajama anactsucumpa eybic.

²⁰ Nimyaj jém judíos:

—Cuarenta y seis amtíy yoxayaj iga iwatyaj yíp mastic. ¿Que wíap inictsucum en tucunajama?

²¹ Pero cuando nimpa Jesús iga iwatpa eybic jém mastic, je inmatpa de jém imijtay.

²² Cuando accaatap jém Jesús y ocmi pispá, jesic jém icuyujcwiñ ijsyajpa ti iñímáy jém Jesús. Jesic icupicyaj jém Dios inmati jém jayñetawíip y jém inmati jém iñímáyñewíip jém Jesús.

Jesús ijodon ti iniityaj ianamanjom jém pxiñtam

²³ Jesic iganam it Jesús jém Jerusalén, cuando iwatyajpa jém pascuasíñ, jáyan jém pxiñtam moj icupicyaj porque iixyaj jém wibic milagro jém iwatnewíip. ²⁴ Pero jém Jesús da iniijayyaj confianza jém pxiñtam, porque ijodon ti iniityaj ianamanjom itumpiy jém pxiñtam. ²⁵ Da ixunpa Jesús iga i inmadáypa iga tsam malo jém pxiñtam, porque ijodon iga tsam it mal ianamanjom.

3

Jém Nicodemo oy íám jém Jesús

¹ It idic tum fariseopic p̄ixiñ iñiyi Nicodemo, anjagooyi de jém judíos. ² Jém Nicodemo oy iám jém Jesús tsuucim. Mu iñúc, iñímáy:

—MamMaestro, anjodónata iga Dios micutsat iga anaquejaytámiñ aichtam. Da i wiap iwat jém wibic milagro juutspic mich inwatpa siiga da inwaganait Dios.

³ Jesic Jesús iñímáy jém Nicodemo:

—Numa mannímáypa siiga tum p̄ixiñ da nayxetpa eybic, jesic da tsíypa juuts Dios im̄ichi ni da nicpa iti con Dios.

⁴ Jém Nicodemo icwác jém Jesús. Iñímáy:

—¿Pero jutsap iñayxet tum p̄ixiñ tsamipic? ¿Que wiap itigiy eybic jém iapa ipuujom iga nayxetpa?

⁵ Jesús icutson jém Nicodemo. Iñímáy:

—Numa mannímáypa siiga tum p̄ixiñ da naypa con ni y da naypatim con Dios iAnama, da tsíypa juuts Dios im̄ichi ni da wiap itigiy jut it Dios. ⁶ Jém nayñewip jém yomyucmi iniit no más jém vida yíp naxyucmi. Pero jém nayñewip con Dios iAnama iniit jém siñyucmic vida. ⁷ Odoy ámanjaci iga mannímáy iga siiga da miñayxetpa eybic da miñúcpa jut it Dios. ⁸ Poypa jém sawa jut quej. Tammatonpa iga poypa jém sawa, pero da tanjodon jut miñpa ni jut nicpa. Jesaptim quejpa iga nayñe jém p̄ixiñ con Dios iAnama. Pero da tánixpa jutsa miñay.

⁹ Jesic jém Nicodemo iñímáy jém Jesús:

—¿Pero que jutsap tannasca jempic?

¹⁰ Nimpa Jesús:

—¿Que mich miIsraelpic mimaestro y da incutiyyíypa ti mannímáypa? ¹¹ Numa mannímáypa aichtam anwijodon tam ti síp mannímáy. Mananmadaytampa jém cosa jém ánixñewip. Pero michtam da ancupigaytampa. ¹² Siiga mananmadáypa jém cosa jém itwip yíp naxyucmi y da incupicpa, ¿jesic jutsap incupic siiga mananmadáypa jém cosa jém itwip siñyucmi?

¹³ 'Da i wiap iquím siñyucmi, no más ich wiap anquím. Ich jém aMiññewip Siñyucmi, ait idic siñyucmi, pero aquet yíp naxyucmi iga anwatpa jém Dios iyoxacuy. ¹⁴ Wiñic jém Moisés ipanpa tum cuy, icquím tum tsañwatnas jém cuyucmi cuando oyyaj jém Dios ipixiñtam jém titsinaxyucmi. Jesaptim aich, jém aMiññewip Siñyucmi, acquimtap tum cuyucmi ¹⁵ iga itumpiy jém p̄ixiñtam, jém acupicneyajwip aich, da togoypa, mas ipictsonyajpa jém vida jém dapic cuyajpa.

¹⁶ 'Dios tsam itoypa itumpiy jém p̄ixiñtam jém ityajwip yíp naxyucmi. Jeeyucmi ijic iga accaata jém tumpic iManic iga itumpiy jém icupicneyajwip jém Dios iManic da togoypa, mas ipictsonpa jém vida jém dapic cuyajpa. ¹⁷ Porque Dios da icutsat iManic yíp naxyucmi iga ichiiba castigo jém p̄ixiñtam. Icutsat iManic iga iciacputyajiñ itumpiy jém ityajwip icuwiti yíp naxyucmi.

¹⁸ 'Siiga tum p̄ixiñ icupic jém Dios iManic, jesic da i ichiiba castigo. Pero jém dapic icupicpa, jesic Dios ijycámayñe iga ichiiba castigo porque da icupicpa jém Dios iManic jém tumpic. ¹⁹ Chiitap castigo jém p̄ixiñtam porque cuando miñ yíp naxyucmi jém wibic juctian̄tsoca, jesic jeeyaj da iwianjamyaj. Tsam itoyyajpa jém piichi porque tsam iwianjam iga imalwatyajpa. ²⁰ Itumpiy jém imalwatyajpáppic ijóyixyajpa jém wibic juctian̄tsoca. Da icunúcyajpa jém juctian̄tsoca iga odoy quejiñ iga imalwatyajpa. ²¹ Pero jém iwatneyajwip juuts nimpa jém numapic anquímayooyi, icunúcyaj jém wibic juctian̄tsoca iga quejiñ iga iwíwatyajpa juuts ixunpa Dios.

Jém Xiwan jém acchínoyapaap eybic inmatpa de Cristo

²² Jesic ocmi jém Jesús con icuyujc̄iwiñ nicyaj jém naxyucmi de Judea. Jemigam nic itiyaj. Acchínoyyajpa. ²³ Acchínoypatim jém Xiwan jém attebet Enón nocojom de jém attebet Salim porque jemíc tsam it ni. Nicyaj jém p̄ixiñtam iga acchiniyajt̄añ. ²⁴ Porque danam pajneta cárcel jém Xiwan.

²⁵ Jesic algunos de jém Xiwan icuyujc̄iwiñ moj áñajiyaj con jém judíos iga ti ixunpa jém Moisés inquímayooyi iga tsíy tum p̄ixiñ cuáyñe. ²⁶ Jesic jém Xiwan icuyujc̄iwiñ nic inmadayyaj jém Xiwan. Inímayyaj:

—Mammaestro, jém p̄ixiñ jém tanjıypátnewı̄p jém Jordán inwiñtuc, jém annımayñewı̄p mimich iga jeam jém Dios iManic, sı̄p acchínoypatim mex je. Nicyajpa itumpıy jém p̄ixiñtam iga itúñıyyajpa.

²⁷ Jesic jém Xiwan inímay jém icuyujc̄iwiñ:

—Siiga da ti tachiiba Dios, jesic da ti tanait. ²⁸ Michtam anwı̄mator̄neta cuando manañmadayta iga ich da je aCristo. Pero Dios acutsat iga anjagoyñeñ ammiñ iga anwı̄tsagáypa jém Cristo ituj. ²⁹ Cuando it jém ancoomıyóycuy, jesic jém representante wiñti iwı̄tsacpa itumpıy jém cosa. Jesic ocmi miñpa jém yoomıyypaap iga ipıctsonpa jém iyomo. Jesic maymay jém representante. Jesaptim aich. Agui amaymay iga núcneum jém Cristo. ³⁰ Sı̄p más jáyanap jém Cristo ip̄ixiñtam. Dam atúñıyyajpa jém p̄ixiñtam porque cuyajum jém anyoxacuy.

Jém Miññewı̄p Sı̄nyucmi tsam wiap

³¹ Jém yucmıpic miññe, je más wiap que itumpıy jém p̄ixiñtam. Pero jém tsucumnewı̄p yıp naxyucmi iniit yıp naxyucmıpic jıxi. Inmatpa yıp naxyucmıpic anquímayooyi. Pero jém yucmıpic miññe inimiñ jém más wı̄bic jıxi. ³² Inmatpa jém wı̄bic anquímayooyi jém iixñewı̄p y jém imator̄newı̄p sı̄nyucmi. Pero jém p̄ixiñtam da icupıcyajpa jém inmadayooyi, itumpıy ijısyajpa iga mıgooyi. ³³ Pero ich aXiwan ancupic jém inquímayooyi y mannımaypa iga je jém numapic, da mıgóypa tanjatuj Dios. ³⁴ Porque jém icutsatnewı̄p Dios, inmatpa jém Dios inmatı. Quejpa iga tsam pı̄mi chiiñeta jém Dios iAnama. ³⁵ Tanjatuj Dios tsam itoypa jém iManic. Ichiñcodáy itumpıy cosa icı̄jom iga wı̄añ iwı̄anjam. ³⁶ Siiga i icupıcpa jém Dios iManic, jesic ipıctsonpa jém vida jém dapic cuyajpa. Pero siiga tum p̄ixiñ da icupıcpa jém Dios iManic, jesic da ipıctsonpa jém vida jém dapic cuyajpa. Dios ichiiba jém p̄ixiñ jém mı̄pı̄c castigo jém dapic cuyajpa.

4

Jesús anmatyajpa con tum Samariapic yomo jém mutcım

¹ Jesic imator̄nyaj jém fariseoyaj iga más jáyan jém p̄ixiñtam itúñıyyajpa jém Jesús que jém Xiwan, icchinipatim más jáyan p̄ixiñtam. ² Pero jém Jesús iyaac da acchínoypa, nada más acchínoyyajpa jém icuyujc̄iwiñ. ³ Mu ijodóna jém Jesús ti ijısyajpa jém fariseoyaj, jesic put de jém naxyucmi de Judea. Set eybic jém naxyucmi de Galilea.

⁴ Iganam nicpa Galilea jém Jesús, tienes que naspa jém naxyucmi de Samaria. ⁵ Jesic núc jém Jesús tum Samariapic attebet inı̄yi Sicar. Da juumi jém nas jém ichiñewı̄p wiñigam jém Jacob jém imaníc José. ⁶ Jemtim it jém mutı jém iwı̄atnewı̄p jém Jacob. Cugapjama núc jém Jesús. Agui sopsne. Juumi miñ. Jesic coñ Jesús jém mutcım. ⁷ Jesic jeeti rato núc tum Samariapic yomo. Miñ ipic ni. Jesús inímay jém yomo:

—Acwaaci uxañ ni.

⁸ Da i jém icuyujc̄iwiñ. Nic ijuyyaj titam icútyajpa jém attebet Sicar. ⁹ Jesic jém Samariapic yomo inímay jém Jesús:

—¿Tiiga anwágáypa ni aich? Mich mijudío y ich aSamariapic ayomo.

Jempam nim jém yomo porque jém judíos tsam ijóyixajpa jém Samariapic pixiñtam.
 10 Jesic Jesús icutson jém yomo. Iñímáy:

—Meega mich iñjodon i miwágáypa jém ni y meega iñjodon tim iga Dios michiitooba jém wibic ni, jesic mich anwágáypa jém ni y ich manchiiba jém wibic ni jém michiipáppic jém vida.

11 Jesic jém yomo iñímáy jém Jesús:

—Pero mich da ini timi iñtoppa jém ni. Tsam jojmi jém muti. ¿Jutsap iñtop jém ni jém tachiipáppic vida? 12 Jém anjatunwewe ijatun jém Jacob ichac yíp muti para aichtam. Jém Jacob con jém imanictam nicyajpa yim. Icnicyajpatim jém ianimatyaj. ¿Que mich más miwíap que jém Jacob?

13 Jesic Jesús iñímáy jém yomo:

—Itumpiy jém iucyajpáppic yíp ni, yimpic it mutjom, níctitsyajpa eybic. 14 Pero jém iucpáppic jém ni, jém ichpic anchiiba, dam eybic níctitspa. Jém ni tsíypa juuts tum ni ixcu y ianamanjom. Iyaacquímpa jém ni iga ichiiba jém vida jém dapic cuyajpa.

15 Jém yomo iñímáy jém Jesús:

—Mimich, achi jém ni, jesic dam eybic aníctitspa. Da amiñgacpa yim iga ampicpa ni.

16 Jesús iñímáy jém yomo:

—Nigi anwejaayi jém inwidaya. Miñtaami yim.

17 Nim jém yomo:

—Da ajaayíy.

Jesic Jesús iñímáy:

—Da mimigóypa iga miñimpa iga da mijaayíy. 18 Porque iniit idic cinco inwidaya y jém pixiñ jém siippic iniit da je inwidaya. Da mimigóypa iga da mijaayíy.

19 Cuando imaton junimpa Jesús, jesic jém yomo iñímáy:

—Quejpa iga mich miprofeta. 20 Aichtam jém aSamariapic anwewetam dende wiñigam ijisyajpa Dios yíp cotsicyucmi. Pero mimichtam miñimtámpa iga solamente Jerusalén wiap tanjista Dios.

21 Jesús iñímáy jém yomo:

—Cupici siip ti mannímáypa. Núcpa jém jama iga wiap iñjista tanjatun Dios jutquej. Da miñicpa Jerusalén ni datim miquímpa yíp cotsicyucmi iga ininwejpáttámpa Dios.

22 Mimichtam miitwip Samaria da iñjodon i iñjistámpa. Pero aichtam jém ajudiospic apixiñtam ánixpicneta jém nunta Dios porque Dios ichac iga tsucum jém naxyucmi de Israel jém ciacpudoypaap. 23 Siip núctooba jém jama cuando jém numapic icupicneyajwip Dios ijisyajpa Dios ianamanjom, ijisyajpa juuts nimpá jém numapic anquímayooyi. Jém tanjatun Dios imétsa jém ijisyajpáppic jempic. 24 Tanjatun Dios je tum Anama juuts jém sawa. Jém numapic icupicneyajwip Dios jeeyaj numa ijisyajpa Dios ianamanjom juuts nimpá jém numapic anquímayooyi.

25 Jém yomo iñímáy Jesús:

—Anjodon iga miñpa jém Mesías jém icutsatpaap Dios, iñiyitim Cristo. Cuando núcneum jém Mesías, jesic tanquejáypa itumpiy jém witampic anmatí.

26 Jesic Jesús iñímáy jém yomo:

—Icham aje, jém siippic mananmat.

27 Jeeti rato núcyaj jém Jesús icuyujcwiñ. Tsam amanjacyaj iga anmatpa Jesús con jém yomo. Pero da i icwác jém yomo iga: “¿Ti miñ imméts?” Ni datim i icwác jém Jesús iga: “¿Tiiga ininmatpa jém yomo?” 28 Jesic jém yomo ichac imajcuy, nic jém atebet. Nic inmadáy jém pixiñtam:

²⁹ —Nigi aami tum pixiñ. Anmadáy aich itumpiy titam anwatne dende wiñic. ¿Que da yibam jem Cristo?

³⁰ Jesic jeeyaj putyaj jem attebet, nic iamyaj jem Jesús. ³¹ Iganam nicne jem yomo, jem Jesús icuyujcwiñ inímayyaj:

—MamMaestro, miñi miwiiqui.

³² Pero Jesús inímay jem icuyujcwiñ:

—Ich anait wiccuy jem dapic inixpictámpa mimichtam.

³³ Jesic jem icuyujcwiñ mojpa nacwacyajtaji entre jeeyaj. Nimyajpa:

—¿Tananjam iga algunos inimíñáy jem wiccuy?

³⁴ Pero Jesús inímay icuyujcwiñ:

—Cuando anwatpa juuts ixunpa Dios y anaccupacpa jem Dios iyoxacuy jex juuts ich anwiccuy. ³⁵ Michtam miñimtámpa iga: “Togoyñam cuatro meses iga itpa jem cosecha.” Pero ich mannímáypa, ixtaami iga cinneum jem cosecha. Jáyan jem pixiñtam icupicyajtooba jem Dios inmatí. ³⁶ Jem ipinyajpáppic jem cosecha yoyajtap. Ipinyajpa jem pixiñtam iga chiitap jem vida jem dapic cuyajpa. Itumpiy jem inipneyajwiip y jem ipinyajpáppic jem cosecha wagamaymáayajpa. ³⁷ Numa juuts nimpa jem anmatí iga tum pixiñ inippa jem cama, pero tungac ipinpa jem cosecha. ³⁸ Mancutsat iga niguiñ impin jem yoxaji jut mich da inñip. Tungac yoxayajpa jem camjom, pero michtam impíñáypa jem iyoxaji.

³⁹ Jáyan jem Samariapic pixiñtam jem ityajwiip jem attebet Sicar icupicyaj jem Jesús porque jem yomo inímay iga: “Jem pixiñ anmadáy itumpiy juuts ich anwatne.” ⁴⁰ Jesic cuando jem pixiñtam núcyaj jut it jem Jesús, icunucsayyajpa. Inímayyaj iga: “Tsiyi yim con aichtam.” Jesic jemum tsíy jem Jesús wisna jama. ⁴¹ Jesic iganam accuyujóypa Jesús jem attebet Sicar, mástim jáyanam jem pixiñtam icupicyaj jem Jesús. ⁴² Jesic jeeyaj inímayyaj jem yomo:

—Siip anjodonam iga yip pixiñ je jem Cristo jem iciacputpáppic itumpiy jem ityajwiip icuwiti yip naxyucmi. Anjodónata porque anyaac ammatoneta ti nimpa, da no más iga mich ananmadáy.

Jesús icpis tum mijpic anjagooyi ijaymanic

⁴³ Jemum poychíy wisnajama. Ocmi moygacum niqui jem Jesús jem naxyucmi de Galilea. ⁴⁴ Porque iyaac nim jem Jesús iga: “Wipictsonap jem profeta jutquej, pero cuando nicpa najíyooyi iticmipic attebet, jem itwitam da iwipictsonyajpa.”

⁴⁵ Cuando núc Jesús Galilea, jesic jem Galileapic pixiñtam iwipictsonyaj. Porque oy sinajiyaj jem pascuasij jem Jerusalén. Iixyajtim titam iwatne Jesús jem Jerusalén. ⁴⁶ Nicgac Jesús jem attebet Caná, jem naxyucmi de Galilea, jut icset jem ni iga vino. Jesic jemum it idic tum mijpic anjagooyi, icuyoxap jem rey. Mimne jem anjagooyi ijaymanic jem attebet Capernaum. ⁴⁷ Cuando ijodónap jem anjagooyi iga putneum Jesús jem naxyucmi de Judea y núcneum jem naxyucmi de Galilea, jesic nic iam jem Jesús. Jem anjagooyi icunucsáypa jem Jesús iga niguiñ iticim iga icpisáyiñ jem ijaymanic porque caatoobam.

⁴⁸ Jesic Jesús inímay jem pixiñ:

—Mimichtam, siiga da inixtámpa jem wibic seña y jem wítampic milagroyaj, da incupictámpa iga Dios acutsat yip naxyucmi.

⁴⁹ Pero jem anjagooyi inímay Jesús:

—Mánomi, siipti tanicpa antes que caaba jem ammanic.

⁵⁰ Jesic Jesús inímay jem anjagooyi:

—Siip nicsim iníicmi. Pisneum jem immanic.

Jém p̄ixiñ icupic ti iñímáy Jesús. Mojum seti iticmi. ⁵¹ Iganam seti idic iticmi jém anjagooyi, jesic tunjom ipát algunos de jém icuyoxayajpaap. Miñ imétsyaj jém iomi. Nímayta:

—Pisneum jém immanic.

⁵² Jesic jém anjagooyi icwác jeeyaj iga juchis hora moj uxánaji iga pistooba jém imaníc. Nímaj:

—Matic a la una de la tarde ichac jém jawan.

⁵³ Jesic jém tsixi ijatun ijis iga jeetim hora Jesús iñímáy iga: “Pisum jém immanic.” Jesic jém p̄ixiñ icupic Jesús con itumpiy jém ityajw̄ip iticcim.

⁵⁴ Wisten milagro iwat Jesús cuando set jém naxyucmi de Galilea de jém naxyucmi de Judea. Yip jém ocmipic.

5

Jesús icpis tum p̄ixiñ jém meycim iñiyi Betesda

¹ Jesic yaj iwat jempic, núc jém jama iga jém judíos iwatyajpa tum sin Jerusalén. Nictim mex jém Jesús. ² Jemum Jerusalén it tum meyi watneta, taañianaca. Jém ni iñiyi Betesda jém hebreopic anmatimi. Nocojom it jém taañi ipuerta iñiyi jém Borrego iPuerta. Jém meyanaca it cinco corredor. ³ Woneyaj jém corredor jáyan jém mimneyajw̄ip. Ittim jém cáchti, jém cuxuj y jém tusacanew̄ip icumij. Injócyajpa iga tsigóypa jém ni. ⁴ Porque aveces miñpa tum sinyucmipic p̄ixiñ iga ictsigóypa jém ni. Jesic jém wiñtipic tigiyapa jém meyjom cuando tsigóypa jém ni, p̄ispa de cualquier jém caacuy. ⁵ Jemum it tum p̄ixiñ tsam pecam mimne. Inii tum jém caacuy treinta y ocho amt̄iy. ⁶ Jesic Jesús iix jém p̄ixiñ jut wone. Ijodon̄a Jesús iga tsam pecam mimne, iñímáy jém p̄ixiñ:

—¿Inwianjam iga mipispa?

⁷ Jesic jém mimnew̄ip iñímáy Jesús:

—Mánomi, da anai i acucumpa jém meyjom cuando tsigóypa jém ni. Iganam atigiytooba aich, wiñti tigiyapa tungac.

⁸ Jesús iñímáy jém p̄ixiñ:

—Siip tsucumim, piñim jém iñchees, w̄itim.

⁹ Jeeti rato pisum jém p̄ixiñ, ipin jém ichees, mojum w̄iti.

Watta yip milagro jém jejcuyjama. ¹⁰ Jém judíos p̄imi jóyñeyaj. Iñimayyaj jém p̄ixiñ jém pisnew̄ip:

—Yip jama jém jejcuyjama. Jém tananquímayooyi da ijicpa iga iñchimteñpa iñchees yip jama.

¹¹ Jesic jém mimnew̄ip idic iñímáy jém anjagooyiyaj:

—Jém p̄ixiñ, jém acpisnew̄ip, anímáy iga: “Piñim iñchees. W̄itim.”

¹² Jesic jeeyaj icwácayaj, iñímáy:

—¿I miñímáy iga: “Piñim jém iñchees, w̄itim”?

¹³ Pero jém acpisnetaw̄ip da ijodon̄i icpis porque tsam itñim jém lugar y nicneum jém Jesús. ¹⁴ Jesic ocmi Jesús ictsiy jém p̄ixiñ jém mijpic masticjom. Iñímáy:

—Siip mipisneum. Odom malwati eybic iga odoy iññascain̄ tum cosa más p̄imi malo.

¹⁵ Jesic jém p̄ixiñ nic inmaday jém judíos iga Jesús jém icpisnew̄ip. ¹⁶ Jém judíos ijóyixyajpa Jesús iga acpisóypa jém jejcuyjama. Jeeyucmi tsam icpóyiyaj jém Jesús. Imétsyaj jutpic iccaayajpa. ¹⁷ Pero Jesús iñímáy jeeyaj:

—Jém anjatun Dios yoxap hasta siip. Ich ayoxaptim.

¹⁸ Jeeyucmi jém judíos más pimi iccaayajtooba jém Jesús. Porque da solamente iga yoxap jém jejcuyjama, pero nimpatim Jesús iga: “Ich jém Dios anJatun.” Jesic tsíy jex juuts tanJatun Dios.

Jém Dios iManic jextim ipimi juuts jém iJatun

¹⁹ Jesic Jesús inímáy jém pixiñtam:

—Numa mannímáypa iga jém Dios iManic da iwatpa juuts ijispa iyaac, iwatpa juuts iix iga iwatpa jém iJatun. Jém Dios iManic iwatpa jextim juuts iwatne iJatun. ²⁰ Jém anJatun Dios itoypa jém iManic y inquejáypa itumpiy juuts je iwatpa. Ocmi Dios inquejáypatim iManic jém más mijpic milagro y mimichtam tsam miámanjactámpa cuando íñixtámpa. ²¹ Porque jém anJatun Dios icpíspa jém caaneyajwip, ichiiba vida. Jesapitim iwat jém Dios iManic, ichiibatim vida jém pixiñtam jém iwianjamyajpáppic. ²² Jém anJatun Dios da i icipinpa. Iccám iManic juuts tum anjagooyi iga icipíñiñ itumpiy jém pixiñtam, ²³ iga itumpiy de jeeyaj icujípyajin jém Dios iManic. Jém dapic icujíppa jém Dios iManic, jesic datim icujíppa jém anJatun Dios jém icutsatnewip.

²⁴ Nímtim Jesús:

—Numa mannímáypa mimichtam, siiga immatonpa ich anañmati y incupicpa Dios jém acutsatnewip, jesic iniitum jém vida jém dapic cuyajpa. Jesic da impictsonpa jém castigo. Michíyñe idic juuts caane jém íñanama, pero sip vivojam jém íñanama. ²⁵ Numa mannímáypa iga núcpa jém jama y sip núcneum iga jém pixiñtam, jém caaneyajwip, imatónayyajpa jém Dios iManic ijíyi. Jém icupicneyajwip ti inímáy, ipictsonyajpa jém vida. ²⁶ Jém anJatun Dios iniit jém vida y wíap ichi i quej. Ichíñetim jém iManic jexpictim pimi iga jeegacti wíap michi jém vida juutstim anJatun Dios. ²⁷ Jém Miñnewip Sinyucmi chiita jém pimi iga icipin jém pixiñtam. Jeeyucmi miñ yíp naxyucmi. ²⁸ Odoy ámanjaci cuando mannímáypa iga pisyajpa jém caaneyajwip. Porque núcpa jém jama cuando itumpiy jém pixiñtam, jém caaneyajwip, imatónayyajpa jém ijíyi. ²⁹ Itumpiy jém caaneyajwip putyajpa de jut cumneyajta. Jém iwatneyajwip juuts iwianjam Dios, pisyajpa iga ipictsonyajpa jém vida iga dam eybic caaba. Pero jém malopic pixiñtam, pisyajpatim iga ipictsonyajpa jém castigo jut da nunca putpa.

Wiquejpa iga Jesús iniit Dios ipimi

³⁰ Jesic nímtim Jesús:

—Ich da ti wíap anwat anyaac. Ançipinpa jém pixiñtam juuts anímáy Dios. Jeeyucmi ich anwicipinpa porque da anwatpa juuts ich anwianjam, pero anwatpa juuts iwianjam jém anJatun Dios jém acutsatnewip. ³¹ Siiga ich anyaac manañmadáypa iga Dios acutsat, jesic da i acupigáypa jém anañmadayooyi. ³² It tungac testigo jém minmadaypáppic iga Dios acutsat. Ich anjodon iga nuumanmatpa cuando miñímáypa jut amiñ. ³³ Michtam incutsat jém pixiñtam iga niguiñ icwácay jém Xiwan jém acchínoypaap. Jém Xiwan miñuumanmadáy, da mimigóyáy. ³⁴ Ich da ansunpa jém testigo iga ayoxpátpa aich, pero ammétspa jém testigo iga miyoxpátámiñ iga micíacputtámiñ mimichtam. ³⁵ Jém Xiwan jex juuts tum jucti iga miyíquejpa, agui wítsocpa. Cuando it jém Xiwan, mimichtam agui mimaymaytam iga impictsonpa jém Xiwan inquímayooyi. ³⁶ Pero it tum testigo más wí que jém Xiwan. Jém milagroyaj, jém anwatnewip, tsíy juuts tum testigo para ich. Cuando anwatpa jém milagro juuts anímáy Dios, jesic quejpa iga Dios acutsat yíp naxyucmi. ³⁷ Jém anJatun, jém acutsatnewip yíp naxyucmi, tsíy tim juuts tum testigo iga ich amiñ sinyucmi, pero mimichtam da queman immatonpa jém Dios ijíyi ni da queman íñixta jém icuwiñ. ³⁸ Mimichtam, da iniita jém Dios inmati íñanamanjom porque da ancupicta aich jém acutsatnewip Dios. ³⁹ Mimichtam tsam incuyujcatámpa

jém Dios in̄mati jém jayñew̄ip porque in̄jistámpa iga jemum impátpa jém vida jém dapic cuyajpa. Pero jém Dios in̄mati jém jayñew̄ip, miñmadáypa de aich. ⁴⁰ Mimichtam da michiytamtooba juuts ich man̄cuyujc̄iwiñ iga w̄iañ impictson̄ta jém vida jém dapic cuyajpa.

⁴¹ Nintim Jesús:

—Ich da ammétspa jém p̄ixiñtam ȳip naxyucmi iga acujípyajiñ. ⁴² Man̄w̄ixpicpa mimichtam, an̄jodon̄ iga da in̄toytámpa Dios. ⁴³ Ich amiñ jém an̄Jatun̄ Dios in̄iyimi, pero mimichtam da ampictson̄ta. Siiga miñpa tungac p̄ixiñ jém dapic je Dios im̄chi, jesic impictson̄támpa. ⁴⁴ ¿Pero jutsap in̄cupicta Dios porque tsam minicujíptamtap̄ in̄yaac? Da in̄wattamtooba jém w̄itampic cosa iga Dios icutum micujíptamiñ. ⁴⁵ Odoy j̄isi iga ich anaquímpa jém quejaj contra mimichtam jém an̄Jatun̄ Dios iwiñjom. Pero jém Moisés numa iniquímpa jém quejaj contra mimichtam porque miñimtámpa iga in̄cupicta jém Moisés in̄químayooyi.

⁴⁶ Siiga numa in̄cupicta jém Moisés in̄químayooyi, jesic in̄cupictámpa tim̄ iga Dios acutsat porque jém Moisés ijay iga ich amiñpa. ⁴⁷ Pero siiga da in̄cupictámpa ti ijay jém Moisés, ¿jesic jutsap in̄cupic ti mannímáy?

6

Jesús icwíc cinco mil p̄ixiñtam

(Mt. 14:13-21; Mr. 6:30-44; Lc. 9:10-17)

¹ Ocmi, cuando yaj in̄asca jem̄pic, nic Jesús jém laguna an̄wiñtuc, in̄iyi jém laguna Galilea, in̄iyitim Tiberias. ² Tsam jáyan̄ p̄ixiñtam itún̄iyaypa Jesús porque iixyay jém milagroyaj cuando icp̄is jém mimneyajw̄ip. ³ Quím Jesús tum̄ cotsicyucmi, iwaganacoñyay jém icuyujc̄iwiñ. ⁴ Núctooba jém pascuas̄in̄ jém iwatyajpáppic jém judíos. ⁵ Cuando ámquím Jesús, iix iga miñyajpa tsam jáyan̄ jém p̄ixiñtam. Jesic in̄ímáy jém Felipe:

—¿Jut̄ w̄iap tan̄juy caxtánañi iga tanacwíctámpa itump̄iy ȳipyaj p̄ixiñtam?

⁶ Ichobiyñímáy jém Felipe jem̄pic iga icutítspa, porque ijodon̄ Jesús jutsap icwíc jém p̄ixiñtam. ⁷ Jesic jém Felipe in̄ímáy:

—Meega tanait̄ doscientos tumiñ de plata iga tan̄juy caxtánañi, da ictsíypa iga cada tum̄tum̄ ipictson̄pa uxan̄.

⁸ Jesic jém Anti, tungac jém icuyujc̄iwiñ, jém Ximoj Peto it̄wi, in̄ímáy Jesús:

⁹—Yim̄ it̄ tum̄ jaych̄ixi. Iniiit̄ cinco caxtánañi de cebada y w̄isten̄ t̄ipi. Pero como tsam jáyan̄ ityay, da ictsíypa ni uxan̄.

¹⁰ Jesic Jesús in̄ímáy jém icuyujc̄iwiñ:

—Accoñyaji itump̄iy jém p̄ixiñtam.

Jesic coñyay múganjom, ityay como cinco mil jém p̄ixiñtam. ¹¹ Jesic Jesús ipic jém caxtánañi. Cuando yaj in̄wejpát Dios, ichi jém caxtánañi jém icuyujc̄iwiñ. Jeeyaj iwécyaj, ichiiyay itump̄iy jém p̄ixiñtam jém coñyajw̄ip. Jem̄pictim̄ iwat con jém t̄ipi. Chiiyajta juuts ixunyajpa jém p̄ixiñtam. ¹² Jesic cuando cusum wiiquiyaj, in̄ímáy Jesús jém icuyujc̄iwiñ:

—S̄ip̄ pin̄taami itump̄iy jém cutsíyñew̄ip iga odoy togóyiñ ni uxan̄.

¹³ Jesic ipinyaj itump̄iy jém cutsíyñew̄ip, jém dapic yaj icútyaj jém p̄ixiñtam. Icucomyay doce nacoon̄ con jém cutsíyñew̄ip de jém cinco caxtánañi de cebada. ¹⁴ Jesic jém p̄ixiñtam cuando iixyay jém milagro jém iwatnew̄ip Jesús, n̄im̄yay:

—Numa ȳip p̄ixiñ jém Profeta jém tananjóctampáppic iga miñpa ȳip naxyucmi.

15 Pero Jesús icutiꝢyꝢy iga miñpa imats jém pꝢixiñtam iga iccámpa pꝢimimi juuts tum rey, jeeyucmi nic icutum tum cotsicyucmi.

Witpa Jesús jém nꝢwiñpacyucmi
(Mt. 14:22-27; Mr. 6:45-52)

16 Jesic jocpiichabam iti. Quetyaj jém Jesús icuyujcꝢwiñ jém laguna añnaca. 17 TigiyꝢyꝢ tum barcojom, moj nꝢquiꝢyꝢ jém laguna añwiñtuc jém atebet Capernaum. Cupiichawum, pero danam quet jém Jesús. 18 Jesic moj poyi jém sawa tsam pꝢimi. Agui mij jém nꝢpoa. 19 Juumi nic jém barco como cinco o seis kilómetro. IcwiꝢyꝢjpa jém barco con remos. Jesic jeeti rato iꝢxyꝢyꝢ iga miñpa jém Jesús, witpa imiñ jém nꝢwiñpacyucmi. Núc nocojom jut it jém barco. Tsam pꝢimi cꝢnyꝢyꝢ jém icuyujcꝢwiñ. 20 Jesic Jesús iñímáy jeeyaj: —Aicham, odoy cꝢntaami.

21 Jesic iwꝢpꝢctsonꝢyꝢ jém icuyujcꝢwiñ, icquímyꝢ Jesús jém barcojom. Jesic tumti rato núcyꝢyꝢ jém laguna añnaca jut nꝢcyꝢjpa.

Jém pꝢixiñtam imétsyꝢjpa jém Jesús

22 Jesic icuquejama jém pꝢixiñtam, jém tsíyñeyajwꝢp jém laguna añnaca, jut tsucumyꝢyꝢ jém Jesús icuyujcꝢwiñ, ijodónꝢyꝢyꝢ iga it idic jem no más tum barco. IjodónꝢyꝢyꝢjtim iga jém Jesús da iwagananꝢcyꝢyꝢ jém icuyujcꝢwiñ barcojom. 23 Iganam sꝢp iꝢsꝢyꝢyꝢ jém pꝢixiñtam, núcyꝢyꝢ wꝢti jém barco, tsucumyꝢyꝢ jém atebet de Tiberias. NúcyꝢyꝢ jém laguna añnaca nocojom jém lugar jut icútyꝢjpa jém caxtánañi jut inꝢwejpát Dios jém tánꝢmi. 24 Jesic cuando jém pꝢixiñtam iꝢxyꝢyꝢ iga da i jém Jesús ni jém icuyujcꝢwiñ, tigiyꝢyꝢyꝢ jém tungac barcojom, jém yaguiñꝢic miñyꝢyꝢ, nꝢcyꝢjtim jém atebet Capernaum iga imétsyꝢjpa Jesús.

Jesús jém caxtánañi jém tachiꝢpáꝢꝢic vida

25 Jesic cuando ipátyꝢyꝢ jém Jesús jém laguna añwiñtuc nꝢmyꝢjpa:

—MamMaestro, ¿juchis miñúc yꝢm?

26 Jesic Jesús iñímáy jeeyaj:

—Numa mannímáyꝢ, mimichtam ammétstámpa porque micusta mu inꝢcútta jém caxtánañi. Da ammétstámpa porque inꝢcutiꝢyꝢyꝢta ti mananꝢquejayta con jém wꝢbꝢic milagro jém añwatnewꝢp. 27 Odoy yoxataami no más para jém wꝢccuy, jém itwꝢp yꝢp naxyucmi, porque je yajpa. Más wꝢ iga miyoxatámiñ para jém tungac wꝢccuy jém dapꝢic cuyajpa, jém michiꝢpáꝢꝢic jém vida jém dapꝢic cuyajpa. Ich, jém aMiññewꝢp SꝢnyucmi, amiñ iga manchiiba jém wꝢccuy jém dapꝢic cuyajpa. Quejpa iga acutsat jém anꝢꝢatunꝢ Dios porque achi jém pꝢimi iga wꝢꝢiñ añwat jém milagroyaj.

28 Jesic jém pꝢixiñtam iñímáy jém Jesús:

—¿Ti wꝢꝢp añwatta iga añwattámpa jém Dios iyoxacuy?

29 Jesús iñímáy jém pꝢixiñtam:

—It tum yoxacuy iwꝢanꝢam Dios iga inꝢwattámiñ, acupꝢctaami aich jém acutsatnewꝢp Dios yꝢp naxyucmi.

30 Jesic jém pꝢixiñtam iñímáy jém Jesús:

—¿Que jup seña ananꝢquejáyꝢ mimich iga manꝢcupꝢctámiñ? ¿Jup milagro wꝢꝢp inꝢwat?

31 Jém tanꝢꝢatunꝢwewetam wiñigam icútyꝢyꝢ jém maná jém titsꝢnaxyucmi. Jayñeta jém Dios inꝢꝢati iga: “ChiiꝢyꝢjta jém pꝢixiñtam jém sꝢnyucmꝢꝢic caxtánañi.”

32 Jesic Jesús iñímáy jém pꝢixiñtam:

—Numa mannímáyꝢ, da je sꝢnyucmꝢꝢic caxtánañi jém ichiñewꝢp jém Moisés jém wiñꝢꝢic pꝢixiñtam. Pero anꝢꝢatunꝢ Dios michiiba jém nunta sꝢnyucmꝢꝢic caxtánañi. 33 Porque jém caxtánañi, jém michiꝢpáꝢꝢic Dios, quetpa sꝢnyucmi y ichiiba vida jém pꝢixiñtam jém ityꝢjwꝢp yꝢp naxyucmi.

³⁴ Jesic nimyaj jeeyaj:

—Mánomi, achiitaami siempre jexpic caxtánañi.

³⁵ Jesic Jesús iníimáy:

—Ich jém acaxtánañi jém michiipáppic jém vida. Siiga i miñpa atúnjy, jesic da nunca yuap; siiga i acupicpa aich, jesic da nunca níctitspa. ³⁶ Mannímáyta iga mex ánixñeta mimichtam, da ancupictámpa iga michíyíñ juuts ich manꝑucuyucñwiñ. ³⁷ Itumpiy jém pxiñtam, jém achiipáppic jém anJatun Dios, miñpa atúnjyyaj. Siiga miñpa atúnjy tum pxiñ, ampictsonpa, da anquebacputpa. ³⁸ Porque ich amiñ sinjucmi iga anwatpa juuts iwianjam Dios jém acutsatnewiip. Da amiñ iga anwatpa juuts aich anwianjam. ³⁹ Jém anJatun, jém acutsatnewiip yíp naxyucmi, da ixunpa iga togoypa ni tum jém pxiñ jém achiñewiip aich. Achiita jém pimi iga waiñ anacpisyaj jém ampixiñtam jém caaneyajwiip jém inajpigam jama. ⁴⁰ Porque jém anJatun Dios, jém acutsatnewiip, iwianjam iga itumpiy jém pxiñtam, siiga iixyaj jém iManic, icupicyajpa, ipictsonyajpa jém vida jém dapic cuyajpa. Anacpisyajpa itumpiy jém ampixiñtam jém inajpigam jama.

⁴¹ Jesic agui jóyñeyaj jém judíos. Icujiyyaj jém Jesús porque nimpa iga: “Ich jém acaxtánañi jém aquetnewiip sinjucmi.” ⁴² Nimyaj jeeyaj:

—¿Que da yibam jém José imaníc? Tánixpígáy jém ijatun y iapa. ¿Tiiga tanímáypa iga quetne sinjucmi?

⁴³ Jesic jém Jesús iníimáy jém pxiñtam:

—Tsaci iga anꝑucuytámpa mimichtam. ⁴⁴ Da i wiaꝑ imiñ iga acupicpa siiga jém anJatun Dios da inimiñpa. Ich anacpisa jém ampixiñtam jém caaneyajwiip jém inajpigam jama. ⁴⁵ Jém wiñicpic profeta ijaychacne jém librojom iga: “Dios icꝑucuyyajpa itumpiy jém ipixiñtam.” Siip mannímáypa iga itumpiy jém pxiñtam jém icꝑucuyneyajwiip jém anJatun Dios, jém imatonneyajwiip, miñpa atúnjyyaj aich.

⁴⁶ Nimpatim Jesús:

—Ich anjodon iga da i oypa iix jém anJatun Dios, ich anꝑutum ánixñe. Porque ich amiñ jut it jém anJatun. ⁴⁷ Numa mannímáypa, jém acupicpaap aich, ipictsonpa jém vida jém dapic cuyajpa. ⁴⁸ Ich jém acaxtánañi, jém manchiipáppic vida jém dapic cuyajpa. ⁴⁹ Mimichtam injatunwewetam, jém wiñicpic, icútyaj jém maná jém titsinaxyucmi. Pero ocmi caayajtim jeeyaj. ⁵⁰ Pero siip mananmadáypa iga it tungac caxtánañi jém quetnewiip sinjucmi. Siiga i icútpa yíp caxtánañi da eybic caaba. ⁵¹ Ichtim mismo jém acaxtánañi jém aquetnewiip sinjucmi. Siiga i icútpa yíp caxtánañi, itpa para siempre. Jém caxtánañi, jém manchiipáppic, ich ammitay. Ich anyaac anjicpa iga accaatap iga anyojáypa jém pxiñtam itanꝑa iga ipictsonyajpa jém vida jém dapic cuyajpa.

⁵² Jesic jém judíos nacwacyajtap entre jeeyaj. Moj anajiyaj. Nanímayyajtap:

—¿Jutsap tachi jém imitay iga tanꝑudáypa?

⁵³ Jesic Jesús iníimáy jeeyaj:

—Ich jém aMiññewiip sinjucmi, numa mannímáypa siiga mimichtam da inꝑutpa ich ammitay y siiga da inucpa jém annipiñ, jesic da ini jém vida iga nicpa miiti con Dios. ⁵⁴ Siiga i icútpa jém ammitay y iucpa annipiñ, iniitum jém vida jém dapic cuyajpa; anacpisa jém inajpigam jama. ⁵⁵ Jém ammitay nunta wiccuy y jém annipiñ nunta uccuy, mimatspagáypa inanama. ⁵⁶ Siiga i icútpa ammitay y iucpa annipiñ, awaganaitpa aich y ich anwaganaitpa je. ⁵⁷ Jém anJatun Dios jém acutsatnewiip iniit jém vida. Ich anaittim jém vida porque achiñe jém anJatun. Jesanetim jém ampixiñtam jém icútnewiip jém ammitay, iniityajtim jém vida jém dapic cuyajpa, porque ich anchiñe. ⁵⁸ Mananmadáypa de jém caxtánañi jém quetnewiip sinjucmi. Yíp caxtánañi da jex juuts

jém wíccuy jém maná jém icútneyajwíip jém iñjatunwewetam wiñigam. Jeeyaj caayajtim itumpiy. Pero siiga ì icútpa yíp caxtánañi, iniitpa jém vida jém dapic cuyajpa para itumpiy tiempo.

⁵⁹ Jesús inquejáypa jempic jém ityajwíip jém sinagoga jém attebet Capernaum.

Tachiitá jém vida jém dapic cuyajpa

⁶⁰ Jáyan jém icuyujcwiñ cuando imatonyajpa ti nimpá jém Jesús, jesic nimyaj:

—Tsam tánca yíp anquímayooyi. ¿Ì wíap icupic?

⁶¹ Jém icuyujcwiñ mojpa icuyiyaj jém Jesús. Pero je ijodon ti síp iñimayaj, jesic iñimáy:

—¿Que da inwianjamta yíp anquímayooyi? ⁶² ¿Jesic ti iñjístampa siiga mimichtam

ánixtámpa, jém aMiññewíip Sinyucmi, cuando aquíngacpa sinyucmi jut ait idic wiñigam?

⁶³ Tum pxiñ ìanama iniit jém ivida. Pero siiga putpa jém ìanama, jesic jém imiytay da ti cuwatcuy. Ich anañmati, jém manañmadayñewíip, numa iniit jém vida, iniit jém anama.

⁶⁴ Pero todavía it algunos de mimichtam da incupictámpa ich anañmati.

Mu icupin Jesús jém icuyujcwiñ ijodon ìapaap da icupicpa y ìapaap iwadáypa jém atraición. ⁶⁵ Jesic Jesús iñimáy itumpiy jém itúnyajpaap:

—Jeeyucmi mannimáypa iga da ì wíap imiñ iga atúníyapa siiga jém anjatun Dios da ijícpa, siiga da anamíñáypa.

⁶⁶ Dende jesigam tsam jáyan jém Jesús icuyujcwiñ ichaganputyaj iga iwaganasiba, da más itúnyaj. ⁶⁷ Jesic Jesús icwácpa jém doce icuyujcwiñ. Nímayta:

—¿Que mimichtam antsaganputpatim?

⁶⁸ Icutson jém Ximój Peto, iñimáy:

—Mánomi, ¿jesic ì antúníyapa? Mimich iniit jém wibic añmati jém tachipáppic jém vida jém dapic cuyajpa. ⁶⁹ Aichtam mancupicnetámum y anjodónanetámum iga mich miCristo jém Vivopic Dios miManic.

⁷⁰ Jesic Jesús iñimáy jém icuyujcwiñ:

—Ich mancupineta mimichtam jém doce mancuyujcwiñ. Pero tum de mimichtam miwocwiñ.

⁷¹ Inmatpa Jesús de jém Judas Iscariote, jém Ximój Iscariote imanic. Je tum de jém docepic icuyujcwiñ, pero iwadáypa atraición jém Jesús.

7

Jém Jesús itiwitam da icupicyajpa

¹ Jesic ocmi cuando yaj inquejáy jempic, siiba Jesús jém naxyucmi de Galilea. Da nictooba jém naxyucmi de Judea porque jém judíos iccaayajtooba. ² Da jáypa núc jém sin iga iwatyajpa jém nacxtic jém judíos. ³ Jesic jém Jesús itiwitam iñimayaj:

—¿Tiiga michíy yim? Nici jém naxyucmi de Judea iga itumpiy jém incuyujcwiñ jém ityajwíip jém naxyucmi de Judea wíap iixyaj ti inwatpa. ⁴ Siiga ì ixunpa iga ixpictañ, jesic da iyamwatpa tum cosa jut da ì iixpa. Siiga mich inwatpa jexpic cosa, odooy yamwati. Wati jém pxiñtam añcucmi iga miixtani.

⁵ Porque jém itiwitam datim icupicyajpa jém Jesús. ⁶ Jesic Jesús iñimáy jeeyaj:

—Danam núcne jém hora iga anwatpa juuts ixunpa Dios jém naxyucmi de Judea. Pero mimichtam juchis quej wíap iññic. ⁷ Jém pxiñtam, jém ityajwíip yíp naxyucmi, da mijóyixtámpa mimichtam. Pero tsam ajóyixyajpa aich porque ich atsíy juuts tum testigo iga tsam imalwatyajpa jeeyaj. ⁸ Mimichtam, nicstaamim mixínajitam. Ich da anicpa porque danam núcne jém hora iga anicpa.

⁹ Ocni yaj nimi jém Jesús, jemum tsíy jém naxyucmi de Galilea.

Yamnic Jesús jém mijpic sinjom

¹⁰ Cuando nicyajum sinajiyaj jém itiwitam, jesic nictim mex jém Jesús. Da nic cucwiñjom, pero yamnic. ¹¹ Jém judíos imétsyajpa jém Jesús sinjom. Nimyajpa:

—¿Jut it jém pixiñ?

¹² Jesic jém pixiñtam jém ityajwiip jém sinjom nacwacyajtap entre jeeyaj iapaap jém Jesús. Nimyajpa algunos iga agui wibic pixiñ jém Jesús. Pero tungac nimyajpa iga tsam imigóyáypa jém pixiñtam.

¹³ Pero da i inmatpa jut wiap imatonjaj jém judíos porque tsam cinjajpa. ¹⁴ Cuando núcne cucmi iga sinajajpa jém pixiñtam, jesic tigiy Jesús jém mijpic masticjom. Moj accuyujooi. ¹⁵ Jesic jém judíos tsam ipooñanjamyaj cuando imatonjaj jém Jesús. Nimyaj:

—Da oy cuyuji yíp pixiñ, pero tsam jixiíy.

¹⁶ Jesic Jesús inímáy jeeyaj:

—Yíp anquímayooyi da ich ammiichi. Imiichi jém acutsatnewiip. ¹⁷ Siiga tum pixiñ iwianjam iga iwatpa juuts ixunpa Dios, jesic icutiíyíypa iga Dios imiichi yíp anquímayooyi, da ich anjixquimi. ¹⁸ Siiga tum pixiñ ijixquimpa tum anquímayooyi, iwatpa iga cujíptaiñ. Pero siiga tum pixiñ ixunpa iga cujíptaiñ jém icutsatnewiip, jesic quejpa iga nu-
umanmatpa jém pixiñ, da migóypa, da tancaiy ni uxan.

¹⁹ ¿Que da numa michiñeta jém Moisés jém wiñicpic anquímayooyi? Pero mimichtam, ni tum, da incupictámpa jém anquímayooyi. Mimichtam, ¿tiiga anaccaatamtooba aich?

²⁰ Nimyajpa jeeyaj:

—Mich iniif tum mal espíritu. ¿I miccaatooba?

²¹ Jesic Jesús inímáy:

—Mimichtam agui impooñanjamtámpa iga ich anwat jém milagro jém jejcuy jama. ²² Jém Moisés ichac jém costumbre iga inwattamiñ jém marca de circuncisión. Datim Moisés ictsucum yíp costumbre, pero jém wiñicpic pixiñtam iwattim jempic. Jeeyucmi mimichtam inwadaytámpatim jém marca tum jaychixi y da inwadaytámpa caso siiga jejcuy jama. ²³ Jesic siiga mimichtam inwadaytámpa jém marca de circuncisión tum jaychixi iga inwatpa juuts nimpá jém Moisés inquímayooyi, ¿jesic tiiga anjóiypa aich siiga anacpíspa tum pixiñ mimnewiip jém jejcuy jama? ²⁴ Odoy nimi iga imalwatpa tum pixiñ siiga da inwijodon. Wicipiñi con wibic jixi.

Nimpa Jesús iga Dios icutsat yíp naxyucmi

²⁵ Jesic algunos jém ityajwiip jém Jerusalén moj nanímayyajtaji entre jeeyaj:

—¿Da yíbam jém pixiñ jém imétsyajpáppic jém anjagooyiyaj iga accaataiñ? ²⁶ Yim it. Síp inmat jém pixiñtam icucwiñjom. Pero da i ijíyáypa. ¿Tananjam iga jém anjagooyiyaj inuntawijodon iga yíp pixiñ jém Cristo jém icutsatnewiip Dios? ²⁷ Pero taichtam tanjodon jut miñ yíp pixiñ. Pero cuando miñpa jém Cristo da i ijodon jut tsucumpa.

²⁸ Jeeyucmi pimi jiypa Jesús jut accuyujóypa jém mijpic masticjom, nim mu ijíy:

—Numa michtam ánixpicpa y injodonjam jut amiññe, pero ich da amiñ anyaac. Jém acutsatnewiip je jém numapic Dios, michtam da inixpictámpa. ²⁹ Pero ich ánixpicpa porque ich amiññe Dioscim, jeam acutsatne.

³⁰ Jeeyucmi jém anjagooyiyaj tsam imatsyajtooba jém Jesús. Pero da i wiap imats porque danam núcne jém hora iga matstap. ³¹ Y tsam jáyan jém pixiñtam icupicyaj jém Jesús. Nimyajpa:

—Cuando miñpa jém Cristo, ¿que wiap iwat tungac más wibic milagro que jém iwatnewiip yíp pixiñ? Da wiap.

Jém fariseoyaj icutsat jém policía iga imachiñ jém Jesús

³² Jesic jém fariseopic anjagooyiyaj imatonyaj ti nımyajpa jém pıxiñtam de jém Jesús. Jesic jeeyaj con jém panij anjagooyiyaj icutsat jém masticjompic policia iga niguiñ imatsyaj jém Jesús. ³³ Jeeyucmi Jesús inímáy jém pıxiñtam:

—Apoyitpa con mimichtam tum rato. Da jáypa nicpa aiti jut it jém acutsatnewiip. ³⁴ Michtam ammétstampa, pero da ampáttampa porque nicpa aiti jut mimichtam da wiap inñicta.

³⁵ Jesic jém judíos moj nacwácyajtajı entre jeeyaj:

—¿Jut nicpa yıp pıxiñ iga da wiap tampátta? ¿Tananjam nicpa jém tungac naxyucmi jut it jém Israelpic pıxiñtam jém inmatyajpáppic griego iga iccuyujpa jém griegoyaj? ³⁶ ¿Ti nımtooba yıp pıxiñ cuando nımpa iga: “Michtam ammétstampa, pero da wiap ampátta y jut nicpa aiti, da wiap inñúcta”?

Jém ni jém tachiipáppic vida

³⁷ Jesic núc jém jama iga cuyajpa jém sıñ, jém más mijpic jama. Teñchucum jém Jesús jém pıxiñtam ançucmi. Pımi ijıyáypa jém pıxiñtam, nımayyajtap:

—Siiga miñictıstampa, miñi manacnicpa. ³⁸ Siiga tum pıxiñ acupicpa aich, jesic iniit juuts nımpa jém Dios inmatı: “Tum mijpic nıxcuy ianamanjom.”

³⁹ Cuando inmatpa jempic, nımtooba Jesús iga jém icupicneyajwiip, ipictsonyajpa jém Dios iAnama. Porque danam núcne jém Dios iAnama hasta nicgacpa Jesús sınyucmi.

Naweecyajtap jém pıxiñtam

⁴⁰ Jesic cuando jém pıxiñtam imatonyajpa ti nımpa jém Jesús, nımyajpa algunos iga: “Yıp pıxiñ numa jém profeta jém tananjócnewiip.”

⁴¹ Pero tungac de jeeyaj nımyajpa:

—Yıp pıxiñ numa jém Cristo jém icutsatnewiip Dios.

Pero jém tungac más de jeeyaj nımyajpa:

—¿Que wiap imiñ jém Cristo de Galilea? ⁴² Tanjodon iga nımpa jém Dios inmatı iga jém Cristo jém David iocmanic imanıc. Naypa jém Belén, jeetim attebet jut it idic jém David.

⁴³ Jempıgam nawécyajta jém pıxiñtam. ⁴⁴ Algunos de jeeyaj imatsyajtooba jém Jesús, pero da i wiá mimats.

Jém anjagooyiyaj da icupıcyaj jém Jesús

⁴⁵ Jesic jém mastic ipolicia setyajum jut ityaj jém panij anjagooyiyaj con jém fariseoyaj. Jesic acwácyajta jém policia:

—¿Tiiga da inimiñta jém preso?

⁴⁶ Nımyaj jém policia:

—Da i nunca wiap inmat juuts jém pıxiñ.

⁴⁷ Jém fariseoyaj inımayyaj jém policia:

—¿Que mich incupıctámpatım jém migooyi? ⁴⁸ Injodontam iga jém tananjagooyiyaj ni jém fariseoyaj da icupıcyajpa yıp pıxiñ. ⁴⁹ Pero yıpyaj pıxiñtam da icutııyıyajpa jém tananquımayooyi, jeeyaj da wiap inñıcyaj jut it Dios.

⁵⁰ Jesic jém Nicodemo, jém oyñewiip iam jém Jesús tsuucım, tum fariseopic anjagooyi, inímáy:

⁵¹ —Jém tananquımayooyi da ijıcpa iga chiitap castigo tum pıxiñ siiga da wiñti cıpıntap iga quejiñ siiga imalwatne.

⁵² Jém tungac anjagooyiyaj inımayyaj jém Nicodemo:

—¿Que mich miGalileapıctım mipıxiñ? Cuyujcaı jém Dios inmatı iga injodónaiñ iga ni tum jém profeta da miñpa de jém naxyucmi de Galilea.

⁵³ Jesic cada tumtum nicyaj itıccım.

8

Matsta tum yomo jem pejoypáppic

¹ Pero nic Jesús jem cotsicyucmi iñiyi Olivos. ² Jesic jem tungac jama, icuquejama, nicgacpa Jesús jem mijpic masticjom. An̄tuumayaj jem pixiñtam iga imatonjajpa. Jesic coñ jem Jesús, moj in̄quejáy jem an̄tuumaneyajwip. ³ Jesic algunos jem escribaspic maestroyaj con algunos jem fariseoyaj inimiñyay tum yomo jut it Jesús. Matsta jem yomo porque páttaj jut pejóypa ixí. Namiñtá jem yomo hasta jem pixiñtam an̄cucmi iga icwácayajpa jem Jesús. ⁴ Nímaytap:

—Maestro, matsta yíp yomo porque páttaj jut pejóypa ixí. ⁵ Nimpa jem Moisés in̄químayooyi iga tannácscatámiñ tsaami jem pejoypaap. Jesic mich anímaayi jup castigo tanchiiba yíp yomo.

⁶ Nímyajpa jempic jem fariseoyaj iga icutítspa jem Jesús. Imétsyajpa jutpic iquejajwadayajpa jem Jesús. Jesic cómneactin̄ jem Jesús, moj jayí naxyucmi con ici. ⁷ Pero jeeyaj da ichacpa iga icwácayajpa. Jesic teñchucum jem Jesús, in̄ímáy jem inimiññewip jem yomo:

—Siiga tum de mimichtam da mitáncaíy, wí iga in̄yígáypa con jem wiñtipic tsa.

⁸ Jesic eybictim cómneactin̄ jem Jesús, mojjacum jayí naxyucmi con ici. ⁹ Jesic cuando jem pixiñtam imatonjaj ti in̄ímáy jem Jesús, agui ijisyajpa ianamanjom iga táncaíytim. Tumtumti moj níquiyaj. Wiñti nicyaj jem más tsamipic hasta cunigayyaj itumpiyaj. Jesic icutumtim tsíy jem Jesús con jem yomo, jemum teñ jem cuarto icucmi. ¹⁰ Jesic teñchucum jem Jesús. Da i iix, tsíy no más jem yomo. Jesic Jesús in̄ímáy:

—Miyomo, ¿jut it jem miquejajwadaypáppic? ¿Que da i wíaj michi castigo?

¹¹ Jem yomo icutson. In̄ímáy:

—Da i, mánomi.

Jesic Jesús in̄ímáy jem yomo:

—Ich datim manchiiba castigo. Sip nicsim. Odom malwatí eybic.

Jesús jem wibic juctian̄tsoca

¹² Ocmi eybictim accuyujóypa Jesús, in̄ímáy:

—Icham jem ajuctian̄tsoca, amiñ iga anyicquejpa jem ityajwip yíp naxyucmi. Jem atúnjypaap da siiba jem piichcim, pero iniit jem jucti an̄tsoca ianamanjom, jem ichi-ípáppic vida jem dapic cuyajpa.

¹³ Jesic jem fariseoyaj in̄ímayyaj jem Jesús:

—Mich in̄yaac min̄matpa iga miapaap, jeeyucmi da quejpa iga miñuumanmatpa.

¹⁴ Jesic Jesús in̄ímáy jeeyaj:

—Siiga ich anyaac ananmatpa iga aiapaap, jesic numa jem ananmatí porque anjodon jut amiñ y anjodontim jut anicpa. Pero mimichtam da in̄jodontam jut amiñ ni datim in̄jodon jut anicpa. ¹⁵ Michtam micipin̄oytámpa juuts nimpa yíp naxyucmic an̄químayooyi. Ich da i an̄cipin̄pa. ¹⁶ Pero siiga acipin̄óypa juuts tum juez, jesic awicipin̄óypa porque da anyaac acipin̄óypa. An̄waganacipin̄óypa jem an̄jatun̄ Dios jem acutsatnewip yíp naxyucmi. ¹⁷ Jayñetawum michtampic inin̄químayooyi: “Siiga wisten testigo nimpatic jempic, wí iga tan̄cupicpa.” ¹⁸ Jesic itum wí porque anyaac atsíy juuts tum testigo iga mananmadáypa aiapaap. Tsíytim juuts testigo jem an̄jatun̄ Dios, jem acutsatnewip yíp naxyucmi.

¹⁹ Jesic icwácayajpa jeeyaj. Nímaytap jem Jesús:

—¿Jut it jem in̄jatun̄?

Jesús icutson, in̄ímáy jeeyaj:

—Mimichtam da ánixpic̄ta aich ni datim íñixpic̄ta jém anJat̄uñ Dios. Siiga ánixpic̄ta aich, jesic íñixpic̄támpatim jém anJat̄uñ Dios.

²⁰ Jempigam inmatpa Jesús jém mijpic̄ mastic̄jom iganam accuyujóypa jém cuarto jut̄ p̄ntap̄ jém ofrenda. Pero da i w̄iap̄ imats porque danam núcne jém ihora.

Jém dapic̄ icupic̄pa Jesús da w̄iap̄ íñicyaj jut̄ nic̄pa je

²¹ Jesic eybictim íñímáy jeeyaj:

—Ich anic̄pa. Mimichtam ammétstampa, pero da w̄iap̄ ampátta. Jesic cuando micaanetámum, nic̄pa iñyojta jém iñt̄anca jut̄ da nunca miputpa. Jut̄ ich anic̄pa, mimichtam da w̄iap̄ íñicta.

²² Jesic n̄myajpa jém judíos:

—¿Jut̄ nic̄pa yíp̄ p̄ixiñ? ¿Que nacaat̄ap̄ iyaac? Porque n̄mpa: “Jut̄ ich anic̄pa, michtam da w̄iap̄ íñicta.”

²³ Jesic Jesús íñímáy jeeyaj:

—Mimichtam miñaxwiñpic̄, ich asiñwiñpic̄, ich amiñ siñyucmi. Mimichtam yíp̄ naxyucm̄pic̄ mip̄ixiñtam, ich da yíp̄ naxyucm̄pic̄ ap̄ixiñ. ²⁴ Jeeyucmi mannímáypa iga cuando micaanetámum, nic̄pa iñyojta jém iñt̄anca. Porque siiga da in̄cupic̄tampa iga ich amiñ siñyucmi, jesic cuando micaanetámum, nic̄pa iñyojta jém iñt̄anca.

²⁵ Jesic icwácyajpa jeeyaj, n̄mayta jém Jesús:

—¿Que mich̄ mijapaap?

Jesic Jesús íñímáy:

—Ich ajeam juuts mannímáyne wiñti. ²⁶ W̄ia manañquejayta iga mimichtam tsam mit̄ancaiyta y w̄iap̄tim meega man̄cip̄in̄pa mimichtam. Pero da an̄watpa, porque nada más anan̄matpa yíp̄ naxyucmi jém an̄químayooyi jém an̄imayñew̄ip̄ jém acutsatnew̄ip̄. Je da migóypa, siempre nuuman̄matpa.

²⁷ Pero da icut̄iyiyaj iga n̄mtooba Jesús iga jém tanJat̄uñ Dios ichiñe jém in̄químayooyi. ²⁸ Jeeyucmi Jesús íñímáy jém p̄ixiñtam:

—Ich jém aMiñew̄ip̄ Siñyucmi y cuando acquímtap̄ aich jém cunusyucmi, jesic in̄cut̄iyiyt̄ampa āiapaap. Manañmadayt̄ampa jém an̄químayooyi jém an̄quejayñew̄ip̄ jém anJat̄uñ Dios. Da anyaac an̄ixquímpa. ²⁹ Jém anJat̄uñ Dios jém acutsatnew̄ip̄ yíp̄ naxyucmi, an̄waganait̄ aich. Da atsacne an̄cut̄um porque siempre an̄watpa juuts je iw̄ian̄jam.

³⁰ Iganam inmatpa jempic̄ jém Jesús, jesic jáyan̄ jém p̄ixiñtam moj icupicyaj.

Jém Dios iman̄ictam y jém icuyoxayajp̄appic̄ jém Woc̄c̄wiñ

³¹ Jesic Jesús íñímáy jém judíos jém sīppic̄ icupic̄neyaj:

—Siiga mimichtam da iñchactampa iga in̄wattampa juuts mannímáypa, jesic numa michíypa iga man̄cuyuc̄wiñ. ³² W̄iap̄ in̄cut̄iyiyta jém numapic̄ an̄químayooyi, jesic jém numapic̄ an̄químayooyi miccutsigayt̄ampa iga odoy michíyt̄amiñ juuts t̄um esclavo.

³³ Jesic los de más jém judíos, jém dapic̄ icupic̄neyaj Jesús, íñimayaj:

—Aichtam jém Abraham aman̄ictam. Da nunca atsíyta juuts t̄um esclavo. ¿T̄iiga annímayt̄ampa iga acutsigaytam̄t̄añ?

³⁴ Jesic Jesús íñímáy jeeyaj:

—Numa mannímáypa, it̄ump̄iy jém imalwatyaajp̄appic̄ tsíy juuts esclavo porque iwatpa juuts ip̄imíypa jém malopic̄ j̄ixi ianaman̄jom. ³⁵ Mannímáypatim iga t̄um esclavo da w̄iap̄ iwaganait̄ jém iomi it̄ump̄iy tiempo. Pero t̄um p̄ixiñ iman̄ic̄ w̄iap̄ iwaganait̄ jém ījat̄uñ it̄ump̄iy tiempo. ³⁶ Siiga Dios iMan̄ic̄ miccutsigáypa, jesic da michíypa juuts esclavo iga

—Mich da inii ni cincuenta íñamtiy ¿y miñimpa iga íñixñe jém Abraham?

⁵⁸ Jesic Jesús íñímáy:

—Numa manímáypa cuando danam nayñe jém Abraham, ich aittim.

⁵⁹ Jesic jém p̄ixiñtam ipiñyaj tsa iga íñácscayajpa idic tsaami. Pero yam jém Jesús, put jém masticjom, nas jém p̄ixiñtam añcucmi. Nic.

9

Jesús icp̄is tum p̄ixiñ cachti mu iñay

¹ Cuando nasp̄a Jesús tum lugar, iix tum p̄ixiñ, cácht̄i mu iñay. ² Jesic jém Jesús icuyujc̄iwiñ icwácayajpa. Nímayta:

—MamMaestro, ¿tiiga cácht̄i yíp p̄ixiñ mu iñay? ¿Que yíp p̄ixiñ iyaac iwat tánca, o jém ijatun con iapa iwat tánca iga cácht̄ia mu iñay?

³ Jesic Jesús íñímáy jém icuyujc̄iwiñ:

—Da cácht̄i yíp p̄ixiñ iga táncaiy iyaac o iga táncaiy jém ijatun o iapa. Cácht̄ia yíp p̄ixiñ iga ixtaiñ iga Dios wiap iwat jém wibic milagro. ⁴ Iganam siññi w̄i iga tanwatpa jém Dios iyoxacuy jém acutsatnew̄ip, porque miñpa jém piichi cuando da j̄ wiap iwat jém yoxacuy. ⁵ Iganam ait yíp naxyucmi, jesic ich jém wibic juctian̄tsoca, anyicquejpa jém ityajw̄ip yíp naxyucmi.

⁶ Jesic yaj íñímáy jempic, Jesús tsujpa naxyucmi, iwat uxan tuuti con ichuyñi, iccámáy jém tuuti jém cácht̄i iixcuuyucmi. ⁷ Jesic íñímáy jém cácht̄i:

—Nigi cutseaaȳi jém íñixcuy jém meyjom jém lugar Siloé.

Taichtam tanañmat̄imi jém Siloé nimtooba jém cutsatnetaw̄ip.

Jesic jém cácht̄i nicpa icutseáy jém iixcuy. Cuando setpa, ixixóypam. ⁸ Jesic jém ivecinoyaj con jém iixñeyajw̄ip idic cuando iwácpa tumiñ, moj nanímayyajtaji entre jeeyaj:

—¿Que da yíbam jém coññepaap idic yim iga iwácpa tumiñ?

⁹ Nímyajpa algunos:

—Numa, yíbam jém p̄ixiñ.

Tungac nímyajpa:

—Quenam jeam, pero da je.

Pero jém cácht̄ipic idic nímpa:

—Aicham.

¹⁰ Jesic jém an̄tuumaneyajw̄ip íñímayyaj jém cácht̄ipic idic:

—¿Jutsa mitoj jém íñixcuy?

¹¹ Nímpa jém cácht̄ipic idic:

—Jém p̄ixiñ íñiyi Jesús iwat uxan tuuti, accámáy ánixcuuyucmi y anímáy iga: “Nigi cutseaaȳi jém íñixcuy jém meyjom jém lugar Siloé.” Jesic oy añcutseáy ánixcuy, mojum aixixooyi.

¹² Jesic nímyaj jeeyaj:

—¿Siip jut it jém p̄ixiñ?

Jém cácht̄ipic idic icutson̄:

—Da anjodon̄ jut in̄.

Jém fariseoyaj icwácayajpa jém cachtipic idic

¹³ Jesic ocm̄im nanict̄a jém cácht̄ipic idic jém anjagooyic̄im jut it jém fariseoyaj. ¹⁴ Jecuyjama idic cuando jém Jesús iwat uxan jém tuuti iga ictojáy jém cácht̄i iixcuy.

¹⁵ Jesic jém fariseoyaj eyb̄ic icwácayaj jém cácht̄ipic idic. Nímayta:

—¿Jutsa miixixóy?

Jesic jém cáchtipic idic nĩmpa:

—Jém pĩxiñ accámáy uxan jém tuuti ánixcuyucmi. Oy ancutseáy jém ánixcuy jém meyjom. Siip aixixóypam.

¹⁶ Jesic algunos jém fariseoyaj nĩmyaj:

—Jém pĩxiñ, jém iwatnewiip jempic, da je de Dios porque yoxap jém jejcuyjama contra jém tanañquĩmayooyi.

Pero jém tunjac jém fariseoyaj nĩmyajpa:

—¿Pero jutsap iwat jém wibic milagro siiga táncaiytim jém pĩxiñ?

Jesic nawécayjta jém fariseoyaj. Agui áñayajpa. ¹⁷ Eybictim acwácta jém cáchtipic idic. Nĩmayta:

—¿Mich ti miñĩmpa, ĩapaap jém mictojayñewiip iñixcuy?

Nĩmpa jém cáchtipic idic:

—Je tum profeta.

¹⁸ Pero jém judíos da icupicyajpa iga cáchtĩ idic jém pĩxiñ. Datim icupicyajpa iga actojayta iixcuy hasta que inwejayayaj jém pĩxiñ ijatun con ĩapa. ¹⁹ Jém fariseoyaj icwácyajpa jém pĩxiñ ijatun. Nĩmayta:

—¿Que yip pĩxiñ mich immanic, jém miñĩmpaap iga cáchtĩ mu iñay? ¿Jutsap miixixóy siip?

²⁰ Jesic nĩmyaj ijatun con ĩapa:

—Anjodon iga nũma yĩbam jém ammanic, cáchtĩ miñay. ²¹ Pero da anjodon jutsa miixixóy y ni datim anjodon ĩ ictojáy jém iixcuy. Acwaaci jém ammanic porque siip mijam, wĩap miñmadáy iyaac ĩ ictojáy iixcuy.

²² Jempigam nĩmpa jém cáchtipic idic ijatun con ĩapa porque icĩnyajpa jém judíos. Porque jeeyaj iccám tum orde siiga nĩmpa tum pĩxiñ iga jém Jesús je jém Cristo, jesic quebacputtap jém sinagoga. ²³ Jeeyucmi nĩmyaj jém pĩxiñ ijatun con ĩapa iga: “Acwaaci jém ammanic porque siip mijam jém ammanic.”

²⁴ Jesic jém judíos eybictim inwejaypa jém cáchtipic idic. Nĩmayta:

—Anuntawianmadaayi. Jiisi iga Dios taixpa. Odoy amigóyaayi. Ichtam anjodon iga táncaiy jém pĩxiñ jém miñĩmpaap iga micpis.

²⁵ Jesic jém cáchtipic idic iñimáy jém anjagooyi:

—Ich da anjodon siiga táncaiy jém pĩxiñ. Pero annuntawijodon iga acáchtĩ idic y siip aixixóypam.

²⁶ Jesic eybictim acwácta. Nĩmayta jém cáchtipic idic:

—¿Tĩ miwadáy jém pĩxiñ? ¿Jutsa mictojáy jém iñixcuy?

²⁷ Jém cáchtipic idic iñimáy jém anjagooyi:

—Mannĩmayñeum ti awadáy jém pĩxiñ, pero mimichtam da incupictámpa ti mannĩmayñe. ¿Tĩiga anacwáctámpa eybic? ¿Que michiytooba juuts icuyujcwiñ?

²⁸ Jesic agui jóyyaj jém anjagooyiyaj. Moj imalmalnĩmayyaj jém pĩxiñ. Nĩmayta jém cáchtipic idic:

—Mimich micuyujcwiñ jém pĩxiñ. Aichtam jém Moisés acuyujcwiñ. ²⁹ Ichtam anjodon iga wiñgam Dios ijáy jém Moisés, pero yip Jesús ni da anjodon jutpic pĩxiñ.

³⁰ Jesic jém cáchtipic idic iñimáy jém anjagooyi:

—Yip cosa da oypa tánix. Mimichtam miñĩmtámpa iga incupicne Dios, pero da injodontam jutpic pĩxiñ actojáy ánixcuy. ³¹ Tanwijodon iga Dios da imatónaypa tum malopic pĩxiñ. Pero siiga tum pĩxiñ ĩjspa Dios y iwatpa juuts ixunpa Dios, jesic nũma

Dios imatónáypa. ³² Nunca oypa tammatoŋ iga tum p̄ixiñ w̄iap ictojáy tum cácht̄i iixcuy jém cácht̄ip̄ic miñay. ³³ Siiga ȳip p̄ixiñ da je de Dios, jesic da ti w̄iap iwat.

³⁴ Jesic jeeyaj iñímayyaj jém p̄ixiñ:

—Mich tsam p̄imi mitáncaíy miiññay. ¿Que mich s̄ip anaccuyujtoobam aich?

Jesic quebacputta jém sinagoga jém cácht̄ip̄ic idic.

Ts̄y juuts cácht̄i jém dap̄ic icut̄iȳȳi jém Dios iŋmat̄i

³⁵ Jesic Jesús ijodóna iga quebacputta jém sinagoga jém cácht̄ip̄ic idic. Cuando mipát jém p̄ixiñ, jesic Jesús iñímáy:

—¿Que mich iŋcup̄icpa jém Dios iM̄anic?

³⁶ Jém p̄ixiñ iñímáy jém Jesús:

—Mánomi, anímaayi: ¿Iapaap jém Dios iM̄anic iga w̄iañ aŋcup̄ic?

³⁷ Jesic Jesús iñímáy:

—Mich iñixñe. Aicham jém Dios aM̄anic jém s̄ipp̄ic miniŋmat.

³⁸ Jesic jém cácht̄ip̄ic idic costēñeact̄iŋ jém Jesús iwiñjom. Iñímáy:

—Mánomi, maŋcup̄icpa.

³⁹ Jesic Jesús iñímáy jém ityajw̄ip jem:

—Ich amiñ ȳip naxyucmi iga aŋc̄ip̄iŋyajpa jém p̄ixiñtam. Amiñ iga ixixóyiñ jém cácht̄ip̄ic, amiñ iga cácht̄iayajiñ jém ixixoyáp̄p̄ic.

⁴⁰ Jesic algunos jém fariseoyaj jém iwaganaityajw̄ip Jesús, cuando imatonyaj ti iŋmadáy, n̄imayaj:

—¿Que mijun̄impa iga aicham acácht̄itam?

⁴¹ Jesic Jesús icutson. Nímayyajta:

—Meega micácht̄i, jesic da i michégáypa jém iñtánca, pero como miñimtámpa iga miixixóypa, jesic michíytámpa con jém iñtánca.

10

Jém iwatpápp̄ic cuenta jém borrego

¹ Numa mannímáypa, siiga tum p̄ixiñ da tiḡiypa jém borrego itaañi ijipjom, pero tiḡiypa tum aŋeymi, jesic quejpa iga tum númpaap, p̄imimi ininigáypa tun̄gac im̄chi.

² Pero siiga tum p̄ixiñ tiḡiypa jém taañi ijipjom, jesic quejpa iga jém borrego iomi.

³ Cuando núc jém borrego iomi, jesic jém iwatpápp̄ic cuenta jém puerta, íháypa jém puerta iga tiḡiyiñ jém borrego iomi. Jém borregoyaj, jém im̄chip̄ic, iixp̄icyajpa jém iomi. Imatónact̄iyáypa jém iomi ij̄iyi. Jesic jém p̄ixiñ iŋwejáypa jém iborregoyaj jém im̄chip̄ic con iñ̄iyi. Itoppa jém taañijom. ⁴ Jesic cuando yajum itop itump̄iy jém iborregoyaj, mojum n̄iquiyaj. Jém iomi aŋjagoyñeeba iñic, jém iborregoyaj itún̄iyayajpa porque imatónact̄iyáypa ij̄iyi. ⁵ Jém borregoyaj da itún̄iyayajpa jém tun̄gac p̄ixiñ jém dap̄ic iixp̄icpa. Ic̄iŋyajpa, cupóyayajpa porque imatónact̄iyáypa iga da je iomi ij̄iyi.

⁶ Jesús iŋquejáypa jém p̄ixiñtam con ȳip cuento, pero jeeyaj da icut̄iȳȳiyajpa ti iŋmadaytooba jém Jesús.

Jesús jém w̄ib̄ic pastor iwatpa cuenta jém iborregoyaj

⁷ Jesic Jesús eybictim iŋmadáypa jém p̄ixiñtam. N̄impa:

—Numa mannímáypa iga icham jém apuerta jut̄ tiḡiyayajpa jém borregoyaj. ⁸ Jém tun̄gac maestroyaj, jém wiñtip̄ic miñay cuando danam anúcne, je jém númyajpaap, pero jém borregoyaj da iwadayajpa caso. ⁹ Icham jém apuerta. Siiga i tiḡiypa con aich, jesic

ciacputtap. Jex juuts tum borrego tigiyta y putpa jem itaanijom y ipatpa jem witampic muc.

¹⁰ Jem numpaap miñ iga numpa, accaoyta, icujinayta jem pixintam. Pero ich amiñ iga anchiiba jem pixintam jem vida iga iniidiñ jayan. ¹¹ Ich jem wibic apastor tsam anwidap jem amborregoyaj. Jem wibic pastor nachitap iga accaatap iga jempigam icupujpa jem iborregoyaj. ¹² Pero jem coñwiyoytaap jempic yoxap iga yojtap, da je pastor, da imichi jem borrego. Jesic cuando iixpa iga miñpa jem lobo, cñpa jem pixiñ, ichacpa jem borregoyaj, poypa. Jesic jem lobo imatspa jem borregoyaj, iccupoyayajpa. ¹³ Poypa jem yoxapaap porque nada más coñwiyoyta, da ijspa jem borregoyaj, porque da je imichi.

¹⁴ Ich jem wibic apastor. Anixpicpa jem ampixintam y jeeyaj aixpicaypatim aich. ¹⁵ Jextim juuts jem anjatun Dios aixpicpa aich y ich anixpicpatim jem anjatun. Ich anyaac anachitap iga accaatap iga jempigam ancupujpa jem amborregoyaj. ¹⁶ Anaittim tungac jem amborregoyaj, da yimpic, ich anamiñpatim. Amatónayaypatim ich anjyi, acupicpatim mex jeeyaj. Jesic anantuumawatpa itumpiyay iga wagaityajiñ tumti lugar y tumti pastor injacyajpa.

¹⁷ Jem anjatun Dios tsam atoyta porque anyaac anachitap iga accaatap. Jesic ocmi anyaac ampicsonpa eybic jem amvida. ¹⁸ Jem anenemigoyaj da wiap acca, pero ich anyaac anjicpa iga accaatap. Ich anait jem pimi iga anyaac anachitap iga accaatap. Anaittim jem pimi iga anyaac ampicsonpa eybic jem amvida. Jempigam anwatpa porque apimiy jem anjatun Dios.

¹⁹ Jesic cuando jem judíos imatonyajpa ti nimpa jem Jesús, moypa añajiyaj. Nawécyajtap eybic. ²⁰ Wati de jeeyaj ninyaj:

—¿Tiiga inwadaytampa caso? Yip pixiñ iniit tum mal espíritu, tsam locoanmatpa.

²¹ Pero tungac de jeeyaj ninyaj:

—Jem iniitwip tum mal espíritu da wiap inmat jem wibic anmati juuts inmatpa yip pixiñ. Jem mal espíritu da wiap ictojoy tum cácti iixcuy.

Jem judíos ináscayajtooba tsaami jem Jesús

²² Jesic núc jem tiempo de succu cuando jem Jerusalépic pixintam icusinacayajpa jem mijpic mastic. Wattap jem sin cada amtiy. ²³ Jesic nic Jesús jem mijpic masticjom, widañnaspá jem corredor inyi Salomón. ²⁴ Jesic antuumaneyaj tsam jayan jem judíos, icuteñxetyaj jem Jesús. Ninyaj jeeyaj:

—¿Mijapaap? Tsam anjodónatooba. Siiga micham miCristo, sibam nunta anmati.

²⁵ Jesic Jesús inimay jeeyaj:

—Mannimayneum iga ich aCristo, pero da incupicta ti mannimay. Anwat jem milagroyaj con jem anjatun Dios ipimi iga wiquejiñ iga icham aCristo. ²⁶ Pero mimichtam da incupictampa porque da je mamborregotam juuts mannimayne pecam. ²⁷ Ich amborregoyaj amatónactiyayta jem anjyi y ich anixpicpatim jem amborregoyaj. Jeeyaj atuniyayajpa. ²⁸ Anchiiba jem amborregoyaj jem vida jem dapic cuyajpa. Jesic da nunca togoyta. Da i wiap atobáyay ich ancijom. ²⁹ Jem anjatun Dios achi jem amborregoyaj y da i wiap atobáyay jem amborregoyaj jem anjatun Dios icijom, porque jem anjatun Dios tsam wiap. Je iniit itumpiy ipimi. ³⁰ Ich con jem anjatun Dios atumtitam.

³¹ Jesic jem judíos eybictim ipinyajpa tsa iga ináscayajpa tsaami Jesús. ³² Jesic Jesús inimayta jeeyaj:

—Jayan witampic milagro anwat mimichtamanjom jem anjatun Dios ipimimi. ¿Jup milagro ananucpa iga annáscatampa tsaami?

³³ Jesic jem judíos inimayaj Jesús:

—Da mannáscatámpa tsaami iga inwatne jém wítampic milagro. Mannáscatámpa tsaami iga inçujyypa tanDios. Mich mipixiñ, pero miñimpa iga mich miDios.

³⁴ Jesic Jesús inímáy jeeyaj:

—¿Que da jayñetawum jém Moisés inquímayooyi iga nimpa Dios: “Mimichtam mid-iostam”? ³⁵ Siiga icniya jeeyaj iga diosyaj jém ipictsonneyajwip jém Dios inmati, y da i wip ictogoy jém Dios inmati jém jaychacnetawip, ³⁶ ¿jesic tiiga miñimtámpa iga ich ançujyypa Dios cuando animpa iga: “Ich jém Dios aManic”? Porque Dios acupin y acutsat yip naxyucmi iga anwadiñ juuts je iwianjam. ³⁷ Siiga ich da anwatpa jém wibic milagro juuts iwatpa jém anJatun Dios, jesic odoy acupictaami. ³⁸ Pero siiga ich anwatpa jém wítampic milagro juuts iwatpa Dios y mimichtam da inçupictámpa ti mannímáypa, jesic cupici iga da je migooyi jém milagroyaj iga wiañ inçutiyyihta iga jém anJatun Dios it con aich y ich aít con anJatun Dios.

³⁹ Jesic jeeyaj eybictim imatsyajtooba jém Jesús, pero cipur, da wia mimatsyaj.

⁴⁰ Eybictim nic Jesús jém ni anwiñtuc iniyi Jordán. Jemum tsíy Jesús jut moj acchínwooyi jém Xiwan. ⁴¹ Jesic tsam jáyan pixiñtam nic iámaj jém Jesús. Nimyajpa jeeyaj:

—Jém Xiwan, jém acchínwoypáppic, da iwat ni tum milagro. Pero jém Xiwan da tamigóyay cuando tanmadáy ti iwatpa yip pixiñ.

⁴² Jemum tsam jáyan jém pixiñtam icupicyaj jém Jesús.

11

Ca jém Lázaró

¹ Jesic mimne tum pixiñ iniyi Lázaró jém attebet Betania. Yip jém attebet jut it jém Malía con itiwí jém Marta. ² Yiptim Malía jém iccámayñewip jém pomada jém cinpaap jém tánomi Jesús ipuyyucmi y icujicháyay ipuy con iway. Jém mimnewip, jém Lázaró, itiwitim jém Malía. ³ Jesic jém Malía y Marta icutsadáy anmati jém Jesús. Inímáy:

—Mánomi, mimneactin jém pixiñ, jém inñtoypáppic.

⁴ Mu imaton jém Jesús iga mimne jém iamigo, nimpa:

—Yip caacuy da iccaaba. Imats yip caacuy iga ixtaiñ jém Dios ipimi y iga ixtaiñtim jém Dios iManic ipimi.

⁵ Jesús tsam itoypa jém Marta, jém Malía y jém Lázaró. ⁶ Mu imaton Jesús iga mimne jém Lázaró, jesic da jobit nic iám, jemum tsíy tunçac wisnajama. ⁷ Jesic cuando nasneum wisnajama, Jesús inímáy jém icuyujcwiñ:

—Tanictámpa eybic jém naxyucmi de Judea.

⁸ Jém Jesús icuyujcwiñ inímajyaj:

—MamMaestro, jém Judeapic pixiñtam da más pecam miñáscatooba idic tsaami. ¿Que miñicgacpa eybic?

⁹ Jesús inímáy jém icuyujcwiñ:

—Tum jama iniit doce hora. Siiga tum pixiñ wítpa sinñi, jesic da inñeppa ipuy iga tsutpa porque iguixixóypa jém jama jém icuyicquejpaap yip naxyucmi. ¹⁰ Pero siiga tum pixiñ wítpa tsuucim, jesic tsutpa porque da i jém jama iga iyicquejpa.

¹¹ Jesic ocmi eybictim nimpa Jesús:

—Moñpa sip jém tánamigo Lázaró, pero nicpa antsicyus.

¹² Jesic Jesús icuyujcwiñ inímajyaj:

—Mánomi, siiga moñpa jém Lázaró, jesic tanjodon iga pispa.

¹³ Nimtooba Jesús iga caaneum jém Lázaró, pero jém icuyujcwiñ injampa iga nunta moñpa. ¹⁴ Jesic Jesús inuumañmadáy jém icuyujcwiñ. Nímajyajta:

—Caaneum jém Lázaro. ¹⁵ Ich amaymay iga da aḷ cuando ca jém Lázaro porque sḷp más wḷ para mimichtam. Más inḷcupictámpa Dios. Jesic nicpa tánám jém Lázaro.

¹⁶ Jesic jém Tomax, iñiyitim Mechi, iñímáy los de más jém Jesús icuyujcḷwiñ:

—Tanictámpatim iga tanwaganacaaba jém tánḷmi.

Jesús wiap icpis jém caaneyajwḷp

¹⁷ Jesic cuando núc Jesús jém Betania, ijodóna iga cuatro jama cumnetawum jém Lázaro imijtay tum tsaajosjom. ¹⁸ Jém Betania noco it jém attebet Jerusalén, ijuumi como dos kilómetro y medio. ¹⁹ Jesic tsam jáyan jém judíos nic iámyaj jém Marta y Malía iga icpócsayyajpa ianama iga odoy anyáguiñ porque caane jém itḷwi. ²⁰ Cuando imaton jém Marta iga miñpa jém Jesús, jesic nic iméts tunjom. Tsíy jém Malía iticcḷm. ²¹ Mu iñúc jut it Jesús, nḷmpa jém Marta:

—Mánḷmi, meega miit yḷm cuando mimneactḷj jém antḷwi, jesic da idic ca. ²² Pero ich anjodon iga Dios michiiba sḷp titam inwágáypa.

²³ Jesic Jesús iñímáy jém Marta:

—Pispa jém iñḷwi.

²⁴ Jesic Marta iñímáy jém Jesús:

—Anjodon iga pispa jém antḷwi cuando pisyajpa jém caaneyajwḷp jém íñanpigam jama.

²⁵ Jesús iñímáy jém Marta:

—Ich wiap anacpis jém caaneyajwḷp. Wiap anchi ḷ quej jém vida jém dapic cuyajpa. Siiga tum pḷxiñ acupicpa aich, aunque caaneum, pispa. ²⁶ Siiga vivonam tum pḷxiñ jém íñanpigam jama y acupicpa aich, jesic da nunca caaba. ¿Que da inḷcupicpa yḷp anḷati?

²⁷ Jesic jém Marta iñímáy jém Jesús:

—Numa, mánḷmi, ich anḷcupicpa iga micham miCristo jém Dios miManic. Mich jém mimiññewḷp naxyucmi, jém ananjócnetanwḷp.

²⁸ Cuando yaj inmat jempic jém Marta, nic inwejáy itḷwi jém Malía. Iyamnímáy:

—Núcneum jém tamMaestro, sḷp miñwejáypa.

²⁹ Jesic mu imaton jém Malía, jicsciy tsucum, nic iám jém Jesús. ³⁰ Danam núcne Jesús jém tiganjoj. Tsíyñe jemtim jut oy ictsíy jém Marta. ³¹ Jesic jém judíos, jém ityajwḷp jém Marta iticcḷm iga icpócsayyajpa ianama, iixyay iga agui jicsciy nic jém Malía. Jesic jeeyaj itúñiyajpa. Injamyaj iga nic weji jém Malía jém tsaajoscḷm.

³² Jesic jém Malía, mu iñúc jut it jém Jesús, icosteeñáy ipuycḷm. Nḷmpa jém Malía:

—Mánḷmi, meega miit cuando mimneactḷj jém antḷwi, da idic ca.

³³ Cuando iix Jesús iga tsam wejpa jém Malía y weyajpatim mex jém judíos, pḷmi anyác jém Jesús, tsam ijampa jém anyaaqui ianamanjom. ³⁴ Jesic Jesús icwác, iñímáy:

—¿Jut iñchac jém imijtay?

Nḷmyaj jeeyaj:

—Mánḷmi, miñi aami jut it.

³⁵ Wej jém Jesús. ³⁶ Jesic nḷmyaj jém judíos:

—Ixi. Tsam pḷmi itoypa jém iamigo.

³⁷ Pero jém tunjac nḷmyaj:

—Yḷp pḷxiñ ictojáy jém cáchtḷi iixcuy, ḷtiiga da icpispa jém Lázaro iga odoy caiñ?

Acpista jém Lázaro

³⁸ Jesic eybictim pḷmi anyácne jém Jesús, tsam pḷmi ijampa jém anyaaqui ianamanjom. Núc jém tsaajoscḷm jut cumnetá jém Lázaro. Annúcnetá jém tsaajos con tum miñpic tsa.

³⁹ Jesic Jesús iñímáy jém pḷxiñtam:

—Accáyaayi yḷp tsa.

Jém Marta, jém caanewḷp itḷwi, iñímáy jém Jesús:

—Pero mánQmi, siip iniitum cuatro jama caane, tsam anjeipam.

⁴⁰ Jesús inímáy jém Marta:

—¿Que da mannímáy siiga incupicpa iga ich wiap manyoxpát, jesic inixáypa jém tanjatun Dios ipimi?

⁴¹ Jesús jém ityajwip iccáyayyaj jém tsa. Amquím Jesús sinyucmi, moj inwejpát Dios. Nimpa:

—Manjatun Dios, iyucupdios iga mich ammatónayne ti mannímáy. ⁴² Anjodon iga siempre mich ammatonpa, pero mannímáypa yimpic iga jém pixiñtam wiañ icutiyyay iga mich ancutsatne yip naxyucmi.

⁴³ Jesús cuando yaj inwejpát Dios, pimi jiyapa jém Jesús. Nimpa:

—MiLázaro, puti.

⁴⁴ Jesús putum jém Lázaro, jém caanewippic idic. Anmónayñeta ici y ipuy con puctucu. Anmónayñetatin icobac con tum puctucu. Jesús Jesús inímáy jém pixiñtam:

—¡Cuwijáyaayi jém inmónóycuy, cutsigaayi!

Jém anjagooyiyaj ijsyajpa jutsap imatsyay jém Jesús

(Mt. 26:1-5; Mr. 14:1-2; Lc. 22:1-2)

⁴⁵ Cuando iixyay ti iwat jém Jesús, jesic moj icupicyay jáyan jém judíos jém miññeyajwip iám jém Malía. ⁴⁶ Pero algunos nic iámyaj jém fariseoyaj iga inmadáypa ti iwat jém Jesús.

⁴⁷ Jesús jém cobacpic panijyaj, con jém fariseoyaj, inuumawatyaj jém Sanhedrín, jém wídaytam. Nimyaj:

—¿Ti wiap tanwatta con yip pixiñ? Tsam jáyan milagro iwat. ⁴⁸ Siiga seguido tanjicpa iga iwatpa jém milagroyaj, jesic núcpa jém jama iga itumpiy jém pixiñtam icupicyajpa yip Jesús. Jesús jém Romapic anjagooyi icutsadáypa jém soldado iga imiswadayyajpa jém mijpic mastic y imichap jém tannas.

⁴⁹ Jesús tum de jeeyaj, jém Caifás, cobacpic panij jém amtij, moj anmati con jém anjagooyiyaj jém antuumaneyajwip. Nimpa jém Caifás:

—Mimichtam da ti injodontam. ⁵⁰ Datim incutiyyiyta iga más wi iga accaatap tum pixiñ para itumpiy jém pixiñtam iga odoy togóyñ jém tannaxyucmi.

⁵¹ Jesús Caifás da ijixquím iyaac, pero Dios ichi jém jixi porque je jém cobacpic panij. Jeeyucmi jém Caifás wíap inmadáy jém pixiñtam iga accaatap jém Jesús iga iyoxpátpa itumpiy jém ityajwip jém naxyucmi Israel. ⁵² Da solamente iga iyoxpátpa jém ityajwip Israel, pero accaatap jém Jesús iga inuumawatyajpa itumpiy jém icupicneyajwip Dios jutquej icutero yip mundo. ⁵³ Jesús jeetim jama jém anjagooyiyaj moj ijsyay jutpic iccaayajpa jém Jesús.

⁵⁴ Jeeyucmi jém Jesús da siiba jut iixpa jém judíos. Put jém naxyucmi de Judea. Nic iti tungac lugar nocojom jém titsinaxyucmi. Jém atebet iniyi Efraín. Jenum nic itiyaj Jesús con icuyujcwiñ.

⁵⁵ Núctooba jém pascuasij jém iwatyajpáppic jém judíos. Icuwiti jém naxyucmi de Israel tsucumyaj jáyan jém pixiñtam iga nicyajpa jém atebet Jerusalén iga iwatyajpa jém costumbre iga cuáyñeñ iqnama antes que núcpa jém pascuasij. ⁵⁶ Jesús cuando núcyaj Jerusalén jém pixiñtam, imétsyajpa jém Jesús. Tigiyay jém masticjom, moj nanimayyajtaji entre jeeyaj:

—¿Que tananjam iga miñpa sinaji jém Jesús o da miñpa?

⁵⁷ Jesús jém cobacpic panijyaj con jém fariseoyaj tsam imatsyajtooba jém Jesús. Ipmiyyaj jém pixiñtam, nimayyajta:

—Siiga i ijodon jut it jém Jesús, jesic acjodónaji jém tananjagooyi iga matstaiñ.

12

*Tum yomo iccámáy jém wibic perfume jém Jesús ipuyyucmi
(Mt. 26:6-13; Mr. 14:3-9)*

¹ Jesic seis día antes que naspa jém pascuas_{ij}, nic joyi Jesús jém atebet Betania jut it jém Lázaró, jém icp_{is}new_{ij}p jém Jesús de jut it jém caaneyajw_{ij}p. ² Jém iamigoyaj inis_{ij}ap jém Jesús. Jém Marta icw_{ic}pa jém miññeyajw_{ij}p. Ittim jém Lázaró. Iwaganaw_{ic}yajpa jém Jesús mesac_{im}. ³ Jém Malía inimiñ tum libra jém wibic perfume, naps nardo, jém c_{in}páppic, jém aguip_{ic} tsoow_{iy}. Iccámáy jém perfume jém Jesús ipuyyucmi. Ocmi jém Malía icujicháyáypa jém Jesús ipuy con iway. Agui c_{in}pa jém perfume, comne jém tic de c_{ij}ñi. ⁴ Ittim tum de jém Jesús icuyujc_{ij}wiñ, jém Judas Iscariote, jém Ximoj Iscariote im_{an}ic, jém iwadaypáppic atraición jém Jesús. Nim jém Judas:

⁵ —¿Tiiga da tammáypa y_{ip} wibic perfume? Ivale tres cientos tumiñ de plata. Jesic w_{ia}p tanyoxpát jém yaachayajpáppic.

⁶ Jém Judas da iyaachanjampa jém yaachayajpáppic, pero n_{im}pa jem_{pi}c porque númpa jém p_{ixi}ñ. Iwatpa cuenta jém tumiñ ibolsa y siempre iñúmpa jém tumiñ. ⁷ N_{im}pa Jesús:

—Odoy moog_{ij}y_i y_{ip} yomo. Iccáyñe idic jém perfume iga accámáypa cuando acum_{ta}p.

⁸ Siempre ityaj con mimichtam jém yaachayajpáppic, pero ich da seguido aitpa con mimichtam.

Jém anjagooyiyaj ij_{is}yajpa jutsap iccaayaj jém Lázaró

⁹ Jesic jáyan jém Jerusalén_{ic} p_{ixi}ñtam ijodónayaj iga jemum it jém Jesús. Jesic nic iámyaj. Da no más nic iámyaj jém Jesús, pero iixyajtoobatim jém Lázaró jém acp_{is}netaw_{ij}p.

¹⁰ Jesic jém panij anjagooyiyaj iwatyajpa acuerdo iga iccaayajpatim jém Lázaró. ¹¹ Porque cuando jém judíos iixyaj iga numa acp_{is}net_a jém Lázaró, jesic jáyan ichacyajpa jém Israel_{ic} anquímayooyi, mo_{ij}pa icup_{ic}yaj jém Jesús.

*Tigiy Jesús Jerusalén juuts tum anjagooyi
(Mt. 21:1-11; Mr. 11:1-11; Lc. 19:28-40)*

¹² Jém tungac jama jáyan p_{ixi}ñtam nicne s_{in}ajiyaj jém atebet Jerusalén. Iwatyajpa jém pascuas_{ij}. Cuando ijodónayaj iga núcpa Jerusalén jém Jesús, ¹³ jesic itúcyaj jáyan jém suyat iay. Nic imétsyaj jém Jesús tunjom. Mu ipátyaj, tsam icujípyajpa. P_{im}i j_{iy}yajpa jém p_{ixi}ñtam. N_{im}yajpa:

—¡Hosanna! ¡Agui w_i jém tanJatun Dios! ¡Tan_{cu}jíptampa jém Rey de Israel jém miññew_{ij}p jém tanJatun Dios iñiy_{im}!

¹⁴ Jesic jém Jesús ipát tum mañburro. Iquímca. Iwat juuts jayñeta:

¹⁵ Odoy c_{in}taami miñtanw_{ij}p jém atebet Sión.

Ixtaami iga s_{ij}p miñpa jém iñRey.

Iquímcaane tum mañburro.

¹⁶ Wiñti jém Jesús icuyujc_{ij}wiñ da icut_{ij}y_{iy}yajpa, pero ocmi cuando pisneum y químgac s_{in}yucmi jém Jesús, ij_{is}yajpa iga jem_{pi}gam n_{im}pa jém Dios in_{ma}ti y jem_{pi}gam iñascaaba jém Jesús cuando núcpa Jerusalén.

¹⁷ Jodónatap jutquej ti iwat jém Jesús mu in_{we}jáy jém Lázaró jém tsaajosjom jut cumne. Jém ityajw_{ij}p con Jesús cuando pis jém Lázaró, in_{ma}dayyaj i quej ti iixyaj. ¹⁸ Jeeyucmi miñ iámyaj Jesús tsam jáyan jém p_{ixi}ñtam porque imaton_yaj iga iwat jém milagro. ¹⁹ Jesic jém fariseoyaj nan_{im}mayyajt_ap:

—S_{ij}p quejpa iga da ti w_{ia}p tanwatta. Ixi, itump_{iy} jém p_{ixi}ñtam icuw_{iti} y_{ip} naxyucmi itúñiyajpa.

Algunos jém griegop_{ic} p_{ixi}ñtam tsam iixtooba jém Jesús

²⁰ Miñyajítim sijnajiyaj algunos jém p̄ixiñtam jém anmatyajpaap jém anmati griego. Miñyaj Jerusalén iga ijisyajpa Dios. ²¹ Jeeyaj nic íamyaj jém Felipe, jém miññewiip jém atebet Betsaida jém naxyucmi de Galilea. Jém griegop̄ic p̄ixiñtam icunucsayyaj jém Felipe. Nímayta:

—Awadaayi tum favor. Nigi nímaayi jém Jesús iga tsam anj̄iypáttooba.

²² Jesic jém Felipe nic inmadáy jém Anti ti ixunpa jém griegop̄ic p̄ixiñtam. Jesic iwagananicyaj jém Anti y jém Felipe iga inmadayyaj Jesús ti ixunpa jém p̄ixiñtam. ²³ Jesic jém Jesús inímáy jém icuyujc̄iwiñ:

—Núcneum jém tiempo iga ich, jém aMiññewiip Sinyucmi, ampictsonpa eybic jém amp̄imi jém anaitwiip idic sinyucmi. ²⁴ Numa mannímáypa siiga tum pac da ñiptap nasc̄im jut caaba imayi, jesic tsíypa icutum. Pero siiga caaba imayi, jesic jáyan̄ap. ²⁵ Siiga tum p̄ixiñ tsam itoypa ivida yíp naxyucmi, jesic togoypa ivida. Pero siiga tum p̄ixiñ da itoypa ivida yíp naxyucmi, jesic da togoypa ivida, iniitpa para itump̄iy tiempo. ²⁶ Siiga tum p̄ixiñ acuyoxatooba, jesic ansunpa iga atún̄iyiñ, jesic jemtim jut aitpa aich itpatim jém acuyoxap̄pp̄ic. Siiga tum p̄ixiñ acuyoxap̄ aich, jesic jém anJatun̄ Dios iw̄ixpa jém p̄ixiñ.

Nimpa Jesús iga accaatap

²⁷ S̄iip tsam anyácne. ¿Que ti wiap annímáy jém anJatun̄? Ich da annímáypa jém anJatun̄ Dios iga: “ManJatun̄, ayoxpaati iga odoy ayaachwattaiñ”. Da anwatpa jem̄pic porque ich amiñ yíp naxyucmi iga ayaachwattaiñ. Jesic annímáypa iga: ²⁸ “ManJatun̄ Dios, w̄ati juuts mich inxunpa iga jém p̄ixiñtam micujípyajiñ”.

Jesic j̄iypa Dios sinyucmi. Nimpa:

—S̄iip anwatneum y anwatpatim eybic iga acujípyajiñ jém p̄ixiñtam.

²⁹ Jesic jém p̄ixiñtam, jém an̄tuumaneyajwiip, imaton̄yaj jém j̄iyi. Nimyajpa iga t̄iñpa jém majiywiñ. Pero tungac nimpa:

—Ij̄iyáy tum sinyucm̄pic p̄ixiñ.

³⁰ Jesic Jesús inímáy jém p̄ixiñtam:

—Tammaton̄neta yíp j̄iyi mimichtam in̄cuyucmi, da para ich, iga in̄cut̄iyyit̄amiñ ti iwatpa Dios. ³¹ S̄iip núcpa jém hora iga c̄ip̄intap jém ityajwiip yíp naxyucmi. S̄iip accáyaytap ip̄imi jém Wocciwiñ, jém in̄jacnewiip yíp naxyucmi. ³² Pero ich cuando acquímtap cunusyucmi, jesic anchiiba j̄ixi jém p̄ixiñtam iga acup̄iguiñ.

³³ Cuando in̄matpa jem̄pic jém Jesús, in̄quejáypa jém p̄ixiñtam iga accaatap cunusyucmi.

³⁴ Jesic jém p̄ixiñtam in̄imayyaj jém Jesús:

—Tammaton̄ne iga nimpa jém Dios in̄mati iga itpa jém Cristo para itump̄iy tiempo. ¿Jesic tiiga miñn̄impa iga accaatap cunusyucmi jém Miññewiip Sinyucmi? Anímaayi: ¿Iapaap jém Miññewiip Sinyucmi?

³⁵ Jesic Jesús inímáypa jeeyaj:

—Jém juctian̄tsoca poy it tum rato con mimichtam. Wittaami iganam it jém juctian̄tsoca iga odoy micts̄iyiñ jém piichi. Porque jém witp̄app̄ic jém piich̄c̄im da ijodon̄ jut nicpa. ³⁶ Iganam itpa jém juctian̄tsoca, jesic acup̄ictaami aich iga iniitt̄amiñtim jém juctian̄tsoca jém in̄ñaman̄jom.

Jesic cuando yaj n̄imi jém Jesús, nic iyámáy jém p̄ixiñtam.

Wati jém judíos da idic icup̄icyajpa

³⁷ Tsam jáyan milagro y seña iwat Jesús jém p̄ixiñtámanj̄om, pero jeeyaj da icup̄icyajpa iga je jém Cristo. ³⁸ Iwatyajpa jemp̄ic iga cupaguiñ jém an̄mat̄i jém ijaychacnew̄ip̄ jém wiñicp̄ic profeta jém Isaías. N̄impa:

ManJat̄uñ Dios, mich inin̄quejáy jém p̄ixiñtam jém imp̄imi, pero da i icup̄icpa mich inin̄mat̄i jém anamiññew̄ip̄.

³⁹ Jeeyucmi jém Israelp̄ic p̄ixiñtam da icup̄icyajpa jém Cristo, porque n̄imtim jém Isaías:

⁴⁰ Dios icáchtiwatpa jém p̄ixiñtam,

icamamwadáy icobac iga mástim da wiap̄ icutīiȳyyaj jém Dios in̄mat̄i.

Jempam iwat Dios iga jém p̄ixiñtam da ti iixyajpa iixcuymi ni da wiap̄ icutīiȳyyaj ianamanj̄om iga Dios iw̄iwadaytooba idic.

Datim wiap̄ ichacyaj jém malop̄ic ij̄ixi iga Dios iccáyáyiñ it̄an̄ca.

⁴¹ Wīa in̄mat̄i jemp̄ic jém Isaías porque wiñigam iix jém Cristo ip̄imi. Ijaychacne ti iñascaaba jém Cristo cuando miñpa ȳip̄ naxyucmi.

⁴² Pero da itump̄iȳ jém Israelp̄ic p̄ixiñtam cuixayaj. Jáyan icup̄icyaj, hasta algunos jém anjagooyiyaj icup̄icyajtim jém Jesús. Pero iga tsam ic̄inyajpa jém fariseoyaj jesic in̄yampa iga icup̄icne. Ic̄inyajpa iga quebacputyajtap̄ jém sinagoga. ⁴³ Más iw̄ianj̄amyaj iga cuj̄ipyajtañ̄ ȳip̄ naxyucmi que iga Dios icuj̄ippa.

Jém Jesús in̄mat̄i ic̄ip̄in̄pa jém p̄ixiñtam

⁴⁴ Jesic ocmi p̄imi j̄iypa jém Jesús. N̄impa:

—Siiga i acup̄icpa aich, jesic icup̄icpatim mex jém anJat̄uñ Dios jém acutsatnew̄ip̄ ȳip̄ naxyucmi. ⁴⁵ Jém aixp̄app̄ic aich, iixpatim mex jém anJat̄uñ Dios jém acutsatnew̄ip̄.

⁴⁶ Ich, jém ajuctian̄tsoca, amiñ ȳip̄ naxyucmi iga itump̄iȳ jém acup̄icyajp̄app̄ic aich, da ts̄iyyajpa piichc̄im. ⁴⁷ Siiga i imaton̄pa ich anan̄mat̄i, pero da icup̄icpa, jesic ich anyaac da anchiiba jém icastigo. Ich da amiñ iga ac̄ip̄iñ̄óypa. Amiñ iga an̄ciacputpa jém it̄yajw̄ip̄ ȳip̄ naxyucmi. ⁴⁸ Siiga tum̄ p̄ixiñ̄ ajóyixpa y da iwatpa juuts n̄impa ich anan̄mat̄i, jesic jém in̄an̄pigam jama ich anan̄mat̄i ts̄iypa juuts tum̄ juez. Jeetim anan̄mat̄i ic̄ip̄in̄pa y ichiiba castigo jém dap̄ic ip̄ictson̄pa ich anan̄mat̄i. ⁴⁹ Ich anyaac da anj̄ixqūimpa jém anan̄mat̄i, pero jém anJat̄uñ Dios jém acutsatnew̄ip̄ an̄imáy jutsap̄ anan̄mat̄i jém an̄mat̄i y ti anan̄quejáypa jém p̄ixiñtam. ⁵⁰ Ich anj̄odon̄ iga jém anJat̄uñ Dios in̄qūimayooyi ichiiba jém p̄ixiñtam jém vida jém dap̄ic cuyajpa. Jeeyucmi anan̄mat̄i jém anan̄mat̄i juuts an̄imayñe jém anJat̄uñ Dios.

13

Jesús icheáypa jém icuyujc̄wiñ̄ ipuy

¹ Jesic núctooba jém jama iga jém Israelp̄ic p̄ixiñtam iwatyajpa jém pascuas̄in̄. Ijodon̄ Jesús iga núcneum jém hora iga nicgacpa sin̄yucmi jut̄ it̄ iJat̄uñ Dios. Jém Jesús tsam̄ p̄imi itoȳpa jém it̄ún̄iȳyajw̄ip̄, jém im̄chip̄ic, da nunca ichacpa iga itoȳpa.

² Jesic iganam w̄icmon̄yajpa Jesús con jém icuyujc̄wiñ̄, jém Woc̄c̄wiñ̄ iccám jém malop̄ic j̄ixi jém Judas Iscariote ianamanj̄om iga iwadáȳpa atraición̄ jém Jesús. Ȳip̄ Judas jém Xim̄oj iman̄ic. ³ Ijodon̄̄a Jesús iga jém iJat̄uñ Dios ic̄ijun̄codáȳ itump̄iȳ cosa ic̄ij̄om. Ijodon̄̄tim iga miñ̄ de Dios y eyb̄ic nicpa jut̄ it̄ Dios. ⁴ Cuando yajtoobam w̄iiquiyaj, teñchucum jém Jesús, ichac iyooti, ip̄ic tum̄ toalla, iwoycun̄uc jém im̄j̄pacyucmi. ⁵ It̄ec ni tum̄ palanganaj̄om, moj icheáȳ ipuy jém icuyujc̄wiñ̄. Ocmi icuj̄icháyáypa ipuy con jém toalla jém iwoycun̄ucnew̄ip̄ jém im̄j̄pacyucmi.

⁶ Cuando núc Jesús jut̄ it̄ jém Peto, jesic Peto iñimáy:

—Mán̄omi, ¿que mich antseáypatim ampuy?

⁷ Nimpa Jesús:

—Siip da inçutiïyíyipa tiiga mantseaytámpa jém impuy, pero ocmi inçutiïyíyítámpa.

⁸ Jesic jém Peto iñímáypa jém Jesús:

—Mich da nunca manjígáypa iga antseáypa ampuy.

Jesic nimpa Jesús:

—Siiga da mantseáypa impuy, jesic da je mammïchi.

⁹ Jesic Peto iñímáy jém Jesús:

—Mánomi, atseayí ampuy. Atseayítim jém añci y añcobac.

¹⁰ Jesic iñímáy Jesús:

—Siiga yaguiñ chiñne tum pïxiñ, jesic da ixunpa iga chiñpa eybic. No más ixunpa iga icheeba ipuy porque cuáyñeum icutero. Mimichtam micuáyñeum, pero tum de mimichtam, jém mançuyujcïwiñ, da micuáyñe.

¹¹ Porque jém Jesús ijodon ñapaap iwadáypa atraición. Jeeyucmi nimpa Jesús iga: “Da iñtumpiytam micuáyñeta.”

¹² Cuando yaj icheáy jém icuyujcïwiñ ipuy, jesic jém Jesús icot iyooti, eybictim coñ jém mesacim. Iñímáy jém icuyujcïwiñ:

—¿Inçutiïyíy ti siip manwadayta? ¹³ Mimichtam annímaytámpa iga: mamMaestro y mánomi. Wi iga miñimtámpa jempic porque mimichtam numa manaccuyujpa y numa mimichtam mammïchane. ¹⁴ Aunque michtam amMaestro y ánomi, mantseáypa impuy, jesic wítim iga minitseytamtañ impuy mimichtam. ¹⁵ Mantseáy jém impuy iga manañquejáypa iga wi iga inwattámiñ juuts ich manwadayta. ¹⁶ Numa mannímáypa, tum pïxiñ iesclavo da wiap iñasca jém iomi. Tum mensajero da más mij que jém icutsatpáppic. ¹⁷ Siiga inçutiïyíyítámpa ti mannímáypa y siiga inwattámpa jempic, jesic agui mimaymáyatámpa.

¹⁸ Eybic jïyipa Jesús. Nimpa:

—Da animtooba iga iñtumpiytam wiap inçutiïyíyita porque añwixpicpa jém añcupiñeyajwip. Anjodon ñapaap amalwadáypa. Nimpa jém Dios inmati, jém jayñetawip, iga: “Tum pïxiñ añwaganawícpa aich, ocmi awadáypa atraición.” Siip cupactooaba jém añmati. ¹⁹ Mannímáypa siip ti annascaaba aich, jesic cuando iñixtámpa iga cupacum jém anañmati, wiap inçupicta iga ich jém aCristo jém acupiñnewip Dios. ²⁰ Numa, mannímáypa siiga i ipictsonpa jém añcutsatnewip, jesic apictsonpatim aich. Siiga i apictsonpa aich, ipictsonpatim jém añjatun Dios.

Nimpa Jesús iga jém Judas iwadáypa atraición

(Mt. 26:20-25; Mr. 14:17-21; Lc. 22:21-23)

²¹ Jesic cuando yaj inmat jempic jém Jesús, tsam pimi anyácne ñanamanjom. Nimpa Jesús:

—Numa siip mannímáypa, tum de mimichtam aciñjuncotpa jém ánenemigo icijom.

²² Jesic jém Jesús icuyujcïwiñ tsam naámyajtap. Nimyajpa ñanamanjom iga: “¿Ñapaap iwadáypa atraición jém tánomi?” ²³ Tum jém Jesús icuyujcïwiñ, jém tsampic itoypa, iwaganacoñ jém Jesús. ²⁴ Jesic jém Peto iwaday seña con icobac iga jém pïxiñ icwáguñ Jesús ñapaap jém iwadaypaap atraición. ²⁵ Jesic jém pïxiñ icunúc noco iga iyámacwácpa. Nímaytap jém Jesús:

—Mánomi, ¿i miwadáypa atraición?

²⁶ Jesic Jesús icutson. Nimpa:

—Siip ansonpa tum jaca caxtánañi jém anchimajom, anchiiba jém pïxiñ jém awadaypáppic atraición iga quejiñ ñapaap.

Jesic cuando ixon jém caxtánañi, ichi jém Judas Iscariote, jém Ximoj imaníc. ²⁷ Jesic yaj ipictson jém Judas jém caxtánañi, tigiy jém Wocciwiñ jém Judas ianamanjom. Jesic Jesús inímáy jém Judas:

—Jém siipic inwatpa, nigí wati jicsciy.

²⁸ Jém tungac icuyujciwiñ, jém ityajwiip mesacim, da icutiyyiyaj tiiga inímáy jempic jém Judas. ²⁹ Ijisyajpa algunos iga cutsattap jém Judas iga niguiñ ijuy titam ixunyajpa iga siñayajpa. Tungac ijisyajpa iga cutsattap jém Judas iga ichiñ tumiñ jém yaachayajpáppic. Porque iwatpa cuenta jém tumiñ ibolsa. ³⁰ Jesic yajum icút jém caxtánañi, nic jém Judas. Piichim.

Jém jomipic anquímayooyi

³¹ Jesic cuando nicneum jém Judas, moj anmati jém Jesús. Inímáy jém icuyujciwiñ:

—Siip cujíptap jém Miññewiip Siñyucmi. Cujíptap tim tanjatun Dios je icuyucmi. ³² Siiga cujíptap Dios ich ancuyucmi, jesic acujíptap tim aich jém anjatun Dios icuyucmi. Siip iwatpa Dios jém wítampic cosa iga acujíptaiñ y da jáyñe iccupacpa. ³³ Mamanictam, mantoytampáppic, siip tum ratotim tawagaitta. Pero ocmi mimichtam tsam ancuámtámpa, da ampátámpa. Siip mannímáypa juuts annímáyñe jém judíos, mimichtam da wíap inñicta jut ich anicpa. ³⁴ Siip manchiiba tum jomipic anquímayooyi, natoytamtaji con jém inñiwitam. Juuts mantoytámpa mimichtam, jesic jempictim natoytamtaji con jém inñiwitam. ³⁵ Siiga minitoytamtap con jém inñiwitam, jesic itumpiy jém ityajwiip yíp naxyucmi ijodónayajpa iga ich mancuyujciwiñ.

Nimpa Jesús iga jém Peto inécpa

(Mt. 26:31-35; Mr. 14:27-31; Lc. 22:31-34)

³⁶ Jesic jém Peto icwác jém Jesús, inímáy:

—Mánomi, ¿jut miñicpa?

Nimpa Jesús:

—Jemum jut ich anicpa, mimichtam da wíap inñicta siip, pero ocmi miñictámpatim mex mimichtam.

³⁷ Jesic jém Peto inímáy:

—Mánomi, ¿tiiga da wíap annicta siip? Ich anyaac anchiiba amvida iga accaatap para mimich.

³⁸ Jesic nimpa Jesús:

—¿Que mich michióypa imvida iga miccaatap para aich? Numa mannímáypa iga antes que anwejpa jém cayu, ananécpa tres veces iga ich mancuyujciwiñ.

14

Jesús je jém tun jém nicpáppic jut it tanjatun Dios

¹ 'Mimichtam, odoy anyáctaami inñamanjom iga ich anicpa. Cupictaami Dios, acupictaamitim mex aich. ² Jém anjatun Dios iticim tsam it jém wítampic lugar jut nicpa miñitam. Meega da idic i, da idic mannímáy. Nicpa manwitsagáy tum lugar para mimichtam. ³ Siiga nicpa manwitsagáy tum lugar para mimichtam, jesic amiñgacpa eybic iga mananictámpa, iga jut aítpa aich jemt看 tim miñtámpa mimichtam. ⁴ Mimichtam inñodontam jut anicpa, inñodontim jém tun.

⁵ Jém Tomax inímáy:

—Mánomi, da anjodontam jut miñicpa. ¿Jutsap anjodónata jém tun?

⁶ Jesic Jesús inímáy jém Tomax:

—Icham jém atun. Ich anamiñ jém numapic anquímayooyi. Ich anchiiba jém pixiñtam jém vida jém dapic cuyajpa. Da i núcpa jut it anjatun Dios siiga da acupicpa aich.

⁷ Siiga mimichtam ánixpictámpa aich, jesic íñixpictámpatim jém anJatun Dios. Siip mojum íñixpicta Dios, íñixñetámum.

⁸ Jesic jém Felipe íñímáy Jesús:

—MánQmi, aguixtaami jém tanJatun Dios, jesic itum wí. Da ti más ansuntámpa.

⁹ Jesic Jesús íñímáy jém Felipe:

—A que miFelipe, tsam wiñigam awagaitta con mimichtam. ¿Que mich da ánixpicpa? Jém aixñewiip aich, iixñetím jém anJatun Dios. ¿Tiiga mich annímáy iga: “Aguixtaami jém tanJatun Dios”? ¹⁰ ¿Que da incupicpa iga anwaganait anJatun Dios y jém anJatun Dios awaganait aich? Jém ananmati, jém mananmadayñewiip, da je anjixquiimi. Jém anJatun Dios, jém itwiip ananamanjom, iwatpa jém witampic cosa juuts je iwianjam. ¹¹ Cupictaami iga anwaganait anJatun Dios y jém anJatun Dios it ananamanjom. Siiga da wiap incupicta iga ich anwaganait jém anJatun Dios, jesic acupictaami aich porque íñixñeta jém milagroyaj jém anwatnewiip. ¹² Numa mannímáypa; jém pixiñ, jém acupicnewiip, wiaptim iwat jém milagroyaj jextim juuts ich anwatpa, wiaptim iwat más wibic milagro que ich porque anicgacpam sinyucmi jut it anJatun. ¹³ Siiga iniñwejpátámpa Dios ich anniyimi iga inwagaytámpa algun ti, jesic ich anwatpa juuts mich anwagáypa iga cujiptañ jém anJatun Dios. ¹⁴ Titam inwagáypa Dios ich anniyimi, jesic ich anwatpa juuts anwagáypa mimichtam.

Nimpa Jesús iga icutsatpa jém Dios iAnama yíp naxyucmi

¹⁵ Siiga mimichtam antoytámpa, jesic cupictaami ananquímayooyi. ¹⁶ Ich an��unucsáypa anJatun Dios iga michiitámiñ jém Dios iAnama iga miyoxpátámiñtim juuts aich iga míniñ miwaganait con mimichtam para siempre. ¹⁷ Jém Dios iAnama minquejaytámpa itumpiy jém numapic anquímayooyi. Jém ityajwiip yíp naxyucmi ijóyixyajpa Dios, da wiap ipictson jém Dios iAnama, porque da wiap iixyaj ni da wiap iixpicyaj. Pero cuando núcneum jém Dios iAnama, jesic mimichtam íñixpictámpa porque miwaganaitta. Miñpa iti jém Dios iAnama mimichtam íñanamanjom. ¹⁸ Da mantsactámpa incútum juuts tum yuctucu. Eybic miñpa aiti con mimichtam. ¹⁹ Da jáyñe anicpa, jesic yíp naxyucmic pixiñtam da más aixyajpa, pero mimichtam eybic ánixtámpa. Ich manchiiba jém vida porque ich anait jém vida. ²⁰ Jesic cuando núcpa jém jama, mimichtam injodónatámpa iga anwaganait jém anJatun Dios. Injodónatámpatim iga mich miit con aich y ich ait con mimichtam. ²¹ Siiga tum pixiñ ijodon ich ananquímayooyi y icupicpa, jesic quejpa iga tsam atoypa jém pixiñ. Siiga atoypa aich tum pixiñ, jesic jém anJatun Dios tsam itoypatim jém atoypáppic aich. Ich antoypatim jém atoypáppic. Ich anyaac anwiñquejáypa jém pixiñ iga icutiyiyiñ aiapaap.

²² Jesic jém tungac Judas, jém dapic Iscariote, íñímáy jém Jesús:

—MánQmi, ¿tiiga anwiñquejaytámpa aichtam, pero da inwiñquejáypa jém ityajwiip yíp mundo, jém dapicnam micupicneyaj?

²³ Jesic Jesús íñímáy jém icuyujcwiñ:

—Siiga tum pixiñ atoypa, jesic numa icupicpa jém ananmati. Jém anJatun Dios tsam itoypatim jém pixiñ. Jesic ich con jém anJatun Dios miñpa anwaganaitta jém icupicpáppic ich ananmati. ²⁴ Jém pixiñ, jém dapic atoypa aich, da iwatpa juuts nimpa ich ananmati. Yíp anmati, jém siippic immatonne, da anjixquiimi; achiiñe jém anJatun Dios, jém acutsatnewiip yíp naxyucmi.

²⁵ Mananmadáy itumpiy yípyaj cosa iganam ait con mimichtam. ²⁶ Jesic ocmi anJatun Dios micutsadáypa jém Dios iAnama iga miyoxpádiñ juuts tum representante para ich.

Miñpa miñquejayta itumpiy jém anañquímayooyi. Miñpa iga micjístamiñ itumpiy jém anañmatí jém manañquejayñewiip.

²⁷ 'Siip mantsagáypa jém paz, manchiiba jém wibic jixi iga da ti idíyiy íñanamanjom, da jex juuts michiitap yíp naxyucmi. Jesic odoy anyáctaami íñanamanjom, odoy cįntaami. ²⁸ Immatoneta cuando mannímáy iga: "Anicpa, pero eybic miñpa aiti con mimichtam." Siiga numa antoytámpa, jesic maymáyaataami iga ich anicgacpa siip jut it anJatun Dios, porque jém anJatun más wiap que aich. ²⁹ Manañmadáypa siip titam miñpa antes que núcpa, jesic cuando íñixtámpa itumpiy cosa juuts mannímáyne idic, incupictámpa iga Dios acutsat.

³⁰ 'Siip tum ratofim manañmatpa, porque siip núcum jém tiempo iga miñpa yíp naxyucmic anjagooyi. Je da iticutigiyi con ich, da ti wiap awadáy. ³¹ Pero siip anwatpa juuts apimíypa jém anJatun Dios iga jém ityajwip yíp mundo ijodónayajiñ iga tsam antoypa jém anJatun Dios. Siip tsucumtaami. Tanictámpam.

15

Jém Jesús juuts tum uvas icobac

¹ 'Ich ajex juuts tum nunta uvas icobac. Jém anJatun Dios jém iwatpáppic cuenta jém uvas. ² Jagaytap itumpiy jém uvas incis jém dapic tímāp. Pero jém incis jém tímāpáppic, witsactap, anticsaytap uxan inquniñi iga más tímāiñ. ³ Siip mimichtam cuáyñeum íñanama porque incupic jém anañquímayooyi, jém manañmadayñewiip. ⁴ Seguido wagaittaami con aich y ich seguido manwaganaitpa mimichtam. Siiga tum cuy incis da pmane jém cuyucmi, jesic da tímāp. Jém cuy incis da wiap itima iyaac. Jesapim mimichtam da wiap inwatta jém witampic cosa juuts ixunpa Dios siiga da miwagaitta con aich.

⁵ 'Ich ajex juuts tum uvas icobac. Mimichtam mijex juuts tum uvas incis. Siiga tum pixiñ seguido awaganaitpa aich y siiga ich anwaganaitpa jém pixiñ, jesic wiap iwat jém witampic cosa juuts tsam tímāp. Siiga da manyoxpáttámpa, jesic da ti wiap inwatta. ⁶ Siiga tum pixiñ da seguido awaganaitpa aich, jesic jex juuts tum cuy incis jém dapic tímāp. Pátsaytap, titspa. Ocmi piñtap, cottap juctjom, nooquettap.

⁷ 'Siiga seguido miwagaitpa con aich y da inñacpa iga incupicpa ich anañmatí, jesic wágaytaami Dios titam inñunpa y je michiiba. ⁸ Jém anJatun Dios tsam cujíptap cuando inwíwattámpa mimichtam, juuts tsam miwítimāp. Jempigam michiytámpa iga ich mancuyujciwiñ. ⁹ Mantoytámpa mimichtam juustim jém anJatun atoypa aich. Seguido wíwattaami porque ich tsam mantoytámpa. ¹⁰ Siiga incupictámpa ich anañquímayooyi, jesic seguido inwíwattámpa porque ich tsam mantoytámpa. Jextim juuts aich ancupicpa jém anJatun Dios inquímayooyi y seguido anwatpa juuts je iwianjam porque tsam atoypa jém anJatun Dios.

¹¹ 'Manañmadáypa yípyaj cosa iga iniidiñtim jém maymáyají juustim ich anait, iga tsam pimi mimaymáyatamiñ. ¹² Yim it ich anañquímayooyi: Natoytamtaji con inñiwitam juuts ich mantoytámpa mimichtam. ¹³ Siiga nachiitap iyaac tum pixiñ iga accaatap para jém iamigo, jesic quejpa iga tsam pimi itoypa jém iamigo. ¹⁴ Mimichtam manamigotam siiga inwattámpa juuts mannímáypa. ¹⁵ Siip dam más michiypa juuts manesclavo porque tum esclavo da icutiyyiypa ti iwatpa jém iomi. Pero siip mannímáypa iga manamigotam porque manañquejayñetatum itumpiy jém jixi jém achiiñewiip jém anJatun Dios. ¹⁶ Mimichtam da ancupineta aich, pero ich mancupineta mimichtam. Manchiineta jém cargo iga niguiñ inwatta jém wibic cosa juuts ich ansunpa. Jesic numa inwíwatpa y da inñacpa jém wibic jixi, juuts tanimpa, miwítimāp. Jesic titam inwágáypa

anJatun Dios, ich anniyimi, michiiba. ¹⁷ Siip mananquimpa iga natoytamtaji con jém inñiwitam.

Jém malopic pixiñtam ijóxyajpa Jesús con jém icupicneyajwip

¹⁸ Siiga tsam mijóxyajpa jém malopic pixiñtam jém ityajwip yíp naxyucmi, jesic jisi iga wiñti ajóyixtim aich. ¹⁹ Siiga mimichtam mimalotim juuts jém ityajwip yíp naxyucmi, jesic mitoytámpatim jém malopic pixiñtam. Pero mancupiñne iga inñchaganpudiñ jém ityajwip yíp naxyucmi. Jeeyucmi tsam mijóxyajpa jém malopic pixiñtam porque dam mijex juuts jeeyaj. ²⁰ Jistaami ti mannímáy iga tum esclavo da más mij ipimi que jém iomi. Siiga yíp naxyucmic pixiñtam amalwadayyaj aich, jesic michgacti mimalwadayyajpatim. Meega icupicyaj ich anañmati, jesic icupicyajpatim mex mich inañmati. ²¹ Mimalwadaytamtap ich añcuyucmi porque jém malopic pixiñtam da iixpicayajpa jém anJatun Dios jém acutsatnewip yíp naxyucmi.

²² Meega ich da miñ anañmadayyaj jém pixiñtam jém wibic añmati, jesic jeeyaj da iniiyaj la culpa iga imalwatyajpa. Pero ich anamíñáy jém wibic añmati, jesic jeeyaj iniityaj la culpa siiga da icupicyajpa, da wip inécyaj itañca. ²³ Jém ajóyixpápic aich, ijóyixpatim jém anJatun Dios. ²⁴ Jeeyaj da iniiyaj la culpa meega da miñ añwat jém wibic milagroyaj jém pixiñtamanjom, jém dapic oypa inñix. Pero siip jém pixiñtam iixñeyajum jém milagroyaj y ajóxyajpa aich y ijóxyajpatim jém anJatun Dios. ²⁵ Annascaaba jempic iga cupacpa jém añmati juuts jayñeta wiñigam jém inquímayooyi de jeeyaj. Nimpa: “Jém malopic pixiñtam ajóxyajpa sin motivo.”

²⁶ Cuando anúcpa jut it anJatun Dios, mancutsadáypa jém Dios iAnama iga miyoxpáttamiñ, iga icamamwadiñ inñanama. Miñpa miñmadáy de aich. Miñquejaytámpa itumpiy jém numapic añmati. ²⁷ Mimichtam wiptim inañmadáy jém pixiñtam de aich porque miitta con aich dende moj anañmat jém wibic añmati.

16

¹ Siip manañmadáypa yípyaj cosa iga inñcutiyyitamiñ ti miñpa. Jesic siiga mimalwadaytamtap, da miñyáctámpa ni da inñchactámpa jém Dios inñmati. ² Miquebacputtamtap jém sinagoga. Núcpa jém hora cuando jém malopic pixiñtam imétsyajpa jutsap miccaayaj, porque ijisyajpa iga iwatyajpa juuts ixunpa Dios siiga miccaaba. ³ Yicxpíc cosa iwatyajpa jém malopic pixiñtam porque da queman iixpicayaj jém anJatun Dios y datim aixpicayajpa aich. ⁴ Siip manañmadáypa ti miñpa iga cuando núcpa jém hora iga jém malopic pixiñtam mimalwadáypa, jesic inñjistámpa ti mannímáyñeta. Pecam da idic manañmadayñeta ti miñpa porque manwaganaiñta mimichtam.

Tañquejáypa ti iwatpa jém Dios iAnama yíp naxyucmi

⁵ Siip nicgacpa aiti jut it jém acutsatnewip. Pero ni tum de mimichtam da anacwáctámpa iga: “¿Jut miñicpa?” ⁶ Pero siip tsam miñyácneta inñanamanjom porque manañmadayta ti miñpa. ⁷ Mannímáypa siip jém numapic añmati. Más wí para mimichtam iga anicpa. Porque siiga da anicpa, jesic da miñpa jém Dios iAnama iga miyoxpáttámpa. Pero siiga anicpa, jesic mancutsadáypa jém Dios iAnama. ⁸ Cuando núcpa yíp naxyucmi jém Dios iAnama, jesic inñquejáypa jém ityajwip yíp naxyucmi iga táñcaiy. Inñquejáypatim jém pixiñtam jutsap iwatyaj juuts ixunpa Dios. Inñquejáypatim jém pixiñtam iga núcpa jém jama iga cipiñyajtáp itumpiy jém malopic pixiñtam, chiyajtáp castigo. ⁹ Jém Dios iAnama inñquejáypa jém pixiñtam iga táñcaiyaj porque da acupicyajpa. ¹⁰ Anñquejayajtáptim jém pixiñtam jutsap iwatyaj juuts ixunpa Dios porque

siip anicgacpa jut it jém anJatun y mimichtam da más ánixtámpa. ¹¹ Anquejayyajtaptim jém pixiñtam iga cñipíñóypa Dios porque Dios icñipiñneum jém Wocñwiñ, jém injacpáppic yíp mundo, y ichibatim castigo.

¹² 'Manañmadaytámtoba jáyan más cosa, pero siip da wiap iñyaachíy. ¹³ Pero cuando miñpa jém Dios iAnama jém inmatpáppic jém numapic anmati, jesic miñquejaytámpa itumpiy jém numapic anquímayooyi. Porque Dios iAnama da miñmadáypa de iyaac, pero miñmadáypa itumpiy jém cosa jém imatonnewiip. Miñquejaytámpa ti miñpa. ¹⁴ Jém Dios iAnama ipictsonpa itumpiy jém ich ananquímayooyi y miwianquejaytámpa. Iwatpa jempic iga jém pixiñtam awixyajiñ aich. ¹⁵ Itumpiy jém anJatunpic imñichi, ammiichitim aich. Jeeyucmi mannímáypa iga jém Dios iAnama ipictsonpa ich ananquímayooyi y miñquejaytámpa mimichtam.

Cáypa jém anyaaqui, maymáayajiñ jém Jesús icuyujcñwiñ

¹⁶ 'Da jáyñe mimichtam da ánixtámpa. Pero ocmi da jáypa ánixtámpa eybic. Porque anicpa jut it anJatun Dios.

¹⁷ Jesic algunos jém Jesús icuyujcñwiñ nanímayyajtáp entre jeeyaj:

—¿Que ti nimtooba iga: “da jáyñe da ánixtámpa”, y “da jáypa ánixtámpa eybic” y “porque anicpa jut it anJatun”? ¹⁸ ¿Que ti nimtooba iga: “dam jáyñe da tánixtámpa”? Da tancutñiyíypa ti nimtooba jém tánomi.

¹⁹ Jesic jém Jesús icutñiyíy iga jém icuyujcñwiñ icwáctooba. Jesic iñímáy jeeyaj:

—¿Que minicwáctamtáp ti animtooba cuando mannímáyñe iga: “dam jáyñe, da ánixtámpa” y ocmi, “da jáypa ánixtámpa eybic”? ²⁰ Numa, mannímáypa iga tsam miwejtámpa, tsam miñyáctámpa. Jém malopic pixiñtam jém ityajwñip yíp naxyucmi tsam maymáayajpa. Pero mimichtam tsam miñyáctámpa. Pero ocmi cáypa jém anyaaqui, setpa iga mimaymáyatámiñ mimichtam. ²¹ Cuando tum yomo icnaypa tsixi, agui anyácne iga yaachap porque núcneum jém tsixi itoya. Pero ocmi cuando nayñeum jém tsixi, dam ijspa jém yomo iga tsam yaachá micnay jém tsixi porque agui maymay iga icnayñe tum tsixi yíp naxyucmi. ²² Jesanetim mimichtam siip tsam miñyáctámpa, pero jesic ocmi miñgacpa mánám y tsam mimaymáyatámpa. Jesic jém maymáayaji da i wiap miccáyáy. ²³ Cuando núcum jém jama iga amiñgacpa, jesic da ti anacwáctámpa mimichtam.

'Numa mannímáypa iga jém anJatun Dios michiiba titam inwágaytámpa ich anniyimi.

²⁴ Hasta siip da ti inwágayta Dios ich anniyimi. Siibam wágaytaami Dios titam iñxunpa iga tsam mimaymáyatámpa cuando impictsonjtámpa.

Jesucristo icoñwiy jém Wocñwiñ ipimi

²⁵ 'Hasta siip manañmadayñe cuentujmi, pero núcpa jém hora iga da manañmadáypa cuentujmi. Mannuntawianmadáypa ti iwianjam jém anJatun Dios. ²⁶ Jesic cuando núcpa jém jama, da anañwejpátpa Dios para mimichtam porque mimichtam inwágáypa Dios titam iñxunpa ich anniyimi. ²⁷ Jém anJatun Dios iyaac mitoytámpa porque michtam antoytámpa aich y incupictámpa iga ich atsucum jut it anJatun Dios. ²⁸ Ich atsucum jut it anJatun Dios. Miñ aiti yíp naxyucmi. Siip acáypam yíp naxyucmi. Eybictim anicgacpa jut it anJatun Dios.

²⁹ Jesic nimyaj jém icuyujcñwiñ:

—Siip numa iññuntawianmatum. Dam inmatpa cuentujmi. ³⁰ Siip anjodónatámum iga incutñiyíypa itumpiy cosa, da iñxunpa iga i micwácpa. Jeeyucmi mancupictámpa iga numa Dios micutsatne yíp naxyucmi.

³¹ Jesic jém Jesús iñímáy jeeyaj:

—¿Numa, inçupictámpa siip? ³² Mannímáypa iga núcum jém jama iga ançupóyaytámpa mimichtam. Micupujaytámpa. Miñictámpa yim jeexic. Antsactámpa aich ançutúum. Pero ich da atsíypa ançutúum porque siempre it con aich jém anJatun Dios. ³³ Mannímayta itumpiy yípyaj cosa iga odoy ti inçintámiñ porque ançupicneta aich. Tienes que miyaachwattamtap yíp naxyucmi, pero camamwati iñanama porque ich ançoñwiyñeum itumpiy jém Wocciwiñ ipimi jém itwiiip yíp naxyucmi.

17

Jesús inwejpátpa Dios para jém icuyujcwiñ

¹ Jesic cuando yaj inmat jempic jém Jesús, ámquím siñyucmi. Moj inwejpát Dios. Nimpa: —ManJatun Dios, siip núcneum jém hora iga accaatap. Siip wati titam iñxunpa iga jém pxiñtam awixyajiñ aich, jém michpic immanic. Jesic ich anwatpatim jém yoxacuy juuts mich iñxunpa iga jém pxiñtam miwixyajiñtim. ² Mich anchi jém pimi iga ananjacpa itumpiy jém pxiñtam. Ampictson jém autoridad iga anchiiyajpa jém vida jém dapic cuyajpa itumpiy jém pxiñtam jém michpic anchiiñe. ³ Ipictsonyajpa jém vida jém dapic cuyajpa siiga miixpicyajpa mimich jém tumpic miDios y siiga aixpicyajpatim aich, jém aJesucristo jém michpic ancutsatne yíp naxyucmi.

⁴ 'Yajum anwat jém yoxacuy jém anchiiñewiiip mimich, jeeyucmi tsam micujípyajpa jém ityajwiiip yíp naxyucmi. ⁵ Siip manJatun Dios, awadaayi juuts mich iñxunpa iga acujíptañ con mimich juutstim acujípneta cuando jáy tawagañti cuando danam tanwatne yíp mundo.

⁶ 'Yíp ampixiñtam, jém inçupinnewiiip yíp naxyucmi, mich immichi idic y siip mich anchi. Anaquejayyay yíp ampixiñtam itumpiy jém michpic ininquímayooyi iga miwixpicyajñ. Siip iwatyajpa juuts nimpa ininquímayooyi. ⁷ Siip ijodónayaj iga mich immichi itumpiy jém ananquímayooyi jém michpic anchiiñe. ⁸ Anchiiñeyajum jém ampixiñtam jém anmati, jém michpic anchiiñe. Siip ipictsonneyajum jém anmati y ijodónayajum iga numa ich amiñ siñyucmi jut miit. Icupicyajpa iga mich ancutsatne yíp naxyucmi.

⁹ 'Siip mananwejpátpa mimich para jém ampixiñtam. Da mananwejpátpa para jém ityajwiiip yíp naxyucmi jém dapic acupicneyaj. Solamente mananwejpátpa para jém ampixiñtam jém michpic anchiiñe porque immichitim mich. ¹⁰ Itumpiy jém ichpic ammichi, immichitim mich. Y jém michpic immichi, ammichitim ich. Acujíptap aich porque jém ampixiñtam iwíwatyajpa.

¹¹ 'Siip ich da atsíypa yíp naxyucmi. Tsíyyajpa jém ampixiñtam. Ich anicpa siñyucmi jut miit. Siip manJatun Dios, miCuáyñewiiip, con mich impimi wati cuenta jém ampixiñtam jém anchiiñewiiip iga iniityajiñ tumti jixi juutstim taichtam. ¹² Iganam anwaganaiyay yíp naxyucmi jém ançuyujcwiñ, jém anchiiñeyajwiiip mimich, ich anwatneyaj cuenta con mich impimi. Da ti iñscaneyaj. Da togoyñe ni tum, nada más jém togoyñewiiip dende wiñgam. Je togoy iga cupacpa jém anmati jém jaychacnetawiiip.

¹³ 'Siip anicpa jut miit, manJatun Dios. Pero iganam ait yíp naxyucmi, mannímáypa yípyaj cosa, jesic jém ançuyujcwiñ maymáayajpatim juutstim aich. ¹⁴ Ich anchiiñeyaj jém ançuyujcwiñ jém michpic ininmati. Jém malopic pxiñtam, jém ityajwiiip yíp naxyucmi, tsam ijóyixyajpa jém ançuyujcwiñ porque jeeyaj datim yíp naxyucmic pxiñtam. Jextim juuts ich da yíp naxyucmic apixiñ. ¹⁵ Siip da mannímáypa iga accaayi jém ançuyujcwiñ yíp naxyucmi. Pero mannímáypa iga wati cuenta iga jém Wocciwiñ da wiiip imalwadáy. ¹⁶ Ich ançuyujcwiñ da je yíp naxyucmic pxiñtam,

jextim juuts aich da yíp naxyucmipic apixiñ. ¹⁷ Accámyaji yíp aŋcuyujc#wiñ juuts mich iñyoxac#wiñ iga tsíyyajiñ juuts mich imm#chi iga inmatyajiñ jém numapic aŋmati. Jém michpic ininmati jém nunta numapic. ¹⁸ Aŋcutsatpa jém aŋcuyujc#wiñ iga inquejayyajiñ jém pixiñtam jém ityajw#p yíp naxyucmi juustim mich aŋcutsatne yíp naxyucmi. ¹⁹ Ich anyaac anaccámta juuts mich iñyoxac#wiñ para que jém aŋcuyujc#wiñ wiaptim iniccám juuts tum iñyoxac#wiñ iga inmatyajiñ jém numapic aŋmati.

²⁰ 'Da manañwejpátpa solamente para jém aŋcuyujc#wiñ jém si#ppic it, pero manañwejpátpa para itumpiy jém pixiñtam jém acupicyajpáppic aich cuando imatonyajpa jém aŋcuyujc#wiñ inmati. ²¹ Manwágáypa, manJatun Dios, iga tumti jixi iniityajiñ itumpiy jém ampixiñtam jém acupicneyajw#p, jesaptim juuts taich tumti jixi tanaitta. Yoxpaati itumpiy jém acupicneyajw#p iga tumti jixi tanaiftámiñ tantumpiytam. Jesic jém dapic acupicneyaj, wiañ icupicyaj iga mich aŋcutsatne yíp naxyucmi. ²² Anchiiñe jém impimi, jém michpic anchi, iga tumti jixi iniityajiñ jextim juuts taichtam tumti tanjixi tanaitta. ²³ Ich ait jém aŋcuyujc#wiñ ianamanjom. Mich miittim ich ananamanjom. Jeeyucmi tumti jixi tanaitta tantumpiytam. Jesic jém tungac pixiñtam, jém dapic icupicneyaj, iwijodon iga mich aŋcutsatne yíp naxyucmi. Ijodonjim iga tsam iñtooyajpa jém aŋcuyujc#wiñ juustim mich antoypa aich.

²⁴ 'ManJatun Dios, ansunpa iga aŋwaganaityajiñ jém aŋcuyujc#wiñ, jém michpic anchiiñe. Ansunpatim iga iixyajiñ jém ampimi jém michpic anchiiñe porque mich antoypa antes que wattap yíp nas. ²⁵ ManJatun Dios, agui micuáyñe. Jém ityajw#p yíp naxyucmi da miixpicyajpa, pero ich, numa mánixpicpa y jém ampixiñtam ijodonjayaj iga mich aŋcutsatne yíp naxyucmi. ²⁶ Aŋwianquejáy jeeyaj iga icut#yiyajiñ iga mijapaap mimich. Seguido anañquejáypa iga iniityajiñ jém w#bic tóyooyi juuts mich antoypa aich. Jesic ich ait jém ampixiñtam ianamanjom.

18

Matstá Jesús, nanictá preso

(Mt. 26:47-56; Mr. 14:43-50; Lc. 22:47-53)

¹ Jesic cuando yaj inmat yípyaj aŋmati, moj niquiyaj con jém icuyujc#wiñ. Nicyaj tum ni aŋwiñtuc, iñiyi Cedrón. Jemum it tum finca de olivos, tigiyaj Jesús con icuyujc#wiñ. ² Jém Judas, jém iwadaypaap atraición, ijodonjim jut it jém lugar porque wactiy iwaganaoyaj jém Jesús jém icuyujc#wiñ. ³ Jém panij anjagooyiyaj con jém fariseoyaj icutsatyaj jutén pixiñtam y jém policía con jém Judas iga nicpa imatsyaj jém Jesús. Jesic jém Judas ininica jeeyaj hasta jut it jém Jesús. Ininicyaj jém espada y lanza. Ininicyajpatim jucti iga iyicquejpa. ⁴ Iwijodon Jesús ti iñascaaba, pero da c#npa. Jesic nic iwíñquejáy jém miññeyajw#p. Iñímáy jeeyaj:

—¿I immétspa?

⁵ Nimyajpa jém policía:

—Jém Jesús, jém Nazaretpic.

Jesic Jesús iñímáy:

—Aicham.

Jém Judas, jém iwadaypaap atraición jém Jesús, iwaganait jém policía. ⁶ Cuando iñímáy Jesús jém miññeyajw#p iga: "Aicham", jesic itumpiy de jeeyaj iñiccayaj ituuñi, tsutyaj.

⁷ Jesic eybictim iñímáy Jesús jém policía:

—¿I immétspa?

Nimyajpa jeeyaj:

—Jém Jesús, jém Nazaretpic.

⁸ Jesús eybic iñímáy jeeyaj:

—Mannímáyñeum iga aicham. Siiga ammétstámpa aich, jesic wiñti jígaayi iga nicyajiñ yíp ampixiñtam.

⁹ Nimpa jempic jém Jesús iga cupacpa jém anmatí jém inmatnewiip wiñti. Nimpa: “Jém ampixiñtam, jém achiiñewiip Dios, ni tum da antsictogoy.” ¹⁰ Jesic jém Peto itop jém espada, itinquímay tum pxiñ itatsic jém anwimipic. Jém pxiñ icuyoxap jém cobapic panij, iñiyi Malco. ¹¹ Jesic Jesús iñímáy jém Peto:

—Coti jém espada iñacjom. ¿Que da iñjodon iga anjatun Dios ijícpa iga ayaachwattap y ich tienes que anyaachíypa?

Nanicta Jesús jém panij anjagooyi iticcim
(Mt. 26:57-58; Mr. 14:53-54; Lc. 22:54)

¹² Jesic jém pxiñtam jém icutsatneyajwiip jém panijay y jém comandante con ipolicía imatsyaj jém Jesús. Ichenyaj. ¹³ Jesic wiñti nanictap Jesús jém Anás iticcim, jém Anás imit jém Caifás, jém cobapic panij jém amtíy. ¹⁴ Jeetim Caifás, jém ichiiñewiip consejo jém judíos, iga más wi iga accataiñ tum pxiñ iga odoy togoyajiñ itumpiy jém Israelpic pxiñtam.

Jém Peto inécpa iga iixpicpa Jesús
(Mt. 26:69-70; Mr. 14:66-68; Lc. 22:55-57)

¹⁵ Jém Peto itúñiy Jesús con jém tungac icuyujcwiñ. Jém Caifás iixpicpa jém pxiñ, jeeyucmi tigiy con Jesús jém Caifás itaañijom. ¹⁶ Pero tsíy anscimi jém Peto jém taañi anñaca. Tigiyñe jém tungac discípulo, jém iixpicpáppic jém Caifás, ijíyáy jém yomo jém iwatpáppic cuenta jém puerta. Iacunucsáy iga tigiyiñ jém Peto.

¹⁷ Jesic jém yomo iñímáypa jém Peto:

—¿Que mimich, da yíp pxiñ micuyujcwiñ?

Jesic nimpa jém Peto:

—Ich da aje.

¹⁸ Jesic como tsam succuc, jém policia con jém icuyoxayajpaap jém cobapic panij, icnúcyaj jucti iga samyajpa. Iwaganaityajtim jém Peto. Sampatim mex je.

Jém panij anjagooyi icwácpa Jesús
(Mt. 26:59-66; Mr. 14:55-64; Lc. 22:66-71)

¹⁹ Jesic jém cobapic panij moj icwác jém Jesús. Nímaytap:

—¿Itam jém inucuyujcwiñ? ¿Juutpic anquímayooyi síp ininquej?

²⁰ Jesic Jesús icutson. Nimpa:

—Ich siempre anañmatpa jém anañmatí itumpiy jém pxiñtam iwiñjom jut wiap imatonjay i quej. Siempre accuyujóypa jém sinagoga y jém mijpic masticjom. Da ti anyámanmatpa. ²¹ ¿Tiiga anacwácpa aich? Acwácyaji jém pxiñtam jém amatonneyajwiip. Jeeyaj wiap minmadayyaj ti anañquejayñeyaj. Iwijodonjay ti annímáy.

²² Cuando nimpa jempic jém Jesús, jesic tum policia ichi tum toji iacpacyucmi. Nimpa jém policia:

—¿Que jempigam incutsonpa jém cobapic panij?

²³ Jesic Jesús iñímáy jém policia:

—Siiga amalnim, jesic anímaayi ti mal anim. Pero siiga da amalnimne, ¿jesic tiiga ancótspa?

²⁴ Tsenneta jém Jesús cuando jém Anás icutsadáy jém cobapic panij, jém Caifás.

*Eybictim inécpa jém Peto iga iixpicpa Jesús
(Mt. 26:71-75; Mr. 14:69-72; Lc. 22:58-62)*

²⁵ Jesic jemum teñ jém Peto nocojom jém jucticim. Sampa ixí. Jém ityajwip inímayyaj jém Peto:

—Mimich, ¿da yíp pxiñ micuyujciwiñ?

Jém Peto inécpa. Nimpa:

—Ich da aje.

²⁶ Jesic tum jém icuyoxapaap jém cobacpic panij ijíyápa jém Peto. Jém itíwi, jém itinquímayñewip itatsic. Nímayta jém Peto:

—¿Que da mánix jém finca de olivos, jut matsta jém pxiñ?

²⁷ Jesic eybictim inéc jém Peto iga iixpicpa Jesús. Jesic jeetim rato anwejpa tum cayu.

Nanicta Jesús jém Pilato iwiñjom

(Mt. 27:1-2, 11-14; Mr. 15:1-5; Lc. 23:1-5)

²⁸ Jesic topta Jesús jém Caifás iticim. Nanicta jém palacio jut it jém Romapic gobernador. Tsuuytim. Joccuquej. Jém panij anjagooyiyaj da tigiyaj jém palacio porque ijisyajpa jém Israelpic pxiñtam siiga tigiyajpa jém Romapic pxiñtam iticjom, da tsíy juuts cuáyne, jesic da wíap icútyaj jém pascuasij wíccuy. ²⁹ Jeeyucmi put ipalacio jém Pilato, nic ançim iga íam jém Israelpic anjagooyiyaj. Nímayta jeeyaj:

—¿Tí quejaj inimiñ para yíp pxiñ?

³⁰ Jesic jém judíos injagooyiyaj icutsonyaj, nímaj:

—Meega da pimi mal iwatne yíp pxiñ, jesic da mançijunçodápa inçijom.

³¹ Jesic jém Pilato inímáy jeeyaj:

—Nassetami eybic jemíc, cipiñtaami con michtam ininquímayooyi.

Jesic nímajpa jém judíos:

—Da anaíta derecho iga anaccaatámpa ni tum pxiñ.

³² Iwatyajpa jempic iga cupacpa jém anmati jém nimnewip Jesús cuando inímáy jém icuyujciwiñ jutpic accaatap. ³³ Jesic jém Pilato tigiygacum jém palacio. Inwejay Jesús, inímáy:

—¿Que micham jém judíospic miRey?

³⁴ Jesic Jesús icutson jém gobernador, inímáy:

—¿Que mich iníyaac miñimpa jempic o tungac minmadayne iga ajapaap?

³⁵ Nimpa jém Pilato:

—¿Que ich ajudío? Jém michpic iníwítam, jém judíos, con jém panij anjagooyiyaj micijunçotyaj ich ançijom. ¿Tí mal inwatne?

³⁶ Jesic Jesús inímáy jém Pilato:

—Numa ich atsípa juuts anjagooyi, pero da ananjacpa jém pxiñtam juuts yíp naxyucmic anjagooyiyaj. Siiga ananjacpa juuts yíp naxyucmic anjagooyi, jesic anayajpa jém ampixiñtam iga odoy i waiñ acijunçot jém judíos icijom. Pero ich da ananjacpa juuts yíp naxyucmic anjagooyiyaj.

³⁷ Jesic jém Pilato inímáy jém Jesús:

—¿Que numa micham jém miRey?

Jesús icutson. Nimpa:

—Mich miñimpa iga ich aRey. Ich anay y amiñ yíp naxyucmi iga anañmadápa jém pxiñtam jém numapic anquímayooyi. Jesic itumpiy jém icupicyajpápic jém numapic anquímayooyi, imatonyajpa ti anañmadápa.

³⁸ Nimpa jém Pilato:

—¿Tí jém numapic anquímayooyi?

*Cijunçotta Jesús iga accataiñ
(Mt. 27:15-31; Mr. 15:6-20; Lc. 23:13-25)*

Jesic cuando yaj icwác jém Pilato, putgac anšicmi. Eybictim nic iñímáy jém judíos:

—Ni tum itánca da ampadáy yíp pxiñ. ³⁹ Pero iniitta tum costumbre iga cada pascuasij ançutsigáypa tum preso para mimichtam. ¿Jesic ti iñxunpa, inwianjamta iga ançutsigáypa jém judíos iRey?

⁴⁰ Jesic itumpiy de jeeyaj eybictim pimi jyyajpa. Nimyajpa:

—Odoy cutsigaayi yíp pxiñ. Cutsigaayi jém Barrabás.
Jém Barrabás tum númpaap.

19

¹ Jesic jém Pilato ipimíy isoldado iga imatsyajiñ jém Jesús y icótsyajiñ pimi con jém cótsóycuy. ² Jesic ocmi jém soldado ipicyaj apit, itacpa tum corona, iccámayyaj jém Jesús icobacyucmi. Iccámayyajtim tum yagats yooti moradopic. ³ Jém soldado ixaayiyajpa, icunúcyajpa Jesús, iñímayyajpa:

—Xutsóy, miRey de jém judíos.

Tsam icótsayyajpa iacpac.

⁴ Jesic jém Pilato eybic put anšicmi jém ipalacio. Iñímáy jém judíos:

—Ixtaami. Manamíñáy eybic yíp pxiñ iga manacjodónata iga da ampadáy ni tum itánca.

⁵ Jesic naputta Jesús jém palacio. Accámayñeta jém apit corona icobacyucmi. Accámayñeta tim jém yagats yooti moradopic. Jesic jém Pilato iñímáy jeeyaj:

—Yim it jém pxiñ.

⁶ Jesic cuando jém panij anjagooyiyaj con jém policia iixyaj jém Jesús, pimi jyyajpa, nimyajpa:

—¡Cunúntaami cunusyucmi! ¡Cunúntaami cunusyucmi!

Jesic Pilato iñímáypa jeeyaj:

—Nanictaami mimichtam. Cunúntaami cunusyucmi. Ich da ampadáy ni tum itánca.

⁷ Pero jém judíos iñímayyaj jém Pilato:

—Anaitta tum ananquímayooyi. Nimpa jém ananquímayooyi iga accataiñ jém pxiñ porque nimpa iga: “Dios aManic.”

⁸ Jesic jém Pilato mu imaton ti inmadayyaj, mástim cñ. ⁹ Jesic eybictim jém Pilato ininic Jesús jém palacio, eybic icwácpa, nímayta:

—¿Jutpic mipxiñ?

Pero Jesús da icutson.

¹⁰ Jesic Pilato iñímáy jém Jesús:

—¿Que mimich, da anjáyápa? ¿Da inñjodon iga ich anait jém autoridad iga mançunúnpa cunusyucmi y anaittim autoridad iga mançutsigáypa?

¹¹ Jesic Jesús iñímáypa jém Pilato:

—Mich da ti wiap anwadáy siiga da ijícpa anjatun Dios. Jém autoridad jém iniitwip mimich, michiñe jém anjatun Dios. Jeeyucmi jém acijunçotnewip mich inçijom más tñcaíy que mimich.

¹² Dende jesigam jém Pilato imétstip jutsap icutsigáy jém Jesús. Pero pimi jyyajpa jém judíos. Nimyajpa:

—Siiga inçutsigáypa yíp pxiñ, jesic da je miamigo jém emperador jém itwip Roma. Siiga tum pxiñ nacántap iga rey, jesic tsíypa iga jém emperador ienemigo.

¹³ Jesic cuando jém Pilato imaton ti iñimayyajpa jém p̄ixiñtam, eybictim itop jém Jesús jém palacio. Ininic an̄sicmi. Coñ jém Pilato jém coñcuyucmi juť c̄ip̄iñóypa. Jém lugar iñiyi Gabata. Jém hebreopic an̄matimi n̄imtooba jém piso juť w̄iwatnet̄a con jém tsa.

¹⁴ Iwatyajpa jempic como las seis de la mañana. Yíp jém jama antes que núcpa jém jejcuyjama, jeetim semana cuando wattap jém pascuas̄iñ. Jesic jém Pilato iñimáy jém judíos:

—Yim it jém iñRey.

¹⁵ Jesic p̄imi j̄iyajpa jém p̄ixiñtam. N̄imyajpa:

—¡Accaataami! ¡Accaataami! ¡Cunúntaami cunusyucmi!

Jém Pilato iñimáy jém p̄ixiñtam:

—¿Que iñxuntámpa iga an̄cunúnpa cunusyucmi jém iñRey?

Jesic jém panij an̄jagooyiyaj iñimayyajpa jém Pilato:

—Da anañta tuñgac más rey. Aichtam anrey jém emperador jém itw̄ip Roma.

¹⁶ Jesic ocmi jém Pilato ic̄iñ̄juncot Jesús jém soldado ic̄iñ̄jom iga cunúntañ cunusyucmi. Jeeyaj ininicyaj jém Jesús.

Cunúnta cunusyucmi jém Jesús

(Mt. 27:32-44; Mr. 15:21-32; Lc. 23:26-43)

¹⁷ Jesic nanict̄a Jesús. Accónnet̄a icunus. Nicpa jém lugar iñiyi jém Tsútscōbacpac̄cim. Iñiyit̄im Gólgota jém an̄matimi hebreo. ¹⁸ Jemum cunúnta Jesús cunusyucmi. Jeetim jama cunúntat̄im cunusyucmi tuñgac w̄isten p̄ixiñ. Pánayt̄a jém icunus tumtum cada lado. Cucmi tsíy jém Jesús icunus. ¹⁹ Jém Pilato iwat tum letrero iga accámayt̄añ jém Jesús ic̄obacan̄ticmi. Jaycámnet̄a: “Jesús jém Nazaretpic jém judíos iRey.” ²⁰ Jáyan jém judíos imayyajpa jém letrero porque juť cunúnnet̄a cunusyucmi jém Jesús, da juumi de jém atebet Jerusalén. Watnet̄awom jém letrero tres an̄matimi, jém hebreo, jém latín y griego. ²¹ Jém panij an̄jagooyi iñimayyaj jém Pilato:

—Odoy jaȳi iga: “judíos iRey”, jaȳi iga: “N̄impa yíp p̄ixiñ iga ich aRey de jém judíos.”

²² Pero jém Pilato iñimáy jém panijyaj:

—Como anjayñeum, tsíyñam juťpic anjayñe.

²³ Jesic jém soldado cuando icunúnneyajum jém Jesús cunusyucmi, itobayyaj itump̄iy jém Jesús ipuct̄ucu. Iwécyaj icucuatro jém soldado, pero jém iyooti tácneta icuyagats, da núnne. ²⁴ Jesic nanimayyajtap jém soldado:

—Da tanjactámpa yíp yooti, pero tammétstámpa por sorteo i icoñw̄íypa. Jeam im̄ichap yíp yooti.

Iwatyajpa jempic iga cupacpa jém an̄mati juuts jayñeta jém Dios in̄mati. N̄impa iga: “Jém p̄ixiñtam awégayyajpa ich ampuct̄ucu. Imétsyajpa por sorteo i icoñw̄íypa jém anyooti.” Jempam iwatyaj jém soldado.

²⁵ Juť cunúnnet̄a cunusyucmi Jesús, da juumi ittim iapa, con iapa iyom̄tiwi, it jém Malía jém Cleofas iwichomo y Malía Magdalena. ²⁶ Jesic cuando iix Jesús jém iapa y iixtim iga nocojom teñ tum jém icuyujc̄iwiñ jém tsampic itoypa, jesic iñimáy jém iapa.

—Miyomo, jempic it mich immanic.

²⁷ Jesic ocmi jém Jesús iñimáytim jém icuyujc̄iwiñ jém tsampic itoypa:

—Jempic it mich iñapa.

Jesic dende jém tiempo jém p̄ixiñ ininic jém Jesús iapa iticc̄im iga iwatpa cuenta.

Ca jém Jesús

(Mt. 27:45-56; Mr. 15:33-41; Lc. 23:44-49)

²⁸ Jesic ocmi ijodon Jesús iga cupacneum itumpiy jém iyoxacuy. Jesic iga cupacpa jém Dios inmati, jém jaychacnetawip, nimpa:

—Ich aníctitspa.

²⁹ Jemum it tum majcuy comne con jém tampic vino. Jesic algunos imujpa juuts tum puqui con jém vino, iccám tum waycuyucmi iga igucpa Jesús uxaj jém vino. ³⁰ Jesic iuc uxaj jém tampic vino, nim Jesús:

—Cupacneum.

Inquet icobac, put ianama, caum jém Jesús.

Tséyayta jém Jesús ipócpacañaca con lanza

³¹ Jesic yip jém jama antes que núcpa jém jejcuyjama. Jeetim jejcuy jama cuyajpa jém pascuasij, jeeyucmi jém judíos da iwianjamyaj iga tsíyyajpa jém tsúts cunusyucmi jém jejcuyjama. Jesic iwágayajpa jém Pilato iga ichiñ orde iga nácsnásquídáytañ jém iwítputy jém cunúnnetawip cunusyucmi iga ixtañ iga caaneum. Jesic wíap icquetyaj.

³² Jesic jém soldado nic iñácsnásquídáyay iwítputy jém wiñtipic pixiñ jém cunúnnetawip cunusyucmi con Jesús y ocmi jém tungac. ³³ Pero cuando núcyaj jut it jém Jesús, jém soldado iixyay iga caaneum. Jeeyucmi da iñácsnásquídáy jém iwítputy.

³⁴ Pero tum soldado ichéñay ipócpacañaca con lanza, jeeti rato putpa niipiñ y ni. ³⁵ Ich, jém ánixñewip ti iñasca jém Jesús, atsíy juuts testigo jém numapic iga incupictámiñ. Da mammigóyáypa. Ich anwijodon ti síp manañmadáy. ³⁶ Iwatyajpa jempic iga cupacpa jém anmati jut jayñeta jém Dios inmati. Nimpa iga: “Da i iquídáypa ni tum ipac.” ³⁷ Tungac parte nimpatim jém Dios inmati: “Jém pixiñ agui iámyajpa jém pixiñ jém tseñnetawip.”

Cumta jém Jesús

(Mt. 27:57-61; Mr. 15:42-47; Lc. 23:50-56)

³⁸ Ittim jem tum pixiñ iñiyi José, Arimateapic pixiñ. Icupicnetim Jesús, pero inyampa iga icupicpa porque tsam icijpa jém Israelpic anjagooyiyaj. Jesic cuando caaneum Jesús, jém José nic iwágáy permiso jém Pilato iga ininigáypa Jesús imijtay. Jém Pilato ichi permiso. Jesic jém José oy ipigáy imijtay, ininic. ³⁹ Sibatim jém Nicodemo, jém oyñewip iám Jesús tsuucim. Jém Nicodemo inimiñ cien libras jém pooti jém cñpaap, namotneta jém mirra con jém áloes. ⁴⁰ Jesic jém José y jém Nicodemo ininigáy jém Jesús imijtay. Iccámayaj jém pooti jém cñpaap, inmónayyay con wibic puctucu. Iwadáy itumpiy juuts jém Israelpic pixiñtam icostumbre cuando icumpa tum tsúts. ⁴¹ Jem jut cunúnta cunusyucmi jém Jesús it tum huerto. Jém huertojom it tum tsaajos yaguiñ watneta, jut cumtap tsúts. Pero da i queman icot ni tum tsúts jém tsaajosjom. ⁴² Noco it jém tsaajos. Jeeyucmi jém José y Nicodemo nic icodayyay jém Jesús imijtay jém tsaajosjom porque tsucumtoobam jém jejcuy jama iga jejyajpa jém judíos.

20

Pis jém Jesús

(Mt. 28:1-10; Mr. 16:1-8; Lc. 24:1-12)

¹ Jesic cuando nasneum jém jejcuyjama, jém tungagam jama, icuquejama, jém Malía Magdalena nic tsuuytim jém tsaajoscim. Piichinam. Mu iñúc, iix iga jopputnetawum jém tsa jém jos innúccuy. ² Jesic póyantsucum jém Malía, nic iám jém Peto y jém tungac icuyujcwiñ, jém tsampic itoypa Jesús. Jém Malía iñímáy jém wisten icuyujcwiñ:

—Topnetawum jém tánomi imijtay jém tsaajosjom, nanicnetawum. Da anjodon jut tsacta.

³ Jesic moj niqui jém Peto con jém tungac jém Jesús icuyujcwiñ. Nicayajpa jém tsaajoscim. ⁴ Poyimi nicayaj icuistic, pero jém tungac icuyujcwiñ más jicsciy nic que jém

Peto. Anjagóy miñúc jém tsaajosçim. ⁵ Jém mojnewiip nuuqui ámcúm jém tsaajosjom. Iix iga it no más jém wibic puctucu, jém Jesús inmónóycuy, pero da tigi y jém tsaajosjom. ⁶ Ocmim núc jém Peto, tuuñiañçim miñ. Tigi y jém tsaajosjom. Iixtim iga jemum it no más jém inmónóycuy. ⁷ Iixtim iga it jém icobacañmónóycuy, pacnetawum, tsacnetawum tum áñeymi. ⁸ Jesic tigi y mex jém tunçac icuyujçiwñ, jém mojnewiip nuuqui jém tsaajosçim. Iix iga da i jém Jesús imijtay, jesic icupic iga pisneum. ⁹ Porque danam icuti y yñeyaj jém Dios inmati jut jayñeta iga tienes que pisa jém Jesús de jut it jém caaneyajwiip. ¹⁰ Jesic jém wisten jém icuyujçiwñ setyaj eybic iticçim.

Iwiñquejáy Jesús jém Malía Magdalena
(Mr. 16:9-11)

¹¹ Pero tsíy jém Malía jém tsaajosañaca. Wejpa jém yomo. Iganam wejpa ámcúmpa jém tsaajosjom. ¹² Iix wisten jém siñyucmipic pixiñ. Agui popo ipuctucu. Jemum coñyay jut it idic jém Jesús imijtay. Tum coñ jut it idic icobac, tum coñ jut it idic ipuy. ¹³ Jesic jeeyaj icwácyajpa jém Malía. Nímayta p:

—Miyomo, çtiiga miwejpa?

Jesic nimpa jém Malía:

—Awejpa porque nanicnetawum jém ánomi imijtay y da anjodon jut tsagayñeta.

¹⁴ Cuando yaj jiyi jém Malía, ámsæt ituuñiañçim. Iix iga jemum teñ jém Jesús. Pero da icuti y ypa iga numa jeam jém Jesús. ¹⁵ Jesic Jesús iñímáy jém Malía:

—Miyomo, çtiiga miwejpa? çl immétsa?

Jém Malía da iixpicpa iga jeam jém Jesús, injampa iga je jém pixiñ jém iwatpáppic cuenta jém huerto. Jeeyucmi Malía iñímáy:

—Mimich, siiga ininicne jém ánomi imijtay, añmadaayi jut iñchacne, jesic nicpa ampic.

¹⁶ Jesic nimpa Jesús:

—¡MiMalía!

Jesic ámsæt jém Malía. Ijáy jém Jesús. Nímayta jém hebreopic añmatimi:

—¡Raboni!

Tanañmatimi nimtooba: MamMaestro.

¹⁷ Jesic Jesús iñímáypa jém Malía:

—Odo y atsici porque danam aquímne jut it anjatun Dios. Siip nigí añmadaayi jém tantiwitam, jém añcuyujçiwñ, iga aquímgacpa jut it jém anjatun y iñjatuntim mimichtam, hasta jut it ich anDios y iñdiosim mimichtam.

¹⁸ Jesic jém Malía Magdalena nic inmadáy jém Jesús icuyujçiwñ. Nimpa jém Malía:

—Ánixñeum jém tánomi.

Inmadáytim jeeyaj ti iñímáy jém Jesús.

Iwiñquejáytim Jesús jém icuyujçiwñ
(Mt. 28:16-20; Mr. 16:14-18; Lc. 24:36-49)

¹⁹ Jesic jém wiñtipic jama de jém semana, añtuumaneyaj tsuucim jém Jesús icuyujçiwñ tum ticjom. Wianpajnetá jém tic porque tsam icinyajpa jém judíos. Jesic jeeti rato iixyay iga jém Jesús iwaganaityajum icuyujçiwñ. Pero da i iix jut tigi y. Nimpa jém Jesús:

—¡Xutsóytam!

²⁰ Mu iñímáy Jesús, jesic inquejáy jém ici y ipócpacañaca jut coowane. Jesic icuyujçiwñ cuando iixyay jém tánomi, tsam pimi maymayyaj. ²¹ Jesic eybictim iñímáy Jesús:

—¡Xutsóytam! Juuts jém anjatun Dios acutsat yip naxyucmi iga añwatpa jém Dios iyoxacuy, jempictim mañcutsattampa mimichtam iga inwattamiñ jém Dios iyoxacuy.

²² Jesic cuando yaj inmadáy jempic jém Jesús, ixujpa jém icuyujçiwñ. Iñímáy:

—Pictson̄taami jém Dios iAnama. ²³ Siiga mimichtam iñyoxpátpa jém p̄ixiñtam iga jeeyaj inmadáypa Dios itánca, jesic wadaytap perdón jém itánca. Dam i ichiiba castigo. Pero siiga da iñyoxpátpa jém p̄ixiñtam iga inmadáypa Dios itánca, jesic da i iwadáypa perdón jém itánca.

Jém Tomax iix iga numa p̄isneum jém Jesús

²⁴ Pero jém Tomax tum de jém docepic icuyujc̄wiñ, jém iñiyitim Mechi, da i con los de más cuando núc jém Jesús jut it icuyujc̄wiñ. ²⁵ Jesic jém tungac icuyujc̄wiñ inmadayyaj jém Tomax ti iixñeyaj:

—Ánixñetámum jém tánQmi.

Pero jém Tomax iñímáy jeeyaj:

—Siiga da ánixáypa ici jut jetne con jém clavos y añcodáypa añwayci jut coowane y siiga da añcucompa añci jut tseñayñeta jém ipócpacañaca, jesic da añcupicpa.

²⁶ Jesic tungagam ocho día eybictim añtuumayaj jém Jesús icuyujc̄wiñ tum ticc̄im. Jesic itum mex jém Tomax. Iwianpajneyajtim jém tic. Jesic eybictim miñ Jesús, iwaganaityaj jém icuyujc̄wiñ. Da i iix jut tigy jém Jesús. Iñímáy jeeyaj:

—¡Xutsóytam!

²⁷ Jesic iñímáy jém Tomax:

—Miñi aámaayi jém añci. C̄oti inwayci jut coowane. Cuc̄omi in̄ci jut coowane jém ampócpacañaca. Ts̄aci iga da in̄cupicpa. Cup̄ici iga apisneum.

²⁸ Jesic jém Tomax iñímáy jém Jesús:

—¡MánQmi, manDios!

²⁹ Jesic Jesús iñímáy jém Tomax:

—Mich in̄cupicpa iga apisneum porque ánixñe. Pero tsam w̄itpa jém dapic ánixñeyaj, pero icupicyajpa iga apisneum.

Nimpa jém Xiwan tiiga ijay ȳip libro

³⁰ Jém Jesús tsam jáyan w̄itampic milagro iwat cuando iwaganait icuyujc̄wiñ. Pero da anjaycámne itumpiy jém milagro ȳip librojom. ³¹ Pero ȳimpic anjaycámneum iga in̄cupictámiñ iga Jesús je jém Cristo jém Dios iManic. Siiga in̄cupictámpa, jesic impictson̄támpa jém vida jém dapic cuyajpa jém tánQmi Cristo iñiyimi.

21

Iwiñquejáy Jesús siete jém icuyujc̄wiñ

¹ Jesic ocm̄im Jesús iwiñquejáy eybictim jém icuyujc̄wiñ jém laguna añaca jém Tiberias. Ȳimpic iwiñquejáy jém icuyujc̄wiñ. ² Iwaganaityaj jém Ximój Peto algunos jém Jesús icuyujc̄wiñ. It jém Tomax, iñiyitim Mechi, ittim Natanael jém Galileapic p̄ixiñ, ittim Zebedeo iman̄ictam con tungac w̄isten jém icuyujc̄wiñ. ³ Jesic jém Ximój Peto iñímáy jém icompañeroyaj:

—Nicpa at̄ipmach̄i.

Nimyaj jeeyaj:

—Anictámpatim. Tawaganicpa.

Jesic nicyaj, químyaj tum barcojom. Pero jém tsuu da ti imatsyaj ni tum t̄ipi. ⁴ Jesic cuquejtoobam, núc Jesús jém ni añaca. Pero jém icuyujc̄wiñ da iixpicyaj iga Jesús.

⁵ Jesic j̄iypa Jesús, iñímáy:

—¿Miwoñjaych̄ixtam, da iniifta t̄ipi?

Jeeyaj icutson̄yaj. Nimyaj:

—Da i.

⁶ Jesic jém Jesús iñímáy jeeyaj:

—Cotí jém iñred jém aṇwimipic lado de jém imbarco. Jemum immatspa jém t̄ipi.

Jesic icotyaj jém ired y tsam jáyan t̄ipi imatsyaj. Da wiaṇ itopyaj jém ired porque tsam jáyan t̄ipi imatsyaj. ⁷ Jesic jém Jesús icuyujc̄wiñ, jém tsampic itoypa, iñímáy jém Peto:

—Yíbam jém tánomi.

Jesic cuando jém Peto imaton iga tánomi, icot iyooti, porque iccáyñe idic iga t̄ipmatspa. Quet jém barcojom, tigiy n̄icim jém Peto iga nicpa íam jém Jesús. ⁸ Jesic los de más jém Jesús icuyujc̄wiñ inimiñyaj jém barco hasta playa aṇṇaca. Ijicneyaj jém red comne de t̄ipi, porque da juumi jém playa como cien metros. ⁹ Cuando putyaj aṇsicmi, ipátyaj juṭ acnúcnetá jucti. Iixyaj iga s̄ip ijaasta t̄ipi juuyjom, ittim caxtánañi. ¹⁰ Jesic Jesús iñímáy icuyujc̄wiñ:

—Namiñi algunos jém t̄ipi jém yaguiñpic immatsta.

¹¹ Jém Peto quim jém barcoyucmi, iwij jém ired, moj ijic aṇsicmi. Comne jém red con mijtampic t̄ipi. Ityaj ciento cincuenta y tres. Tsam jáyan t̄ipi, pero da jac jém red. ¹² Jesic Jesús iñímáy jém icuyujc̄wiñ:

—Miñi miwiiquitam.

Ni tum de jém icuyujc̄wiñ da icwácayaj iga: “¿Miiapaap?” Porque iñuntawijodon iga tánomi. ¹³ Jesic Jesús icunúc, ipic jém caxtánañi icijjom, ichi icuyujc̄wiñ, jesaptim iwat con jém t̄ipi.

¹⁴ S̄ip tres vecesam iwiñquejáy Jesús jém icuyujc̄wiñ dende pisne.

Aṇmatyajpa Jesús con jém Peto

¹⁵ Jesic yaj wiiquiyaj, jém Jesús icwác jém Peto. Nímayta:

—MiPeto, jém Jonás mimanic, ¿que mich más antoypa que jém tungac aṇcuyujc̄wiñ?

Jesic Peto icutson. Iñímáy jém Jesús:

—Numa, mánomi, mich iñjodon iga tsam mantoypa.

Jesic Jesús iñímáy jém Peto:

—Acwiici jém ammañborregoyaj.

¹⁶ Jesic eybictim icwácpa Jesús jém Peto. Nímayta:

—MiPeto, jém Jonás mimanic, ¿que tsam antoypa?

Jém Peto icutson. Nimpa:

—Numa, mich iñjodon iga tsam mantoypa.

Jesic Jesús iñímáy:

—Wati cuenta jém amborregoyaj.

¹⁷ Jém Jesús túcciyam icwácpa jém Peto. Nímayta:

—MiPeto, jém Jonás mimanic, ¿que tsam antoypa?

Jesic jém Peto tsam anyác porque tres vecesam icwácpa siiga itoypa, jesic iñímáy jém Jesús:

—Mánomi, mich iñjodon itumpiy cosa. Iñjodonjim iga mantoypa.

Jesic Jesús iñímáy jém Peto:

—Acwícyaji jém amborregoyaj. ¹⁸ Numa mannímáypa iga cuando danam michami, jesic inçotpa iñyaac jém iñyooti y miñicpa juṭ mich iñxunpa. Pero cuando michamim, jesic iññimpa inçi y tungac miccámáypa iñyooti. Mininicpa juṭ mich da miñictooba.

¹⁹ Nimpa jempic Jesús iga icjodonap juṭpic accaatap jém Peto iga cujíptaiñ Dios. Jesic Jesús iñímáy jém Peto:

—Atúnñiyi.

Jém Jesús icuyujc̄wiñ jém tsampic itoypa

²⁰ Jesic ámsētpa jém Peto, iix iga itúñíypa jém tuṅgac jém Jesús icuyujc̄iwiñ jém tsampic itoypa, jém ip̄tsnew̄iip cuando wagawícyajpa jém pascuas̄iṅ. Jeetim p̄ixiñ jém icwácnew̄iip Jesús iga: “¿I miwadáypa atraición?” ²¹ Cuando Peto iix iga itúñíypa jém p̄ixiñ, jesic iñímáypa jém Jesús:

—Mán̄omi, ¿t̄i iñascaaba ȳip p̄ixiñ?

²² Jesús icutson̄. Nímaytap̄ jém Peto:

—Siiga ich ansunpa iga da caaba ȳip p̄ixiñ hasta amiñgacpa, ¿jesic mich iñticut̄iḡiyi? Mich atúñ̄iyi.

²³ Núc jém aṅmati jut̄ it̄ jém icupicneyajw̄iip Jesús, waṅpa iga da caaba jém tum̄ jém icuyujc̄iwiñ, jém tsampic itoypa. Pero Jesús da nim iga da caaba jém p̄ixiñ. Nim iga: “Siiga ich ansunpa iga da caaba ȳip p̄ixiñ hasta amiñgacpa, ¿jesic mich iñticut̄iḡiyi?”

²⁴ Icham jém aXiwan jém tsampic atoypa jém Jesús, jeeyucmi wiap̄ manañmadáy ȳipyaj cosa. S̄iip anjaycámpa librojom. Anjodoṅ iga da je miḡooyi.

²⁵ Ityaj jáyaṅ cosa más jém iwatnew̄iip Jesús. Siiga jaycámtap̄ itump̄iy cosa juuts iwatne Jesús, ich animpa iga icuw̄iti ȳip naxyucmi da cut̄iḡiyyajpa jém libro. Jemum cuyaj.

Ti iwatyaj jém Apóstolyaj

Jesucristo ijycunúc iga icutsatpa Dios iAnama

¹ Mánamigo Teófilo, jém wintipic toto manjáyáy titam iwat Jesús y titam inquej dende wiñti ² hasta jém jama cuando quíngacpa sñyucmi. Antes que quíngacpa sñyucmi inquejáy jém apóstolyaj, jém icupinewiip, ti wiap iwatyaj. Inquejáy con jém Dios iAnama. ³ Jesic cuando yaj iñasca jém yaachaji iga mu iccaata, iwiñquejáy eybic jém icuyujcwiñ iga vivo. Cuarenta jama iwiñquejáy jém ipixiñtam wati veces iga iixyajiñ iga da caane. Inmadáy jutsap injac Dios jém ityajwiip yíp naxyucmi.

Jesús químpa sñyucmi

⁴ Tum jama cuando antuumaneyajum jém icuyujcwiñ, jém Jesús inquím iga odooy putyajiñ jém attebet Jerusalén. Iñimáy iga:

—Anjooci hasta que cupacpa juuts mijycámayñe jém tanjatun Dios juuts ich mannímayñe. ⁵ Mannímáy iga jém Xiwan acchíróypa con ni, pero da jáypa michiitamtap jém Dios iAnama.

⁶ Jesic jém antuumaneyajwiip icwácyaipa jém Jesús:

—¿Que yípti rato moypa ininjac yíp tannaxyucmi Israel?

⁷ Jesús icutson, iñimáy:

—Michtam da wiap injodónata jucha ni júp jama iwatpa jém tanjatun Dios, iwatpa con ipimi juuts je ixunpa. ⁸ Pero mimichtam impictsonátampa jém Dios ipimi. Michiitamtap jém Dios iAnama iga wiap ininmadáy jém pxiñtam titam iñix iga ich anwatne. Moypa ininmatta Jerusalén, icuwíti jém naxyucmi de Judea, hasta jém naxyucmi de Samaria, y hasta más juumi, icuwíti de yíp naxyucmi.

⁹ Cuando yaj inmadáy jém icuyujcwiñ, naquímta Jesús sñyucmi. Iganam síp iámyaj, ucsitogoy. Dam i más iix. ¹⁰ Iganam iámyajpa jut químpa Jesús sñyucmi, jeeti rato miñ iwaganateñ wisten pxiñ, agui popo ipuctucu. ¹¹ Iñimáy:

—MiGalileapic mipixiñtam, ¿tiiga miámquímnetta sñyucmi? Yíptim Jesús, jém químnewiip sñyucmi, jempictim miñgacpa eybic.

Cupința jém Matías iga tsíyiñ juuts jém Judas

¹² Jesic setyaj Jerusalén de jém cotsic iñiyi Olivos. Ijuumi juuts nimpá jém ley iga wiap tanwiít tum jejcuy jama. ¹³ Cuando núcyaj jém attebet Jerusalén, químyaj jém yucmipic piso. Tigiyay jém cuarto jém iñúcsneyajwiip. Jemum ittim Peto, Jacobo, Xiwan, Anti, Felipe, Tomax, Bartolo, Mateo, jém tunjac Jacobo jém Alfeo imaníc, Ximoz Zelote y Judas jém Jacobo itíwi. ¹⁴ Antuumaneyaj iga seguido iwatyajpa oración con tumti ijixi. Jemum ittim jém yomtam; jém Malía, jém Jesús iapa con Jesús itíwítam.

¹⁵ Jesic tum jama iganam antuumaneyaj, teñchucum jém Peto jém pxiñtámanjom, ityaj jem como ciento veinte. Nimpá jém Peto:

¹⁶ —Mimichtam mantíwítam, tienes que cupacpa jém Dios inmatí juuts nim jém David cuando inquejáy jém Dios iAnama ti miñpa. Inmatpa iga jém Judas icijunçotpa jém Jesús iga matstaiñ. ¹⁷ Jém Judas it idic con aichtam jém docepic jém Jesús icuyujcwiñ. Tanwaganayoxatampa idic. ¹⁸ Juyta tum jaca nas con jém tumiñ jém icoñwiyñewiip iga imalwadáy jém Jesús. Ocmi mutsneactin, tojansaj ipuu, cupudáy. ¹⁹ Cuando ijodónayaj ti iñasca jém Judas, jém Jerusalénpic pxiñtam icniyayaj jém nas Acéldama. Jeeyaj inmatimi nímtooba jém nas jém niipiñ chowa. ²⁰ Porque nimpá jém Salmojom jut jayñeta:

Da oomíy_{pa} ichíy jém iñas.

Da i nicpa iti jem.

Nimpatim:

Tungac tsíy_{pa} iga iwatpa jém iyoxacuy.

²¹ Jesic nimpatim jém Peto:

—Siip tançupin_{pa} tum de jém tanwaganaitw_{ip} seguido cuando siiba tán_{omi} Jesús con taichtam, ²² dende icchin jém Xiwan hasta químgac Jesús sinyucmi. Tum de taichtam tsíy_{pa} juuts tum testigo iga numa pisneum jém tán_{omi} Jesús de jut it jém caaneyajw_{ip}.

²³ Jesic cupin_{ta} wisten de jeeyaj. Tum jém José, iñiyi Barsabás, iñiyitim Justo. Jém tungac iñiyi Matías. ²⁴ Jesic los demás inwejpátyajpa Dios. Nimyajpa:

—Mán_{omi}, mich iñixpigáy_{pa} itumpiy jém pixiñtam ianama. Anquejaayi juppíc de yíp wisten mich incupin ²⁵ iga iwadiñ jém yoxacuy juuts jém apóstolyaj jém incutsatnew_{ip}. Togoy jém Judas iga tsam imalwat. Nic jut ipictson_{pa} jém icastigo.

²⁶ Jesic iwatyajpa tum sorteo. Icoñwíy jém Matías, cupineta. Accámta con jém once apóstolyaj.

2

Quando miñpa jém Dios iAnama

¹ Cuando núc jém jama de pentecostés, antuumaneyaj tumti lugar itumpiy jém icupicneyajw_{ip} Jesús. ² Jeeti rato imaton_{yaj} tum mijpic anjyiyi sinyucmi juuts tum mijpic sawa. Tsam pimi jupa. Tigiy jém injyiyi ticjom jut coñy_{yaj} jeeyaj. ³ Jesic iixy_{yaj} jáyañ juctianquiñi. Nawécta jém juctianquiñi, núcyaj cada tumtum jém pixiñtam icobacyucmi. ⁴ Ipictson_{yaj} jém Dios iAnama, tsam iniit ianamanjom. Mojpa inmat tungac anmatimi juuts ipimíy_{pa} jém Dios iAnama.

⁵ Jém tiempo antuumaneyaj Jerusalén jém Israelpic pixiñtam iga iwatyajpa juuts jém icostumbre iga ijisyajpa Dios. Miñneyaj de itumpiy nación icuwiti yíp naxyucmi.

⁶ Cuando imaton_{yaj} iga tsam pimi jupa, antuumaneyaj itumpiy jém pixiñtam. Tsam cinyaj, da icutiyyiy ti iwatyajpa porque cada tumtum imaton iga jiyayajpa jeeyaj inmatimi. ⁷ Tsam ipooñanjamyaj, ámanjacyaj. Nanímayyajt_{ap} entre jeeyaj:

—¿Que da itumpiy jém siippic jiyayajpa Galileapic pixiñtam? ⁸ ¿Junim ammaton_{támpa} iga jiy_{pa} annuntaanmatimi? ⁹ Yim ittim jém pixiñtam de tungac naxyucmi. Miñneyaj de jém naxyucmi de Partia, de Media, de Elam, de Mesopotamia, de Judea, de jém naxyucmi de Capadocia, de jém Ponto y de jém naxyucmi de Asia. ¹⁰ Ittim de Frigia, de Panfilia, de Egipto y de jém naxyucmi de África jém más juumipic de Cirene. Ittim jém Romapic pixiñtam jém yaguiñpic miñne. Ittim jém nunta Israelpic pixiñtam y jém tungacpic pixiñtam jém mo_wip icupic jém judíos inquímayooyi. ¹¹ Ittim jém pixiñtam de Creta y de Arabia. Ammaton_{ta} aichtampic ananmatimi iga anmadayyajpa jém wítampic cosa jém tawadayñew_{ip} Dios.

¹² Itumpiy agui ipooñanjamyaj. Da icutiyyiy ti wi_{ap} ijisyaj. Nacwácyajt_{ap}:

—¿Yíp ti nimtooba?

¹³ Pero tungac ixaayiyayajpa. Nimpa:

—Yípyaj uquiyaj.

Ti iñímáy Peto jém pixiñtam

¹⁴ Pero jém Peto teñchucum con jém once apóstolyaj. Pimi jiy. Iñímáy jém antuumaneyajw_{ip}:

—Mi Judeapic mipixiñtam con inñumpiy jém miittanwip Jerusalén, wijodónataami ti mannímáypa. Maton̄taami. ¹⁵ Yíp p̄ixiñtam da uquiyaj juuts michtam inñjstámpa porque yaguiñ tait a las nueve de la mañana. ¹⁶ Iwatyajpa jempic porque asíam n̄impa jém wiñicpic profeta jém Joel:

¹⁷ Jém in̄an̄pigam jama, n̄impa Dios, anchiiba ánAnama jém p̄ixiñtam. Michtam in̄jayman̄ictam y jém in̄yomman̄ictam in̄matyajpa ich anan̄mati. Jém woñjaychixtam iixyajpa poñ. Jém w̄idaytam mawíñayajpa.

¹⁸ Anchiiyajpa jém ánAnama jém acuyoxayajpáppic jém p̄ixiñtam y jém yomtam iga in̄matyajpa ich anan̄mati.

¹⁹ S̄inyucmi manan̄quejáypa jém impooñan̄jampáppic jém dapic oypa in̄ix. Naxyucmi manan̄quejáypatim seña. Jém seña juuts n̄ipiñ, juuts jucti, juuts ucsjoco.

²⁰ Jém jama p̄ichpa ichoca, jém p̄oya tsíypa juuts n̄ipiñ antes que núcpa jém jama iga miñpa jém in̄omi. Jesigam agui w̄iquejpa jém Dios ip̄imi.

²¹ Jesic tan̄Jatun̄ Dios iciacputpa itumpiy jém in̄wejpátyajpáppic jém tánomi in̄iyimi.

²² N̄imtim jém Peto:

—Mi Israelpic mipixiñtam, amatónaytaami ti mannímáypa. Tsam w̄iquejpa mimichtaman̄jom iga Dios icutsat jém Jesús jém Nazaretpic p̄ixiñ. Dios ichi ip̄imi iga w̄iap iwat jém dapic oypa tánix, jém w̄ibic milagro y jém seña. Michtam in̄wijodon̄tam. ²³ Pero michtam da in̄wadáy caso iga Dios icutsat jém Jesús. In̄c̄ijun̄cotta jém enemigo ic̄ijom. In̄asca jempic porque dende wiñigam ixunpa Dios iga mimichtam in̄c̄ijun̄cottámpa jém malopic p̄ixiñtam ic̄ijom iga accaatañ cunusyucmi. ²⁴ Pero Dios ic̄pis. Iciacput. Porque da w̄iap iga caaneeba ichiy. ²⁵ Jém wiñicpic an̄jagooyi David in̄matpa de Jesús cuando n̄impa:

Siempre ánixpa jém ánomi an̄wiñjom.

Awaganait aich iga odoy ac̄in̄iñ.

²⁶ Jeeyucmi ich agui amaymay án̄anamañjom.

Anan̄matpa jém w̄ibic an̄mati porque agui amaymay.

Jeeyucmi da ac̄in̄pa iga acaaba porque an̄jodon̄ iga ap̄ispa.

²⁷ Man̄Jatun̄ Dios, mich da in̄chacpa án̄anama jém lugar jut it jém caaneyajw̄ip.

Datim in̄j̄icpa iga p̄ucpa im̄jtay jém micuyoxapáppic jém Cuáyñew̄ip iAnama.

²⁸ Anan̄quejáy jém tun̄ jém anan̄icpáppic jut amp̄icton̄pa jém vida.

Agui amaymay iga n̄icpa awagaīti con mimich.

Jempam n̄impa jém David cuando in̄matpa de Cristo.

²⁹ Jesic n̄imtim Peto:

—Mant̄iwitam, tsam w̄iquejpa iga caaneum jém tan̄jatun̄wewe David, cumta jém tsaajosjom. Hasta s̄ip yim it jém tsaajos. ³⁰ Pero jém David tum̄ jém Dios in̄matc̄iwiñ idic. Ijodon̄ iga Dios in̄ycámayñe iga tum̄ jém iocman̄ic, jém naypáppic ocmi, jeam jém Cristo. Tsíypa juuts jém más mijpic an̄jagooyi. ³¹ Jém David iixñe ti miñpa dende wiñigam. In̄matpa iga p̄ispa jém Cristo. N̄impa iga jém in̄anama da tsíypa jut it jém caaneyajw̄ip, jém im̄jtay da p̄ucpa. ³² Yiptim Jesús ic̄pis jém tan̄Jatun̄ Dios. Aichtam antump̄iytam ánixñeta. Jeeyucmi atsíyta juuts testigo. ³³ Ocmi nan̄icta s̄inyucmi jém Dios in̄w̄imi. Ip̄icton̄ jém Dios iAnama juuts in̄ycámayñe in̄jatun̄. Jém s̄ippic in̄ix y immaton̄ne, jeetim Dios iAnama iwat.

³⁴ Porque da je jém David quim̄ s̄inyucmi, pero n̄im jém David:

Jém tan̄Jatun̄ Dios in̄ímáy jém tánomi Cristo:

“Miñi micoñi anan̄w̄imi,

³⁵ hasta que ich manaccoñwíypa jém iñenemigo.”

³⁶ MiIsraelpic mipixiñtam, wijodónataami iga yiptim Jesús, jém michtampic inçunúnta cunusyucmi, Dios iccám jém tánQmi y jém Cristo.

³⁷ Cuando mimatonjaj ti nimpa jém Peto, agui anyácyaj ianamanjom jém pixiñtam. Tsam icwácyajpa jém Peto con jém tungac apóstolyaj. Iñimayyajpa:

—Mantiwitam, ¿ti wiap anwatta?

³⁸ Jesic ocmi jém Peto icutson. Iñimáy:

—Cucactaami iñjixi. Chinjaami cada tumtum de mimichtam jém Jesucristo iñiyimi iga Dios miccáyáypa jém iñtánca. Jesic Dios michiiba jém iAnama. ³⁹ Wiñigam Dios ijycámayñe iga miwíwadáypa mimichtam y jém immanictam. Iwíwadáypatim jém ityajwip juumi con itumpiy jém iwianjamyajpáppic jém tanJatun Dios iga inwejáypa.

⁴⁰ Jém Peto inmadáypa jáyan anmafi. Tsam pimi inquímpana jém pixiñtam. Iñimáy:

—Pictsonjajtaami yíp wibic anmafi iga miciaçputtamta iga da inwagananicpa jém togoñeyajwip.

⁴¹ Jesic jém ipictsonnewip jém wibic anmafi acchinjajta. Jeetim jama tsam jáyan tigiyñeyaj, como tres mil pixiñtam. ⁴² Seguido icuyujcayajpa juuts inquejayñe jém apóstolyaj. Nawinanigayyajta itumpiy de jeeyaj. Inwejpátyajpa Dios. Antuumayajpa iga iwécyajpa jém caxtánañi.

Iwinascayajpa jém wiñtipic icupicneyajwip Cristo

⁴³ Cada tumtum de jeeyaj tsam icinpa Dios. Jém apóstolyaj iwatyajpa jáyan jém milagro y jém seña. ⁴⁴ Itumpiy jém icupicneyajwip Cristo ityaj de acuerdo. Titam iniityaj icumunmichiyaj. ⁴⁵ Imayyajpa titam iniityaj. Iwécyajpa jém tumiñ, ichiijaypa jém dapic iniityaj iga ijuypa titam itogóyay. ⁴⁶ Cada jama antuumayajpa jém mijpic masticjom con tumti ijixi. Iwécyajpa jém caxtánañi tic por tic. Wagawícyajpa. Agui maymayyaj. Wibic jixi iniityaj jém ianamanjom. ⁴⁷ Tsam icujípyajpa Dios. Jém dapic icupicpa Cristo iwixiyajpa jém icupicneyajwip Cristo. Cada jama jém tanJatun Dios inimiñpa jém pixiñtam jém iciaçputpáppic iga más jáyanap jém icupicneyajwip.

3

Açpista tum cuxuj

¹ Tum jama nicayajpa jém Peto y Xiwan jém mijpic masticjom. Nicpa iwat oración a las tres de la tarde, jesigam jém hora de oración. ² Jesic tsacta tum cuxuj jém mastic anñaca. Je cuxuj mu iñay. Nanicta tum jém puerta inñaca iñiyi jém Wibic Puerta. Jemum tsacta cada jama iga iwágayñ tumiñ jém tigiyajpáppic jém mijpic masticjom. ³ Cuando jém cuxuj iix iga tigiyajpa jém Peto y jém Xiwan, iwágay tumiñ. ⁴ Jesic jém Peto y Xiwan iámmatsyaj jém cuxuj. Jém Peto iñimáy jém pixiñ:

—Aámmatsi.

⁵ Jém cuxuj icupic, iámmats jém Peto. Ijispá iga ichiiba tumiñ. ⁶ Pero Peto iñimáy:

—Da anaj plata ni oro, pero manchiiba jém anaitwip. Jém Jesucristo de Nazaret iñiyimi mannimáypa: Tsucumi. Witim.

⁷ Ocmi jém Peto imatsáy ici, jém inwimipic, ijictsucum. Jeeti rato witsíyum jém cuxuj ipuy. ⁸ Teñchucumum jém cuxuj, yóyquímpana, mojum witi. Tigiy jém masticjom con jeeyaj. Witpa, yóyquímpana, icujíppa tanJatun Dios. ⁹ Itumpiy jém pixiñtam iix jém cuxujpic idic iga witpam y icujíppa Dios. ¹⁰ Iixpicayajpa iga jeetim jém pixiñ jém iwáçpáppic tumiñ jém masticanñaca juñ it jém Wibic Puerta. Agui tñeanjacyaj, agui ipooñanjamyaj cuando iix ti iñasca jém pixiñ.

Titam injat jém Peto jém corredor de Salomón

¹¹ Jesic jém cuxuj, jém acpisnetawwip, da ichactooba jém Peto y Xiwan. Poyimi miñyaj jém pxiñtam, anuumayajpa jém Salomón icorredor jut ityaj jém Peto y Xiwan. Agui ámanjacyaj. ¹² Cuando iix iga agui anuumayajpa jém pxiñtam jém Peto iñímáy:

—MiIsraelpic mipixiñtam, ¿tiiga ampoonanjamtampa, tiiga agui anámtampa? ¿Que mich iñjis iga ich anacpis yíp pxiñ iga wíap anacwit con ich ampimi? ¿Que iñjisa iga tsam wibic apixiñ? Odoy jisi jempic. Porque Dios icpis. ¹³ Jém wiñicpic tanjatunwewetam jém Abraham, jém Isaac y jém Jacob tsam ijsiyajpa tanjatun Dios. Jeetim Dios siip iwat así iga tanjupitamiñ jém iManic Jesucristo, jém michpic injiunçotta jém anjagooyi ichjom iga accaataiñ. Cuando jém Pilato icutsigaytooba idic, mimichtam da iñjicta. ¹⁴ Da iñjicta iga cutsigaytaiñ jém wibic pxiñ jém dapic táncay. Pero inwácta iga cutsigaytaiñ tum accaoyap. ¹⁵ Jempam iniccaata jém tachiipáppic jém tamvida. Pero Dios icpis de jut it jém caaneyajwip. Aichtam atsiyta juuts atestigo iga numa pisneum. ¹⁶ Yiptim Jesús iñiyimi acpista yíp pxiñ jém siipic iñix, michtam iñixpicta. Witsiy porque icupic iga jém Jesús wíap iyoxpát. Iñasca así jut iñámpacneta.

¹⁷ Mantiwitam, anjodon iga immalwadáy jém Jesús porque da incutiyiy iga Dios icutsat. Datim icutiyyiyaj jém ininjagooyitam. ¹⁸ Itumpiy jém wiñicpic Dios inmatciwiñ ninyaj iga tienes que yaachwattap jém Cristo jém icutsatnewwip Dios. Siip Dios iccupacneum juuts ninyaj jeeyaj. ¹⁹ Jeeyucmi manímáypa: Cucaci iñjixi, tsaci iga immalwatpa, jesic jém tanjatun Dios miccáyaypa jém iñtánc. Michiiba tum wibic maymáyaj iñanamanjom, ²⁰ micutsadáypa jém Cristo jém icupiñnewwip dende wiñigam para mimichtam. ²¹ Siip nic iti sinyucmi jém Jesucristo. Jenum tsiy hasta que iwitsacpa itumpiy cosa juuts nim jém wiñicpic anmatciwiñ jém cuáynewwip. ²² Jempigam iñímáy Moisés jém wiñicpic tanjatunwewetam: “Jém tanjatun Dios ictsucumpa tum jém profeta entre mimichtam juuts acutsat aich. Matonjaami itumpiy titam miñímáypa jém profeta. ²³ Porque itumpiy jém dapic iwadáypa caso yíp anmatciwiñ iga icupicpa, actogoytap, toptap de jém nación de Israel.”

²⁴ Itumpiy jém wiñicpic anmatciwiñ dende jém Samuel hasta siip, inmatyajpa iga iwatpa Dios juuts tánixpa siip. ²⁵ Mimichtam injatunwewetam jém wiñicpic anmatciwiñ. Dios ijiycámáy iga miwíwadáypa. Iwat tum trato con jém wiñicpic tanwewetam cuando iñímáy jém Abraham así: “Tum jém mich immanic tsam iwíwadáypa itumpiy jém pxiñtam icuwiti yíp naxyucmi.” ²⁶ Cuando Dios icpis jém iManic Jesucristo, wiñti micutsadáy iga miwíwadáyñ mimichtam. Ixunpa Dios iga iñchaguiñ iga immalwatpa cada tumtum de mimichtam.

4

Nanicta jém Peto y Xiwan jém anjagooyi iwiñjom

¹ Iganam jém Peto y Xiwan inmadayajpa jém pxiñtam, miñyaj jém panijyaj. Wagamiñyaj con jém policía icomandante y con jém saduceoyaj. ² Tsam jóyñeyaj porque jém Peto y Xiwan inquejáya jém pxiñtam iga acpistap jém caaneyajwip porque pisneum jém Jesús de jut it jém caaneyajwip. ³ Ocmi matsta jém Peto y Xiwan, cotta cárcel porque tsuuyim. Hasta icuquejama cipiñtap. ⁴ Pero tsam jáyan jém imatonneyajwip jém Peto inmati icupicyaj jém Cristo. Jeetim jama icupicyaj como cinco mil pxiñtam.

⁵ Icuquejama anuumayaj Jerusalén jém Israelpic anjagooyiyaj, con jém wídaytam, con jém escribaspic maestroyaj. ⁶ Ittim jém Anás jém cobacpic panij anjagooyi. Ittim jém Caifás, jém Xiwan, jém Alejandro y itumpiy jém cobacpic panij itiwitam. ⁷ Jesic cutsatta jém policía iga inimíññ jém Peto y Xiwan jém anjagooyiyaj iwiñjom. Acwácta:

—¿I ipimimi, i iñiyimi inwatpa jexpic cosa?

⁸ Jesic Peto tsam iniit jém Dios iAnama. Iñímáy:

—Mananjagooyítam, miIsraelpic miwídaytam, ⁹ mich anacwácpa jutsa mu iwíwadayta jém cuxujpic idic, jutsa micpístá. ¹⁰ Siip mananmadáypa michtam inwiñjom iga itumpiy jém Israelpic pixiñtam ijodónayajiñ iga Jesucristo icpis yíp pixiñ yimpic it inwiñjom. Acpístá jém Jesús iñiyimi, jém Nazarepic. Jeetim pixiñ mimichtam incunúnta cunusyucmi. Pero Dios icpis de jut it jém caaneyajwip. ¹¹ Yíptim Jesús tsíy juuts tum wibic tsa para jém tic. Pero michtam, jém miticwattampáppic, impatsaytip. Pero siip yíptim tsa imatspacne jém tic. ¹² Da i tungac wiapaap taciapcut icuwiti yíp naxyucmi. Dios da icutsat tungac pixiñ iga taciapcutpa.

¹³ Jém anjagooyiyaj agui ipoñanjamyaj porque iix iga da cñpa inmat jém Peto y Xiwan. Icutiyiyay iga da cuyujne, siiba juuts cualquier pixiñ. Jesic icutiyiyay iga jáy iwaganasi jém Jesús. ¹⁴ Iixyajtim iga iwaganateñ jém cuxujpic idic, jeeyucmi da wiap iñim iga migooyi. ¹⁵ Quebacputtá jém Peto y Xiwan con jém cuxujpic idic iga jém anjagooyiyaj waiñ ijisyaj ti wiap iwatyaj. ¹⁶ Jesic nanímayyajtá entre jeeyaj:

—¿Ti wiap tanwat con yíp pixiñtam? Porque itumpiy jém ityajwip Jerusalén iwíjodon iga iwat tum wibic milagro. Da wiap tanayam. ¹⁷ Pero iga odom más juumi niguiñ yíp anmati, jesic tannímáypa iga: Manchiiba tum mijpic castigo siiga seguido ininmatpa yíp Jesús iñiyimi.

¹⁸ Jesic ocmi anwejaytá jém Peto y Xiwan jém anjagooyicim. Nímayta:

—Odoy más anmati jém Jesús iñiyimi. Odoy anmadaayi jém pixiñtam jexpic anquímayooyi.

¹⁹ Pero jém Peto y Xiwan iñímáy jém anjagooyi:

—Jistaami michtam iñyaac siiga más wi iga mancupicpa mimichtam o iga ancupicpa Dios. ²⁰ Aichtam da wiap antsacta iga ananmattámpa ti ánixñe y ti ammatonje.

²¹ Jesic eybic iñímayyaj jém anjagooyi iga ichiiba castigo siiga da ichacpa iga inmatpa. Pero da i wiá michi castigo porque itumpiy jém pixiñtam tsam icujípyajpa Dios porque iix ti iñasca jém cuxujpic idic. Ocni cutsigaytá jém Peto y Xiwan. ²² Jém pixiñ jém wadayñetawip jém milagro, jém acpisnetawip, iniitum más de cuarenta iamtiy.

Jém icupicneyajwip Jesús iwágayyajpa Dios iga iyoxpádiñ

²³ Cuando cutsigayñetawum jém Peto y Xiwan, nicyaj jut it icompañeroyaj. Inmadáy itumpiy titam iñímayyaj jém panij anjagooyiyaj y jém Israelpic wídaytam. ²⁴ Cuando imatonjay ti iñímáy jém Peto, itumpiy jém Jesús icuyujcwiñ con tumti jixi moj inwejpátyaj Dios. Nímayjpa:

—Manjatun Dios, mich inwat jém siñ, jém nas, jém lamar y itumpiy jém itwip yim. ²⁵ Wiñigam jém incuyoxapaap jém David ijaychac mich ininmati. Mich iñAnama iyoxpát iga ijay. Iñímáy:

¿Tiiga tsam jóyñeyaj jém naciónyaj jém dapic icupicyajpa Dios?

¿Tiiga tsam ijsquímpa jém pixiñtam jém cosa da para ti wi, jém dapic i iyoxpátpa?

²⁶ Antuumayaj jém reyyaj con yíp naxyucmipic anjagooyi.

Nicyaj en contra de jém tanjatun Dios,

nicyaj en contra de jém Cristo jém icutsatnewip Dios.

²⁷ Numa antuumayaj yíp Jerusalén jém Herodes y jém Poncio Pilato, jém tungac pixiñtam jém dapic je de Israel con jém Israelpic pixiñtam. Nicyajpa en contra de jém wibic imManic Jesús jém michpic iniccám iga Ciapudoypaap. ²⁸ Jeeyaj cupacpa iwatyaj juuts mich iñisne iga iñascaaba jém imManic. ²⁹ Siip manjatun Dios, ixi yíp pixiñtam. Nímayjpa iga achiiba tum mijpic castigo. Mancuyoxatámpa. Ayoxpáttaami iga wiap

ananmat ininmatí. Acamamwadaayi ánanama iga odoy acinñiñ. ³⁰ Achíi jém impimi iga anacpíspa jém mimnewiip, iga anwatpa jém milagro y jém seña jém Jesucristo inñiyimi, jém wibic imManic.

³¹ Cuando yaj inwejpátyaj Dios, pimi tsigóypa jém tic jut antuumaneyaj. Itumpiy jém pixiñtam tsam iniityaj jém Dios iAnama. Da cinjaypa iga inmatpa jém Dios inmatí.

Itumpiy cosa icumunmichiyaj

³² Itumpiy jém icupicneyajwip tumti ijixi y tumti ianama. Da i ijispa iga imichi icutum titam iniityaj. Ijispa iga itumpiy cosa icumunmichiyaj. ³³ Jém apóstolyaj seguido inmatpa iga pisneum jém tánomi Jesús. Tsam wíap inmat porque Dios ichi jém ipimi y tsam tóyoyajpa. ³⁴ Da i jém yaachayajpáppic. Porque itumpiy jém iniitwip iñas o itic, imáy iga inimiñpa jém tumiñ. ³⁵ Ipietson jém apóstolyaj, iwécyaajpa, ichiyajpa cada tumtum de jeeyaj iga ijuypa titam itogóyáy. ³⁶ It idic tum levitapic pixiñ inñiyi José. Nay jém isla de Chipre. Jém apóstolyaj iccamayaj inñiyi, Bernabé. Jém inñiyi nimtooba jém yoxpádoypaap. ³⁷ Yíp pixiñ iniit idic tum jaca nas, ocmi imáy. Inimiñ jém tumiñ, icijunodáy jém apóstolyaj icijom.

5

Jém Ananías y Safira itánca

¹ Jemum ittim tum pixiñ inñiyi Ananías con iwichomo Safira. Imáyyajtim tum jaca nas.

² Pero yíp pixiñ inñec uxaj jém nas ichowa. Jém iyomo ittim de acuerdo con iwídaya. Nimyaj iga yicsánam ichowa jém nas. Jém pixiñ miñ ichagáy jém apóstolyaj ipuycim.

³ Jesic Peto inñimáy jém Ananías:

—MiAnanías, ¿tiiga tigiy jém Wocciwiñ inñanamanjom iga immigóyáypa jém Dios iAnama iga inñéctsy uxaj jém nas ichowa? ⁴ ¿Que da immichi jém nas cuando danam immáyñe, cuando immáyñeum immichitim jém ichowa? ¿Tiiga inñispa iga inwatpa jempic? Immigóyáy Dios, da immigóyáy tum pixiñ. ⁵ Cuando imaton ti nimpa jém Peto, actij jém Ananías, jemti caanas. Jesic tsam pimi cinjay itumpiy jém imatonneyajwip ti inasca jém pixiñ. ⁶ Tsucumyaj jém woñjaychixtam, inmonyaj jém tsúts, nic icumyaj.

⁷ Cuando nasne tres hora, miñ jém Ananías iwichomo, da ijodon ti nasne. ⁸ Jesic jém Peto icwác jém yomo:

—Anímaayi, ¿numa jesánam ichowa jém nas jutsaj achi jém inwídaya?

Nim jém yomo:

—Numa jesánam.

⁹ Jesic Peto inñimáy:

—¿Tiiga inwatta de acuerdo con inwídaya iga incutitspa jém Dios iAnama? Jemum miñiyaj anxicmi jém oyñewip icum jém inwídaya. Sip michgacti nicpa micum.

¹⁰ Jeeti rato actij jém yomo jém Peto ipuycim. Caanas. Cuando tigiyaj jém woñjaychixtam caaneum jém yomo. Itopyaj, nic icum tum lado jut cumnetá jém iwídaya.

¹¹ Tsam pimi cinneyaj itumpiy jém icupicneyajwip Cristo con jém imatonneyajwip ti inascayaj.

Wattap jáyan jém milagro y seña

¹² Jém apóstolyaj iwatyaj jáyan jém milagro y seña jém pixiñtamanjom. Antuumaneyaj itumpiy de jeeyaj jém mijpic mastic icorredor inñiyi Salomón. ¹³ Pero jém dapic icupicpa Cristo ni tum da inpitsneyaj, pero tsam iwixyajpa jém Dios ipixiñtam. ¹⁴ Jém icupicneyajwip Cristo más jáyanap. Jém pixiñtam y yomtam cada jama más icupicyajpa jém Dios inmatí. ¹⁵ Itopyajpa jém mimneyajwip con ichees. Nicpa ichacyaj calle iga cuando naspa jém Peto, ictsíyáyiñ jém icumunçi algunos de jeeyaj. ¹⁶ Inimiñyajpatim jém

mimneyajwíppic jém tunḡac atebetyaj jém ityajwíip nocojom Jerusalén. Inimiñyay jém mimneyajwíip y jém imatsneyajwíip jém mal espíritu. Cupisayyaj itumpiy.

Matsta jém Peto y Xiwan

¹⁷ Jesic jém cobacpic panij anjagooyi con jém iwaganaityajwíip, jém saduceopic pixiñtam, tsam pimi icujóyiyay. ¹⁸ Matsta jém apóstolyaj, cotta cárcel. ¹⁹ Pero jeetim tsuu Dios icutsat tum sinyucmic pic pixiñ iga ináyiniñ jém cárcel. Topta jém apóstolyaj. Nímayta:

²⁰ —Nigi miteñi jém mijpic masticjom. Anmadayyaj jém pixiñtam iga Dios ichiitooba jém jomipic vida.

²¹ Cuando imatonyaj jém apóstolyaj, icuquejama, tsúytim, tigiyay jém mijpic masticjom, moj inquejay jém pixiñtam.

Jesic jeetim jama antuumaneyaj jém cobacpic panij con itumpiy jém Israelpic anjagooyiyaj y jém wídaytam iga iwatyajpa tum mijpic junta. Pimiyta jém policia iga niguiñ itopyaj cárcel jém presoyaj. ²² Pero cuando jém policia núc jém cárcel, da ipátyaj jém preso. Jesic eybic setyaj. Miñ inmadáy jém anjagooyi. ²³ Nímyajpa:

—Cuando anúc jém cárcel tsam wianpajne y jém guardia ichanwíwatne cuenta jém cárcel ipuerta. Cuando anánáy jém cárcel da i ampát.

²⁴ Cuando imaton ti inímáy jém policia, agui ipooñanjamyaj jém panij anjagooyiyaj con jém mastic icomandante. Da icutiyyiyay ti napa y hasta jut cuyajpa yip asunto.

²⁵ Jeeti rato miñ tum pixiñ, inmadáy jém anjagooyi:

—Jém wisten pixiñ, jém michtampic impajta cárcel, sip it jém mijpic masticjom. Sip iccuyuj jém pixiñtam.

²⁶ Jesic jém comandante con ipolicia nic imétsyaj jém apóstolyaj. Inimiñyay, pero da imalwadáy porque tsam cinneyaj. Ijspa iga inácscayajpa tsaami jém pixiñtam. ²⁷ Cuando inimiñyay, nanicta jém anjagooyiyaj iwiniñjom, jém Sanhedrin. Jesic jém cobacpic panij inímáy:

²⁸ —¿Da mannímayñeum iga odoy anmati yip pixiñ iniyimi? ¿Pero ti sip inwat? Icuwiti yip Jerusalén núc jém ininmati. ¿Que mich antsagaytooba la culpa iga accaata yip pixiñ?

²⁹ Jesic jém Peto con jém tunḡac apóstolyaj icutsonyaj. Inímayyaj:

—Más wi iga ancupicpa Dios que iga ancupicpa jém pixiñtam. ³⁰ Jém wiñicpic tanwewetam ijisyajpa Dios. Jeetim Dios icpis jém Jesús jém michpic iniccaata, incunúnta cunusyumi. ³¹ Pero Dios ininic sinyucmi, iccoñ inwimi. Iccám iga Mijpic injagooyi, iccám iga jém Ciapudoyap. Iwadáy jempic iga ichiiba lugar jém Israelpic pixiñtam iga icucacpa ixi iga wadaytap perdón jém itanca. ³² Aichtam atsiyta juuts tum testigo iga numa pis jém Cristo, quim eybic sinyucmi. Tsiytim juuts tum testigo jém Dios iAnama jém ichiñewíip Dios jém icupicneyajwíip.

³³ Cuando imatonyaj ti nampa jém Peto, tsam jóyñeyaj jém anjagooyi. Tsam iccaayajtooba. ³⁴ Pero entre jeeyaj ittim idic tum fariseopic pixiñ iniyi Gamaliel. Tum accuyujoyap de jém Israelpic anquímayoyi. Jém pixiñtam tsam iwixiyajpa. Teñchucum, ipimiy jém policia iga iquebacpudiñ tum rato jém apóstolyaj. ³⁵ Ocmi inímáy jém anjagooyiyaj:

—MiIsraelpic mipixiñtam, nawattamtaji cuenta. Cuidado iga immalwadáypa yip pixiñtam. ³⁶ Jistaami iga pecam tsucum jém Teudas, tum pixiñ tsiytip juuts tum mijpic anjagooyi. Initsucum como cuatrocientos pixiñtam. Ocmi accaata jém pixiñ y jém itúnyiyajwíip cutogoyay. Jemum cuyaj. ³⁷ Más ocmi cuando wattap jém censo, tsucum jém Judas, tum Galileapic pixiñ. Initsucum tsam jáyan pixiñtam. Pero ocmi accaataim. Cupóyayyaj itumpiy jém itúnyiyajwíip. ³⁸ Jeeyucmi mannímáypa, tsaci yip pixiñtam. Odoy moogiyi. Porque siiga yip anquímayoyi pixiñtam ixiquimi, cuyajpa. ³⁹ Pero siiga yip

p̄ixiñtam iniidáy Dios ij̄ixi, mich da w̄iap inictogoy. Nawattamtaj̄i cuenta. Cuidado iga in̄iñatámpa Dios.

⁴⁰ Jesic itump̄iy jém anjagooyiyaj icup̄icyaj juuts nim jém Gamaliel. Ocmi añwejayt̄a jém apóstolyaj, cótsyajt̄a, nímayyajt̄a iga odoy más añmat̄i Jesús in̄iyimi. Ocmi cutsigayyajt̄a.

⁴¹ Jém apóstolyaj putyaj jém anjagooyi iwiñjom. Agui maymayyaj porque Dios ij̄ic iga yaachwatyajt̄a jém Jesús icuyucmi. ⁴² Jesic cada jama accuyujóypa jém mijp̄ic masticjom y jém itiganjomyaj. Da ichacpa iga inmatpa jém w̄ibic añmat̄i iga Jesús je jém Cristo.

6

Accám̄ta siete jém iyoxpátpáppic jém apóstolyaj

¹ Jém tiempo tsam jáyanap jém Dios ip̄ixiñtam. Icup̄icyajpatim jém griegop̄ic p̄ixiñtam. Jeeyaj agui j̄iyyajpa acontra de jém Israelp̄ic p̄ixiñtam porque in̄ejawégáypa jém cunoytam iw̄iccuy cuando iwécpa jém w̄iccuy cada jama. ² Ocmi jém apóstolyaj in̄tuumawatyaj itump̄iy jém icup̄icneyajw̄ip jém Cristo. In̄imayyaj:

—Da w̄i iga antsactámpa iga anañmatpa jém Dios in̄mat̄i iga acw̄igoytámpa. ³ Jeeyucmi mant̄iwitam, métstaami siete de mimichtam jém w̄ibic p̄ixiñtam, jém j̄ixiyyw̄ip, jém tsamp̄ic iniit jém Dios iAnama. Accám̄taami iga iwatpa jém yoxacuy iga iwécpa jém w̄iccuy.

⁴ Pero aichtam seguido anañwejpáttámpa Dios, anañquejpa jém Dios in̄mat̄i.

⁵ Jesic itump̄iy jém Dios ip̄ixiñtam ityaj de acuerdo iga iwatyajpa juuts nimyaj jém apóstolyaj. Cup̄iñt̄a jém Esteban. Jém p̄ixiñ tsam iniit jém Dios iAnama. Cup̄iñyajt̄atim Felipe, Prócoro, Nicanor, Timón, Parmenas y jém Nicolás. Jém Nicolás miñ de jém Antioquía. Je t̄igiyñe id̄ic iga icup̄icpa jém Israelp̄ic añquímayooyi. ⁶ Ocmi namiñt̄a icusiete jém p̄ixiñtam hasta jūt it jém apóstolyaj iga in̄wejpádáypa Dios para jeeyaj. Cada tumtum de jeeyaj jém apóstolyaj ichiccunúgáy icobac.

⁷ Jesic tsam jáyanap jém Dios in̄mat̄i, núcpa yim jeexic. Tsam jáyanap̄tim jém Dios ip̄ixiñtam jém atbet Jerusalén. W̄ati jém Israelp̄ic panij icup̄icyajtim.

Matst̄a jém Esteban

⁸ Jém Esteban tsam iniit jém Dios ip̄imi y tsam iniit jém w̄ibic tóyooyi. Agui iwatpa jém milagro y jém seña jém p̄ixiñt̄amanjom. ⁹ Jesic algunos jém p̄ixiñtam miñ in̄ñayaj jém Esteban. Miñyaj algunos de jém sinagoga de jém Libertinop̄ic p̄ixiñtam. Miñyajt̄im de jém naxyucmi de Cirene, de jém naxyucmi de Alejandría, de jém Cilicia y de jém Asia. Moj in̄acayaj jém Dios in̄mat̄i con jém Esteban. ¹⁰ Pero jém p̄ixiñtam da w̄iá micoñw̄iy jém Esteban porque tsam j̄ixiyy. Jém Dios iAnama iyoxpát iga tsam w̄iá micutson. ¹¹ Jém añayajpáppic con Esteban iyojpa algunos p̄ixiñtam iga icum̄igóypa jém Esteban. Nimyaj:

—Ich ammaton̄ iga ȳip Esteban imalnímáy jém Moisés in̄químayooyi. Tsam icuj̄iypatim Dios.

¹² Jém añayajpáppic con Esteban icuj̄iñáy jém p̄ixiñtam, jém Israelp̄ic w̄idaytam y jém escribasp̄ic maestroyaj. Icutuumacayaj jém Esteban, matst̄a, nanict̄a jém panij anjagooyicim. ¹³ Ocmi inimiñyaj tun̄gac jém migoyapaap. Nimyaj:

—Ȳip p̄ixiñ da ichacpa iga icuj̄iypa jém tammastic. Tsam icuj̄iypatim jém Moisés in̄químayooyi. ¹⁴ Ammaton̄ta iga nimpa iga Jesús jém Nazaretp̄ic p̄ixiñ imiswatpa jém tammastic y icucagáypa jém costumbre jém tatsagayñew̄ip Moisés.

¹⁵ Jesic itump̄iy jém coñyajw̄ip jem, agui iámyajpa jém Esteban. Iixyaj iga añcac jém iámooyi juuts tum̄ s̄iñyucm̄ipic p̄ixiñ.

7

Nacupujt̄ap jém Esteban

¹ Jesic jém cōbacpic panij anjagooyi icwác jém Esteban. Iñímáy:

—¿Que nūma inwat juuts nīmaja?

² Jém Esteban iñímáy:

—Mantīwítam, minjagooyítam, amaton̄taami. Jém wibic tanDios iwiñquejáy jém wiñicpic tan̄wewe jém Abraham. Iwiñquejáy jém naxyucmi de Mesopotamia cuando danam nicne it̄i jém naxyucmi de Harán. ³ Dios iñímáy: “Puti jém iññaxyucmi. Tsaci jém iñt̄iwítam. Nic̄sim jém naxyucmi iga manañquejáypa.” ⁴ Ocmi jém Abraham put jém naxyucmi de Caldea jut̄ it̄ idic. Nic̄ it̄i jém naxyucmi de Harán. Jem̄gam ca jém ijatun̄. Ocmi Dios inimiñ jém Abraham hasta yim̄ jut̄ taitta s̄ip. ⁵ Pero Dios da ichi ni tum̄ jaca nas jém im̄chipic ni jut̄ icteñ̄pa ipuy. Pero ij̄ycámayñe iga ichiiba jém nas y cuando caaneum, ts̄iypa jém nas para jém im̄anictam. Pero cuando ij̄ycámáy iga ichiiba jém nas da inij̄ im̄anic ni tum̄. ⁶ Dios iñímáy: “Jém im̄anictam nicpa jém tun̄gac naxyucmi. Nicpa it̄i juuts juum̄ipic p̄ixiñtam. Ts̄iyyajpa iga esclavo, yaachwat̄yajtāp cuatrocientos am̄tiy.” ⁷ Nim̄patim Dios: “Ich̄ anchiiba castigo jém p̄ixiñtam jém it̄yajw̄ip jém naxyucmi jut̄ nats̄iyyajtā iga esclavo. Jesic cuando put̄yajpa jem̄ic, miñ̄yajpa eyb̄ic ȳip naxyucmi iga acuyoxap.” ⁸ Dios iwat̄ tum̄ trato con jém Abraham. Iñímáy iga iwadáyñ̄ jém marca de circuncisión jém im̄anictam juuts tum̄ seña iga Dios iwadayñe jém trato con jeeyaj. Jeeyucmi cuando naȳ jém im̄anic Isaac, cuando iniitum̄ ocho día, jém Abraham iwadáy im̄anic jém marca de circuncisión. Ocmi cuando man̄iḡiyum̄ jém Isaac, iwadáytim̄ jem̄pic jém im̄anic Jacob. Ocmi cuando man̄iḡiyum̄ jém Jacob iwadáytim̄ jem̄pic jém im̄anictam. Jém doce im̄anictam ts̄iyyaj juuts jatun̄pic de jém doce tribu de Israel.

⁹ Ȳip Jacob im̄anictam jém wiñicpic tant̄iwítam tsam̄ ij̄oyix̄yaj jém ij̄ayuc José. Iachiyaj imáychi jém ij̄ayuc jém tun̄gac p̄ixiñtam. Ocmi nanictā juumi jém naxyucmi de Egipto. Pero Dios iwaganait̄ jém José. ¹⁰ Iciacput de it̄ump̄iy jém yaachaji. Dios iyoxpát jém José iga tsam̄ j̄ix̄iȳ iga iw̄ixiñ̄ jém Egiptopic rey jém Faraón. Ocmi jém Faraón iccám jém José iga gobernador de jém naxyucmi de Egipto. Chiit̄atim̄ jém cargo iga injacpa jém it̄yajw̄ip jém rey it̄ic̄im̄.

¹¹ Ocmi miñ̄ tum̄ m̄ipic yuu y tum̄ m̄ipic yaachaji jém naxyucmi de Egipto y jém Canaán. Jém wiñicpic tant̄iwítam da ipát̄yajpa ti icútpa. ¹² Pero cuando jém Jacob ijodón̄a iga it̄ trigo Egipto icutsat im̄anictam, jém wiñicpic tant̄iwítam, iga ijuyyajpa jém trigo. Ȳip jém wiñtipic viaje. ¹³ Ocmi eybictim̄ icutsat im̄anictam Egipto. Jesic jém tun̄gac viaje jém José, jém máyñ̄etaw̄ip wiñigam, in̄madayyaj iachiyaj iga it̄iwi. Jesic jém rey Faraón icut̄iȳȳ jup̄ raza jém José. ¹⁴ Jesic José iñímáy it̄iwítam iga: “Nam̄ñ̄i jém tan̄jatun̄ con it̄ump̄iy jém tant̄iwítam.” Jém miñ̄neyajw̄ip setenta y cinco con it̄ump̄iy im̄anictam. ¹⁵ Jesic jem̄pam̄ iwat̄ jém Jacob. Nic̄ it̄i jém naxyucmi de Egipto. Ocmi jem̄gam ca jém Jacob. Más ocmi caayajtim̄ jém im̄anictam jém naxyucmi Egipto. ¹⁶ Cuando ca jém Jacob, naseedaytā it̄icmi jém ipacyaj jém at̄bet Siquem. Jemum̄ cúmaytā jém ipac tum̄ tsaajos̄om̄. Jeetim̄ tsaajos̄ ijuy wiñic jém Abraham. Imáychi tum̄ p̄ixiñ̄ im̄anictam, iñ̄iyi jém p̄ixiñ̄ Hamor.

¹⁷ Cuando núctooba jém tiempo iga cupacpa jém trato jém Diospic iwadayñe jém Abraham, jesic tsam̄ jáyan̄ap jém Israelpic p̄ixiñtam jém naxyucmi de Egipto. ¹⁸ Ocmi tsucum̄ tun̄gac rey jém naxyucmi de Egipto jém dapic̄ iixpicpa jém José. ¹⁹ Ȳip anjagooyi tsam̄ im̄iḡoyáy jém wiñicpic tant̄iwítam. Tsam̄ imalwadáy jém tan̄jatun̄wewetam. Ip̄im̄iȳ iga ichaguiñ̄ jém im̄anictam, jém yaguiñ̄pic nayñe, iga caayajiñ̄. ²⁰ Jesic jém tiempo naȳ jém Moisés, tum̄ wibic ts̄ixi, Dios tsam̄ iw̄ix̄pa. Jém ijatun̄ icm̄ijap̄ tres meses it̄ic̄im̄. ²¹ Ocmi jém ijatun̄ ichac jém im̄anic iga caiñ̄nam̄. Jesic jém Faraón iyom̄manic̄ ipin̄ jém xutu ts̄ixi. Icm̄ijap̄ juuts iñuntamanic̄. ²² Jeeyucmi jém Moisés tsam̄ w̄icuyujne.

Iwicutiyyíypa itumpiy jém jixi jém itwíip Egipto. Jém Moisés tsam wíap iwat ti quej. Tsam wíap inmat.

²³ 'Cuando jém Moisés iniit cuarenta iamtiy, ijispa íanamanojóm iga nicpa ijooyáy jém itiwítam jém Israelpic pìxiñtam. ²⁴ Jemum iix tum Egiptopic pìxiñ síp imalwadáy tum Israelpic pìxiñ. Jesic jém Moisés icupuj jém itíwi. Icca jém pìxiñ, ichégáy iga imalwadáy jém itíwi. ²⁵ Jém Moisés ijispa iga jém itiwítam icutiyyiñe iga Dios icutsat jém Moisés iga iccutsigáyiñ. Pero jeeyaj da icutiyyiyaj. ²⁶ Jesic tungagam jama jém Moisés ipát wisten jém Israelpic pìxiñtam síp íñayaj. Injiyjac. Inímáy: "Odoy áñataami con inítwi. ¿Tiiga minicótstamtap?" ²⁷ Ocmi jém áñayajpáppic idic con itíwi agui ijóyix jém Moisés. Inímáy: "¿I miccám juuts juez iga ananjyactámpa? ²⁸ ¿Que anaccaabatim aich juuts matic inicca jém Egiptopic pìxiñ?" ²⁹ Jesic cuando imatoñ ti nim jém pìxiñ, poy jém Moisés. Nic íti jém naxyucmi de Madián juuts tum juumipic pìxiñ. Jemum nay wisten ijaymanic.

³⁰ 'Cuando nasne cuarenta amtíy jém titsinaxyucmi, jém Moisés it idic nocojóm jém cotsic iníyi Sinaí. Jemum iix tum xutu cuy jípsa ixi. Jém juctjóm iwiñquejáy tum sinyucmipic pìxiñ, jém icutsatnewíip tanjatun Dios. ³¹ Agui ipooñanjam cuando iix jém jucti. Cuando icunúc nocojóm iga iwíámpa, imatoñ iga jíypa jém tanjatun Dios. Nimpa: ³² "Ich jém wiñicpic pìxiñtam aDios. Ich jém Abraham aDios, jém Isaac aDios y jém Jacob aDios." Jesic Moisés moj cuetsaayi. Agui cñ, da wíap íñámmoc jém jucti. ³³ Jesic jém tanjatun Dios inímáy jém Moisés: "Tsaci jém inçiac porque yim jut miteñ tsam it jém Dios ipimi. ³⁴ Ich ánixñe jém ampìxiñtam iga tsam yaachwatyaajtap jém naxyucmi de Egipto. Ammatoñ iga agui weyajpa. Jeeyucmi aquet naxyucmi iga ançiacputpa jeeyaj. Jesic miñi, mançutsatpa eybic jém Egipto jut miit idic."

³⁵ 'Yíptim Moisés jém tsampic ijóyixyaj jém wiñicpic pìxiñtam jém inímáyñewíip iga: "¿I miccám juuts minjagooyi y juuts mijuez?" Yíptim Moisés Dios iccám juuts tum anjagooyi iga iciacputpa jém ipìxiñtam. Wíap iwat porque ichi ipimi jém sinyucmipic pìxiñ jém iixñewíip jut yótpa jucti jém xutu cuyyucmi. ³⁶ Yíptim Moisés itopyaj Egipto jém wiñicpic tantiwítam. Tsam iwat jém milagro y jém seña jém naxyucmi de Egipto, jém Tsabats Lamar y jém titsinaxyucmi jut jáy íti cuarenta amtíy. ³⁷ Yíptim Moisés inímáy jém Israelpic pìxiñtam iga: "Dios icutsatpa tungac profeta juustim acutsat aich. Tsucumpa jém nunta tantiwítamanjóm juuts ich atsucumne. Cupici ti nimpa." ³⁸ Yíptim Moisés it idic con jém wiñicpic tantiwítam jém titsinaxyucmi cuando ijíyáy jém sinyucmi pìxiñ jém cotsicyucmi Sinaí. Ipictsoñ jém vivopic Dios inmatí iga tachiiñ taichtam.

³⁹ 'Pero jém wiñicpic tantiwítam da icupicyaj jém Moisés. Ijóyixyaj. Ijisyaj íanamanojóm iga setpa eybic Egipto. ⁴⁰ Inímayyaj jém Aarón: "Awadaayi tum watnas jém anquejaypáppic jém tun porque da tanjodon jut nic jém Moisés jém tatopnewíip jém naxyucmi de Egipto." ⁴¹ Ocmi jém Aarón iwat tum watnas, tum xutu xix. Iccaayajpa jém animat jém watnas iwiñjóm iga iwatpa sacrificio. Agui maymayyaj iga wíap iwat icimi jém watnas. ⁴² Ocmi Dios ichaganputyaj jém pìxiñtam. Ichi lugar iga ijisyajpa jém matsa y itumpiy cosa jém tánixpáppic sinyucmi. Jempam ijaychacne jém librojóm jém wiñicpic anmatciwiñ. Nimpa Dios:

Mimichtam miIsraelpic mipìxiñtam, mich da inicca jém animat iga anwadáy sacrificio iga anchiiba ich anwiñjóm

cuando jáy tawagaiñi jém titsinaxyucmi jém cuarenta amtíy.

⁴³ Inçópcóbóypa jém watnas Moloc con jém ipuctucmastic.

Inisibatim jém watnas Renfán imatsa

jém michpic inwatneta inçimi iga injístámpa.

Jeeyucmi manquebacputtámpa jém inñaxyucmi.

Mañcutsattámpa más juumi de jém naxyucmi de Babilonia.

⁴⁴ Nímpa jém Esteban:

—Jém wiñicpic tantiwitam inisiibatim jém punctumastic juť accáyap jém tsaatabla juť jayñeta jém Moisés inquímayooyi. Jém punctumastic iwat jém Moisés juuts Dios ipimiy. Iwat juuts Dios inquejáy jém cotsicyucmi. ⁴⁵ Jesic ocmi cuando caum jém Moisés, jém wiñicpic tantiwitam con jém Josué ipictsonyay jém punctumastic juuts tum herencia. Ininicyay jém tunjac naxyucmi iganam itobáyáy jém tunjac pixiñtam iñas. Dios iquebacput jém tunjac pixiñtam iga ichi jém nas jém wiñicpic tantiwitam. Inisiyaypa jém punctumastic hasta cuando tsíy jém David juuts anjagooyi. ⁴⁶ Dios tsam itoypa jém David. Je agui iwattooba tum mijpic tic juť itpa jém tanjatun Dios, jém iispáppic jém tanjatunwewe jém Jacob. ⁴⁷ Pero jém Salomón, jém David imanic, iwadáy Dios tum tic, jém mijpic mastic. ⁴⁸ Mex jém yucmipic Dios da ipa jém ticjom jém watnetawip cimi, juuts nim jém wiñicpic anmatciwiñ:

⁴⁹ Nímpa tanjatun Dios: Sinyucmi it ancoñcuy.

Naxyucmi anaccámne ampuy.

¿Juutspic tic anwadaytámpa?

¿Juť it jém lugar juť wíap anej?

⁵⁰ ¿Que da ich ançimi anwat itumpiy jém yimpic ityay?

⁵¹ Jesic jém Esteban inímáyim jém anjagooyiyay:

—Michtam tsam malotam inñanama juuts jém dapic icupicpa Dios. Jém inñatsic da matónóypa, da inwattooba juuts miñimáypa jém Dios iñanama. Michtam mijextim juuts jém wiñicpic tantiwitam. ⁵² ¿Jupic jém wiñicpic profeta da imalwadáy jém wiñicpic tantiwitam? Iccaayaj jém wiñicpic anmatciwiñ jém inmatnewip iga miñpa naxyucmi jém Wibic Pixiñ jém icutsatnewip Dios. Sip jeetim pixiñ mich inwadayta atraición. Iniccaata. ⁵³ Michtam impictsonya jém Dios inquímayooyi jém tacijunocodayñewip jém sinyucmipic pixiñ, pero da inwatta juuts nímpa jém anquímayooyi.

Accaatá jém Esteban

⁵⁴ Cuando imatonayaj jém pixiñtam ti nímpa jém Esteban, tsam ijóycayaj hasta ichiganjiyyajpa itits jém Esteban icuyucmi. ⁵⁵ Pero jém Esteban tsam iniit jém Dios iñanama. Jesic amquím sinyucmi, iix juť it Dios. Iixtim iga teñ jém Jesús jém Dios inwimi.

⁵⁶ Jesic inímáy jém pixiñtam:

—Aami. Ich ánix iga ányáñe jém siñ. Ánix jém Pixiñ jém Miññewip Sinyucmi. Sip teñ jém Dios inwimi.

⁵⁷ Pero jém pixiñtam innúcyaj jém itatsic. Pimi jiyyajpa, poyimi miñyay, in tuumacayaj jém Esteban. Imatsyay. ⁵⁸ Itopyaj jém atebet, ininicyay ançicmi. Inñacsayaj tsaami. Moj iyigayyay jém Esteban jém icumigoyñeyajwip iga icujyapa Dios. Ichagayyay iyooti tum mañpixiñ ipuycim, inñiyi Saulo, iga iwadáypa cuenta. ⁵⁹ Iganam sip iyigayyay tsaami jém Esteban, inwejpát Dios. Nímpa:

—Mánomi Jesús, pictsonya inñanama.

⁶⁰ Ocmi jém Esteban costeñneactiñ. Pimi jiyapa. Nímpa:

—Mánomi, odooy tségayyaji yip pixiñtam itañca iga amalwadáy.

Yaj nimi, caum jém Esteban.

8

Jém Saulo tsam icpóyypa jém icupicnewip Cristo

¹ Jém Saulo it de acuerdo con jém iccaaneyajwip jém Esteban.

Jeetim jama jém ijóyixyajpáppic moj ictsucumyay iga pimi imalwadáypa jém Dios ipixiñtam jém ityajwiiip Jerusalén. Itumpiy cupóyayyay. Cunigayyay yim jeexic hasta jém naxyucmi de Judea y Samaria. Tsíy Jerusalén no más jém apóstolyaj. ² Algunos jém wibic pixiñtam icum jém Esteban. Agui weyjajpa iga accaata jém pixiñ. ³ Jesic jém Saulo moj iyaachwatyay jém Dios ipixiñtam. Nicpa iméts tic por tic. Pimimi ijicputpa jém pixiñtam con jém yomtam. Icotyajpa cárcel.

Añmattap jém wibic añmati Samaria

⁴ Pero jém cupóyayyajwiiip Jerusalén nic inmatyay jém wibic añmati jut quej. ⁵ Jesic jém Felipe, tum de jeeyaj, nic jém attebet Samaria. Jemum inmadáy jém pixiñtam jém Cristo inquímayooi. ⁶ Añtuumayajpa itumpiy de jeeyaj, imatonjajpa ti nimpajém Felipe. Tsam iwadáypa caso cuando iixyay jém seña jém iwatnewiiip. ⁷ Porque acpisyajta tsam jáyan jém iniitwiiip idic jém mal espíritu. Topta jém mal espíritu. Tsam pimi añwejpa mu iput. Acpisyajtatim jém tusacaneyajwiiip icumij y jém cuxujay. ⁸ Jeeyucmi itumpiy jém ityajwiiip jém attebet tsam maymayyay.

⁹ Pero it idic jém attebet tum pixiñ inñiyi, Ximoj. Icuuyjane jém magia iga inawatwadáypa jém itiwitam. Tsam imigóyáypa jém pixiñtam. Nimpajega: “Ich tum apixiñ tsam awiap.” ¹⁰ Itumpiy jém pixiñtam tsam iwadáypa caso. Icupicyajpa jém cuyujnewiiip y jém dapic cuyujne. Ninyajpa:

—Yíp pixiñ iniit jém Dios ipimi.

¹¹ Tsam iwicupicyajpa porque dende wiñigam imigóyáypa jém pixiñtam con jém magia. ¹² Pero jesic jém Felipe inimiñ jém wibic añmati iga Dios injactooa yíp naxyucmi y iga wiap taciaput jém Jesucristo inñiyimi. Tsam icupicyaj jém pixiñtam y jém yomtam. Acchinjajta. ¹³ Jesic jeetim Ximoj, jém nawatpic idic, icupictim. Acchinjajta. Mojum itúnjy jém Felipe. Agui ipooñanjampa cuando iix jém milagro y jém seña juuts iwatpa jém Felipe.

¹⁴ Jesic cuando jém apóstolyaj jém ityajwiiip Jerusalén ijodónayaj iga jém Samariapic pixiñtam ipictsonjaj jém Dios inmati, icutsat jém Peto y Xiwan Samaria. ¹⁵ Cuando núcyaj jém Samaria, moj inwejpádáy Dios para jém icupicneyajwiiip Cristo iga ipictsoñiñ jém Dios iAnama. ¹⁶ Porque ni tum de jeeyaj danam ipictsonje jém Dios iAnama. No más acchinneyajta jém tánomi Jesús inñiyimi. ¹⁷ Jesic jém Peto y Xiwan ichigáy jém pixiñtam icobac con ici. Jempam ipictsonjaj jém Dios iAnama.

¹⁸ Jesic jém Ximoj, jém nawatpic idic, cuando iix iga chiitajém Dios iAnama cuando jém apóstolyaj ichigáy jém pixiñtam icobac con ici, ¹⁹ inñimáy:

—Manyojpa. Achitit jexpic pimi mex aich iga cuando antsigáypa tum pixiñ icobac con añci, jesic ipictsonpatim jém Dios iAnama.

²⁰ Jesic jém Peto inñimáy:

—Miwagatogóyíñ con jém inñtumiñ porque inñispa iga jém Diospic tachiiba wiap inñjuy con tumiñ. ²¹ Mich da ini derecho iga inwatpa jém Dios iyoxacuy ni da miwiap porque da wi jém inñanama jém Dios iwiñjom. ²² Tsaci jém malopic jixi. Añwejpaati tanjatun Dios siiga wiap miwadáy perdón jém inñánca jém inñisnewiiip inñanamanjom. ²³ Porque ánix iga tsam iniit jém cuyóyiooyi inñanamanjom juuts jém chuxñiwi tsampic tam. Jém malopic jixi michenne.

²⁴ Jesic jém Ximoj inñimáy jém Peto:

—Añwejpáttaami Dios para ich iga odoy ti annascaiñ juuts mich annimayñe.

²⁵ Jesic yaj inmat jém Dios inmati jemíc, setyaj jém Peto y Xiwan Jerusalén. Nasyajpa wati jém tiganjoj jém naxyucmi de Samaria. Inmatyajpa jém wibic añmati iga Dios taciaputpa.

Jém Felipe ipát jém Etiopíapic p̄ixiñ

²⁶ Jesic ocmi Dios icutsat tum siñyucmipic p̄ixiñ. Iñímáy jém Felipe:

—Tsucumi. Nicsim an̄tsapsaumi. P̄ici jém Gaza cutuñ, jém tsucumnewip̄ Jerusalem.

Naspa jém tuñ jém titsinaxyucmi. ²⁷ Jesic jém Felipe tsucum. Nic. Tunjom ipát tum Etiopíapic p̄ixiñ. Capun p̄ixiñ. Mijpic an̄jagooyi jém p̄ixiñ, tesorero. Iccáyáypa jém yompic an̄jagooyi itumiñ. Jém yomo in̄jacpa jém naxyucmi de Etiopía. Iñiyi jém yomo Candace. Jém p̄ixiñ oy Jerusalem iga ij̄ispa Dios. ²⁸ Settim idic iticmi, coñ jém icarretajom, s̄ip imay jém libro jém ijaychacnewip̄ jém Isaías jém wiñicpic profeta. ²⁹ Jesic jeeti rato jém Dios iAnama iñímáy jém Felipe:

—Cunuuci jém carreta, waganan̄ici.

³⁰ Póyan̄tsucum jém Felipe, cuando icunúc noco, imaton̄ iga s̄ip imay jém libro jém ijayñewip̄ Isaías. Jesic jém Felipe icwác jém capun p̄ixiñ, iñímáy:

—¿In̄cutiñyíy ti s̄ip immay?

³¹ Jém p̄ixiñ iñímáy:

—¿Jutsap an̄cutiñyíy siiga da i an̄quejáypa? Miñi tawagacoñi yíp carretajom.

³² Jem jut s̄ip imay jém Dios in̄mat̄i n̄impa así:

Nanicta jém p̄ixiñ, accaata juuts tum borrego juuts tum mañborrego da an̄weipa cuando cupoodatap, jesanetim jém p̄ixiñ datim j̄iypa.

³³ Tsam p̄imi yaachwatta, chiita castigo, pero da i ic̄ipin̄. ¿Jém iman̄ictam, i wiap in̄madáy porque da jáypa cuyajpa ivida yíp naxyucmi?

³⁴ Jesic jém capun p̄ixiñ icwác jém Felipe. Iñímáy:

—¿Anímaayi, ti n̄imtooba yíp an̄mat̄i? ¿Jém wiñicpic profeta, in̄matpa de iyaac o in̄matpa de tun̄gac p̄ixiñ?

³⁵ Jesic jém Felipe moj in̄madáy jém an̄mat̄i jém sīppic imay. In̄madáy jém w̄ibic an̄mat̄i de Jesús. ³⁶ Iganam waganicyajpa, núcyaj tum lugar jut it ni. Jesic jém capun p̄ixiñ iñímáy jém Felipe:

—Yim it ni. ¿Que ich da wiap anacchin̄?

³⁷ Jém Felipe iñímáy:

—Siiga in̄cupicpa con itump̄iy iñanama, wiap manacchin̄.

Jesic jém p̄ixiñ iñímáy Felipe:

—Ich an̄cupicpa iga Jesucristo je jém Dios iManic.

³⁸ Ocmi icteñ jém icarreta. Quetyaj, tigiyaj jém nīcim. Jém Felipe icchin̄ jém an̄jagooyi. ³⁹ Cuando putyaj jém nīcim, jém Dios iAnama inin̄ic jém Felipe. Jém an̄jagooyi da más iix. Mojum nīqui, tsam maymay. ⁴⁰ Jesic pátta jém Felipe jém atebet Azoto. De jem moj nīqui. In̄matpa jém w̄ibic an̄mat̄i itump̄iy jém atebetay hasta núc jém atebet Cesarea.

9

Jém Saulo cuando moj icupic Jesús (Hch. 22:6-16; 26:12-18)

¹ Jesic jém Saulo seguido imalwadáypa jém tánomi ip̄ixiñtam. Tsam icumecpa iga iccaaba. Jeeyucmi nic íam jém cobacpic pan̄ij an̄jagooyi. ² Nic iwác tum toto iga wiap itigiyaj jém sinagogayaj jém ityajw̄ip̄ jém atebet Damasco iga icuámpa jém icupicneyajw̄ip̄ Cristo, jém p̄ixiñtam y yomtam iga imatspa y inin̄icpa Jerusalem.

³ Iganam niq̄ui jém Saulo tunj̄om, cuando núctooba jém attebet Damasco, iix tum jucti tsam p̄imi tsocpa siñyucmi. ⁴ Jesic jém Saulo actiñ naxyucmi. Imaton̄ tum j̄iyi. Nímaytap:

—Saulo, Saulo, ¿t̄iiga anacpoypa?

⁵ Jesic jém Saulo icwác. N̄impa:

—¿M̄iapaap, mán̄omi?

Jém j̄iyi icutson̄. N̄impa:

—Ich aJesús jém michpic̄ siip̄ anacpoy. Iñyaactim̄ siip̄ inimalwadayta. Mijex juuts jém yunta jém iñeppáppic̄ jém ichen̄óycuy in̄quiñi.

⁶ Jém Saulo tsam p̄imi cuetsáypa porque agui c̄iñne. N̄impa:

—¿Mán̄omi, ti iñxunpa iga añwatpa?

Jesic tán̄omi iñímáy:

—Tsucum̄im, n̄ici ȳip̄ attebet Damasco. Jemum miñímáytap ti w̄iap̄ in̄wat.

⁷ Jém p̄ixiñtam, jém iwagananicpáppic̄ jém Saulo, tsam p̄imi c̄iñ porque imaton̄ jém j̄iyi, pero dā i iix. ⁸ Ocmi tsucum̄ jém Saulo jut̄ actiñne idic̄ naxyucmi. Tojne jém iixcuy, pero dā ixixóypa. Matsaytā ici, j̄icteñtā. Nanictā jém attebet Damasco. ⁹ Jemum tucunajama dā ixixóypa. Dā wíc ni dā níc.

¹⁰ It idic̄ Damasco tum p̄ixiñ iñ̄iyi Ananías, icupicnetim̄ Cristo. Iwiñquejáy tán̄omi juuts tum poñ. Iñímáy:

—¡Ananías!

Jesic jém p̄ixiñ iñímáy:

—Ȳim aít, mán̄omi.

¹¹ Jesic iñímáy jém tán̄omi:

—Tsucum̄i. N̄ici jém calle iñ̄iyi Numa, hasta jém Judas iticcim̄. Acwaaci tum p̄ixiñ de Tarso iñ̄iyi Saulo, s̄ip̄ in̄wejpát Dios. ¹² Jém Saulo iixtim̄ tum poñ. Iix iga miñpa tum p̄ixiñ iñ̄iyi Ananías, tiḡiypa jém tic̄jom, iccámpa ici jém Saulo icobacyucmi iga eybictim̄ ixixóyiñ.

¹³ Jesic imaton̄ jém Ananías, iñímáy jém tán̄omi:

—Mán̄omi, tsam̄ jáyan̄ p̄ixiñtam añmadayñe ti iwat̄ ȳip̄ p̄ixiñ iga tsam̄ imalwadáy jém imp̄ixiñtam jém micupicneyajw̄ip̄ jém attebet Jerusalén. ¹⁴ Siip̄ núcneum̄ ȳim con jeetim̄ orde jém ichiñew̄ip̄ jém cobacpic̄ pan̄ij iga imatspa itump̄iy jém in̄wejpátpáppic̄ Dios mich iñ̄iyimi.

¹⁵ Jesic jém tán̄omi iñímáy jém Ananías:

—Siip̄ nicsim̄. Ich añcupiñ ȳip̄ p̄ixiñ iga in̄madáyñ ich anañquímayooyi jém tun̄gacpic̄ p̄ixiñtam, jém tun̄gac naxyucmi ireyyaj y jém Israelpic̄ p̄ixiñtam iwiñjom. ¹⁶ Ich anañquejáypa iga tsam̄ p̄imi yaachwattap̄ ȳip̄ p̄ixiñ ich añcuyucmi.

¹⁷ Ocmi jém Ananías nic̄ jém tic̄cim̄ jut̄ it̄ jém Saulo. Tiḡiy, iccám ici icobacyucmi. Iñímáy:

—Mant̄iw̄i Saulo, jém tán̄omi Jesús miwiñquejáy iganam mimiñpa tunj̄om. Siip̄ acutsat iga w̄iap̄ iñixixóy eybic̄ y iga tsam̄ iniidiñ jém Dios iAnama.

¹⁸ Jeeti rato actiñ iixcuyucmi juuts t̄ipi iñaca, w̄iawum̄ miixixóy eybic̄. Jesic ocmi tsucum̄ jém Saulo, acchintā. ¹⁹ Ocmi wícum̄, eybic̄ ipictson̄ ip̄imi. Tsíy juna jama con jém icupicneyajw̄ip̄ Cristo jém attebet Damasco.

Jém Saulo in̄matpa jém w̄ibic̄ añmat̄i Damasco

²⁰ Ocmi moj in̄mat jém w̄ibic̄ añmat̄i jém sinagoga. In̄madáy jém p̄ixiñtam iga Jesús je jém Dios iManic̄. ²¹ Itump̄iy jém imaton̄yajpáppic̄ tsam̄ ipooñanjamyaj. N̄imyaipa:

—¿Que dā ȳiptim̄ p̄ixiñ jem̄ic̄ Jerusalén tsam̄ icpoy jém in̄wejpátpáppic̄ Dios jém Jesús iñ̄iyimi? ¿Que dā ȳiptim̄ p̄ixiñ s̄ip̄ miññe ȳim iga imatspa jém p̄ixiñtam y inin̄icpa jém pan̄ij anjagooyicim̄?

²² Pero jém Saulo más pimi inmatpa jém Dios inmati. Je da cñpa. Inquejáypa iga Jesús je jém Cristo hasta imiswadáy ijixi jém judíos jém ityajwñip Damasco.

Cñput Saulo jém attebet Damasco

²³ Cuando watña jama it jém Saulo, jém judíos iwatyaj acuerdo iga iccaayajpa. ²⁴ Pero ocmi jém Saulo ijodóna iga tsucim y siñni jém ienemigo inteñne jém puerta añaca iga iccaaba cuando putpa jém attebet. ²⁵ Pero jém icupicneyajwñip Cristo icotyaj jém Saulo tum miñpic coonjom. Ijmquetyaj tsucim jém taañi iweñtañ. Jempam cñput.

Jém Saulo nic Jerusalén

²⁶ Cuando núc jém Saulo jém Jerusalén, tigiyooba idic jut antuumaneyaj jém icupicneyajwñip Cristo. Pero itumpiy jém pixiñtam tsam icñyajpa. Da icupicpa iga jém Saulo numa icupicneum jém Cristo. ²⁷ Pero jém Bernabé iwagananic jém Saulo. Nic icwiñquej jém apóstolyaj iwiñjom y inmadáypa jutsa miix jém Saulo jém tánomi tunjom y jutsa mijíyáy. Inmadáypatim iga jém Saulo da cñpa inmat jém Damasco jém Jesús iñiyimi. ²⁸ Jesic jemum tsíy Jerusalén jém Saulo. Mojum iwaganasiyay jeeyaj. ²⁹ Seguido inmatpa jém Dios inmati jém tánomi iñiyimi. Da cñpa. Anmatmatneyajpa, añayajpa con jém Israelpic pixiñtam jém ijiyyajpáppic jém griego añmati. Pero jeeyaj tsam iccaayajtooba jém Saulo. ³⁰ Cuando ijodónayaj jém tantiwitam, nanicta Saulo jém attebet Cesarea y de jem cutsatta hasta iticmi jém attebet Tarso.

³¹ Jesic da i imoogíypa jém Dios ipixiñtam icuwiti jém naxyucmi de Judea y de Galilea y de Samaria. Jesic más iwicutiyyayajpa Dios inmati jém icupicneyajwñip Cristo. Tsam iwíwatyajpa porque tsam icñpa tánomi. Dios iAnama iyoxpátpa iga tsam jáyanap jém Dios ipixiñtam.

Acpista jém Eneas

³² Jesic jém Peto nicpa ijooyáy jém tantiwitam yim jeexic. Nictim ijooyáy jém icupicneyajwñip Cristo jém attebet Lida. ³³ Jemum ipát tum pixiñ iñiyi Eneas. Ocho amtiy mimne icheesmi. Tusacane icumij. ³⁴ Jesic jém Peto iñímáy:

—Eneas, Jesucristo micpíspa. Tsucumi. Piñi jém immoncuy.

Jesic jeeti rato tsucum jém Eneas. ³⁵ Jesic itumpiy jém pixiñtam jém ityajwñip jém attebet Lida y Sarón iixyay iga pisneum. Ichacyaj jém wiñicpic añquímayooyi, moj icupicyaj jém tánomi.

Acpista jém Dorcas

³⁶ Jeetim tiempo it idic jém attebet Jope tum yomo icupicnetim Cristo. Iñiyi Tabita. Jém añmatimi griego nimtooba Dorcas. Yip yomo tsam iwíwatpa, iyoxpátpa jém yaachayajpáppic. ³⁷ Jesic jeetim tiempo mimneactiñ jém yomo, ocmi ca. Jesic acchíyayta jém imijtay. Nanicta tum cuarto jém tungac pisoyucmi. ³⁸ Jém attebet Jope da juumi de jém attebet Lida. Cuando imatonyaj iga it jém Peto jém attebet Lida, jém icupicneyajwñip Cristo icutsatyaj wisten pixiñ iga niguiñ inwejay jém Peto. Iñímáy:

—Jicsciy nñi jém Jope.

³⁹ Jesic nic jém Peto con jém miññeyajwñip inwejay. Cuando núc jém Jope, nanicta jém cuarto jut it jém tsúts jém yucmipic piso. Itumpiy jém cunoytam intuumaneyaj. Tsam weyajpa. Inquejayajpa jém Peto jém wibic tecxi y yooti jém iñúnwñip jém Dorcas cuando vivonam. ⁴⁰ Jesic Peto iñímáy iga pudiñ itumpiy jém ityajwñip cuartojom. Costeñneactiñ, moj inwejpát Dios. Iámseedáy jém yomo jém caanewñip, iñímáy:

—Tabita, tsucumi.

Jesic jém yomo ictoj iixcuy. Cuando iix jém Peto, coñchucum. ⁴¹ Jém Peto imatsáy ici, ijictsucum. Inwejay jém tantiwitam y jém cunoytam. Inquejay iga pisneum. ⁴² Icuwiti jém

atbet Jope imatonjaj ti iñasca jém yomo. Tsam jáyan icupicyaj jém tánomi. ⁴³ Tsíy jém Peto jém atbet Jope watña jama tum pxiñ iticim. Iñiyi Ximoj jém pxiñ, icinpáppic cuero.

10

Jém Peto y Cornelio

¹ It idic jém atbet Cesarea tum pxiñ iñiyi Cornelio. Capitán idic, injacpa tum batallón, jém grupo iñiyi jém Italiano. ² Yíp pxiñ ijisyajpa Dios con itumpiy jém ichixtam y itiwitam. Icinjajpa Dios. Ichiiba tumiñ jém yaachajpáppic iga iyoxpátpa. Siempre injejpátpa Dios. ³ Tum jama como las tres de la tarde iix tum poñ. Iñuntawix iga tigiy hasta jut it jém Cornelio tum sinyucmipic pxiñ jém icutsatnewip Dios. Iñímáy:

—¡Cornelio!

⁴ Jém Cornelio agui iámpa jém sinyucmipic pxiñ, tsam pimi cinne. Jesic icwác. Nimpa:

—¿Ti, mánomi?

Jesic jém sinyucmipic pxiñ iñímáy:

—Dios mimatónayñeum jém iñoración. Ijodon iga agui iñyoxpátpa jém yaachajpáppic y Dios tsam iwianjam. ⁵ Sip cutsati algunos pxiñtam jém atbet Jope iga injejáypa tum pxiñ iñiyi Ximoj, iñiyitim Peto. ⁶ Yíp pxiñ it jém tungac Ximoj iticim jém icinpáppic cuero. It jém lamar añaca. Jém pxiñ minmadáypa ti wiap injwat.

⁷ Jesic nic jém sinyucmipic pxiñ jém inimiñnewip jém añmati. Jém Cornelio injejáy wisten jém imozo y tum soldado. Jém soldado siempre iwatpa juuts pimiytap. Ijispatim Dios. ⁸ Jesic jém Cornelio injmadáy itumpiy ti iix y ti iñímáy jém sinyucmipic pxiñ. Ocmi icutsat jém atbet Jope.

⁹ Jesic icuquejama nic imétsyaj jém Peto. Iganam niquiyaj tunjom cuando núctooban nocojom jém atbet Jope, jesic jeeti rato quim jém Peto jém yucmipic piso iga injejpátpa Dios. Cugapjama. ¹⁰ Pimi yuane jém Peto, agui wictooba, pero iganam sip iwadayta iwíccuy, iix tum poñ. ¹¹ Iix iga aháy jém sin. Juuts tum mijpic manta jimquetta hasta naxyucmi, tsénayñeta icucuatro itatsic. ¹² Ityaj jém mantajom itumpiy jém animat yíp naxyucmipic, jém cuatropic ipuy, jém tsañyaj y jém jonyaj. ¹³ Ocmi imaton tum jiyi. Nímayta:

—Peto, tsucumi, accai, cuuti.

¹⁴ Pero jém Peto icutson. Nimpa:

—Mánomi, da queman oypa añcút jém dapic wi tancút, ni jém ninyajpáppic iga tactañcaíypa.

¹⁵ Eybictim jiyayta. Nímayta:

—Jém Diospic iwitsac iga wi tancút, da i wiap iñim iga tactañcaíypa.

¹⁶ Jempigam iñasca tuciy. Ocmi eybictim quim jém manta sinyucmi. ¹⁷ Iganam amanjac jém Peto iga iix jém poñ, núcyaj jém tiganaca jém pxiñtam jém icutsatnewip jém Cornelio. Acwágooyajpa jém Ximoj iticim. ¹⁸ Cuando núcyaj iticim, pimi jiy. Icwacyaj siiga jemum it jém Ximoj iñiyitim Peto. ¹⁹ Iganam Peto sip ijis ti nimtooba jém poñ, Dios iAnama iñímáy:

—Aami, sip miméts tucuten pxiñ. ²⁰ Tsucumi, queti jém yucmipic piso, nicsim con jeeyaj. Odoy cini porque ich mancutsadayñe.

²¹ Jesic quet jém Peto, nic iam jém tucuten pxiñ jém icutsatnewip jém Cornelio. Iñímáy:

—Icham jém ammétstampáppic. ¿Tiiga mimiñta yim?

²² Jesic iñímáy jém pxiñtam:

—Amiñta porque acutsatta jém capitán Cornelio. Je tum wibic p̄ixiñ, tsam iwatpa juuts ixunpa Dios. Itumpiy jém Israelpic p̄ixiñtam tsam iwianjamyaj, tsam itoyyajpa jém capitán. Da más pecam oy iwiñquejay tum s̄nyucmipic p̄ixiñ jém icutsatnew̄ip Dios. Nimpa jém s̄nyucmipic p̄ixiñ iga miñwejayiñ iticcim iga imatonpa jém capitán mich ininmati. ²³ Jesic jém Peto iñimáy jém p̄ixiñtam:

—Tigiyi.

Jemum tsíyyaj jém tsuu con jém Peto. Icuquejama waganicyajpa jém Peto con jeeyaj. Iwagananicyajpatim algunos jém tantiwitam jém ityajw̄ip jém attebet Jope. ²⁴ Jesic jém tungagam más jama, núcyaj jém attebet Cesarea. Jemum injócneyaj jém Cornelio con algunos itiwitam y con jém más wibic iamigoyaj jém inwejayñew̄ip. ²⁵ Cuando núc jém Peto jém Cornelio iticcim, put jém Cornelio, miñ iwipictson. Costeñactij jém Peto iwiñjom iga inwejpáttooba. ²⁶ Pero jém Peto ijictsucum. Iñimáy:

—Teñchucumi. Ich ap̄ixiñtim juuts mimich.

²⁷ Iganam s̄ip inmatyaj, tigíyyaj jém Cornelio iticjom. Jém Peto ipát tsam jáyan p̄ixiñtam an̄tuumaneyaj. ²⁸ Jesic Peto iñimáy:

—Michtam iñjodon iga jém judíos inquímayooyi da ijícpa iga an̄tuumap jém judíos con jém tungac p̄ixiñtam ni datim ijícpa iga tigíypa jém tungac p̄ixiñ iticjom. Pero Dios an̄quejayne iga da w̄i iga tanj̄ispa iga tum p̄ixiñ tactán̄cawatpa, da w̄i iga tanj̄ispa iga tum p̄ixiñ da jex juuts taich. ²⁹ Jeeyucmi cuando mich an̄wejay, amiñ. Da ti an̄jy. S̄ip manacwácpa, ¿tiiga an̄wejay?

³⁰ Jesic jém Cornelio iñimáy:

—Iniitum cuatro día como yiptim hora aif anticcim. An̄watne ayuno. An̄wejpátpa Dios juuts siempre an̄watpa cada cutsuuyaji. Jesic awiñquejay tum p̄ixiñ tsam tsocpa ipuctucu. ³¹ Jém p̄ixiñ anímáy: “MiCornelio, Dios mimatónayneum jém iñoración. Ij̄ispa iga tsam iñyoxpátpa jém yaachayajpáppic.” ³² Anímáytim: “Cutsati algunos jém imp̄ixiñtam hasta jém attebet Jope iga inimiñiñ jém Ximoy iñiyitim Peto. Jém p̄ixiñ it jém tungac Ximoy iticcim jém ic̄npáppic cuero jém itw̄ip lamar an̄naca. Cuando núcpa, miñmadáypa ti w̄iap in̄wat.” ³³ Jeeyucmi jeeti rato an̄cutsat jém amp̄ixiñtam iga niñguñ miméts. Agui w̄i iga mimiñ. S̄ip tantumpiytam taifta yim Dios iwiñjom. Tsam ammaton̄tamtooba itumpiy cosa juuts miñimáy jém tánomi.

Najíyóypa jém Peto jém Cornelio iticcim

³⁴ Jesic jém Peto moj j̄iyi. Nimpa:

—Numa s̄ip tan̄cutiyyíypa iga jém tan̄jatun Dios da iñejaixpa ni tum p̄ixiñ. Itumpiy iixpa jextim. ³⁵ Pero Dios iwipictsonpa itumpiy jém p̄ixiñtam icuw̄iti yip naxyucmi siiga ic̄npa Dios y iw̄iwatpa. ³⁶ Dios icutsadáy jém wibic an̄mati jém Israelpic p̄ixiñtam. Iñimáy iga tawipictsonpa tan̄jatun Dios porque tawiwadáy jém Jesucristo. Je tantumpiytam tánomi. ³⁷ Michtam in̄w̄jodon ti nasne jém naxyucmi de Judea. Jemigam tsucum jém Galilea cuando najíyóypa y acchíhóypa jém Xiwan. ³⁸ Iñjodon̄tim iga ocmi Dios ichi jém Jesús de Nazaret jém Dios iAnama ip̄imi. Iñjodon̄tim iga jut quej nicpa jém Jesús, iw̄iwadáypa jém p̄ixiñtam, ic̄p̄ispa itumpiy jém iyaachwatyajpáppic jém Wocciwiñ. Jém tan̄jatun Dios iwaganait, jeeyucmi w̄iap iwat jempic. ³⁹ Aichtam atsíyta juuts testigo. Anixñeta itumpiy cosa juuts iwat jém attebet Jerusalén y icuw̄iti jém judíos iñaxyucmi. Ocmi jeeyaj iccaayaj, cunúnta cunusyucmi. ⁴⁰ Pero Dios ic̄p̄is jém tucunajama y awiñquejayta aichtam. ⁴¹ Da iwiñquejay itumpiy p̄ixiñtam. No más awiñquejay aichtam jém acupin̄etaw̄ip dende wiñti jém tan̄jatun Dios iga atsíyta juuts testigo.

Awagawícta, awaganícta con je cuando pisneum de jut it jém caaneyajwíip. ⁴² Acutsatta iga anañmadaytámiñ jém pìxiñtam y anañquejaytámiñ iga Dios iccám yíptim Jesús iga juez iga icìpiñpa jém vivopic y jém caaneyajwíppic. ⁴³ Dende wiñigam itumpiy jém Dios inmatcìwiñ inmatyajtìim iga miñpa jém Jesús. Nìmyajpa iga jém icupicpaap jém Jesús, wadaytap perdón jém itánca jém Jesús inñiyimi.

Ipictsonyatim Dios iAnama jém dapic je de Israel

⁴⁴ Iganam síp inmat jém Peto, núc jém Dios iAnama. Ipictsonyay itumpiy jém imatonneyajwíip jém Peto inmati. ⁴⁵ Tsam ipooñanjamyajpa jém Israelpic pìxiñtam jém miñneyajwíip con Peto, jém icupicnewíip Cristo, cuando iix iga chiitaim jém Dios iAnama jém tungac pìxiñtam jém dapic je de Israel. ⁴⁶ Porque imatonnyay iga jìyyajpa jém tungac pìxiñtam inmatimi. Tsam icujípyajpa Dios. ⁴⁷ Jesic Peto inñimáy:

—¿I wíap inñim iga da wíap tanacchin yíp pìxiñtam? Porque ipictsonneum Dios iAnama juustsim taichtam.

⁴⁸ Jesic Peto ipimáy iga acchinjaytaiñ jém pìxiñtam jém Jesucristo inñiyimi. Ocmi cunucsayta jém Peto iga tsíyiñ juna jama con jeeyaj.

11

Jém Peto inmadáypa jém ityajwíip Jerusalén ti inasca jém attebet Jope

¹ Jesic jém apóstolyaj con jém tantíwítam, jém ityajwíip Judea, ijodónayaj iga jém tungac pìxiñtam, jém dapic je de Israel, ipictsonyajtìim jém Dios inmati. ² Cuando set Jerusalén jém Peto, agui icujíyyaj jém Israelpic pìxiñtam jém icupicneyajwíip Jesús. ³ Nìmyaj:

—¿Tíiga oy inñooáy jém tungac pìxiñtam jém dapic je de Israel? ¿Tíiga miwagawícpa con jeeyaj?

⁴ Jesic jém Peto moj inmadáy titam inasca dende wiñti. Inñimáy:

⁵ —Ich aít idic jém attebet Jope. Iganam síp anañwejpát Dios, ánix tum poñ. Ánix juuts tum mijpic manta tsénayñeta icucuatro itatsic, jímquetta dende sinyucmi hasta jut aít. ⁶ Cuando añwíam ti it jém mantajom, ánix yíp naxyucmipic animat jém cuatropic ipuj, jém jimñi animat, ittìim jém tsañ, jém pachì y jém jonyaj. ⁷ Jesic ammaton tum jìyi. Anímayta: “Peto, tsucumi, accai, cuuti.” ⁸ Pero annímáy: “Mánomi, ich da queman añcút jém dapic wì tañcút jém tactañcaiyápáppic.” ⁹ Jesic eybic ajíyáy jém sinyucmipic jìyi. Anímáy: “Jém Diospic iwítsac, da wíap tannim iga da wì tañcút.” ¹⁰ Annasca tucciy. Ocmi eybic jímquímta sinyucmi. ¹¹ Jeeti rato núcyaj tucuten pìxiñ jém ticcìim jut aít idic. Tum Cesareapic pìxiñ icutsat iga miñ améts. ¹² Jém Dios iAnama anímáy iga aniguiñ con jeeyaj y iga odoy acñiñ. Anwagananictatim yíp seis tantíwítam. Antumpiytam atigiyta jém pìxiñ iticjom, tum capitán. ¹³ Anmadáy jutsa miix iticcìim tum sinyucmipic pìxiñ. Miñ inmadáy jém capitán. Inñimáy: “Cutsati algunos pìxiñtam jém attebet Jope iga inimíñiñ jém Ximój inñiyitìim Peto. ¹⁴ Je miñpa inñmadáy jutsap inçiput y jutsap iciputyaj itumpiy jém ityajwíip inñiccìim.” ¹⁵ Cuando moj anañmat jém Dios inmati, ipictsonyay jém Dios iAnama juustsim taichtam matampictson wiñti. ¹⁶ Jesic anjìs ti tanímáy jém tánomi. Nìmpa: “Jém Xiwan acchíjóypa con ni, pero mimichtam impictsontampa Dios iAnama.” ¹⁷ Siiga Dios ichi jém tungac pìxiñtam jém Dios iAnama juuts tachiiñeta taichtam, jém tañcupicnewíip Jesucristo, ¿jesic ich aìapaap iga anícpa contra jém tanjatun Dios?

¹⁸ Jesic cuando imatonnyaj jém tantíwítam, jém ityajwíip Jerusalén, da jìyyaj. Moj icujípyaj Dios. Nìmyaj:

—Jém tanJatur̄ Dios ichiitim lugar jém tunḡac p̄ixiñtam jém dap̄ic je de Israel iga icucacyajpa ij̄xi iga iniitpatim jém vida jém dap̄ic cuyajpa.

Jém Dios ip̄ixiñtam jém attebet Antioquía

¹⁹ Cuando accaatā jém Esteban, jeetim jama moj icpoyyajta los demás jém icup̄icneyajw̄ip̄ Cristo. Cupóyayyaj. Algunos n̄icyaj hasta jém attebet Fenicia, Chipre y Antioquía. Jemigam inmadayyaj jém w̄ib̄ic an̄mati jém Israelp̄ic p̄ixiñtam. Pero da inmaday jém tunḡac p̄ixiñtam jém dap̄ic je de Israel. ²⁰ Pero algunos jém tant̄iw̄itam jém it̄yajw̄ip̄ jém attebet Chipre y Cirene n̄icyaj jém attebet Antioquía. Inmadayyaj jém tunḡac p̄ixiñtam jém dap̄ic je de Israel iga w̄iap̄ ic̄iacputyaj jém tán̄omi Jesús. ²¹ Jém tant̄iw̄itam ts̄am iniit jém tán̄omi ip̄imi. Ts̄am jáyan jém p̄ixiñtam ichacyaj jém wiñ̄icp̄ic an̄químayooyi. Moj icup̄icyaj jém tán̄omi Jesús.

²² Cuando ijodón̄ayaj jém Dios ip̄ixiñtam, jém it̄yajw̄ip̄ Jerusalén, icutsat jém Bernabé iga niguiñ Antioquía. ²³ Cuando núc jém Bernabé, iix iga Dios agui iw̄iwadayñe jém p̄ixiñtam. Jesic agui maymay jém Bernabé. Moj in̄quím̄yaj it̄ump̄iy jém p̄ixiñtam iga iw̄icup̄iguiñ y odoy ichaguiñ jém tán̄omi inmadayooyi. ²⁴ Porque jém Bernabé tum̄ w̄ib̄ic p̄ixiñ, ts̄am iniit jém Dios iAnama. Ts̄am iw̄icup̄icpa iga Dios w̄iap̄. Jeeyucmi jáyan p̄ixiñtam tiḡiyñeyaj iga icup̄icyajpa jém tán̄omi Jesús. ²⁵ Ocmi jém Bernabé nic jém attebet Tarso. Nic iméts jém Saulo. Cuando ipát, inin̄ic Antioquía. ²⁶ Jáy it̄iyaj jemum con jém Dios ip̄ixiñtam. Oy it̄i tum̄ am̄tiy. Inquejáy jáyan p̄ixiñtam jém Dios in̄mati. Yiptim Antioquía moj iccám̄yayajta in̄iyi iga cristiano jém icup̄icneyajw̄ip̄ Cristo.

²⁷ Jeetim tiempo algunos jém profeta, jém it̄yajw̄ip̄ Jerusalén, nic Antioquía. ²⁸ Tum̄ de jeeyaj, in̄iyi Agabo, teñchucum̄ jūt an̄tuumaneyaj jém tant̄iw̄itam. Dios iAnama icjodón̄a ti miñpa. Niñpa iga miñpa tum̄ m̄ijp̄ic yuu icuw̄iti de ȳip̄ naxyucmi. Ocmi numa cupac juuts nim, jém tiempo cuando injacpa jém Romap̄ic an̄jagooyi Claudio. ²⁹ Jesic ocmi jém icup̄icneyajw̄ip̄ Cristo, jém Antioquíap̄ic p̄ixiñtam, moj ij̄isyaj iga icutsadayyajpa tum̄ yoxpádooyi jém tant̄iw̄itam jém it̄yajw̄ip̄ Judea. Ichiiyajpa cada tum̄tum̄ jutsan̄ w̄iayajpa. ³⁰ Jemp̄igam iwatyaj. Cutsadaytā jém yoxpádooyi jém Dios ip̄ixiñtam in̄jagooyiyaj. Oy ichac jém Bernabé y Saulo.

12

Accaatā Jacobo y pajtā jém Peto

¹ Jeetim tiempo moj icpoy jém rey Herodes algunos jém Dios ip̄ixiñtam. ² Accaatā con espada jém Jacobo jém Xiwan it̄iw̄i. ³ Cuando jém Herodes iix iga agui iw̄ian̄jam̄ jém Israelp̄ic p̄ixiñtam, jesic ip̄im̄iytim̄ iga matstaiñ mex jém Peto. In̄asca jemp̄ic cuando wattap̄ jém siñ iga cúttap̄ jém caxtánañi sin levadura. ⁴ Cuando matstā jém Peto, nanictā cárcel. Jém cárcel ts̄am w̄i watnetā cuenta con cuatro grupo de soldado. Cada grupo it̄yaj cuatro soldado. Jém Herodes ij̄ispa id̄ic iga itoppa jém Peto cuando cuyajneum̄ jém siñ iga ic̄ip̄in̄pa jém p̄ixiñtam iw̄iñjom̄. ⁵ Jeeyucmi ts̄iy Peto jém cárcel, ts̄am w̄i watnetā cuenta. Pero jém Dios ip̄ixiñtam ts̄am p̄imi in̄wejpádáypa Dios para je.

Dios itop̄ jém Peto jém cárcel

⁶ Ocmi cuando núc jém tiempo iga jém Herodes ij̄ispa iga itoppa jém Peto, jeetim tsuu mon̄pa Peto cucmi de w̄isten soldado. Tsenne con w̄isten cadena. Algunos jém soldado iwatne cuenta jém cárcel ipuerta. ⁷ Jeeti rato iw̄iñquejáy jém Peto tum̄ siñyucm̄ip̄ic p̄ixiñ jém Diosp̄ic icutsatne. Jém cárcel ijojmī cutsoct̄ic juuts tum̄ jucti. Jesic jém siñyucm̄ip̄ic p̄ixiñ ichigáy jém Peto ipócpac. Ichicyus. In̄imáy:

—Jicsciȳ tsucumi.

Jesic wij jém cadena jém Peto ic̄iyucmi, cutiñ naxyucmi. ⁸ Jém siñyucm̄ip̄ic p̄ixiñ in̄imáy:

—Tsencaami jém iñcinturón immijpacyucmi. Coti inçiac.

Cuando yaj iwat jempic, iñimáy jém sinyucmipic p̄ixiñ:

—Coti iñyooti. Atúñiyi.

⁹ Jesic put jém Peto, mojum itúnjy jém sinyucmipic p̄ixiñ. Pero da icutiyyíy siiga numa ti iwatpa jém sinyucmipic p̄ixiñ. Je ijispa no más iga imawíñ. ¹⁰ Pero nasyaj jut inçeññe jém wiñtipic soldado y jém ocmipic soldado. Cuando núcyaj jut it jém tinçuy puerta jém calle aññaca, añáy iyaac jém puerta. Putyaj, widañnasyaj tum calle, jeeti rato nic jém sinyucmipic p̄ixiñ. Tsíy icutum jém Peto. ¹¹ Jesigam jém Peto icutiyyíy iga numa. Nimpa:

—Sip añcutiyyíy iga numa jém tánomi icutsat tum sinyucmipic p̄ixiñ iga aciacputpa jém Herodes icijom con jém Israelpic p̄ixiñtam icijom jém amalwadaypáppic idic.

¹² Iganam síp ijis jém Peto ti iñasca, nic jém Malía iticçim. Jém yomo jém Xiwan iapa iñiyitim Marco. Jem tsam jáyan p̄ixiñtam añtuumaneyaj. Síp iwatyaj oración. ¹³ Cuando jém Peto itics jém puerta, miñ inçson tum woñi iñiyi Rode. ¹⁴ Imatónactiyyáy iga Peto ijji. Pero jém woñi da inçay jém tic. Tsam maymay, póyançsucum, nic jojmi iga inçmadáy jém añtuumaneyajwip iga núcneum jém Peto jém puerta aññaca. ¹⁵ Pero jeeyaj iñimáy jém woñi:

—Mich miloco.

Pero jém woñi nimpa:

—¡Numa, da je migooyi!

Jesic niymajpa jém p̄ixiñtam:

—¿Que da je Petotim ianama?

¹⁶ Seguido iticspa puerta jém Peto. Cuando inçay jém puerta jém p̄ixiñtam, iixyaj jém Peto, tsam p̄imi ámançyay. ¹⁷ Pero jém Peto iwat seña con icic iga odoy jiyajíñ. Moj inçmadáy jutsa mitop tánomi jém cárcel. Iñimáy jém p̄ixiñtam:

—Añmadaytaami jém Jacobo y los demás jém tantiwitam.

Ocmi put jém Peto, nic tunçac lugar.

¹⁸ Icuquejama p̄imi cujínayñeyaj jém soldadoyaj porque da ijodon ti iñasca jém Peto. ¹⁹ Jém Herodes icutsat jém soldado iga inimíñiñ jém Peto, pero da ipát. Jesic jém Herodes inçwejay jém soldado jém iwatneyajwip cuenta jém cárcel. Icçipin. Ocmi ipimíy iga accaayajtáñ itumpiy de jeeyaj. Jesic put jém Herodes jém naxyucmi de Judea, nic iti jém atebet de Cesarea.

Ca jém Herodes

²⁰ Jesic jém Herodes tsam p̄imi ijóyixpa jém p̄ixiñtam jém ityajwip jém atebet de Tiro y Sidón. Pero jém p̄ixiñtam iwatyaj acuerdo con jém Blasto, tum mijpictim añjagooyi, icuyoxap jém rey Herodes. Iyojyaj jém Blasto iga iyoxpáñ. Iacunucsay iga odoy imoogiyajíñ jém rey porque jém p̄ixiñtam ipicpa iwíccuy jém rey Herodes iñaxyucmi. ²¹ Jém Herodes inçwejay jém p̄ixiñtam. Iñimáy júp jama miñyajíñ. Jesic jém jama icot jém rey ipuctucu. Nic coñi jém icõncuyucmi jut çipínóypa. Moj najíyooyi. ²² Jesic jém p̄ixiñtam, jém inçwejayñeyajwip, tsam p̄imi jiyajpa, tsam icujípyajpa jém Herodes. Niymaj:

—Yimpic jypa da je p̄ixiñ, tum dios.

²³ Jeeti rato tançatun Dios icutsat tum sinyucmipic p̄ixiñ iga icmimneñ jém Herodes porque da icujíppa Dios. Más iwiançam iga cujiptáñ iyaac. Jempigam ca. Jém tsuuquiñ icútyaj.

²⁴ Pero jém tánomi inçuímayooyi más jáyanap. Añmattap jutinçuej jém añmati.

²⁵ Jesic jém Bernabé y Saulo cuando cuyaj jém iyoxacuy, putyaj Jerusalén. Setyaj iticmi. Iwagananicyajpa jém Xiwan iñiyitim Marco.

13

Jém Bernabé y Saulo moypa iwat jém yoxacu y iga ininicpa Dios inmatí juumi

¹ Jesic jemigam jut antuumayajpa jém Dios ipixiñtam, jém attebet Antioquía, ityaj jém Dios inmatciwiñ y jém wibic maestroyaj. Ityaj jém Bernabé; jém Ximoj iniyitim Niger; jém Lucio, jém Cirenepic pixiñ; jém Manaén, icuyoxap idic jém Herodes jém gobernador de Galilea; ittim jém Saulo. ² Tum jama cuando antuumaneyaj jém pixiñtam iga ijspa jém tánomi y iwatyajpa ayuno, Dios iAnama inímáy jém pixiñtam:

—Tsaci aparte yíp Bernabé y Saulo jém ancupinewiip iga acuyoxap.

³ Iwatyaj ayuno jém Dios ipixiñtam, inwejpátyaj Dios, iccámayyaj ici jém Bernabé y Saulo icobacyucmi. Jesic nanquimayjta.

Jém apóstolyaj inmatyajpa jém Dios inmatí jém attebet Chipre

⁴ Jesic Dios iAnama icutsat jém Bernabé y Saulo. Nicyaj jém attebet Seleucia. Jemum tigiyay barcojom iga nicpa jém isla de Chipre. ⁵ Cuando núc jém attebet Salamina, moj inmat jém Dios inmatí jém judíos imasticjom, jém sinagoga. Iwagananicajtim jém Xiwan iga iyoxpátpa. ⁶ Inmatyaj yim jeexic icuwiti jém isla de Chipre. Núcyaj jém attebet Pafos. Jemum ipát tum nawat iniyi Barjesús. Nimpa iga tum Israelpic anmatciwiñ, pero je tum migoypaap. ⁷ Jém nawat it idic con jém gobernador Sergio Paulo. Yíp anjagooyi tsam jixiy. Inwejay jém Bernabé y Saulo porque agui imatontooba jém Dios inmatí. ⁸ Pero jém nawat, iniyitim Elimas, nicpa en contra de jém Bernabé y Saulo. Da ichiitooa lugar jém gobernador iga icupiguiñ Cristo. ⁹ Jesic jém Saulo, iniyitim Pablo, tsam iniit jém Dios iAnama. Iwiámmats jém nawat. ¹⁰ Inímáy:

—Mimigoypaap, tsam malopic mipixiñ, Wocciwiñ mimanic. Mich tsam mienemigo de itumpiy jém witampic cosa. Agui inwótpa jém tánomi inquimayoooyi jém numapic. ¹¹ Siip jém tánomi michiiba castigo. Siip micáhtiap. Juna jama da wiap inix jém jama ichoca.

Jesic jeeti rato imats juuts tum oma jém iixcuy, cupiicha. Moypa iméts i wiap ijictañ. ¹² Cuando jém gobernador iix ti inasca jém pixiñ, icupic Cristo. Agui ipooñanjampa cuando imaton jém tánomi inquimayoooyi.

Jém Pablo y Bernabé nicyaj jém tungac Antioquía jém attebet de Pisidia

¹³ Ocmi jém Pablo con icompañeroyaj tigiy barcojom, putyaj jém attebet Pafos. Nicyaj jém attebet Perge jém naxyucmi de Panfilia. Pero jém Xiwan ichaganput iga iwaganasiiba jeeyaj, set Jerusalén. ¹⁴ Ocmi nasyaj jém attebet Perge, núcyaj jém tungac Antioquía jém itwip jém naxyucmi de Pisidia. Jemum tum jejucuy jama tigiyay jém sinagoga, coñyaj. ¹⁵ Jém sinagoga injagooyiyaj imayyaj jém Dios inmatí, jém Moisés inquimayoooyi y jém ijaychacnewiip jém wiñicpic anmatciwiñ. Cuando yaj imayyaj, jesic jém anjagooyiyaj icutsadáy anmatí jém Pablo. Nímayta:

—Mantiwitam, siiga iniit ti inñimaytooba yipyaj pixiñtam iga ininquimpa, sibam wiap ininmadáy.

¹⁶ Jesic jém Pablo teñchucum. Iwat tum seña con ici iga odoy i jiyiñ, moj inmadáy:

—MiIsraelpic mipixiñtam y mimichtam inçintampáppic tanjatun Dios, matonjaami.

¹⁷ Tanjatun Dios, jém Israelpic pixiñtam iDios, icupin jém wiñicpic tanjatunwewetam. Tsam icjáyanayaj jém tanwewetam cuando oy itiyaj jém naxyucmi Egipto juuts juumipic pixiñtam. Ocmi itop jém naxyucmi de Egipto con ipimi. ¹⁸ Dios iyaachiy iga tsam imalwatyajpa jeeyaj cuando jáy itiyaj cuarenta amtíy jém titsinaxyucmi. ¹⁹ Ocmi Dios ictogoy siete nación jém ityajwiip jém naxyucmi de Canaán iga chiitap jém nas jém tanjatunwewetam. ²⁰ Jesic ocmi Dios iccám jém juezyaj iga injacyajpa jém Israelpic pixiñtam cuatrocientos cincuenta amtíy. Injacyajpa jém juezyaj hasta que núc jém tiempo

de Samuel jém Dios inmatcwiñ. ²¹ Ocmi iwácayaj tum nunta rey iga injaguiñ. Jesic Dios iccám jém Saúl juuts rey iga injacpa cuarenta amtíy. Jém Saúl, jém Cis imaníc, tsucum de jém tribu de Benjamín. ²² Ocmi Dios itop jém Saúl. Accámta jém David iga rey. Nimpa Dios: “Ampát jém David jém Isaí imaníc. Jém ijixi jextim juuts aich. Iwatpa juuts ich anwianjam.” ²³ Yíptim David iocmaníc maníc jém Jesús, jém iciacputpáppic jém Israelpic pixiñtam. Dios ictsucum juuts tajycámayñe wiñigam. ²⁴ Antes que miñpa jém Jesús, jém Xiwan inmadáy itumpiy jém Israelpic pixiñtam iga icucacyajiñ ijixi y iga acchinjaytaiñ. ²⁵ Cuando dam jáyñe iga caaba jém Xiwan, nimpa: “Ich da aje jém michpic inñispa iga miñpa. Pero ocmi miñpa antuuñianchim tum pixiñ más wiap que aich. Ich da ipati iga anwijáypa iciac ipuyyucmi.”

²⁶ Mantiwitam, jém Abraham mimanictam, jém inçintampáppic Dios, taichtam tacutsadayta jém wibic anmati iga taciacputpa Dios. ²⁷ Jém ityajwip Jerusalén y jém injagooyiyaj da ijodonjay iga Jesús je jém icutsatnewip Dios. Datim icutiyyiyajpa cuando imayyajpa cada jejcuy jama jém anmati jém ijaychacnewip jém wiñicpic anmatcwiñ. Cuando accaata jém Jesús, cupacpa iwat juuts nim jém wiñicpic anmatcwiñ. ²⁸ Mex da ipadayyaj itánca jém Jesús iga accaataiñ, jém pixiñtam iwágáy jém Pilato iga accaataiñ. ²⁹ Cuando jém pixiñtam yaj imalwadayyaj jém Jesús juuts ijaychacne jém wiñicpic anmatcwiñ, icquetyaj jém icunusyucmi, icumyaj. ³⁰ Pero Dios icpis de jut it jém caaneyajwip. ³¹ Watña jama iwiñquejáy jém icuyujcwiñ jém iwaganamiñnewip de Galilea a Jerusalén. Siip jeeyaj tsíyyaj juuts testigo iga inmadayyajpa jém pixiñtam iga numa pisneum.

³² Siip aichtam manaquejáypa jém wibic anmati jém Diospic ijycámayñe jém wiñicpic tanjatunwewetam. ³³ Siip Dios iccupac jém promesa para taichtam jém wiñicpic pixiñtam tamanictam. Iccupac Dios cuando icpis jém Jesús, juuts jaychacnetá jém salmo dos. Nimpa:

Mich mammaníc.

Yíp jama manchi jém vida.

³⁴ Jém tanjatun Dios ijyachacne iga icpispa jém imaníc de jut it jém caaneyajwip iga jém imijtay da púcpa. Yimpic nimpa jut jaychacnetá:

Manyaachanjampa,

manwíwadáypa juuts anjycámayñe jém David.

³⁵ Jeeyucmi nimpatim jém tunjac salmo:

Da anjícpa iga púcpa imijtay jém acuyoxapaap,
jém tsampic antoypa.

³⁶ Numa jém David tsam icuyoxa jém itiwitam juuts iwianjam Dios. Ocmi ca, cumta juttim cumneyaj jém ijatunwewe, púc jém imijtay. ³⁷ Pero jém icpisnewip Dios, da púc jém imijtay. ³⁸ Mantiwitam, jodonataami iga yíptim Jesús inñiyimi minmadaytamtap iga Dios miwadaytampa perdón jém inñánca. ³⁹ Yíp pixiñ inñiyimi itumpiy jém icupicneyajwip Jesús wadaytap perdón itumpiy jém itánca jém dapic wiap iwitsagáy jém Moisés inquímayoyi.

⁴⁰ Nawattamtaji cuenta mimichtam iga da inñascaaba juuts ijaychacne jém wiñicpic anmatcwiñ. Nimpa yimpic:

⁴¹ Mimalopic mipixiñtam, tsam inñiccatámpa jém wibic cosa.

Núcpa jama iga agui miámanjacpa, pero mitogoypa.

Porque ich aDios anwatpa tum mijpic cosa jém tiempo de mimichtam.

Pero mimichtam da incupictámpa mex i minmadáypa.

⁴² Iganam putyaj jém Pablo con icompañeroyaj jém sinagoga, jesic jém pixiñtam inñimayyaj:

—Yíp tunjac jejcuy jama miñi anmadaytaami eybic jém siippic ammatonja.

⁴³ Cuando cupudayyaj de jut antuumaneyaj, jesic tsam jáyan jem judíos con jem tungac pixiñtam, jem iwianjamyajpáppic jem Moisés inquímayooyi, itúnjyyajpa jem Pablo y Bernabé. Jesic jeeyaj inquímpa jem pixiñtam iga seguido icupiguiñ y odoy ichaguiñ jem Dios itóyooyi.

⁴⁴ Jesic jem tungac semana jem jejcuy jama antuumayajpa casi itumpiy jem ityajwiip jem attebet iga imatonjajpa jem Dios inmati. ⁴⁵ Pero cuando jem judíos iix iga antuumaneyaj tsam jáyan pixiñtam, jesic tsam najajoyajpa, moj imalmalnímayyaj jem Pablo. Nimyajpa iga tsam migóypa. ⁴⁶ Jem Pablo y Bernabé da cñpa inmat. Inímáy:

—Tienes que wiñti manañmadáypa jem Dios inmati mimichtam miIsraelpic mipixiñtam. Pero como da impictson̄tooba jem vida jem dapic cuyajpa, siip ananigáypa jem wibic añmati jem tungac pixiñtam jem dapic je de Israel. ⁴⁷ Porque jem̄pigam tanímáy jem tan̄jatun̄ Dios. Nimpa yñmpic:

Manaccám juuts tum wibic jucti para jem tungac pixiñtam jem dapic je de Israel.

Mancutsatpa iga inin̄cpa jem wibic añmati iga Dios iciacputtooba jem pixiñtam icuw̄iti yip naxyucmi.

⁴⁸ Jesic cuando imatonjaj jem tungac pixiñtam, jem dapic je de Israel, agui maymayyaj. Nimyajpa:

—¡Yíp Dios inmati tsam wi!

Jesic icupicyaj itumpiy jem icupin̄newiip Dios iga ipictson̄yajiñ jem vida jem dapic cuyajpa. ⁴⁹ Jesic añmattap jem Dios inmati icuw̄iti jem naxyucmi de Pisidia. ⁵⁰ Pero jem judíos tsam ijóyixyajpa jem wibic añmati. Moj ictsucum iga icpóyiyajpa jem Pablo y Bernabé. Jem malopic judíos inímáy jem wibic yomtam con jem miipic añjagooyiyaj iga iyoxpádiñ. Jesic moj icpóyiyaj hasta icquebacputyaj jem naxyucmi de Pisidia. ⁵¹ Jesic cuando putyaj jem Pablo y Bernabé, icunebayyaj jem pótpót ipuyucmi iga quejiñ iga jem pixiñtam da ipictson̄yaj jem Dios inmati. Ocmi nicyaj jem attebet Iconio. ⁵² Pero jem icupicneyajwiip Cristo jem attebet Antioquía tsam maymayyaj. Tsam iniityaj Dios iAnama.

14

Jém Pablo y Bernabé it jem attebet Iconio

¹ Jesic jem attebet Iconio jem Pablo y Bernabé wagatigiyyaj jem judíos isinagoga. Como tsam wiap inmatyaj jem wibic añmati, tsam jáyan pixiñtam icupicyaj jem Cristo. Icupicyajtim jem judíos con jem griegopic. ² Pero jem judíos, jem dapic icupicpa, tsam pimi imalnímayyaj jem Pablo y Bernabé. Icjóyixajtim jem tungac pixiñtam jem dapic je de Israel. ³ Jeeyucmi tsíyyaj jemum jem Pablo y Bernabé watña jama. Da cñpa inmat porque ijodon̄ iga iyoxpátpa jem tán̄omi. Numa Dios inquejáypa jem pixiñtam iga da migóypa jem Pablo cuando inmatpa de jem Dios itóyooyi. Chiit̄atim jem Dios ipimi iga wiap iwat jem milagro y jem seña jem dapic oypa tánix. ⁴ Pero nawécyajta jem pixiñtam jem ityajwiip jem attebet. Algunos iwianjamyaj jem judíos inquímayooyi, algunos iwianjamyaj jem apóstol inquímayooyi. ⁵ Ocmi jem judíos con jem tungac pixiñtam iwatyaj acuerdo con jem añjagooyiyaj iga imalwadayyajpa jem Pablo y Bernabé, iga inácscayajpa tsaami. ⁶ Pero jem Pablo y Bernabé cuando ijodón̄ayaj, poyyaj, nicyaj jem attebet Listra y Derbe jem naxyucmi de Licaonia. Nasyaj itumpiy jem attebetyaj jem nocojompic it ⁷ iga inmatyajpa jem wibic añmati.

Yigayta tsaami jem Pablo jem attebet Listra

⁸ Jém attebet Listra coñ tum cuxuj calle aññaca. Da nunca wiap iwit porque cuxuj miñay. ⁹ Jém p̄ixiñ s̄ip imatoñ ti n̄impa jém Pablo. Jesic jém Pablo iámmats, iix iga tsam icup̄icpa iga Dios wiap icp̄is. ¹⁰ Jesic jém Pablo ij̄iyáypa p̄imi. N̄impa:

—¡Tsucumi, numteñi!

Jém p̄ixiñ teñchucum, yóyquím, mojum w̄iti. ¹¹ Cuando jém p̄ixiñtam iixyay ti iwat jém Pablo, p̄imi j̄iyaypa jém Licaoniap̄ic añmat̄imi. N̄imyaipa:

—Quetneum w̄isten diosyay, jex juuts p̄ixiñ.

¹² Ij̄isyay jém p̄ixiñtam iga jém Bernabé jém dios Júpiter y jém Pablo jém dios Mercurio porque je agui añmatpa. ¹³ Jém pañij, jém icuyoxap̄ap̄ic jém dios Júpiter, iniit imastic jém attebet aññaca. Inimiñ jut̄en xix tsam iw̄iaccuyajne con jém moya. Jém pañij con jém p̄ixiñtam iccaayajtooba jém xix juuts tum sacrificio jém Pablo iwiñjom iga ij̄isyaypa juuts tum dios. ¹⁴ Pero jém apóstolyay, jém Pablo y Bernabé, cuando icutiyyay ti iwatpa jém p̄ixiñtam, jesic ichiccujac jém iyooti. Tiḡiy jém p̄ixiñtamanjom, moj j̄iyi p̄imi. ¹⁵ N̄impa:

—¡Mip̄ixiñtam! ¿Tiiga inwattámpa jemp̄ic? Ich ap̄ixiñ juuts mimichtam. Jeeyucmi amiñ iga manactsactámpa jexp̄ic j̄ixi jém dap̄ic tayoxp̄átpa. Cup̄ici jém vivop̄ic Dios jém iwatnew̄ip s̄iñ, nas y lamar. Itump̄iy jém Dios iw̄ati. ¹⁶ Wiñigam Dios ij̄ic iga itump̄iy jém p̄ixiñtam iwatyajpa con ij̄ixi juuts ixunpa iyaac. ¹⁷ Pero dende wiñigam tanquejáypa juutsp̄ic Dios jém tanjat̄uñ Dios. Tsam taw̄iwadáypa. Icchijóypa tuj iga tanaittámpa w̄ib̄ic cosecha. Tachiiba titam tanj̄cútpa iga tamaymáyp.

¹⁸ Mextim inmadáypa jemp̄ic, jém Pablo tsam t̄añca ic̄tsac jém p̄ixiñtam iga iccaaba jém xix iga iwadáypa sacrificio jém Pablo y Bernabé iwiñjom.

¹⁹ Ocmi miñyajt̄im jem jém malop̄ic judíos, jém ityajw̄ip jém Antioquía y jém Iconio. Moj icumigoyyay jém p̄ixiñtam iga Pablo icuj̄ypa Dios. Jesic iccup̄icyay, iyigayyay tsaami jém Pablo. Ij̄isyay iga caaneum. Ij̄icputyay añs̄icmi de jém attebet. ²⁰ Pero cuando icuyujc̄iwiñ in̄tuumaçayaj jém Pablo, eyb̄ic tsucum, tiḡiy jém attebet. Jém tun̄gac j̄ama put jém attebet con jém Bernabé, n̄icyay jém attebet Derbe. ²¹ Ocmi cuando yaj in̄mat jém w̄ib̄ic añmat̄i jém attebet Derbe, tsam j̄ayan tiḡiyyay iga icup̄icyajpa Cristo. Jesic set̄ jém attebet Listra, jém Iconio y jém Antioquía. ²² Cuando nasyay jém tun̄gac attebet̄yay tsam iyoxp̄átpa jém icup̄icneyajw̄ip Cristo. Inquímpa iga odoy ichaguiñ jém Dios in̄mat̄i. In̄imayyajpatim iga tienes que tayaachwatt̄ap y tacut̄it̄stap iga tanúcpa jut̄ it̄ Dios. ²³ Accámt̄a tum añjagooyi cada mast̄icjom jut̄ añtuumayajpa jém Dios ip̄ixiñtam. Jesic jém Pablo y Bernabé cuando yaj iwat oración y ayuno, ic̄iñj̄uncot jém añjagooyiyaj jém tán̄omi ic̄iñjom iga iwatyajiñ cuenta jém icup̄icneyajw̄ip Cristo.

Jém Pablo y Bernabé set̄pa Antioquía y Siria

²⁴ Ocmi nasyajpa jém naxyucmi de Pisidia, núcyay jém naxyucmi de Panfilia. ²⁵ In̄matyay jém Dios in̄mat̄i jém attebet Perge. Ocmi n̄icyay hasta tum attebet in̄iyi Atalia. ²⁶ Jemum tiḡiyyay tum barcojom. Set̄ eyb̄ic jém Antioquía, jém attebet jut̄ tsucumyay, jut̄ jém tant̄iw̄itam ic̄iñj̄uncotyay jém Dios ic̄iñjom iga iwatpa cuenta con jém w̄ib̄ic tóyooyi cuando nicpa iwat jém yoxacuy jém sīpp̄ic cuyajneum. ²⁷ Cuando núcyay jém Antioquía, in̄tuumawatyay jém Dios ip̄ixiñtam. Jesic jém Pablo y Bernabé in̄madayyay itump̄iy juuts iwadáy Dios. In̄madáȳtim itump̄iy jutsap̄ in̄yáyay jém puerta jém tán̄omi para jém tun̄gac p̄ixiñtam jém dap̄ic je de Israel iga w̄iñiñtim icup̄icyay. ²⁸ Jesic jeeyay ts̄iyyay w̄ati j̄ama con jém tant̄iw̄itam.

¹ Jesic algunos p̄ixiñtam, jém ityajw̄ip idic Judea, miñyay Antioquía. Moj inquejayyay jém tant̄iw̄itam iga da taciacputt̄ap siiga da tampictson̄pa jém marca de circuncisión jém ictsucumnew̄ip jém Moisés. ² Jesic jém Pablo y Bernabé añayay con jém inimiññeyajw̄ip jém migooyi. Jesic cupiñta jém Pablo y Bernabé con tungac más p̄ixiñtam iga nicpa iw̄itsac jém asunto Jerusalén con jém apóstolyay y jém w̄idaytam, jém injacpáppic jém Dios ip̄ixiñtam.

³ Jesic jém Dios ip̄ixiñtam jém ityajw̄ip Antioquía oy ijagan̄tsacyay tunjom. Ocmi nasyay jém Fenicia y Samaria. Inmadayyay juts̄a micupicyay jém tungac p̄ixiñtam jém dapic je de Israel. Agui maymayyay itump̄iy jém tant̄iw̄itam cuando imatonyay.

⁴ Cuando núcyay Jerusalén jém Pablo y Bernabé, iw̄ipictson̄yay jém Dios ip̄ixiñtam. Iw̄ipictson̄yajt̄im jém apóstolyay y jém w̄idaytam. Moj inmadayyay titam iwadáy Dios con jeeyay. ⁵ Pero jemum it̄tim jut̄en jém fariseoyay, icupicyajt̄im jém Jesucristo inquímayooyi. Teñchucum, n̄imyajpa:

—Jém tungac p̄ixiñtam jém dapic je de Israel tienes que iwatpatim jém marca de circuncisión cuando mojpa icupic Jesús. Tienes que iwatpatim juuts n̄impa jém Moisés inquímayooyi.

⁶ Ocmi an̄tuumayay jém apóstolyay con jém w̄idaytam. Moj ij̄isyay siiga w̄i iga tanwatpa juuts n̄impa jém fariseoyay. ⁷ Cuando yajum añajiyay, teñchucum jém Peto. Iñimáy:

—Mant̄iw̄itam, michtam in̄jodon̄ iga da más pecam Dios acupin̄ de mimichtámanjom iga anañmadáypa jém w̄ibic an̄mañi jém tungac p̄ixiñtam jém dapic je de Israel iga icupicyajiñ mex jeeyay. ⁸ Dios ijodon̄ ti tanj̄ispa tánanamanjom. Tanquejáy iga jém tungac p̄ixiñtam numa icupicyajpatim Cristo porque chiiyajt̄a jém Dios iAnama jut̄stim taichtam. ⁹ Dios da iñejaixpa jém p̄ixiñtam. Iixpa jém tungac p̄ixiñtam jextim juuts taichtam. Dios iccuáyáy ianama porque icupicpatim Cristo mex jeeyay. ¹⁰ Jesic tiiga da in̄cupicpa ti iwatpa Dios. ¿Tiiga in̄icts̄im̄ap jém tant̄iw̄itam con jém wiñicpic an̄químayooyi? Porque ni taichtam ni jém wiñicpic tanjatun̄wewetam da w̄iap tanaccupac juuts n̄impa jém wiñicpic an̄químayooyi. ¹¹ Pero taichtam tan̄cupicpa iga Jesucristo taciacputpa porque ts̄am tatoypa. Tachiiba jém tóyooyi juuts tum xaja. Jemp̄ictim iwadáypa Dios jém tungac p̄ixiñtam.

¹² Jesic itump̄iy jém p̄ixiñtam jut̄ an̄tuumaneyay dam j̄iyay. Moj icumatonyay iganam inmatpa jém Pablo y Bernabé juts̄a miyoxp̄at Dios iga iwat jém milagro y seña entre jém tungac p̄ixiñtam, jém dapic je de Israel. ¹³ Cuando yaj n̄imiyay, teñchucum jém Jacobo, iñimáy jém p̄ixiñtam:

—Mant̄iw̄itam, amaton̄taami. ¹⁴ Tanmadáy jém Peto juts̄a miw̄iwadáy Dios jém tungac p̄ixiñtam cuando moj ip̄ictson̄yay jém Dios in̄mañi. Cupiñyajt̄atim jut̄en de jeeyay iga ts̄íyyajpa juuts jém Dios ip̄ixiñtam. ¹⁵ Cuando iwat jemp̄ic, icts̄íypa jém an̄mañi juuts ijaychacne jém wiñicpic an̄mat̄c̄iwiñ. N̄impa ȳimp̄ic:

¹⁶ Jesic yaj iñasca jemp̄ic, amiñgacpa eyb̄ic iga an̄w̄itsagáypa jém David itic jém act̄in̄new̄ip. An̄watsetpa jomipic jém misanew̄ip, eyb̄ic anact̄eñpa.

¹⁷ An̄watpa jemp̄ic iga jém tungac p̄ixiñtam imétsyajiñ Dios.

Jesic itump̄iy jém cupiñnet̄aw̄ip, jém dapic de Israel, ts̄íyyay juuts ich amp̄ixiñtam.

¹⁸ N̄impa jém tanjatun̄ Dios:

Ts̄am wiñigam jodón̄at̄a iga naspa jemp̄ic.

¹⁹ N̄impatim Jacobo:

—Jeeyucmi ich an̄impa w̄i iga da tammoogíypa jém tungac p̄ixiñtam jém dapic je de Israel cuando ichacpa jém wiñicpic j̄ixi iga icupicyajiñ Dios. ²⁰ W̄i iga tanjáyáypa tum toto iga ichaguiñ iga icupicpa jém watnas, iga odoy pejóyiñ, odoy icúdiñ jém an̄imat

jém pencanewiip ni jém jupcanewiip y odoy icúdiñ jém nipiñ. ²¹ Dende wiñigam it jém inmatpáppic jém Moisés inquímayooyi cada tiganjoj. Maytap jém anmati cada jeucuy jama jém sinagoga.

²² Jesic jém apóstolyaj con itumpiy de jém Dios ipixiñtam con jém wídaytam ijisyaj iga icupinyajpa wisten pxiñ de jeeyaj iga icutsatpa Antioquía con jém Pablo y Bernabé. Jesic cupiñta jém Judas iniyitim Barsabás y tum pxiñ iniyi Silas. Yip wisten tsíy iga jém Dios ipixiñtam injagooyiyaj. ²³ Icutsat tum toto con jeeyaj. Nimpa:

“Aichtam aapóstoltam, con jém wídaytam, con itumpiy jém tantiwitam jém ityajwip yim, mancutsadápa watidios, mantiwitam, jém miitawwip jém atebet Antioquía y jém naxyucmi de Siria y Cilicia. ²⁴ Anjodonaneta iga oyñe yimpic pxiñtam, pero aichtam da ancutsatneta. Yipyaj mimigóyápa, micujíñápa con jém inmati. Mipimíyapa iga inwadiñ jém marca de circuncisión y iga odoy inchaguiñ jém Moisés inquímayooyi. ²⁵ Jeeyucmi ancumunjista iga ancupinpa wisten pxiñ aichtampic iga niguiñ miámta con jém Bernabé y jém Pablo jém tantoypáppic. ²⁶ Yip wisten pxiñ watciy accaatatooba jém tánomi Jesucristo icuyucmi. ²⁷ Jeeyucmi mancutsadápa jém Judas y Silas iga nicpa miñmadáy iyaac itumpiy juuts manjáyápa yip totoyucmi. ²⁸ Dios iAnama da iwianjam iga manactsimmap con jém mijpic anquímayooyi y aichtam anjístampatim jempic. Mananmadápa ti ixunpa Dios iga tanwatpa: ²⁹ Odoy cuuti jém animat imayi, jém accaanetawwip jém watnas iwiñjom, jém watnetawwip sacrificio. Odoy cuuti jém nipiñ ni jém animat jém pencanewiip. Odoy pejooyi. Odoy tsici tunjac yomo. Siiga seguido inwatpa juuts nimpa yip anquímayooyi, jesic inwíwatpa. Jesánam manjáyáy.”

Nicyajpa Antioquía jém cuatro pxiñ

³⁰ Jesic yaj inquímayaj, mojum niquiyaj jém cuatro pxiñtam jém atebet Antioquía. Cuando núcyaj, inuumawatyaj itumpiy jém Dios ipixiñtam. Iciijunodayyaj jém toto. ³¹ Cuando yaj imayyaj jém toto, jém tantiwitam agui maymayyaj porque tsam iyoxpát jém toto. ³² Jém Judas y Silas profetayaj, chiijajta jém jixi iga wíap inmat jém Dios inmati. Tsam inmadayyajpa jém pxiñtam ti ixunpa Dios. Tsam iyoxpátpa iga iwícupicyajpa y da ichacyajpa jém wibic anmati. ³³ Jesic jáy wagañtiyay. Cuando yaj iwat iyoxacuy, jém tantiwitam inquímayaj iga setpa eybic juttim tsucumyay. ³⁴ Pero jém Silas jis iga tsíyapa Antioquía. ³⁵ Tsíyyajtim jém Pablo y Bernabé. Da ichacyaj iga najíyóyapa y inquejáyapa jém pxiñtam jém tánomi inmadayooyi. Jenum tsíyyajtim wati jém tantiwitam.

Jém Pablo eybic nicpa juumi

³⁶ Da watña jama jáyitiyay, jém Pablo inímáy jém Bernabé:

—Nicpa tanjójáy eybic jém tantiwitam itumpiy jém atebet jut moj tanañmat jém tánomi inmadayooyi iga tanjodonap jutsane iitiyaj.

³⁷ Jém Bernabé iwagananictoobatim jém Xiwan iniyitim Marcos. ³⁸ Pero jém Pablo da iwianjam iga iwagananica jém Xiwan porque ichaganput jém yoxacuy jém atebet Panfilia. ³⁹ Ocmi jém Pablo añayaj con jém Bernabé. Mex jeegacti natsaganputyajta. Jém Bernabé ininic jém Marcos. Tigiy barcojom, waganicyaj jém isla de Chipre. ⁴⁰ Jesic jém Pablo icupin jém Silas. Nicyaj. Jesic jém tantiwitam inquímayaj, inwejpátyaj tanjatun Dios iga iyoxpádiñ. ⁴¹ Nasyajpa jém naxyucmi de Siria y Cilicia. Jut quej nicpa iyoxpát jém Dios ipixiñtam iga más wíaiñ iwatyaj juuts ixunpa Dios.

¹ Jesic jém Pablo y Silas nicyaj jém atebet Derbe y Listra. Jemum ipát tum p̄ixiñ jém icupicnew̄ip Cristo iñ̄iyi Timoteo. Jém iapa tum Israelpic yomo, tsam icupicpatim Cristo. Jém ijatun tum griegopic p̄ixiñ. ² Jém tantiw̄itam jém ityajw̄ip Listra y jém Iconio tsam iw̄ixyajpa jém Timoteo. ³ Jém Pablo iwagananictooba jém Timoteo. Jeeyucmi iwadáytim jém marca de circuncisión iga odoy ijóyixiñ jém judíos jut nicyajpa jém Pablo. Porque ijodon̄yay iga jém ijatun griegopic p̄ixiñ. ⁴ Jesic nicyaj, nasyajpa wat̄i jém atebet. Inquejyaypa ti w̄iap iwatyaj juuts ip̄im̄iy jém apóstolyaj y jém w̄idaytam jém ityajw̄ip Jerusalén. ⁵ Jesic jut an̄tuum̄ayajpa Dios ip̄ixiñtam más̄tim icupicyajpa. Cada jama más jāyap.

Imaw̄iñix Pablo tum Macedoniapic p̄ixiñ

⁶ Jém Dios iAnama da ijigáy iga in̄matpa jém Dios in̄mati jém naxyucmi de Asia. Jeeyucmi widañnasyaj jém naxyucmi de Frigia y Galacia. ⁷ Ocmi núcyaj jut tsucum jém naxyucmi de Misia. De jem ijisyajpa iga tiḡyypa jém naxyucmi de Bitinia. Pero Dios iAnama datim ijigáy iga in̄matyajpa jém Dios in̄mati jem. ⁸ Jesic icuw̄idayyay jém naxyucmi de Misia, nicyaj naxwiñ jém atebet Troas jém lamar an̄naca. ⁹ Jesic tsuucim̄ jém Pablo iix tum poñ. Iix iga jemum teñ tum Macedoniapic p̄ixiñ. Iacunucsáypa. Iñimáy:

—Nasi yim̄ Macedonia, miñi ayoxpátaami.

¹⁰ Mu iix jém poñ, jicsciy anaw̄itsactam̄ta iga anictámpa Macedonia. Anjodón̄ata iga numa an̄wejay Dios iga niguiñ anan̄mat jém w̄ibic an̄mati Macedonia.

Cuando ityaj Filipos jém Pablo y Silas

¹¹ Atiḡiyta barcojom jém atebet Troas. Anun̄nicta jém isla de Samotracia. Tun̄gagam jama anúcta jém atebet Neápolis. ¹² De jem anicta hasta Filipos, tum Romapic colonia. Je jém más mijpic atebet de jem parte de Macedonia. Jáy aítitam jemum juna jama. ¹³ Tum jeicy jama aputta an̄sicmi de jem atebet. Anicta tum ni an̄naca. Anúcta tum lugar jut siempre in̄wejpátyajpa Dios. Acoñta, moj anan̄madayyay jém Dios in̄mati jém yomtam jém an̄tuuman̄eyajw̄ip jem. ¹⁴ Tum de jeeyaj iñ̄iyi Lidia. Jém yomo tsucum jém atebet Tiatira. Imáypa jém w̄ibic puctucu jém color morado. Tsam ijispa Dios. Iw̄imatop̄a jém Dios in̄mati. Jém tán̄omi in̄áyáy jém yomo ianama iga iwadáyñ caso ti n̄impa jém Pablo. ¹⁵ Jesic acchin̄ta jém Lidia. Acchin̄yajt̄atim itump̄iy jém ityajw̄ip iticcim̄. Ocmi icunucsáy jém Pablo. Iñimáy:

—Siiga iñ̄ispa iga an̄w̄icupic jém tán̄omi, miñi mich̄iyi ich anticcim̄.

Jesic an̄cupicta, ats̄iyta.

¹⁶ Jesic tun̄gagam jama anictámpa eybic jém lugar jut iwatyajpa oración. Tun̄jom ampát tum woñi juyñeta, tum esclava. Iniit tum mal espíritu. Jém woñi tum sabio. Iméts̄pa suerte. Tsam iw̄icoñw̄yypa tumiñ para jém iomi jém ijuyñew̄ip. ¹⁷ Yip woñi moj atún̄iyta aichtam. Pimi j̄yypa jém woñi, n̄impa:

—Yip p̄ixiñtam icuyoxap jém yucm̄ipic Dios. In̄matyajpa jutsap taciaput Dios.

¹⁸ Jempam iwat jém woñi wat̄ña jama. Ocmi jém Pablo ijóyca. Iámseedáy, iñimáy jém mal espíritu:

—Jém Jesucristo iñ̄iyimi man̄imáypa, puti yip woñi ianaman̄jom.

Jeeti rato jém mal espíritu ichacum jém woñi.

¹⁹ Pero mu iix jém woñi iomi iga da más icoñw̄yypa tumiñ, jesic matsta jém Pablo y Silas. Nanicta jém an̄jagooyicim̄ jém plaza an̄naca. ²⁰ Ichījun̄cot jém juez ic̄ijom. N̄impa jém woñi iomi:

—Yipyaj judíos tsam iccujíñáypa jém p̄ixiñtam jém ityajw̄ip tán̄atbet. ²¹ Inquejpa tum an̄quím̄ayooyi jém dapic w̄iap tan̄cuyucata porque taichtam taRomapic tap̄ixiñtam.

²² Ocmi tsucumyaj jém p̄ixiñtam iga iquejajwadayyajpa jém Pablo. Jém juez ip̄imíy iga ichodayyaj iñ yooti iga cóststaiñ con waycuy. ²³ P̄imi icótsyaj, ocmi icotyaj cárcel. P̄imiyta jém carcelero iga iw̄iwadiñ cuenta. ²⁴ Cuando ip̄ictson jém orde, icot jém Pablo y Silas jém más jojm̄ip̄ic cuarto de jém cárcel. Codayta ip̄uy tum cuycotcuyjom, acmatsta tum cadena.

²⁵ Cuando núc cugaptsu, jém Pablo y Silas iwatyajpa oración; iwánayyajpa Dios tum himno. Jém tun̄gac preso imaton̄yajpa. ²⁶ Jeeti rato tsam p̄imi ȳispa jém nas. Tsam p̄imi ixics jém cárcel. Jeeti rato ánȳay itump̄iy jém ipuerta. Ánȳayaj itump̄iy jém cuycotcuy icadena, cutsigayyajta itump̄iy jém preso. ²⁷ Jesigam yus jém carcelero. Iix iga ánȳayñeum itump̄iy jém cárcel ipuerta. Itop imach̄iti iga nacaatap iyaac porque ij̄ispa iga cupóyayñeyajum itump̄iy jém preso. ²⁸ Pero jém Pablo p̄imi ij̄iyáy. Iñímáy:

—Odoy wati jemp̄ic. Da apoyñeta, antump̄iytam aitta yim.

²⁹ Jesic jém carcelero iwác jucti. Tigiy poyimi jém cárcel. P̄imi cuetsáypa, tsam c̄iñne. Ocmi costeññeactiñ jém Pablo y Silas iw̄iñjom. ³⁰ Ocmi itop jém Pablo y Silas. Icwác. Iñímáy:

—Mip̄ixiñtam, ¿ti w̄iap an̄wat iga aciacputtap?

³¹ Jesic jém Pablo y Silas iñímáy:

—Cup̄ici tánomi Jesucristo. Jesic mic̄iacputpa, c̄iacputtap̄tim itump̄iy jém ityajw̄ip̄ iñicc̄im.

³² Jesic moj in̄madáy Dios in̄mati jém carcelero con itump̄iy jém ityajw̄ip̄ iticc̄im.

³³ Jeetim hora, tsuuc̄im, danam cuquejne, jém carcelero icheáy jém Pablo y Silas icoowaji. Jesic jeeti rato acchin̄yajta jém p̄ixiñ con itump̄iy jém ityajw̄ip̄ iticc̄im. ³⁴ Ocmi in̄nic iticc̄im jém Pablo y Silas iga acw̄icyajtap. Agui maymay jém p̄ixiñ con itump̄iy jém ityajw̄ip̄ iticc̄im porque icup̄icyaj Dios.

³⁵ Icuquejama jém juezay icutsatyaj juten jém policía iga iñímáy iñ jém carcelero iga icutsigáy iñ jém Pablo y Silas. ³⁶ Jesic ocmi jém iwatnew̄ip̄ cuenta jém cárcel in̄madáypa jém Pablo:

—Ap̄imíy jém juezay iga man̄cutsigáy iñ. Siip̄ puttaamim. Chogoyñicsim.

³⁷ Pero jém Pablo iñímáy:

—Aunque aichtam aRomap̄ic, acóststamta jém p̄ixiñtam iw̄iñjom ni da i ac̄ip̄iñ. Acotta cárcel. ¿Que ij̄isyajpa iga siip̄ ayamcutsigayyajtooba? Da w̄iap. Más w̄i iga miñyajiñ jeeyaj iga acutsigayyajpa iyaac.

³⁸ Jém policía nic in̄madayyaj jém juezay. Jesic tsam p̄imi c̄iñyay jeeyaj cuando imaton̄yaj iga Romap̄ic p̄ixiñtam. ³⁹ Jesic miñyay jém juezay iga iwágáypa perdón jém Pablo y Silas iga tsam imalwadáy. Iacunuc̄sáy iga pud̄iñ jém atebet. ⁴⁰ Cuando yajum puti cárcel jém Pablo y Silas, nic jém Lidia iticc̄im. Nic iámyaj jém tant̄iw̄itam. In̄químyaj ti w̄iap iwatyaj. Ocmi nicyajum.

17

Cujñáypa jém Tesalónicap̄ic p̄ixiñtam

¹ Jesic jém Pablo y Silas nasyaj jém atebet de Anfíp̄olis y Apolonia. Ocmi núcyaj jém atebet Tesalónica jut it tum jém judíos isinagoga. ² Juuts siempre jém Pablo tigiyta jut an̄tuumaneyaj. Tucunasemana in̄quejáypa Dios in̄mati cada jej̄cuyjama. ³ In̄quejáy jém p̄ixiñtam jut jayñeta jém Dios in̄mati. In̄madáypa iga tienes que yaachwattap jém Cristo y ocmi acp̄istap. Iñímáytim:

—Yíptim mismo Jesús siip̄ man̄madáypa, je jém Cristo.

⁴ Jesic algunos jém Israelp̄ic p̄ixiñtam icup̄icyaj, in̄pitsyaj jém Pablo y Silas. Icup̄icyajtim jáyan jém griegop̄ic p̄ixiñtam jém ij̄isyajp̄ap̄ic Dios y wati jém w̄itamp̄ic

yomtam jém jixiywïp. ⁵ Ocmi jém judíos, jém dapic icupicyajpa jém wibic aḡmaṡi, tsam najajóypa. Anṡuumayaj con algunos jém malopic pïxiñtam jém dapic yoxayajpa, jém witwidoypáppic calle. Ictsucumyay tum mijpic bulla iga iccujíñáypa jém pïxiñtam. Inácsayyaj jém Jasón itic. Imétstip jém Pablo y Silas iga itopyajpa iga ininicyajpa jém pïxiñtam iwiñjom. ⁶ Pero cuando da ipát jém Pablo ticjom, matsyajta jém Jasón con algunos jém tantiwitam. Ijicteñyay hasta jém anjagooyicim. Jém pïxiñtam pimi anweyjajpa. Nimyajpa:

—Yíbam pïxiñtam iccujíñayñeyaj icuwiti yíp naxyucmi. Sïp núcneyajum yim. ⁷ Yíp Jasón ipictsonne iticcim. Itumpiy de jeeyaj da iwatyajpa juuts nïmpa jém Romapic anquímayooyi. Nimyajpatim iga it tunḡac rey, jém Jesús.

⁸ Jesic jém pïxiñtam con jém anjagooyiyaj tsam pimi cujínayyaj cuando imaton ti nïmyajpa. ⁹ Jesic jém Jasón con icompañeroyaj ichiyyaj tumiñ jém anjagooyi iga odoy más idiñ jém bulla. Ocmi cutsigayta.

Jém Pablo y Silas nicpa jém attebet Berea

¹⁰ Jesic jeeti tsuu jém tantiwitam icutsatyaj jém Pablo y Silas iga nicyajiñ jém attebet Berea. Ocmi cuando núcyaj, tigiyyaj jém judíos isinagoga. ¹¹ Pero jém Bereapic pïxiñtam más da maloyaj que jém ityajwïp jém attebet Tesalónica. Tsam maymayyaj, iwipictsonyay jém Dios inḡmaṡi. Cada jama icuyujcayajpa jém aḡmaṡi jém jayñewïp, icuámyajpa siiga numa jesaneum juuts inímáy jém Pablo. ¹² Jeeyucmi tsam jáyan de jeeyaj icupicyaj. Icupicyajtim jáyan jém griegopic yomtam y pïxiñtam jém witampic. ¹³ Pero jém judíos jém ityajwïp Tesalónica, cuando ijodónayaj iga jém Pablo inmatpa Dios inḡmaṡi Berea, nicyaj jemíc iga iccujíñayyajpatim jém pïxiñtam. ¹⁴ Jesic jém tantiwitam jém ityajwïp Berea jicsciy icutsat jém Pablo jém lamar anḡaca. Pero jém Silas y Timoteo tsíyyaj jém attebet Berea. ¹⁵ Jém iwagananicnewïp jém Pablo ininicyaj hasta jém attebet Atenas. Cuando setyaj, jém Pablo icutsadáy aḡmaṡi jém Silas y Timoteo con jeeyaj. Inímáy iga: Jicsciy miñi, da mijáypa.

Jém Pablo it jém attebet Atenas

¹⁶ Iganam jém Pablo injócpa jém Silas y Timoteo, iix iga jém ityajwïp jém attebet Atenas agui icupicyajpa jém watnas. Tsam jáyan ityaj. Jesic jóyñe jém Pablo ianamajom. ¹⁷ Jeeyucmi aḡmatyajpa jém Pablo con jém ityajwïp jém sinagoga, jém judíos, con jém tunḡac pïxiñtam jém ijisyajpáppic Dios. Cada jama aḡmatyajpatim jém Pablo con jém pïxiñtam jém ipátneyajwïp plaza. ¹⁸ Jenum ipátyaj algunos jém pïxiñtam jém icuyujcanewïp jém epicúreospic inquímayooyi con jém icuyujcanewïp jém estoicospic inquímayooyi. Jeeyaj moj aḡmatiyaj con jém Pablo. Nïmyajpa:

—¿Ti nimtooba yíp pïxiñ tsam aḡmattero?

Tunḡac jém pïxiñtam nïmyajpa:

—Quénam tum najíyoypaap de tunḡac dios.

Nïmyajpa jempic porque jém Pablo inmatpa jém Cristo inquímayooyi iga pis jém Jesús de juṡ it jém caaneyajwïp. ¹⁹ Ocmi jém pïxiñtam ininicyaj jém Pablo tum lugar iníyi Areópago juṡ siempre anṡuumayajpa iga accuyujóypa. Jém pïxiñtam icwácayaj jém Pablo. Inímáy:

—Aichtam anjodónatooba tiapaap yíp jomipic anquímayooyi jém michpic inimiñ. ²⁰ Mich anaḡmadáypa tunḡac jixi jém dapic queman ammatonṡa. Anjodónatooba ti nimtooba.

²¹ Porque itumpiy jém Atenaspic pïxiñtam con jém juumipic pïxiñtam jém ityajwïp jem, tsam iwianjamyaj jém jomipic jixi iga imatonyajpa y iga inmatyajpa.

²² Ocmi jém Pablo teñchucum jém p̄ixiñtam aṅcucmi jém ityajw̄ip jém Areópago. Iñímáy: —Mimichtam, miittanw̄ip Atenas. Ánix iga tsam jáyan diosyaj iñjístampa. ²³ Cuando anas juṭ it waṭi jém iñdios, ampát tum altar juṭ jayñeta yíp aṅmaṭi. Nimpa jém letra: “Jém dios jém dapic i iixpicpa.” S̄ip manañmadáypa de jém Dios, jém dapic iñixpictampa mimichtam.

²⁴ Yibam Dios iwat jém nas con itump̄iy jém ityajw̄ip yíp naxyucmi. Imiichi jém siṅ y jém nas. Da s̄iba jém masticjom jém iwatnew̄ip jém p̄ixiñtam. ²⁵ Jém p̄ixiñtam da wiap iyoxpátyaj yíp Dios iga ichiiba titam itogóyáy. Porque je iniit itump̄iy cosa. Tachiiba tamvida tantump̄iytam. Tachiibatim jém sawa iga tasaupicpa. Tachiiba itump̄iy cosa.

²⁶ De tum p̄ixiñ ictsucum iga ityaj itump̄iy jém naciónyaj jém ityajw̄ip icuw̄iti de yíp naxyucmi. Ij̄ispa juṭ itpa jém naciónyaj y jutsañ ityaj. ²⁷ Dios iwadáypa jem̄pic porque ixunpa iga icuámiñ jém p̄ixiñtam iga w̄iañ ipát. Numa Dios da juumi it con taichtam. ²⁸ Porque yíp naxyucmi tanwaganaitpa Dios. Je tachiiba tamvida y tamp̄imi. Tum de mimichtam jém iniñmatc̄iwiñ nimpa iga: “Taichtam Dios tamanictam.” ²⁹ Siiga Dios tamanictam, da wiap tanj̄ista iga tanj̄atun Dios jex juuts tum watnas jém watnetaw̄ip de oro, plata o tsa, jém ij̄ixquimpáppic jém p̄ixiñtam iga iwatpa. ³⁰ Dios da ij̄isáy itañca jém wiñicpic p̄ixiñtam porque jeeyaj da ij̄odon ti w̄i tanwat. Pero s̄ip Dios ip̄im̄iy itump̄iy jém p̄ixiñtam icuw̄iti de yíp naxyucmi iga icucacyajiñ ij̄ixi. ³¹ Porque Dios ichac tum jama iga ic̄ip̄inpa itump̄iy jém p̄ixiñtam, jém ityajw̄ip yíp mundo. Iw̄ic̄ip̄inpa con tum p̄ixiñ jém iccámnew̄ip juuts juez. Tanquejáy tantump̄iytam iga numa iwatpa jem̄pic cuando pis yíp p̄ixiñ de juṭ it jém caaneyajw̄ip.

³² Jesic cuando imaton̄yaj jeeyaj iga pis tum p̄ixiñ caanew̄ip, algunos agui ixiccayajpa. Pero jém tungac n̄im̄yajpa:

—Tungac jama ammaton̄tooba eybic ti miñimpa.

³³ Jesic put jém Pablo juṭ aṅtuumaneyaj. Nic. ³⁴ Pero algunos jém p̄ixiñtam nic itún̄iy jém Pablo. Icupictim jém Cristo in̄químayooyi. Itún̄iy jém Dionisio tum Areópagopic p̄ixiñ, y tum yomo iñ̄iyi Dámaris con tungac más.

18

Jém Pablo nicpa jém attebet Corinto

¹ Ocmi jém Pablo put jém attebet Atenas. Nic jém attebet Corinto. ² Jemum ipát tum judío iñ̄iyi Aquila. Nay jém attebet Ponto. Yaguiñ miñ de jém naxyucmi de Italia. Iwaganamiñ iwichomo Priscila. Putyaj jém naxyucmi de Italia porque jém Romapic anjagooyi jém Claudio ip̄im̄iy itump̄iy jém Israelpic p̄ixiñtam iga pudiñ jém attebet Roma. Jesic jém Pablo nic ijooyáy jém Aquila y Priscila. ³ Jeetim yoxacuy iwatyajpa juuts iwatpa jém Pablo. Jeeyucmi nicpa iwaganaityaj. Wagayoxayajpa. Iwatyajpa jém puctuctic. ⁴ Cada jejcuy jama jém Pablo nicpa in̄quejayyaj jém aṅtuumaneyajw̄ip jém sinagoga. Iccupicyaj jém judíos con jém tungac p̄ixiñtam jém dapic je de Israel.

⁵ Mu ixetyaj jém Silas y Timoteo de jém Macedonia jém Pablo in̄madáypa jém judíos con itump̄iy ij̄ixi iga Jesús je jém Cristo. ⁶ Pero jeeyaj tsam ij̄oyixyajpa jém Pablo. Tsam imalmalnimayyaj. Jesic Pablo icuxicsáy iyoofti juuts tum seña. Iñímáy:

—Michtam iniit la culpa siiga micaaba y da imp̄ictson̄pa jém vida jém dapic cuyajpa. Ich da anai la culpa. Dende s̄ip nicpa anañmadáy jém tungac p̄ixiñtam jém dapic je de Israel.

⁷ Jesic put jém sinagoga, nic tum p̄ixiñ iticc̄im iñ̄iyi Justo. Jém sinagoga aṅnaça it jém itic. Yíp p̄ixiñ tsam ij̄ispa Dios. ⁸ Jém sinagoga in̄jagooyi iñ̄iyi Crispo. Icupictim jém tán̄omi con itump̄iy jém ityajw̄ip iticc̄im. Jesic tsam jáyan jém Corintopic p̄ixiñtam mu imaton̄yaj

ti nĩmpa jém Pablo, icupicyajtim jém Cristo y acchĩnyajta. ⁹ Jesic tum tsuu jém Pablo iix tum poñ. Jém tánomi inĩmá yém Pablo:

—Odoy cĩñi. Seguido anmatĩ ich ananmatĩ. Odoy tsaci iga inĩmatpa. ¹⁰ Ich manwaganait mimich jeeyucmi da i wiap mimalwadáy. Tsam jáyan ampixiñtam anait yíp attebet.

¹¹ Jesic jemigam tsíy jém Pablo tum amtĩy y medio jém attebet Corinto. Inquejáypa jém pĩxiñtam jém Dios inmatĩ.

¹² Jém tiempo jém gobernador Galión injacpa jém naxyucmi de Acaya. Jesic jém judíos antuumayaj iga imatsyajpa jém Pablo. Ocmi nanicta jém anjagooyicim. ¹³ Inĩmayyaj jém gobernador:

—Yíp pĩxiñ inquejá yém pĩxiñtam iga ijĩsyajiñ Dios con tungac anquĩmayooyi jém dapic jex juuts aichtam ananquĩmayooyi.

¹⁴ Jesic jiytooba idic Pablo cuando jém Galión inĩmá yém Israelpic pĩxiñtam:

—MiIsraelpic mipixiñtam, siiga tsam mijpic táñca iwat yíp pĩxiñ o siiga accaoyñe, jesic mammatónaypa ti miñĩmpa. ¹⁵ Pero siiga nada más inĩñacatámpa michtam inĩmadayooyi y jém inĩquĩmayooyi y jém inĩDios inĩyĩ, jesic wĩtsactaami inĩyaac. Da ancipĩntooba jexpic cosa.

¹⁶ Jesic topyajta jém anjagooyicim. ¹⁷ Cuando putyaj, jesic jém griegopic pĩxiñtam imatsyaj jém Sóstenes jém sinagoga injagooyi, icótsyaj jém gobernador iwiñjom. Pero jém Galión da iwadáy caso.

Jém Pablo set eybic jém Antioquía

¹⁸ Jemum tsíy jém Pablo jáyan tiempo. Ocmi inquĩmyaj jém tantiwitam, tigiy pa barcojom con jém Priscila y Aquila iga nicyajpa jém naxyucmi de Siria, jém attebet Cencrea. Antes que tigiy pa jém barcojom, icujebáy icobac juuts tum seña iga iccupacpa juuts ijycámayñe Dios. ¹⁹ Ocmi núcyaj jém attebet Efeso. Jemum ichacyaj jém Priscila y Aquila. Jesic tigiy jém sinagoga jém Pablo iga inquejáypa Dios inmatĩ jém judíos porque jemum antuumaneyaj. ²⁰ Jém pĩxiñtam icunucsayyaj jém Pablo iga tsíyĩn más jáyan tiempo con jeeyaj, pero Pablo da ijíc. ²¹ Cuando nictoobam jém Pablo, inquĩm jém pĩxiñtam. Inĩmá y:

—Wĩ iga anicpa Jerusalén iga anacnaspá jém sijn jém miñpáppic. Pero eybic miñpa mánámta siiga Dios iwianjam.

Ocmi tigiy barcojom jém attebet Efeso. Nic Cesarea. ²² Cuando núc jém Cesarea, nictim Jerusalén iga idioschiyajpa jém Dios ipixiñtam. Ocmi nic jém attebet Antioquía.

²³ Jesic jáy iti juna jama Antioquía. Ocmi put eybic. Nic yim jeexic cada tumtum tiganjoj jut oyñe wiñti. Nas icuwiti jém naxyucmi de Galacia y Frigia. Iyoxpátpa jém Dios ipixiñtam iga odoy ichaguiñ jém Dios inmatĩ.

Jém Apolos najyóypa jém attebet Efeso

²⁴ Jesic jeetim tiempo núc jém attebet Efeso tum judío inĩyĩ Apolos. Nay jém attebet Alejandría. Tsam wiap inijyóy. Tsam iwicutiĩyĩyipa jém Dios inmatĩ. ²⁵ Tsam iwicuyujcane ti ixunpa tanjatun Dios iga tanwatpa. Inmatpa Dios inmatĩ con itumpiy ianama. Iwianquejáypa jém pĩxiñtam jém tánomi Jesucristo inquĩmayooyi. Mex da iwijodon jém anquĩmayooyi, no más ijodon jém Xiwan inquĩmayooyi jém acchĩnoypaap. ²⁶ Jém Apolo tigiy jém sinagoga, moj inmat jém Dios inmatĩ. Je da cĩñpa. Pero cuando jém Priscila y Aguila imatonyaj, ininicyaj jém Apolo tungac añeymi. Iwianquejáypa iga más iwicutiĩyĩyipa jém tanjatun Dios inmadayooyi.

²⁷ Jesic cuando nictooba jém Apolo jém naxyucmi de Acaya, jém tantiwitam jém ityajwĩp Efeso tsam iyoxpátyajpa. Ijáyáy tum toto jém ityajwĩp Acaya iga wĩpictsonñaiñ jém Apolo. Jesic ocmi cuando núcneum Acaya jém Apolo, tsam iyoxpát jém icupicneyajwĩp Cristo, jém ipictsonñeyajwĩp jém Dios itóyooyi. ²⁸ Iwianquejáypa jém

judíos jém p̄ixiñtámanj̄om iga da w̄iputne jém in̄químayooyi. Tsam w̄iquejpa jém m̄igooyi y jeeyaj da w̄iap inyam. In̄quejpa con Dios in̄mat̄i jém jayñew̄ip iga n̄uma Jesús je jém Cristo jém in̄jócyajp̄app̄ic.

19

Jém Pablo nicpa Efeso

¹ Iganam it jém Apolo jém atebet Corinto, naspa jém Pablo jém tiganjojay jém ityajw̄ip jém cotsiganj̄om jém naxyucmi de Galacia y Frigia. Ocmi núc Efeso. Jemum ipát algunos jém icupicneyajw̄ip Cristo. ² Jém Pablo icwác jém p̄ixiñtam. In̄ímáy:

—¿Que imp̄ictson̄ta jém Dios iAnama cuando moj in̄cupic Cristo?

N̄imyajpa:

—Da ammaton̄ta siiga it jém Dios iAnama.

³ Jesic jém Pablo icwác. In̄ímáy:

—¿I in̄iyimi micchin̄tam̄ta?

N̄imyajpa:

—Acchin̄tam̄ta juuts acchínóypa jém Xiwan jém acchínoypaap.

⁴ Jém Pablo in̄ímáy:

—Jém Xiwan icchin̄pa jém p̄ixiñtam juuts tum seña iga icucaguiñ jém ij̄ixi. In̄ímáȳtim iga icupiguiñ jém miñp̄app̄ic ocmi, je jém Jesucristo.

⁵ Jesic yaj imaton̄yay, acchin̄yajt̄ap jém tán̄omi Jesús in̄iyimi. ⁶ Jém Pablo ichiccunúc cada tumtum icobacyucmi, jesic ip̄ictson̄yay jém Dios iAnama. Moj j̄iyi tun̄gac an̄mat̄imi. In̄matyajpa jém j̄ixi jém ichiñew̄ip Dios. ⁷ Ityay jem con itump̄iyay como doce jém p̄ixiñtam.

⁸ Jáy it̄i jem jém Pablo tres meses. Tigiy jém sinagoga, da c̄in̄pa in̄mat. Chocoymi in̄quejáypa jém p̄ixiñtam jutsap in̄jac Dios ȳip naxyucmi. ⁹ Pero algunos tsam maloyaj ianama, da icupicyaj. Tsam imalmaln̄imayyay jém tán̄omi in̄químayooyi jém p̄ixiñtam iwiñj̄om. Jesic jém Pablo ichagan̄putyay jeeyaj. Ininic jém icupicnew̄ip Cristo tum escuela jém Tiranno im̄ichi. Jemum accuyujóypa cada jama. ¹⁰ Jemum ts̄iy w̄isten am̄tiy. Jemp̄igam itump̄iy jém ityajw̄ip jém naxyucmi de Asia imaton̄yay jém tán̄omi in̄químayooyi. Miñyay jém judíos con jém tun̄gac p̄ixiñtam jém griegop̄ic. ¹¹ Dios ichi ip̄imi jém Pablo iga w̄iañ̄i wat jém m̄ijtamp̄ic milagro. ¹² Siiga jém Pablo ichicpa tum pañuelo o tum puct̄ucu y ocmi cutsadayt̄ap tum m̄imnew̄ip iga ichiguiñ, jesic p̄ispa. Putpatim jém mal esp̄iritu.

¹³ It idic jem algunos jém judíos jém nicyajp̄app̄ic ȳim jeexic, jeeyaj itopyajpa jém mal esp̄iritu. Itopyajtoobatim idic jém Jesucristo in̄iyimi. In̄ímáȳpa jém imatsnew̄ip jém mal esp̄iritu:

—Siip mamp̄im̄íypa. Jém Jesús in̄iyimi jém in̄matp̄app̄ic jém Pablo, puti de jem.

¹⁴ It idic tum judío in̄iyi Esceva, cobacp̄ic panij. Iniīt siete ijaymanic, iwatyajpatim jemp̄ic. ¹⁵ Jesic tum jama cuando itopyajpa idic tum mal esp̄iritu, j̄iypa jém mal esp̄iritu, n̄im̄pa:

—Ich an̄ixpicpa jém Jesús. An̄ixpicpatim jém Pablo. Pero mich, ¿m̄īiapaap?

¹⁶ Ocmi jém p̄ixiñ jém iniitw̄ip jém mal esp̄iritu yóyquimpa, moj an̄ajiyay con jém itopyajp̄app̄ic idic. Como tsam iniit ip̄imi jém iniitw̄ip jém mal esp̄iritu, icon̄w̄iy; más w̄iap que jém sietepic, jém itopyajp̄app̄ic idic. Tsam p̄imi malwadayyajt̄a. Poyyay icus̄iciyay hasta iticc̄im, coowaneyaj. ¹⁷ Itump̄iy jém ityajw̄ip jém Efeso ijodón̄yay, jém judíos con jém griegop̄ic. Tsam c̄inyay. Tsam p̄imi icujípyaj jém tán̄omi Jesús. ¹⁸ Jesic jáyan jém icupicneyajw̄ip Cristo miñ in̄madáyayyay Dios jém itán̄ca titam iwatne pecam. ¹⁹ Miñyay jáyan jém nawatyaj. Inimiñyay jém ilibroyaj. Miñ in̄ooquetyay jém p̄ixiñtam iwiñj̄om. Ocmi

ijisyaj jutsañ ivale jém libro. Ivale cincuenta mil tumiñ de plata. ²⁰ Jempam tsam jáyanap jém Dios inmati, tsam wiquejpa jém tánomi ipimi.

²¹ Ocmi cuando nas itumpiy yipyaj cosa, jém Pablo ijis iga nicpa jém naxyucmi de Macedonia y Acaya y ocmi hasta Jerusalén. Nimpa:

—Wiñti anicpa Jerusalén, ocmi anictoobatim jém atebet Roma.

²² Jesic jém Pablo icutsat jém naxyucmi Macedonia wisten jém icuyoxayajpaap jém Timoteo y Erasto iganam tsíy jém Pablo juna jama jém naxyucmi de Asia.

Cujñayaj jém ityajwip Efeso

²³ Jeetim tiempo tsam inçacayajpa jém Dios inquímayooyi. Jém dapic icupicpa Cristo pimi ijóyixpa jém wibic anquímayooyi. ²⁴ Tum pixiñ inñyi Demetrio ictsucum jém pleito. Yíp pixiñ tum platero, iwat tum xutu mastic iwatnas. Jém watnas en forma de jém dios inñyi Diana imastic. Yíp pixiñ con icompañeroyaj icoñwiyajpa jáyan tumiñ con jém iyoxacuy. ²⁵ An̄tuumayajpa con jém tungac pixiñtam jém iwatyajpáppic jexpictim yoxacuy, nímayajta:

—Mantiwitam, michtam in̄wijodon̄ iga tsam tawitpa con yíp yoxacuy. ²⁶ Síp inñixñeta y immatoneta ti nimpa yíp Pablo. Síp inmat iga jém diosyaj, jém watnetawip cimi, da je nunta dios. Tsam icupicyajpa jáyan pixiñtam, da no más yim Efeso, pero icupicyajpatim icuwiti jém naxyucmi de Asia. ²⁷ Da wí siiga togoypa jém tanyoxaji. Da wí siiga tsíypa jém tammastic juuts tum cosa da para ti wí. Da wí siiga jém pixiñtam mojpa ijóyixyaj jém tandios Diana, jém sippic ijisyajpa itumpiy jém ityajwip Asia y icuwiti de yíp naxyucmi.

²⁸ Cuando imaton̄yaj ti nimpa jém Demetrio, jesic tsam jóyyaj jém pixiñtam. Tsam pimi an̄weyajpa. Nimyajpa:

—Tsam wí jém tandios Diana, jém tan̄jstampáppic yim Efeso.

²⁹ Jesic kujñayaj jém pixiñtam icuwiti jém atebet. Itumpiy de jeeyaj poyimi nicyaj jém mijpic an̄ci jūt iwatyajpa jém asamblea. Matsyajta jém Gayo y Aristarco jém Pablo icompañeroyaj, Macedoniapic jeeyaj. Nanicyajta poyimi hasta jūt an̄tuumayajpa jém Efesopic pixiñtam. ³⁰ Jém Pablo tigiytooba idic jūt an̄tuumaneyaj jém pixiñtam iga icupujpa jém wisten. Pero jém icupicneyajwip Dios da ijigáy. ³¹ Ittim jem jutem jém Pablo iamigoyaj, jém Asiapic an̄jagooyiyaj. Jeeyaj icutsadáy an̄mati jém Pablo iga odoy tigiyiñ jém mijpic an̄ci.

³² Tsam jáyan jém pixiñtam an̄tuumaneyaj, tsam pimi an̄weyajpa. Tum nimpa tum cosa y tungac nimpa tungac cosa. Porque tsam kujñayaj jém pixiñtam. Casi da i ijodon̄ tiiga an̄tuumaneyaj. ³³ Jesic algunos jém ityajwip jem in̄madayaj jém Alejandro tiiga an̄tuumaneyaj jém pixiñtam. Jesic jém judíos iyáctēñ ininic jém Alejandro jém pixiñtam iwiñjom iga ijíyáyiñ. Jesic jém Alejandro iwat seña con ici iga odoy jiyajiñ jém pixiñtam porque icupujtooba jém wisten pixiñ. ³⁴ Pero cuando icutiiyyaj jém pixiñtam iga judío jém Alejandro, jesic tsam pimi an̄weyajpa dos hora. Nimyajpa:

—Tsam wí tandios, Diana, jém tan̄jstampáppic yim Efeso.

³⁵ Jesic ocmi jém secretario in̄jiyac jém pixiñtam. Cuando cuyaj iga an̄weyajpa, in̄máy:

—MiEfesopic mipixiñtam, da i ni tum pixiñ jém dapic ijodon̄ iga taichtam taccámnetā iga tan̄wattāmpa cuenta jém tammastic jūt it jém tandios Diana y jūt it jém iwatnas jém actiñnewip sin̄yucmi. ³⁶ Da i wíap in̄im iga migooyi. Jesic odoy jiytaami más. Odoy ti wattaami siiga da wiñti in̄jispā ti in̄watpa. ³⁷ Porque yíp wisten pixiñ da icujiyñe jém in̄dios Diana ni da imaln̄mayñe. ³⁸ Yíp Demetrio con icompañeroyaj siiga i ijóyixpa, wíap iquejajwadáy jém juezcim. Jeeyucmi it jém juez iga icipin̄pa jém pleito. Jemum wíap iwitsacyaj. ³⁹ Siiga algo más in̄xuntāmpa, wí iga inin̄jóctāmpa hasta cuando

tan̄tuumaḡwattámpa jém tanan̄jagooyi. ⁴⁰ Siḡp wiap̄ i taquejajwadáypa iga tarebelde porque tan̄tuumaḡta sin an̄jagooyi. Da ti wiap̄ tannim̄ siiga tacwáctamḡap̄ tiiga it̄ yíp bulla.

⁴¹ Yaj n̄imi jempic, jém secretario iccuyaj jém junta.

20

Nicpa jém Pablo jém Macedonia y Grecia

¹ Cuando cuyaj jém bulla, jesic jém Pablo in̄wejáy jém icupicneyajw̄ip̄ Cristo iga ichiiba j̄ixi. Ocmi in̄químyaj, nanuusyajḡa. Nic jém Pablo jém naxyucmi de Macedonia. ² Juḡ quej nicpa, in̄quejáy jém tant̄iwitam̄ ti wiap̄ iwatyaj. In̄madayyaj tsam̄ jáyaḡ an̄maḡti. Cuando yaj icuwit̄xet̄ jém Macedonia, núc jém naxyucmi de Grecia. ³ Jemum tsíy tres meses. Cuando tiḡiytooba idic̄ jém barcoj̄om̄ iga nicpa jém Siria, imatoḡ iga algunos jém judíos imétsyajpa jutsap̄ iccaayaj. Jeeyucmi jém Pablo ijis̄ iga setpa puymi. Nasp̄a eybic̄ jém naxyucmi de Macedonia. ⁴ Jesic jut̄en̄ jém iamigoyaj it̄uḡiyaj jém Pablo. Nicyaj jém Sópater, tum̄ Bereapic̄ p̄ixiñ, y Aristarco. Nicyajtim̄ tum̄ Tesalónicapic̄ p̄ixiñ in̄iyi Segundo, tum̄ Derbepic̄ p̄ixiñ in̄iyi Gayo y Timoteo. Nicyajtim̄ jém Tíquico y Trófimo, tsucumneyaj jém naxyucmi de Asia. ⁵ Yípyaj tant̄iwitam̄ an̄jagóy miñicyaj, jemigam̄ anan̄jócyajpa jém attebet Troas. ⁶ Cuando nas jém siḡ iga cúḡḡap̄ jém caxtánañi sin levadura, jesic atsucumta jém Filipos, atiḡiyta barcoj̄om̄. Awit̄ta barcoj̄om̄ cinco día hasta anúcta jém attebet Troas. Jemigam̄ anactsíy jém ánamigoyaj jém tsucumneyajw̄ip̄ wiñti. Jemum atsíyta siete día.

Jém Pablo nicpa joyi jém attebet Troas

⁷ Jém wiñtipic̄ jama de jém semana, an̄tuumayaj jém icupicneyajw̄ip̄ Cristo iga iwécyajpa jém caxtánañi. Jém Pablo moj accuyujoooyi. Nic̄tooba Pablo jém tunḡac̄ jama jeeyucmi accuyujóypa hasta cugaptsu. ⁸ An̄tuumaneta tum̄ cuarto jém yucmipic̄ piso. Jemum tsocpa jáyaḡ jucti. ⁹ It̄tim̄ jem̄ tum̄ woñjaych̄ixi in̄iyi Eutico. Coñ jém ventana yucmi. Como jém Pablo tsam̄ jáyaḡ hora in̄mat̄ jém Dios in̄maḡti, imats moḡi jém jaych̄ixi, jesic joobaḡnas jém tucuten̄ piso iyucmi. Cuando pin̄ḡa, caaneum. ¹⁰ Jesic quet̄ jém Pablo, icunúc noco, in̄nuusáy. In̄imáy jém ityajw̄ip̄ jem̄:

—Odoy c̄in̄taami. Da caane, vivo.

¹¹ Ocmi Pablo quim̄ eybic̄ jém yucmipic̄ piso. Iwéc jém caxtánañi, wícyaj. Jesic seguido moj in̄mat̄ jém Dios in̄maḡti hasta cuquej. Ocmi nic̄ jém Pablo. ¹² Jesic nanictā jém jaych̄ixi it̄ic̄cim̄, vivojam. Agui maymayyaj iga da ca.

Nicpa Pablo jém attebet Mileto

¹³ Aichtam̄ an̄jagóypa anicta barcoj̄om̄ hasta jém attebet Asón iga jemigam̄ ampicnasp̄a jém Pablo. Jempigam̄ an̄watneta trato. Nic̄ jém Pablo puymi. ¹⁴ Cuando anactsíytamḡa jém attebet Asón, tiḡiy barcoj̄om̄ jém Pablo, awaganictā jém attebet Mitilene. ¹⁵ Jesic aputta de jem̄, jém tunḡac̄ jama an̄umnas jém attebet Quío. Tunḡagam̄ jama anúcta jém attebet Samos. Amon̄ta noco jém attebet Trogilio. Tunḡac̄ más jama anúcta jém attebet Mileto. ¹⁶ Jém Pablo ijis̄ iga an̄umnastámpa jém attebet Efeso iga da ajáytámpa jém naxyucmi de Asia. Agui jicsciḡy nic̄tooba Jerusalén iga ict̄síyiñ jém siḡ de pentecostés siiga wiap̄.

Jém Pablo ichi j̄ixi jém an̄jagooyiyaj

¹⁷ Cuando anúcta jém Mileto, jém Pablo in̄wejáy jém Dios ip̄ixiñtam̄ in̄jagooyiyaj jém ityajw̄ip̄ Efeso. ¹⁸ Cuando núcneyaj, in̄imáy jém Pablo:

—Michtam̄ in̄j̄odon̄ ti an̄watne dende jém wiñtipic̄ jama cuando anúc jém naxyucmi de Asia. ¹⁹ It̄ump̄iy tiempo cuando man̄waganait̄ta mimichtam̄, tsam̄ an̄cuyoḡa jém tán̄omi. Da anacuj̄ipt̄a anyaac. Tsam̄ p̄imi anyácne. Tsam̄ acut̄it̄st̄a porque jém judíos ijis̄yaj jutsap̄ accaayaj. ²⁰ Pero ich̄ da antsac̄ iga manan̄madáy it̄ump̄iy jém Dios in̄maḡti jém tsampic̄

mioxpátpa. Manañquejáy juṭ anṭuumaneyaj jáyan jem p̄ixiñtam y manañquejáyṭim iñticim.

²¹ Anañmadáy jem judíos con jem dapic je judíos iga icucacyajiñ ijixi jem Dios iwiñjom y iga icupicyajiñ jem tánQmi Jesucristo. ²² Siip anicpa Jerusalén. Apimíy jem Dios iAnama. Da anjodon ti acnascatap jemic. ²³ No más cada tiganjoj juṭ ich anicpa, jem Dios iAnama acjodónap iga ayaachwattap, apajtap. ²⁴ Pero da anwadáypa caso. Ni datim ançinpa iga accaatap. Da ti cuwatcuy jem amvida. Ich amaymay siiga anaccupacpa jem anyoxacuy y siiga anwatpa juuts apimíy jem tánQmi Jesús iga anañmatpa jem wibic añmaṭi iga Dios tsam tatoypa.

²⁵ Siip ich anwijodon iga ni tum de mimichtam, jem manañmadayñewiip jem Dios inmaṭi, da eybic ánixtámpa. ²⁶ Jeeyucmi siip tsam manñimaytooba iga ich da anaj la culpa de ninguno de mimichtam siiga mitogoypa y da impictsonpa jem vida jem dapic cuyajpa. ²⁷ Manwianmadáy itumpiy jem Dios inmaṭi. Da ti anañécne ni uxaj. ²⁸ Siip nawattamtaji cuenta mimichtam iñyaac. Minjagooyitam jem miccámnewiip Dios iAnama, wattaami cuenta jem Dios ipixiñtam jem ijuyñewiip jem tánQmi Cristo con iñipiñ. ²⁹ Ich anjodon iga cuando anicneum, miñyajpa jem migoyyajpaap iga ictogoypa jem Dios ipixiñtam juuts tum lobo tsam malo iccaaba jem borrego. ³⁰ Mimichtámanjom tsucumpa algunos jem migoypaap. Mojpa imigóyáy jem icupicnewiip Cristo iga ictsacpa jem Dios inmaṭi iga iccupiguiñ jem migooyi. ³¹ Jesic nawattamtaji cuenta. Jistaami iga tres antiy oy manañmadáy jem Dios inmaṭi tsuucim y siññi. Pimi manañquim hasta awejpa iga odoy i mictsaguiñ jem Dios inmaṭi.

³² Siip mançijunçotpa jem tanjatun Dios icijom iga miwattámiñ cuenta y iga mioxpátpa con jem wibic añmaṭi iga tsam tatoypa Dios. Jem añmaṭi tsam mioxpátpa iga más inwicupicpa. Mioxpátpa iga impictsonpa jem herencia con itumpiy jem cuáyñewiip ianama. ³³ Da mançusúníyáy jem iñtumiñ, plata y oro, ni jem impuctucu. ³⁴ Michtam inwijodon iga ich ayoxa ançimi iga odoy ti atogóyayiñ ni ich ni jem anwaganaitwiip. ³⁵ Siempre manañquejayñeta iga wi iga tayoxap iga tanyoxpátpa jem yaachayajpápic. Jistaami ti nimpa jem tánQmi Jesús cuando nim: “Más tamaymay iga tachióypa que iga tachiitap.”

³⁶ Cuando yaj nimi jempic, jem Pablo costeññeactin, moj inwejpát Dios con itumpiy jem ityajwiip jem. ³⁷ Agui weyjajpa, itumpiy nanuusyajta, inñacatsútsyaj jem Pablo. ³⁸ Tsam anyácneyaj jem p̄ixiñtam porque nimpa jem Pablo iga da nunca iixyajpa eybic. Ocmi nic ijagançsacyaj hasta tigiy barcojom.

21

Jém Pablo nicpa Jerusalén

¹ Cuando antsacta jem tantiwitam, atigiyta jem barcojom. Anumnic hasta jem attebet Cos. Jem tungac jama anicta jem attebet Rodas y de jem anicta jem attebet Pátara. ² Jem attebet Pátara ampátta tum barco jem nicpáppic Fenicia. Jemum atigiyta, anicta. ³ Jesic anastámum, ánix jem isla de Chipre. Tsíy tum lado añaymi. Anumnic hasta jem naxyucmi de Siria. Jemum anuc porque jem barco ichacnaspá jem ichimi jem puerto de Tiro. ⁴ Jemum ampátta jem icupicneyajwiip Cristo. Atsíyta con jeeyaj siete día. Dios iAnama icjodóna jem icupicneyajwiip Cristo ti iñascaaba jem Pablo. Jeeyucmi nímayta jem Pablo iga odoy niguiñ Jerusalén. ⁵ Pero cuando núc jem siete día, mojum aniquitam. Itumpiy jem icupicneyajwiip Cristo con iyomtám y con ichixtam nic ajagançsacta ançicmi de jem attebet, jem lamar añnaca acosteñña, moj anañwejpátta Dios. ⁶ Ocmi anañquímtamta, ananuustamta. Aichtam aquímta barcojom. Jeeyaj setyajum iticmi.

⁷ Atsucumta jém Tiro, anicta hasta jém atebet Tolemaida. Jemum atsac jém barco, moj aniquitam puymi. Jesic jém atebet Tolemaida andioschi jém tantiwitam, atsiyta con jeeyaj tum jama. ⁸ Jesic icuquejama atsucumta aichtam con jém Pablo, anicta jém atebet Cesarea. Anúcta jém Felipe iticcim. Je tsam wiap inmadáy Dios inmati jém pixiñtam jém dapicnam icupicne. Yíp pixiñ tum de jém siete jém iyoxpátpáppic jém apóstolyaj. Jemum atsiyta iticcim. ⁹ Jém Felipe iniit cuatro iyommanic da jaayiyñeyaj. Dios iyoxpátpa iga inmatyajpa ti miñpa. ¹⁰ Watña jama aitta jem cuando núc tum Judeapic pixiñ inyi Agabo, tum profeta, wiaptim inmat ti miñpa. ¹¹ Miñ aámta. Ipigáy jém Pablo imijpactsencuy, jém icinturón. Natsenta iyaac jém pixiñ. Ichen ici y ipuy. Jesic nimpa jém Agabo:

—Nimpa jém Dios iAnama iga jém atebet Jerusalén jém judíos ichénáypa así yíp cinturón iomi, ocmi cihunçottap jém tungac pixiñtam icijom.

¹² Cuando ammatonja ti nimpa jém pixiñ, jesic aichtam con jém tantiwitam jém ityajwip Cesarea aniyactsihta jém Pablo iga odoy niguiñ Jerusalén. ¹³ Pero jém Pablo anímayta:

—¿Tiiga miwejtampa, tiiga antsiganycwattampa? Ich anjicpa iga atsentap y da solamente iga atsentap, anjicpatim iga accaatap Jerusalén jém tánomi Jesucristo icuyucmi.

¹⁴ Como da amaton jém Pablo ti anímayta, jesic antsacta. Annímayta iga wati juuts ixunpa jém tánomi.

¹⁵ Cuando cupac jém jama iga aitta jém Cesarea, anwitsacta jém antraste, atsucumta. Anicta jém atebet Jerusalén. ¹⁶ Anwagananicta algunos jém Cesareapic pixiñtam jém icupicneyajwip Cristo. Ininicyajtim tum Chiprepic pixiñ inyi Mnasón. Yíp pixiñ tsam wiñigam icupicne Cristo. Jém Mnasón iniit itic Jerusalén. Jemum anúcta, acwíctamta, y acmonjamtá.

Jém Pablo nicpa ijooyáy jém Jacobo

¹⁷ Cuando anúcta Jerusalén, jém tantiwitam tsam awipictsonja, agui maymayyaj. ¹⁸ Jesic icuquejama Pablo nic ijooyáy jém Jacobo. Awagananictatim aichtam. Antuumaneyajtim jem itumpiy jém wídaytam jém injacyajpáppic jém Dios ipixiñtam. ¹⁹ Jém Pablo idioschi. Ocmi inmadáy parejo jém antuumaneyajwip jutsap iwíwadáy Dios jém tungac pixiñtam jém dapic je de Israel cuando oy inmadáy jém wibic anmati. ²⁰ Cuando imatonyaj, tsam icujípyaj Dios. Nímayta jém Pablo:

—Mantíwi, ixí iga tsam jáyan miles de jém judíos icupicneyaj jém Jesucristo inquímayooyi. Itumpiy de jeeyaj ninyajpa iga da wí iga tantsacpa jém Moisés inquímayooyi. ²¹ Ijodónaneyaj iga mich ininquejáy itumpiy jém judíos, jém juumipic nicneyaj, iga odoy icupiguiñ jém Moisés inquímayooyi. Ininquejáytim iga odoy iwadáyñ imanictam jém marca de circuncisión y odoy iwadiñ jém wiñicpic costumbre. ²² ¿Jesic ti wiap tanwatta? Porque cuando imatonyaj jém pixiñtam iga miñúcne, tienes que micutuumacayajpa. ²³ Jesic wati juuts sip mannímáy. It yim con aichtam cuatro pixiñ. Jeeyaj iccupactoba juuts ijycámáy Dios. ²⁴ Wagananici, wagachintaami juuts nimpa jém tançostumbre, yojóyaayi jutsan iwatpa gasto. Jesic ocmi wiap ijepyaj icobac. Jempigam icutiyyajpa itumpiy jém tantiwitam iga inwixpatim jém Moisés inquímayooyi y iga incupicpatim mex mich. ²⁵ Pero jém tungac pixiñtam, jém dapic de Israel, jém icupicneyajwip Cristo, anjáyayñe iga odoy iwadiñ jém Israelpic costumbre. No más annímáy iga odoy icúdiñ jém animat imayi jém accaatawip jém watnas iwiñjom ni odoy icúdiñ jém nipiñ ni odoy icúdiñ jém animatyaj jém pencanewip y odoy pejooyi.

Matsta Pablo jém masticjom

²⁶ Jesic jém Pablo ininic jém cuatro p̄ixiñtam. Icuquejama wagaacchinyajta con jeeyaj juuts nim jém Israelpic costumbre. Ocmi tigiyay jém mijpic masticjom iga quejiñ iga cupacpa iwatyaj jém costumbre y jucha ichacyajpa jém ofrenda cada tumtum de jeeyaj.

²⁷ Cuando cuyajtooba jém siete día, algunos jém judíos, jém miñneyajw̄ip de Asia, iixyaj jém Pablo jém mijpic masticjom. Jesic iccujíñayaj itumpiy jém p̄ixiñtam jém ityajw̄ip jem. Imatsyaj jém Pablo. ²⁸ P̄imi aṇweyajpa. Nimyajpa:

—MiIsraelpic mip̄ixiñtam, ayoxpaati. Yibam jém p̄ixiñ jém inquejaypáppic jém p̄ixiñtam jutinqej contra tannación, contra jém tananquímayooyi y contra jém tammastic. Tungac más tájca iwat. Inimiñ tammasticjom jém tungac p̄ixiñtam jém griegoyaj. Inimiñ jém tájcaiyw̄ip jém w̄ibic tammasticjom.

²⁹ Nimpa jem̄pic porque iixyaj iga jém Pablo iwaganas̄iba Jerusalén tum Efesopic p̄ixiñ iñiyi Tróximo. Jeeyucmi jeeyaj injampa iga inioy jém mijpic masticjom. Pero da inioy.

³⁰ Jesic cujiñayaj itumpiy jém p̄ixiñtam icuw̄iti jém attebet. Miñyay poyimi. Icutu-umacayaj jém Pablo. Imatsyaj. Ijicputyaj jém masticjom. Jicsciy inpajyaj jém mastic.

³¹ Iccaayajpa idic jém Pablo. Cuando acjodónata jém coronel iga tsam cujiñayaj jém p̄ixiñtam icuw̄iti jém Jerusalén, ³² jesic jeeti rato jém coronel in̄tuumaw̄at isoldado cada grupo con icapitán. Nicyaj poyimi hasta jut it jém p̄ixiñtam. Cuando iixyaj iga núcyaj jém coronel con isoldado, jesic ichacyaj iga icótsa jém Pablo. ³³ Jesic jém coronel icunúc. Matsta jém Pablo. Ip̄imíy jém isoldado iga ichéniñ con wisten cadena. Ocmi icwácpa, nimpa:

—¿Mich, mijapaap? ¿Ti inwatne?

³⁴ Pero jém p̄ixiñtam p̄imi j̄yyajpa. Tum nimpa tum cosa y tungac nimpa tungac cosa. Jém coronel da w̄iap icut̄iȳy ti nimyajpa porque tsam it bulla. Jesic ip̄imíy jém isoldado iga ininigiñ jém cuartel. ³⁵ Cuando núcyaj jut químyajpa jém cuartel, jém soldado icópne ininicyaj jém Pablo porque agui imalwadayyajtooba jém p̄ixiñtam. ³⁶ Porque itumpiy jém p̄ixiñtam jém miñyajpáppic ituñiançim p̄imi j̄yyajpa, nimyajpa iga accaataiñ jém Pablo.

Nacupujtap jém Pablo jém p̄ixiñtam iwiñjom

³⁷ Iganam cottap Pablo jém cuartel iñimáy jém coronel:

—Mannímaytooba idic tum aṇmat̄i.

Jesic jém coronel iñimáy:

—¿Que mich w̄iap ininmat jém griegopic aṇmat̄i? ³⁸ ¿Jesic mich da je jém miEgiptopic mip̄ixiñ, jém dapicnam peca ictsucum tum rebelión, jém ininicnew̄ip jém titsinaxyucmi jém cuatro mil p̄ixiñtam, jém accaoyajpaap?

³⁹ Jesic Pablo iñimáy:

—Ich ajudío. Anay jém attebet Tarso. Ich apertenece jém más mijpic attebet de jém naxyucmi de Cilicia. Maṇwágáypa tum favor. Ajígaayi iga ananmadáypa ȳip p̄ixiñtam.

⁴⁰ Ocmi jém coronel ijígáy iga inmadáypa jém p̄ixiñtam. Teñchucum jém Pablo jém escalerayucmi. Iwat seña con ici iga odoy i j̄yiñ. Jesic cuando dam i j̄ypa, moj j̄yi jém Pablo jém hebreopic aṇmat̄imi. Iñimáy:

22

¹—Mant̄iw̄itam, minjagooyítam, amatónaayi iga anacupujtap.

² Cuando imatonayaj iga j̄ypa jém Pablo jém hebreopic aṇmat̄imi, jesic mástim da j̄yyaj. Iñimáy jém Pablo:

³—Ich ajudío. Anay jém attebet Tarso jém naxyucmi de Cilicia. Amija ȳim Jerusalén. Ich accuyuj jém maestro Gamaliel. Aṇcuyjca jém wiñicpic tananquímayooyi

jém tachiiñewiip jém wiñicpic tanjatunwewetam. Tsam anwadáy caso iga ançuyoxap Dios con itumpiy ánanama juutstim mimichtam inwattámpa yíp jama. ⁴ Ich pecam tsam anacpoy jém icupicneyajwiip yíp jomipic anquímayooyi hasta anaccaaba. Ammatspa pxiñ y yomtam, ançotpa cárcel. ⁵ Jém cobacpic panij anjagooyi con itumpiy jém tananjagooyiyaj tsíyyaj juuts testigo porque achiiyaj jém toto iga wiap amméts jém icupicneyajwiip yíp jomipic anquímayooyi. Anic jém atebet Damasco iga ammatspa jém pxiñtam y anamiñpa preso Jerusalén iga chiitap castigo.

Pablo inmatpa jutsa micupic Cristo

(Hch. 9:1-19; 26:12-18)

⁶ Pero cuando aniqui tunjom, como cugapjama, anúctooba jém atebet Damasco, tsam pimi tsocha tum jucti sinyucmi. Acuyicquej jut aniqui. ⁷ Acutiñ naxyucmi. Amatonj tum jiyi. Anímáy: “¿Saulo, Saulo, tiiga anacpoypa?” ⁸ Ocmi anacwác. Annímáy: “¿Miiapaap, mánomi?” Jesic anímáy: “Ich aJesús de Nazaret jém michpic síp inicpoy.” ⁹ Jém ityajwiip con aich iixyaj jém jucti. Tsam pimi çnyaj. Imatonyaj jém jiyi, pero da icutiyyiyaj ti anímáy. ¹⁰ Jesic ich annímáy: “¿Mánomi, ti wiap anwat?” Jém tánomi anímáy: “Tsucumi, nici Damasco, jemum miñimaytap itumpiy cosa titam ansunpa iga inwatpa.” ¹¹ Como jém jucti ichoça acáchtiwat, ajcteñyaj jém anwagananicpáppic hasta anúcta Damasco.

¹² Jemum it idic tum pxiñ inñiyi Ananías. Tum wibic pxiñ. Iwatpa itumpiy juuts nimpa jém Moisés inquímayooyi. Itumpiy jém judíos, jém ityajwiip Damasco, tsam iwixyajpa. ¹³ Jém Ananías miñ aám. Acunúc, anímáy: “Mantíwi Saulo, ámqiimi.” Jesic anámquímáy, jeeti rato wiawum mu ánixixóy. ¹⁴ Jesic jém Ananías animáy: “Jém tanjatun Dios jém icupicnewiip jém wiñicpic tantummitam, micupin iga inñodónaiñ ti ixunpa Dios iga inwatpa. Micupin iga inñixpa jém Cristo, iga immatonpa ti miñimáypa. ¹⁵ Michiypa juuts testigo para je iga inñmadáypa itumpiy jém pxiñtam icuwiti yíp naxyucmi ti inñixne y ti immatonne. ¹⁶ Siip odoy anjooci, tsucumi, çinji. Anwejpaati tanjatun Dios jém Cristo inñiyimi iga miccáyapa jém inñtanca.”

Jém Pablo inmat jutsa micutsatta jém tungac pxiñtamanjom

¹⁷ Cuando aset Jerusalén atigiy jém mijpic masticjom iga anañwejpátpa Dios. Jemum ánix tum poñ. ¹⁸ Ánix jém tánomi. Anímáy: “Jicsciy puti yíp Jerusalén porque yipyaj pxiñtam da iwadáypa caso iga inñmadáypa ich anañmati.” ¹⁹ Ocmi annímáy: “Mánomi, jeeyaj ijodonayaj iga jáy amméts jém pxiñtam jém micupicnewiip cada sinagoga. Ammatsyajpa iga ançotpa cárcel. Tsam ançótsyaj. ²⁰ Cuando accaata jém Esteban, jém inmatpáppic mich inñmati, ich asibatim. Ich ait de acuerdo iga accaata. Anwadáy cuenta jém iyootiyaj jém iccaaneyajwiip.” ²¹ Pero jém tánomi anímáy: “Nicsim. Mançutsatpa juumi iga inñmadáypa ich anañmati jém tungac pxiñtam jém dapic je de Israel.”

Jém Pablo it jém coronel icijom

²² Cuando imatonyaj iga nimpa jém Pablo iga inñmadáypa Dios inñmati jém juumipic pxiñtam, pimi jóyñeyaj jém Israelpic pxiñtam. Moj jiyiyaj pimi. Nimyajpa:

—Accaataiñ yíp pxiñ. Da wi iga tsíypa vivo.

²³ Tsam pimi añweyajpa. Itopyaj iyooti, ipatsquetyaj naxyucmi. Ipatsquímyajpa pótpót.

²⁴ Jeeyucmi jém coronel ipimiy jém isoldado iga ininicyajiñ jém cuartel. Ipimiy iga cótstaiñ jém Pablo iga inñmadiñ tiiga iccujíñáy jém pxiñtam y tiiga tsam jiyiyajpa jeeyaj acontra de jém Pablo. ²⁵ Pero cuando tsenneta jém Pablo iga cótsta, inñimáy jém capitán jém itwip jem:

—¿Que mich wiap inçóts tum Romapic pxiñ jém dapic i icipinne?

²⁶ Cuando imaton jém capitán, nic iñímáy jém coronel:

—Cuidado iga immalwadáypa yíp p̄ixiñ porque Romapic.

²⁷ Jesic miñ jém coronel, icwác jém Pablo:

—¿Que numa mich miRomapic mip̄ixiñ?

Nimpa jém Pablo:

—Numa, ich ajeam.

²⁸ Jém coronel iñímáy:

—Ich tsam jáyan tumiñ anyoj iga atsíy juuts aRomapic ap̄ixiñ.

Jesic nimpa jém Pablo:

—Pero ich aRomapic porque anay jém Roma iñaxyucmi.

²⁹ Jesic jeeti rato jém icótsyajpáppic idic ichacyaj. Jém coronel tsam c̄iñpatim iga ichenne cuando ijodóna iga Romapic p̄ixiñ.

Añwejayta Pablo jém añjagooyiyaj iwiñjom, jém Sanhedrín

³⁰ Jesic icuquejama jém coronel ijodónatooba tiiga jém judíos iquejajwadáypa jém Pablo. Iccáyáy jém cadena. Jesic in̄tuumawat itumpiy jém cobacpic panij con jém Sanhedrín. Jesic nanicta jém Pablo jém añjagooyiyaj iwiñjom.

23

¹ Jesic jém Pablo iámmats jém Sanhedrín, iñímáy:

—Mant̄iwitam, ich anjodon iga hasta siip anwatne juuts ixunpa Dios. Da ti añc̄iñpa jém Dios iwiñjom.

² Jesic jém Ananías, jém cobacpic panij, ip̄imíy tum policia, jém itw̄iip nocojom jut it jém Pablo, iga itojáyñ ijip. ³ Jesic jém Pablo iñímáy jém panij:

—Dios micótspa mimich. Mich tsam minimigóyaytap. Jemum micoñ iga añc̄iñpa juuts nimpa jém añquímayooyi, ¿jesic tiiga in̄watpa acontra jém añquímayooyi iga añcóts?

⁴ Jesic jém ityajw̄iip jem iñímáy jém Pablo:

—Odoy malnímaayi jém cobacpic panij jém iccámnew̄iip Dios.

⁵ Jém Pablo iñímáy:

—Mant̄iwitam, da anjodon siiga cobacpic panij. Nimpa jém Dios in̄mati jut jayñeta: “Odoy malnímaayi jém in̄injagooyi jém in̄jacpáppic jém p̄ixiñtam.”

⁶ Ocmi jém Pablo icutiíyíy iga wisten partido it jem jut antuumaneyaj. It jém fariseoyaj, ittim jém saduceoyaj. Jesic p̄imi j̄yypa iga imatonjajiñ. Nimpa:

—Mant̄iwitam, ich afariseopic ap̄ixiñ. Jém anjatun con anjatunwewe fariseopic p̄ixiñ. Siip anquejajwadayta porque añcupicpa iga p̄ispa jém caaneyajw̄iip.

⁷ Cuando yaj n̄imi jém Pablo, moj añajiyaj jém fariseoyaj con jém saduceoyaj. Nawécayta jém p̄ixiñtam jut antuumaneyaj. ⁸ Porque jém saduceoyaj n̄imyajpa iga da p̄ispa jém caaneyajw̄iip. Datim icupicyajpa iga it jém sin̄yucmi p̄ixiñtam ni jém espíritu, pero jém fariseoyaj icupicyajpa iga it itumpiy jexpic cosa. ⁹ Jesic tsam p̄imi j̄yypa itumpiy jém p̄ixiñtam. Jesic teñchucum algunos jém accuyujoypaap de jém fariseopic añquímayooyi. Nimpa:

—Yíp p̄ixiñ da ti mal iwatne. W̄iip ijíyáy tum sin̄yucmic p̄ixiñ o tum espíritu. Da tanictámpa acontra de Dios.

¹⁰ Jesic tsam p̄imi añayajpa. Jém coronel c̄iñpa iga ichichañsajajpa jém Pablo. Jeeyucmi ip̄imíy jém isoldado iga itopyajpa p̄imimi jém Pablo jém p̄ixiñtam ic̄iñjom y iga in̄iniguñ eybic jém cuartel.

¹¹ Jeetim tsuu jém tánomi iwiñquejay jém Pablo jém cuartel. Iñímáy:

—MiPablo, camamw̄ati iñanama. Juuts ininmat ich anan̄mati ȳip Jerusalén tienes que ininmatpatim jém attebet Roma.

Ijisyajpa jutsap iccaayaj jém Pablo

¹² Jesic icuquejama algunos jém judíos iwatyajpa de acuerdo iga iccaayajpa jém Pablo. Nimyajpa iga: “Da tawícpa ni da tanícpa hasta que tanaccaaba jém Pablo.” ¹³ Ityaj más de cuarenta p̄ixiñtam jém nimneyajw̄ip jempic. ¹⁴ Ocm̄i nic iámyaj jém panij anjagooyi con jém w̄idaytam de Israel. Iñimayyaj:

—Aichtam animneta iga s̄ip da awícpa ni da anícpa hasta anaccaaba jém Pablo. ¹⁵ S̄ip mimichtam con jém Sanhedrín wágaytaami jém coronel iga joymi inimíñiñ michtam inwiñjom. Niman̄taayaji iga chocoymi in̄cipin̄pa. Jesic aichtam aittámpa listo iga anan̄teñtámpa tunjom antes que núcpa jut miitta.

¹⁶ Pero jém Pablo iyom̄tiwi iman̄ic ijodón̄a iga an̄teñt̄ap tunjom. Jesic nic inmadáy iachi jém cuartel. ¹⁷ Ocm̄i jém Pablo in̄wejay jém capitán jém iwatnew̄ip cuenta. Iñimáy:

—Nan̄ici ȳip jaych̄ixi jut it jém coronel. Iniit tum an̄mati iga iñimáypa.

¹⁸ Jesic jém capitán inin̄ic jém jaych̄ixi jut it jém coronel, iñimáy:

—Jém preso, jém Pablo, an̄wejay. Iwác iga manamíñáyiñ ȳip jaych̄ixi. Iniit tum an̄mati iga miñimáypa.

¹⁹ Jesic jém coronel imatsáy ici jém jaych̄ixi. Inin̄ic aparte. Iñimáy:

—¿Ti annimaytooba?

²⁰ Jém jaych̄ixi iñimáy:

—Jém judíos ityaj de acuerdo iga joymi miwágayyajpa iga inin̄iguiñ jém Pablo jém Israelpic anjagooyi iwiñjom. Niman̄taayap iga ic̄ipin̄pa chocoymi. ²¹ Pero odoy cup̄ici porque más de cuarenta jém p̄ixiñtam in̄teñyajpa tunjom. Iwatyaj acuerdo iga da wícpa ni da nícpa hasta iccaaba jém Pablo. S̄ip ityajum listo. Injócneyaj iga in̄cutson̄pa.

²² Ocm̄i jém coronel in̄quím jém jaych̄ixi, iñimáy:

—Odoy i an̄madaayi juuts annimayñe.

Cutsatt̄a jém Pablo jém gobernadorc̄im

²³ Jém coronel in̄wejay wisten jém icapitán. Ip̄im̄iy iga naw̄itsacyajtaiñ dosciento soldado jém nicyajp̄appic puymi y setenta jém nicyajp̄appic cawajyucmi y dosciento soldado jém inin̄icyajp̄appic jém lanza. Iñimáy iga nicyajñiñ jém attebet Cesarea tsuuc̄im a las nueve. ²⁴ Ip̄im̄iy iga imétsayajiñ cawaj iga icquímcaaba jém Pablo y iga iw̄iwadiñ cuenta hasta que núcpa jut it jém gobernador Félix. ²⁵ Jém coronel ijay tum toto, icutsadáy jém gobernador Félix con jém isoldado. Nimpa jém toto:

²⁶ “Ich aClaudio Lisias. MiFélix, tsam w̄ibic migobernador. S̄ip mandioschiiba. ²⁷ Jém judíos imatsne idic ȳip p̄ixiñ. Iccaatooba idic. An̄cupuj con jém ansoldado. Cuando an̄jodón̄a iga Romapic p̄ixiñ, ²⁸ an̄jodón̄atooba tiiga iquejajwadayyajpa, jesic ananic jut an̄tuum̄aneyaj jém Israelpic anjagooyiyaj. ²⁹ Ampát tiiga iquejajwadayyaj. Iwat algo en contra jém Israelpic an̄químayooyi. Pero da in̄ij it̄an̄ca iga iccaayajpa ni datim w̄i iga ipajyajpa. ³⁰ An̄jodón̄a iga jém judíos ijisyajpa iga iccaayajpa. Jeeyucmi man̄cutsadáypa ȳip p̄ixiñ. Amp̄im̄iytim jém iquejajwadayñew̄ip iga nicyajñiñ mich inwiñjom. Jesánam man̄jáyáy.”

³¹ Jesic jém soldado iwatyaj juuts ip̄im̄iy jém coronel. Tsuuc̄im inin̄icyaj jém Pablo hasta jém attebet Antípatris. ³² Jesic icuquejama jém soldado, jém nicneyajw̄ip puymi, setyaj eybic jém icuartel. Jém tungac soldado, jém nicneyajw̄ip cawajyucmi, seguido iwagananicyajpa jém Pablo. ³³ Cuando núcyaj jém attebet Cesarea, ic̄ijun̄codáy jém toto

jém gobernador icijom. Ininicyaj jém Pablo jém gobernador iwiñjom. ³⁴ Cuando yaj imay jém toto jém gobernador, icwác jém Pablo iga jutpic pixiñ. Cuando ijodóna iga nay jém naxyucmi de Cilicia, ³⁵ jesic iñímáy:

—Mammatóñaypa jém iñasunto cuando miñpa jém miquejajwadayñewiip.

Jesic jém gobernador ipimíy iga nanictañ jém palacio de Herodes iga wattañ cuenta.

24

Nacupujta Pablo jém gobernador Félix iwiñjom

¹ Ocmi cuando nasne cinco día, núcyaj Cesarea jém cobacpic panij jém Ananías con algunos jém Israelpic anjagooyiyaj. Inimiñyajtím tum abogado iñiyi Tértulo. Miñ iquejajwadayyaj jém Pablo jém gobernador iwiñjom. ² Cuando namiñta jém Pablo, jesic jém Tértulo moj iquejajwadáy. Nimayta jém gobernador:

—Iyucuipdios, migobernador, iga tsam tawitta. Da i jém pleito. Tsam wiap ininjac yíp naxyucmi porque tsam mijixiíy. ³ Icuwiti yíp naxyucmi anjodontam iga mich tsam anwawadayta. ⁴ Pero iga odooy manactogóyayíñ jáyan tiempo, mancunucsáypa iga amatónaayi tum rato ti mannímáypa. ⁵ Yíp pixiñ tsam pimi malo, jut quej ictsucum iga iccujíñáypa jém judíos iga nawécyajtap. Yíp pixiñ jém cobacpic jém grupo nazareno. ⁶ Ininictooba idic jém tungac pixiñ jém táñcaiywiiip jém mijpic masticjom. Jeeyucmi ammatsta. Ançipinjooba idic con aichtampic anañquímayooyi. ⁷ Pero jém coronel Lisias tigiy con isoldado, pimimi itop. ⁸ Iñímáy jém iquejajwadayñewiip iga nicyajíñ iquejajwadáy mich inwiñjom. Siip mich mismo wiap inçipin iga iñjodónañiñ numa tiiga anquejajwadayñeta.

⁹ Jém judíos, jém miññeyajwiiip jém gobernadorcim, ninyajtím iga numa. ¹⁰ Ocmi jém gobernador iwadáy seña jém Pablo iga jíyíñ. Jesic nimpa Pablo:

—Ich amaymay iga wiap ancutson jém aquejajwadayñewiip mich inwiñjom. Anjodon iga jáyan amtíy michíy iga minjagooyi yíp naxyucmi. ¹¹ Siiga inicwácpa yíp pixiñtam, jeam minmadáypa iga apenas doce día anúcne Jerusalén iga anañwejpátpa Dios. ¹² Da apát jut síp anaña jém pixiñtam, ni datim apát iga síp ançujíñáy jém ityajwiiip jém mijpic masticjom, ni tum sinagoga, ni tungac parte de jém attebet. ¹³ Yípyaj da wiap awiñpacchi juuts ninyaj iga ich anwatne. ¹⁴ Pero ich manañmadáypa iga numa ançuyoxap jeetim Dios jém ijsneyajwiiip jém wiñcpic anjatunwewetam. Ich aít de acuerdo con jém jomipic anquímayooyi, pero jeeyaj ninyajpa iga migooyi. Ich ançupicpa itumpiy jém ijaychacnewiip jém wiñcpic anmatçwiñ y jém Moisés inquímayooyi. ¹⁵ Ich ananjócpatím juuts jeeyaj iga Dios icpíspa jém caaneyajwiiip, jém witampic y jém malopic. ¹⁶ Jeeyucmi siempre anwadáypa caso iga anwíwatpa. Jesic da ti ançinpa jém tanjatun Dios iwiñjom ni jém pixiñtam iwiñjom.

¹⁷ Cuando tsam wiñgam anicne, jesic aset eybic anticmi iga anyoxpátpa jém antiwítam jém yaachayajpáppic y iga antsacpatím tum ofrenda. ¹⁸ Iganam síp anwat jempic, algunos jém judíos, jém miññeyajwiiip de Asia, apát jém mijpic masticjom. Anwatne jém costumbre iga acuáyíñ. Da anamiñ jáyan pixiñtam ni da i jém bulla. ¹⁹ Más wi meega miñ aquejajwadáy jém Asiapic judíos siiga iniit algo encontra para ich. ²⁰ Wítim meega yípyaj pixiñtam, jém miññeyajwiiip yim, minmadáypa mimich ti mal anwatne, siiga apádáy antañca cuando açipin jém panij anjagooyi iwiñjom. ²¹ Da ti anwat no más pimi ajiy cuando aít jém anjagooyi iwiñjom, annímáy: “Siip açipintap porque ançupicpa iga píspa jém caaneyajwiiip.”

²² Jém Félix iwicutiíyíy jém jomipic anquímayooyi. Cuando yaj imaton ti nimpa jém Pablo, jém Félix ipoychac jém asunto; da icipin. Nimpa:

—Cuando miñpa jém coronel Lisias iga acjodónap ti inwatne, jesic yajpa anwĩtsac jém asunto.

²³ Ocmi jém gobernador Félix ipimíy jém capitán iga seguido iwatpa cuenta jém Pablo jém palacio. Pero ijícpa iga tigíypa jém iamigoyaj iga miñpa iám y ichiiba iwĩccuy titam itogóyáy.

²⁴ Jesic tungac jama más, miñgacum eybic jém gobernador Félix con iwichomo Drusila, tum Israelpic yomo. Inwejay jém Pablo iga inmadáyíñ jutsap micupic jém Jesucristo.

²⁵ Pero Pablo inmadáy iga Dios ixunpa iga tanwĩwadiñ, ixunpatim iga tum pĩxiñ nanjactap iyaac iga odoy imalwadiñ. Inmadáyítim iga núcpa jama iga Dios icĩpiñpa itumpiy jém pĩxiñtam. Jesic cuando imaton, jém Félix tsam pĩmi cĩñ. Inĩmáy jém Pablo:

—Siip poyñicsim. Cuando anaĩtpa lugar manañwejaypa eybic.

²⁶ Ijispatim jém Félix iga jém Pablo ichiiba tumiñ iga cutsigaytaiñ. Jeeyucmi watciy inwejaypa iga anmatpa con je. ²⁷ Wisna amtíy iñasca así jém Pablo. Ocmi jém Félix putum de gobernador. Jém Porcio Festo jeegagam tsíy iga gobernador. Pero jém Félix, como ixunpa iga iwĩxiñ jém judíos, da itop jém Pablo.

25

Anwejayta Pablo jém gobernador Festo iwiñjom

¹ Yaguiñ núc jém naxyucmi jém gobernador Festo. Nas tucunajama, put jém attebet Cesarea, nic Jerusalén. ² Jém panij anjagooyiyaj con jém anjagooyiyaj de jém judíos, nic iáyay jém gobernador. Iquejajwadáypa jém Pablo. ³ Iwágayyaj tum favor jém gobernador. Nĩmyaj:

—Mañcunucsáypa, ayoxpaati, cutsati jém Pablo Jerusalén.

Nĩmyaj jempic porque ijisyajpa iga inteñyajpa tunjom iga iccaaba.

⁴ Pero jém gobernador Festo icutson. Nĩmpa:

—Jém Pablo tsíy preso Cesarea. Ich anyaac da jáyñe anicpa jemíc. ⁵ Jeeyucmi mannímáypa, wĩ siiga algunos de mimichtam minjagooyítam tawaganictámpa Cesarea. Siiga jém pĩxiñ iwat algun tãñca, jesic jemigam wiap inquejajwadáy.

⁶ Jesic jém Festo cuando iyaj ocho o diez día Jerusalén, set eybic Cesarea. Icuquejama nicum coñi jém oficina jut cĩpĩjóypa. Ipimíy jém soldado iga inimíñiñ jém Pablo.

⁷ Cuando jém Pablo tigiy jém oficina, icunúcyaj jém judíos, jém miññeyajwĩp de Jerusalén. Moj iquejajwadayyaj iga tsam mĩjtampic tãñca iwatne. Pero da i wiap miwiñpacchi.

⁸ Jesic nacupujtap jém Pablo. Nĩmpa:

—Ich da ti mal anwatne contra jém judíos inquĩmayooyi, ni contra jém mĩjpic mastic, ni contra jém Romapic anjagooyi.

⁹ Jém gobernador Festo ixunpa iga iwĩxyajiñ jém judíos, jeeyucmi icwác jém Pablo, nĩmayta:

—¿Que iñxunpa iga mañcutsatpa Jerusalén iga jemigam micĩpĩñtaiñ?

¹⁰ Pablo icutson, inĩmáy:

—Ich ait yĩm jut cĩpĩjóypa jém gobernador. Yĩp oficina jém Romapic anjagooyi imĩchi. Yĩm tienes que acĩpĩñtap. Mich inwĩjodon iga da ammalwadayñe jém judíos. ¹¹ Siiga tsam pĩmi ammalwatne, wĩ iga ampictsonpa jém castigo iga accaatap. Pero siiga da quejpa jém antãñca juuts jeeyaj aquejajwadayñe, jesic da i wiap acĩjunçot jém Israelpic pĩxiñtam icĩjom. Anwácpa iga jém Romapic anjagooyi iyaac acĩpĩñiñ.

¹² Cuando yaj anmatiyaj con jém ichiipáppic jĩxi jém gobernador Festo, inĩmáy jém Pablo:

—Inwác iga micĩpĩñiñ jém Romapic anjagooyi, siip jemigam miñicpa.

Anwejayta jém Pablo jém rey Agripa iwiñjom

¹³ Cuando da waṭña jama nasne, núc Cesarea jém rey Agripa con iyomo Berenice. Miñ idioschi jém gobernador Festo. ¹⁴ Ityaj Cesarea waṭña jama. Jesic jém Festo inmadáy jém rey ti iñasca jém Pablo. Iñímáy:

—Yim it tum p̄ixiñ ichac preso jém Félix cuando put de gobernador. ¹⁵ Cuando aoy Jerusalén jém pañij anjagooyiyaj con jém iwidaytam de jém judíos, anmadayyaj ti iwatne yíp p̄ixiñ. Awágáy iga anchiñ castigo. ¹⁶ Ich ancutsoñ iga taichtam jém taRomapic, da tanaṭa jém costumbre iga tanchiiba castigo tum p̄ixiñ siiga da wiñti iwiñpacchiiba jém iquejajwadayñewiip iga wiap inicupujta iyaac. ¹⁷ Jeeyucmi cuando núcyaj yim jém Israelpic anjagooyiyaj, da jáypa ancipiñ. Icuquejama acoñ juṭ acipinóypa, anañwejáy jém p̄ixiñ. ¹⁸ Pero cuando núc yim jém iquejajwadaypáppic, da iniquímyaj quejaj iga imalwatne juuts ich anjisa idic. ¹⁹ No más tsam jóyñe iga inimiñ tum jomipic anquímayooyi y iga inmatpa de tum p̄ixiñ iñiyi Jesús. Accaata, pero siip nimpa jém Pablo iga pisneum. ²⁰ Ich da ancutiyyiy ti anwatpa con yicxp̄ic asunto. Jesic anacwác jém Pablo siiga iwianjam iga ancutsatpa Jerusalén iga jemigam w̄itsactaiñ. ²¹ Pero como je iwác iga c̄ipintañ jém Romapic anjagooyicim, jém Augusto, ich amp̄imiy iga tsíyñ preso hasta wiap ancutsat jém Romapic anjagooyicim.

²² Jesic jém Agripa iñímáy jém gobernador Festo:

—Ich agui ammaton̄tooba ti nimpa yíp p̄ixiñ.

Jém Festo iñímáy:

—Joymi immaton̄pa.

²³ Icuquejama jém rey Agripa con iwichomo Berenice núcyaj jém palacio. Agui w̄i cuyajneyaj. Iwaganamiñyaj jém soldado injagooyiyaj con jém más mijpic anjagooyiyaj de jém atebet Cesarea. Jém gobernador Festo ip̄imiy isoldado iga inimiñiñ jém Pablo. ²⁴ Jesic moj j̄iyi jém Festo. Nimpa:

—Mirey Agripa, con iñtumpiytam miitw̄iip yim. Yíbam jém p̄ixiñ. Tsam jáyan jém judíos iquejajwadayñe contra je. Iquejajwadáy Jerusalén y iquejajwadáytim yim Cesarea. Da ichacpa iga n̄myajpa iga accaatañ. ²⁵ Ich animpa iga da ti iwatne iga iccaayajpa. Pero iyaac iwác iga ic̄ipin̄iñ jém Romapic anjagooyi jém Augusto. Jeeyucmi anjis iga ancutsatpa jem̄ic. ²⁶ Pero como da ampádáy itañca iga anjáyáypa jém tananjagooyi jém Romapic, jeeyucmi anamiñ mich inwiñjom, mirey Agripa, iga in̄cipin̄iñ. Jesic siiga quejpa ti mal iwatne, wiap anjáyáy jém tananjagooyi jém itw̄iip Roma. ²⁷ Ich animpa iga da wiap ancutsat tum preso jém tananjagooyicim siiga da anjáyáypa tiiga quejajwadayñeta.

26

Jém Pablo inmatpa ti iwatne jém rey Agripa iwiñjom

¹ Ocmi jém rey Agripa iñímáy jém Pablo:

—Wiap annímáy iñyaac ti inwatne.

Jesic jém Pablo icquím ici, moj inmat así:

² —Mirey Agripa, agui amaymay iga wiap anañmat mich inwiñjom iga anacupujtap juuts aquejajwadayñe jém judíos. ³ Ich agui amaymay porque mich inw̄ixpicpa itumpiy jém judíos icostumbre. In̄jodon̄tim jutsap in̄acayaj jém inquímayooyi. Jeeyucmi manwágáypa iga amatón̄aayi chocoyi.

Pablo inmatpa ti iwat antes que icupicpa Cristo

⁴ Itumpiy jém judíos ijodon̄yay juuts jáy anwat dende ats̄ixiñam jém naxyucmi juṭ anay y jém Jerusalén. ⁵ Jeeyaj iw̄jodon̄yay y wiap inmat siiga iwianjamyay iga ich an̄cuyajca jém fariseopic anquímayooyi jém más táncapic tanwat de itumpiy jém anquímayooyiyaj. ⁶ Yim siip ac̄ipintap porque ananjócpa iga Dios ic̄ispa jém caaneyajw̄iip juuts ijycámáy

jém wiñicpic anjatunwewetam. ⁷ Itumpiy jém Israelpic pixiñtam, jém doce tribu, injócyajpatim jém promesa. Jeeyucmi anjístampa Dios y añcuyoxatampa tsuucim y siññi. Siip, manrey Agripa, jém Israelpic pixiñtam aquejajwadayne porque ananjócpa jeetim promesa. ⁸ ¿Tiiga iñjisa iga Dios da wiap icpis jém caaneyajwip?

Pablo pecam icpoypa idic jém icupicneyajwip Cristo

⁹ Pecam ich anyaac anjispatic iga ammalwadáypa jém pixiñtam jém itúnypáppic jém Jesús de Nazaret. ¹⁰ Jempigam anwat Jerusalén con jém toto jém achiiñewip jém panij anjagooyiyaj. Ampaj tsam jáyan jém icupicneyajwip jém Cristo, jesic miccaayajta jeeyaj, ich aít de acuerdo. ¹¹ Wati veces anchi castigo iga ichaguiñ iga icupicpa jém Cristo. Jempam anwat itumpiy jém sinagoga. Tsam pimi anjóiypa idic. Tsam ammalwadáy, anacpóyiy juumi hasta jém tunjac naxyucmi.

*Pablo inmatpa eybic jutsa micupic Cristo
(Hch. 9:1-19; 22:6-16)*

¹² Jeeyucmi anic jém attebet Damasco. Jém panij anjagooyiyaj acutsat con tum toto. ¹³ Pero cuando aniqui tunjom, mirey Agripa, como cugapjama ánix tum jucti siñyucmi. Más pimi tsocpa que jém jama. Actsíy jém ichoca con jém anwagananicpáppic.

¹⁴ Jesic antumpiytam acutiñta naxyucmi. Jesic ammaton tum jiyi, anímayta jém hebreo anmatimi: “¿Saulo, Saulo, tiiga ammalwadáypa? Iñyaac siip minimalwadayatp; juuts iwatpa jém buey cuando iñeppa jém ichenóycuy inquiñi, iñyaac miniccoowatp.”

¹⁵ Ocmi ich annímáy: “¿Mijapaap, mánomi?” Jesic anímáy: “Ich aJesús jém síppáppic ammalwadáy. ¹⁶ Tsucumi. Manwiñquejay iga mancupin iga añcujoxap. Michíyppa juuts testigo iga ininmatpa ti iñix siip y ti iñixpa ocmi. ¹⁷ Manyoxpátpa iga odoy mimalwadayyajiñ jém Israelpic pixiñtam y jém tunjac pixiñtam jém dapic je de Israel. Siip mancutsatpa iga nicpa ininmadáy ich ananmati jém tunjac pixiñtam jém dapic je de Israel. ¹⁸ Mancutsatpa iga inictojáypa iixcuy iga odom más wityajiñ piichcim, pero wityajiñ juctianstocajom. Mancutsatpatim iga inictsacpa jém tunjac pixiñtam jém Wocciwiñ ipimi iga ipictsóniñ jém Dios ipimi. Ininmadáypa ich ananmati iga acupiguiñ aich, jesic wadaytap perdón jém itañca. Jesic Dios imanigayajpa con los demás jém cuáyñewip ianama.”

Pablo iwatpa juuts iñímáy Jesucristo

¹⁹ Jeeyucmi, mirey Agripa, anwatpa juuts anímáy cuando Dios anquejay jém poñ. ²⁰ Wiñti oy ananmadáy jém anmati jém ityajwip jém attebet Damasco, ocmi anic Jerusalén y icuwiti jém naxyucmi de Judea. Ocmi anic jut it jém tunjac pixiñtam jém dapic je de Israel. Anímáy iga icucaguiñ ijixi y iga ichaguiñ iga imalwatpa y mojpa iwíwat iga quejiñ iga cucacneum ijixi. ²¹ Jeam ananúc. Jeeyucmi amats jém judíos jém mijpic masticjom. Iwatyaj tum trato entre jeeyaj iga accaayajpa. ²² Pero Dios tsam ayoxpát. Hasta siip da antsacne iga ananmatpa Dios inmati. Ananmadáypa cualquier pixiñtam jém mijpic anjagooyi y jém dapic cargojy. Ich ananmatpa no más juuts nimpa jém wiñicpic anmatciwiñ y jém Moisés cuando inmatyajpa ti miñpa. ²³ Jeeyaj nimyaj iga yaachwattap jém Cristo y ocmi accaatap. Je jém wiñtipic icpispáppic Dios de jut it jém caaneyajwip. Chiitap jém Israelpic pixiñtam jém wibic jixi iga icutiyyiyajiñ. Chiitapim jém tunjac pixiñtam, jém dapic je de Israel.

Por uxaj jém rey Agripa icupicpatim Cristo

²⁴ Iganam nacupujtap jém Pablo, tsam pimi jiy jém gobernador Festo. Nimpa: —¡Mich, miPablo, tsam miloco! Iga tsam pimi micuyujne milocojane.

²⁵ Pero Pablo icutsoj. Iñímáy:

—Miwibic miFesto da alocojane. Síp manañmadáy jém nūmapic añmatí jém jixiywñip.

²⁶ Yim it jém rey Agripa. Je tsam iwicutñiyíypa itumpiy yípyaj cosa. Jeeyucmi manñañmadáypa, da acñpa. Ich animpa iga iwijodon itumpiy yíp jomipic añquímayooyi porque da yamwatneta jut da i iixpa. ²⁷ Mirey Agripa, ¿que inçupicpa juuts nimpa jém wiñicpic añmatciwiñ? Ich animpa iga inçupicpa.

²⁸ Jesic jém Agripa iñímáy Pablo:

—Por uxañ anaccupicpa Cristo.

²⁹ Ocmi Pablo iñímáy:

—Por uxañ o por jáyañ, ich tsam ansunpa iga inçupicpa. Da solamente mimich, pero itumpiy jém sippic amatoñneyaj. Tsam añwñañjam iga michíytampa juuts aich, pero sin cadena.

³⁰ Cuando yaj nimi jém Pablo, teñchucumyaj jut coñyaj jém rey, jém gobernador y jém Berenice con itumpiy jém iwaganaitwñip. ³¹ Jesic putyaj jém añjagooyiyaj, nicyaj aparte. Moj nanímayajtaji entre jeeyaj:

—Yíp pixiñ da ti iwatne iga accaatap ni iga pajtap cárcel.

³² Jém Agripa iñímáy jém Festo:

—Wiap tañcutsigáy idic yíp pixiñ meega da iwác iga icipñiñ jém Romapic añjagooyi.

27

Nanicta Pablo Roma

¹ Jesic icunúcyaj jixi iga acutsattamtap jém naxyucmi de Italia. Jém Pablo con jém tungac presoyaj cñjñcotta tum capitán icñjom. Iñiyi Julio. Jém batallón iñiyi Augusto. ² Atigiyta tum barcojom. Tsucum jém barco Adramitio. Naspá jém atebetyaj lamar aññaca jém naxyucmi de Asia. Awaganictampa con jém Aristarco. Je tsucumne jém atebet Tesalónica jém naxyucmi de Macedonia. ³ Icuquejama anúcta jém atebet Sidón, lamar aññaca. Jém capitán Julio tsam iyaachañjam jém Pablo. Ijígáypa iga nicpa iám jém iamigoyaj. Ijígáypatim iga iyoxpátpa y iga ichiiba titam itogóyay.

⁴ Atsucumta jém atebet Sidón. Anasta jém isla de Chipre jém aññaymipic lado porque tsam pimi jém sawa. ⁵ Anjacta jém lamar jém naxyucmi Cilicia y Panfilia iñuma. Anúcta jém atebet Mira jém naxyucmi de Licia.

⁶ Jemic jém capitán Julio ipát tum barco jém tsucumnewñip jém atebet Alejandría. Nicpa jém naxyucmi de Italia. Jém capitán acotta barcojom. ⁷ Watña jama anictampa chocoymi. Tsam táñcañ mu annúcta jém atebet Gnido iñuma. Como tsam pimi jém sawa, da tacnas jem. Jeeyucmi aquetta hasta jém isla de Creta. Anúcta jém punto de Salmón iñuma. Anasta noco jém isla de Creta. ⁸ Tsam táñcaap iñic jém barco. Witpa lamaraññaca. Ocmi anúcta tum lugar iñiyi jém Wibic Puerto, nocojom jém atebet Lasea.

⁹ Tsam jáyañ tiempo anactogoyta. Sñp tsam it peligro iga anictampa barcojom porque nasne jém siñ de ayuno. Núcne jém tiempo cuando tsam poypa jém sawa. Jeeyucmi Pablo ichi jixi jém pixiñtam. ¹⁰ Iñímáy:

—Mipixiñtam, ánixpa iga sñp tsam it peligro iga tanicpa barcojom. Wiap itogoy jém barco con itumpiy jém carga hasta togoypatim jém tamvida.

¹¹ Pero jém capitán da imatoñ ti iñímáy jém Pablo. Más icupicpa jém barco iomi y jém icwitpáppic jém barco. ¹² Casi itumpiy jém ityajwñip jém barcojom agui nictooba porque da wicóm jém puerto jut aitta iga annascatampa jém tiempo de pagac cuando tsam poypa jém sawa. Nicyajtooba jém atebet Fenice, tungac puerto, jeetim isla de Creta. Íñámmocne aññantigiyimi. Jenum wiap annascata jém tiempo de succuc.

Tsam it mal tiempo jém lamar

¹³ Jesic moj poyi jém tsapsawa, ijisyajpa iga wicoomap, wiap iñicyaj. Tsucum jém barco, moj niqui jém lamar anñaca jém isla de Creta. ¹⁴ Pero da jáy mactsiyta tum sawa tsam pimi. Juuts tum ciclón. Jemic iccámayyaj iñiyi jém euraquilón. ¹⁵ Moj ininic jém barco. Como da wiap anañámmoc jém sawa, jesic jém icwitpáppic jém barco ijicpa iga ininicpa. ¹⁶ Anasta tum xutu isla iweñtañ, iñiyi jém isla Clauda. Jem da pimi núcpa jém sawa. Tsam táñcaā maampiñta jém lancha jém ijicnewiip jém barco. ¹⁷ Cuando yaj ipiñyay jém lancha, moj ichenyaj jém barco con mijpic tipxi iga odoy sámíñ. Tsam cñneyaj. Wiip tsíypa jém pooycñm jém lugar iñiyi Sirte. Jesic icquedayyaj ivela. Ijigayyaj iga ininiguñ jém sawa. ¹⁸ Icuquejama como tsam pimi poypa jém sawa, jém pixiñtam moj ipatspatsayyaj lamar jém barco ichimi. ¹⁹ Jesic núcum tucunajama, aichtam anyaac ampatsáyayta jém barco itñcuy con jém itraste. ²⁰ Watña jama it jém mal tiempo, da aguixta jém jama ni jém matsa. Como tsam pimi actsiy jém sawa, anjístampa antumpiytam iga acucaaytámpa.

²¹ Tsam jáyan jama da awícta. Jesic jém Pablo teñchucum jém pixiñtamanjom. Iñímáy:

—Mantiwitam, meega inwadáy caso ti mannímáy y da tatsucum jém isla de Creta jut tait idic, jesic da idic tannascaaba yíp mijpic yaachaji con yíp togoyi.

²² Pero siip camamwattaami iñanama. Porque ni tum de mimichtam da micaatámpa aunque yíp barco togoypa. ²³ Tsúmic awiñquejáy tum siñyucmipic pixiñ jém icutsatnewiip Dios, jém ichpic anjacpa y añcuyoxap. ²⁴ Jém siñyucmipic pixiñ anímáy: “MiPablo, odoy cññi porque tienes que mininúctap jém Romapic anjagooyicñm. Mich inçuyucmi Dios iciacputyajpa itumpiy jém pixiñtam jém inwagananicpaap jém barcojom iga odoy caayajiñ.” ²⁵ Jeeyucmi mannímáypa mimichtam iga odoy cññtaami. Porque ich añcupicpa iga Dios wiap tayoxpát. Ich anjodon iga numa tannascaaba juuts anímáy jém siñyucmipic pixiñ. ²⁶ Pero tienes que tananicpa jém barco hasta tananúcpa tum isla.

²⁷ Cuando nasne dos semana iga aniquitam, jém sawa ananicta jém lamar iñiyi Adria. Jesic como cugapsu jém icwityajpáppic jém barco ijamyajpa iga núctooba naxyucmi. ²⁸ Iquípsyaj jém lamar jutspiy ijojmi. Iniit treinta y seis metro. Cuando wityaj uxañ más juumi, eybic iquípsyaj, iniit veintisiete metro. ²⁹ Tsam icñnyajpa iga núcpa jém tsaayucmi, jesic icquedayyaj cuatro iancla jém barco itutscñm iga ichenyajpa. Tsam anyácneyaj, síp injócyaj iga cuquejiñ. ³⁰ Algunos jém marinero agui quettooba jém barcojom iga poypa. Moj icquet jém lancha, nimanñtaayap iga icquedáypa jém iancla jém icobacciimpic. ³¹ Pero jém Pablo inmadáy jém capitán y jém isoldado:

—Siiga yíp pixiñtam da tsíypa barcojom, michtam micucaaytámpa iñtumpiytam.

³² Ocmi jém soldado itñcujagáy jém lancha itipxi jut cutsenneta jém barcoyucmi iga cutññiñ nñcñm. ³³ Icuquejama jém Pablo iñímáy itumpiy jém pixiñtam iga wícyajiñ. Iñímáy:

—Iniitum dos semana da miwícnet. ³⁴ Jeeyucmi mançunucsáypa iga miwíctámpa uxañ iga impictsonpa impimi porque ni tum de mimichtam da mitogoypa, da togoypa ni tum jém inway jém itwñp inçobacyucmi.

³⁵ Cuando yaj nñmi jém Pablo, imatpacne tum caxtánañi icñjom. Inwejpát Dios jém pixiñtam iwiñjom. Ocmi iwenjac jém caxtánañi, moj wiiqui. ³⁶ Jesic itumpiy jém pixiñtam icamamwat ianama. Mojum wiiquiyaj mex jeeyaj. ³⁷ Aitta jém barcojom adosciento setenta y seis. ³⁸ Cuando yaj wiiquiyaj, moj ipatspatsayyaj lamar jém trigo iga más zejcyajiñ jém barco.

Po jém barco

³⁹ Icuquejama jém icwitpáppic jém barco da ijodonjaj júp naxyucmi ityaj. Iixyaj tum lugar jut wícom jut wítijom jém pooyáñaci. Ijísya siiga wíap ininic jém barco jem. ⁴⁰ Itñcujacyaj jém tipxi jut tsenne idic jém ancla, ichacyaj lamar. Iwijáy jém timón itipxi. Icqúim jém vela, jém icobaccimpic, iga icwídiñ jém sawa. Jém barco moj puti jém lamar aññaca. ⁴¹ Núc jut it jém corriente, tsíy jém barco icobac pooycim, wí cáme, da tsigóypa. Jém ituts moj iccujagáy jém lamar poa. ⁴² Jesic jém soldado ijisyajpa iga iccaayajpa jém preso iga odoy púnanjacyajiñ iga poypa. ⁴³ Pero jém capitán iciacputtooba jém Pablo. Da ijígáy jém soldado iga iccaayajpa jém preso. Ipimíy jém wíapaap iññén iga tigíyíñ lamar iga putpa añsícmi. ⁴⁴ Iñímáy jém dapic wíap iññén iga ipiguiñ tabla o tum jaca jém barco icuy iga iyoxpátpa. Asíam cupudayyaj itumpiyaj añsícmi.

28

Núc jém Pablo jém isla de Malta

¹ Cuando aciputtámum antumpiytam, anjodónata iga jém isla iñiyi Malta. ² Jém jemícpic pixiñtam tsam awixta. Icnúcyaj jucti porque tsam succuc, tsam chijóypa tuj. Anímayta iga: “Miñi mixami.” ³ Ocmi jém Pablo ipin uxan çipi titsnewip. Iganam icotpa juctjom, put tum tsañ, ipóyáy jém jucti ipiji. Tñnecám jém Pablo iciiyucmi. ⁴ Cuando jém ityajwip jem iixyaj iga tñnecám jém tsañ iciiyucmi, nanímayyajta:

—Yíp pixiñ tum accaoypaap. Aunque çiput jém lamar, Dios da iwianjam iga tsíypa vivo.

⁵ Pero Pablo icuxicsáy jém tsañ juctjom. Da ti iñasca. ⁶ Jesic jeeyaj agui injócyaj siiga xinpa jém ici o jeeti rato caaba. Pero ocmi cuando tsam injócyaj, iix iga da ti iñasca. Jesic icacyaj ijixi. Moj nímijaj:

—Yíp pixiñ tum dios.

⁷ Jém anjagooyi iñiyi Publio. Injacpa jém isla. Noco it jém iñas. Tsam awipictsona. Achiita jut amonta juuts aamigotam. Jemum atsíyta tucunajama. ⁸ Mimne idic jém Publio ijatun. Imatsne jém jawan y jém nñipiñiñ. Tigíy jém Pablo jut wone. Inwejpádáy Dios para je, ichigáy icobac, icpis. ⁹ Cuando iixyaj ti wat jém Pablo, jesic miñyajtím itumpiy jém mimneyajwip icuwiti jém isla. Acpsiyajtatim. ¹⁰ Jesic jém pixiñtam tsam awixtámpa, tsam acujíptámpa. Ocmi cuando anictooba eybic jém tunçac barcojom, jeeyaj achiita titam atogóyayta iganam anictámpa.

Jém Pablo núcpa Roma

¹¹ Cuando anyajta tres meses jém isla de Malta, atigiyta tunçac barcojom. Jém barco iñascatím jém tiempo de succuc jeetim isla. Tsucum jém attebet Alejandría. Jém barcoyucmi it wisten watnas iñiyi Cástor y Pólux. ¹² Anúcta nianñaca tum attebet Siracusa. Tucunajama atsíyta. ¹³ Jesic icquímajyaj jém barco ivela, moj aniquitam. Anúcta jém attebet Regio. Icuquejama poypa jém tsapsawa, jesic jém tunçac jama anúcta jém attebet Puteoli. ¹⁴ Jemum ampátta algunos jém tantiwitam. Jeeyaj acunucsayta iga atsíytamiñ tum semana con jeeyaj. Ocmi moj aniquitam Roma. ¹⁵ Jém tantiwitam jém ityajwip Roma, ijodónajaj iga anúctamtooba, miñ amétsta tum lugar iñiyi Foro de Apio. Núcyaj algunos hasta jém Tres Tabernas. Cuando iix jém Pablo iga núcyaj jém tantiwitam, moj ichi gracia Dios, más da çinpa. ¹⁶ Cuando anúcta Roma, jém capitán iciñunçot jém tunçac presoyaj jém comandante iciñjom. Pero ijíc iga da i ipaj jém Pablo. Jígayta iga nic ití tunçac añeymi con tum soldado jém iwatpáppic cuenta.

Jém Pablo inmatpa jém Dios inmatí Roma

¹⁷ Cuando nasne tucunajama, jém Pablo inwejay jém anjagooyiyaj de jém judíos, jém ityajwip Roma. Cuando antuumaneyajum, nímayyajta:

—Mantiwitam, da ammalwadáy jém Israelpic pixiñtam ni datim anwatne en contra de jém wiñicpic tançostumbre jém tachiñewip jém wiñicpic tanjatunwewetam. Pero amatsta Jerusalén, aciñuncotta jém gobernador icijom. ¹⁸ Cuando yaj aciñin, acutsigaytooba idic porque da ti apádáy iga accaatañ. ¹⁹ Pero jém judíos da ijic iga acutsigaytaiñ. Jeeyucmi anwac iga aciñiniñ jém Romapic anjagooyi mex da anquejajwadaytooba jém antiwítam jém judíos. ²⁰ Jeeyucmi mancutsadáy anmati iga miñi aámtaami iga manamatpa. Ich atsenne con yip cadena porque ancupicpa iga Dios icipisa jém caaneyajwip. Jesanetim icupicyaj jém Israelpic pixiñtam dende wiñigam.

²¹ Jesic jém miñneyajwip Roma iñimáy jém Pablo:

—Da ampictsonne ni tum toto de jém naxyucmi de Judea iga ti iññascane mimich. Ni tum jém tantiwítam, jém miñneyajwip jém Jerusalén, da anmadayyaj iga mich immalwatne. ²² Agui ammatontooba jém anmati jém michpic iniñmatpa porque anjodónane iga jut quej tsam jóyixtap yip jomipic anquímayooyi.

²³ Jesic jeeyaj icamayyaj tum jama iga miñyajiñ eybic iga imatonyajpa jém Pablo. Cuando núc jém jama, miñyaj tsam jáyan jém Romapic pixiñtam hasta jém ticcim jut it jém Pablo. Dende tsúytim hasta tsuán inmadáy jém pixiñtam jutsap injac Dios jém ityajwip yip naxyucmi. Inquejáypa iga Jesús je jém Cristo jém icutsatnewip Dios. Inquejay con jém wiñicpic anquímayooyi jém ijaychacnewip jém Moisés y jém wiñicpic anmatciwiñ.

²⁴ Algunos jém pixiñtam icupicyaj jém Pablo inmadayooyi. Pero jém tungacyaj da icupicyaj.

²⁵ Jém dapic iwianjamyaj moj niquiyaj. Cuando cunigayyaj, nim jém Pablo:

—Wininim jém Dios ianama cuando iñimáy jém wiñicpic tanjatunwewetam por medio de jém wiñicpic anmatciwiñ jém Isaías. Yimpic nim:

²⁶ Nigi nímaayi yip pixiñtam:

Numa immatontampa jém anmati, pero da incutiyíypa.

Numa iñixtampa, pero da injodónatampa.

²⁷ Porque yip pixiñtam ianama tsam pimi malo,

tsam iñejamatonpa,

jém iixcuy inmichñe,

iga odoy ixixóyiñ con iixcuy,

ni odoy matónóyiñ con itatsic,

ni odoy icutiyíyiñ con ianama,

ni da icacpa ijixi iga anaccáyaypa itañca.

²⁸ Jodónataami iga dende sip Dios icutsadáypa jém tungac pixiñtam jém wibic anmati iga Dios taciacputpa. Cutsadaytap jém tungac pixiñtam, jém dapic je de Israel. Jeeyaj numa imatonyajpa.

²⁹ Cuando yajum inmat jém Pablo, nicyaj jém judíos. Tsam anayajpa entre jeeyaj.

³⁰ Jesic jém Pablo tsíy wisten amtiy jém ticcim jém iñúcsnewip. Ipictonyajpa itumpiy jém miñpáppic iam. ³¹ Inmadáypa jém pixiñtam iga Dios injactooba jém ityajwip yip naxyucmi. Inquejáypa jém tánomi Jesucristo inquímayooyi. Da cñpa jém Pablo, da i imoogíypa. Jemum cuyaj.

Jém carta jém ijáyayñewiip Pablo jém Romapic pìxiñtam

Jém Pablo ijáyáypa Dios ipìxiñtam jém ityajwip Roma

¹ Ich aPablo, siip manjáyáypa. Ançuyoxap jém tánQmi Jesucristo. Dios acupiñ iga accám juuts tum apóstol, jém icutsatnewiip Dios. Acupiñ iga anañmadiñ jém wibic añmati iga Dios iciacputtooba jém pìxiñtam.

² Wiñgam jém Dios inmatciwiñ ijaychacneyaj iga Dios tajiycámayñe iga núcpa jama iga Dios taciacputpa. Jaychacnetā jém promesa jém wibic librojom jém Diospic imichi.

³ Nımyajpa iga miñpa jém Dios iManic, jém tánQmi Jesucristo. Ocmi nay yip naxyucmi jém Jesucristo juuts tum pìxiñ, jém rey David iocmanic imanic. ⁴ Quejpa iga Dios iManic, jém tsampic iniit jém Dios ipimi, porque acpista de jut it jém caaneyajwip. Jeetim wibic jixi iniit juuts tanjatun Dios. ⁵ Jém Jesucristo amichane, jeeyucmi Dios ayaachanjām y ayoxpát iga ananictámpa juumi jém wibic añmati iga itumpiy jém tungacpic pìxiñtam wiñiñ icupicyaj jém Cristo y iwatyajpa juuts ixunpa Dios. ⁶ Mimichtam jém tungacpictim mipìxiñtam. Dios miñwejaytámpatim iga michíytamiñ juuts jém Jesucristo mimichitam.

⁷ Siip manjáyaytámpa mimichtam, miittanwip jém mijpic attebet Roma, jém mitoytampáppic tanjatun Dios. Miñwejaytámpatim Dios iga michíytamiñ juuts jém Dios ipìxiñtam jém dapic táñcaiy. Tsam wafidios mancutsadaytámpa. Jém tanjatun Dios con jém tánQmi Jesucristo miwıwadaytamiñ.

Jém Pablo nictooba joyi jém mijpic attebet Roma

⁸ Wiñti anchiiba gracia jém tanjatun Dios jém tánQmi Jesucristo iñiyimi para iñtumpiytam mimichtam porque icuwiti yip naxyucmi añmattap iga michtam tsam inçupictámpa tánQmi Jesucristo. ⁹ Ich ançuyoxap jém tanjatun Dios con itumpiy ánānama. Anañmadáypa jém pìxiñtam jutsap iciacputyaj jém Dios iManic. Dios ijodon iga cada jama anañwejpátpa Dios para mimichtam. ¹⁰ Ich tsam nictooba manjójáy, pero da awıap. Siip añwágáypa Dios, siiga Dios ixunpa, wiap nicpa manjójáy. ¹¹ Tsam mánixtamtooba. Tsam manyoxpáttooba iga más wiap inçutiyyıfta ti ixunpa Dios. ¹² Ich anımpa iga mimichtam anyoxpátpatim cuando ánıxpa iga tsam inwıcupicpa jém tánQmi Cristo. Jempam tanayoxpátamtap.

¹³ Mantıwıtam, ich ansunpa iga iñjodónatamiñ iga waciy nictooba manjójáy, pero hasta siip da awıap. Ansunpa iga idiñ tum wibic cosecha mimichtamanjom, juustim cuando oy anañmadáy jém tungac pìxiñtam jém dapic je de Israel. ¹⁴ Ich tsam anjıspa itumpiy jém pìxiñtam jém dapic imatonne jém Dios inmati. Tsam aıt obligado iga anyoxpátpa itumpiy jém pìxiñtam jém añmatyajpáppic griego y jém tungacpic pìxiñtam; jém cuyujneyajwip y jém dapic cuyujne. ¹⁵ Jeeyucmi ich tsam manañmadaytamtoobatim jém wibic añmati mimichtam, miittanwip jém mijpic attebet Roma.

Jém wibic añmati wiap tayoxpát

¹⁶ Ich da atsaap iga anañmatpa jém wibic añmati porque je iniit jém Dios ipimi iga taciacputtámpa siiga tançupicpa Cristo. Wiñti ipictsonyaj jém Israelpic pìxiñtam, ocmi ipictsonyajpatim jém tungac pìxiñtam, jém dapic je de Israel. ¹⁷ Jém wibic añmati tacjodónata iga Dios tawıtsagáy tantánca iga wiñiñ tapictsonya Dios. Tapictsonya cuando

tañcupicpa Cristo y solamente siiga tañcupicpa. Nimpa así jém Dios in̄mati: “Jém icupicnew̄ip iga Dios iw̄itsagáy jém it̄anca, ip̄ictson̄pa jém vida jém ñapic cuyajpa.”

Tsam táñcaíy itump̄iy jém pixiñtam

¹⁸ Quejpa iga Dios icutsatpa tum̄ mijp̄ic castigo dende sin̄yucmi. Chiitap̄ castigo itump̄iy jém pixiñtam, jém iwatyajpáppic contra jém Dios in̄químayooyi y jém imalwatyajpáppic. Como tsam̄ p̄imi malo, da ij̄icpa iga núcpa jém numapic̄ an̄mati. ¹⁹ Chiitap̄ castigo porque tsam̄ w̄iquejpa juutspic̄ Dios jém tan̄Jatun̄ Dios. Itump̄iy pixiñtam tsam̄ iw̄ijodon̄yay porque jeetim tan̄Jatun̄ Dios in̄quejáy. ²⁰ Dende watnet̄a ȳip nas, tsam̄ w̄iquejpa juutspic̄ Dios jém tan̄Jatun̄ Dios, jém ñapic̄ nunca cuyajpa ip̄imi. Da tánixpā Dios, pero w̄iap̄ tánixáy titam̄ iwatne. Jesic̄ jém pixiñtam̄ iniit la culpa iga da iixp̄icyajpa Dios. ²¹ In̄untaw̄ijodon̄yay juutspic̄ Dios jém tan̄Jatun̄ Dios, pero da ij̄isyajpa juuts Dios. Datim̄ icuj̄ipyajpa Dios para itump̄iy jém w̄itampic̄ cosa juuts iwatne. Ocm̄i núc̄ jém jamā iga jém pixiñtam̄ ij̄ixi da para ti w̄i. Tsam̄ maloyaj. Da w̄iap̄ icutīiȳy jupp̄ic̄ jém numapic̄ y jupp̄ic̄ jém migooyi. Jeeyaj juuts cupiich̄ane jém ianama. ²² Nimyajpa iga tsam̄ j̄ixīy, pero mástim̄ quejpa iga da j̄ixīy ni uxan̄. ²³ Ichacyaj iga ij̄ispa jém numapic̄ Dios, jém ñapic̄ nunca caaba. Iwatyaj jém watnas iga ij̄isyajpa. Watnet̄a en forma juuts tum̄ p̄ixiñ̄ jém caapáppic, o juuts tum̄ jon, o juuts tum̄ animat, o juuts tum̄ tsañ.

²⁴ Jeeyucmī Dios ichacyaj jém pixiñtam̄. Ij̄icpa Dios iga más p̄imi imalwatyajiñ̄ juuts icusúniyyajpa jém pixiñtam̄ ianaman̄jom̄ hasta namalwadayyajt̄ap con it̄iwitam̄. Iwatyajpa jém da w̄ibic̄ cosa jém tsamp̄ic̄ tatsaap̄ tan̄wat, ²⁵ porque jeeyaj da icupicneyaj jém numapic̄ Dios, más icupicneyaj jém migooyi. Ij̄isyajpa jém cuy y jém tsa jém Diospic̄ iwatne. Icuyoxayajpa jém watnas. Pero da ij̄isyajpa ni da icuyoxayajpa jém tan̄Jatun̄ Dios, jém iwatnew̄ip̄ itump̄iy cosa. W̄i iga tañcuj̄iptámiñ̄ para siempre. Amén.

²⁶ Jeeyucmī Dios ij̄ic̄ iga jém pixiñtam̄ w̄iap̄ iwatyaj jém malopic̄ cosa, jém tsamp̄ic̄ icusúniypa jém malopic̄ pixiñtam̄. Jém yom̄tam̄ ichacyajpa iga ip̄icpa p̄ixiñ̄. Moj iwatyaj contra juuts siempre iwatyajpa jém w̄ibic̄ pixiñtam̄. Moj nap̄icyajt̄aji yom̄tam̄ con yom̄tam̄. ²⁷ Jesanetim̄ jém pixiñtam̄ ichacyajpa iga ip̄icpa yomo. Tsam̄ icusúniyyajpa p̄ixiñ̄ juuts yomo. P̄ixiñ̄ con p̄ixiñ̄ nap̄icyajt̄a. Yaachwadayt̄ap̄ jém imij̄tay. Ip̄ictson̄yajpa jém castigo iga iwatyajpa jexpic̄ táñca.

²⁸ Como da iw̄ian̄jamyaj iga ij̄isyajpa Dios, jesic̄ Dios ij̄ic̄ iga más imalwadiñ̄ jém pixiñtam̄. Ij̄icpa iga iwatyajiñ̄ jém malopic̄ cosa jém Diospic̄ da iw̄ian̄jam̄. ²⁹ Comne ianama con itump̄iy jém malopic̄ j̄ixi. Tsam̄ ichicyajtooba jém tun̄gac yomo. Tsam̄ icusúniypa p̄ixiñ̄ juuts tum̄ yomo. Tsam̄ cuj̄óȳyóypa. Tsam̄ najajóypa, accaóypa, tsam̄ áñatero, tsam̄ migóypa, tsam̄ imalwadáypa ī quej y tsam̄ cuj̄óȳyóypa. ³⁰ Imaln̄ímáypa jém it̄iwitam̄. Ij̄óyixyajpa Dios. Da inīj̄ respeto. Tsam̄ natoyt̄ap̄ iyaac. Tsam̄ nacuj̄ipt̄ap̄. Ij̄ixquím̄pa jém da w̄itampic̄ cosa. Da itoȳpa ni ij̄atun̄ ni iapa. ³¹ Da j̄ixīy. Da iccupacpa juuts in̄ímáypa it̄iwi. Da tóyóypa. Da iyaachanj̄ampa jém it̄iwi. ³² Jeeyaj tsam̄ iw̄ijodon̄ iga Dios ip̄im̄iypa iga accaayajt̄a in̄ jexpic̄ pixiñtam̄. Pero jém malopic̄ pixiñtam̄ da iwadáypa caso. Seguido imalwatyajpa. Agui maymaytim̄ cuando imalwatyajpatim̄ jém it̄iwitam̄.

2

C̄ip̄īyóypa Dios con jém numapic̄ an̄químayooyi

¹ Mich iniit la culpa siiga miñim̄pa iga malo ȳip̄ pixiñtam̄. J̄istaamī iga in̄yaac miniquejajwadayt̄ap̄ porque mimichtam̄ mimalotim̄, in̄wattámpatim̄ jexpic̄ cosa. Ich da anticutīḡiyi mījapaap̄ mimich. ² Tan̄jodon̄ iga Dios ic̄ip̄in̄pa jém pixiñtam̄ con jém numapic̄ an̄químayooyi. Chiijajt̄ap̄ castigo itump̄iy jém iwatneyajw̄ip̄ jexpic̄ cosa. ³ ¿Que

mich iñjiswa iga miciputpa y Dios da michiiba castigo? ¿Tiiga miñimpa iga tsam tãñcaiy jém iñtiwi porque tsam imalwat? ¿Que da iñjiswa iga inwatpatim jexpic cosa? ⁴ ¿Tiiga iñjyixpa jém Dios itóyooyi jém dapic cuyajpa? ¿Que da inwadáypa caso iga tsam iyaachíypa Dios iga tammalwatpa y da jobit ichiiba castigo jém pixiñtam jém imalwatyajpáppic? Jodónataami iga jém tanjatun Dios tsam miyaachanjampa porque ixunpa iga incucaguiñ iñjixi.

⁵ Pero michtam da mimatónóypa, da inwattooba juuts miñimáy Dios, da incucacta iñjixi. Más jáyanap incastigo jém michiipáppic Dios hasta cuando núcpa jém jama iga ichiiba castigo Dios jém malopic pixiñtam. Jesic iñixtámpa iga Dios iwicipinpa jém pixiñtam. ⁶ Dios icyojpa cada tumtum juuts iwatne. ⁷ Chiitap jém vida jém dapic cuyajpa itumpiy jém pixiñtam jém dapic ichacpa iga iwíwatpa, jém imétsápáppic jutsap iñuc jut it Dios, jém iwianjampáppic iga Dios iwíixpa, jém imétsápáppic jém vida eterna. ⁸ Pero Dios ichiiba tum mijpic castigo itumpiy jém iwatpáppic juuts je ixunpa iyaac, jém dapic icupicpa jém numapic anquímayooyi, jém tsampic imalwatpa. ⁹ Tsam yaachwatyajtap, tsam anyácneyaj itumpiy jém pixiñtam jém imalwatneyajwip. Wiñti iñascaaba así jém Israelpic pixiñtam, ocmi jempictim iñascaaba jém dapic je de Israel. ¹⁰ Pero itumpiy jém iwíwatyajpáppic, chiitap derecho iga núcpa jut it Dios. Jém tanjatun Dios tsam iwíixpa, iyoxpátpa iga odoy ti ijixiñ. Wiñti iñascaaba así jém Israelpic pixiñtam, ocmi iñascaabatim así los demás, jém dapic je de Israel.

¹¹ Porque jém tanjatun Dios da innegáypa ni tum pixiñ itánca, iwicipinpa parejo. ¹² Jém iwatnewip tãnca, jém dapic ipictsonje jém Moisés inquímayooyi, chiitapim castigo sin jém anquímayooyi. Jém iwatnewip tãnca cuando iniit jém Moisés inquímayooyi, jesic cipintap con jeetim anquímayooyi. Chiitap castigo. ¹³ Porque Dios da iwítsagáypa tum pixiñ itánca siiga ixajamatonpa jém Moisés inquímayooyi. Pero Dios iwítsagáypa tum pixiñ itánca siiga iwatpa juuts nimpa jém Moisés inquímayooyi. ¹⁴ Cuando jém tungac pixiñtam, jém dapic je de Israel, iwatyajpa ijiximi juuts nimpa jém Moisés inquímayooyi, pero da ini jém anquímayooyi, jesic jém ijixi jex juuts jém wibic anquímayooyi. ¹⁵ Jexpic pixiñtam cuando iwíwatpa, quejpa iga jaycámnetã ianamanjom jém anquímayooyi. Jesic jém pixiñtam ijispa ijixianjom siiga iwíwatne o imalwatne. Iyaac nacipintap. ¹⁶ Cuando núcpa jém jama iga icipinpa Dios, quejpa itumpiy cosa jém anécnewip jém pixiñtam ianamanjom. Accámta jém Jesucristo juuts tum juez iga icipinpa juuts nimpa jém wibic anquímayooyi, jém ichpic manañmadayñe.

Jém Israelpic pixiñtam tsam itoypa jém wiñicpic anquímayooyi

¹⁷ Pero mimichtam miñimtámpa iga miIsraelpic mipixiñtam. Tsam incupictámpa jém Moisés inquímayooyi. Tsam minicujíptatãp iñyaac iga iñixpictámpa jém nunta Dios. ¹⁸ Iñjodontam ti ixunpa Dios iga tanwattámpa. Wiap incupin jém más wibic cosa iga inwattámpa porque inwicuyucane jém Dios inquímayooyi. ¹⁹ Iñjístámpa iga inicjodónap jém tun jém cáchtijaj. Iñjístim iga wiap iñyicquej jém wityajpáppic piichcim. ²⁰ Iñjístámpa iga wiap ininquejáy jém pixiñtam, jém dapic jixiíy, jém dapic cuyujne, porque mich iniit jém Dios inquímayooyi. Numa jém anquímayooyi naps jém numapic jixi. ²¹ Numa, mimichtam, ininquejáypa tungac pixiñ, ¿jesic tiiga da mininquejaytap iñyaac? Ininquejáypa iga da wí iga tanúmpa, pero mich miñúmpatim. ²² Iññimáypa jém pixiñtam iga odoy pejooyi, pero mich mipejóypatim. Tsam pimi iñjyixpa jém watnas jém tungac diosyaj, jém dapic je nunta Dios, ¿pero que numa inwíixpa jém tanjatun Dios y siempre inwatpa juuts je ixunpa? ²³ Mimichtam tsam minicujíptãp iñyaac porque iniit jém numapic anquímayooyi. Pero jut quej jém pixiñtam ixiccayajpa jém tanjatun Dios porque mimichtam da inwattámpa juuts nimpa jém Dios inquímayooyi. ²⁴ Nimpa así jém Dios inmati jut jayñeta:

“Jutquej jém p̄ixiñtam, jém dapic je de Israel, imalnímayyajpa jém tanJatun̄ Dios iñ̄iyi michtam in̄cuyucmi iga da in̄w̄iwattámpa.”

²⁵ Siiga in̄wattámpa juuts n̄impa jém Dios in̄químayooyi, jesic vale mucho iga miwadayta jém marca de circuncisión. Pero siiga da in̄watpa juuts n̄impa jém an̄químayooyi, jesic da ti micuwatcuy iga miwadayta jém marca de circuncisión. ²⁶ Jesanetim siiga jém tungac p̄ixiñ, jém dapic marcaj̄iy, iwatpatim juuts n̄impa jém Dios in̄químayooyi, jesic Dios ipictson̄patim jextim juuts marcaj̄iy. ²⁷ Siiga tum̄ p̄ixiñ da marcaj̄iy iwatpa juuts n̄impa jém Moisés in̄químayooyi, jesic min̄quejáypa iga mitáncaiȳ porque mimichtam iniifta jém Dios in̄mat̄i y iniiftatim jém marca de circuncisión, pero da in̄wattámpa juuts n̄impa jém Moisés in̄químayooyi. ²⁸ Mextim nayñe jém naxyucmi de Israel, pero da je nunta Israelpic p̄ixiñ. Jesanetim jém nunta marca de circuncisión da je jém watnew̄ip̄ jém tammij̄tayyucmi. ²⁹ Jém numapic Israelpic p̄ixiñ iniif̄ jém marca de circuncisión ianaman̄jom. Ij̄ispa ianaman̄jom iga numa Dios im̄ichi. Tawadáypa así jém Dios iAnama, da je jém Moisés in̄químayooyi. Jesic jém p̄ixiñtam da tacuj̄ippa, pero tacuj̄ippa Dios.

3

¹ ¿Jesic para ti w̄i iga taIsraelpic tap̄ixiñtam? ¿Para ti w̄i jém marca de circuncisión? ² W̄i para w̄ati cosa. Wiñ̄ti mannímáypa iga Dios ic̄ij̄un̄cot jém Israelpic p̄ixiñtam ic̄ij̄om̄ jém Dios in̄mat̄i. ³ Numa, algunos jém Israelpic p̄ixiñtam ichacyaj jém Dios in̄mat̄i, da iccupacyaj juuts ij̄ycámayñeyaj Dios. Pero Dios iccupacpa juuts taj̄ycámayñe, je da jex juuts taichtam. ⁴ Numa, jém tanJatun̄ Dios iccupacpa juuts taj̄ycámayñe. Siiga migóypa itump̄iy jém p̄ixiñtam, jém tanJatun̄ Dios da nunca migóypa. N̄impa así jém Dios in̄mat̄i: Dios da migóypa, iñuuman̄matpa.

Siiga c̄ip̄in̄tap, tsam̄ w̄iquejpa iga da táncaiȳ.

⁵ Pero siiga más p̄imi tammalwatpa, más quejpa iga da malo jém tanJatun̄ Dios, ¿jesic ti w̄iap̄ tannim? ¿Tanan̄jam malo jém tanJatun̄ Dios iga tatségáypa jém tantánca? ¿Ī ij̄ispa jem̄pic? ⁶ ¡Da malo! Porque siiga táncaiȳtim jém tanJatun̄ Dios, ¿jutsap̄ ic̄ip̄in̄ itump̄iy jém p̄ixiñtam jém ityajw̄ip̄ ȳip̄ naxyucmi iga ichiiba castigo?

⁷ Pero siiga tsam̄ tamigóypa, jesic más w̄i quejpa iga Dios da migóypa hasta más p̄imi cuj̄iptap. ¿Jesic tiiga tachiiba castigo iga tsam̄ tatáncaiȳ? ⁸ ¿Jesic tiiga da más p̄imi tammalwatpa iga más p̄imi cuj̄iptañ̄ jém tanJatun̄ Dios? Asíam̄ n̄imyaip̄a algunos iga aichtam anan̄quejáypa. Tsam̄ p̄imi acuj̄yypa. Jexpic p̄ixiñtam más w̄i iga chiitañ̄ tum̄ mij̄pic castigo.

Tatáncaiȳ tantump̄iytam

⁹ ¿Jesic ti iñ̄j̄ispa iga taichtam jém taIsraelpic tap̄ixiñtam más taw̄itam que jém tungac p̄ixiñtam? Datim. Tatáncaiȳtim tantump̄iytam siiga taIsraelpic tap̄ixiñtam o da taje. Tienes que tampictson̄pa jém castigo iga tanait̄ jém tantánca. ¹⁰ Jaychacnetawum̄ así jém Dios in̄mat̄i:

Da ī ni tum̄ w̄ib̄ic p̄ixiñ jém dapic táncaiȳ.

¹¹ Da ī w̄iap̄ icut̄iȳȳ ti ixunpa Dios.

Da ī iméts̄pa Dios.

¹² Itump̄iy ichacyaj jém w̄ib̄ic tun̄.

Nicyajpa jém malopic tun̄.

Ni tum̄ p̄ixiñ da iw̄iwatpa juuts ixunpa Dios.

¹³ Jém malopic an̄mat̄i agui putpa ij̄ip̄jom̄.

Jém ij̄ip̄ juuts tum̄ tsúts̄ijos.

Agui it̄ migooyi ij̄ip̄jom̄.

Jex juuts tum malopic tsañ, tsam cuj'iyóypa.

¹⁴ Tsam malmalnimpa.

Tsam it jooya ianamanjom.

¹⁵ Agui jicsciy accaóypa.

¹⁶ Jutquej nicpa ichacyaj jém anyaaqu y jém yaachaji.

¹⁷ Da ipát jém wibic tun iga iwínanigáypa jém itiwitam.

¹⁸ Da icinpa Dios.

¹⁹ Tanjodontam iga chiita jém wiñicpic anquímayooyi jém Israelpic pixiñtam iga injaguiñ. Nímayyajta ti wiap iwatyaj, pero da iwatyajpa. Jesic ipictsonyajpatim jém castigo jém ichiipáppic Dios con itumpiy jém malopic pixiñtam jém ityajwip yíp naxyucmi. Da ti wiap iñmyaj. ²⁰ Dios da ipictsonpa jém nimyajpáppic iga cupacpa iwat juuts nimpa jém wiñicpic anquímayooyi. Jém anquímayooyi no más tanquejáypa iga tatanchaíy porque da i wiap iwat itumpiy jém anquímayooyi.

Jutsap tawitsagáy jém tantánca

²¹ Pero siip Dios tanquejáy jutsap tawitsagáy jém tantánca iga tapictsoniñ Dios sin jém Moisés inquímayooyi. Pero jém anmati, jém ijaychacnewip jém wiñicpic anmatciwiñ con jém Moisés inquímayooyi, icuistic nimpa iga miñpa jém Cristo iga iwitsagáyiñ jém pixiñtam itánca. ²² Dios iwitsagáypa jém pixiñtam itánca siiga icupicpa jém tánomi Jesucristo. Pictsontap itumpiy jém icupicneyajwip siiga Israelpic pixiñ o siiga tungac pixiñ. ²³ Itumpiy pixiñ táncayyay. Da i núcpa jut it Dios porque da i iwatne juuts je ixunpa.

²⁴ Pero jém tanjatun Dios iwitsagáypa jém pixiñtam itánca iga witsíyiñ porque tsam tóyóypa Dios. Ichiiba juuts tum xaja. Wiap tawadáy así porque jém tánomi Jesucristo tajojáy tantánca. ²⁵ Dios icutsat iManic Jesucristo iga ipictsonáyiñ jém pixiñtam icastigo. Itegáy iñipiñ iga iyojáy jém pixiñtam itánca. Siip Dios imatónáypa jém pixiñtam itánca siiga icupicyajpa Jesucristo. Asíam quejpa iga da malo jém tanjatun Dios. Iyaachanjampa jém pixiñtam. Da jobit ichégáypa jém pixiñtam itánca jém iwatneyajwip wiñigam.

²⁶ Asíam quejpa iga siip datim malo jém tanjatun Dios, iwitsagaytooba jém pixiñtam itánca siiga icupicpa Jesucristo.

²⁷ Jesic da wi iga tanacujíptap iga tawitsagayta jém tantánca porque da taichtam tanwat jempic. Dios da tamatónáypa jém tantánca iga tanwatpa juuts nimpa jém wiñicpic anquímayooyi, jém ipictsonnewip Moisés. Pero tamatónáypa tantánca porque tancupicpa jém Jesucristo. ²⁸ Jempigam quejpa iga Dios ipictsonpa jém pixiñtam jém icupicneyajwip iga Jesucristo wiap taciaput. Dios da ipictsonpa jém nimyajpáppic iga cupacpa iwat juuts nimpa jém wiñicpic anquímayooyi.

²⁹ ¿Que iñjspa iga jém tanjatun Dios solamente para jém Israelpic pixiñtam? ¿Que da iDiestim jém tungac pixiñtam, jém dapic je de Israel? Numa, imichitim mex jeeyaj. ³⁰ Porque nada más tum Dios it. Iwitsagáypa itánca jém Israelpic pixiñtam siiga icupicyajpa Cristo. Iwitsagáypatim itánca jém tungac pixiñtam cuando icupicyajpa jeeyaj.

³¹ ¿Que iñjspa iga da para ti wi jém anquímayooyi cuando tancupicpa Cristo? Odoy jistaami así. Una vez tancupicneum Cristo, jesic más tanwatpa juuts nimpa jém Dios inquímayooyi.

4

Tanwatpatim juuts iwat jém Abraham

¹ ¿Ti tanimpa jesic iga ipát jém Abraham jém tanjatunwewe ijatun, jém wiñicpic tantúmmi? ² Meega jém Abraham iwat itumpiy juuts nimpa jém wiñicpic anquímayooyi, jesic tienes que iwipictsonpa Dios y agui nacujíptap iyaac jém Abraham. Pero da wiap incujípta iyaac jém Dios iwiñjom. ³ ¿Jesic ti nimpa jém Dios inmati jém jayñewip? Nimpa

iga: “Jém Abraham icupic iga Dios wiap iwıtsagáy itánca. Jeeyucmi Dios ipıctson.”
⁴Yojtap jém yoxapaap, pero jém icoñwıyooyi da je tum xaja. ⁵Siiga tum pıxiñ da ti iwatpa iga icoñwıypa jém vida jém dapic cuyajpa, pero icupicpa Dios jém wiapaap iwıtsagáy jém malopic pıxiñtam itánca, jesic Dios iixpa jém pıxiñ juuts tum wıbic pıxiñ. ⁶Asíim nımpa jém rey David iga agui wı itpa jém pıxiñ jém wadayñetawıip perdón jém itánca jém ipıctsonpáppic jém vida jém dapic cuyajpa juuts tum xaja, da je icoñwıyooyi. ⁷Nımpa: Agui maymay jém pıxiñtam jém Diospic iwadayñe perdón jém itánca, jém accáyayñetawıip jém itánca.

⁸Agui maymay jém pıxiñtam jém dapic ichégáypa Dios jém itánca.

⁹¿Que solamente jém Israelpic pıxiñtam wiap ipıctsonyay jém maymáayi? ¿O ipıctsonpatim jém tungac pıxiñtam? Mannımayñeum iga Dios iix jém Abraham juuts tum wıbic pıxiñ porque icupic iga Dios wiap iwıtsagáy jém itánca. ¹⁰¿Juchis iñasca así jém Abraham? ¿Cuando wadayñetawum jém marca de circuncisión o cuando danam i iwadayñe? Dios iix jém Abraham juuts tum wıbic pıxiñ cuando danam i iwadayñe jém marca. ¹¹Ocmı ipıctson jém marca de circuncisión jém Abraham juuts tum seña o juuts tum sello iga matónayñetawum jém itánca porque icupicne Dios. Cuando iwat así jém Abraham tsıy juuts tum jatunpic para itumpiy jém pıxiñtam jém icupicneyajwıip Dios cuando da iniıyay jém marca de circuncisión. Cuando icupicyajpa, jesic Dios ipıctsonyaypatim juuts tum wıbic pıxiñ jém dapic táncaıy. ¹²Tsıytim jém Abraham juuts tum jatunpic para itumpiy jém wadayñetawıip jém marca de circuncisión. Da solamente porque iniıt jém marca, pero iga icupicyajpatim Dios juuts icupicpa jém Abraham cuando danam i iwadayñe jém marca de circuncisión.

Jém Abraham icupic Dios jeeyucmi wadayta jém promesa

¹³Dios iñımáy así jém Abraham: “Manchiiba jém nas jém ichpic ammiichi con itumpiy immanıctam.” Pero Dios da ijıycámáy así jém Abraham porque iwat juuts nımpa jém wiñıcpic anquımayooyi. Jiycámayta porque icupicpa iga Dios wiap iwıtsagáy jém itánca. ¹⁴Pero siiga jém pıxiñtam imıchayaj jém nas porque iwatneyaj juuts nımpa jém wiñıcpic anquımayooyi, jesic xajatim tancupicpa Cristo. Jesic da ti cuwatcuy jém promesa juuts ijıycámayñe Dios. ¹⁵Jém iwatyajpáppic contra jém anquımayooyi tienes que ipıctsonpa castigo. Siiga da i jém anquımayooyi, da i wiap iwat contra jém anquımayooyi.

¹⁶Jesic Dios tawıtsagáypa tantánca siiga tancupicpa iga wiap. Tachiiba titam tajıycámayñe juuts tum xaja. Da tampıctsonpa juuts tancoñwıyooyi. Jesic seguro ichiiba jém xaja itumpiy jém icupicneyajwıip Dios juuts icupic jém Abraham, siiga iniıt jém wiñıcpic anquımayooyi o siiga da iniı. Jesic jém Abraham tsıy juuts tum jatunpic para tantumpıytam taıchtam porque tancupicpatim juuts je. ¹⁷Abraham ipıctson yıp promesa jém Dios iwiñjom. Jeetim Dios jém icupicnewıip jém Abraham, ichiiba ivida jém caaneyajwıip. Iwatpa jém cosa jém dapıcnam idic i. Asíam nımpa jém Dios inmatı jut jaychacnetá: “Ich manaccám juuts tum jatunpic para itumpiy jém pıxiñtam.”

¹⁸Casi da wiap ijıs iga iñascaaba así jém Abraham, pero icupic iga Dios wiap iwat, ijıspa iga núcpa jém jama iga tsıypa juuts jatunpic para icuwıti yıp naxyucmi juuts iñımáy Dios. Nımpa: “Tsam jáyanap jém immanıctam.” ¹⁹Jém Abraham iniıt idic como cien iamtıy. Da ichacpa iga icupicpa Dios cuando ijıspa jém Abraham iga tsam wıdayam y tsamıtım mex jém iwıchomo jém Sara. Jeeyaj caayajtoobam. Como tsamım, da wiap imanıgiyyaj. ²⁰Da ichacpa iga icupicpa juuts ijıycámayñe Dios. Pero más pımi icupicpa y moj icujıp Dios. ²¹Porque iñuntawıjodon iga Dios tsam iniıt ipımi, wiap iwat itumpiy juuts ijıycámayñe. ²²Jeeyucmi Dios iwıtsagáy jém Abraham itánca y ipıctson juuts tum pıxiñ dapic táncaıy porque icupic iga Dios tsam wiap.

²³ Cuando n̄mpa iga w̄ip̄ictson̄ta j̄em Abraham porque icup̄ic Dios, jes̄ic da jaychacneta solamente para j̄em Abraham no más. ²⁴ Pero jaychacnetat̄im para taichtam iga tanj̄odon̄ iga Dios taw̄ip̄ictson̄pat̄im siiga tan̄cup̄icpa j̄em tan̄J̄atun̄ Dios, j̄em icp̄isnew̄ip̄ j̄em tán̄omi Jesucristo de j̄ut it̄ j̄em caaneyajw̄ip̄. ²⁵ C̄ij̄un̄cotta, accaata j̄em Jesucristo iga tayojoyt̄amiñ tant̄ānca. Acpīsta iga Dios taw̄ip̄ictson̄t̄amiñ.

5

S̄ip̄ da tan̄c̄ij̄pa j̄em castigo

¹ Jes̄ic Dios tap̄ictson̄pa juuts t̄um p̄ixiñ dap̄ic tan̄cāiȳ porque tan̄cup̄icne iga Dios taw̄iwad̄aypa. S̄ip̄ tats̄iyta amigo con Dios porque j̄em tán̄omi Jesucristo tayojoyñeum j̄em tant̄ānca. ² J̄em Jesucristo ts̄am tayoxp̄atpa iga tan̄úcpa j̄ut it̄ Dios, j̄em ts̄amp̄ic tatoypa, porque tan̄cup̄icne. Jeeyucm̄i da tantsacpa j̄em Dios in̄mat̄i. S̄ip̄ agui tamaymaytam porque tanj̄odon̄ iga n̄úcpa j̄ama iga nicpa tāiti j̄em w̄ic̄om̄ j̄ut it̄ Dios. ³ Pero agui tamaym̄ayat̄amp̄at̄im cuando ts̄am tayaachwatt̄ap̄ porque tanj̄odon̄ iga cuando tayaachwatt̄ap̄, jes̄ic tanānyujpa más iga tanyaach̄iyiñ. ⁴ Siiga tanyaach̄iȳpa cuando tacut̄it̄stap̄ o iga tayaachwatt̄ap̄, jes̄ic Dios ts̄am taw̄ix̄pa. Siiga Dios ts̄am taw̄ix̄pa, jes̄ic más̄tim tanj̄odon̄ iga tan̄J̄atun̄ Dios iccupacpa juuts taj̄yc̄amayñe. ⁵ Siiga tan̄j̄ispa iga j̄em tan̄J̄atun̄ Dios agui w̄iap̄, jes̄ic da nunca tan̄ȳacpa; y Dios īAnama, j̄em tach̄iñew̄ip̄ j̄em tán̄anaman̄jom̄, ts̄am tayoxp̄atpa iga w̄iāiñ tan̄cut̄īȳiȳ iga ts̄am p̄imi tatoypa j̄em tan̄J̄atun̄ Dios.

⁶ Jes̄ic cuando da ti w̄iap̄ tan̄watta iga tanacupujt̄ap̄ tanyaac, Dios icup̄in̄ j̄em j̄ama iga accaat̄ap̄ j̄em tán̄omi Jesucristo para it̄ump̄iȳ j̄em malop̄ic p̄ixiñtam. ⁷ Casi da ī ij̄icpa ni t̄um p̄ixiñ iga accaat̄ap̄ para t̄um w̄ib̄ic p̄ixiñ iga icupujpa. Pero quizás algunos ij̄icpa iga accaat̄ap̄ iga icupujpa t̄um ts̄am w̄ib̄ic p̄ixiñ. ⁸ Pero Dios tan̄quej̄ay iga ts̄am tatoypa. Porque iganam ts̄am tamalotam, accaata j̄em Jesucristo para taichtam. ⁹ S̄ip̄ taw̄ip̄ictson̄pa Dios porque j̄em Cristo iteḡaȳ iñ̄ip̄iñ iga tayojoȳ tant̄ānca. Jeeyucm̄i tanj̄odon̄ iga taciacputt̄amp̄at̄im j̄em Cristo iga dam tamp̄ictson̄pa j̄em p̄imp̄ic castigo j̄em ich̄iip̄app̄ic Dios j̄em malop̄ic p̄ixiñtam. ¹⁰ Taichtam tats̄iyñe id̄ic juuts enemigo con Dios. Jes̄ic accaata j̄em Dios īMan̄ic iga tats̄iyt̄amiñ amigo con Dios. S̄ip̄ como tats̄iyta juuts amigo con Dios, más̄tim tanj̄odon̄ iga taciacputt̄ampa j̄em Dios īMan̄ic porque vivojam. ¹¹ Da solamente tacupujpa de j̄em castigo, también tamaym̄ayap̄ s̄ip̄ iga tán̄ix̄picnet̄amum j̄em tan̄J̄atun̄ Dios. Agui tayoxp̄atne j̄em tán̄omi Jesucristo iga tats̄iyt̄amiñ amigo con Dios.

J̄em Adán y j̄em Cristo

¹² T̄um p̄ixiñ j̄em Adán moj iwat tan̄ca. Asíam moj tsucum̄i j̄em tan̄ca ȳip̄ naxyucm̄i. Cuando moj imalwat j̄em p̄ixiñ, tsucum̄i iga caayajpa j̄em p̄ixiñtam. Jeeyucm̄i it̄ump̄iȳ j̄em p̄ixiñtam caayajpa porque it̄ump̄iȳ p̄ixiñ tan̄cāiȳ. ¹³ Wiñigam cuando danam ī ich̄iñe j̄em Moisés j̄em an̄químayooyi, it̄tim tan̄ca ȳip̄ naxyucm̄i. Pero cuando da ī j̄em an̄químayooyi, da quejpa iga tan̄cāiȳ j̄em p̄ixiñtam. ¹⁴ Caayajpa it̄ump̄iȳ j̄em p̄ixiñtam dende it̄ j̄em Adán hasta cuando it̄ j̄em Moisés. Caabatim j̄em dap̄ic iwatne j̄em tan̄ca juuts iwat j̄em Adán. Je juuts t̄um figura de j̄em Cristo, j̄em miñp̄app̄ic oc̄mi. Pero j̄em Adán tact̄an̄cāiȳpa, j̄em Cristo inimiñ j̄em vida.

¹⁵ Dios it̄óyooyi más̄ mij que j̄em Adán it̄an̄ca. Caayajpa jáyan̄ p̄ixiñtam porque t̄um p̄ixiñ, j̄em Adán, iwat j̄em tan̄ca. Pero más̄ mij j̄em Dios it̄óyooyi porque tach̄iiba j̄em vida juuts t̄um xaja. Ts̄am jáyan̄ p̄ixiñtam w̄iwad̄ayt̄a porque ts̄am tayaachanj̄ampa j̄em tun̄gac p̄ixiñ, j̄em Cristo. ¹⁶ J̄em Adán it̄an̄ca da jex juuts j̄em w̄ib̄ic xaja j̄em Dios̄pic tach̄iñe. J̄em Adán iwat t̄um tan̄ca, jeeyucm̄i tsucum̄i j̄em castigo para it̄ump̄iȳ j̄em p̄ixiñtam. Pero

Dios iciaacputpa jém p̄ixiñtam jém iwatneyajw̄ip tsam jáyan jém táŋca. Tachiiba juuts tum xaja. ¹⁷ Tum p̄ixiñ moj iwat jém táŋca, jeeyucmi caayajpa itumpiy jém p̄ixiñtam, pero siip Dios iyaachanjampa. Siip i quej p̄ictson̄tap juuts tum p̄ixiñ dapic táŋcaíy. Chiitap juuts tum xaja, ip̄ictson̄yajpa jém jomipic vida porque icupicyajpa tum p̄ixiñ, jém Jesucristo.

¹⁸ Jesic como iwat táŋca tum jém p̄ixiñ, itumpiy jém p̄ixiñtam ip̄ictson̄yajpa jém castigo. Pero da jex jém Jesucristo juuts Adán. Je iwat juuts ixunpa Dios, jesic Dios ip̄ictson̄pa itumpiy jém p̄ixiñtam siiga icupicpa Cristo. ¹⁹ Tum p̄ixiñ jém Adán da iwat juuts inímáy Dios. Jeeyucmi tsam jáyan jém p̄ixiñtam táŋcaíyyaj. Jesap̄tim tum p̄ixiñ jém Cristo iwat juuts inímáy Dios. Jeeyucmi tsam jáyan jém p̄ixiñtam w̄ip̄ictson̄yajtap jém Dios iwiñjom.

²⁰ Chiiñeta jém Moisés jém anquímayooyi iga más quejiñ jém p̄ixiñtam itáŋca. Pero cuando más quejpa jém táŋca, jesic más p̄imi iyaachanjampa Dios jém p̄ixiñtam. ²¹ Jém táŋca juuts tum malopic anjagooyi. Caayajpa itumpiy jém táŋcaíyw̄ip. Jém w̄ibic tóyooyi jex juuts tum w̄ibic anjagooyi. Itumpiy jém icupicneyajw̄ip jém tánomi Jesucristo w̄itsagayta jém itáŋca. Ip̄ictson̄yajpa jém vida jém dapic cuyajpa.

6

Vivo jém icupicneyajw̄ip jém Cristo

¹ ¿Jesic ti in̄j̄ispa, w̄i iga seguido tammalwatpa iga Dios más tayaachanjaamiñ? ² Da w̄i iga seguido tammalwatpa. Porque taichtam tanwaganaca Cristo cunusyucmi cuando tajoáy tantáŋca. ¿Jesic tiiga seguido tammalwatpa? ³ ¿Que da in̄j̄odon̄tam iga cuando tacchiñta iga tatsíy támiñ juuts jém Cristo im̄ichi, jex juuts tanwaganaca jém Cristo cuando yaj tacchiñta? ⁴ Cuando tacchiñta iga quejiñ iga tanwaganaca jém Cristo, jextim juuts tawagacumtatim con Cristo. Acpīsta jém Cristo de jūt it jém caaneyajw̄ip con jém tan̄jatun̄ Dios ip̄imi iga tanaitpa jém jomipic vida iga w̄iañ tan̄wat juuts ixunpa Dios.

⁵ Porque siiga tanwaganaca jém Cristo cuando accaata cunusyucmi, jesic tienes que tacpīstap̄tim taichtam juuts acpīsta jém Cristo. ⁶ Tan̄jodon̄ iga jém wiñicpic̄ j̄ixi, jém tanaitw̄ip idic, iwaganaca jém Cristo cunusyucmi. Accaata iga cuyajpa jém p̄imi jém tacmalwatpáppic, jesic da tatsíypa juuts tum esclavo iga seguido tammalwatpa juuts tap̄im̄iytap. ⁷ Porque cuando caaneum tum p̄ixiñ, da más imalwatpa. ⁸ Pero siiga tanwaganaca jém Cristo, jesic tan̄jodon̄tam iga tamp̄ictson̄tampa tum vida juuts jém Cristo ivida iga tanwaganaitpa je. ⁹ Tan̄jodon̄ iga jém tánomi Cristo una vez pis de jūt it jém caaneyajw̄ip, da nunca caaba eybic. Da más ic̄ñpa iga caaba. ¹⁰ Accaata jém Cristo iga iccuyajpa jém táŋca. Tum̄ciy ca jém Cristo, da eybic caaba. Eybic ip̄ictson̄ jém vida iga icuyoxap Dios. ¹¹ Jesanetim, mimichtam, j̄isi iga michíy juuts micaaneum iga da más immalwatpa. Imp̄ictson̄neta jém jomipic vida jém tachiiñew̄ip jém tánomi Jesucristo iga in̄cuyoxatámiñ jém tan̄jatun̄ Dios.

¹² Jeeyucmi odoy j̄ici iga micmalwatpa jém malopic j̄ixi, jém iniitw̄ip in̄anamanjom. Odom más w̄ati juuts ixunpa jém imm̄ij̄tay. ¹³ Odoy acnúcsi jém imm̄ij̄tay jém Woccīwiñ iga micmalwatpa. Pero j̄ici iga miñúcsáyiñ Dios jém imm̄ij̄tay juuts tum p̄ixiñ caane idic, pero siip pisneum. Siip acnúcsi Dios jém imm̄ij̄tay iga in̄w̄i watpa. ¹⁴ Siip jém táŋca da jex juuts tum anjagooyi iga mip̄im̄iypa iga immalwatpa. Porque dam min̄jacne jém Moisés in̄químayooyi. Pero siip Dios miyaachanjampa, miwadayñeum perdón jém in̄táŋca.

Siip tan̄cuyoxap Dios

¹⁵ ¿Que in̄j̄ispa iga seguido w̄i tan̄wat jém táŋca porque dam tan̄jacpa jém Moisés in̄químayooyi y Dios tawadayñeum perdón jém tantáŋca? Da w̄i iga tan̄wattampa jempic. ¹⁶ Michtam in̄j̄odon̄tam siiga in̄j̄icpa iga mim̄ichap tum p̄ixiñ juuts in̄omi, jesic tienes que in̄watpa juuts mip̄im̄iypa. Jesanetim siiga in̄watpa juuts n̄impa jém malopic j̄ixi, jesic

jém jixi tsíy juuts jém íñomi y miccaaba. Pero siiga inçupicpa Dios, jesic iniitpa jém wibic vida. ¹⁷ Mimichtam michíyñe idic juuts tum esclavo de jém malopic jixi, pero iyucupdios iga sñip miputneum. Sñip inçupicpa con itumpiy íñanama jém wibic anquímayooyi jém michiñewñip Dios. ¹⁸ Jesic micutsigayñetawum iga odoy minjaguiñ jém malopic jixi. Mojum inçwat juuts ixunpa Dios. ¹⁹ Sñip manañmadáypa juuts jém pixiñtam ijiximi iga más inçcutiyíyíñ. Inñicne idic iga agui immalwatpa. Sñip jempictim cñunçodaayi Dios jém immijtay iga inçwatpa jém wítampic cosa juuts ixunpa Dios.

²⁰ Cuando tsam inçuyoxa jém malopic jixi, da idic inçwatpa juuts mipimíypa jém wibic jixi. ²¹ Tsam miyoxaca jém malopic jixi jém dapic miyoxpátpa. Sñip agui michaap cuando inñispa ti jáy inçwat. Itumpiy jém iwatneyajwñip así nicpa jém infierno. ²² Pero sñip micutsigayñetawum. Dam minjacne jém malopic jixi. Mojum inçwatta juuts ixunpa Dios. Je numa tsam miyoxpátpa iga inçwatpa jém wítampic cosa juuts ixunpa Dios. Itumpiy jém iwatyajpáppic así, ipictsonpa jém vida jém dapic cuyajpa. ²³ Itumpiy jém imalwatyajpáppic ipictsonpa juuts tum coñwiyoooyi iga nicpa jém infierno. Pero Dios tachiiba jém vida jém dapic cuyajpa juuts tum xaja cuando tamñchap jém tánomi Jesucristo.

7

Ti imejcuy jém Moisés inçuímayooyi

¹ Mantíwítam, mimichtam inñjodon tam jém Moisés inçuímayooyi. Inçcutiyíyítampa iga jém anquímayooyi wiap inçac tum pixiñ nada más iganam vivo. ² Tum pixiñ iyomo tienes que iwaganaitpa iwídaya iganam da caane porque nimpá así jém Dios inçuímayooyi. Pero siiga caaba jém iwídaya, icutumtim tsíypa jém yomo, jém anquímayooyi da nimpá iga da wiap ipic tunçac pixiñ. ³ Jesic siiga tum yomo ipicpa tunçac pixiñ iganam da caane jém iwídaya, pejóypa jém yomo. Pero siiga caaneum jém iwídaya, jém anquímayooyi ijícpa iga ipicpa tunçac pixiñ, da pejóypa jém yomo.

⁴ Mantíwítam, jesanetim mimichtam dende miwaganaca jém Cristo, dam minjacpa jém Moisés inçuímayooyi. Sñip mimñchaneum jém Cristo, jém acpisnetawñip de jut it jém caaneyajwñip. Sñip wiap tançwatta jém wítampic cosa juuts ixunpa Dios. ⁵ Cuando danam tánixpicne jém Cristo, tançwattámpa idic juuts iwatyajpa jém pixiñtam, jém dapic icupicneyaj Dios. Jesic jém Moisés inçuímayooyi ichicyus jém malopic jixi tánanamanjom. Jém malopic cosa tacnicpa jém infierno. ⁶ Sñip dam ti cuwatcuy jém Moisés inçuímayooyi. Tajextam juuts tacaane. Dam tanjacpa jém wiñicpic anquímayooyi. Tatsíyítamum iga tançuyoxap Dios con jém jomipic vida jém tachiñewñip Dios iñanama.

Tanímayta jut miñ jém táñca

⁷ ¿Jesic ti tanñispa? ¿Que malo jém wiñicpic anquímayooyi? Da malo. Pero siiga da ançcutiyíypa jém anquímayooyi, jesic datim anjodon iga atañcaíy siiga ançsúníyáypa tunçac pixiñ imñchi. Siiga jém anquímayooyi da nimpá iga odoy cusúníyaayi tum pixiñ imñchi, jesic da anjodon iga táñca. ⁸ Pero jém táñca tsam acmalwat cuando ammaton jém anquímayooyi. Tsicyusta itumpiy jém malopic jixi ánanamanjom. Porque cuando danam j jém anquímayooyi, jesic jém malopic jixi tsíy juuts caane idic. ⁹ Ich anñisne idic iga ançwatne cuando danam anai jém Dios inçuímayooyi. Pero ocmi núc jém anquímayooyi, moj tsucumi jém malopic jixi ánanamanjom. Jesic quejpa iga da anai jém vida jém dapic cuyajpa. Ich juuts acaane. ¹⁰ Anñistip iga jeetim anquímayooyi achiiba jém vida jém dapic cuyajpa. Pero da achi jém vida, más acnicpa jém infierno. ¹¹ Jém malopic jixi amigóyáy. Anñisne idic iga ampictsonpa jém vida jém dapic cuyajpa. Pero con jeetim anquímayooyi acnicpa jém infierno.

¹² Jesic quejpa iga da malo jém Dios inqúimayooyi. Jém anqúimayooyi wí, da tamalwadáypa. Tsam tayoxpátpa. ¹³ ¿Que iñjísipa iga yíp wíbic anqúimayooyi acnicpa jém infierno? Asítim anquejáypa jém anqúimayooyi iga tsam malo jém tánca. Jém antánca amalwadáy con jém wíbic cosa jém Dios inqúimayooyi. Asíam quejpa iga tsam pími malo jém tánca.

¹⁴ Tanjodon iga Dios inqúimayooyi tsam wí, miñ sinyucmi. Pero ich tsam amalo, siempre anwatpa juuts iwatyajpa yíp naxyucmipic pixiñtam. Ich ancuoyoxap idic jém malopic jixi. Juuts tum pixiñ juyñeta, ancuoyoxap jém antánca. ¹⁵ Da ancutiyyíypa tiiga anjísipa iga ammalwatpa. Da anwatpa juuts ich ansunpa, pero anwatpa jém malopic cosa jém dapic anwianjam. ¹⁶ Siiga anwatpa jém malopic cosa jém dapic anwianjam, jesic jempigam quejpa iga ich ancupicpa iga wí jém Dios inqúimayooyi. ¹⁷ Jesic quejpa iga da ich ammalwatpa, pero más wí tanimpa iga jém tánca, jém anaitwíp ánanamanejóm, jeam acmalwatpa. ¹⁸ Ich anjodon iga da anai ni tum wíbic cosa ánanamanejóm. Malo itumpiy yíp naxyucmipic jixi. Agui anwíwattooba, pero da awiap. ¹⁹ Da anwatpa jém wíbic cosa juuts ich ansunpa, pero anwatpa jém malopic cosa jém dapic anwianjam. ²⁰ Jesic siiga ich anwatpa jém malopic cosa, jém dapic anwianjam, jesic quejpa iga da ich ammalwatpa. Pero más wí tanimpa iga jém antánca, jém anaitwíp ánanamanejóm, jeam imalwatpa.

²¹ Jempigam annascaaba aich. Cuando anjísipa iga anwíwattooba, siempre ammalwatpa. ²² Anjodon ánanamanejóm iga tsam wí jém Dios inqúimayooyi. ²³ Pero ánix iga anait ánanamanejóm tunyac jixi juuts tum malopic anqúimayooyi. Tsam ijóyixpa jém wíbic jixi. Da iwianjam iga anwíwatpa. Jém malopic jixi, jém anaitwíp ammiytayyucmi, atsenne juuts tum preso.

²⁴ Ich tsam pími anyácne. ¿I wíap aciacput de yíp malopic jixi, jém accaapáppic? ²⁵ Siip anchiiba gracia jém tanjatun Dios porque aciacputneum jém tánomi Jesucristo. Jesic ich mismo ancupicpa jém Dios inqúimayooyi con itumpiy áninama. Ananjacpa jém malopic anjixi jém anaitwíp ánanamanejóm. Pero siempre jém malopic jixi anjactooaba aich, tsam acmalwattooba.

8

Tantúnyíypa jém Dios iAnama

¹ Siip Dios da ichiiba castigo jém pixiñtam, jém icupicneyajwíp jém tánomi Jesucristo, itumpiy jém imichipic. Jeeyaj ichacneyaj iga iwatyajpa juuts nimpá jém malopic jixi. Siip icupicyajpa jém Dios iAnama. ² Jém Dios iAnama jém tachiiñewíp jém vida, tanjacpa porque Cristo tamichi. Taccutsigáypa jém malopic jixi jém taccaapáppic. ³ Jém Moisés inqúimayooyi da wíap iyoxpát jém pixiñtam porque jeeyaj da wíap iwatyaj itumpiy jém anqúimayooyi. Pero jém tanjatun Dios numa wíap iyoxpát jém pixiñtam. Icutsat iManic yíp naxyucmi. Miñ iti juuts tum pixiñ táncaiywíp. Oy iyojáy jém pixiñtam itánca. Dios ichégáy Cristo jém pixiñtam itánca cuando accaata. ⁴ Iwat así iga wíap tanaccupac juuts nimpá jém Dios inqúimayooyi porque siip da tanwatpa juuts nimpá jém malopic jixi, pero tanwattampa juuts nimpá jém Dios iAnama.

⁵ Jém pixiñtam, jém iwatpáppic juuts nimpá jém malopic jixi iananejóm, wíap tanim iga injacpa jém malopic jixi. Pero jém iwatpáppic juuts nimpá jém Dios iAnama, injacpa jém wíbic jixi jém ichiiñewíp jém Dios iAnama. ⁶ Siiga siempre tanjacpa jém malopic jixi jém itwíp tánanamanejóm, jesic caaba táninama. Da nicpa taíti con Dios. Pero siiga jém wíbic jixi tanjacpa, jém tachiiñewíp jém Dios iAnama, jesic tanaít jém vida. Da ti idíyíy, tumti tanjixi con Dios. ⁷ Porque siiga jém malopic jixi injacpa tum pixiñ, jesic ijóyixpa tanjatun Dios. Jém pixiñ da iwattooba, ni da wíap iwat juuts nimpá jém Dios inqúimayooyi. ⁸ Jém

tsampic iwatpa juuts nimpá jém malopic jixi ianamanjom, da wíap iwat juuts ixunpa Dios.

⁹ Pero mimichtam da minjactámpa jém malopic jixi jém itwíip íñanamanjom. Minjacpa jém wíbic jixi jém tachiiñewíip jém Dios iAnama siiga numa iniit jém Dios iAnama íñanamanjom. Pero siiga tum pxiñ da inií jém Dios iAnama, jém tachiiñewíip Cristo, jesic jém pxiñ da je jém Cristo imíichi. ¹⁰ Caaba jém tammijtay porque tanwatne jém táñca. Pero siiga numa tanait Cristo tánanamanjom, jesic vivo jém tánanama porque Dios tawítsagáy jém tantáñca. ¹¹ Siiga iniit jém Dios iAnama íñanamanjom, jém icpísnewíip Jesús de jut it jém caaneyajwíip, jesic jeetim Dios, jém icpísnewíip jém Jesucristo, ichiibatim vida jém immijtay jém caapáppic. Micpíspa porque iniit jém Dios iAnama íñanamanjom.

¹² Jesic, mantíwítam, da tai obligado iga tammalwadiñ juuts nimpá jém malopic jixi jém itwíip tánanamanjom. ¹³ Porque siiga inwatpa juuts nimpá jém malopic jixi, jém iniitwíip íñanamanjom, tienes que micaaba, da miñúcpa jut it Dios. Pero siiga íñícpa iga miyoxpátpa jém Dios iAnama iga mictsacpa iga immalwatpa, jesic iniitpa jém wíbic vida.

¹⁴ Itumpiy jém pxiñtam siiga ijícyajpa iga inquejáypa jém Dios iAnama jém wíbic tun, jeeyaj jém Dios imanictam. ¹⁵ Jém Dios iAnama, jém tachiiñewíip, da tatsacpa juuts tum esclavo iga eybic tançinpa jém wiñicpic anquímayooyi. Pero tayoxpátpa iga tatsíyíñ juuts Dios tamanictam. Tayoxpátpatim iga tannímáypa Dios: “Manjatun Dios.” ¹⁶ Jeetim Dios iAnama tacjodónap tánanamanjom iga taichtam Dios tamanictam. ¹⁷ Siiga Diosam tamanictam, jesic tampictsonpa itumpiy jém Diospic imíichi jém tachiiápáppic Dios. Tanwagapictsonpa con jém tánomi Jesucristo. Yíp naxyucmi tawagayaachap con Cristo, pero núcpa jama iga tawagaitpa con Cristo jut wícom, jut nicpa taítitam para siempre.

¹⁸ Ich animpá iga casi da tanjísipa jém yaachaji, jém tannascanewíip yíp naxyucmi, cuando tánixpa jém maymáyají jém tachiiápáppic jém Cristo cuando tanwaganait je. ¹⁹ Itumpiy cosa yíp naxyucmi, jém iwatnewíip Dios, tsam injócyajpa, tsam iixyajtooba jém tiempo cuando quejpa iapaap jém Dios imanictam, cuando ipictsonyajpa titam ijíycámayñe Dios. ²⁰ Dios ichac yíp nas iga da ti cuwatcuy porque asíam ixunpa Dios, da juuts ixunpa jém iwatnewíip Dios. Y jém Dios iwati, jém itwíip yíp naxyucmi, tsam injócpa jém jama iga iwítsacpa Dios itumpiy cosa. ²¹ Porque núcpa jama iga itumpiy jém cosa, jém iwatnewíip Dios, da misap, da nunca cuyajpa. Cíputyajpa itumpiy jém Dios iwati juuts jém Dios imanictam. ²² Tanjodonam iga hasta síip itumpiy jém cosa, jém Diospic iwati, tsam yaachap juuts tum yomo agui toypa cuando icnaypa tum tsíxi. ²³ Da solamente yaachap jém cosa, jém iwatnewíip Dios, pero tayaachaptim taichtam, jém tampictsonnewíip jém Dios iAnama como jém wiñític xaja, jém tachiiñewíip Dios. Tsam tanjampa jém yaachaji tánanamanjom iganam tananjócpa jém tiempo cuando tapictsonap juuts Dios tamanictam. Yíp nimtooba cuando Dios icjoomasetpa jém tammijtay. ²⁴ Taciacputnetá porque tanjísipa iga Dios wíap tawíwadáy. Síip tananjócpa jém jama iga tawíwadáy, pero danam núcne. Da i injócpa tum cosa una vez ipictsonne porque iniitum. ²⁵ Pero siiga tananjócpa alguna cosa jém dapicnam núcne, jesic seguido tananjócpa y da tantsacpa hasta que tampictsonpa.

²⁶ Jempictim jém Dios iAnama tsam tayoxpátpa cuando da tanwícutiíyíypa ti ixunpa Dios. Da tanjodon jutsap tananwejpát Dios juuts je iwíanjam. Pero jém Dios iAnama iyaac inwejpátpa Dios para taichtam. Tsam yaachap jém Dios iAnama, íñúcspa Dios para taichtam con jém jixi, jém dapic wíap iput juuts tum jiyi. ²⁷ Jém tanjatun Dios iixpigáypa jém pxiñtam ianama. Ijodonim ti nimtooba jém Dios iAnama. Porque tumti ijixi jém Dios iAnama con tanjatun Dios cuando inwejpátpa Dios para jém Dios ipxiñtam.

Da i wiap tactsac jém Dios itóyooyi

²⁸ Tanjodon iga titam tannascaaba, Dios tawiwadáypa siiga tantoypa Dios, siiga tacu-piñne iga tañcuyoxap. ²⁹ Porque dende wiñigam ijsipa Dios iga icupiñpa jém ipixiñtam, ocmi icsetpa juuts jém iManic Cristo. Iwianjam Dios iga Cristo tsíy juuts jém achpic con jáyan itiwitam. ³⁰ Jesic Dios inwejay jém pixiñtam jém icupiñneyajwip. Iwitsagáy itañca jém inwejayñeyajwip. Jesic jém iwitsagayñewip itañca, icsetpa juuts jém iManic Cristo, jém itwip sinyucmi.

³¹ ¿Tí tanimpa? Siiga Dios it con taichtam, ¿jesic i wiap tamalwadáy? ³² Jém tanjatun Dios da iñéc iManic iga odoy i ichiñ castigo. Ijíc iga ipictson itumpiy jém castigo. Ichiñcot iManic iga accaatañ para taichtam. Jesic tanjodon iga tachiitampatim itumpiy cosa con iManic. ³³ ¿Jesic i wiap iquejajwadáy jém icupiñneyajwip Dios? Tanjatun Dios iwitsagayñeum jém itañca. ³⁴ ¿Jesic i wiap tachi castigo? Jém tánomi Jesucristo da tachiiba jém castigo porque je accaata para taichtam. Ocmi acpista de jut it jém caaneyajwip, nic iti jém tanjatun Dios inwimi jut sip tacupujtampa. ³⁵ ¿I wiap tactsac iga tatoypa jém Cristo? Je da nunca ichacpa iga tatoypa. Siiga tammalnascaaba, tsam tayaachap, tajóyixtap, odoy jisi iga da tatoypa tánomi Jesús. Siiga tayuucatooba, siiga da tapuctugiy, tamalwadaytap o taccaatatooba; odoy jistaami iga Cristo michacpa iga mitoypa. ³⁶ Nimpa Dios inmati jut jayñeta:

Mich inçuyucmi accaatamtap.

Muma jama it jém peligro.

Amatstamtap juuts jém borregoyaj iga accaayajtap.

³⁷ Titam tannascaaba tañcoñwíypa porque tsam tayoxpátpa jém Cristo jém tsampic tatoypa. ³⁸ Ich añwijodon iga da ti wiap tactsac jém Dios itóyooyi. Siiga tacaaba o tavivo, ni jém sinyucmipic pixiñtam, ni jém malopic espíritu, ni cualquier jém añjagooyiyaj, ni jém cosa jém itwip sip, ni jém cosa jém miñpáppic, ³⁹ ni jém sinyucmipic ni jém naxyucmipic da wiap tactsac jém Dios itóyooyi jém tañquejayñewip tánomi Jesucristo.

9

Cupinyajta jém Israelpic pixiñtam

¹ Sip mannuumanmadáypa iga tsam pimi anjsipa jém Israelpic pixiñtam. Jém tánomi Cristo ijodon iga da mammigóyáypa. Jém Dios iAnama anímáy ananamanjom iga numa. ² Tsam pimi anyácne. Tsam it anyaaqui ananamanjom, da cuyajpa. ³ Tsam ansunpa iga ciacputyajtap jém antiwítam jém Israelpic pixiñtam. Tsam anyoxpáttooba. Meega awiap, antsacpa iga añcupicpa Cristo iga ampictsonpa jém castigo juuts tum malopic pixiñ meega wíap añciacput jém antiwítam. ⁴ Jeeyaj tsíyyajpa jém nación de Israel, jém Dios imichi. Dios ipictsonyay juuts imanictam. Ixyajtim jém wibic juctiantsoqa cuando iwaganait Dios jém titsinaxyucmi. Watciy ijycámáy Dios jutsap iwíwadáy. Ipictsonyay jém Moisés inquímayooyi. Chiijajta jém derecho iga ijsiyajpa Dios jém mijpic masticjom. Chiitatim itumpiy jém promesa. ⁵ Jém wiñicpic itiwítam jém Abraham, Isaac y Jacob; jém ictsucumneyajwip jém nación de Israel. Jém Cristo, jém icutsatnewip Dios, nay juuts tum Israelpic pixiñ. Jém yucmipic Dios tañcujíptampa para siempre. Amén.

⁶ Pero da animtooba sip iga da cupacpa juuts ijycámáy Dios jém wiñicpic pixiñtam. Porque da itumpiy jém Israel imanictam jém nunta Israelpic pixiñtam. ⁷ Da itumpiy jém Abraham imanictam tsíyyaj juuts iñuntamanic. Porque nimpa así jém Dios inmati: “No más jém Isaac imanictam tsíy juuts mich immanictam.” ⁸ Yip nimtooba iga da itumpiy jém Abraham imanictam tsíypa juuts Dios imanic. Nada más jém ijycámáyñewip Dios iga

naypa, jeeyaj tsíyapa juuts Dios iñuntamanictam. ⁹ Dios ijíycámáy jém Abraham iga naypa imaníc. Nímpa Dios: “Yíp tungac amtiy amiñgacpa y jém Sara icnaypa tum ijaymaníc.”

¹⁰ Da no más jém Abraham y Sara. Jesanetim jém wiñicpic tanjatun jém Isaac con jém iyomo Rebeca. Manigíy jém yomo. Mechi jém imaníc jém Jacob y Esaú. ¹¹⁻¹³ Pero cuando danam nayñe jém imaníc, ni da ti iwatneyaj, ni cosa wibic ni malo, Dios iñímáy jém Rebeca: “Jém achpic immaníc tsíyapa iga icuyoxap jém ijáyuc.” Jesanetim nímpa jém Dios inmatí jém jayñetawip. Nímpa Dios: “Antoypa jém Jacob, pero da anwixpa jém Esaú.” Jesic quejpa iga tanjatun Dios iniit derecho iga icupinpa i ixunpa iga cupacpa jém Dios iyoxacuy. Da tacupinpa porque tanimpa iga tanwíwatne.

¹⁴ ¿Tí tanimpa? ¿Que malo jém tanjatun Dios iga icupinpa i ixunpa? Da malo.

¹⁵ Porque Dios iñímáy jém Moisés iga: “Anyaachanjampa jém ichpic ansunpa, antoypa jém ichpic anwanjam.” ¹⁶ Jesic Dios da iwíwadáyapa tum pxiñ iga jém pxiñ ixunpa ni porque jém pxiñ tsam imétsa iga wíwadaytaiñ, pero Dios iyaachanjampa itam ixunpa.

¹⁷ Wiñigam Dios iñímáy jém Faraón jém Egiptopic anjagooyi. Jaychacnetá jém Dios inmatí: “Manaccámne juuts rey iga anaquejáyapa jém pxiñtam ampimi. Cuando iixyajpa ti iññascaaba, jesic icuwíti yíp naxyucmi núcpa jém anmatí iga it tum jém numapic Dios.”

¹⁸ Jesic Dios iyaachanjampa itam ixunpa, pero icamamwadáyapa ianama jém tungac iga más malojaiñ.

¹⁹ Miñímtámpa mimichtam: “Siiga iwatpa jempic Dios, ¿jesic tiiga nímpa iga táncaíy jém pxiñ? ¿I wíap iwat contra titam ixunpa Dios?” ²⁰ Odoy jisí jempic. A que mipxiñ, ¿miiapaap iga incutsonpa Dios? ¿Tiiga inínapa Dios? ¿Que tum suun iñímáy jém pxiñ, jém suunwatpáppic, iga: “¿Tiiga anwat jempic?” ²¹ Tanjodon iga jém suunwatpáppic iwatpa titam ixunpa con jém nas. Tumti nas ipicpa para tum wibic suun, jeetim nas ipicpa iga iwatpa tungac suun jut cottap jém da wítampic cosa.

²² Dios tsam inquejaytooba ipimi jém malopic pxiñtam, tsam ichiitooba castigo, tsam iccuyajtooba, pero iyaachiyñe. Da jobit inimiñpa jém castigo porque ²³ icjodónatooba jém tungac pxiñtam, jém iyaachanjampáppic, iga tsam ichiitooba jém wítampic cosa. Dende wiñigam icupin jém pxiñtam, jém ipictsonpáppic jém wítampic cosa sinyucmi.

²⁴ Taichtam tacupinnetá jém taIsraelpic tapxiñtam. Cupinñtam jém tungac, jém dapic je de Israel. ²⁵ Iwatpa Dios juuts nímpa jém wiñicpic anmatcwiñ jém Oseas:

Jém pxiñtam, jém dapic idic ammiichi, tsíyapa juuts ich ampixiñtam.

Jém dapic i itoypa, ich tsam antoypa.

²⁶ Jeetim lugar jut iñímáy Dios jém pxiñtam:

“Mimichtam da je mampixiñtam”,

jeetim pxiñtam tsíy juuts jém vivopic Dios imanictam.

²⁷ Jém Isaías inmatpa de jém nación de Israel cuando nímpa:

Tsam jáyanane jém Israelpic pxiñtam juuts jém pooy, jém itwip lamar anñaca, pero da wati iciacputpa Dios.

²⁸ Porque tanjatun Dios da iyaachíyapa para siempre, pero núcpa jama iga icutsatpa jém castigo yíp naxyucmi. Iccupacpa juuts tajíycámayñe.

²⁹ Wiñigam jém Isaías nímpatim ti miñpa:

Siiga tanjatun Dios, jém más mijpic anjagooyi, da iyaachanjampa jém tannación de Israel y da ichagáyapa jém imanictam,

jesic yajpa taccucaáy juuts jém atebetyaj de Sodoma y Gomorra.

Ciacputtap itumpiy jém icupicneyajwip Cristo

³⁰ Jodónataami ti mannímáypa. Jém tungacpic pixiñtam, jém dapic de Israel, da imétsyaj jutsap iwıtsac itánca. Pero ipátyaj iga Dios wiap iwıtsagáy jém pixiñtam itánca cuando icupicyajpa Cristo. ³¹ Pero jém Israelpic pixiñtam tsam imétsyajpa jutsap iwıtsagáy jém itánca con jém Moisés inquímayooyi, pero da ipátyaj jutsap porque da wiap iccupacyaj juuts nimpa jém Moisés inquímayooyi. ³² Ijıspa iga jém Moisés inquímayooyi wiap iwıtsagáy jém pixiñtam itánca siiga iwatyajpa juuts nimpa, pero da icupicpa jém Cristo iga Dios iwıtsagáyıñ jém itánca. Jexpic jıxi juuts tum tsa jut inepyajpa ipuy, jut tsutyajpa. ³³ Jaychacnetá así jém Dios inmatı. Nimpa Dios: Ich antsacpa tum tsa jém naxyucmi de Sión. Jém tsa ipaccaaba jém pixiñtam. Pero siiga i icupicpa je, da nunca natsaawattap.

10

¹ Mantıwıtam, tsam ansunpa ánanamanjom, tsam ananwejpátpa Dios para jém Israelpic pixiñtam iga núcpa jama cuando ciacputyajtap. ² Ich anjodon iga jeeyaj tsam iwatyajtooba juuts ixunpa Dios, pero da inuntacutiıyıypa ti ixunpa Dios. ³ Da icutiıyıypa jutsap iwıtsac jém itánca iga ipictsonpa Dios. Imétsyajpa tungac manera iga iwıtsacpa iyaac jém itánca iga wıaiñ inúc jut it Dios. Porque da iwıanjamıyaj iga icupicpa jém Cristo iga iwıtsagáyıñ Dios jém itánca. ⁴ Porque Jesucristo iccupac jém Moisés inquímayooyi, iccupajtim. Jeeyucmi wıtsagayñetawum itánca itumpıy jém icupicneyajwıp jém Cristo.

⁵ Jém Moisés ijaychacne jutsap ichıy tum pixiñ sin tánca. Nimpa así: “Siiga tum pixiñ capspa iwıat itumpıy cosa juuts nimpa jém anquímayooyi, jesic asíam ipictsonpa jém vida.” ⁶ Pero siiga incupicpa Cristo iga miwıtsagáyıñ Dios jém inñtánca, jesic odoy jısi inñanamanjom: “¿I wiap iquım sınyucmi iga icquetpa jém Cristo?” ⁷ Odoy jısi: “¿I tıgıypa jém mıjpic josjom tsam jojmi iga nicpa itop jém Cristo de jut it jém caaneyajwıp?” ⁸ Wı jém anmatı, jém itwıp inñanamanjom, jém puttopáppic inñıpjom, jém ichpic ananmattámpa jut quej. Nimpa iga jém pixiñtam tienes que icupicpa Cristo iga wıtsagaytıñ jém itánca. ⁹ Siiga ininmadáypa jém pixiñtam iga jém Cristo mich inñomi y siiga incupicpa inñanamanjom iga Dios icpis jém Cristo de jut it jém caaneyajwıp, jesic Dios micıacputpa. ¹⁰ Porque tanıcupicpa jém Cristo tánanamanjom iga Dios tawıtsagáyıñ jém tantánca. Tananmadáypa jém pixiñtam iga tanıcupicpa jém Cristo iga taciacpudiñ Dios.

¹¹ Nimpa así jém Dios inmatı: “Jém icupicneyajwıp jém Cristo da nunca ichaaixpa jém Cristo.” ¹² Jém Israelpic pixiñtam jextim juuts jém dapic de Israel. Jém tánomi Cristo itumpıy jém pixiñtam iQmiyaj. Ichiiba jém wıbic riqueza itumpıy jém iwágaypáppic. ¹³ Porque nimpa así jém Dios inmatı: “İtam iwágáypa jém tánomi Dios iga iciacpudiñ, tienes que iciacputpa.” ¹⁴ ¿Pero jutsap iwágayyaj Dios iga iyoxpádiñ jém pixiñtam, siiga da icupicyajpa jém Cristo? ¿Jutsap icupicyaj jém Cristo jém pixiñtam siiga da queman imatonyaj jém Cristo inmatı? ¿Jutsap imatonyaj jém anmatı siiga da i inmadayyajpa? ¹⁵ ¿Jutsap inmat jém Cristo inmatı tum pixiñ siiga da i icutsatpa? Juuts nimpa jém Dios inmatı: “Agui wı jém inimiññewıp jém wıbic anmatı iga agui tawıixpa Dios.”

¹⁶ Pero da itumpıy iwadáypa caso jém wıbic anmatı jém taciacputpáppic. Juuts nimpa jém Isaías: “¿Mánomi, i icupicpa jém anmatı jém ichpic ananmatpa?” ¹⁷ Jesic quejpa iga jém pixiñtam icupicpa jém Cristo siiga imatonyajpa jém wıbic anmatı. Imatonyajpa siiga i inmadáypa jém Cristo inmatı.

¹⁸ Ich manacwácpa. ¿Que da imatonyeyaj jém pixiñtam jém wıbic anmatı? Tanjodon iga numa imatonyeyaj. Nimpa así jém Dios inmatı: Matonıta jém jıyi icuwıti jém naxyucmi. Núc jém anmatı hasta jut cuyaj jém inıanpic tıganjoj.

¹⁹ Siip eybictim manacwácpa. ¿Que da icutiyyiyaj jém Israelpic pìxiñtam? Wiñti nìmpa así jém Moisés:

Dios iñímáy jém Israelpic pìxiñtam iga:

“Siip anwìwadáypa jém tungac pìxiñtam jém ñapic de Israel iga mantsicujóypa.

Anyoxpátpa jém pìxiñtam jém ñapic jìxiy iga mantsicjóypa.”

²⁰ Jesic ocni da cìnpa jém Isaías iga inmadáypa jém Israelpic pìxiñtam así:

Nìmpa Dios:

“Jém ñapic amétsyajpa, apátaj.

Anyaac anwìñquejáy jém pìxiñtam jém ñapic acuámyaj.”

²¹ Pero cuando inmatpa Dios de jém Israelpic pìxiñtam, nìmpa así juuts ijaychacne jém Isaías: “Muma jama anañwejaytìp jém pìxiñtam, jém ñapic acupicpa, jém ñapic iwatyajpa juuts ich anwìanjam.”

11

Ciacputtaptim jém Israelpic pìxiñtam

¹ Siip manacwácpa. ¿Que numa tanjatun Dios ichacne iga iyoxpátpa jém ipìxiñtam jém nación de Israel? Da ichacne porque ich mismo aIsraelpic apìxiñ. Jém anjatunwewe ijatunwewe jém Abraham. Ich antúmmitam jém tribu de Benjamín. ² Dios da ichacne icutum jém ipìxiñtam. Dende wiñigam Dios iixpicpa jém Israelpic pìxiñtam porque je imìchi. ¿Que da injodon jut jaychacne jém Dios inmati ti inasca jém wiñicpic anmatcìwiñ jém Elías? Je tsam pìmi iwágáypa Dios iga ichiñ castigo jém Israelpic pìxiñtam. Nìmpa: ³ “Manjatun Dios, jeeyaj iccaayaj jém ininmatcìwiñ, jém inmatpáppic mich ininmati. Imiswatyajtim jém altaryaj jut ijìsyajpa idic Dios. Ich atsìy ancutum, tsam accaaya-jtoobatim mex aich.” ⁴ Pero Dios icutson. Nìmayta jém Elías: “Ich anait siete mil pìxiñtam jém ammìchipic jém ñapic icosteeñayaj jém watnas jém Baal.” ⁵ Jesanetim siip tsìyñeyaj algunos jém Israelpic pìxiñtam jém Diospic imìchi. Dios icupin, jeeyucmi iciacput porque tsam tóyóypa. ⁶ Siiga icupin porque tsam tóyóypa, jesic da i wìap icoñwìy. Cuando tachiitā tum xaja, jesic da tanyojáypa jém tachiñewìp. Dios tacupin porque tsam tóyóypa, da porque tanwìwatne.

⁷ ¿Jesic ti inasca jém Israelpic pìxiñtam? Tsam imétsyajtìp jutsap iwìtsac jém itánca. Tsam jáyan da ipátaj. Pero Dios icupin algunos jém pìxiñtam, da más wati, iga ipátajin titam imétsyajpa. Pero los demás, Dios ichac iga más icupicyajpa jém migooyi. ⁸ Jaychacnetā así jém Dios inmati: “Dios iccumóháy ijìxi jém pìxiñtam. Ichac iga ixcuyìy, pero da ixixóypa. Tàtsigìy, pero da matóhóypa. Asíam iwatyajpa hasta siip.” ⁹ Wiñigam nìmpa jém David: Jém sinyaj, jém iwatyajpáppic jém Israelpic pìxiñtam, tsìypa juuts tum trampa, juuts jém suycuy jém imatpáppic tum animat.

Wì iga ipictsonpa jém castigo.

¹⁰ Cáchtìap jém iixcuy iga odoy ixixóyìn.

Tsam pìmi tsìmane hasta wotne ituuñi.

Ciacputtaptim jém tungacpic pìxiñtam

¹¹ ¿Tananjam iga actin jém Israelpic pìxiñtam iga da eybic tsucum? Da jucha. Cuando tsam imalwatyaj, jesic Dios wìap iciacput jém tungac pìxiñtam tsam jáyan. Siip wì siiga jém Israelpic pìxiñtam icuixiñ ti inascayaj jém tungacpic pìxiñtam hasta que icusúnyapatim. ¹² Cuando imalwatyaj jém Israelpic pìxiñtam, jesic jém tungac pìxiñtam ipictsonyaj jém wìtampic riqueza. Cuando togoy jém Israelpic pìxiñtam, jesic chiita derecho jém tungac pìxiñtam iga tsìyyajin juuts Dios imìchi. Pero siip mannímáypa iga

cuando núcpa jama iga tigiyajpa eybic itumpiy jém Israelpic pixiñtam, jesic itpa tum maymáyaji tsam pími.

¹³ Siip manañmadáypa mimichtam, jém tungacpic mipixiñtam, iga achiita tum mijpic cargo. Accámta juuts tum apóstol iga anañmadáypa jém wibic añmati jém tungac pixiñtam, jém dapic de Israel. ¹⁴ Añwatpa así porque ich animpa iga cuando iixyajpa jém antiwitam, tsam icusúniypatim jém wibic añmati y núcpa jama iga ciacputyajtaptim jeeyaj. ¹⁵ Cuando Dios ichac jém Israelpic pixiñtam iga icupicyajpa jém migooyi, jesic jém tungac pixiñtam wiap ichiyaj juuts amigo con Dios. Pero cuando núcpa jama iga jém Israelpic pixiñtam eybic tsíyyajpa juuts Dios ipixiñtam, jesic agui it maymáyaji juuts cuando píspa tum pixiñ caanewiip. ¹⁶ Siiga Dios imichi jém caxtánañi jém moiwiiip iwat jém panadero, jesic imichitim itumpiy jém jaapi. Siiga Dios imichi jém mero cuytichic, jém Abraham, jesic imichitim jém cuy inçis jém Israelpic pixiñtam.

¹⁷ Jém Israelpic pixiñtam juuts tum olivos inçis. Algunos tinçujacta y mimichtam micámta jém olivos icuyucmi juuts tum injerto jut it idic jém Israelpic pixiñtam. Mimichtam mijextam juuts jém cimarrón olivos. Siip michiy juuts jém nunta olivos. Mimatspacpa jém cuy. ¹⁸ Odoy jistaami iga más miwi que jém tungac añcis jém tinçujacnetawiiip. Siiga minicujiptap iñyaac, jistaami iga mich da immatspacne jém cuytichic, pero jém cuytichic mimatspacne mimich.

¹⁹ Siiga miñimpa: “Numa, tinçujacta jém olivos inçis iga accámtpa aich juuts tum injerto”, ²⁰ it wi. Pero jistaami iga tinçujacta jeeyaj porque ichacyaj iga icupicpa Dios. Mich micámtpa porque inçupicpa. Jesic odoy nacujiptaji iñyaac iga agui wibic mipixiñ. Nawattaji cuenta iga odoy michudiñ. ²¹ Porque siiga Dios da iyaachañjam jém nunta olivos inçis, jesic datim miyaachañjamtampa mimichtam siiga inwattápatim jempic. ²² Ixtaami iga tsam tóyóypa Dios, pero núcpa jama iga ichiiba castigo jém malopic pixiñtam. Jém ichacneyajwiiip iga icupicpa Dios ipictsonpa mijpic castigo, pero Dios tsam wi it con mimichtam siiga seguido inwattámpa juuts ixunpa Dios. Porque siiga inçactámpa iga inçupicpa Dios, jesic mitinçujactaptim juuts jém olivos inçis. ²³ Pero siiga jém Israelpic pixiñtam eybic icupicyajpa Dios, jesic accámtpa eybic jém cuyucmi juuts tum injerto. Porque Dios wiap iccám eybic ilugar jut it idic. ²⁴ Porque mimichtam mijextam juuts tum cimarrón olivos. Pero Dios wiap miccám juuts tum injerto jém wibic cuyucmi. Pero más da tñca iga iccámpa eybic jém olivos inçis jém imichipic.

Ocmi ciacputyajtap jém Israelpic pixiñtam

²⁵ Mantiwitam, ansunpa iga jodónataami yip jixi jém añnécnawiiip idic. Odoy jistaami iga más mijixiyta que jém Israelpic pixiñtam. Dios ichac jém Israelpic pixiñtam iga más icupicyajpa jém migooyi hasta que yajpa tigiyaj jém tungacpic pixiñtam jutsañ icupiñne Dios. ²⁶ Jesic cuando iñascaaba así, Dios iciacputpa itumpiy jém Israelpic pixiñtam. Nimpa así jém Dios inmati:

Jém Ciacpudoypaap miñpa jém attebet Sión.

Accáyaytap jém malopic jixi jém Jacob imanictam, jém Israelpic pixiñtam.

²⁷ Ich añjycámáy iga añwatpa así cuando anaccáyáypa jém ampixiñtam itañca.

²⁸ Pero jém Israelpic pixiñtam tsíyyaj hasta siip enemigo con Dios porque ijóyixyajpa jém wibic añmati. Cuando iwatyajpa así, jesic mimichtam michiñtamtpa lugar iga immatonjampá jém añmati. Pero hasta siip tsam itoypa Dios jém Israelpic pixiñtam porque wiñigam icupiñne jém ijatunwewe ijatun iga tsíyyajiñ juuts imichi. ²⁹ Jém tachiiñewiiip Dios da taccáyáypa. Jém icupiñneyajwiiip Dios da nunca ichacpa iga iyoxpátpa. ³⁰ Wiñti mimichtam michiyta juuts rebelde, da inwatta juuts ixunpa Dios,

pero s̄ip miyaachanjampa Dios porque jém Israelpic p̄ixiñtam ichacyaj iga icupicpa Dios. ³¹ Jesanetim jeeyaj s̄ip ts̄íyyaj juuts rebelde, da iwatyaj juuts ixunpa Dios iga núcpa jama iga iyaachanjampatim Dios mex jeeyaj juuts miyaachanjampa mimichtam. ³² Ijicpa Dios iga imalwatyajpa itumpiy jém p̄ixiñtam iga w̄iañ iyaachanjam itumpiy jém p̄ixiñtam.

³³ Tsam mij jém Dios ijixi. Ijodon itumpiy cosa. Da i w̄iap icutiyȳy titam iwatpa Dios ni tiiga iwatpa así. ³⁴ N̄impa Dios in̄mati:

¿I icutiyȳyipa jém Dios ijixi?

¿I ichi j̄ixi jém tanjatun Dios?

³⁵ Itumpiy cosa je im̄ichi. Da i ichi ni ti iga icseedáypa.

³⁶ Porque Dios iwat itumpiy cosa. Ip̄imimi wadayta iga cuj̄iptañ Dios. Cuando tanj̄ispa ti iwat, da yajpa tan̄cuj̄iptampa tan̄jatun Dios. Amén.

12

W̄i iga tanchiiba Dios jém tamvida

¹ Jesic mant̄iwitam, tánixpa iga Dios tsam tayaachanjampa. Jeeyucmi man̄cunucsáypa iga in̄c̄ijun̄codáñ Dios jém immijt̄ay juuts tum sacrificio dap̄ic caane, tum w̄ibic xaja cuáyñe jém w̄iapaap ipictson̄ Dios. Asíam iw̄ian̄jam Dios iga tan̄j̄istamiñ. ² Odoy wattaami, odoy j̄istaami juuts jém malopic p̄ixiñtam jém ityajw̄ip ȳip naxyucmi. Cucaci jém in̄j̄ixi, p̄ictson̄taami jém jomipic j̄ixi iga micjoomasettaiñ. Jesic w̄iap in̄cutiyȳy ti ixunpa Dios iga tan̄wattampa, jém w̄ibic cosa, jém dap̄ic malo, jém iw̄ian̄jampáppic Dios.

³ Dios acupiñ iga an̄cuyoxap jeeyucmi mann̄imáypa, odoy j̄istaami iga agui miw̄iap. Cada tumtum de mimichtam j̄istaami como tum p̄ixiñ tsampic j̄ixiyȳ. Siiga michiita iga más in̄cupicpa Dios, jesic más mijp̄ic cargo michiiba Dios. ⁴ Jesanetim juuts tammijt̄ay. W̄ati cosa tanait tammijt̄ayyucmi. Pero da tumti yoxacuy iwatyajpa. ⁵ Jesanetim taichtam tsam tajáyan̄tam, pero tumti tamijt̄ay porque tan̄cupicnetim jém Cristo. Cada tumtum de taichtam tumtí jém m̄ijt̄ayyucmi tap̄imane.

⁶ Dios tachiñe w̄ati yoxacuy juuts je iw̄ian̄jam. Cada tumtum de taichtam w̄i iga tan̄wattamiñ juuts tachiñeta Dios. Siiga tachi jém yoxacuy iga tanañmatpa jém Dios in̄mati, jesic w̄i iga tanañmadiñ juuts tan̄cupic Dios. ⁷ Siiga tachiita jém yoxacuy iga tan̄cuyoxatamiñ jém tant̄iwitam, jesic w̄i iga tan̄cuyoxap. Siiga tachiita jém yoxacuy iga tanañquejáypa jém tant̄iwitam, jesic w̄i iga tanañquejáyiñ parejo. ⁸ Siiga tachiita jém yoxacuy iga tanañquejáypa jém p̄ixiñtam iga más icupiguiñ, jesic w̄i iga tan̄wattamiñ jempic. Jém iniitw̄ip jém yoxacuy iga iwat jém Dios iyoxacuy con jém itumiñ, jesic w̄i iga ichiñ jáyan̄. Jém iniitw̄ip jém cargo iga in̄jacpa jém Dios ip̄ixiñtam, jesic w̄i iga iwadiñ con itumpiy ianama. Jém iniitw̄ip jém cargo iga iyoxpátpa jém yaachayajpáppic y jém mimnew̄ip, w̄i iga iwadiñ con maym̄ayaji.

Jém icupicneyajw̄ip Jesús tienes que iw̄iwatyajpa

⁹ Naittaami jém numapic tóyooyi con jém in̄t̄iwitam. Jóyixtaami jém malopic j̄ixi. Seguido w̄iwattaami. ¹⁰ Natoytamtaji con jém in̄t̄iwitam juuts tum in̄ñuntat̄iwi. Naw̄ixtamtaji con itumpiy jém in̄t̄iwitam. W̄i iga más in̄toytamiñ jém in̄t̄iwitam que iga minitoytap̄ in̄yaac.

¹¹ Odoy cutiñataami iga in̄w̄iwattampa. Cuyoxataami jém tán̄omi con itumpiy in̄anama.

¹² Maym̄ayataami porque in̄injóctampa jém jama cuando miñgacpa jém Cristo. Yaachiytaami cuando miyaachwattamtap̄. Seguido an̄wejpátaami Dios.

¹³ Yoxpaati jém icupicneyajw̄ip Cristo, chiitaami titam itogóyay. W̄ipictson̄i jém miñyajpáppic juumi.

14 W_iwadaayi jém mimalwadaypáppic. Wágaayi Dios iga iw_iwadáyiñ jém p_ixíñ. Odoy malnímaayi.

15 Maymáyaataami con jém maymáyaajpáppic. Anyátaami con jém anyácneyajw_iip.

16 Naittaami tumti j_ixi con jém tant_iwitam. Odoy nacujíptaji iñyaac. Odoy cusúniyi iga más miw_iitpa que jém iñt_iwitam. W_inanigaayi jém pobreyaj. Odoy j_isi iga más mij_ixíy.

17 Siiga j_i mimalwadáypa, odoy acseedaa_i jém mal. Wadaytaami caso iga in_wi_wattámiñ jém p_ixíñtámanjom. 18 Wattaami jutspiy w_iap in_wi_watta iga odoy míñatámiñ con jém p_ixíñtam. 19 Mant_iwitam mantoytampáppic, odoy tségaayi jém mimalwadaypáppic. Tsaci iga ichégáypa Dios. Ichiiba castigo jém mimalwadayñew_iip. Nimpa así jém Dios in_wmat_i: “Ich antségáypa jém imalwadayñew_iip jém amp_ixíñtam. Ich anáseedáypa jém mal. Nimpa tanjatun Dios.” 20 Nímtim jém Dios in_wmat_i: “Siiga yuap jém íñenemigo, acwiici. Siiga níctitpa, acniici. Porque siiga in_wi_wadáypa jém íñenemigo, jesic agui p_imi tsaap iga mimalwadayñe.” 21 Odoy j_ici iga micmalwatpa jém malopic j_ixi. W_iwadaayi jém malopic p_ixíñ iga in_wcoñw_iyíñ jém malopic j_ixi.

13

1 W_i iga cada tumtum de taichtam tan_wcupictámiñ jém anjagooyi, jém gobierno im_ichi. Porque Dios ichi derecho jém anjagooyi iga in_wjacpa jém p_ixíñtam. Dios iccám itumpiy jém anjagooyi. 2 Jesic jém dapic icupicpa jém anjagooyi nicpa en contra de jém iccámnew_iip Dios. Jém nicpáppic en contra tienes que chiitap castigo. 3 Da j_i iccám jém anjagooyi iga ic_iñiñ jém iw_iwatpáppic. Pero jém malopic p_ixíñtam ic_iñpa jém anjagooyi. Siiga da in_wianjam iga in_wñpa jém anjagooyi, jesic w_iwat_i. Jesic miw_ixpa jém anjagooyi. 4 Porque Dios iccám jém anjagooyi iga iwatpa jém yoxacuy iga miw_iwadáypa. Pero siiga immalwatpa, c_iñi jém anjagooyi porque da ixajaaccám Dios jém anjagooyi. Iccám iga ichiiba castigo jém p_ixíñtam jém imalwatpáppic. Jém anjagooyi icuyoxap Dios iga ichiiba castigo jém p_ixíñtam jém imalwatnew_iip. Jempigam ixunpa Dios. 5 Jeeyucmi w_i iga tan_wcupictámiñ jém anjagooyi, da no más iga odoy tamp_ict_sóniñ jém castigo, pero tan_wispa tan_wj_iximi iga tan_wi_watpa. 6 Jeeyucmi mimichtam iñyojtámpatim jém impuesto. Porque jém anjagooyi icuyoxap Dios cuando ichécpa jém tumiñ. 7 Yoji itumpiy jém ichécpáppic impuesto. Yojitim jém contribución. Naidaayi respeto jém anjagooyiyaj. Toyyaj_i.

8 Siiga iñjatsne algunos, jesic yoji hasta yajpa iñyoj. Pero da nunca yajpa tantoy jém tant_iwitam. Jém itoypáppic jém it_iwitam cupacpa iwat jém anquímayooyi. 9 Nimpa así jém anquímayooyi: “Odoy pejooyi. Odoy accaoyi. Odoy nuumi. Odoy migóyaayi jém iñt_iwitam. Odoy cusúniyi tungac p_ixíñ im_ichi.” Yip anquímayooyi con itumpiy los demás nimp_a iga tantóyiñ jém tant_iwitam como taich mismo tanatoytap. 10 Jém tóyoypaap da imalwadáypa jém it_iwitam. Jesic siiga tannuntatoypa jém tant_iwitam, caps_a tan_wat jém Dios in_wquímayooyi.

11 W_i iga tan_wattámpa así porque tan_wodon_w juchis hora tait. W_i iga tayustámiñ porque más nocojomum it jém tiempo iga taciaputpa Dios que cuando moj tan_wcupic jém Cristo. 12 S_iip cuyajtooba jém tsuu, quíntooba jém jama. W_i iga tantsactámiñ iga tammalwatpa juuts iwatyajpa jém dapic icupicyajpa Cristo. Mojpa tan_wi_wat. Tantsacpa iga tammalwatpa juuts jém imalwatyajpáppic piichciim. Mojpa tan_wi_wat juuts tum soldado jém si_ipaap juctian_wsocajom. 13 W_i iga tan_wi_wattámiñ juuts jém si_iyajpáppic siññi. Da tauctámpa, da tan_wattámpa jém malopic siñ. Da tanyamtsáyap tum yomo, odoy j_isi jém malopic cosa. Da w_i iga tan_watámpa, odoy kujóy_iyooyi. 14 Accaami jém w_ibic j_ixi juuts Jesucristo i_jxi iga miyoxpátpa iga da immalwatpa. Odoy malwat_i juuts iñ_wispa iñanamanjom.

14

Da wí iga tañcujíypa tum jém tantíwí

¹ Siiga núc tum pìxiñ jém ðapic iwícupicne jém Cristo inqúimayooyi, jesic píctsonj. Odoy wogaayí jém pìxiñ porque iñejacupicpa jém anqúimayooyi. ² Algunos jém iwícupicneyajwíp jém Dios inmati ijíspa iga wíap icút ti quej. Pero it tunḡac jém pìxiñ iñejacupicpa jém Dios inmati, ða icíspa jém mayí, icútpa naps jém verduras. ³ Jesic jém icútpáppic itumpiy cosa odoy ijóyixiñ jém ðapic icútpa. Jém ðapic icútpa itumpiy cosa, odoy icujíyíñ jém itíwí jém icútpáppic itumpiy cosa porque Dios ipíctsonpatim jém pìxiñ. ⁴ ¿Mich miíapaap iga inçujíypa jém tunḡac pìxiñ jém icuyoxapáppictim Dios? Solamente iQmi wíap inim siiga wíputpa jém iyoxacuy o ða wíputpa. Pero tienes que wíputpa porque jém tánQmi Cristo iyoxpátpa iga wípudiñ jém iyoxacuy.

⁵ Tum pìxiñ ijíspa iga tum jama más mij que jém tunḡac jama. Pero tunḡac pìxiñ ijíspa iga itumpiy jama jex. Cada tumtum pìxiñ wí iga ijíxiñ íanamanjom siiga iwíwatpa. ⁶ Jém ijíspáppic iga tum jama más mij, ixutspa jém jama iga iwíwadáypa tánQmi. Jém ijíspáppic iga itumpiy jama jex, iwíwadáypatim jém tánQmi. Jém icútpáppic itumpiy cosa, iwíwadáypatim jém tánQmi porque icujíppa Dios. Jém ðapic icútpa itumpiy cosa, iwíwadáypatim tánQmi porque icujípatim Dios.

⁷ Ni tum de taichtam ða tañcutum tait yíp vida, cuando tacaaba ðatim tañcutum nicpa taíti. ⁸ Siiga tavivo tañwatpa juuts ixunpa jém tánQmi Jesucristo. Siiga tacaaneum, tañwatpatim juuts je ixunpa. Jesic siiga tavivo o tacaaneum, tánQmitim tamíchi. ⁹ Jeeyucmi ca jém Cristo y eybictim pis iga tsíyíñ juuts iQmi jém caaneyajwíppic y jém vivopic.

¹⁰ ¿Tiiga injíspa iga imalwatpa jém iníwí siiga icútpa ti quej? ¿O mimich, tiiga injóyixpa jém iníwí siiga ða icíspa jém mayí? Porque núcpa jama iga tantumpiytam tacípíntamtap jém Dios iwiñjom jut cípínyópa tánQmi Jesucristo. ¹¹ Porque asíam jaychacnetā: Nimpa tánQmi:

“Como ich avivo tienes que acosteeñáypa itumpiy jém pìxiñtam, inmatyajpa Dios iwiñjom ti iwatyaj.”

¹² Jesic cada tumtum de taichtam tienes que tanañmadáypa Dios ti tañwatne yíp naxyucmi.

Da wí iga tanacwatpa táñca tum tantíwí

¹³ Jesic ða tañcujíypa jém tantíwítam. Más wí iga ða tanacwatpa táñca tum tantíwí o iga ða nunca tañcutitspa iga tanacmalwatpa. ¹⁴ Ich anwíjodon iga wítam itumpiy jém wíccuy porque anquejayñe así jém tánQmi Jesucristo. Pero jém ijíspáppic iga táñcaíy siiga icútpa algun wíccuy, jesic jém pìxiñ táñcaíypa siiga icútpa. ¹⁵ Siiga pími inçiganjácwatpa jém iníwí iga inçíspa jém mayí, jesic quejpa iga ða mitóyópa. Odoy actogoyí jém iníwí iga tsam inçístooba jém mayí porque accaata jém Cristo iga icíacpudiñtim jém iníwí. ¹⁶ Jesanetim siempre jisí ti inwatpa iga odoy í imalnímáyíñ jém wíbic anqúimayooyi mich inçuyucmi, aunque injódon iga ða immalwatpa siiga inçíspa jém mayí. ¹⁷ Siiga tatigiyñe con Dios ipíxiñtam, jesic ða ti cuwatcuy jém anqúimayooyi ti wí tañcútpa y ti wí tánucpa. Pero siiga Diosam tamíchitam, wí iga tañwíwadiñ y iga tañwínanigáyíñ jém tantíwítam. Tsam tamaymáyp porque tanait Dios íAnama tánanamanejom. ¹⁸ Siiga asíam inçuyoxatámpa jém tánQmi Cristo, tsam miwíixpa jém tañjatun Dios, miwíixyajpatim jém pìxiñtam.

¹⁹ Jesic tammétstámpa jutsap tañwíwat iga tañwínanigáyíñ jém tantíwítam. Tammétstámpatim jutsap tanayoxpáttamta iga más tañcutíyíyítamiñ ti ixunpa Dios. ²⁰ Odoy actogóyaayí jém Dios iyoxacuy porque injíspa iga inçíspa algun mayí. Numa itumpiy jém wíccuy wí tañcís. Pero ða wí inçís jém mayí jém icwatpáppic táñca jém

inñtíwí. ²¹ Wí iga da tançispa jém mayi y da tánucpa jém vino o tanwatpa tungac cosa iga inímalwatpa jém inñtíwí iga moypa inñjacupic jém Dios inmáti. ²² Siiga incupicpa iga itumpiy jém wíccuy wí tançis, jesic jisi mich inñyaac jém Dios iwiñjom. Tsam wítpa jém pxiñ siiga ijispa íanamajom iga itumpiy wíccuy wí tançis. ²³ Pero siiga algunos ijispa iga da wí tançis, siiga icispa, jesic táncaíypa porque ijispa iga da wí tançis. Titam tanjispá iga da wí tanwat siiga tanwatpa, jesic tatáncaíypa.

15

Wí iga tanyoxpátpa jém tantíwítam

¹ Taichtam como tanwícupicne jém Dios inmáti, wí iga tanyaachíypa jém tantíwítam, jém dapic iwícupicne. Wí iga da tanwattámpa juuts taich tansunpa. ² Pero cada tumtum de taichtam wí iga tanwattámiñ juuts ixunpa jém tantíwítam. Tanwíwatpa, tanyoxpátpa iga más iwícutíyíyíñ jém Dios inmáti. ³ Porque jém tánQmi Cristo datim iwat juuts ixunpa iyaac. Inñasca jém Cristo juuts nimpá jém Dios inmáti: “ManJatun Dios, jém malopic pxiñtam, jém mijóyixajpáppic, ajóyixpatim aich.” ⁴ Itumpiy jém Dios inmáti wiñigam jaychacnetá iga tanquejáypa taichtam. Jém Dios inmáti tsam tanyoxpátpa iga tanyaachiymiñ cuando tayaachwattap iga odoy tanyáguiñ. Jeeyucmi tananjócpa jém jama iga tampictsonpa titam tajycámayñe Dios. ⁵ TanJatun Dios tsam tanyoxpáttámpa iga tanyaachiymiñ cuando tayaachwattap, iga odoy tanyáctámiñ. Síp miyoxpáttámpatim mimichtam iga tumti jixi iniñtámiñ juuts tanquejáy tánQmi Jesucristo ⁶ iga tantumpiytam jempictim tançujíptámiñ tanJatun Dios, jém tánQmi Jesucristo iJatunjim, jém iDiostim.

Anmadayá jém tungac pxiñtam jém wíbic anmáti

⁷ Jesic jempictim nawípicsonjtamtaji mimichtam juutstim taich tawípicson jém Cristo, jesic agui cujíptap jém tanJatun Dios. ⁸ Ich animpá iga oy íti yíp naxyucmi jém tánQmi Cristo juuts tum yoxacíwiñ iga icuyoxap jém Israelpic pxiñtam. Iccupacpa itumpiy cosa juuts ijycámayñe Dios jém wiñicpic pxiñtam, jém ictsucumnewíp jém nación de Israel. Jempam tanquejáypa iga Dios da tamigóyáypa. Je iccupacpa juuts tajycámayñe. ⁹ Oy yíp naxyucmi jém tánQmi Cristo iga jém tungac pxiñtam, jém dapic de Israel, icujípyajiñ Dios porque tsam iyaachanjampa. Juuts nimpá jém Dios inmáti:

Jeeyucmi mançujíppa, manJatun Dios, con jém tungac pxiñtam, jém dapic de Israel.

Manwánáypa tum wañi iga mançujíppa.

¹⁰ Eybictim nimpá jém Dios inmáti:

Maymáyaataami jém dapic je miIsraelpic mipixiñtam.

Wagamaymáyaataami con jém Dios ipixiñtam.

¹¹ Eybictim nimpá jém Dios inmáti:

Cujíptaami Dios inñtumpiytam, jém dapic je miIsraelpic mipixiñtam.

Wí iga itumpiy pxiñtam icujípyajiñ Dios.

¹² Eybictim nimpá jém Isaías:

Anaypa eybic jém Isaí itichic.

Jém wiñicpic pxiñ Isaí iocmanic manic eybic tsucumpa juuts anjagooyi iga injacpa jém tungacpic pxiñtam jém dapic je de Israel.

Jém tungacpic pxiñtam tsam injócyajpa iga tsucumpa jém anjagooyi.

¹³ Tanjodon iga Dios tawíwadáypa. Ich ansunpa iga Dios mimaymaywadiñ iga da ti inçinpa inñanamajom iganam incupictámpa Cristo. Ansunpatim iga Dios íAnama miyoxpáttámiñ iga más y más inñjístámpa jém jama cuando cupacpa itumpiy cosa juuts tajycámayñe Dios.

¹⁴ Mantiwitam, anwijodon iga mimichtam tsam mitóyopa y capsum micuyuji hasta wiap mininquejaytamta con inñiwitam. ¹⁵ Pero manjáyáy yíp toto iga manañmadáypa juuts tum inñatun iga odoy inñamaanodíñ jém wibic anquímayooyi jém incuyujcanewiip. Manjáyáypa así porque Dios acupiñne iga ¹⁶ anañmadáypa jém Jesucristo inquímayooyi jém tungac pixiñtam jém dapic je de Israel. Cuando ananicpa juumi jém wibic anmati iga Dios taciaputpa, ancuyoxap Dios juuts jém wiñicpic panijyaj icuyoxayaj Dios. Jém tungacpic pixiñtam cuando moj icupic Cristo, jeeyaj juuts tum xaja para Dios. Jesic Dios iAnama icujicháyáy jém pixiñtam ianama iga iwipictsoniñ Dios.

¹⁷ Ich animpa iga wiput jém anyoxacuy jém anwadayñewiip Dios porque da ich anwat, jém Jesucristo ayoxpát. ¹⁸ Siip manañmadáypa solamente titam awadáy Cristo iga jém tungac pixiñtam, jém dapic de Israel, icupicyajiñtim mex jeeyaj. Moj icupicyaj cuando imaton jém anmati, cuando iixyaj ti wiap wat jém Cristo. ¹⁹ Ayoxpát iga wiap anwat jém milagro y jém cosa agui taámanjacpa. Dios iAnama watpatim jáyan wítampic cosa con ipimi. Capsum anañmat jém anmati jutsap taciaput jém Cristo dende Jerusalén hasta jém naxyucmi de Ilírico. ²⁰ Ich siempre anwanjam iga ananicpa jém wibic anmati jém tungac lugar jut da i imatónayñe jém Jesucristo inñiyi. Porque da anwattooba tum tic jém baseyucmi jém ictsucumnewiip tungac pixiñ. ²¹ Asíam nimpa jém Dios inmati: Jut da i queman inmat de je, siip icutiyyajpa jém wibic anmati. Jém dapic oypa imaton, siip ijodónayaj.

Jém Pablo nictooba Roma

²² Jeeyucmi da nunca wiap nicpa manjójáy aunque tsam anictooba idic. ²³ Pero siip cupacum anyoxacuy icutero yíp lugar jut jém pixiñtam da idic imatonne jém Cristo inquímayooyi. Como tsam wiñigam nictooba manjójáy, ²⁴ siip anjisa iga manjoyñasáypa cuando anicpa España. Cuando yajpa manjójayta, jesic mimichtam ayoxpáttaami iga anicpa España. ²⁵ Pero siip anicpa Jerusalén. Nicpa anyoxpát jém tantiwitam, jém icupicneyajwip Jesucristo. ²⁶ Porque jém Dios ipixiñtam jém ityajwip jém naxyucmi de Macedonia y Acaya ijisyajpa iga in tuumawatyajpa tumiñ iga icutsadáypa jém tantiwitam, jém yaachayajpáppic jém atebet Jerusalén. ²⁷ Agui maymayyaj iga wiap iyoxpátayaj. Ich animpa iga witim porque jém Jerusalénpic pixiñtam tsam iyoxpátim jém tungac pixiñtam jém dapic je de Israel. Ichiiyaj jém wibic anmati. Jesic wi siiga jém tungac pixiñtam iyoxpátpa jém Jerusalénpic pixiñtam con jém itumiñ. ²⁸ Cuando yajpa anñijunçot yíp tumiñ, jesic anicpa España. Jesic manjoyñasáypa. ²⁹ Cuando anuc jemíc jut miifta, anwijodon iga tsam tawiwadaytampa jém tánOmí Jesucristo.

³⁰ Siip mantiwitam, iga tsam incupicpa tánOmí Jesucristo y Dios iAnama michiita jém wibic tóyooyi, mançunucsáypa iga anwejpádaytaami Dios para aich con itumpiy impimi. ³¹ Wágaayi Dios iga aciapudiñ iga jém dapic icupicyajpa Cristo jém naxyucmi de Judea da wiap amalwadáy. Ansunpatim iga jém tantiwitam, jém itwip Jerusalén, ipictsonyajiñ jém xaja jém siippic ananigáypa. ³² Jesic siiga Dios ixunpa iga anicpa jemíc, agui amaymayap cuando manixpa mimichtam y ajeipatim con mimichtam. ³³ Siip tanjatun Dios, jém tachiipáppic jém wibic jixi tánanamanjom, miyoxpátamiñ mimichtam. Amén.

16

Anquímuyajtap jém Pablo iamigoyaj

¹ Siip manañquimpa iga inwipictsonotámiñ jém tanyomtíwi jém Febe, jém icuyoxapáppic idic jém Dios ipixiñtam jém atebet Cencrea. ² Wipictsonataami yíp yomo jém tánOmí Cristo

iñiyimi juuts siempre jém Dios ipixiñtam iwipictsonyajpa jém itiwitam. Yoxpáttaami, chiitaami titam itogóyáy. Porque yíp yomo tsam iyoxpát wati jém tantiwitam, tsam ayoxpátim mex aich.

³ Dioschitaami jém Priscila con jém iwidaya Aquila. Anwaganayoxata cuando anwatta jém Jesucristo iyoxacuy. ⁴ Jeeyaj aciactput jém ánenemigoyaj icijom hasta por uxañ accaataptim mex jeeyaj. Siip ich, con itumpiy jém Dios ipixiñtam, jém dapic je de Israel, annímaytámpa iyucuidios jém Priscila y Aquila iga tsam ayoxpát. ⁵ Dioschitaamitim itumpiy jém Dios ipixiñtam jém antuumayajpáppic jém Priscila y Aquila iticim. Watidioschi jém tantiwí Epeneto, jém tsampic antoypa, jém mojawip icupic Cristo jém naxyucmi de Asia. ⁶ Dioschitaami jém Malía, jém tsampic pimi yoxap mimichtámanjom. ⁷ Dioschitaami jém Andrónico y Junias jém anticmipic pixinñtam. Awagapajtamta cárcel con jeeyaj. Agui wíap iwatyaj jém apóstol iyoxacuy. Icupicneyaj jém Cristo antes que danam ancupicne aich.

⁸ Dioschitaami jém Amplias jém wibic ánamigo porque icupicnetim Cristo. ⁹ Dioschitaami jém Urbano jém ancompañero, anwagacuyoxata jém Cristo. Watidioschi jém ánamigo Estaquis, jém tsampic antoypa. ¹⁰ Dioschitaami jém Apeles jém tsampic cutitsta siiga numa icupicne Cristo. Watidioschijaj jém ityajwip jém Aristóbulo iticim. ¹¹ Dioschitaami jém Herodión, jém anticmipic pixinñ, con jém ityajwip jém Narcisco iticim, jém icupicneyajwip tánomi Cristo. ¹² Dioschitaami jém Trifena y Trifosa, jém tsampic iwatyajpa jém Dios iyoxacuy. Watidioschitaami jém Pérsida jém tantoypáppic. Agui pimi icuyoxap jém tánomi. ¹³ Dioschitaami jém Rufo jém tsampic wíap con jém iapa. Jém yomo tsíytim juuts ich ánapa. ¹⁴ Watidioschijaj jém Asíncrito, jém Flegonte, jém Hermas, jém Patrobas, jém Hermes con itumpiy jém tantiwitam jém ityajwip con jeeyaj. ¹⁵ Dioschitaami jém Filólogo y Julia, jém Nereo con jém iyomtíwi, jém Olimpás con itumpiy jém Dios ipixiñtam jém ityajwip con jeeyaj.

¹⁶ Nadioschitamtajaj mimichtam con tum anacatsuuchi juuts iwatyajpa jém Cristo ipixiñtam. Itumpiy jém Dios ipixiñtam jém antuumayajpáppic jutinqej micutsadáypa watidios.

¹⁷ Siip mañcunucsáypa, mantiwitam, iga ixpictaami jém pixinñtam jém nawéctapáppic jém Dios ipixiñtam. Inmatyajpa jém migooyi jém dapic jex juuts jém incuyujcanewip mimichtam. Odoy waganasiyaji jeeyaj. ¹⁸ Jexpic pixinñtam da icuyoxayajpa jém tánomi Jesucristo. Tsam imétsyajpa titam icusúnyáypa iyaac. Agui wíap inmatyaj juuts tum wibic pixinñ hasta imigóyáypa jém tantiwitam, jém dapicnam iwícupicne jém Dios inmati. ¹⁹ Jut quej jodónatá iga mimichtam tsam incupictámpa jém wibic anquímayooyi. Jeeyucmi agui amaymay con mimichtam. Ansunpa iga mijixiytámiñ iga inwíwattámiñ. Ansunpa iga michíypa juuts tum tsixi, jém dapicnam wíap imalwat. ²⁰ Jém tanjatun Dios da ixunpa iga itpa jém pleito. Da jáyñe iccutinpa jém Wocciwiñ hasta naxyucmi iga michtam wíap incunepquet con jém impuy. Siip tánomi Jesucristo miwíwadaytámiñ.

²¹ Micutsadaytámpa watidios jém Timoteo, jém anwaganayoxapaap. Midioschitamtoobatim jém Lucio, jém Jasón y jém Sosípater, jém anticmipic pixinñtam.

²² Ich aTercio, ançimi manjáyáypa yíp toto iganam apimíypa jém Pablo. Mañcutsadáypam watidios inñtumpiytam jém tánomi Cristo inñiyimi.

²³ Micutsadáypatim watidios jém Gayo, jém anucsayñewip itic. Jemtim antuumayajpa jém Dios ipixiñtam. Midioschitámpatim jém tantiwí Cuarto y jém Erasto, jém tesorero de yíp atebet.

²⁴ Siip jém tánomi Jesucristo miwíwadaytámiñ mimichtam inñtumpiytam. Amén.

Juumi núc jém wibic anmati

²⁵ S̄ip taṇcujíptámpa jém tanJatun̄ Dios. Je wiap̄ miwatta cuenta iga odoy iñchactámiñ iga in̄cupictámpa Jesucristo. Tanjodon̄ iga wiap̄ porque asíam̄ n̄impa jém wibic̄ aṇmaṭi, jém ichpic̄ anaṇmatpa, jém Jesucristo in̄químayooyi, jém sīppic̄ Dios taṇquejayñe. Aṇécne idic̄ yíp̄ aṇquímayooyi dende wiñigam̄ antes que Dios iwat̄ yíp̄ nas. ²⁶ Pero s̄ip̄ taṇquejayñeum̄ con jém Dios in̄maṭi, jém ijaychacnew̄ip̄ jém wiñicpic̄ aṇmatcīwiñ, porque asíam̄ ip̄im̄íy tanJatun̄ Dios, jém dapic̄ nunca cuyajpa. S̄ip̄ itump̄iȳ p̄ixiñtam̄ icuw̄iti yíp̄ naxyucmī ijodón̄ayajum̄ jém cosa, jém dapic̄ idic̄ ī ijodon̄, iga icupicyajiñ̄ Cristo, iga iwatyajiñ̄ juuts̄ n̄impa jém Cristo in̄químayooyi.

²⁷ S̄ip̄ taṇcujíptámpa jém tanJatun̄ Dios jém tump̄ic, jém tsampic̄ j̄ixīiy. Taṇcujíptámpa para siempre porque tánixpictámpa jém tánQ̄mi Jesucristo. Amén. Jemum̄ cuyaj.

Jém wiñtipic carta jém ijáyayñewiip Pablo jém Corintopic pixiñtam

Jém Pablo ijáyaypa jém Dios ipixiñtam jém attebet Corinto

¹ Ich aPablo. Dios añwejay iga atsiy juuts tum apóstol. Acutsat iga nicpa anañmat jém tánQmi Jesucristo inmati. Asiam iwianjam Dios. Siip ich con jém tantiwí Sóstenes manjayaytampa mimichtam, ² jém miñtuumatampáppic iga inñistampa Dios jém attebet Corinto. Mimichtam Dios mimichitam porque Cristo micujicháyáy inanama. Dios miñwejayta iga michiytamiñ juuts je mimichi, wicuáyñeum inanama. Imichitim itumpiy jém pixiñtam jém inwejpátyajpáppic Dios jém tánQmi Jesucristo iniyimi porque jém Cristo imichapitim jém tungac pixiñtam jextim juuts taichtam. ³ Siip jém tanjatun Dios y jém tánQmi Jesucristo miwíwadaytamiñ, michiitamiñ paz.

Jém tánQmi Cristo tsam tawíwadáypa

⁴ Siempre anchiiba gracia Dios para mimichtam iga Dios miwíwadayne cuando moj incupic jém Jesucristo. ⁵ Dios michiiba itumpiy jém wítampic riqueza porque Cristo mimichitam. Miyoxpáttampa iga wíaiñ ininmat parejo jém Dios inmati. Miyoxpáttampatim iga inwicutiyiyiñ itumpiy jém wibic jixi. ⁶ Manacjodónata ti wiap miwadáy jém Cristo y jempigam inñasca. ⁷ Dios michi itumpiy jém wítampic xaja iga odoy ti mitogóyayíñ iganam ininjóctampa jém jama cuando miñgacpa jém tánQmi Jesucristo. ⁸ Dios mimatspacpa icijom iga odoy inchaguiñ jém Dios inmati hasta jém inañpigam jama. Jesic da i wiap miñimáy iga mitañcaiy jém jama cuando miñgacpa jém tánQmi Jesucristo. ⁹ Jém tanjatun Dios siempre iccupacpa juuts tajycamayne. Iyaac miñwejayta iga miwaganaittampa jém Dios imanic jém tánQmi Jesucristo.

Nawécyajta jém Dios ipixiñtam

¹⁰ Siip, mantiwitam, michtam jém tánQmi Jesucristo mimichitam, jeeyucmi mancunucsaypa iga miittamiñ de acuerdo iga odoy miniwéctamtaiñ. Más wí iga inwinanigaytamiñ itumpiy jém tantiwitam. Ansunpa iga iniittamiñ tumti jixi y tumti inanama. ¹¹ Mannimáypa jempic, mantiwitam, porque jém Cloe itiwitam anímayyay iga tsam it pleito entre mimichtam. ¹² Siip mannimáypa iga cada tumtum de mimichtam miñimtampa tungac cosa. Tum nimpá iga: “Ich antúníyipa jém Pablo.” Tungac nimpá iga: “Ich antúníyipa jém Apolos.” Tungac nimpá iga: “Ich antúníyipa jém Peto.” Tungac nimpá iga: “Ich antúníyipa jém Cristo.” ¹³ ¿Que wécne jém Cristo? ¿Que cunúnta cunusyucmi jém Pablo para mimichtam? ¿Que micchintamta mimichtam jém Pablo iniyimi? ¹⁴ Anchiiba gracia Dios iga da manacchiñe ni tum de mimichtam, solamente jém Crispo y jém Gayo. ¹⁵ Jesic da i wiap inñim iga acchiñnetá ich anniyimi. ¹⁶ Anacchiñtim jém ityajwip jém Estéfanos iticciim. Da anjispá siiga anacchiñe tungac más. ¹⁷ Ich da acutsat jém Cristo iga acchínóyipa. Acutsat iga anañmadayíñ jém pixiñtam jém wibic añmati iga Dios iciacputpa. Pero da anañmatpa con jém añmati jixiywip, jesic da i wiap inñim iga da ti cuwatcuy iga accaata cunusyucmi jém Cristo.

Cristo je jém Dios ipimi y jém Dios ijixi

¹⁸ Jém togoyñeyajwip ijsyaypa iga da para ti wí jém añmati iga accaata Cristo cunusyucmi. Pero taichtam, jém taciaputnewip Dios, tanjodon iga yíp añmati tsam iniit jém Dios ipimi. ¹⁹ Porque nimpá jém Dios inmati jém jayñewip:

Anaccuyajáypa jém sabioyaj ijixi.
Anactogóyáypa jém jixiywíip ijixi.

²⁰ Jesic da para ti wí jém sabioyaj, ni jém tsampic wícuyujne, ni jém aguipic wíap inmat yíp naxyucmipic jixi. Porque Dios ichac iga tsam cuixi jém iniitwíip yíp naxyucmipic jixi, porque yíp jixi da tayoxpátpa, da tacnúcpa jut it Dios. ²¹ TanJatun Dios ijodon itumpiy cosa. Jeeyucmi nimpá Dios iga jém pixiñtam da nunca wíap ipát Dios ijiximi. Iwianjam Dios iga iciacputyajpa jém pixiñtam siiga icupicyajpa jém inmatpáppic jém Dios inmati. Jeetim anmati, jém nimyajpáppic iga da para ti wí.

²² Jém Israelpic pixiñtam siempre iixyajtooba tum milagro como seña. Jém griegopic pixiñtam siempre imétsyajpa iga icutiyyiyajiñ yíp naxyucmipic jixi. ²³ Pero taichtam tanañmadáypa jém pixiñtam iga accaata jém Cristo cunusyucmi. Jém Israelpic pixiñtam tsam pími ijóyixyajpa yíp anmati. Jém tungac pixiñtam jém dapic je de Israel nimyajpa iga da para ti wí. ²⁴ Pero itumpiy jém pixiñtam jém icupineyajwíip Dios, siiga Israelpic pixiñtam o dapic je de Israel, ijodonayaj iga jém tánomi Cristo iniit itumpiy jém Dios ipimi y iniit itumpiy jém Dios ijixi. ²⁵ Nimyajpa jém pixiñtam, jém dapic icupicpa Dios inmati, iga jém Dios ijixi da para ti wí. Pero jém Dios ijixi más wí que itumpiy jém pixiñtam ijixi. Nimyajpatim jém pixiñtam iga jém tanJatun Dios da iniij ipimi, pero je más iniit ipimi que itumpiy jém pixiñtam. ²⁶ Jesic, mantiwítam, jistaami juutspic mipixiñ idic cuando tanJatun Dios minwejay. Da wati de mimichtam tsam inwicutiyyitámpa yíp naxyucmipic jixi. Da wati de mimichtam tsam miwíap. Da wati de mimichtam mijpic anjagooyi jém injatun. ²⁷ Pero tanJatun Dios icupin jém pixiñtam jém dapic jixiy iga ichaawatpa jém jixiywíppic. Icupin jém pixiñtam jém dapic ti wíap iwat iga ichaawatpa jém tsampic wíap. ²⁸ Dios icupin jém pixiñtam jém dapic iwíixpa jém itwítam. Icupin jém pixiñtam jém tsampic jóyixtáp. Icupin jém pixiñtam jém dapic para ti wí. Jesic con jeeyaj Dios icoñwíypa jém pixiñtam jém tsampic wíap. ²⁹ Jempam iwat Dios iga odooy i wíaiñ inicujípta iyaac jém tanJatun Dios iwiñjom. ³⁰ Pero Dios mismo micupineta iga michiytamiñ juuts jém Jesucristo mimichitam. Ixunpatim Dios iga jém tánomi Cristo michiitamiñ jém más wibic jixi. Tayojáytim tantánca iga wíaiñ tanúc jut it Dios. Tacujicháyayta tánanama y taciacputneum. ³¹ Jeeyucmi nimpá así jém Dios inmati jém jayñewíip: “Odooy nacujíptaji iñyaac. Más wí iga inucujíptamiñ tanJatun Dios porque tsam miwíwadayne.”

2

Inmatpa jém Pablo iga accaata cunusyucmi jém Cristo

¹ Mantiwítam, cuando oy manañmadáy ti iwat Dios, da manañmadáy jém miltampic anmati ni miltampic jixi. ² Jesic cuando jáy aiti con mimichtam anjísipa iga da ti más manañmadáy, solamente manañmadáy jém tánomi Jesucristo inquímayoooyi iga accaata jém Cristo jém cunusyucmi iga tayojáy tantánca. ³ Cuando tawagait con mimichtam, casi da ti wíap anwat. Tsam acinpa, acuetsáypa. ⁴ Da manañmadáy jém miltampic anmati juuts inmatyajpa jém pixiñtam jém dapic icupicyajpa Dios. Pero cuando oy manañmadáy jém Dios inmati, quejpa iga tsam ayoxpátpa jém Dios iAnama. Tsam achiiba jém Dios ipimi. ⁵ Mimichtam da incupictámpa Cristo porque iga inwianjamta jém pixiñtam ijixi, pero incupictámpa Cristo porque Dios minquejay jém ipimi.

Dios iAnama tayoxpátpa iga wíaiñ tancutiyyiy jém Dios inmati

⁶ Pero anañmatpa jém tsam wibic jixi entre jém icupicneyajwíip parejo jém Dios inmati. Yíp da jex juuts jém jixi jém iniitwíip jém sabioyaj jém yíppic naxyucmi. Datim jex juuts

yíp naxyucmipic anjagooyiyaj ijixi jém dapic jáyñe cuyajpa. ⁷ Pero ananmattámpa jém jixi jém achiiñewiip Dios, jém dapic i wiap ijodóna porque anécne idic jém jixi. Dios ijis dende wiñic antes que iwat yíp nas. Nimpa iga cuando núcpa jém jama, tachiitámpa jém vida jém dapic cuyajpa. ⁸ Ni tum jém mijpic anjagooyiyaj yíp naxyucmi da icutiyyíypa jém anmati jém anécnewiip, meega icutiyyíypa, jesic da iccaayajpa cunusyucmi jém tánomi Jesucristo jém Miññewiip Sinyucmi. ⁹ Asíam nimpa jém Dios inmati jém jayñewiip: Da i iix, ni da i imaton, ni datim i icutiyyíypa ianamanjom titam ijspa Dios iga tachiitámpa.

¹⁰ Pero Dios icutsat iAnama iga tacjodónata titam tachiiba. Porque Dios iAnama iwicutiyyíypa itumpiy cosa. Numa icutiyyíypa itumpiy jém Dios ijixi jém más mijpic.

¹¹ Entre jém pixiñtam da i wiap icutiyyíy ti ijspa tungac pixiñ ianamanjom, solamente jém pixiñ iyaac ijodon ti ijspa ianamanjom. Jesaptim solamente jém Dios iAnama ijodon itumpiy jém Dios ijixi. ¹² Taichtam da tampictsoneta yíp naxyucmipic jixi, pero tampictsoneta jém Dios iAnama iga tancutiyyítamiñ titam tachiiba Dios porque je da malo. ¹³ Y aichtam siip ananmadáypa jém pixiñtam titam tachiiba Dios. Da ananmatpa con yíp naxyucmipic jixi, pero ananmatpa con jém jixi jém achiiñewiip Dios iAnama. Ananquejáypa Dios inmati jém pixiñtam jém iniitwiip jém Dios iAnama, jesic wiap icutiyyíypa.

¹⁴ Pero jém pixiñ jém dapic ini jém Dios iAnama da imatontooba titam tanquejáy jém Dios iAnama porque jexpic pixiñ ijspa iga da para ti wi yíp anquímayooyi, datim wiap icutiyyíy. Siiga Dios iAnama da iyoxpátpa, da wiap icutiyyíy jém Dios inmati. ¹⁵ Pero jém pixiñ jém iniitwiip jém Dios iAnama ijodon jup jém wibic jixi y jup jém malopic. Pero da i icipinpa jém pixiñ. ¹⁶ Nimpa jém Dios inmati jut jayñeta: “Da i wiap icutiyyíy jém tanjatun Dios ijixi. Da i wiap ijixianchiyy Dios porque je más wiap que itumpiy jém pixiñtam.” Pero taichtam tanaidáy jém tánomi Jesucristo ijixi.

3

Wagayoxayajpa jém Dios iyoxacwiñ

¹ Siip, mantiwitam, da wiap mananmadáy itumpiy jém Dios inmati juuts jém iniitwiip jém Dios iAnama. Mananmadáypa juuts jém pixiñtam jém dapic cucacne ijixi. Mimichtam mijextam juuts jém pixiñtam cuando yaguiñ icupicpa jém Cristo, juuts jém xuxut tsixtam. ² Mananquejáypa jém anmati dapic tánca iga waiñ incutiyyíy porque mijex juuts tum xutu tsixi jém tsútspáppicnam. Michtam da wiap incút jém wíccuy jém tachiipáppic pimi. Hasta siip da wiap incúta. ³ Danam iñchacneta jém malopic jixi, tsam iniit jooya iñanamanjom. Tsam mínatámpa. Tsam miniwéctamtap. Quejpa iga da iñchacne jém malopic jixi. Inwattámpa mal juuts jém pixiñtam jém dapic icupicneyaj Cristo. ⁴ Cuando tum de mimichtam miñmpa iga: “Ich antúníypa jém Pablo” y tungac nimpa iga: “Ich antúníypa jém Apolos”, jesic quejpa iga síp inwatta juuts jém pixiñtam jém dapic icupicpa jém Cristo.

⁵ ¿Que iapaap jém Pablo? ¿Que iapaap jém Apolos? Aichtam no más manyoxpáttámpa iga incupictamiñ Cristo. Cada tum tum de aichtam anwattámpa juuts anquejayta jém tánomi Jesucristo. ⁶ Ich añip tum pac. Jém Apolos imujpa. Pero Dios icmijap jém planta. ⁷ Da ti jém iñippáppic jém pac ni datim ti jém imujpáppic, pero tanjatun Dios wiap icmijap jém planta. ⁸ Jém ñippáppic y jém imujpáppic icuistic jextim. Dios iyojpa cada tumtum según jém iyoxaji. ⁹ Aichtam ancuyoxatámpa Dios. Mimichtam mijex juuts jém Dios iñas iga Dios síp iyoxaca. Michtam mijex juuts tum tic jém Diospic síp iwat. ¹⁰ Dios tsam ayoxpát iga waiñ anwat jém yoxacuy. Ich atsíy juuts tum maestro albañil. Ich antsajpa

jém base jut p̄im̄ap jém tic an̄taana. Jesic tun̄gac yoxac̄iwiñ icteñ̄pa jém tic jém baseyucmi. Ich ansunpa iga cada tumtum jém yoxac̄iwiñ iwadiñ cuenta iga w̄ipudiñ jém iyoxacuy. ¹¹ Da i w̄iap iwat tun̄gac base jut p̄im̄ap jém tic que jém watnetaw̄ipp̄igam. Jém base je jém Jesucristo mismo. ¹² Tum p̄ixiñ w̄iap iwat jém tic jém baseyucmi de jém oro y plata y jém w̄ibic tsaayaj. W̄iap̄tim iwat jém tic de waycuy, de sóc y de jém p̄ocyaj. ¹³ Pero núcpa jém jama cuando tan̄jatun̄ Dios ic̄ip̄in̄pa jém tanyoxaji. Icutitspa con jucti, jesic quejpa siiga tan̄w̄iwatne o da tan̄w̄iwatne. ¹⁴ Siiga tanyoxaji iyaach̄iypa jém jucti, jesic tayōjtap porque w̄iput jém tanyoxaji. ¹⁵ Siiga jípsquetpa tum p̄ixiñ iyoxaji, togoypa itump̄iy jém iyoxaji. Por uxan̄ jípsquetpatim mex je, pero c̄iputpa.

¹⁶ ¿Que michtam da in̄jodon̄tam iga mijextam juuts tum Dios im̄astic? Jém Dios iAnama it in̄anaman̄jom. ¹⁷ Siiga i im̄iswatpa jém Dios im̄astic, jesic Dios ichiiba tum m̄ip̄ic castigo hasta iccaan̄spa jém p̄ixiñ. Porque cuáyñeum jém Dios im̄astic, da i t̄an̄ca. Mimichtam jém Dios mim̄astic.

¹⁸ Odoy namigóyaȳtaji in̄yaac. Siiga tum p̄ixiñ ij̄ispa iga tsam̄ j̄ixīy, jesic namigóyaȳtap iyaac. Más w̄i iga ts̄iypa jém p̄ixiñ juuts tum p̄ixiñ da ti w̄iap, jesic Dios ichiiba jém w̄itamp̄ic j̄ixi iga numa w̄iañ icut̄īȳy itump̄iy cosa. ¹⁹ Dios n̄impa iga da para ti w̄i jém p̄ixiñtam ij̄ixi jém itw̄ip̄ ȳip naxyucmi. N̄impa así jém Dios in̄mati jém jayñetaw̄ip̄: “Dios icon̄w̄iypa jém sabioyaj, con jeetim ij̄ixi iccut̄in̄pa.” ²⁰ Nimpatim jém Dios in̄mati: “Dios ij̄odon̄ ti ij̄isyajpa jém sabioyaj. Ij̄odon̄ iga da para ti w̄i jém ij̄ixi.” ²¹ Jeeyucmi mann̄im̄áypa iga odoy j̄isi in̄anaman̄jom iga agui w̄ibic mip̄ixiñ iga in̄t̄un̄j̄iypa algun pastor. J̄odon̄ataami iga itump̄iy cosa michtam imm̄ichi. ²² Dios michiita jém Pablo, jém Apolos y jém Peto iga miyoxp̄atpa. Imm̄ichit̄im itump̄iy jém Dios iw̄ati. Siiga mivivo o micaaneum, siiga sīip o joymi, itump̄iy cosa michtam imm̄ichitam. ²³ Y mimichtam jém tán̄omi Cristo mim̄ichitam. Y jém Cristo je jém tan̄jatun̄ Dios im̄ichi.

4

Jém apóstol iyoxacuy

¹ Ansunpa iga jém p̄ixiñtam icut̄īȳȳyajiñ iga ichtam an̄cuyoxat̄ampa jém tán̄omi Cristo. Acutsattam̄ta iga anan̄matt̄amiñ jém an̄mati de Dios jém an̄nécn̄ew̄ip̄ idic. ² Cuando chiita tum p̄ixiñ algun cargo siempre ixunpa jém iomi iga iw̄iwadiñ jém p̄ixiñ juuts ixunpa jém iomi. ³ Ich da an̄wad̄áypa caso siiga michtam o cualquier p̄ixiñ ac̄ip̄in̄pa siiga an̄w̄iwatpa o da. Ni aich datim anac̄ip̄in̄tap anyaac. ⁴ Da an̄jampa an̄jixian̄jom iga ammalwatne, pero da an̄impa iga da at̄an̄cāiy. No más jém tán̄omi Jesucristo w̄iap ac̄ip̄in̄. ⁵ Jeeyucmi mann̄im̄áypa, odoy n̄imi iga tum p̄ixiñ t̄an̄cāiy hasta jém jama cuando miñgacpa jém tán̄omi Cristo. Jesic iyicquejpa itump̄iy cosa jém an̄nécn̄ew̄ip̄ piichc̄im. An̄quejtap jém p̄ixiñtam ij̄ixi jém itw̄ip̄ in̄aman̄jom. Jesic Dios icuj̄iypa itump̄iy jém p̄ixiñtam jém iw̄at̄ajp̄app̄ic juuts ixunpa Dios.

⁶ Mant̄iw̄itam, mann̄im̄áypa así iga manyoxp̄atpa. Ats̄iypa juuts tum ejemplo con jém Apolos iga in̄jodon̄at̄amiñ jutsap in̄watta juuts n̄impa jém Dios in̄mati jém jayñew̄ip̄. Porque da w̄i siiga tsam̄ in̄cuj̄ipt̄ampa tum accuyujoypaap y tun̄gac accuyujoypaap in̄j̄oyix̄t̄ampa. ⁷ ¿I miñim̄áy iga más w̄ibic mip̄ixiñ que jém tun̄gac? ¿Que da in̄j̄ispa iga Dios michiñe itump̄iy cosa jém iniitw̄ip̄? ¿Jesic tiiga minicuj̄ipt̄ap in̄yaac juuts mich mismo in̄j̄ispa iga impict̄son̄ne in̄yaac titam michiñe Dios?

⁸ Mimichtam in̄j̄ist̄ampa iga tsam̄ miricotam iga iniitta itump̄iy cosa jém in̄w̄ian̄jamp̄app̄ic. In̄j̄ispatim iga mijextim juuts tum rey. Asíam in̄watt̄ampa cuando da āita con mimichtam. Agui numa w̄i meega mirey, jesic tan̄wagaan̄jacpa ȳip naxyucmi. ⁹ Pero aichtam, jém aapóstoltam, Dios atsacta tuuñian̄c̄im juuts acaatooba. Aixyajpa

jém sinjucmipic pixiñtam y jém ityajwip yíp naxyucmi. ¹⁰ Ijisyajpa jém pixiñtam iga agui acuixitam porque anañmattámpa jém Cristo inqúimayooyi. Mimichtam inñispa iga tsam inwicutiñiyipa jém Cristo inqúimayooyi. Aichtam atsiyítámpa juuts da ti awiap, pero mimichtam inñistámpa iga agui miwiatámpa. Aichtam tsam ajóyixtamtap, pero michtam tsam miwixtámpa jém pixiñtam, jém dapic icupicyajpa Cristo. ¹¹ Hasta siip aichtam ayuatámpa, aníctitstámpa, yajtooba jém anyooti, pimi acótstamtap, da anaíta antic. ¹² Ayoxatámpatim ciimi hasta pimi asopstámpa. Tsam amalmalnimaytamtap, pero da anácseedaytámpa, mas añwagáypa Dios iga iwíwadáyíñ jém amalnimayyajpáppic. Cuando pimi amalwadaytamtap, anyaachiytámpa. ¹³ Jém pixiñtam inmatyajpa malopic cuento de aichtam, pero chocoyi anañiyjactámpa. Ninyajpa iga da ti acuwatcuy. Hasta siip atsiyítámpa juuts tum puchi jém ipatsayyajpáppic jém pixiñtam.

¹⁴ Da manjáyáypa iga mantsaawattámpa, pero manjáyáypa juuts mammanictam. Manchiitámpa jixi porque tsam mantoytámpa. ¹⁵ Aunque iniitta tsam jáyan jém maestroyaj, jém minquejaypáppic jém Cristo inqúimayooyi, tanjodon iga nada más tum jém injatun. Michiytámpa juuts mammanictam porque mammaniga cuando oy manañmadayta jém Cristo inqúimayooyi. ¹⁶ Jesic mancunucsóypa iga inwattamiñ juuts ich añwatpa.

¹⁷ Jeeyucmi mancutsadáypa jém Timoteo jém tsampic antoypa porque je tsíy juuts tum annuntamanic cuando icupic jém Cristo. Je micjístámpa jutsap añwat juuts ixunpa jém Cristo. Yiptim añqúimayooyi anañquejayñe icuwiti yíp naxyucmi jut Dios ipixiñtam añtuumayajpa. ¹⁸ Algunos de mimichtam tsam minicujíptap inyaac. Inñistámpa iga da eybic nicpa mánámta. ¹⁹ Pero da jáyñe nicpa mánámta siiga Dios ixunpa. Nicpa anámcoñwiy jém pixiñtam jém tsampic nacujíptap iyaac. Ánixtooba siiga numa wíap iwatyaj juuts ninyajpa cuando nacujíptap iyaac. ²⁰ Tsam wiquejpa jut injacpa Dios jém pixiñtam porque jém wibic añqúimayooyi da naps jiyi, pero iniittim Dios ipimi. ²¹ ¿Jesic ti inwianjamta? ¿Que inxunpa iga miñpa manchiita castigo? ¿O inwianjamta iga chocoyi manañmadáypa con jém wibic tóyooyi?

5

Jém Pablo icipin jém pejoypáppic

¹ Anjodónaneta iga tum de michtampic ichayane jém ichiñapa. Tsam pimi imalwatne hasta tum de jém pixiñtam, jém dapic icupicyajpa Dios, datim iwianjam iga iwatpa jempic. ² ¿Tiiga tsam minicujíptap inyaac? Más wí iga minyáctamiñ. Quebacputtaami jexpic pixiñ mimichtamanjom. ³ Numa, da manwaganaitta con ammitay, pero manwaganaitta con ánanama. Siip añcipin neum jém pixiñ jém pejoypáppic juuts jesic manwaganaitta. Wí iga chiitap castigo. ⁴ Mimichtam añtuumataami jém tánomi Jesucristo inñiyimi con jém Jesucristo ipimi. Ich manwaganaittim con ánanama. ⁵ Jesic quebacputtaami jém malopic pixiñ. Cijunçoti jém Wocciwiñ icijjom iga imiswadáyíñ jém imijtay. Jesic cuando miñgacpa jém tánomi, iciacpudáypa jém íanama.

⁶ Da wí iga minicujíptap inyaac porque tsam immalwatne. ¿Que da injodon iga uxaj levadura icpípa itumpiy jém jaapi? ⁷ Jesic patsaytaami jém pecapic levadura jém mimalwadaypáppic, tsíytaami como jém jomipic jaapi, juuts jém caxtánañi jém watnewip sin levadura, jém icútyajpáppic jém pascuasij. Porque accaata jém Cristo iga tayojoyta tantanca, jesaptim juuts jém mañborrego jém accaatapáppic jém pascuasij. ⁸ Jesic tasíñatámpa jém pascuasij con jém caxtánañi jém dapic inij levadura. Tampictámpa jém wibic jixi, jém dapic miçoooyi, jém dapic motne con jém pecapic levadura. Yíp nimtooba itumpiy jém malopic jixi.

⁹ Jém tungac toto manjáyayñe iga mannímáy iga odoy waganasii tum p̄ixiñ siiga n̄impa iga icupicpa Cristo, pero pejóypa. ¹⁰ Ich da animtooba iga iññuntatsagan̄pudiñ jém malopic p̄ixiñtam, jém pejoyyajpáppic, jém tsampic icusúniyyajpa jém it̄iwitam im̄ichi, jém númyajpáppic, jém ijisyajpáppic jém watnas, porque siiga tannuntatsagan̄putpa itumpiy jexpic p̄ixiñtam, tienes que taputpa yíp naxyucmi porque jutquej it jém malopic p̄ixiñtam. ¹¹ Pero siip manjáyáypa iga mannímáypa, odoy waganasii taami tum p̄ixiñ jém nimpáppic iga icupicpatim Cristo siiga pejóypa jém p̄ixiñ, siiga icusúniypa jém tungac p̄ixiñ im̄ichi, siiga ijisyajpa jém watnasyaj, siiga tsampic an̄atero, siiga tsam ucpa o siiga númpa. Da w̄i iga tanwaganawíctampa jexpic p̄ixiñtam. ¹²⁻¹³ Porque ich da i accámne juuts tum juez iga an̄cipin̄pa jém p̄ixiñtam jém dapic icupicyajpa jém Cristo. Tanjatun̄ Dios ic̄ipin̄pa jexpic p̄ixiñtam. Pero mimichtam w̄iap in̄cipin̄ta jém p̄ixiñtam jém icupicneyajw̄ip jém Cristo. Jeeyucmi mannímáypa iga toptaami jém malopic p̄ixiñ jém itw̄ip con mimichtam.

6

Jutsap tanw̄itsac jém pleitoyaj

¹ Siiga tum de mimichtam iniit algun pleito con tungac jém tant̄iw̄i, ¿que da michaap iga in̄ñapa jém tant̄iw̄i jém anjagooyicim̄ jut it jém anjagooyi jém dapic icupicpa Dios? Más w̄i iga in̄w̄itsacpa jém pleito con jém Dios ip̄ixiñtam. ² ¿Que da in̄jodon̄tam iga núcpa jém tiempo iga jém Dios ip̄ixiñtam ic̄ipin̄yajpa yíp naxyucmic̄ic p̄ixiñtam? Siiga in̄cipin̄tampa jém p̄ixiñtam, jém ityajw̄ip yíp naxyucmi, ¿jesic tiiga da w̄iap in̄w̄itsac tum pleito dapic juchan̄? ³ ¿Que da in̄jodon̄tam iga núcpa jém jama iga tan̄cipin̄patim jém sin̄yucmic̄ic p̄ixiñtam? Jesic tiiga da más w̄iap tanw̄itsac tum asunto jém siippic it. ⁴ Siiga michtam iniit algun pleito, ¿tiiga miñictampa jém anjagooyicim̄ iga in̄w̄itsacpa? Porque jém anjagooyiyaj da ti cuwacuy para con jém Dios ip̄ixiñtam. ⁵ Mannímáypa iga michaatámiñ mimichtam. ¿Que da i ni tum de mimichtam jém w̄iapaap iw̄itsac jém pleito? ⁶ ¿Tiiga in̄quejajwadáypa tum jém tant̄iw̄i jém anjagooyicim̄? Porque jém anjagooyiyaj da icupicneyaj Cristo.

⁷ Cuando in̄wattámpa jempic, quejpa iga da capsne in̄cupic jém Dios in̄mati. Da w̄i iga miniquejajwadaytam̄tap con jém tant̄iw̄itam. Más w̄i iga in̄yaachiyiñ iga mimalwadaytam̄ y iga micunúmaytam̄tap. ⁸ Pero mimichtam in̄yaac immalwadaytampa jém tant̄iw̄itam, in̄cunúmaytampatim.

⁹ ¿Que da in̄jodon̄tam iga jém malopic p̄ixiñtam da w̄iap itigiyay jut in̄jacpa Dios? Odoy j̄ici iga i mimigóyáypa. Da w̄iap itigiyay jut in̄jacpa Dios jém pejoyyajpáppic, ni jém ijisyajpáppic jém watnas, ni jém iyamtsaayapaap tum yomo o tum woñi, ni jém p̄ixiñ jém tsíypaap juuts yomo, ¹⁰ ni jém númyajpáppic ni jém icusúniypáppic tungac p̄ixiñ im̄ichi, ni jém tsampic ucyajpa, ni jém imotsyajpáppic jém it̄iwitam, ni jém imalwadaypáppic. Jeeyaj da tigiyajpa jut in̄jacpa Dios. ¹¹ Algunos de mimichtam mimalotim idic juuts jeeyaj. Pero siip miccáyaytam̄ta jém in̄t̄anca. Dios mim̄ichitam. Miw̄ipictson̄ta jém tán̄omi Jesucristo in̄iyimi, siip w̄ibigam mip̄ixiñtam. Impictson̄ta jém Dios iAnama.

Odoy tammalwadiñ con jém tammijtay

¹² Ich w̄iap an̄wat titam ansunpa, pero da itumpiy cosa tayoxpátpa. W̄iap an̄wat titam ansunpa, pero da atsíytooba juuts tum esclavo de ninguna cosa. ¹³ Numa juuts n̄imyajpa jém p̄ixiñtam: “Dios iw̄at jém wíccuy para jém tampuu. Iwattim jém tampuu para jém wíccuy.” Pero núcpa jém jama iga Dios iccuyajpa jém wíccuy y jém tampuu. Da tachiita jém tammijtay iga tammalwatpa con jém malopic yomtam. Tachiita jém tammijtay iga

tañcuyoxap tánQmi, y jém tánQmi tawadáypa cuenta jém tammijtay. ¹⁴ TanJatun Dios icpis jém tánQmi Jesucristo y taichtam tacpistamtaptim con jém Dios ipimi.

¹⁵ ¿Que da iñjodon tam iga jém tammijtay tumti con jém tánQmi Cristo imijtay? ¿Que wí iga anchiiba tum malopic yomo jém Cristo imichi iga imichap jém yomo? ¡Da wiap tanchi! ¹⁶ ¿Que datim iñjodon siiga tum pixiñ inimonpa tum malopic yomo jém pejoyppic, jesic tsíyyaj juuts tumti mijtay? Nimpa así jém Dios inmati: “Jém pixiñ y jém yomo icuistic tsíy juuts tumti mijtay.” ¹⁷ Pero cuando imichap jém Cristo tum pixiñ, jesic tumti ianama con Cristo.

¹⁸ Odoy malwati con jém malopic yomtam, poytaami. Jém tungac tánca, jém iwatpáppic jém pixiñtam, da pimi imalwadáypa jém imijtay. Pero siiga imalwatpa con jém malopic yomtam, jesic namalwadaytap iyaac jém pixiñ. ¹⁹ ¿Que da iñjodon iga jém immijtay jém Dios iAnama imastic, jém tachiñewiip Dios; jém Dios iAnama miñ iti tánanamajom? Mich immijtay da immichi. ²⁰ Porque Dios mijuy con tum wibic precio. Jeeyucmi wí iga tañcujíppa Dios con tánanama y con tammijtay porque icuistic jém Dios imichi.

7

Chiitap jixi jém pixiñtam y jém yomtam

¹ Siip mañcutsonpa titam anacwác cuando anjayáy mimichtam: Numa wí siiga da yoomíypa tum pixiñ. ² Pero iga odoy immalwadiñ, más wí iga yoomíypa cada pixiñ y jaayíypa cada yomo. ³ Jém pixiñ tienes que iwíwadáypa iyomo porque iñuntawichomo. Jém yomo tienes que iwíwadáypa iwídaya porque iñuntawídaya. ⁴ Jém yomo imijtay da imichi iyaac. Imichi jém iwídaya. Jesanetim jém pixiñ imijtay da imichi iyaac. Imichitim jém iwichomo. ⁵ Odoy natsactamtaji iga miwagamontámpa con inwichomo. Wí siiga da mipoywagamontámpa siiga miiffa de acuerdo iga ininwejpáttámpa Dios. Jesic ocmi eybictim wiap inwagamonta, siiga da wiap ininjacta iñyaac, iga jém Wocciwiñ odoy micmalwadiñ.

⁶ Ich da mampmíypa iga miyoomiytámiñ, pero Dios ijícpa iga miyoomiytámiñ siiga inwianjamta. ⁷ Ich animpa iga más wí siiga itumpiy pixiñtam jextim juuts aich iga da ayoomíy. Pero Dios ichiiba cada tum tum pixiñ jém jixi iga wiap iwat juuts ixunpa Dios. Tum pixiñ wiap iwat tum yoxacuy y tungac pixiñ tungac yoxacuy wiap iwat.

⁸ Siip anchiiba jixi jém pixiñtam jém dapic yoomíy y jém yomtam jém dapic jaayíy y jém cunoytam: Wí iga tsíyyajiñ juuts aich iga da ayoomíy. Siiga pixiñ, odoy yoomíyiñ. Siiga yomo, odoy jaayíyiñ. ⁹ Pero siiga da iyaachíypa iga ityajpa icutum, jesic wí iga yoomíyiñ. Más wí iga yoomíypa tum pixiñ que iga tsam pimi cusúníyóypa.

¹⁰ Siip mannímáypa mimichtam, jém miyoomiywíip y jém mijaayíywíip: Miyomtam odoy tsaci inwídaya. Yíp jixi da ich anjixquimi. Tanquejáy así jém tanJatun Dios. ¹¹ Siiga tum yomo ichacpa iwídaya, jesic da wiap ijaayíy con tungac pixiñ. Siiga jaayíytooba eybic jém yomo, wí iga ipicsetpa eybic jém iwídaya jém ichacnewíip. Mipixiñtam, mannímáypatim: Odoy tsaci iñyomo.

¹² Siip anañmadáypa los de más tum añquímayooyi jém dapic je tánQmi achiiñe. Siiga tum tantíwí iniit iyomo jém dapic icupícpa Cristo y jém yomo iwianjam iga iwaganaitpa jém tantíwí, jesic da wiap initsacyajta. ¹³ Jesanetim tum yomo siiga iwídaya da icupícpa Cristo y siiga iwianjam jém pixiñ iga iwaganaitpa jém iyomo, jesic da wí iga natsacyajtap. ¹⁴ Jesic jém yomo iwídaya, jém dapic icupícpa Cristo, tsíy juuts Dios imichi porque jém iwichomo icupícpa Cristo. Jesanetim jém pixiñ iwichomo, jém dapic icupícpa Cristo, tsíy juuts Dios imichi porque jém iwídaya icupícpa Cristo. Siiga Dios da ichacpa jempic, jesic jém tsixtam da tsíypa juuts jém Dios imichi, pero tanjodon iga numa Dios imichap jém

imanictam. ¹⁵ Pero siiga jém p̄ixiñ o jém yomo, jém dapic icupicpa Cristo, agui ichactooaba jém iwichomo o jém iwidaaya, jesic j̄ici iga iwatpa así. Jesic jém p̄ixiñ o jém yomo, jém icupicnewiip Cristo, iniit libertad; w̄iap ipic tunjac yomo o tunjac p̄ixiñ porque Dios tacupin iga odoy tánatamiñ. ¹⁶ ¿Porque jutsap in̄jodóna miyomo siiga w̄iap in̄ciacput jém in̄widaaya? ¿Y jutsap in̄jodóna mip̄ixiñ siiga w̄iap in̄ciacput jém in̄wichomo?

¹⁷ Pero cada tumtum de taichtam w̄iap tanwatta juuts ixunpa Dios con jém ij̄ixi y jém ip̄imi jém tachiiñewiip Dios. Siempre tanwattampa juuts tanimáy Dios cuando matacupin. Asíam ananmadayajpa itumpiy jém Dios ip̄ixiñtam. ¹⁸ Siiga Dios icupin tum p̄ixiñ jém wadayñetaw̄iip jém marca de circuncisión, jesic da w̄i iga iccáypa jém marca. Y siiga Dios icupin tum p̄ixiñ jém dapic ini jém marca de circuncisión, jesic da w̄i iga iwatpa jém marca. ¹⁹ Jém marca de circuncisión da ti cuwatcuy, da tayoxpátpa. Siiga tanait o da tanai jextim. Pero siiga tanwattampa juuts ixunpa Dios, je numa tayoxpátpa. ²⁰ Cada tumtum w̄i iga ts̄iyiñ juutstim it idic cuando Dios in̄wejay. ²¹ Siiga miesclavo cuando micupin Dios, jesic odoy wadaayi caso. Pero siiga w̄iap imput de esclavo, jesic puti. ²² Siiga esclavo tum p̄ixiñ cuando Dios icupin iga icupicpa Cristo, jesic siip iniitum libertad porque jém ianama dam tsenne. Y siiga tum p̄ixiñ da je esclavo cuando cupin̄ta iga icupicpa Cristo, jesic siip ts̄iy juuts tum esclavo porque Cristojam im̄ichi. ²³ Tsam tsoowiy tayojáy Dios jém tantánca iga odom tats̄iyiñ juuts tum esclavo. Jesic siip da tammalwatpa juuts tapimíypa jém p̄ixiñtam jém dapic icupicpa Dios. ²⁴ Mant̄iwitam, w̄i iga michiytamiñ jextim juuts miit idic cuando min̄wejay Dios porque siip miwaganait Dios.

²⁵ Jém tánomi Cristo da ichac tum an̄químayooyi para jém woñtam jém dapicnam jaayiy, pero siip mananmadáy titam ich an̄j̄ispa porque ayoxpátpa jém tánomi Jesucristo iga w̄iañ an̄cutiyyiy ti ixunpa Dios. ²⁶ Ich an̄impa iga w̄itim jém p̄ixiñtam siiga da yoomíypa porque siip miñpa jém mijpic yaachaji. ²⁷ Siiga yoomiy tum p̄ixiñ, jesic odoy ichaguiñ jém iyomo. Siiga j̄i ichacne iyomo, jesic odoy iméchiñ tunjac yomo. ²⁸ Pero siiga miyoomíypa, da je tánca. Siiga jaayíypa tum woñi, datim je tánca. Pero siiga yoomíypa tum p̄ixiñ o siiga jaayíypa tum woñi, tienes que yaachayajpa yip naxyucmi. Tsam manyoxpáttooba iga odoy miyaachátamiñ.

²⁹ Mant̄iwitam, ich an̄imtooba iga da jáyñe miñpa jém mijpic yaachaji, jesic w̄i siiga jém p̄ixiñtam jém yoomiyw̄iip iwadiñ juuts jém p̄ixiñtam jém dapic yoomiy. ³⁰ Jém tsampic anyácneyaj w̄i iga ts̄iyiñ juuts jém dapic anyácne. Jém tsampic maymayyaj w̄i iga ts̄iyiñ juuts jém dapic maymay. Jém juyjúyoypaap w̄i iga ts̄iyiñ juuts jém dapic ti iniit. ³¹ Siiga iniit algun ti yip naxyucmi, odoy j̄isi porque cuyajpa itumpiy cosa jém itw̄iip yip naxyucmi.

³² Ich da an̄wianjam iga tsam iniit cobacp̄iji. Siiga da yoomiy tum p̄ixiñ, jesic da ti ij̄ispa. Nada más ij̄ispa jutsap iwat jém tan̄jatun̄ Dios iyoxacuy juuts iwianjam Dios. ³³ Pero siiga yoomiy tum p̄ixiñ, tsam ij̄ispa jém cosa jém ityajw̄iip yip naxyucmi. Tsam ij̄ispa jut̄ ip̄igáypa titam ixunpa jém iwichomo. ³⁴ Jesic nawéct̄a jém p̄ixiñ ij̄ixi. Jesanetim jém yomo jém dapic jaayiy, ij̄ispa jém tan̄jatun̄ Dios iyoxacuy. Jesic quejpa iga Dios im̄ichitim jém im̄jtay y jém ianama. Pero jém tunjac yomo jém jaayiyw̄iip, tsam ij̄ispa jém cosa jém ityajw̄iip yip naxyucmi. Ij̄ispatim jutsap iwat juuts ixunpa jém iwidaaya.

³⁵ Mannimáy así iga manyoxpátpa. Da manchiitooba tum an̄químayooyi tsampic tánca tanwat. Pero ansunpa iga in̄w̄iwadiñ iga miwixtap. Ansunpatim iga w̄iap in̄cuyoxata jém tánomi Jesucristo con itumpiy in̄j̄ixi.

³⁶ Pero siiga tum p̄ixiñ ij̄ispa iga más w̄i iga jaayíypa jém iyommanic porque naspá jém tiempo iga pictap, jesic w̄i iga jaayiyiñ. Da je tánca. ³⁷ Pero tunjac p̄ixiñ ij̄ispa iga da ij̄icpa

iga jaayíypa jém iyommanic. Wiap iwát así siiga jém pìxiñ ijodon ìanamajjom iga más wì jém woñi iga da jaayíypa. Wì siiga iwát pa jempic. Datim iwát pa tãncã siiga da jaayíypa jém woñi. ³⁸ Jesic siiga jém woñi ijatun ijícpa iga jaayíypa, jesic iwíwadáypa. Y siiga tum woñi ijatun da ijaayíypa jém iyommanic, iwíwadáypatim.

³⁹ Tum yomo da wiap ichac iwídaya cuando danam caane. Pero siiga caaneum iwídaya, jesic jém yomo wiap ipic tungac pìxiñ juuts ixunpa jém yomo. Pero da wiap ijaayíy con tum pìxiñ jém ðapic icupícpa Cristo. ⁴⁰ Pero ich anjís pa iga más maymay jém yomo siiga da eybic jaayíypa. Ich animpa iga jém Dios iAnama achi yíp jìxi.

8

Jém mayi jém accaanetawíp jém watnas iwiñjom

¹ Siip manañmadáypa jém asunto de jém mayi jém accaanetawíp jém watnas iwiñjom. Numa tantumpiytam tajixiyta, pero da wì iga tanacujítap. Jesic siiga tanaít jém numapic tóyooyi, jáyanap jém wìbic jìxi. ² Siiga algunos ijís pa iga agui jìxiy, todavía itogóyáy jém jìxi jutsap ijodóna. ³ Siiga tantoypa Dios, jesic Dios taixpícpa.

⁴ Siip manañmadáypa siiga wì tançis jém mayi, jém accaanetawíp jém watnas iwiñjom. Tanjodontam iga da ti cuwatcuy jém tungac dios iwát nas icuwíti yíp naxyucmi. Da i más tungac Dios. Nada más tum Dios it. ⁵ Mex idiñ sñyucmi y naxyucmi jáyan jém diosyaj jém ðapic je nunta Dios. Jém pìxiñtam tsam ijísyajpa jém diosyaj juuts iomi. ⁶ Pero taichtam tanjodon iga it nada más tum Dios jém tanjatun Dios. Je iwát itumpiy cosa y taichtam taitta iga tanjístamiñ Dios. Iftim nada más tum jém tánomi Jesucristo. Iwagawatyaj itumpiy cosa con tanjatun Dios. Jém Jesucristo tachiitim jém tamvida.

⁷ Pero it jém pìxiñtam da iwíjodon iga tum Dios it. Algunos como inyujne idic iga ijísyajpa jém watnasyaj, icínpa iga icíspa jém mayi jém accaanetawíp jém watnas iwiñjom. Jém pìxiñtam da iwícutiyíypa jém Dios inmatì. Ijís pa ijíxianjom iga ictãncáypa jém mayi iga icíspa. ⁸ Dios da tapictsonpa siiga tançispa jém mayi o siiga da tançispa. Jextim siiga tançispa y jextim siiga da tançispa. ⁹ Mimichtam injodontam iga wiap inçista ti quej. Pero cuidado iga inicwatpa tãncã tum inñíwi, jém ðapic iwícutiyíyñe jém Dios inmatì. ¹⁰ Por ejemplo, siiga nicpa inçis mayi jut ijísyajpa jém watnas porque injodon iga jém watnas da iniñ ipimi, jesic siiga miixpa tum inñíwi, jém ðapic iwícutiyíyñe jém Dios inmatì, jesic wiap inñejacutiyíy, mojpã icupic iga jém watnas iniñ ipimi. ¹¹ Mimichtam iga tsam inwícutiyíypa jém Dios inmatì, asíam inictogoy pa tum inñíwi, jém ðapic iwícutiyíypa jém Dios inmatì. Accaata jém Cristo iga iciacpudiñtim mex jém pìxiñ. ¹² Cuando inicmalwatpa tum jém inñíwi jém ðapic iwícutiyíyñe jém Dios inmatì, jesic mástim inñejacutiyíypa jém Dios inmatì. Siiga inwatpa jempic, jesic inwatpatim tum tãncã jém ðapic iwíanjã jém Cristo. ¹³ Jesic siiga anactãncawatpa antiwi iga ançispa jém mayi jém accaanetawíp jém watnascim, jesic da nunca ançispa jém mayi iga odoy anactãncawadiñ jém antiwi.

9

Wì iga wípictsontap jém apóstol

¹ Tsam wíquejpa iga ich atsíy juuts tum apóstol y ich anaít libertad iga anwatpa juuts ixunpa Dios porque ich ánix jém tánomi Jesucristo. Mimichtam miwíputta juuts tum cosecha iga oy manañmadayta jém Dios inmatì. ² Siiga jém tungac pìxiñtam nímajpa iga ich da je aapóstol, da anwadáypa caso. Pero michtam inwíjodon iga Dios acutsat iga anamatpa jém inmatì. Cuando michtam incupicta jém Cristo, jesic quejpa iga Dios acutsat juuts tum apóstol.

³ Yimptic ancutsonpa jem nimyajpáppic iga ich da je aapóstol. ⁴ Ich anait derecho iga ancutpa y ánucca jem achiipáppic jem tantiwitam. ⁵ Meega ayoomiy, wíap anasi jem anyomo juuts jem tungac apóstolyaj, jem inisipáppic jem iyomo juuts jem tánomi itiwitam y jem Peto. ⁶ ¿Que mimichtam injistámpa iga no más jem Bernabé y ich da wíap antsacta jem anyoxacuy juuts jem tungac apóstolyaj iga ananmatpa jem Dios inmati? ⁷ Siiga i nicpa de soldado, da najojóyaytap iyaac. ¿I inippa tum finca de uvas y da icútpa uxan jem itim? Siiga tum pixiñ iwatpa cuenta jem borregoyaj, wíap iuc uxan jem leche. ⁸ Odoy jistaami iga ich anjixquimi iga annímáypa jem pixiñtam porque nimpatim así jem Moisés inquímayooyi. ⁹ Jayñetawum así jem anquímayooyi, nimpá: “Odoy quiñianjupí jem yunta cuando inepnepcotspa jem trigo iga itobáypa ipac.” Cuando nimpá así, da nimpá no más de jem xix. ¹⁰ Pero Dios icám como tum ejemplo para taichtam. Ijaychacne así jem anquímayooyi iga tayoxpátpa. Tum pixiñ ijítpa jem nas, tungac inepnepcotspa jem trigo. Yoxayajpa icuistic porque injócyajpa iga ipictsonyajpa jem iyoxaji. ¹¹ Oy manaquejáy jem wibic jixi juuts tum wibic pac añip. Jeeyucmi wí iga anchiitámpa jem wíccuy y titam más atogóyáypa juuts tum ancoñwiyoyi. ¹² Aichtam más wíap ampictsonja jem ancoñwiyoyi que jem tungac Dios inmatciwiñ.

Pero da manwágyatámpa iga anchiitamiñ titam atogóyáy. Ichtam anyaachiyta iga da ti anchiita iga odoy inchactamiñ jem Cristo inmadayooyi. ¹³ Michtam injodontam iga jem pixiñtam jem yoxayajpáppic jem masticjom, jemum ipátyajpa jem iwíccuy. Y jem pixiñtam, jem iccaayajpáppic jem animatyaj jem masticjom iga iwatyajpa jem sacrificio, tienes que icútpa uxan jem mayi jem iccaanewip masticjom. ¹⁴ Jempictim Dios icám iga jem inmatpáppic jem wibic anmati jemum ipictsonpa jem icoñwiyoyi. ¹⁵ Da nunca ampictsonne jexpic cosa. Ni datim nunca manjáyaytámpa tum toto iga manwágyáypa alguna cosa iga anchiñ. Más wí iga ayuucaba que iga michtam miñimtámpa iga anacwícpa.

¹⁶ Ich da anacujítpa anyaac iga ananmatpa jem Dios inmati porque Dios apimiyta iga ananmadiñ. Tsam auuguytim aich siiga da ananmatpa jem Dios inmati. ¹⁷ Siiga anwatpa tum yoxacuy juuts ich ansunpa, jesic tienes que ayojtpa. Pero siiga anwatpa juuts apimiy Dios, jesic quejpa iga Dios achi jem cargo. ¹⁸ ¿Jesic jup coñwiyoyi ampictsonpa? Da ti ampictsonpa, nada más tsam amaymay porque wíap ananmat jem Dios inmati. Da antségáypa jem pixiñtam. Anait jem derecho iga antsécpa, pero da antségáypa jem pixiñtam iga ananmadáypa jem wibic anmati.

¹⁹ Ich da je aesclavo. Da i ancuyoxap. Pero atsiy juuts tum esclavo iga ancuyoxap itumpiy pixiñtam iga ammétspa más jem pixiñtam iga icupicyajiñ jem tánomi Cristo. ²⁰ Cuando ait con jem Israelpic pixiñtam, atsiytim juuts jem Israelpic pixiñtam iga icupicyajiñ jem Cristo. Cuando ait con jem icupicneyajwip jem Moisés inquímayooyi atsiytim juuts tum pixiñ jem injacnewip jem Moisés inquímayooyi iga jeeyaj icupicyajiñtim jem Cristo. Pero ich da numa anjacpa jem Moisés inquímayooyi. ²¹ Cuando ait con jem pixiñtam jem dapic iniñ jem Moisés inquímayooyi, ich atsiypatim juuts tum de jeeyaj iga anyoxpátpa jem pixiñtam iga icupicyajiñ jem Jesucristo. Pero ich siempre ancupicpa jem Dios inquímayooyi, anwatpa juuts nimpá jem tánomi Cristo. ²² Cuando ait con jem pixiñtam jem dapic iwícupicne, ich atsiypatim jextim juuts jeeyaj iga más wíap anyoxpát jem tantiwitam. Ich atsiypa juuts itumpiy jem pixiñtam iga anyoxpátpa itumpiy jem pixiñtam iga icupicyajiñ jem tánomi Cristo. ²³ Ich anwatpa itumpiy yipyaj cosa iga más anpiguiñ jem Jesucristo inquímayooyi y iga tanwagapictsonjamiñ jem tachiñewip Dios.

²⁴ Mimichtam injodontam iga cuando poymichpa jem pixiñtam, pimi poypa itumpiy

jém m̄ichyajpáppic. Pero nada más tum w̄iap icoñw̄iy jém premio. Jesanetim mimichtam wattaami juuts ixunpa Dios con itump̄iy imp̄imi iga w̄iañ in̄coñw̄iy jém w̄ibic premio jém tachiiipáppic Dios. ²⁵ Tum p̄ixiñ siiga m̄ichtooba tum apuesto iga poym̄ichpa, jesic ichacpa itump̄iy cosa jém imalwadaypáppic. Iwatpa así porque icoñw̄iytooba tum premio jém dap̄ic jáypa. Pero taichtam tan̄coñw̄iyta tum premio jém dap̄ic yajpa. ²⁶ Pero ich da apoym̄ichpa juuts tum p̄ixiñ jém dap̄ic ijodon̄. Da axajason̄m̄ichpa. ²⁷ Amp̄im̄iy-pa ammij̄tay iga iw̄iwadiñ iga odoy ats̄iyiñ sin premio cuando yajpa anan̄madáy jém p̄ixiñtam jém Dios in̄mati.

10

Naquímyajta iga odoy ij̄isyajiñ jém watnas

¹ Mant̄iw̄itam, ansunpa iga michtam jodón̄ataami iga jém wiñ̄icpic p̄ixiñtam, jém Israelpic, wityajpa jém ucscuc̄im. Áñáy jém Tsabats Lamar, widan̄jacyaj itump̄iy de jeeyaj. ² Cuando iwatpa así, jesic juuts tan̄impa wagaacchin̄yajta con Moisés itump̄iy jém p̄ixiñtam iga ts̄iyajiñ juuts jém Moisés im̄ichi. Iñasca así cuando wagan̄icyajpa con jém Moisés jém ucscuc̄im y widan̄jacyaj jém Tsabats Lamar. ³ Jesanetim itump̄iy icútyaj tumti w̄iccuy jém ichiñew̄ip Dios. ⁴ Itump̄iy iucyaj tumti ni jém ichiñew̄ip Dios. Iucyaj jém ni jém putpáppic jém tsaayucmi jém iwagas̄ipáppic. Jém tsa je jém Cristo. ⁵ Pero ocmi núc jém jama iga Dios da iw̄ian̄jam ti iwatyajpa jém p̄ixiñtam. Caayaj jáyan̄ de jeeyaj jém titsinaxyucmi jém dap̄ic icup̄icyaj Dios.

⁶ Itump̄iy ȳipyaj cosa ts̄iyaj juuts tum ejemplo para taichtam iga odoy tan̄cusúniyiñ jém malopic cosa juuts icusúniyyaj jém wiñ̄icpic p̄ixiñtam. ⁷ Da w̄i iga in̄j̄istampa jém tun̄gac dios iwatnas juuts iwatyaj jeeyaj. Jaychacnet̄a jém Dios in̄mati ti iwatyaj jém p̄ixiñtam. Nīmpa así: “Jém p̄ixiñtam coñ̄yaj iga w̄icyajpa y tsam̄ ucyajpa. Jesic tsucumyaj iga imalwatyajpa tum malopic m̄ichi.” ⁸ Datim w̄i iga tapejóypa juuts iwatyaj jeeyaj y tumti jama caayaj veintitrés mil p̄ixiñtam. ⁹ Datim w̄i iga tan̄cut̄itspa jém tán̄omi siiga tacyojpa jém tant̄an̄ca iga tammalwatpa. Asíam iwatyaj algunos de jeeyaj. Jesic yaj iwascayaj jém tsañ. ¹⁰ Odoy cuj̄iytaami jém tan̄jatun̄ Dios juuts icuj̄iyaj jém wiñ̄icpic p̄ixiñtam y ocmi Dios icutsat tum s̄nyucm̄ipic p̄ixiñ, jém accaoypaap, iga accaayajtañ.

¹¹ Iñascayaj jemp̄ic jém ityajw̄ip wiñ̄igam iga ts̄iyiñ juuts tum ejemplo para taichtam. Jaychacnet̄a ti iwatyaj iga tan̄quejáy iga odoy tammalwadiñ porque s̄ip̄ taittámum jém in̄an̄pigam jama. ¹² Jesic siiga in̄j̄ispa iga agui miw̄iteñ, nawattaji cuenta iga odoy michudiñ. ¹³ Cuando micut̄itstap̄ iga micmalwattap̄, jodón̄ataami iga itump̄iy jém p̄ixiñtam in̄ascayajpatim jemp̄ic. Pero jém tan̄jatun̄ Dios siempre iwatpa juuts taj̄ycámayne. Da ij̄icpa iga más p̄imi micut̄itstap̄ hasta da w̄iap in̄yaach̄iy. Pero cuando núcpa jém hora iga tsam̄ p̄imi micut̄itstap̄, jesic micupujpa jém tan̄jatun̄ Dios. Miyoxpátpa iga w̄iañ in̄yaach̄iyta.

¹⁴ Jeeyucmi mant̄iw̄itam mantoytampáppic, tsactaami iga in̄toytampa jém watnas. ¹⁵ Ich manan̄madáypa juuts tum mip̄ixiñ tsamp̄ic mij̄ixīy, jeeyucmi mannímáypa, j̄isi ti mannímáypa siiga numa o m̄igooyi. ¹⁶ Taichtam tantump̄iytam tumti tan̄j̄ixi con Cristo cuando tánucpa jém uvas in̄i cuando tan̄wattampa jém Santa Cena. Tumti tan̄j̄ixi porque tan̄j̄ispa iga itegáy tán̄omi in̄ipiñ iga tajojáy tant̄an̄ca. Jesanetim tumti tan̄j̄ixi con Cristo cuando tan̄wéctampa jém caxtánañi porque tan̄j̄ispa iga yaachwadayta jém Cristo imij̄tay jém cunusyucmi para taichtam. ¹⁷ Taichtam tsam̄ taj̄ayan̄tam, pero tumti caxtánañi tan̄wagacútta. Jeeyucmi tats̄iyta tumti tammij̄tay porque tan̄cútta tumti caxtánañi, jém tán̄omi Cristo imij̄tay.

¹⁸ Jistaami ti iwatyaj jém Israelpic pìxiñtam. Iciis jém mayi jém accaanetawhip jém altaryucmi jut ijisyajpa Dios. Jesic jém pìxiñtam tsíy tumti jixi con Dios. ¹⁹ Jesic jistaami ti mannímáy iga jém watnas da ti cuwatcuy. Jém mayi jém accaanetawhip jém watnascim iga iwatyajpa sacrificio, jextim juuts cualquier mayi. ²⁰ Pero mannímáytooba iga jém tungac pìxiñtam, jém dapic iixpicpa Dios, cuando iccaayajpa jém animat jém watnas iwiñjom, itoyyajpa tum dios jém dapic je nunta Dios. Ijisyajpa tum mal espíritu. Ich da ansunpa iga inwaganaitpa tum jém mal espíritu. ²¹ Da wíap tánuc jém uvas iñi jém Cristo imichi siiga tánucpatim jém níccuy jém malopic espíritu imichi. Datim wíap tançút jém Santa Cena siiga tançútpatim jém wíccuy jém chiiñetawhip jém mal espíritu. ²² ¿Que inçujóiytámpa Dios? ¿Que michtam más miwíatámpa que jém tanjatun Dios?

Jém itoypaap jém itiwitam da icmalwatpa

²³ Numa juuts nimyajpa iga wíap tanwat cualquier cosa, pero da itumpiy cosa wi. Wíap tanwat titam tansunpa, pero da itumpiy tayoxpátpa iga más wíap tanwat juuts Dios iwianjam. ²⁴ Wi iga tammétsa jutpic tanyoxpátpa jém tantiwitam. Da tansunpa iga tanyaac tanawiwadaytap.

²⁵ Cústaami cualquier mayi jém máytapaap mercado. Odoy acwágooyi iga iñjísipa iñjixianjom iga da wi inçis. ²⁶ Porque yíp nas jém tanjatun Dios imichi con itumpiy cosa jém ityajwíap yíp naxyucmi.

²⁷ Siiga tum pìxiñ jém dapic icupicne Cristo miñwejáypa iga niguiñ miwiiqui, jesic nictaami siiga miñictamtooba. Cústaami titam michiítamtap y odoy acwágooyi iga iñjísipa iñanamanjom iga da wi inçis. ²⁸ Pero siiga tum pìxiñ, jém dapic iwícupicne jém Dios inmatí, miñímáypa iga: “Yíp mayi accaaneta jém watnas iwiñjom juuts sacrificio”, odoy cuuti. Porque siiga inçispa, wíap inictáncaíy jém pìxiñ. Ocmi ijísipa iga jém watnas iniit ipimi. Pero odoy jaamannoti iga tánomi imichi itumpiy jém itwíap yíp naxyucmi. ²⁹ Michtam da inçupictámpa iga jém watnas iniit ipimi, pero jém tungac pìxiñ, jém dapic iwícupicne jém Dios inmatí, wíap ijís iga iniit ipimi.

Síap mannímáypa tiiga jém tungac pìxiñ, jém dapic iwícupicne Dios inmatí, wíap anímáy iga da wi ançis jém mayi. ³⁰ Siiga ich wiñti anchiiba gracia Dios iga ançispa jém mayi, ¿jesic tiiga nimyajpa iga da wi ançis jém mayi? ³¹ Siiga tawícpa o tanícpa o tanwatpa cualquier cosa, watí itumpiy iga cujíptaiñ tanjatun Dios. ³² Siempre wíwattaami iga odoy i inicmalwattámiñ ni jém Israelpic pìxiñtam, ni jém dapic je de Israel, ni jém icupicneyajwíap Cristo. ³³ Ich ammétsa iga anwíwadáypa itumpiy jém pìxiñtam iga iciacpudiñ Dios. Da ammétsa iga anawiwadaytap anyaac.

11

¹ Seguido wattaami juutstim ich anwatpa porque anwatpatim juuts iwatpa jém tánomi Cristo.

Ti iwatyajpa jém yomtam jut wattap culto

² Mantiwitam, ich tsam mançujíptámpa porque siempre tsam anjístámpa aich y seguido inwattámpa juuts manañquejayñe. ³ Pero ich ansunpa iga inçutiyyítamiñ iga Cristo injacpa cada tumtum jém pìxiñ. Y cada tumtum pìxiñ injacpa jém iyomo. Jextim juuts jém tanjatun Dios je jém cobacpic de Cristo. ⁴ Siiga tum pìxiñ icujimpa icobac cuando inwejpátpa Dios o cuando inmatpa jém Dios inmatí, tum tsaaji para jém pìxiñ. ⁵ Pero siiga tum yomo da icujimpa icobac cuando iwatpa oración o inmatpa jém Dios inmatí, tum tsaaji para jém yomo jextim juuts icupoodane jém icobac. ⁶ Jesic siiga tum yomo da icujimpa icobac, más wi iga cupoodaiñ. Pero siiga tsaap jém yomo iga cupoodap juuts iñuntajepa icobac, jesic más wi iga icujimpa icobac cuando iwatpa oración. ⁷ Da wi

iga tum p̄ixiñ icuj̄mpa icobac cuando iwatpa oración porque je jém Dios icuwiñ, tsam w̄iquejpa jém ip̄imi. Pero jém yomo watta juuts p̄ixiñ, iniit jém p̄ixiñ ip̄imi. ⁸ Porque da tsucum jém p̄ixiñ jém yomyucmi, pero jém yomo tsucum jém p̄ixiñyucmi. ⁹ Jém yomo watta para jém p̄ixiñ. Pero da watta jém p̄ixiñ para jém yomo. ¹⁰ Jeeyucmi w̄i iga icuj̄imiñ icobac jém yomo como tum seña iga jém iw̄idaya injacpa, jesic jém sinyucmipic p̄ixiñtam iixyajpa iga anjacneta jém yomo. ¹¹ Tienes que ijodon jém icupicneyajw̄ip jém Cristo iga jém p̄ixiñ da w̄iap iit sin yomo y jém yomo da w̄iap iit sin p̄ixiñ. ¹² Numa watta jém yomo con jém p̄ixiñ ip̄opac. Pero jém p̄ixiñ también naypa yomyucmi. Pero itump̄iy cosa jém Dios iw̄ati.

¹³ ¿Anímaayi mimichtam siiga w̄i tum yomo iga iwatpa oración cuando da icuj̄mpa icobac? ¹⁴ Ȳip naxyucmipic j̄ixi mismo tanquejáypa iga tum tsaaji siiga tum p̄ixiñ tsam icyoone iway juuts tum yomo. ¹⁵ Tsam w̄i para jém yomt̄am iga yagats jém iway iga iwaymi icuj̄mpa jém icobac. ¹⁶ Siiga algunos da iw̄ianjam iga an̄mpa así, w̄i iga ijodón̄aiñ iga ni aichtam ni jém Dios ip̄ixiñtam, jém ityajw̄ip jém tungac lugar, da iixpicyajpa tungac costumbre.

*Chiitap j̄ixi jutsap iwat jém Santa Cena
(Mt. 26:26-29; Mr. 14:22-25; Lc. 22:14-20)*

¹⁷ S̄ip manjáyaypa tungac cosa. Da manjúj̄iptámpa. Quejpa iga jut̄ min̄tuumatámpa tsam minimalwadaytamtap, da s̄ip in̄w̄iwatta. ¹⁸ Wiñti manním̄aytooba iga ich ammatone iga cuando min̄tuumatámpa iga in̄wattámpa culto tsam miniwéctamtap. Ich an̄mpa iga da migóypa. ¹⁹ Numa, mimichtam tienes que miniwéctamtap para que tanjodón̄aiñ i jém in̄untaw̄icupicnew̄ip jém Dios in̄mati. ²⁰ Jesic cuando min̄tuumatámpa, da s̄ip in̄cútt̄a jém Santa Cena jém tachiiñew̄ip jém tán̄omi Jesucristo. ²¹ Cada tumtum min̄jagoytámpa in̄wicta iga da in̄chiitooba ti icútpa jém tant̄iwitam. Jesic algunos yuap y algunos uquiayajpa. ²² Michtam mitigiya jut̄ miwictámpa y jut̄ miñictámpa. Cuando in̄wattámpa así quejpa iga in̄jójixtámpa jém Dios ip̄ixiñtam. In̄chaawattámpa jém pobreyaj. ¿Jesic ti w̄iap manním̄áy? ¿Que w̄iap manjúj̄ipta? Da aw̄iap porque immalwatneta mimichtam.

²³ Porque Dios achi jém j̄ixi jém manan̄madayñew̄ip. Jém tán̄omi Jesucristo jeetim tsuu cuando wadaytap atraición, imatspic tum caxtánañi ic̄ijom, ²⁴ cuando yaj in̄wejpát Dios, moj iwéc jém caxtánañi con icuyujc̄wiñ. Nim Jesús: “Pictaami, cúttaami. Ȳip caxtánañi ich ammiytay. Ich ammiytay yaachwattap por mimichtam. Siempre wattaami ȳimpic iga an̄j̄istámiñ aich.” ²⁵ Jesanetim iwat cuando yajum wiiquiyaj, imatspic jém copa ic̄ijom. Nimpa: “Ȳip copa jém jomipic trato jém an̄watpaap con ann̄ipiñ. Wattaami jempic cada in̄uctámpa ȳip copa iga an̄j̄istámpa aich.” ²⁶ Cuando in̄cúttámpa ȳip caxtánañi y in̄uctámpa ȳip copa, jempigam in̄inquejáypa jém p̄ixiñtam iga accaata jém Jesucristo iga tayoajy tantánca. W̄i iga tanwattámpa así hasta miñgacpa tán̄omi ȳip naxyucmi.

²⁷ Jesic siiga tum p̄ixiñ, jém dapic in̄ij derecho, icútpa ȳip caxtánañi y iucpa ȳip copa cuando wattap jém Santa Cena, jesic mijpic t̄anca iwatpa contra jém tán̄omi imiytay y jém in̄ipiñ. ²⁸ Pero wiñti cada tumtum de mimichtam nac̄ip̄intaji in̄yaac, jesic ocmi w̄iap in̄cút jém caxtánañi y w̄iap in̄uc jém copa. ²⁹ Siiga tum p̄ixiñ icútpa ȳip caxtánañi y iucpa ȳip copa cuando da in̄ij derecho, tienes que ipictson̄pa tum mijpic castigo porque da ij̄ispa iga jém caxtánañi je jém tán̄omi imiytay. ³⁰ Jeeyucmi tsam jáyan̄ de mimichtam tsam mim̄m̄neta, da w̄i in̄inj̄amta. Jeeyucmi algunos caaneyajum. ³¹ Porque siiga aw̄inac̄ip̄intap anyaac, jesic Dios da achiiba castigo. ³² Pero cuando Dios tac̄ip̄in̄pa, jesic tachiiba castigo juuts tum iman̄ic iga odoy tamp̄ict̄són̄iñ jém mijpic castigo con jém malopic p̄ixiñtam jém ityajw̄ip ȳip naxyucmi.

³³ Jesic, mantiwitam, cuando min̄tuumatámpa iga in̄wattámpa jém Santa Cena, nanjóctantaji con jém in̄tiwitam iga in̄wagacúttámpa jém Santa Cena. ³⁴ Siiga algunos yuap, jesic w̄i iga n̄guiñ wiiqui it̄cc̄m. Jesic da ichiiba castigo Dios cuando min̄tuumatámpa iga in̄wattámpa jém Santa Cena.

Jém tungac asunto an̄witsacpa cuando nicpa mánám.

12

Tachiiba j̄ixi jém Dios iAnama cada tumtum de taichtam

¹ Siip, mantiwitam, manacjodónap iga Dios iAnama michiiba j̄ixi iga w̄iañ in̄watta jém Dios iyoxacuy.

² Michtam in̄wijodon̄tam iga cuando danam in̄cupicneta jém tan̄jatun̄ Dios, tsam in̄jictámpa idic iga mimigóyaytam̄ap. In̄cupictámpa idic jém watnas jém dapic̄ j̄iypa.

³ Jeeyucmi siip ansunpa iga in̄jodónatamiñ siiga tum̄ p̄ixiñ imalnímáypa jém tán̄omi Jesucristo, quejpa iga Dios iAnama da ichiñe j̄ixi. Jesap̄tim siiga jém Dios iAnama da iyoxpátne jém p̄ixiñ, da w̄iap in̄imáy Jesús iga: “Mán̄omi.”

⁴ Jém Dios ip̄ixiñtam̄ ipictson̄yajpa j̄ixi iga w̄iap iwat w̄ati jém yoxacuy, pero jém ichiñew̄ip̄ tum̄, je jém Dios iAnama. ⁵ W̄ati yoxacuy it̄ iga tan̄cuyoxap̄ jém tán̄omi, pero jém tán̄omi tum̄. ⁶ Jáyan̄ cosa it̄ iga tan̄watpa juuts ixunpa Dios, pero jeetim Dios iyoxpát̄pa itump̄iy jém p̄ixiñtam̄ iga iwatyajpa itump̄iy cosa. ⁷ Jém Dios iAnama ichiiba j̄ixi cada tumtum̄ jém Dios ip̄ixiñtam̄ iga quejiñ iga chiiñetā jém Dios iAnama. Chiiñetā jém j̄ixi iga iyoxpát̄pa itump̄iy jém ip̄ixiñtam̄. ⁸ Jém Dios iAnama iyoxpát̄pa tum̄ p̄ixiñ iga tsam̄ j̄ixiñ̄y iga w̄iañ in̄mat. Jeetim Dios iAnama iyoxpát̄pa jém tungac p̄ixiñ iga iw̄icut̄īȳȳȳpa jém Dios in̄químayooyi y w̄iap iccuyuj jém it̄iwitam̄. ⁹ Jém Dios iAnama iyoxpát̄pa tungac p̄ixiñ iga w̄iap iw̄icupic̄ jém tan̄jatun̄ Dios. Jeetim Dios iAnama ichiiba p̄imi tungac p̄ixiñ iga w̄iap icp̄is jém mimneyajw̄ip̄. ¹⁰ Tungac p̄ixiñ chiitā jém p̄imi iga w̄iañ iwat jém milagroyaj. Tungac p̄ixiñ chiitā jém p̄imi iga w̄iañ in̄mat ti in̄imáy Dios. Tungac p̄ixiñ chiitā jém j̄ixi iga w̄iañ iixpic̄ i in̄isiba jém mal espíritu y i in̄isiba jém w̄ibic espíritu. Tungac p̄ixiñ chiitā jém p̄imi iga w̄iañ in̄mat tungac an̄mat̄imi. Jém tungac p̄ixiñ chiitā j̄ixi iga icut̄īȳȳȳñ jém tungac an̄mat̄i iga in̄matpa ti n̄impa. ¹¹ Itump̄iy ȳip̄yaj cosa iwat jeetim Dios iAnama juuts je ixunpa. Chiitā cada tumtum̄ p̄ixiñ tungac j̄ixi.

Tantump̄iy tatsíytámpa juuts tumti m̄jtay

¹² Jém tán̄omi Cristo jex juuts tum̄ m̄jtay. Jáyan̄ cosa it̄ jém m̄jtayyucmi, pero tumti m̄jtay. ¹³ Tantump̄iytam̄ tatsíytámpa juuts tumti m̄jtay porque asiam̄ iwat jém Dios iAnama cuando tacchin̄tam̄ta. Siiga Israelpic̄ tap̄ixiñ o griegopic̄ tap̄ixiñ, siiga taesclavo o da je taesclavo tantump̄iytam̄ tumti tan̄j̄ixi porque tampictson̄neta jém Dios iAnama jém tumtipic̄.

¹⁴ Jesanetim jém tamm̄jtay da je tumti cosa it̄, jáyan̄ cosa it̄ jém tamm̄jtayyucmi. ¹⁵ Siiga jém tampuy n̄impa iga: “Ich̄ da je aci, jeeyucmi da je at̄umti con jém m̄jtay”, jesic da w̄i iga n̄impa así jém tampuy porque ts̄iypa siempre juuts tumti m̄jtay. ¹⁶ Siiga tantatsic̄ n̄impa iga: “Ich̄ da je aixcuy, jeeyucmi da je at̄umti con jém m̄jtay”, jesic da w̄i iga n̄impa así jém tantatsic̄ porque ts̄iypa siempre juuts tumti m̄jtay. ¹⁷ Porque siiga jém tamm̄jtay naps ixcuy, ¿jesic jutsap̄ tammat̄ón̄óy? Siiga naps tatsic̄ jém tamm̄jtay, ¿jesic jutsap̄ tansugóy? ¹⁸ Pero Dios taccám̄yñeum̄ itump̄iy cosa jém tamm̄jtayyucmi juuts je ixunpa. ¹⁹ Siiga jém tamm̄jtay naps puy o naps ci, ¿jesic jūt it̄ jém tamm̄jtay? ²⁰ Siip̄ w̄ati cosa it̄ jém tamm̄jtayyucmi, pero tumti tamm̄jtay.

²¹ Jém tán̄ixcuy da w̄iap in̄imáy jém tan̄ci: “Mich̄ da anyoxpát̄pa.” Y jém tan̄cobac̄ datim w̄iap in̄imáy jém tampuy: “Mich̄ datim anyoxpát̄pa.” ²² It̄ jém cosa dapic̄ juchan̄ jém

tammijtayyucmi, pero tsam tayoxpátpa. ²³ Jém cosa jém tammijtayyucmi, jém dapic tajayayoxpátpa, mástim tanwíidap. Ittim jém cosa jém tammijtayyucmi da wí tánám, pero tanwíidaptim. ²⁴ Jém cosa jém tsampic wíixtap, da ti itogóyáy. Dios iwat jém tammijtay con itumpiy cosa, jém ityajwíip más tanwíidap, jut da i wí taixáy. ²⁵ Iwat así Dios porque da ixunpa iga nawécyajtaiñ jém ityajwíip jém tammijtayyucmi. Ixunpa iga itumpiy cosa nayoxpátyajtaiñ. ²⁶ Siiga yaachwattap tum cosa, jém itwíip tammijtayyucmi, jesic ijampa itumpiy jém ityajwíip tammijtayyucmi. Siiga wíwadaytap tum cosa, jém ityajwíip jém tammijtayyucmi, jesic maymáayajpa itumpiy jém ityajwíip tammijtayyucmi.

²⁷ Siip mimichtam michíytámpa juuts jém tánomi Cristo imijtay. Cada tumtum de mimichtam michíytámpa juuts tum cosa jém itwíip jém Cristo imijtayyucmi. ²⁸ Jesic Dios iccám jém yoxaciwiñ iga iwatyajpa jém yoxacuy entre jém Dios ipixiñtam. Wiñí iccám jém apóstol, ocmi iccám jém inmatpáppic jém wíbic anmatí, ocmi iccám jém accuyujoypaap, ocmi iccám jém wíapaap iwat jém milagroyaj, ocmi iccám jém wíapaap icpis jém mimneyajwíip, ocmi iccám tim jém iyoxpátpáppic jém itíwítam, ocmi iccám jém injacpáppic jém Dios ipixiñtam, ocmi iccám jém inmatpáppic jém tungac anmatími. ²⁹ Pero da itumpiy jém Dios ipixiñtam accám tap juuts tum apóstol ni juuts tum inmatpáppic jém wíbic anmatí, ni juuts tum accuyujoypáppic. Da itumpiy wíap iwat jém milagroyaj. ³⁰ Da itumpiy icpíspa jém mimneyajwíip, da itumpiy wíap inmat jém tungac anmatími. Da itumpiy wíap tanmadáy ti nimtooba jém tungac anmatí. ³¹ Wadaayi caso iga impictsonpa jém más wíbic yoxacuy jém tachiipáppic Dios. Pero ich manañquejáypa jém más wíbic tun.

13

Jém wíbic tóyooyi

¹ Siiga ich wíap ananmat itumpiy jém anmatí jém ityajwíip yíp naxyucmi y wíaptim ananmat jém sinyucmipic pixiñtam inmatí, pero da atóyóypa, jesic da ti acuwatcuy. Ajax juuts tum campana jém aguípic anjiypa. Ajax juuts tum platillo jém tsampic pími anjiypa. ² Siiga wíap ananmat jém Dios inmatí y wíaptim ancutíyíy itumpiy jém jixi jém dapic i ijodon y siiga tsam pími ajixíy y tsam ancupicpa iga Dios wíap tayoxpát hasta annímáypa jém cotsic iga cáyíñ jut it y cáypa, pero da atóyóypa, jesic da ti acuwatcuy. ³ Siiga anwécpa itumpiy jém anaitwíip y siiga acíjuncotpa ammijtay iga nooquettaiñ, pero da atóyóypa, jesic da para ti wí iga anwatpa así.

⁴ Jém tóyoypáppic iyaachíypa siiga malwadaytap, da malo, da najajóypa, da nimpá iga ich aguí awíap, datim nacujítap. ⁵ Jém tóyoypáppic píxiñ iwíixpa jém itíwítam, da icusúníypa jém más wíbic cosa para je mismo, datim jóytero, da iccáypa jém jooya. ⁶ Jém píxiñ, jém tóyoypáppic, da maymáypa cuando tum píxiñ iwatpa tájca, maymáypa cuando iwíwatpa tum píxiñ. ⁷ Jém tóyoypáppic da cutíñap. Da nunca ichacpa iga icupicpa Dios, ijodon iga tanjatun Dios tawíwadáypa. Siempre iyaachíypa cuando yaachwattap.

⁸ Jém tóyooyi da nunca cuyajpa. Pero núcpa jém jama iga cuyajpa jém ipictsonpáppic jém Dios inmatí, da más ipictsonpa. Cuyajpatim jém pími iga inmatpa jém tungac anmatími. Cuyajpatim itumpiy jém jixi jém itwíip yíp naxyucmi. ⁹ Da itumpiy tancutíyíypa. Da capsapa tanaanmat titam tanímáypa Dios. ¹⁰ Pero núcpa jém jama iga capsapa jém tanjixi iga tancutíyíypa. Pero jém dapic capsne jém jixi, cuyajpa.

¹¹ Cuando ich atsíxiñam, anmatpa juuts tsíxi, jextim anjixi y jempictim ancutíyíypa. Pero cuando amíja, antsac jém tsíxtam ijixi. ¹² Siip tajex juuts tum píxiñ iámpa iwiñpac tum tescatjom da jayawíquejpa. Pero ocmi tanwíixpa. Siip da tancutíyíypa itumpiy cosa, pero ocmi tancutíyíypa itumpiy cosa juuts Dios taixpicpa taich. ¹³ Da cuyajpa iga

tañcupicpa Dios, datim cuyajpa iga tanjisa iga Dios tayoxpátpa y datim cuyajpa jém tóyooyi. Icutres da cuyajpa. Pero más pimi wí jém tóyooyi.

14

Jém anmatyajpáppic jém tungac anmatimi

¹ Jesic waday caso más iga mitóyoytámiñ. Metstaami jém pimi, jém tachiiñewiip jém Dios iAnama. Jém más wibic pimi jém tachiiñewiip Dios iga wiap tanañmat jém Dios inmati. ² Siiga tum pixiñ jiyapa jém tungac anmatimi, jém dapic i icutiyyiypa, jesic Dios síp ijíyáy jém pixiñ. Da síp ijíyáy jém pixiñtam porque da i wiap icutiyyi ti nimpá. Jém Dios iAnama iyoxpátpa iga inmatpa jém jixi jém dapic i ijodon. ³ Pero siiga tum pixiñ inmadáypa itiwitam jém Dios inmati, jesic más iwíwatpa. Iyoxpátpa jém itiwitam iga más icutiyyiyajiñ ti ixunpa Dios. Ichiiyajpa jixi iga más iwícupiguiñ jém Dios inmati iga odoy ichaguiñ. Icamamwadayajpa ianama. ⁴ Siiga tum pixiñ jiyapa tungac anmatimi jém dapic i icutiyyiypa, jesic jém pixiñ nayoxpátta iyaac iga más icutiyyiñ ti ixunpa Dios. Pero siiga tum pixiñ inmadáypa itiwitam jém Dios inmati, jesic iyoxpátayajpa itumpiy jém Dios ipixiñtam iga más iwatyajiñ juuts ixunpa Dios.

⁵ Ich animpa wí siiga inñumpiytam wiap inñiy jém tungac anmatimi, jém dapic i icutiyyiypa. Pero más wí iga ininmatpa jém Dios inmati porque jém inmatpáppic jém Dios inmati más tayoxpátpa que jém jiyáppic jém tungac anmatimi siiga da i inñumtsacpa jém anmati iga iyoxpádiñ itumpiy jém Dios ipixiñtam. ⁶ Jesic, mantiwitam, siiga nicpa manjójáy iga manañmadáypa jém tungac anmatimi, jém dapic i icutiyyiypa, jesic da wiap miyoxpát. Más wí iga manañmadáypa jém jixi jém achiiñewiip Dios, jém dapic je miñooyi o iga manañmadáypa jém Dios inmati o jém wibic anquímayoyi.

⁷ Siip anaccámpa tum ejemplo. Jém flauta y jém arpa da jixiíy, pero siiga ticstap y da wiap itics parejo, da tañcutiyyiypa jup wañi ticstap. ⁸ Jesanetim siiga jém soldadoyaj da wiap ixus parejo jém trompeta iga icjodónap iga nicpa añajiyaj, jesic jém soldado da i listo. ⁹ Jempictim inñascátampa mimichtam cuando mijiyapa jém tungac anmatimi jém dapic i icutiyyiypa. ¿Jutsap inñodónata jém anmati? Síp inñaxajaanmat jém anmati. ¹⁰ Tsam jáyan anmati ityaj yíp naxyucmi, pero cada pixiñ wiap icutiyyi jém inmati. ¹¹ Jesic siiga tum pixiñ ajíyáypa inmatimi, pero da añcutiyyiypa, jesic anjodon iga juumipic pixiñ. Jesic jém pixiñ ijodonjim iga ichgacti juumipictim apixiñ. ¹² Mimichtam, numa tsam inwianjamta iga Dios iAnama michiiba jém ipimi, jesic métstaami jutsap inñoyxpátta jém Dios ipixiñtam iga más wiap iwatyaj ti ixunpa Dios.

¹³ Jesic siiga tum pixiñ wiap inmat jém tungac anmatimi, jém dapic i icutiyyiypa, jesic wí iga iwágáyiñ Dios iga iyoxpádiñ iga wiap inmadáy jém itiwitam ti nimpá jém tungac anmatimi. ¹⁴ Siiga anwatpa oración jém tungac anmatimi, jém dapic i icutiyyiypa, jesic jém añanama inwejpátpa Dios, pero da ti cuwacuy jém anjixi. ¹⁵ Jesic ich mannímáypa ti wiap anwat. Ich anwatpa oración con jém añanama y anwatpatim oración con anjixi. Awanpa con añanama y con anjixi. ¹⁶ Porque siiga ininwejpátpa Dios con inñanama, pero da ininwejpátpa Dios con inñixi, jesic jém pixiñ jém dapicnam iwícuuyucane jém Dios inmati, cuando imatonpa iga inwatpa oración, da wiap inwagaanwejpátta Dios porque da icutiyyiypa ti nimpá jém anmati. ¹⁷ Tsam wiap inñchi gracia Dios, pero da inñoyxpátpa jém tungac pixiñtam iga más icutiyyiypa jutsap iwát juuts ixunpa Dios. ¹⁸ Iyucupdios iga ich más wiap anañmat jém tungac anmatimi, jém dapic i icutiyyiypa, que inñumpiytam de mimichtam. ¹⁹ Pero cuando antuumayajpa jém Dios ipixiñtam, ich animpa más wí iga

ananmatpa tum rato con anjixi iga ananquejáypa jém tantiwitam que iga ananmatpa tsam yagatsjom jém tungac anmatimi jém dapic icutiyyiypa.

²⁰ Mantiwitam, odoy jisi juuts tum xutu tsixi. Pero jixiyyaami juuts tum tsamipic pixiñ iga inwicutiyyiypa. Numa wi iga miittamiñ juuts tum xutu tsixi, jém dapicnam imalwatne. ²¹ Nimpa jém wiñicpic anquímayooyi jut jayñeta: “Nimpa Dios iga ich ananmatpa jém nación de Israel con tungac anmati y con jém juumipic pixiñtam. Pero ni jempic datim amatonjajpa.” ²² Jém inmatpáppic jém tungac anmatimi wi para jém seña para jém dapic icupicneyaj Dios. Jém inmatpáppic jém Dios inmati wi como tum seña para jém icupicneyajwip Dios. Da para jém dapic icupicneyaj. ²³ Jesic cuando itumpiy jém Dios ipixiñtam antuumaneyaj y itumpiy jiyajpa jém tungac anmatimi y jesic tigiyapa algunos jém dapicnam icuyucane jém Dios inmati o jém dapicnam icupicne, wiap inim iga yip pixiñtam culocoquetneyaj. ²⁴ Pero siiga itumpiy inmatyajpa jém Dios inmati cuando tigiyapa jém dapicnam icupicneyaj o jém dapicnam icuyucane jém Dios inmati, jesic anquejaytap iga tancaiy, iyaac naciipintap cuando imatonpa ti sip inimyaj. ²⁵ Jesic naixtap jém malopic jixi jém inécnewiip ianamanjom. Jesic costenactinpa jém pixiñ, moypa inwejpát Dios. Nimpa jém pixiñ iga numa Dios it con mimichtam.

Wi iga idiñ orden jut antuumayajpa jém Dios ipixiñtam

²⁶ Jesic, mantiwitam, cuando minuumatámpa, wi iga inwattamiñ así: Tum pixiñ imaypa tum salmo, tungac inquejáypa tum wibic anquímayooyi, tungac inmatpa tum jixi jém Diospic ichiñe, tungac jiyapa jém tungac anmatimi, y tungac pixiñ tanmadáypa ti nintooba jém anmati. Wi iga inwattámpa itumpiy cosa iga jém pixiñtam más iwicupiguiñ jém Dios inmati. ²⁷ Siiga mijiytámpa jém tungac anmatimi, wi iga mijiytamiñ miwisten o mitucuten nada más. Pero jiytaami mitumtum. Ixunpa iga tum inmadiñ jém anmati ti nimpa. ²⁸ Pero siiga da i wiap inmat ti nimpa jém tungac anmatimi, mejor iga odoy jiytaami jém tungac anmatimi jut minuumaneta. Más wi iga jém pixiñ icutum jiyiñ con Dios. ²⁹ Jesaptim cuando minuumaneta, wi iga wisten o tucuten inmatpa jém Dios inmati. Los de más icipijiñ ti nimpa jém pixiñ. ³⁰ Pero siiga Dios ichiiba jixi tungac pixiñ, jém coñwip jem, jesic jém moypa inmat jém Dios inmati ichaguiñ iga inmatpa. ³¹ Initumpiytam wiap ininmatta jém Dios inmati juuts Dios michiñe jixi. Pero anmattaami tumtum por mitumtum iga jém pixiñtam wiap icuyucayaj jém Dios inmati, jesic maymayaj jém Dios ipixiñtam. ³² Jém inmatpáppic jém Dios inmati iwianjaguiñ jém ianama. ³³ Wi iga idiñ orden jut antuumayajpa jém Dios ipixiñtam iga da ti idiyi. Jempictim iwatyajpa jém Dios ipixiñtam jutinquej jut antuumayajpa.

³⁴ Jém yomtám da wi iga jiyajpa jut watap culto jut antuumayajpa jém Dios ipixiñtam. Da i ijigáypa iga jiyajpa. Más wi iga imatoniñ porque asíam nimpa jém Dios inquímayooyi. ³⁵ Siiga ijodónatooba ti nimpa jém anmati, wi iga icwáguñ jém iwidaaya cuando núcpa iticcim. Porque da i iwixpa jém yomo siiga jiyapa jém culto.

³⁶ Wijodónataami iga Dios inmati da tsucum mimichtamanjom. Y datim mimichtam incutum impictsonja. ³⁷ Siiga algunos ijispa iga agui wiap inmat jém Dios inmati o ijispa iga tsam iniñ jém Dios iAnama, wi iga icutiyyiñ iga Dios tachiñe jém anquímayooyi jém sippáppic anjay. ³⁸ Siiga tum pixiñ da icutiyyi iga Dios tachi yip anquímayooyi, jesic asíam tsiyñ.

³⁹ Jesic, mantiwitam, cusuniyi jém pimi iga waiñ ininmatta jém Dios inmati. Odoy anjijaci jém inmatpáppic jém tungac anmatimi. ⁴⁰ Pero wattaami itumpiy cosa juuts tum wibic pixiñ. Wi iga idiñ orden jut antuumayajpa jém Dios ipixiñtam iga odoy cujiñayajiñ.

15

Numa pisneum jém tánQmi Jesucristo

¹ Siip mantiwitam, manacjodónatámpa eybic jém wibic anmaṭi iga iñjistámiñ. Yíptim anmaṭi impictsoneta, hasta siip da iñchacne. ² Con yíptim anmaṭi miciaacputtámpa Dios siiga da iñchacpa jém anmaṭi, jém manañmadayñewiip, siiga da minímanṭaayap iga incupicne jém wibic anmaṭi.

³ Wiñti oy manañquejay jém más mijpic anquímayooyi, jém ichpic ampictsonne. Yíp anquímayooyi tanquejáypa iga accaata Jesucristo iga tayojoyta jém tantánca. Asíam nimpá jut jayñeta jém Dios inmaṭi. ⁴ Cumta, pero jém tucunajama pis juuts nimpá jém Dios inmaṭi jut jayñeta. ⁵ Jesic pisneum Jesús, moj iwiñquejay jém Peto, ocmi iwiñquejay jém doce icuyujcwiñ. ⁶ Más ocmi tumti ci iwiñquejay más de quinientos jém icuyujcwiñ. Jáyan de jeeyaj vivo hasta siip, pero algunos caaneum. ⁷ Más ocmi iwiñquejay jém Jacobo. Ocmi eybictim iwiñquejay jém doce icuyujcwiñ.

⁸ Jesic ocmi cuando yaj iwiñquejay itumpiy de jeeyaj, awiñquejaytim aich. Acupiichcúy cuando awiñquejay. Ich ajex juuts tum tsixi iga danam núcne hora iga naypa. ⁹ Ich tum xutupic aapóstol y datim wí iga mannímaypa iga ich aapóstol porque ich tsam ammalwadáy jém Dios ipixiñtam. ¹⁰ Ich numa aapóstol porque Dios tsam ayaachanjám y awiwadáy. Aich da axajacám juuts tum apóstol porque más pimi ayoxane que itumpiy jém apóstol. Pero ich anyaac da anwatpa. Dios tsam ayoxpát iga wíap anwat. ¹¹ Da ti iwatne siiga ich mismo o jém tungac apóstol minmadáypa jém anmaṭi, mimichtam tsam inwicupicneta.

Acpisyajtap jém caaneyajwíip

¹² Siiga nimpá jém anmaṭi, jém manañmadayñewiip, iga pisneum jém Cristo de jut it jém caaneyajwíip, ¿jesic tiiga nimyajpa algunos de mimichtam iga da pisyajpa jém caaneyajwíip? ¹³ Siiga numa da pisyajpa jém caaneyajwíip, jesic datim pis jém Cristo. ¹⁴ Siiga da pis jém Cristo, jesic xajatim manañmadáy jém anmaṭi y xajatim incupic jém Cristo. ¹⁵ Siiga da pis jém Cristo, jesic ammigóyanmatpa jém Dios inmaṭi cuando manañmadáy iga Dios icpis jém Cristo. Siiga da je numa iga pisyajpa jém caaneyajwíip, jesic da numa Dios icpis jém Cristo. ¹⁶ Porque siiga jém caaneyajwíip da pisyajpa, jesic ni Cristo datim pis. ¹⁷ Siiga jém Cristo datim pis, jesic xajatim incupictámpa, da i miyoyayñe jém iñtánca. ¹⁸ Jesic togoyñeyajum jém caaneyajwíippic, jém icupicneyajwíip Cristo. ¹⁹ Siiga nada más tanjísipa iga jém Cristo tayoxpátpa iganam taitpa yíp naxyucmi, más tauuguytim que itumpiy jém pixiñtam.

²⁰ Pero siip numa pisneum jém Cristo de jut it jém caaneyajwíip. Je jém wiñtipic cosecha. Jesic quejpa iga pisyajpatim itumpiy jém caaneyajwíip. ²¹ Tum pixiñ ictsucum iga caayajpa itumpiy jém pixiñtam yíp naxyucmi. Tungac pixiñ ictsucum iga pisyajpa itumpiy jém caaneyajwíip. ²² Caaba itumpiy jém pixiñtam porque tsucumne de Adán. Pero Cristo ictsucum iga wíap ipisyaj itumpiy jém caaneyajwíip. ²³ Písipa cada tumtum juuts ixunpa Dios. Wiñti pis jém Cristo, pero ocmi cuando miñgacpa yíp naxyucmi jém tánQmi, acpisyajtap jém caanewiip, jém icupicnewiip Cristo. ²⁴ Ocmi miñpa jém ínanpigam jama. Jém tánQmi Cristo ictogoypa itumpiy jém anjagooyiyaj. Itobáypa ipimi. Iciijunçotpa jém anjagooyi ipimi jém íjatunçim iga Dios injacpa yíp naxyucmi. ²⁵ Porque tienes que tsíypa jém Cristo juuts anjagooyi hasta que icoñwíypa itumpiy jém ienemigoyaj. ²⁶ Cuyajpa jém ínanpigam tánenemigo. Cuyajpa iga caaba jém pixiñtam. ²⁷ Dios ichac itumpiy cosa jém Jesucristo ipuyçim iga injacpa. Pero cuando nimpá jém Dios inmaṭi iga Cristo injacpa itumpiy cosa, da nimtooba iga injacpatim jém tanjatun Dios.

28 Cuando itumpiy cosa tsíy jém Jesucristo ipuycim, jesic jém Cristo iyaac ijícpa iga injacpa ijatun Dios, jém ichiñewip itumpiy jém ipimi. Jesic itumpiy cosa Dios imichi, injacpatim itumpiy cosa.

29 Algunos icchinjaypa jém pixiñtam iga iciacpudiñ jém itiwitam jém wiñicpic caaneyaj. ¿Pero tiiga iwatpa jempic siiga da pispa jém caanewip?

30 ¿Tiiga da acinpa iga aitta en peligro itumpiy tiempo siiga da tapispa cuando tacaaneum? 31 Mantiwitam, tsam amaymay iga incupicneta jém tánomi Jesucristo. Jeeyucmi da acinpa iga it peligro iga tacaaba cada jama. 32 Tsam pimi anájapa con jém ánenemigoyaj jém atebet Efeso juuts ájapa tum pixiñ con jimñi animat, pero da ti acuwatcuy siiga da pisyajpa jém caaneyajwip. Wiap tanim juuts nimyajpa: “Tawictámpam y tanictámpam porque joymi tacaaba.”

33 Odoy jici iga i mimigóyápa. Juuts nimpá jém dicho: “Jém malopic compañeroyaj icmalwatpa jém itiwitam.” 34 Tsactaami iga immalwatpa. Wiwattaami eybic juuts tum wibic pixiñ. Porque algunos de mimichtam da inixpictámpa Dios. Mannímaytámpa así iga michaatámiñ.

Jutsap icpisyaj jém caaneyajwip

35 Pero algunos acwágóyapa, nimyajpa: “¿Jutsap ipisyaj jém caaneyajwip? ¿Juutspic migtay iniitpa cuando pisneum?” 36 Michtam da mijixiíy iga micwágóyapa así porque tanjodon cuando ñiptap tum pac tienes que caaba imayi iga naypa eybic jém pac, tsíyapa tum planta. 37 Ñiptap jém trigo ipac o tungac pac, pero da i inibáyapa iplanta. Tanñippa tum xutu pac, pero naypa tum mijpic planta. 38 Dios ichiiba juuts ixunpa cada pac jém imigtay jém imichipic. Cada jém pac chiitap jém imigtay. 39 Da itumpiy mayi tumti. Jém pixiñ tungac imayi, jém animat tungac imayi, jém jon tungac imayi, jém ttipi tungac imayi. 40 Ityaj jém sinyucmic migtay, ityajtim yip naxyucmic migtay. Jém sinyucmic iniit iwí. Jém naxyucmic tungac iwí. 41 Jém jama ichoca tungac, jém poya tungac, y jém matsa tungac. Jém matsayaj da tumti ichoca. 42 Asíam naspá cuando pisyajpa jém caaneyajwip. Cumtap jém migtay jém púcpáppic. Jesic pispa tum migtay dam nunca caaba. 43 Cumtap jém da wibic migtay jém pucpáppic. Cuando pispa, tsam wibic migtay. Cuando cumtap da iniit ipimi. Pero cuando pispa iniitum ipimi. 44 Cumtap yip naxyucmic migtay. Pispa juuts tum sinyucmic migtay. Ittim jém migtay jém naxyucmic. Ittim jém migtay jém sinyucmic.

45 Nimpá jém Dios inmati jut jayñeta: “Jém wiñtipic pixiñ, jém Adán, chiita ivida.” Pero jém inajpigam Adán tum Anama, jém tachiipáppic tamvida. 46 Wiñti tawatneta juuts jém Adán imigtay, ocmi tawattap juuts jém sinyucmic migtay. 47 Jém wiñtipic pixiñ watta con naspótpót, je jém naxyucmic pixiñ. Jém ocmic pixiñ je jém tánomi Cristo jém Miññewip Sinyucmi. 48 Jém tammigtay, jém naxyucmic, jex juuts jém pixiñ jém watnetawip con naspótpót. Jém sinyucmic migtay jex juuts jém itwip sinyucmi. 49 Tanait jém ámooyi juuts jém watnetawip naxyucmi, jesanetim núcpa jém tiempo iga tanaitpa jém ámooyi juuts jém Miññewip Sinyucmi.

50 Mantiwitam, mannímaytooba iga jém tammayi y jém tannipiñ da núcpa sinyucmi jut injacpa Dios. Jém dapic jáyapa da wiap iwaganait jém jáypáppic. 51 Ich manacjodonatámpa sip jém jixi, jém dapic incutiyyiñeta. Da tacaatámpa tantumpiytam, pero tantumpiytam tacucagaytamtap. 52 Agui jicsciy tanascaaba así juuts tum pixiñ cuando ijitpa iixcuy. Tacucagaytap cuando sustap jém inajpigam suxi de jém trompeta. Porque tienes que sustap jém trompeta y jém caaneyajwip cupisayyajpa y dam nunca caaba eybic. Y taichtam tavivopic tacucagaytamtap. 53 Jém tammigtay jém dapic jáyapa tienes que joomasetpa iga jáyapa para siempre. Jém tammigtay jém caapáppic tienes que joomasetpa

iga da nunca caaba. ⁵⁴ Cuando joomasetpa jém tammijtay, jesic jáypa, da eybic caaba, jesigam cupacum juuts nimpá jém Dios inmati: “Cuyajpa iga caayajpa jém pixiñtam. Jém Cristo icoñwíy jém Wocciwiñ ipimi. ⁵⁵ A que miWocciwiñ, ¿jut it jém impimi iga anaccaatámpa? Micoñwiyñeum jém ánomi Cristo.” ⁵⁶ Tacaatámpa porque tanwatneta jém tánca. Y tanwattámpa tánca porque da tancupigayta jém Moisés inquímayooyi. ⁵⁷ Siip tanchiiba gracia jém tanjatun Dios porque dam tançinpa iga tacaaba porque jém tánomi Jesucristo tawitsagayñeum jém tantánca.

⁵⁸ Jeeyucmi, mantiwitam mantoytampápic, siempre wattaami juuts ixunpa Dios, odoy tsactaami jém Dios inmati. Seguido wattaami jém Dios iyoxacuy porque injodonam iga cuando tanwaganayoxa jém tánomi, da taxajayoxatámpa.

16

Jém tumiñ para Dios iyoxacuy

¹ Cuando inintuumawattámpa jém ofrenda iga inyoxpátpa jém tantiwitam, jém icupicneyajwip Jesucristo, wattaami juutstim anaquejayñe jém Dios ipixiñtam jém naxyucmi de Galacia. ² Cada jém wiñtipic jama de jém semana cada tumtum de mimichtam accáytaami jém tumiñ juuts Dios miwíwadáy jém semana. Jesic cuando anúcpa jemíc, da tanantuumawatpa jém tumiñ. ³ Cuando anúcpa jemíc jut miitta, ancutsatpa Jerusalén jutén jém impixiñtam jém incupinnetanwip iga ininicyajiñ jém tumiñ iga ichiiyajpa jém tantiwitam. Ininipatim tum toto iga wipictsonyajtaiñ. ⁴ Siiga wi iga anicpatim mex aich, jesic ich anwagananicpa.

Ijispá jém Pablo juchis nicpa joyi

⁵ Jesic cuando anicpa, tienes que anaspa jém naxyucmi de Macedonia. Jesic yajpa anaxi Macedonia, anicpatim Corinto. ⁶ Wiap ampoychíy con mimichtam. Wiaptim antsíy entero jém tiempo de succuc. Jesic mimichtam wiap anyoxpát jut anictooba ocmi. ⁷ Ich da ansunpa iga mánixpa no más tum rato iga awidanaspá. Ansunpa iga apoychíypa con mimichtam siiga Dios iwianjam jempic. ⁸ Ich atsiypa jém attebet Efeso hasta naspá jém siñ de Pentecostés. ⁹ Yim ánáyayta jém puerta iga anwatpa jém Dios iyoxacuy, tsam jáyan icupicyajpa jém Dios inmati. Pero ittim wati jém ajóixyajpápic.

¹⁰ Siiga núcpa jemíc jém Timoteo, jici iga miwaganayoxap sin çini porque je iwatpatim jém Dios iyoxacuy juutstim aich. ¹¹ Jeeyucmi mannímáypa, wixi jém Timoteo inñumpiytam, yoxpáttaami iga maymáyañ iga niguiñ más juumi. Porque sip ananjócta jém Timoteo con jém tungac tantiwitam iga miñajpatim yim.

¹² Siip manañmadáypa ti inasca jém tantiwí Apolo. Tsam ançunucsay iga niguiñ mijóyáy con jém tantiwitam, pero ijispa iga siip da wiap. Nicpa tungac jama cuando iniit lugar.

Pablo idioschiiba jém iamigoyaj

¹³ Odoy monñtaami, odoy tsactaami jém Dios inmati. Wattaami juuts tum pixiñ jém tsampic iwicyujcane jém Dios inmati. ¹⁴ Jesic titam inwattámpa, wattaami con jém wibic tóyooyi.

¹⁵ Siip mantiwitam, michtam injodonam iga jém Estéfnas con jém itiwitam jeeyaj jém moiwip icupicyaj Cristo jém naxyucmi de Acaya. Jeeyaj tsam iyoxpátyajpa jém icupicneyajwip jém Cristo. ¹⁶ Ansunpa siip iga inwixtámiñ itumpiy juuts jeeyaj, jém tsampic yoxayajpa y jém iyoxpátyajpápic jém tantiwitam. ¹⁷ Agui amaymay porque miñneum jém Estéfnas, jém Fortunato y jém Acaico. Miñ iwatyaj jém yoxacuy jém michpic da wiap inwatta porque da miita yim. ¹⁸ Jeeyaj tsam amaymaywat y mimaymaywattim mex mich. Jeeyucmi animpa wi iga tanwixtámiñ jexpic pixiñtam juuts jeeyaj.

¹⁹ Jém Dios ipixiñtam, jém aṅtuumayajpáppic jém naxyucmi de Asia, micutsadáypa waṭidios. Jém Aquila y Priscila con itumpiy jém Dios ipixiñtam, jém aṅtuumayajpáppic iticcim, micutsadáypatim waṭidios jém tánQmi Cristo iñiyimi. ²⁰ Itumpiy jém tantiwitam, jém ityajwip yim, micutsadáypatim waṭidios. Nadioschitamtají con tum aṅnacatsuuchi.

²¹ Síp ich aPablo manjáyáypa aṅcimí yíp aṅmaṭi iga mandioschitámpa.

²² Jém ḍapic itoypa jém tánQmi Jesucristo, wí iga ipictsóñiñ jém castigo. Síp, mánQmi, miñi.

²³ Jém Jesucristo miwattámiñ cuenta. ²⁴ Agui mantoytámpa iñtumpiytam, jém iṅcupicnetañwip Jesucristo. Jemum cuyaj.

Jém segunda carta jém ijáyayñewiip Pablo jém Corintopic pixiñtam

Pablo idioschiiba jém Dios ipixiñtam jém ityajwiip jém attebet Corinto

¹ Ich aPablo. Jesucristo accám juuts tum apóstol porque jempigam ixunpa tanJatun Dios. Siip ich con jém tantiwí Timoteo manjáyaytámpa mimichtam, jém Dios mipixiñtam, jém miñtuumatampáppic jém attebet Corinto. Anjáyápatim itumpiy jém Dios ipixiñtam icuwíti jém naxyucmi de Acaya. ² Siip jém tanJatun Dios y jém tánomi Jesucristo miwíwadaytamiñ, michiitamiñ paz.

Nimpa Pablo iga tsam yaachwatta

³ Siip tanjucijptámpa jém tanJatun Dios jém tánomi Jesucristo iJatun. Tsam tayaachanjampa, tacpocsáypa tánanama. ⁴ Dios tsam tacpocsáypa tánanama cuando pími tayaachwattap, jesic taichtam wiaptim tanacpocsáypa iñamamayaj jém yaachayajpaap jextim juuts Dios tacpocsáypa tánanama. ⁵ Tsam pími tayaachwattapim yíp vida jextim juuts yaachwatta jém Cristo. Jesic jeetim Cristo icuyucmi tacpocsayta tánanama iga tanyaachiyiñ cuando tayaachwattap. ⁶ Jeeyucmi aichtam ayaachwattamta iga manyoxpáttámpa iga Dios micpocsáyiñ iñanama y miciaacputtamtaiñ. Jeeyucmi aichtam acpocsayta ánanama iga michtam wiañtim iñyaachiyta cuando miyaachwattamta jextim juuts aichtam cuando ayaachwattamta. ⁷ Anwijodon iga mimichtam da iñchactámpa jém Dios inmati porque siiga miyaachwattamta juuts aichtam, numa Dios micpocsáypatim iñanama juuts aichtam acpocsayta ánanama.

⁸ Mantiwitam, ansunpa iga iñjodonatamiñ iga tsam pími ayaachwattamta jém naxyucmi de Asia. Tsam pími acutítstamta hasta casi da wiap anyaachiyta. Ich anjístámpa idic iga jemum accaatamta. ⁹ Ich anjampa juuts apreso, jém accaatapáppic. Dios ijícpa iga annascaaba jempic iga odoy ancupiguiñ iga ich wiap anyoxpátta anyaac. Iwianjam tanJatun Dios iga ancupiguiñ iga je icutum wiap ayoxpát, je wiap icpis jém caaneyajwiip. ¹⁰ Dios taciapputta iga da tanicpa jém infierno. Jesic taciapputpatim cuando tanascaaba jém mijpic yaachaji. Tannuntawijodon iga siempre taciapputtámpa. ¹¹ Siiga mimichtam anyoxpáttamtooba, anwejpáttaami Dios para aichtam. Siiga wati pixiñtam inwejpátayjpa Dios para aichtam, jesic núcpa jama iga jáyan pixiñtam ichiyajpa gracia Dios iga tsam awíwadayñeta.

Tiiga jém Pablo da nicpa jobit jém attebet Corinto

¹² Aichtam agui amaymáyata porque anjodon ánanamanjom iga anjywatne yíp naxyucmi y mimichtamanjom juuts anquejáy Dios. Ich da anjywatne ich anjiximi, yíp naxyucmipic, pero anjywatne porque Dios tsam ayaachanjam y ayoxpát iga wiañ anjywat. ¹³ Itumpiy jém cosa, jém siipic manjáyáypa, wiap immay y wiaptim inwicutiyyiyta. Ansunpa iga odoy nunca tsaci iga inwicutiyyiytamiñ. ¹⁴ Siip inwicutiyyiñeum en parte. Cuando miñgacpa yíp naxyucmi jém tánomi Jesucristo, michtam tsam mi-maymáyatámpa con aichtam y aichtam agui amaymáyatámpatim con michtam.

¹⁵ Ich anjampa ánanamanjom iga amaymáyatámpa con mimichtam. Jeeyucmi ich anjísipa iga wiñti manjoyñasáypa cuando anaspa jem. Jesic cuando asetpa, eybic manjoyñasáypatim. ¹⁶ Anjísipa iga manjoyñasáypa cuando anicpa jém naxyucmi de Macedonia. Ocmi cuando asetpa, eybic anaspa iga apoychíypa tum rato con mimichtam, jesic wiap anyoxpátta cuando anicpa jém naxyucmi de Judea. ¹⁷ ¿Que michtam iñjísipa iga

mammigóyáypa porque hasta siip da oyñe mánámta? ¿Que iñjísipa iga ich ajex juuts tum pxiñ jém dapic icupicne Dios iga wiap anim tum rato iga anicpa y tungac rato animpa iga da anicpa? ¹⁸ Pero Dios ijodon iga aichtam da mammigóyayta, da mannímayta jeeti rato iga anicpa y jeeti rato iga da anicpa. ¹⁹ Ich con Silvano y Timoteo oy manañmadayta de Jesucristo jém Dios iManic. Yíptim Cristo siempre iccupacpa ti tanímayñe, da tamigóyáypa. ²⁰ Juť tanañwejpáttámpa Dios wí iga tanímtámpa “Jempigam it wí” porque tanjodon iga jém tánomi Cristo iccupacpa juuts tajíycamayñe Dios. Jeeyucmi tanimpa iga “Jempigam it wí.” Asíam tanjupámpatim jém tanjatun Dios. ²¹ Siip mimichtam y aichtam Cristojam tammichitam porque jém tanjatun Dios tacupineta y tamichaneta. ²² Dios taccámayñeta tum sello iga quejiñ iga Dios tamichi. Tachiitamta jém Dios iAnama tánanamanjom iga tanjodónatamiñ iga seguro tampictsonjámpa titam tachiiba Dios.

²³ Danam nicne manjójáy juuts anjísne idic porque da manwogaytooba. Dios tsíy juuts tum testigo iga da mammigóyáypa. ²⁴ Ich da mampimiytooba juuts tum anjagooyi porque michtam inwicupicneta jém tánomi Jesucristo juuts aichtam. Más wí iga tanwaganayoxatámpa iga tanaítamiñ jém wibic maymáyají. Seguido incupicpa iga Cristo miyoxpátpa, da iñchacpa iga incupicpa.

2

¹ Jeeyucmi ich anjís iga da nicpa manjójáy iga eybic mantsiganjácwatpa iga manwogáypa. ² Siiga ich mantsiganjácwattámpa, ¿jesic i wiap amaymaywat aich? Da i más, solamente mimichtam jém mantsiganjácwatnewip. ³ Jeeyucmi manjójáy juuts manjójáyñe porque da anictooba iga mantsiganjácwattámpa mimichtam. Más anwanjam iga ammaymaywattámpa aich. Annuntawijodon iga cuando ich agui amaymáyp, jesic michgacti agui mimaymáyatámpa iñtumpiytam. ⁴ Jesic manjójáy jém wiñtipic toto, agui pimi manjísipa, pimi anyácne hasta awejpa. Pero da manjójáyta iga miñyáctamiñ, manjójáyta iga manacjodónap iga ich tsam pimi mantoytámpa.

Pablo iwadáypa perdón jém pxiñ jém imalwatnewip

⁵ Siiga jém tantíwi, jém imalwatnewip, tatsiganjácwattámpa, da solamente anyácpa aich, pero miñyáctámpatim mimichtam. ⁶ Siip itum wí jém castigo, jém iñchiiñewip jém tantíwi jém imalwatnewip. Odom chíi más. ⁷ Siip más wí iga tanwadáyíñ perdón y tanacpocsáypa ianama. Da wí iga pimi anyácpa yíp pxiñ hasta ichacpa Dios inmati. ⁸ Jeeyucmi mancunucsáypa iga anquejaayi yíp pxiñ iga eybic iñtoytámpa. ⁹ Manjójáyñe wiñti iga iñchiiñ castigo jém pxiñ iga mancutitstámpa siiga numa inwattámpa juuts manañquejayñeta. ¹⁰ Siiga mimichtam inwadayñeum perdón jém pxiñ, jesic ichgacti anwadáypatim perdón. Porque siiga ich anwadáy perdón algun pxiñ, anwadáyum así iga manyoxpáttámpa jém tánomi Cristo icuyucmi. ¹¹ Wí iga tanwadáy perdón jém imalwatnewip, jesic jém Wocciwiñ da wiap tacoñwíy. Porque tanjodon iga jém Wocciwiñ tsam jáyayanjichich.

Anyácne Pablo jém attebet de Troas

¹² Cuando nic anañmat jém tánomi Jesucristo inmati jém attebet Troas, tanjatun Dios tsam achi yoxacuy jemíc. ¹³ Tsam anyácne ánanamanjom porque da ampát jém tantíwi Tito. Jeeyucmi anañquímajum jém tantíwitam jemíc, aset jém naxyucmi Macedonia.

Jém tánomi Jesucristo tsam tayoxpátpa

¹⁴ Pero iyucupdios iga jém tánomi Jesucristo siempre tayoxpátpa iga tancoñwíytámpa jém Wocciwiñ ipimi. Tayoxpátpatim iga tananictámpa jém Dios inmati jutquej juuts tum wibic cñi núcpa jutíñquej. ¹⁵ Aichtam ajextam juuts jém poma ijoco iciñi juuts jém Jesucristo iñoaypaap ijatun. Núcpa jém iciñi jut it jém iciacputyajpáppic y jut it

jém togoyyajpáppic. ¹⁶ Cuando ixucpa jém togoyyajpáppic, da ipictsonyajpa. Jém dapic iwianjam cuando ixucpa, iccaaba. Pero cuando ixucyajpa jém iciacputyajpáppic Dios, jesic jém cñi ichiiba vida. Tsam mij yíp yoxacuy, da i wiap iwat siiga Dios da tayoxpátpa. ¹⁷ Aichtam da síp anwatta negocio con Dios inmati. Da anañcodiytámpa juuts algunos tsam incodíypa. Pero aichtam manwianquejáypa jém wibic anquímayooyi, jém dapic je migooyi, porque aichtam Dios acutsatta. Anañmattámpa juuts aixtámpa Dios, juuts ayoxaciwiñ de jém tánomi Jesucristo.

3

Anmadayta jém pixiñtam de jém jomipic pacto

¹ Cuando mannímaytámpa jempic, ¿que iñjistámpa iga anyaac anacujíptap? ¿Que iñxunpa iga manñijuncodáypa tum toto iga ánixpictámiñ, iga da amalotam? ¿Que iñxunpa iga manwágáypa tum toto iga ánixpictámiñ juuts iwatyajpa algunos? ² Mimichtam mismo mitoto iga quejpa iga anwíwatne. Jém jaycámnewiip anañamanjom jém tansuntampáppic. Jesic itumpiy iixpicpa y wiap imay. ³ Mimichtam mitoto jém ijayñewiip jém Jesucristo iyaac y acñijuncodayta aichtam iga ananicpa jém tungac pixiñtamanjom. Mijex juuts mitoto, pero da mijayñe con tinta, mijayñe con jém Dios iAnama jém vivopic. Yíp toto dapic i ijaycámne jém tsaatablayucmi, pero jaycámnetá jém pixiñ ianamayucmi.

⁴ Animpa así porque ancupicpa iga Dios wiap iwat itumpiy cosa porque ánixpicne jém tánomi Jesucristo. ⁵ Aichtam anyaac da ti wiap anwatta, pero itumpiy jém wiapaap anwat, anwatpa porque Dios ayoxpátne. ⁶ Dios ayoxpátne iga anañmadáypa jém pixiñtam jém jomipic trato. Yíp jomipic trato da nimpá iga tancupicpa jém wiñicpic anquímayooyi, jém jayñewiip, pero nimpá iga tampictsonpa jém jomipic vida, jém tachiiñewiip jém Dios iAnama. Porque jém wiñicpic anquímayooyi, jém jaychacnewiip, taccaaba, pero jém Dios iAnama tachiiba vida.

⁷ Jém Moisés inquímayooyi jaycámnetá jém tsaatablayucmi. Tsam pimi tsocpa jém Moisés iwiñpac cuando inimiñ jém anquímayooyi. Hasta jém Israelpic pixiñtam da wiap iámyaj. Tsam pimi tsocpa, pero jeeti rato píchpa ixi. Pero siiga tsam pimi tsocpa jém Moisés iwiñpac cuando inimiñ jém wiñicpic anquímayooyi, jém taccaapáppic, ⁸ jesic más pimi wi jém wibic juctiantsoca jut núc jém anmati jém inimiññewiip jém Dios iAnama. ⁹ Tsam pimi tsocpa jém anquímayooyi, jém taccaapáppic, pero más pimi witsocpa jém wibic anmati, jém nimpáppic iga Dios tapictsonpa. ¹⁰ Porque siip jém pecapic anquímayooyi, jém tsampic tsocpa idic, dam para ti wi porque ni uxaj da ictsíypa juuts yíp jomipic anquímayooyi. Je más pimi witsocpa. ¹¹ Porque siiga tsam wiquejpa iga miñ Dioscñim jém anquímayooyi, jém dapic jáypa, tienes que más wiquejpa iga miñ Dioscñim jém tungac anquímayooyi, jém jáypáppic para siempre.

¹² Como aichtam anwijodon iga más wi yíp anquímayooyi, jeeyucmi annu-umanmattámpa, da ti anñipa. ¹³ Da tanwatpa juuts jém Moisés. Je icujimpa iwiñpac con tum yic puctucu iga jém Israelpic pixiñtam odoy iixayyajiñ iga píchpa ixi jém iámooyi, jém aguipic tsocpa. ¹⁴ Pero jeeyaj da icutiyyiyajpa. Hasta siip cuando imayyajpa jém wiñicpic anquímayooyi, jém pixiñtam juuts icujimneyaj iwiñpac con jém yic puctucu y da wiap iguixixóy. Da i iccáyayñe jém puctucu porque da i wiap iccáyáy hasta que icupicyajpa jém Jesucristo. ¹⁵ Hasta siip cuando imayyajpa jém Dios inmati, jém ijayñewiip jém Moisés, jém pixiñtam juuts anjimne ijixi con jém yic puctucu. Jeeyucmi da wiap icutiyyiyaj jém Dios inmati. ¹⁶ Pero cuando tum pixiñ icupicpa jém tánomi Cristo, jesic accáyaytáp jém yic puctucu. ¹⁷ Jém tánomi je jém Dios iAnama. Jut it jém tánomi iAnama, cutsigayñetawum jém pixiñtam iga odoy más icupicyajiñ jém Moisés inquímayooyi. ¹⁸ Jeeyucmi taichtam como taccáyayñetawum jém yic puctucu

tanwiñpacyucmi, tajextam juuts tum tescat. Quejpa jem tanwiñpacyucmi jem tánQmi ichoca. Cada jama más y más tacucacpa iga más y más tatsíypa juuts jem tánQmi Cristo. Más pimi tawitsocpa hasta más quejpa jem Cristo. Iwatpa jempic jem tánQmi iAnama.

4

¹ Jesic jem tanJatun Dios ayaachanjamta y ayoxpáttampa iga wiñiñ anwatta jem Dios iyoxacuy, jeeyucmi da antsacta. ² Siip ich antsacneum jem migooyi, jem anñecnewiip, jem tatsaawatpáppic. Da asiitampa juuts jem pixiñtam jem tsampic jáyayanjichich. Da ançucagáy jem Dios inmati. Ananmattampa jem numapic anquímayooyi. Jesic itumpiy jem pixiñtam ijodon anamanjom iga da ammigóyáypa. Ijodonjim jem tanJatun Dios. ³ Da anñecne yip wibic anmati. Solamente anñecne para jem pixiñtam jem togoyyajpáppic. ⁴ Como jeeyaj da icupicyajpa yip wibic anmati, jem Wocciwiñ, jem yippic naxyucmic dios, icáchtiwatne jem pixiñtam, jem dapic icupicyajpa Cristo, iga odoy icutiñyiyiñ y odoy wiñiñ iixyaj jem wibic jucti antsoqa, jem wibic anmati, jem tachiñewiip jem tánQmi Cristo; je jem Dios icuwiñ. ⁵ Cuando ananmattampa, da ananmattampa aichtampic ananmati. Ananmattampa iga jem Jesucristo je tánQmi. Aichtam nada más amozotam iga mançuyoxatampa porque tsam tatoypa jem Jesucristo. ⁶ Porque jeetim Dios iwat jem jucti iga yicquejóypa jem piichcim cuando mu iwat yip nas. Jeetim Dios tayicquejpa tananamanjom iga wiñiñ tánix jem wibic Dios jem Jesucristo iwiñpacyucmi.

Wi iga tanaitpa fe iganam taittampa yip naxyucmi

⁷ Pero taichtam tanait yip wibic jucti antsoqa jem nassuunjom. Yip nimtooba jem tammijtay. Jesic quejpa iga Dios tachiiba yip tsam mijpic pimi, da je taichtam tampimi. ⁸ Aichtam ayaachwattamtap jutquej, pero siempre tacupujtap. Da anjodonjam ti wiap anwatta porque tsam it jem enemigo. Pero da nunca anjisa iga acoñwiypa. ⁹ Tsam amalwadaytamta, pero Dios da atsacta ancutum. Accutiñtamta naxyucmi, pero da i wiap mu accaata. ¹⁰ Jutquej anicpa, accaata tooba juuts accaata jem Cristo. Pero jutquej anicpa, quejpa iga vivo jem Cristo porque tsam acupujpa. ¹¹ Ich anjodon iga accaata tooba itumpiy jama jem Jesucristo icuyucmi. Jempam quejpa iga anaitta jem Cristo ivida jem ammijtayyucmi, jem caapáppic. ¹² Tsam ayaachwattamtap yip naxyucmi. Accaatamtooba aichtam, pero mimichtam impictsonjtampa jem vida jem tachiñewiip jem Jesucristo.

¹³ Nimpa jem Dios inmati jem jayñewiip: “Ich ançupicpa iga Dios wiap tayoxpát.” Jesanetim aichtam ançupicpatim juuts jem pixiñ jem ijayñewiip jem Salmo iga Dios wiap tayoxpát, jeeyucmi wiap ananmat jem wibic anmati. ¹⁴ Ich anjodon iga Dios, jem icpisnewiip jem tánQmi Jesucristo de jut it jem caaneyajwip, tacpispatic taichtam y tananictamtap tantumpiytam jem Dios iwiñjom. ¹⁵ Annascata jem yaachaji mimichtam inçuyucmi iga miwiwadáypa Dios. Porque cuando wiwadayyajta, tsam jáyan pixiñtam ichiiyajpa gracia Dios, icujipyajpa.

¹⁶ Jeeyucmi ich da nunca antsactamtooba jem Dios inmati. Tsam ayaachwattap. Yajtooba jem ammijtay, pero cada jama jomasetpa jem ananama. ¹⁷ Yip yaachaji jicsci y naspá, da jáypa cuyajpa, pero jem tançoñwiyooyi siñyucmi tsam pimi wi, da nunca cuyajpa. Jeeyucmi tanjampa iga yip naxyucmic yaachaji da más pimi y da más jáypa. ¹⁸ Da tanwadáypa caso jem cosa jem tánixpáppic, pero tanwadáypa caso jem dapic tánixpa porque jem tánixpáppic cuyajpa. Jem dapic tánixpa, je da nunca cuyajpa.

5

¹ Siip tanjodon iga misap jem tammijtay yip naxyucmi jex juuts tum tic dapic jáypa. Pero Dios tawadayne tum tic siñyucmi, jem dapic nunca misap, jem dapic je pixiñ

iwati. ² Numa, iganam tait yíp naxyucmi tsam tanjisa jém sinyucmipic tic. Tsam tanjucagaytooba yíp tammijtay iga nicpa taiti jém sinyucmipic tic. Yíp nimtooba jém jomipic mijtay. ³ Anaccampa juuts tum jomipic yooti iga odoy atsiyiñ ancusici. ⁴ Iganam anait yíp ammijtay juuts tum tic agui anyacne, tsam anjisa iga antsactooa jém ammijtay. Da antsactooa yíp pecapic yooti iga atsiypa ancusici, pero antsactooa iga ampictsonpa jém jomipic yooti. Jesic cuyajpa yíp naxyucmipic mijtay, jém caapáppic, ampictsonpa jém jomipic mijtay jém dapic caaba. ⁵ Dios tawitsagáy tánanama iga wíap tampictson jém jomipic mijtay jém dapic cuyajpa. Tachiiñeta jém Dios iAnama iga tacjodónap iga numa tampictsonpa jém tachiipáppic Dios.

⁶ Jeeyucmi ich anwicupicpa iga achiiba titam ajycámayñe Dios. Siip iganam anait yíp ammijtay, anjodon iga danam ai con jém tánomi Cristo. ⁷ Tantúnjyipa jém Cristo porque tanjucupicpa iga tayoxpátpa. Da tantúnjyipa porque wíap tánix. ⁸ Ich tsam anwicupicpa iga Dios achiiba titam ajycámayñe. Jesic más anwianjam iga antsacpa yíp mijtay yimpic anait iga wíaiñ nicpa aiti con tánomi. ⁹ Jeeyucmi aichtam tsam anwadaytampa caso titam ixunpa Dios siiga anaitñam yíp ammijtay, o siiga anicneum. ¹⁰ Tantumpiytam tacnastamtap jut cipínóyipa jém Cristo. Cada tumtum de taichtam tajojtap juuts tanwatta iganam tait yíp vida. Siiga tanwíwat o tammalwat.

Jutsap tantsíyta como taamigo con Dios

¹¹ Aichtam anjodon iga jém tánomi tum mijpic anjagooyi, ichiiba castigo jém pixiñtam jém imalwatneyajwíp. Jeeyucmi ich tsam anwadáypa caso iga ananmadáypa jém pixiñtam jutsap iciputyaj de jém castigo de Dios. Jém tanjatun Dios iwíjodon juutspic apixiñ. Ansunpa iga michtam jodónataamitim juutspic apixiñ. ¹² Da síp anacujípta anyaac, no más manchiiba lugar iga mimaymáyatámiñ con aichtam, jesic wíap ininjijyac jém pixiñtam jém tsampic nacujíptap iyaac. Jeeyaj tsam iwadáypa caso jém cosa jém tánixtampáppic, pero da ijisa ti iniit íanamajom. ¹³ Nimyajpa jém pixiñtam iga ich aloco porque tsam anjucyojap Dios. Siiga aloco, wí para Dios. Siiga da aloco, wí para mimichtam. ¹⁴ Jém Cristo itóyooyi tapimíyipa. Tanwijodon iga jém accaatawíp accaata para itumpiy jém pixiñtam, jesic itumpiy caayaj. ¹⁵ Accaata jém Cristo para itumpiy jém pixiñtam. Siip jém ipictsonnewíp jém jomipic vida da iwatpa juuts ixunpa iyaac, pero iwatyajpa juuts ixunpa Cristo, jém accaanetawíp por jeeyaj, jém siippic pisneum. ¹⁶ Da anjisa tum pixiñ juuts yíp naxyucmipic. Wiñic anjisa idic jém Cristo juuts tum yíp naxyucmipic pixiñ, pero siip da más anjisa jempic. ¹⁷ Jesic siiga tum pixiñ iwaganait Cristo, tsíy juuts tum jomipic pixiñ. Cuyajneum itumpiy jém wiñicpic jixi, jesic itumpiy cosa jomiñam.

¹⁸ Tawadayta jempic jém tanjatun Dios cuando icutsat jém Cristo iga tawitsagayta tantánca iga tatsíytámiñ taamigo con Dios. Siip taccám juuts tum iyoxac#wiñ iga tananmadáyíñ jém pixiñtam iga wíaiñ ichíyyaj amigo con Dios. ¹⁹ Tanacjodónap jém pixiñtam iga Cristo iwaganait Dios yíp naxyucmi. Oy iwitsagáy jém pixiñtam itánca iga odom más tsíyyajiñ juuts enemigo con Dios. Dam más ichégáypa jém pixiñtam itánca. Taichtam tachiita jém cargo iga tananmadáypa jém pixiñtam jém wibic anmatí iga dam más tsíyipa juuts enemigo con Dios. ²⁰ Ich acutsat Cristo juuts tum representante. Manjucunucáypa juuts Dios micunucáypa iyaac iga michíytámiñ amigo con Dios. Manjucunucáypa jém Cristo iníyimi iga odom más michíyiñ juuts enemigo con Dios. ²¹ Jém Jesucristo da wat ni tum tánca, pero por culpa de taichtam, Dios iix jém Cristo juuts tum pixiñ táncaiywíp. Jempam wat Dios iga taichtam tatsíytámiñ juuts tum wibic pixiñ jém Dios iwíñjom porque Cristo tamichi.

6

¹ Jesic aichtam anwaganayoxatámpa Dios, jeeyucmi man̄cunucsáypa mimichtam iga odoy xajapictson̄i jém Dios ifóyooyi, jém siippic min̄quejayñe Dios. ² Nimpa jém Dios in̄māti jut̄ jayñeta:

Cuando núcpa jém tiempo iga taw̄iwadaytooba Dios, jesic tamatoñtámpa.

Cuando núcpa jém jama iga taciacputtámpa Dios, jesic Dios tayoxpáttámpa.

Siip núcum jém tiempo iga taw̄iwadáypa Dios. Siip núc jém jama iga taciacputtamtap.

³ Agui anawattap cuenta anyaac iga odoy ammalwadiñ porque jesic da i imalnímáypa yíp anyoxacuy. ⁴ Titam annascaaba anyaachiytámpa iga quejiñ iga an̄cuyoxatámpa Dios. Cuando ayaachwattap y cuando it jém yaachaji, da anāi titam atogóyay, aichtam anyaachiytámpa. ⁵ Cuando tsam acótstamtap y apajtamtap y tsam it jém ajóyixpáppic, jesic anyaachiytámpa. Cuando tsam p̄imi ayoxatámpa iga an̄wattámpa jém Dios iyoxacuy hasta da wiap ammon̄ta y tsam ayuatámpa, jesic anyaachiytámpatim. ⁶ Quejpa iga an̄cuyoxatámpa Dios porque siempre an̄wiwattámpa, an̄cut̄hiyiytámpa jém numapic an̄māti, anyaachiytámpa cuando ayaachwattamtap, da amalotam, anaifta jém Dios iAnama, anaifta jém wibic tóyooyi. ⁷ Anañmattámpa jém numapic an̄māti, achiitamta jém Dios ip̄imi, anasiitámpa jém Dios in̄māti jex juuts tum espada iga an̄coñwíypa jém ánenemigoyaj y con jém espada wiaptim anacupujta. ⁸ It jama aw̄ixtamtap, it jama ajóyixtamtap. It jama aw̄inimaytamtap, it jama amalnimaytamtap. It jama jém pixiñtam ijsiyajpa iga ich amigóypa, it jama ijsiyajpa iga ich da amigóypa. ⁹ It jama aixtamtap juuts tum p̄ixiñ dapic i iixpicpa, it jama aixtamtap juuts tum p̄ixiñ ixpictapáppic. Accaatatooba, pero hasta siip aifta vivo. Tsam achiitamta castigo, pero da i accaata. ¹⁰ Ichtam tsam p̄imi anyácnetta, pero agui amaymaytam. Tsam apobretam, pero agui anricowatpa jém pixiñtam. Da ti anaifta, pero itumpiy cosa ammiichitam.

¹¹ Mant̄iwitam, miiftan̄wiip jém atebet Corinto, ich man̄wian̄quejayñe itumpiy jixi jém itw̄iip ánanamanjom. Da ti anañécne ánanamanjom. ¹² Ich tsam mantoytámpa, pero mimichtam da antoytámpa parejo juuts ich mantoypa. ¹³ Ich man̄cunucsáypa juuts tum jatun̄pic icunucsáypa iman̄ic iga iññuuman̄madáyiñ ti iniit iñnanamanjom juutstim ich añwatne.

Taichtam tamastic jém Dios im̄chi

¹⁴ Odoy accaami tumti yugo con jém dapic icupicpa Cristo. ¿Jutsap iw̄inanigáy jém wibic jixi con jém malopic jixi? ¿Jutsap iwagaityaj jém juctian̄tsoca con jém piichi? ¹⁵ ¿Jutsap iniityaj tumti jixi jém Cristo con jém Wocciwiñ? ¿Jutsap iniityaj tumti jixi jém icupicnew̄iip Cristo con jém p̄ixiñ jém dapic icupicne? ¹⁶ ¿Que wiap iwaganait Dios im̄astic jém watnas? Da wiap. Taichtam jém Dios tamastic jém vivopic. Juuts Dios nim iyaac:

Ich aif jém ampixiñtam ianamanjom, anwaganasiiba jeeyaj.

Ich aDios de jeeyaj.

Jeeyaj ampixiñtam, nimpá Dios.

¹⁷ Jeeyucmi nimpatim tan̄jatun̄ Dios:

Tsagan̄puttaami itumpiy jém dapic icupicneyaj Dios.

Odoy waganasi jeeyaj.

Odoy wattaami juuts iwatyajpa jém malopic p̄ixiñtam.

Odoy ts̄ici jém dapic w̄i.

Jesic mampictson̄támpa.

¹⁸ Ich atsíypa juuts mimichtam iñ̄jatun̄

y mimichtam michíytámpa juuts manjaymaníctam y jém manyommaníctam. Nímpa jém tanJatun Dios jém iniitwíip itumpiy ipími.

7

¹ Mantíwítam mantoytampáppic, jempam tajíycámayñeta jém tanJatun Dios. Jeeyucmi wí iga tantsactámiñ itumpiy jém malopíc cosa jém imalwadaypáppic jém tammijtay y jém tánanama iga tacuáyñetámiñ. Wadaytaami caso ti ixunpa Dios. Wíwattaami con itumpiy íñanama.

Cucacyaj ijíxi jém Corintopíc píxiñtam

² Jístaami íñanamanjom iga anwíictsonotámiñ. Ich da í ammalwadayñe, ni da í anacmalwatne ni da í ammigóyayñe. ³ Da síp mammétsáy jém íñtánca iga michíitap castigo. Pero manañmadáypa así porque tsam manjístámpa ánanamanjom. Wí iga tawagaittámpa yíp naxyucmi hasta tawagacaaba. ⁴ Ich anwíjodon iga michtam inwattámpa juuts ich ansunpa. Tsam amaymay con mimichtam. Numa, tsam ayaachwatta, pero cuando manjístámpa ánanamanjom, tsam pími amaymay.

⁵ Dende anúcta jém naxyucmi de Macedonia, da ajejneta ni uxan. Tsam amalwadaytamta jutíñquej. Tsam ityaj jém ánenemigo, tsam áñayajpa con aichtam. Tsam aciñne ánanamanjom. ⁶ Pero Dios siempre iyoxpátpa jém anyácneyajwíip, acpocsáyíim aichtam ánanama cuando miñ jém Tito. ⁷ Da solamente amaymaywadáy ánanama cuando núc jém Tito, pero amaymáypíim porque michtam tsam immaymaywat jém Tito cuando oy mijóyáy. Nímpa jém Tito iga tsam minyácnetá iga immalwatneta idíc. Nímpatim iga agui anjístámpa mimichtam íñanamanjom. Cuando ammaton iga agui anjísipa, jesic mástím pími amaymáyp.

⁸ Agui mantsiganýácwat cuando manjáyáy jém wiñtípíc toto. Anyácne uxan cuando manjáyáy jém toto porque tsam pími manwogáy. Pero síp ich da anyácne iga manjáyáy jempic porque ánix iga jém toto michiganýácwat no más tum rato, ocmi jeetim toto miyoxpátta iga íñchactámiñ iga immalwattámpa. ⁹ Síp amaymay, pero da amaymay iga minyácnetá idíc, amaymay porque cuando mantsiganýácwat, íñchac itumpiy iga immalwatpa. Mimichtam íñyaachiyta jém anyaaqui hasta inwattámpa juuts ixunpa Dios. Síp quejpa iga manwíwadayñe. ¹⁰ Dios tacutsadáy jém anyaaqui iga tactsacpa iga tammalwatpa. Ocmi taciacputtámpa iga odoy togóyíñ tánanama. Jesic tamaymáyatámpa. Pero yíp naxyucmípic píxiñtam jém dapíc icupícpa Dios cuando íñascaaba jém anyaaqui, da ichacyajpa jém malopíc jíxi, más ípíctsonpa jém castigo para siempre. ¹¹ Mantsiganýácwat porque da inwatta juuts ixunpa Dios. Íxi síp iga tsam inwadaytámpa caso ti ixunpa Dios. Incupuj jém incompañero, íñjampa iga agui imalwatne. Quejpa iga tsam inwattamtooba juuts ixunpa Dios, hasta más pímic castigo íñchiíta jém iwatnewíip jém mal. Quejpa iga da inwíanjám jém malopíc cosa. ¹² Cuando manjáyáy jém toto, da iga tsam anjísipa jém imalwatnewíip ni datim iga tsam anjísipa jém malwadayñetawíip. Pero manjáyáypa jém toto iga quejñ Dios iwiñjom iga tsam anjístámpa mimichtam. ¹³ Jeeyucmi agui acpocsayta ánanama y tsam pími amaymáyata.

Pero más pími amaymáyata iga ánix iga maymáya jém Tito porque mimichtam tsam pími ínyoxpátta iga ichaguiñ jém anyaaqui. ¹⁴ Annímáy jém Tito iga tsam amaymay con mimichtam. Tsam mancujípta. Síp da atsaap porque numa mimichtam inwatta juuts annímáyñe jém Tito. Da je migooyi itumpiy cosa jém mannímáyñewíip mimichtam. Datim je migooyi jém annímáyñewíip jém Tito. ¹⁵ Jém Tito más pími mitoypa íanamanjom cuando íjísipa iga tsam inwatta titam miñímáy. Quejpa iga tsam inwadáypa caso iga inwattámpa juuts ixunpa jém Tito. ¹⁶ Ich amaymay porque anjodon iga siempre inwattámpa juuts ixunpa Dios.

8

Yoxpátyajtap jém tantiwitam con jém ofrenda

¹ Siip, mantiwitam, manacjodónatooba jutsap iyoxpát Dios jém ipixiñtam jém naxyucmi de Macedonia. ² Jeeyaj tsam pimi malwadayyajta, tsam cutitsta, pero da anyácnayaj. Tsam yaachayajpa jém pxiñtam, pero itúmyajpa jáyan tumiñ iga iyoxpátyajpa jém tantiwitam juuts tum rico. ³ Ich ánix iga ijiximi itúmyajpa jém tumiñ. Itumpiy jém tumiñywip chioyyajpa, chioyyajpatim jém dapic tumiñiy. ⁴ Jém Macedoniapic pxiñtam tsam iyoxpátyajtooba jém itiwitam jém icupicneyajwip Jesucristo. Yoxpádooyajpatim jeeyaj con jém tumiñ. Tsam awágáy permiso iga waiñ ichiyaj. ⁵ Ich da anjisa jém pxiñtam siiga ichiyajtooba jém tumiñ jém tungac itiwitam. Pero wiñti ijisa con itumpiy ianama iga icuyoxayajpa Cristo y iga acuyoxatámpatim aichtam. Jempam iwianjam Dios. Jesic ocmi ijiximi itúmyajpa jém tumiñ. ⁶ Ich anjuncusáypa jém Tito iga iwadiñ eybic juuts moj wat con mimichtam iga iñtúmtámpa jém tumiñ iga iñyoxpáttámpa jém tantiwitam. ⁷ Mimichtam tsam inwicupictámpa Dios, tsam wip iniquej jém Dios inmati, tsam inwicutiyyitámpa jém wibic anquímayooyi, tsam inwattámpa con itumpiy iñanama jém Dios iyoxacuy, y mimichtam tsam antoytámpatim aichtam. Jesic wi iga iñjístamiñ iga iñyoxpáttámpa jém tantiwitam con jém tumiñ.

⁸ Da mampimiytámpa iga inwattamiñ jempic, nada más mancutitstamtooba siiga numa inisítámpa jém numapic tóyooyi. Jeeyucmi manajmadayñeta iga jém Macedoniapic pxiñtam tsam iyoxpátyajpa jém yaachayajpápic. ⁹ Michtam iñjodontam iga jém tánomi Jesucristo tsam tatoytámpa. Tsam rico jém tánomi, pero ipoychac jém sinyucmic riqueza iga waiñ miyoxpáta. Oy yip naxyucmi juuts tum pxiñ pobre iga mimichtam miricojatamiñ. ¹⁰ Ich mannímáypa ti síp anjis. Ich animpa iga más wi para mimichtam siiga iniccupacpa jém mojuwip inwatta maamtymi. ¹¹ Siip accupactaami con itumpiy iñanama juuts iñjnsneta idic wiñti. Chiitaami jém iñtiwitatim titam iniitta. ¹² Siiga tum pxiñ da inij jáyan tumiñ, pero tsam iyoxpáttooba y ichiiba uxaj, jesic Dios iixñe jextim juuts jém ichiñewip jáyan.

¹³ Ich da síp mannímáy mimichtam iga iñyoxpáttamiñ jém tungac tantiwitam iga mitogóyaytamiñ. ¹⁴ Ich animpa wi iga jextim miidiñ juuts jém iñyoxpátnewip. Siip mimichtam wip iniccaps jutsaj itogóyayaj jeeyaj. Jesic tungac tiempo jeeyajgagam wip michiyaj jutsaj mitogóyayta. ¹⁵ Juuts jayñeta jém Dios inmati: “Jém ipiñewip jáyan jém wiccuy jém titsinaxyucmi ictsíypa, pero dam cutsíypa. Jém ipiñewip uxaj, da ti itogóyay.”

Cutsattap jém Tito con icompañeroyaj

¹⁶ Iyucupdios iga jém tanjatun Dios ichi jixi jém Tito ianamanjom iga mijístamiñ juutstim aichtam manjístámpa mimichtam. ¹⁷ Cuando anjuncusáy jém Tito, acupic, pero je mismo tsam miyoxpáttamtooba, siip ixtaami iga miyoxpáttámpa ijiximi.

¹⁸ Siip mancutsadáypa jém Tito con jém tungac tantiwí jém tsampic wip inmat jém wibic anmati jut antuumayajpa jém Dios ipixiñtam. ¹⁹ Da no más ich ancutsat jém pxiñ, pero icupinyajtim jém Dios ipixiñtam jut antuumayajpa yim iga wip awaganasi aichtam iganam anwattámpa jém wibic yoxacuy jém siipic anwattámpa. Jesic cujítap jém tánomi Cristo y quejpa iga tsam tantoypa jém tantiwitam. ²⁰ Anwíwattooba iga odoy i waiñ amalnimáy iga anchiiba yip tumiñ jém tantiwitam. ²¹ Siip anwadáypa caso iga anwíwatpa jém Dios iwiñjom y anwíwatpatim jém pxiñtam iwiñjom.

²² Ancutsatpatim con jeeyaj tum jém tantiwí, jém tánixñewip, iga iwattooba juuts ixunpa Dios. Watciy ancutits yip pxiñ siiga numa iwattooba juuts ixunpa Dios, quejpa

¹ Ich aPablo. Jém tánQmi Cristo achi jixi iga da amalo, iga atóyóypa, jeeyucmi mañcunucsáypa. Nımyajpa iga da amalo cuando tawagaitta, pero tsam apımıyóypa cuando atsıy juumi de mimichtam. ² Sıp mañcunucsáypa iga iñchaguiñ iga immalwatpa, jesic cuando nicpa mánám, da mañwogáypa. Porque algunos de mimichtam nımyajpa iga ich ammalwatpa juuts cualquier jém pıxiñtam. Ich aıt dispuesto iga anáñámmocpa jém pıxiñtam iga añwogáypa. ³ Numa taichtam yıp naxyucmıpic tapıxiñtam, pero da jempic táñatámpa juuts yıp naxyucmıpic pıxiñtam. ⁴ Cuando táñatámpa con jém Dios ipımi, jesic tammıswadáypa jém Wocciwiñ ipımi. ⁵ Jempam tammıswatpa jém mıgooyi y cualquier jém malopic jixi jém iniıtwiıp jém pıxiñtam ianamanjom, jém dapic ijıcpa iga icupıcpa Dios. Tañcoñwıyypa jém pıxiñtam ijıxi iga icupıguiñ jém Cristo. ⁶ Cuando wıquejpa iga inwattámpa itumpıy juuts ixunpa Dios, jesic ich wıap anchi castigo jém tantıwıtam, jém dapic iwatyajpa itumpıy juuts ixunpa Dios.

⁷ Mimichtam iñixtámpa jém pıxiñtam jém nımyajpáppic iga icupıcpa Cristo. Wı iga ijodónaiñ iga aichtam añcupictámpatım Cristo. ⁸ Siiga más jáyan anacujıptap anyaac iga tánQmi accám juuts tum añjagooyi, da atsaap. Achi jém cargo iga manyoxpáttámpa iga más y más inwattámpa juuts ixunpa Dios. Da achi jém cargo iga mammalwadadaytámpa. ⁹ Da ansunpa iga mantsiganjecpa con jém toto jém mañcutsadayñewııp. ¹⁰ Nımyajpa iga tsam pımi mañwogáypa con jém toto cuando manjáyáy. Pero cuando oy manjáyáy mimichtam, ich juuts da ti añjodon. Nımyajpatım iga jém anañmaıti da para ti wı. ¹¹ Pero jém nımyajpáppic así wı iga ijodónaiñ iga jextım jém anañmaıti cuando manjáyáypa juutstim cuando aıt con mimichtam.

¹² Aich da anımpa iga atsıyypa juuts jeeyaj. Da ajex juuts jém nacujıptapáppic iyaac. Jeeyaj tsam jıxitogoyñeyaj porque iyaac naquıpsyajıtap con iquıpsóycuy. Iámpa siiga ıctıyypa con jém tungac itıwi siiga jextım iwı. ¹³ Pero aichtam da añnaspı iga anacujıptap. Dios tañquejáypa hasta jut tanúcpa iga tayoxap. Ajıgayta iga anúcta hasta jut mııtta. ¹⁴ Ich añwatpa nada más juuts añquejáy Dios. Wiñtı aoy hasta jut mııtta mimichtam iga manañmadáy jém wıbic añmaıti jém Cristopic tachııñe. ¹⁵ Da anacujıptap anyaac juuts ich añwat jém tungac pıxiñ iyoxacuy juutstim ich añwat jém yoxacuy. Pero ich anımpa más wı siiga más y más incupıcpa Cristo wıap anyoxata con mimichtam. Pero ich añwattámpa siempre juuts anımayñe Dios. Da wıap annasca. ¹⁶ Ocmı ananıctamtooba jém Dios inmaıti hasta más juumi jut mııtta. Pero da wıap anacujıpta juuts iga añwatta jém yoxacuy jém iwatnewııp tungac pıxiñ.

¹⁷ Siiga algunos nacujıptatooba, más wı iga icujıbiñ jém tánQmi Jesucristo. ¹⁸ Dios iwıanjam tum pıxiñ siiga iwatpa juuts ixunpa tánQmi Cristo. Da ipıctsonpa iga agui nacujıptap iyaac.

11

Jém Pablo y jém tungacyaj apóstol, jém mıgooyajpaap

¹ Wı meega michtam anyaaçıypa tum rato juuts ich da ajıxiıy. ² Tsam mañcunaıyypa con jém naja jém Diospic achııñe. Manjıycunúgayñe michtam iga manañcómıyypa con inwıdaya jém Cristo juuts tum woñı jém dapic ti iwatne. ³ Jém Wocciwiñ como tum tsañ agui jáyayanjıchıch, imıgoyáy jém Eva. Jempıctım ich añcıñpa mimichtam iga wıaptım jı mimıgoyáy iga jém iñjıxıanjom iñjıspa iga iñchacpa iga iñtoypa Cristo, jém iniıtwiıp jém numapic tóyooyi. ⁴ Inwıanjamta jém mıñquejayñewııp de tungac Cristo jém dapic nunta Cristo. Tsam mimaymay iga impıctsonıta jém tungac espıritu jém dapic jex juuts jém manañmadayñewııp. Tsam incupıctámpa jém mıgooyi jém dapic jex juuts jém Cristo inquımayooyi. ⁵ Ich más awıap que jém tungac apóstol, jém mıgooyajpaap jém mıchıpc

iñtún̄iytámpa. ⁶ Ich anañmatpa juuts tum p̄ixiñ dapic wiap in̄mat, pero jém an̄jixi da jex. Cuando mu íñix iga añwat itump̄iy jém w̄itampic cosa, jesic quejpa iga w̄i jém an̄jixi.

⁷ ¿Que mich inin̄jam iga ammalwat iga da mantségáy cuando oy manañmadáy jém w̄ibic añmat̄i? Ich ats̄iy juuts da ti aw̄iap iga micujípt̄aiñ mimichtam. ⁸ Ich ampictson̄ne jém tumiñ jém achiiñew̄ip jém Dios ip̄ixiñtam jém tungac lugarpic iga manyoxp̄átámpa mimichtam. ⁹ Cuando aitta con mimichtam tsam ayaacha, pero da ti manwágayta. Jém tant̄iw̄itam, jém miññew̄ip Macedonia, jeam achiiyaj itump̄iy cosa titam atogóyáy. Jesic da ti manwágayta y siip datim manwágaytámpa. ¹⁰ Ich añwijodon̄ iga numa jém Cristo in̄químayooyi. Ich tsam amaymay iga da antségáy jém p̄ixiñtam icuw̄iti jém naxyucmi de Acaya iga oy anañmadáy jém w̄ibic añmat̄i. Da i wiap accáyáy ȳip maymáyaj̄i. ¹¹ ¿Íiiga animpa jempic? ¿Que michtam iñ̄j̄ispa iga da mantoypa? Dios ijodon̄ iga tsam p̄imi mantoypa.

¹² Pero seguido añwatpa juuts añwatne iga jém ánenemigoyaj da wiap inicujípt̄a iga iwatyajpa juuts ich s̄ip añwat. ¹³ Ȳip p̄ixiñtam n̄iman̄taayap iga Dios icutsatne, pero puro migooyi inis̄iba. Ts̄iytooba juuts tum w̄ibic apóstol jém Cristopic icutsatne, pero da je. ¹⁴ Iwatyajpa jextim juuts iwat jém Wocciwiñ. Setpa juuts tum siñyucm̄ipic p̄ixiñ jém aguipic tsocpa. ¹⁵ Jeeyucmi jém Wocciwiñ ip̄ixiñtam setpatim juuts w̄ibic p̄ixiñ. Pero ȳipyaj p̄ixiñtam ip̄ictson̄yajpatim castigo porque da iw̄iwatneyaj.

Tsam yaacha jém Pablo iga ts̄iy juuts apóstol

¹⁶ Eybictim mann̄imaytámpa, odoy i ij̄ixiñ iga da aj̄ixīy. Pero siiga jempic iñ̄j̄ispa, aj̄igaaȳi iga anañmatpa juuts tum p̄ixiñ dapic j̄ixīy iga ich anyaac wiap anacujípt̄a uxañ. ¹⁷ Pero da mann̄imáypa jempic iga jém tán̄omi achi jém j̄ixi, pero ich mann̄imáypa juuts tum p̄ixiñ dapic j̄ixīy porque agui anacujípt̄ap anyaac. ¹⁸ Tsam jáyan̄ it jém nacujípyajtap̄ap̄pic ȳip naxyucmi. Jesic ichgacti anacujípt̄aptim. ¹⁹ Mimichtam tsam mij̄ixīyta, jesic yaach̄iȳi tum p̄ixiñ jém dapic j̄ixīy. ²⁰ Mimichtam iñ̄yaach̄iytámpa jeeyaj siiga mip̄imíypa iga in̄cuyoxatámiñ juuts esclavo, siiga mitobáypa titam iniifta, siiga mim̄igóyáypa, siiga tsam mij̄óyixpa, siiga mixón̄áypa in̄wiñpac. ²¹ Nimyajpa iga aichtam juuts da ti aw̄iap. Tsam amaln̄imáy. Pero ich da añwatpa jexpic cosa. Tsam atsaap iga manwadáypa jempic.

Jém tungac p̄ixiñtam nacujípt̄ap iyaac. Ichgacti anacujípt̄aptim juuts da aj̄ixīy. ²² ¿Que jeeyaj hebreopic p̄ixiñtam? Ich hebreopic̄tim ap̄ixiñ. ¿Que jeeyaj Israelpic p̄ixiñtam? Ich Israelpic̄tim ap̄ixiñ. ¿Que jeeyaj jém Abraham iman̄ictam? Ich̄tim jém Abraham aman̄ic. ²³ ¿Que jeeyaj icuyoxayajpa jém Cristo? Ich más añcuyoxap̄ jém Cristo que jeeyaj. Siip ich anañmatpa juuts tum loco porque tsam anacujípt̄ap anyaac. Más p̄imi ayoxap̄ que jeeyaj. Más p̄imi acótsta que jeeyaj, más apajta que jeeyaj. W̄ati veces accaat̄at̄ip. ²⁴ Cinco veces jém Israelpic p̄ixiñtam achiiyaj treinta y nueve azote. ²⁵ Tres veces anácscat̄ip cuymi. Tun̄ciy anácscat̄ip tsaami. Tres veces anacumon̄ jém barco jém lamar. Tum muma tsu y muma jama ap̄un̄púnóypa lamar con tum jaca cuy. ²⁶ Wat̄ciy aoy juumi. Tsam annasca jém peligro jém mij̄pic río. Annasca peligro de jém númyajpaap. Annasca peligro con aichtampic p̄ixiñtam y con jém juum̄ipic p̄ixiñtam. Tsam annasca peligro jém mij̄pic atebetyaj y jém jimñom. Tsam annasca peligro jém lamar. Annascat̄im jém peligro con jém p̄ixiñtam jém n̄iman̄taayañew̄ip iga icupicpa Cristo. ²⁷ Tsam p̄imi ayoxa, tsam ayaacha. W̄ati veces da wiap ammon̄ tsuuc̄im. Tsam p̄imi ayuap y an̄ict̄it̄ispa. Wat̄ciy da anai titam añcútpa. Tsam ayaacha con jém succuc. A veces yajneum jém ampuct̄ucu.

²⁸ Tungac más mij̄pic yaach̄aji annascaaba. Tsam añ̄j̄ispa cada jama itump̄iy jém Dios ip̄ixiñtam jut̄ añtuumayajpa. ²⁹ Siiga algunos da iw̄icupicne Dios, jesic añ̄j̄ampa juuts ich

da anwícupicne Dios. Siiga algunos acwattap tãñca, jesic ich agui atsaap y agui ajóypa. ³⁰ Siiga anacujíptap anyaac, jesic anacujíptap iga da ti wíap anwat, pero jem tánQmi Cristo tsam ayoxpát iga agui awíap. ³¹ Jém Dios, jem tánQmi Jesucristo iJatun, wí iga tanjucíptampa itumpiy tiempo. Jém tanJatun Dios ijodon iga da amigóypa. ³² Cuando ait jem atebet Damasco, jem gobernador jem icuyoxapápic jem rey iñiyi Aretas, ipimíy jem policia iga niguiñ anteñ jem taañi ipuerta iga amatstaiñ. ³³ Pero ajimquetta tum coonjom jem taañi iweñtan. Jempigam aciput de jem ánenemigo icijom.

12

Nimpa Pablo iga iix tum poñ

¹ Da ti acuwatcuy siiga anacujíptap anyaac. Pero siip ich ananmatpa titam anquejáy jem tánQmi Jesucristo cuando awiñquejáy jem tánQmi juuts tum poñ. ² Ich ánixpicpa tum pìxiñ jem icupicnewiip jem Jesucristo. Siip nasneum catorce año nanicta jem tucutenpic sinyucmi. Da tanjodon siiga nanicta con jem imijtay o no más nanigayta ianama, solamente Dios ijodon. ³ Pero anjodon iga nanicta sinyucmi jem pìxiñ. Eybictim mannímáypa iga da anjodon siiga nanicta con imijtay o no más ianama nanigayta. Sólo Dios ijodon. ⁴ Nanicta jem paraíso jut it Dios. Jemigam anmattap jem jixi jem dapic i wíap icutiíy. Dios da ijicpa iga tananmatpa jexpic jixi yíp naxyucmi. ⁵ Ich animpa iga agui wí iga nanicnetá sinyucmi jem pìxiñ. Pero ich anyaac da ti awíap. Solamente anacujíptap iga da awíap. ⁶ Siiga ich anacujíptap anyaac da ajex juuts jem pìxiñ dapic jixiíy. Porque siiga anacujíptap anyaac, wí porque ananmatpa jem numapic cosa. Pero da anwatpa jempic. Más wí iga jem pìxiñtam aixyajpa iyaac ti anwatpa y imatonyajpa ti ananmatpa.

⁷ Jém sinyucmic cosa, jem anquejayñewiip Dios, tsam tampooñanjampa. Jesic iga odoy anacujíptaiñ iga oy anám jem wibic cosa sinyucmi, Dios ijic iga jem Wocciwiñ acutsadáy tum toya juuts tum apit atsenayñe ammijtay iga odoy anjixiñ iga agui awíap iga aoy sinyucmi. ⁸ Tres veces anwágáy tánQmi iga accáyayiñ jem toya. ⁹ Pero jem tánQmi anímáy iga: “Siiga iniit jem antóyooyi da ti más mitogóyáy. Siiga tum pìxiñ da ti wíap iwat iyaac, jesic más wíquejpa jem Dios ipimi.” Jeeyucmi agui amaymay iga da ti wíap anwat anyaac. Más wíquejpa iga jem tánQmi Cristo ipimi ayoxpátne. ¹⁰ Jeeyucmi amaymay iga da ti wíap anwat iga tsam amalnímayta, iga tsam ayaacha, iga ajóyixta, tsam ayaachwatta jem Cristo icuyucmi. Cuando da ti wíap anwat anyaac, jesic Dios achi jem ipimi iga más wíap anwat juuts je iwianjam.

Tsam ijispa Pablo jem Dios ipixiñtam jem antuumayajwip jem atebet Corinto

¹¹ Ich ajex juuts tum pìxiñ dapic jixiíy cuando anacujíptap anyaac. Michtam iniit la culpa, jeeyucmi anwat jempic. Más wí iga mimichtam anjucíptamiñ aich. Ich quejpa iga da ti wíap anwat, pero más awíap que jem tungac apóstol, jem migoypaap jem michpic sip iñtúñyta. ¹² Tsam wí quejpa iga ich tum numapic aapóstol jem Diospic acutsatne porque oy anwat mimichtamanjom jem milagroyaj, jem cosa dapic i wíap iwat y jem seña jem dapic queman tánix. Chocoymi mananquejáypa. ¹³ ¿Que iñjisa iga ich da manjwíwadáypa juuts anjwíwadayñe jem tungac grupo jem Dios ipixiñtam? No más da ti manwágayta. Awadaayi perdón iga da manjigáy iga anyoxpátta.

¹⁴ Siip anjisa iga nicpa manjójáy. Siip tres vecesam nicpa manjójáy. Y da ti manwágaytámpa. Da nicpa amméts titam iniitta. Pero nicpa manyoxpátta. Jém jatunpic intuumawatpa jem tumiñ para jem imanictam. Jém manicpic da intuumawatpa jem tumiñ para jem iJatun. ¹⁵ Ich anwatpa gasto itumpiy jem anaitwiip. Anwatpa gasto hasta anyaac anachiitap iga accaatap iga odoy togóyíñ jem iñanama. Michtam tsam pimi mantoypa, pero michtam da pimi antoytámpa juuts aich.

¹⁶ Michtam inw̄ijod̄on̄ iga da ti manwágáypa mimichtam. Pero n̄imyajpa algunos jém p̄ixiñtam iga ich tsam ajáyayan̄jichich iga oy mammigóyáy. ¹⁷ ¿Que mammigóyáy cuando mancutsadáy algunos jém p̄ixiñtam? ¹⁸ Annímáy jém Tito iga niguiñ miámcoñw̄iy. ¿Que in̄j̄ispa iga mimigóyáy jém Tito? Je iwatpatim juuts aich. T̄umti j̄ixi inis̄iba con aich.

¹⁹ Tal vez michtam in̄j̄istámpa iga manjáyáypa ȳip̄ toto iga ich anyaac anacupujtap. Pero da anwatpa jem̄pic. Sīip, mant̄iw̄itam, mantoytampáppic, anañmatpa así jém Dios iwiñjom̄ jém Cristo in̄iyimi. Manjáyáypa así porque tsam manyoxpáttooba. Jeeyucmi anwat titam anwatne. ²⁰ Ich an̄c̄in̄pa iga cuando nicpa mánám da mampátpa iga síp inwat juuts mannímáyne. Michtam datim ampátpa aich juuts mich inw̄ian̄jam̄ porque siiga immalwatne tienes que manwogáypa. Ich an̄c̄in̄pa iga michtam tsam míñatámpa, tsam micujóyáyóypa, tsam iniit̄ jooya in̄anaman̄jom̄, tsam minitoytap̄ in̄yaac, tsam immaytámpa jém malopic cuentoyaj, tsam micujíyóypa, tsam minicujíptap̄ in̄yaac, cada t̄umt̄um̄ inwattámpa juuts in̄xunpa in̄yaac. ²¹ Ich an̄c̄in̄pa iga cuando eyb̄ic̄ nicpa manjójáy, jesic Dios atsaawatpa porque michtam da in̄chacpa iga immalwatpa. Tsam p̄imi awejpa porque w̄ati de michtam tsam inwatneta t̄an̄ca. Tsam pecam da in̄chactámpa iga immalwatpa. Algunos tsam imalwat con jém yomtam y datim ichacne jém malopic vicio juuts iwatyajpa dende wiñgam.

13

Jém Pablo icjod̄on̄ap̄ ti miñpa y in̄qūmpa jém iamigoyaj

¹ Sīip tres vecesam nicpa manjójáy. Ac̄ip̄in̄jóypa chocoȳmi. Cuando quejajwadaytap̄ jém p̄ixiñtam iga imalwatne ixunpa w̄isten̄ o tucuten̄ testigo. ² Annímáy jém p̄ixiñtam iga chiitap̄ jém castigo jém imalwatnew̄ip̄ pecam. Y sīip eyb̄ictim annímáypa iga ipictson̄yajpa jém castigo juuts mannímáyne cuando oy manjójáy w̄isciy. ³ Michtam tsam an̄cut̄it̄stamtooba iga quejiñ siiga numa Cristo acutsatne. Jém t̄an̄omi Cristo da jex juuts t̄um̄ p̄ixiñ jém dap̄ic̄ w̄iap̄. Tsam iniit̄ ip̄imi iga mic̄ip̄in̄pa mimichtam. ⁴ Numa jém Cristo cun̄unt̄a cunusyucmi juuts t̄um̄ p̄ixiñ dap̄ic̄ w̄iap̄. Pero sīip it̄ vivo jém Cristo porque iniit̄ jém Dios ip̄imi. Jem̄p̄ictim sīip aichtam da ti aw̄iap̄. Siiga anwaganait̄ jém t̄an̄omi, jesic anaifta jém Dios ip̄imi iga w̄iañ̄ man̄cuyoxata mimichtam.

⁵ Nac̄ip̄in̄taj̄i in̄yaac siiga numa da in̄chacpa iga in̄cupicpa Cristo. ¿Que da in̄j̄od̄on̄tam iga jém Cristo it̄ in̄anaman̄jom̄ siiga da mimigóypa iga in̄cupicpa Cristo? ⁶ Ich manacjod̄on̄ap̄ iga da mammigóyáyne iga numa an̄cupicpa jém Cristo. ⁷ Ich anañwejpátámpa Dios iga odoy immalwattámiñ. Ich ansunpa iga w̄ipudiñ jém in̄yoxacuy iga inwattámiñ juuts ixunpa Dios. Siiga mich inw̄iwatpa, jesic ich amaymay. Da manañquejáypa jém amp̄imi. ⁸ Da w̄iap̄ anic en contra de jém numapic an̄químayooyi. Siiga inw̄iwatneum, da manwogáypa. Tienes que anwattámpa juuts n̄impa jém an̄químayooyi. ⁹ Ich agui amaymay siiga michtam inw̄iwatneum, jesic da manañquejáypa amp̄imi iga manchiiba castigo. Seguido anañwejpátámpa Dios iga capxiñ in̄cut̄iȳiȳ jém Dios in̄mat̄i. ¹⁰ Manjáyáypa ȳip̄ toto antes que nicpa mánám. Jesic cuando anicpa, da p̄imi manwogáypa porque ich juuts t̄um̄ anjagooyi. Jém t̄an̄omi accám juuts t̄um̄ anjagooyi iga manyoxpátámiñ iga más w̄iap̄ inwatta juuts ixunpa Dios. Da accám juuts anjagooyi iga manactogoytámiñ.

¹¹ Sīip mant̄iw̄itam, mancutsadáypa w̄at̄id̄ios. Wattaami juuts ixunpa Dios iga w̄its̄iyiñ jém invida. Maton̄taami ti mannímáy. Nait̄taami t̄umti j̄ixi. Odoy āñataami. Jém tan̄jatun̄ Dios, jém tsampic tatoypa, it̄ con mimichtam. Je miyoxpátpa iga odoy míñatámiñ. ¹² Nadioschitamtaj̄i con jém in̄t̄iw̄itam con t̄um̄ an̄nacatsuuchi. ¹³ Itump̄iȳ jém Dios ip̄ixiñtam, jém itw̄ip̄ ȳim, micutsadáypa w̄at̄id̄ios.

¹⁴Tánomi Jesucristo miyoxpáttámiñ, jém tanJatun Dios mitoytámiñ y jém Dios iAnama miwaganaittámiñ. Jenum cuyaj.

Jém carta jém ijáyayñewiip Pablo jém ityajwiip jém attebet Galacia

Jém Pablo ijáyáypa jém ityajwiip Galacia

¹ Ich aPablo. Accám̄ta juuts tum apóstol. Pero da je p̄ixiñtam acupiñ ni datim je acutsat. Acupiñ tanJatun̄ Dios y acupiñtim jém tánQ̄mi Jesucristo jém icp̄isnewiip Dios. ² Ich con jém tant̄iwitam, jém ityajwiip con aich, manjáyaytámpa mimichtam jém Dios mip̄ixiñtam icuwīti jém naxyucmi de Galacia. ³ Siip jém tanJatun̄ Dios y jém tánQ̄mi Jesucristo miw̄iwadaytámiñ y michiitámiñ jém w̄ibic paz iga odoy iniittámiñ jém cobacp̄iji iñanamanjom. ⁴ Jém Jesucristo iyaac nachiit̄a iga accaat̄aiñ iga tayojoyta tant̄anca iga taciapputta de itump̄iy jém malopic cosa jém siip̄pic it ȳip naxyucmi. Jempam iw̄at porque iw̄ianjam̄ jém tanJatun̄ Dios. ⁵ Da nunca cuyajpa tan̄cuj̄pta. Amén.

Da i tungac anquímayooyi jém taciapputpaap

⁶ Tsam ampoañan̄jampa iga michtam tsam jobittim iñchactámpa jém Dios in̄m̄ati, jém miñquejayñewiip iga tsam tatoypa jém Cristo, iga in̄cupictámpa tungac anquímayooyi jém dapic jex juuts jém Cristo in̄químayooyi. ⁷ Da numa i tungac w̄ibic anquímayooyi. Pero algunos jém malopic p̄ixiñtam nicneyaj jem̄ic iga miccuj̄iñaytámpa con jém tungac j̄ixi, tsam in̄codiyajpa jém tánQ̄mi Jesucristo in̄químayooyi. ⁸ Siiga aichtam mismo o tum siñyucm̄ipic p̄ixiñ minimiñáypa tungac anquímayooyi jém dapic jex juuts jém wiñtipic manan̄quejayñe, jesic w̄i iga chiit̄aiñ tum miip̄ic castigo. ⁹ Mannímayñeum pecam y siip eybictim mannímáypa siiga i miñmadáypa tungac anquímayooyi, dapic jex juuts jém impictson̄newiip, jesic Dios ichiiba castigo jém p̄ixiñ jém inimiññewiip jexpic anquímayooyi.

¹⁰ Cuando mannímáypa jem̄pic, jesic quejpa iga da anwadáypa caso iga jém p̄ixiñtam da aw̄ixiyajpa. Ich ansunpa iga aw̄ixiñ jém tanJatun̄ Dios. Da sip̄ anwat juuts ixunpa jém p̄ixiñtam iga atoyyajiñ. Siiga ansunpa iga atoyyajiñ jém p̄ixiñtam, jesic da atsíypa juuts jém tánQ̄mi Jesucristo imozo.

Jutsa miccám̄ta jém Pablo iga apóstol

¹¹ Siip, mant̄iwitam, jodón̄ataami iga jém Cristo in̄químayooyi, jém manan̄madayñewiip, da je p̄ixiñtam iñxquiimi. ¹² Cuando ampictson̄ jém w̄ibic anquímayooyi, da jém p̄ixiñtam anquejáy, pero jém tánQ̄mi Jesucristo mismo acjodón̄a.

¹³ Mimichtam iñjodon̄ titam jáy anwat cuando an̄cupicne jém Israelpic anquímayooyi. Iñjodón̄ata iga tsam p̄imi ammalwadáy jém Dios ip̄ixiñtam jém icupicneyajwiip jém Jesucristo. Agui anactogoytooba idic jém Dios ip̄ixiñtam. ¹⁴ Tsam an̄wicuyujcane jém Israelpic anquímayooyi. Más aw̄iap que itump̄iy jém ant̄iwitam jém dapicnam tsamiyaj jutstim aich. Tsam anwadáypa caso iga seguido anwatpa juuts nimpa itump̄iy jém wiñcipic costumbre jém ichacneyajwiip jém an̄jatun̄wewetam. ¹⁵ Dios acupiñ cuando danam anayñe. Tsam p̄imi atoypa jeeyucmi an̄wejay iga an̄cupiguiñ jém Jesucristo. Cuando iw̄ianjam̄ Dios, ¹⁶ anquejáy jém Dios iManic, jém Jesucristo, iga w̄iaiñ anan̄madayyaj jém Cristo in̄químayooyi jém tungac p̄ixiñtam jém dapic je de Israel. Da oy anacwác ni tum p̄ixiñ iga anquejáyñ jém Cristo in̄químayooyi. ¹⁷ Ni datim oy ánám jém tungac apóstol jém ityajwiip Jerusalén jém más wiñtipic accám̄net̄a. Pero anic más juumi jém naxyucmi de Arabia. Ocmi aset eybic jém attebet Damasco.

¹⁸ Jesic ocmi cuando nasum tucuten amtiy, nic ánám jém Peto hasta Jerusalén. Oy anyaj quince día con je. ¹⁹ Pero da ánix tungac jém apóstol. Ánix nada más jém Jacobo, jém tánQmi itíwi. ²⁰ Mannímáypa jém Dios iwiñjom iga jém siippic manjáyáypa da je migooyi. ²¹ Jesic ocmi anic jém naxyucmi de Siria y Cilicia. ²² Pero jém tantiwitam, jém icupicneyajwip Cristo jém naxyucmi de Judea, da aixpicyajpa. ²³ Solamente imatonyajpa iga: “Jém pixiñ jém tamalwadaypáppic idic, súp inmat jém Cristo inquímayooyi jém ictogoypáppic idic.” ²⁴ Jesic tsam icujípyajpa Dios ich ancyucmi.

2

Jém tungac apóstolyaj iwixyaj jém Pablo

¹ Jesic ocmi cuando nas catorce amtiy, eybictim anic jém Jerusalén. Anwagananic jém Bernabé. Ananictim jém Tito. ² Anic Jerusalén porque acjodóna Dios iga aniguiñ. Jemic jut antuumayajpa naps jém anjagooyiyaj, jém injacyajpáppic jém Dios ipixiñtam, anaquejáy jém wibic anmati, jém ananmadayñewip jém tungac pixiñtam jém dapic je de Israel, iga jém anjagooyiyaj iixyajiñ juutspic anquímayooyi ananmatpa aich iga da axajayoxap. ³ Jém Tito, jém anwagananicnewip, tum griegopic pixiñ da je Israelpic. Pero da i ipimiy iga iwatpa jém marca de circuncisión juuts jém Israelpic pixiñtam icostumbre. ⁴ It idic jem algunos jém pixiñtam nímanṭaayap iga icupicyajpa Jesucristo. Tsam ixunyajpa iga jém Tito wadaytaiñ jém marca de circuncisión. Jeeyaj yantigiyay con aichtam iga icuixyajpa jém libertad jém tachiiñewip jém Cristo. Jém pixiñtam agui ixunyajpa iga ichtam atsiytamiñ eybic juuts esclavo iga anwattamiñ eybic jém wiñicpic costumbre. ⁵ Pero ni uxan da ancupicta jém malopic pixiñtam ni da anwattampa juuts ixunyajpa, porque anwanjamta iga michtam iniittamiñ jém numapic anquímayooyi iga odoy i incodiyiñ iga mimigóyáypa. ⁶ Jém anjagooyiyaj da achiiyay tungac jomipic jixi. Ich da anwadáypa caso siiga mijpic anjagooyi. Dios iixpa itumpiy jém pixiñtam jextim porque iixpigáypa ianama. ⁷ Ich da i achi ni tum jomipic jixi, pero jeeyaj moj icutiyyiyay iga Dios achi jém yoxacuy iga ananigáypa jém tánQmi Cristo inquímayooyi jém tungac pixiñtam jém dapic je de Israel, jempictim juuts chiita jém Peto jém yoxacuy iga ininigáypa jém Israelpic pixiñtam jém anquímayooyi. ⁸ Jeetim Dios icutsat jém Peto iga iwatpa jém Dios iyoxacuy con jém Israelpic pixiñtam. Jeetim Dios acutsat aich iga anwatpa jém Dios iyoxacuy con jém tungac pixiñtam jém dapic je de Israel.

⁹ Jeeyucmi jém Jacobo, jém Peto y jém Xiwan, jém más mijpic anjagooyiyaj, cuando iixyaj iga Dios tsam ayoxpátne iga wiap anwat jém Dios iyoxacuy, jesic jeeyaj anacimatsyay aich con Bernabé iga quejiñ iga ityay de acuerdo con aichtam iga anwattampa jém Dios iyoxacuy jém tungac naxyucmi, jém dapic je de Israel, iganam jeeyaj iwatyajpa jém Dios iyoxacuy jém naxyucmi de Israel. ¹⁰ Solamente anímayta iga seguido anjístamiñ jém yaachayajpáppic. Numa ich tsam anwanjam iga anwatpa jempic.

Jém Pablo iwogáy jém Peto jém attebet Antioquía

¹¹ Pero cuando oy jém Peto jém attebet Antioquía, ich anwogáy jém Peto anwiñpacnámáy porque iwat tum cosa dapic wi. ¹² Jém Peto iwaganawícyajpa jém pixiñtam jém dapic je de Israel. Pero cuando núcyaj jém icutsatneyajwip jém Jacobo, jesic jém Peto mojum ichac iga iwaganawícyajpa porque tsam icinpa jém partido, jém iwatyajpáppic jém marca de circuncisión. ¹³ Jesic los de más jém Israelpic pixiñtam, jém icupicneyajwip Jesús, ityay de acuerdo con jém Peto. Nímanṭaayap iga itoyyajpa jém itiwitam jém dapic je de Israel, pero da iwianjamyaj iga iwaganawícyajpa. Hasta jém Bernabé itúníyitim, imalwattim juuts iwatyaj los de más jém Israelpic pixiñtam. ¹⁴ Pero cuando ánix iga da iwíwatyajpa juuts

nĩmpa jém nũmapic añquĩmayooyi, añwogáy jém Peto. Cuando añtuumaneyaj itũmpiy jém icupicneyajwĩp Jesús, annĩmáy jém Peto jém pĩxiĩtam iwiĩñjom: “Mich tũm Israelpic mipĩxiĩ, pero siĩp iĩchacneum iga iñwatpa jém costumbre juuts iwatyajpa jém Israelpic pĩxiĩtam. Sĩp iñwat jém tungac pĩxiĩtam icostumbre. ¿Jesic tiiga iĩjĩspa iga impĩĩmĩypa jém tungac pĩxiĩtam, jém dapic je de Israel, iga iwatyajiĩ juuts jém Israelpic icostumbre?”

Jém Israelpic pĩxiĩtam tienes que icupicpatim jém Cristo

¹⁵ Aichtam anayta Israel. Israelpic apĩxiĩtam. Da je atañcaiywĩp juuts jém tungac pĩxiĩtam, jém dapic je de Israel. ¹⁶ Pero añwijodonam iga Dios da iwĩtsagáypa ni tũm pĩxiĩ itañca siiga no más iwatpa juuts nĩmpa jém Moisés iñquĩmayooyi. Dios iwĩtsagáypa tũm pĩxiĩ itañca solamente cuando icupicpa Jesucristo. Jeeyucmi aichtam añcupicnetatim jém Jesucristo iga awĩtsagaytamiĩ antañca. Wĩtsagayta jém Israelpic pĩxiĩtam itañca jempictim juuts wĩtsagayta jém tungac pĩxiĩtam itañca. Da i nũcpa jut it Dios siiga no más iwatpa juuts nĩmpa jém Moisés iñquĩmayooyi. ¹⁷ Siiga añwagáypa Dios perdón de jém antañca, jesic tsam wĩquejpa iga atañcaiytim juuts jém tungac pĩxiĩtam jém dapic je de Israel. Pero yĩp da nĩmtooba iga tánomi Cristo tacwatpa jém tãñca porque je da wĩap tactañcawat. ¹⁸ Pero aich mismo atañcawatpa siiga eybic antũñĩypa jém wiĩncpic añquĩmayooyi jém antsacnewĩp. ¹⁹ Jém wiĩncpic añquĩmayooyi añquejay iga da wĩap ayoxpát, jeeyucmi antsac jém añquĩmayooyi juuts tũm pĩxiĩ caane. Siĩp avivojam iga añwatpa juuts ixunpa Dios. ²⁰ Ich añwaganaca cunusyucmi jém tánomi Jesucristo. Siĩp ich avivojam, pero dam aich, porque Cristo it añanamanjom. Siĩp anaĩt jém vida, it ammijtayyucmi porque añcupicpa jém Dios iManic jém tsampic atoypa, jém iyaacpic nachĩitã iga accaata ich añcuyucmi. ²¹ Ich da añjõyixpa jém Dios itõyooyi. Porque siiga jém wiĩncpic añquĩmayooyi wĩap tawadáy perdón jém tantañca, jesic xajatim accaata jém Cristo.

3

Dios iAnama tampictsonpa siiga tancupicpa Cristo

¹ ¿Mimichtam, mantiwĩtam, miĩttanwĩp jém Galacia, da mijixiyta? ¿I mimigõyayta iga odoy iñcupictamiĩ jém nũmapic añquĩmayooyi? Mimichtam iĩxĩñeta iga oy manañquejayta iga accaata jém tánomi Jesucristo cunusyucmi. ² Anĩmaayi jesic, ¿tiiga michi Dios jém iAnama? ¿Que michi porque iñwatpa juuts nĩmpa jém Moisés iñquĩmayooyi, o michi porque iñcupicpa iga jém Jesucristo wĩap taciaput? ³ Mimichtam da mijixiyta. ¿Que michi iĩyaac wĩap iniccupac jém inictsucumnewĩp con Dios iAnama? ⁴ ¿Que xajatim iĩñasca jáyan jém yaachaji cuando moj iñcupic jém Dios iñmatĩ? Da wĩap iga xajatim miyaachwatta. ⁵ Cuando tanjatun Dios michi jém Dios iAnama y cuando iwat jém wĩbic milagroyaj mimichtamanjom, ¿jesic tiiga iwat jempic? Iwat porque iñcupic jém Jesucristo, da porque iñwattãmpa juuts nĩmpa jém Moisés iñquĩmayooyi.

Jém pacto, jém iwatwĩp Dios con Abraham

⁶ Jém Abraham icupic jém tanjatun Dios. Jeeyucmi Dios iwĩpictson jém Abraham juuts tũm pĩxiĩ dapic tãñcaiy. ⁷ Jeeyucmi mannĩmãypa, jodonãtaami iga jém pĩxiĩtam, jém icupicneyajwĩp Dios, jeam jém Abraham imanictam. ⁸ Jém Dios iñmatĩ, jém jayñewĩp tsam wiĩgam, nĩmpa iga algunos jém pĩxiĩtam jém dapic je de Israel icupicyajpatim Dios, jesic Dios iwĩpictsonpa. Wiĩti añmadayta jém Abraham jém wĩbic añmatĩ cuando nĩmayta: “Mich iñcuyucmi Dios iwĩwadáypa itũmpiy jém naciõnyaj jém ityajwĩp yĩp naxyucmi.” ⁹ Jempictim Dios iwĩwadáypa itũmpiy jém pĩxiĩtam jém icupicyajpãppic juuts jém Abraham.

¹⁰ Jém nĩmyajpáppic iga Dios iwĩpictsonpa siiga iwatyajpa juuts nĩmpa jém Moisés inquĩmayooyi tienes que ipictsonyajpa tsam mijpic castigo porque nĩmpa asĩ jém Dios inmatĩ jém jayñewĩp: “Jém dapic iwatpa itumpiy cosa juuts nĩmpa jém Moisés inquĩmayooyi, jém jaychacnetawĩp librojom, tienes que ipictsonpa tsam mijpic castigo.”

¹¹ Tsam wĩquejpa jesic iga Dios da iwĩpictsonpa ni tum pĩxiñ jém iwatpáppic juuts nĩmpa jém Moisés inquĩmayooyi. Nĩmpa asĩ jém Dios inmatĩ: “Jém icupicpáppic iga Dios wĩap iwĩtsagáy itañca, chiitap jém vida jém dapic cuyajpa.” ¹² Siiga tum pĩxiñ ijspa iga wĩap iwat iyaac juuts nĩmpa jém Moisés inquĩmayooyi, jesic quejpa iga da icupicpa iga Dios wĩap iyoxpát. Nĩmpa jém wiñicpic anmatĩ: “Siiga tum pĩxiñ capsapa iwat juuts nĩmpa jém Moisés inquĩmayooyi, iniitpatim jém vida jém dapic cuyajpa, pero da ĩ capsapa iwat.”

¹³ Jém tánomi Jesucristo tayojoytámum tantañca iga odom tampictsonñamiñ jém castigo porque da tanwatne itumpiy cosa juuts nĩmpa jém Moisés inquĩmayooyi. Jém Cristo ipictson taichtam tancastigo. Jayñeum asĩ jém Dios inmatĩ, nĩmpa: “Mijpic castigo chiitap itumpiy jém jĩmcanewĩp cuyyucmi.” ¹⁴ Asiam iwat jém tánomi Jesucristo iga iwĩwadáyapa jém tungac pĩxiñtam, jém dapic je de Israel, juuts tanjatun Dios ijycámayñe jém Abraham. Iwatpa asĩ iga tantumpiytam cuando tancupicpa jém Jesucristo wĩap tampictsonñta jém Dios iAnama juuts tajycámayñe.

Jycámayñeta jém Abraham iga tawĩwadáyapa Dios

¹⁵ Sĩp mantiwĩtam, mannímáyapa juuts iwatyajpa jém pĩxiñtam. Siiga tum pĩxiñ iwatpa tum trato con ifirma, jesic ocmĩ da ĩ wĩap iccuyaj jém trato ni da ĩ wĩap incodiy.

¹⁶ Dios ijycámáy iga iwĩwadáyapa jém Abraham iocmanic imanic. Cuando inmatpa asĩ, da nĩmpa iga imanictam como watĩ, pero yĩp anmatĩ nĩmtooba iga tum jém imanic, je jém Cristo. ¹⁷ Mannímaytooba iga Dios iwat tum trato con jém Abraham iga numa iwatpa juuts ijycámayñe. Jesic cuando nas cuatrocientos treinta amtĩy, núc jém Moisés inquĩmayooyi. Como más ocmĩ miñ, da wĩap iccuyaj jém más wiñicpic trato, ni datim wĩap ictogoy jém promesa. ¹⁸ Tsam wiñigam Dios ijycámayñe jém Abraham iga tachiiba tum wibic herencia juuts tum xaja. Pero da porque tanwattampa juuts nĩmpa jém Moisés inquĩmayooyi. Tachiiba porque tsam wiñigam tajycámayñe.

¹⁹ ¿Jesic ti mejcuy jém Moisés inquĩmayooyi? Dios ichac jém ley iga inquejáyĩñ jém pĩxiñtam iga tñcaiy hasta cuando nũcpa jém Abraham iocmanic imanic, jém ijycámayñewĩp Dios iga icutsatpa. Dios ichac iga jém sĩnyucmipic pĩxiñtam icĩjunçotpa jém wiñicpic anquĩmayooyi jém Moisés icĩjom iga tsĩy Moisés juuts tum representante.

²⁰ Tum representante icuyoxap wĩsten, pero tanjatun Dios tum.

Ti mejcuy jém Moisés inquĩmayooyi

²¹ Jém anquĩmayooyi tumti jĩxi con jém promesa jém tawadayñewĩp Dios. Meega ĩ wĩap iwat juuts nĩmpa jém wiñicpic anquĩmayooyi, jesic chiitap jém vida jém dapic cuyajpa. Dios iwĩpictsonpa porque iwatpa itumpiy juuts nĩmpa jém wiñicpic anquĩmayooyi. ²² Pero da ĩ wĩap porque nĩmpa jém Dios inmatĩ iga tñcaiy itumpiy jém pĩxiñtam. Nĩmpa asĩ iga ijodónayajĩñ jém pĩxiñtam iga solamente jém icupicneyajwĩp jém Cristo wĩap ipictson jém vida jém dapic cuyajpa juuts tajycámayñeta Dios.

²³ Cuando danam núc jém tiempo iga tancupicpa jém Cristo, tanjacneta idic jém wiñicpic anquĩmayooyi, juuts tapajne idic, hasta que Dios tacjodónata jutsap tancupicta jém Cristo.

²⁴ Jém anquĩmayooyi jex juuts tum mozo jém iwatpáppic cuenta jém tsixtam. Jém anquĩmayooyi tayoxpátpa iga tancupiguiñ jém Cristo iga tawĩpictsonpa Dios. ²⁵ Pero una vez tancupicne jém Cristo, jesic dam más tanjacpa jém anquĩmayooyi.

²⁶ Sĩp iñtumpiytam Diosam mimanictam porque incupicneta jém tánomi Jesucristo.

²⁷ Mimichtam cuando micchĩtamta, michĩyta juuts mitumtĩtam con Cristo. Dios michi

jém Cristo ijixi juuts miccámáyámpa tum jomipic yooti. ²⁸ Cuando Cristo tamichitam, jesic tantumpiytam tajextim. Siiga taIsraelpic tapixiñ o tagriegopic tapixiñ, tajextim. Siiga taesclavo o da taje, tajextim. Siiga tapixiñ o tayomo tajextim. Tantumpiytam tatumtitam porque Cristo tamichitam. ²⁹ Siiga Cristo mimichitam, jesic jém Abraham mimanictam. Impictsonjámpatim titam ijycámáy Dios jém Abraham.

4

¹ Siip manañmadáypa tum ejemplo. Siiga caaba tum tsixi ijatun y ichagáypa imaníc itumpiy jém iniitwip, jesic jém tsixi tsíypa juuts tum esclavo iganam mijap. Pero imichitim itumpiy jém ichagayñewip ijatun. ² Accámyajtap algunos juuts maestro y mayordomo iga iwatpa cuenta jém tsixi iganam mijap hasta núcpa jém jama iga iñuntamichap juuts nimpá jém ijatun. ³ Jesanetim taichtam. Wiñigam cuando danam tanjcupicne jém Cristo, da ti tanjodon juuts tum tsixi. Tanjacneta idic jém wiñicpic jixi jém itwip yíp naxyucmi. ⁴ Cuando núc jém tiempo iga ixunpa Dios, jesic Dios icutsat imaníc yíp naxyucmi. Nay tum yomyucmi. Injacpatim jém wiñicpic anquímayooyi. ⁵ Jeeyucmi wiap iccutsigáy jém pixiñtam, jém injacneyajwip idic jém wiñicpic anquímayooyi iga Dios ipictsoniñ juuts imanictam.

⁶ Siip quejpa iga Diosam tamanictam porque tachiiñeta jém Cristo iAnama tánanamajom, tayoxpátpa iga wiñiñ tannímáy Dios: “Manjatun Dios.” ⁷ Jeeyucmi siip dam je miesclavo, Diosam mimanic. Siiga Diosam mimanic, jesic iniit jém derecho iga impictsonpa itumpiy jém herencia, jém ichiipáppic Dios jém imanictam.

Jém Pablo iwogáy jém Galaciapic pixiñtam

⁸ Wiñic cuando danam iñixpicpa Dios, injcuyoxap idic juuts esclavo jém tungac diosyaj jém dapic je nunta Dios. ⁹ Pero siip iñixpictámpa Dios o más wi iga tanimpa iga Dios miixpicpa mimichtam. ¿Jesic tiiga mixetpa iñtuuñançim iga eybic injcuyoxap juuts esclavo jém tungac anquímayooyi, jém dapic tayoxpátpa, jém dapic iniñ ipimi? ¹⁰ Da iñchac iga injwatpa itumpiy jém sinyaj juuts iwatyajpa jém icupicneyajwip jém wiñicpic costumbre. Iñjispá iga jempigam miwitsagáypa jém iñtánca. ¹¹ Ich tsam acinpa iga axajayoxa mimichtámanjom.

¹² Mantiwitam, manjuncucáypa iga iñchaguiñ jém anquímayooyi juuts ich antsac cuando moj anjcupic jém Cristo. Ich anjispá cuando oy aiti con mimichtam, agui anwipictsonja. ¹³ Iñjodónata iga wiñti oy manañmadáy jém Cristo injquímayooyi porque ich amimne idic, jeeyucmi atsíy con mimichtam. ¹⁴ Ich tsam pimi amimne, tsam pimi acutitsta, pero mimichtam da anquebacputta, ni datim anjójixía. Anwipictsonja juuts tum sinjucmicpic pixiñ, juuts Jesucristo iyaac. ¹⁵ ¿Jut it jém maymáyají jém iniitwip idic cuando impictson jém wibic anmati? Ich atsíy juuts testigo iga mimichtam tsam anyoxpáttamtooba idic. Meega wiap, iñtoptámpa idic jém iñixcuy iga anchiiba. ¹⁶ ¿Jesic tiiga tsam anjójixítámpa iga mannuumanjmadayñe?

¹⁷ Yíp tungac maestroyaj nimanjaayap iga tsam mitoypa, pero da iga miwíwadáypa. Ixunyajpa iga antsaganputtamiñ aich iga iñtúnijytamiñ jeeyaj. ¹⁸ Jesic wi iga mitoypa jém tungac maestroyaj siiga numa miwíwadaytooba, pero da wi siiga nada más mitoypa cuando iixpa iga ait con mimichtam. ¹⁹ Mammánictam, tsam ayaachap hasta toypa ánanama por mimichtam juuts tum yomo jesic icnappa imaníc. Eybic manyoxpáttooba hasta que iniittamiñ jém Cristo ipimi iñanamajom. ²⁰ Meega awiap, siipti anicpa jut miitta. Manwianquejáypa ti ixunpa Dios. Porque ich da anjodon siiga injcupicpa jém wibic anmati o iñchactooba.

Jém ejemplo de jém wisten yomtam jém Agar y Sara

²¹ Michtam tsam inꝓictamtooba jém Moisés inꝓuímayooyi. ¿Pero que inꝓutiiyítampa ti nĩmpa jém anꝓuímayooyi? ²² Nĩmpa jém Dios inꝓaꝓi, jém jayñewiꝓ, iga jém Abraham iniit wisten imanic. Tum imanic iwat con jém yomo Agar, jém iesclava. Jém tungac imanic iwat con jém inũuntayomo jém dapic je esclava. ²³ Jém iesclava imanic nay juuts cualquier pĩxiñ. Pero jém inũuntayomo, jém dapic je esclava, icnay jém imanic iga cupacpa juuts ijycámayñe Dios. ²⁴ Yíp cuento manaccámaypa como tum ejemplo. Jém wisten yomo jex juuts jém wisten trato jém iwatnewiꝓ Dios. Jém wiñtipic watnetā jém cotsicyucmi jém Sinaí. Jém trato jex juuts jém Abraham iesclava jém Agar. Jém icupicneyajwiꝓ yíp trato tsíypa juuts tum esclavo porque icuyoxayajpa jém Moisés inꝓuímayooyi. ²⁵ Jém Agar jex juuts jém cotsic Sinaí jém naxyucmi Arabia, jex juuts jém atebet Jerusalén jém siꝓpic it con itũmpiy jém imanictam jém Israelpic pĩxiñtam. Tsíyyaj jeeyaj juuts esclavo porque inꝓacneyaj jém wiñicpic anꝓuímayooyi. ²⁶ Pero jém tungac Jerusalén, jém itwiꝓ siꝓyucmi, tsíy libre. Taichtam jém siꝓyucmiꝓic Jerusalén tamānictam. ²⁷ Nĩmpa así jém Dios inꝓaꝓi jém jayñewiꝓ:

Maymájaji, miyomo, jém dapic mimanigíy.

Pĩmi anꝓeji de maymájaji jém dapic queman inicnay tum tsixi.

Porque núcpa jém jama iga jém yomo jém tsacnetawwiꝓ,

iniitpa más jáyan imanic que jém yomo jém iniitwiꝓ jém iwidaaya.

²⁸ Mantiwitam, mimichtam Diosam mimānictam porque Dios tajycámayñe iga tamāigap jextim juuts jém Isaac. ²⁹ Wiñigam jém Abraham imanic, jém nayñewiꝓ juuts cualquier pĩxiñ, tsam iyaachwat jém itwiꝓ jém ijycámayñewiꝓ Dios iga naypa. Jesapim siꝓ jém icupicneyajwiꝓ jém wiñicpic anꝓuímayooyi tsam iyaachwatayajpa jém icupicneyajwiꝓ Cristo jém nayñewiꝓ con Dios iAnama. ³⁰ ¿Jesic ti nĩmpa jém anꝓaꝓi jém jayñewiꝓ? Nĩmpa así: “Tanjatun Dios inĩmá yém Abraham iga quebacꝓuti jém inĩesclava con imanic porque jém yomo imanic da wiꝓ ipictson jém herencia juuts jém inũuntayomo imanic.” ³¹ Jeeyucmi, mantiwitam, da tatsíyta juuts jém esclava imanic porque tamānictam de jém yomo jém dapic je esclava.

5

Odom más tatsíyñ juuts tum esclavo

¹ Jém tánomi Jesucristo tachi jém libertad iga odom más tatsíyñ juuts tum esclavo. Jesic odoy jici iga i miccámaypa eybic inĩsciyucmi jém yunta iyugo, jém wiñicpic anꝓuímayooyi.

² Amatonꝓaami. Ich aPablo. Siꝓ mannímáypa siiga inĩjicpa iga miwadayꝓap jém marca de circuncisión iga miccáyayñ jém inĩtāꝓca, jesic tánomi Cristo da wiꝓ miyoxpáta.

³ Eybictim mannímáypa, siiga tum pĩxiñ ijicpa iga wadayꝓap jém marca de circuncisión iga odoy iniidiñ jém tāꝓca, jesic tienes que iwatpatim itũmpiy juuts nĩmpa jém Moisés inꝓuímayooyi iga odoy ipictsoniñ jém miꝓpic castigo. ⁴ Siiga algunos de mimichtam inĩjicpa iga Dios miccáyaypa inĩtāꝓca porque siꝓ inꝓwat juuts nĩmpa jém Moisés inꝓuímayooyi, jesic quejpa iga inĩchacne iga inꝓupicpa jém tánomi Cristo. Inĩchacneum jém Dios itóyooyi.

⁵ Pero taichtam tananjócpa por medio de Dios iAnama iga tawitsagáypa tantāꝓca porque tanꝓupicpa iga Dios wiꝓ tayoxpát. ⁶ Siiga Cristo tamichi, jesic da para ti wi siiga tanañ jém marca de circuncisión o da tanañ. Pero tsam wi siiga tanꝓupictámpa iga Dios wiꝓ tayoxpát y tanañ jém wibic tóyooyi.

⁷ Mimichtam inꝓiwattámpa idic juuts ixunpa Dios. ¿Jesic i mictsac jém numapic anꝓuímayooyi iga da más inꝓupicpa? ⁸ Quejpa iga da je Dios michi yíp jixi porque Dios miñwejay iga michíyñ juuts jém imanictam. ⁹ Jistaami iga: “Uxan levadura icꝓipa

itumpiy jém jaapi.” ¹⁰ Ich ancupicpa iga tánomi tsam miyoxpátpa, jeeyucmi da ançinpa iga incupictámpa jém tungac anquímayooyi. Dios ichiiba castigo jém pxiñ jém icujíñaypaap jém Dios ipxiñtam. Dios da iticutigiyi japaap jém pxiñ.

¹¹ Mantiwitam, tsam ajóyixajpa jém Israelpic pxiñtam porque da anañmadáypa jém pxiñtam iga ixunpa Dios iga tanwatpa jém marca de circuncisión. Pero meega anañmatpa jexpictim miogooyi, jesic jém Israelpic pxiñtam da ijóyixajpa jém wibic anmati iga accaata tánomi Cristo jém cunusyucmi. ¹² Jém malopic maestroyaj tsam mimoogíypa porque ixunpa iga inwattámpa jém marca de circuncisión. Ich animpa más wi meega iyaac nacapunyajtaiñ.

¹³ Mimichtam mantiwitam, Dios micupinpa iga michiitámpa jém libertad de jém wiñicpic anquímayooyi. Pero jém libertad da michiiba lugar iga immalwatpa. Michiiba lugar iga minitoymtamtaiñ con jém iñiwitam, iga miniyoxpáttamtaiñ. ¹⁴ Porque cupacpa tanwat itumpiy jém Dios inquímayooyi siiga tanwatpa juuts nimpá yip anmati: “Tantóyiñ tantiwitam como taich mismo tanatoytap.” ¹⁵ Pero siiga tsam minijóyixátamtap con jém iñiwitam y tsam míñatámpa, jesic cuidado iga miniyajtamtap.

Dios iAnama tayoxpátpa iga tanwawatpa

¹⁶ Siip mannímáypa, cupictaami juuts nimpá jém Dios iAnama, odoy wattaami jém malopic cosa juuts iñjistámpa iñanamanjom. ¹⁷ Jém malopic jixi, jém tanaitwip tánanamanjom, it en contra de jém Dios iAnama. Jém Dios iAnama ittim en contra de jém malopic jixi. Icuistic it en contra. Jeeyucmi da wiap inwat jém wibic cosa juuts iñxunpa. ¹⁸ Pero siiga incupicpa juuts nimpá jém Dios iAnama, jesic dam más minjacpa jém wiñicpic anquímayooyi.

¹⁹ Tsam wiquejpa titam iwatyajpa jém pxiñtam jém iniitwip jém malopic jixi ianamanjom. Pejóypa, yomtsicpa, icusúniypa itumpiy jexpic cosa jém dapic wi. ²⁰ Ijisyajpa jém watnas, iñawatwadáypa itiwí. Tsam jóytero. Tsam áñapa. Tsam naja. Tsam jóyixóypa. Agui nawiwadaytatooba iyaac. Nawéctap, iwatpa tungac grupo. ²¹ Tsam cuyóyiyóypa. Accaóypa. Tsam ucpa. Iwatpa malopic sin y itumpiy jexpic cosa. Siip eybic mannímáypa juuts mannímayne iga jém pxiñtam, jém iwatpáppic jempic, da wiap iñuc jut injacpa Dios.

²² Pero Dios iAnama tayoxpátpa iga tatóyoyiñ, iga tamaymáyatámiñ, iga odoy táñatámiñ con jém tantiwitam, iga tanyaachiyiñ siiga i tamalwadáypa. Da tamalo. Tanyoxpádiñ i quej, tanaccupaguiñ juuts tanjycámayne. ²³ Da tanacujíptap. Seguido tanwatpa jém wítampic cosa, da i wiap tacutits iga tacmalwatpa. Da i ni tum ley en contra de jém wibic cosa. ²⁴ Itumpiy jém pxiñtam jém Cristopic imichiyaj, icunún jém malopic ijixi cunusyucmi. Tsíy juuts caane jém malopic jixi iga odom más tanjusúniyiñ jém malopic cosa. ²⁵ Siiga tanait jém vida, jém tachiiñewip jém Dios iAnama, jesic wi iga tanwattámiñ juuts tanquejáypa jém Dios iAnama.

²⁶ Da wi iga minicujíptap iñyaac porque jempigam inictsucumpa jém pleito. Datim wi iga minicujóyiytamtap.

6

Nayoxpáttamtaji con jém tantiwitam

¹ Mantiwitam, siiga impát tum tantiwí iccutiñe itañca, jesic mimichtam, jém inwattampáppic juuts minquejáy jém Dios iAnama, yoxpaati iga tsucúmiñ eybic. Anjijajaci chocoymi con tum wibic iñanama. Pero cada tumtum de mimichtam nawattamtaji cuenta iga odoy i micutíchiñ iga micmalwatpa. ² Mantiwitam, nayoxpáttamtaji con jém

tantiwitam iga iñyaachiytámiñ cuando micutítstamtap. Jempigam capsapa inwat itumpiy jém tánQmi Jesucristo inquímayooyi.

³ Siiga tum pxiñ tsam nacujíptap y nimpá iga agui wíap, pero da ti ijodon, jesic namigóyaytáp iyaac. ⁴ Cada tumtum de mimichtam nacipintaji iñyaac. Siiga inwíwatne, jesic mimaymay. Pero odoy jisi iga jém iñtíwi da wíap. ⁵ Cada tumtum ininiguíñ iyaac jém ichimi.

⁶ Siiga tum pxiñ icuyujcaaba jém wibic anquímayooyi, wí iga ichiñ jém imaestro jém wibic cosa titam iniit.

⁷ Mimichtam odoy namigóyaytaji iñyaac. Da i wíap imigóyáy Dios. Titam tanñippa, jeetim cosecha tampinpa. ⁸ Siiga tum pxiñ iwatpa jém malopic cosa juuts ijispa ianamanjom, jesic ipictsonpa jém castigo. Togoypa jém pxiñ. Pero siiga i iwatpa juuts iñímáypa jém Dios iAnama, jesic ipictsonpa jém vida jém dapic cuyajpa. ⁹ Jesic wí iga odoy tasopstámiñ iga tanwíwattámpa porque cuando núcpa jém tiempo juuts ixunpa Dios, tampictsontámpa tum wibic coñwiyoooyi siiga da tantsacne iga tanwíwatpa. ¹⁰ Jeeyucmi iganam tavivo, wí iga tanwíwadáyíñ itumpiy jém pxiñtam, pero da tantsacpa iga tanwíwadáypa jém tantiwitam jém icupicneyajwíp tánQmi Cristo.

Jém Pablo ichiiba jixi jém tantiwitam y ocmi inquímpa

¹¹ Ixtaami iga tsam mijpic letra síp manjáyáy ançimi. ¹² Jesanetim tsam wíquejpa iga jém malopic maestroyaj mipimiytámpa iga inwattámiñ jém marca de circuncisión. Iwatyajpa jempic iga iwíixyajiñ jém Israelpic pxiñtam. Tsam cinyajpa iga yaachwattap, jeeyucmi da inmattooba iga accaata cunusyucmi jém Jesucristo. ¹³ Porque ni jeeyaj, jém wadayñetawíp jém marca de circuncisión, datim capsapa iwatyaj itumpiy juuts nimpá jém Moisés inquímayooyi. Pero tsam iwianjamyaj iga miwadaytamtap jém marca de circuncisión iga wíñ inicujípyajta mimichtam incuyucmi. ¹⁴ Pero ich da anacujíptap anyaac. Wí iga tançujíppa tánQmi Jesucristo porque je accaata cunusyucmi para taichtam. Jeeyucmi tsíy juuts caane cunusyucmi para ich itumpiy jém malopic jixi jém itwíp yíp naxyucmi. Ich atsíy juuts acaanetim iga da más ançusúníypa jém cosa dapic wí. ¹⁵ Siiga Cristo tamichi, jesic da ti cuwatcuy jém marca de circuncisión siiga tanaít o da tanaí. Pero wí iga tacjoomasetpa jém Cristo. ¹⁶ Wí iga itumpiy jém icupicyajpáppic yíp anquímayooyi, con jém nunta Israelpic pxiñtam, jém Diospic imichi, iniityajiñ jém wibic paz ianamanjom. Wítim iga Dios iyaachanjamyajiñ.

¹⁷ Dende siip odoy i más amoogíyíñ porque anasiba annacyucmi jém marca iga acótsta jém tánQmi Cristo icuyucmi.

¹⁸ Mantiwitam, siip jém tánQmi Jesucristo ittámiñ iñanamanjom y miwíwadaytámiñ. Jemum cuyaj.

Jém carta jém ijáyayñewiip Pablo jém ityajwiip jém attebet Efeso

Jém Pablo ijáyaypa Dios ipixiñtam jém attebet Efeso

¹ Ich aPablo. Jém tánQmi Jesucristo accám juuts tum apóstol porque asíam iwianjam Dios. Siip manjáyaypa mimichtam, Dios mipixiñtam, jém miittanwiip jém attebet Efeso jém incupicnetanwiip Jesucristo. ² Miwíwadáyíñ jém tanJatun Dios y jém tánQmi Jesucristo. Michiitámiñ jém paz iga da ti idíyíy íñanamanjom.

Chiitq wibic bendición jém Cristo ipixiñtam

³ Tanjújíptámpa Dios, jém tánQmi Jesucristo iJatun, porque tsam tawíwadáyíñ, tachiíñe jém sinyucmic bendición jém dapic tánixpa. Tawadayíñe así porque tamichi jém tánQmi Cristo. ⁴ Dios tacupin tsam wiñigam cuando danam iwatne yíp mundo iga tamichap jém tánQmi Cristo, iga tatsíytámiñ juuts tum wibic pxiñ dapic táncáiy Dios iwiñjom. ⁵ Como tsam tatoypa Dios, dende wiñigam tacupin iga tamanigap jém tánQmi Jesucristo icuyucmi. Tawadáy así porque jempam iwianjam. ⁶ Jeeyucmi tanjújíptámpa Dios porque tsam tóyóypa y tsam tawíwadáyaypa. Tawadáy así porque tamichi jém tánQmi Cristo, jém tsampic itoypa Dios. ⁷ Yíptim Cristo tajojáy tantánca cuando itegáy íñipiñ. Tawadáy perdón jém tantánca porque Dios tsam tóyóypa, tsam tawíwadáyaypa. ⁸ Quejpa iga Dios tsam pimi tatoypa porque tachi itumpiy jém wibic jixi iga tanjutíyíyíñ ti tanquejáypa Dios. ⁹ Tacjodóna ti iwattooba, jém jixi jém anécnewiip dende wiñigam. Iyaac ijsne idic iga iwatpa juuts je iwianjam. ¹⁰ Cupacpa iwat juuts iwianjam Dios cuando núcpa jém ínanpigam jama. Dios ijs iga icijunçotpa itumpiy cosa jém Cristo icijom iga injacpa jém ityajwiip sinyucmi y jém ityajwiip naxyucmi.

¹¹ Jém Cristo tamichi, porque Dios tacupin neum dende wiñigam iga tampictsoniñ titam tachiiba Dios juuts ijsne idic. Porque siempre iwatpa Dios juuts je iwianjam. ¹² Iwianjam iga aichtam atsíytámiñ jém wiñtipic iga ananjóctámpa jém Cristo iga anjújíptámpa porque tsam iniit ipimi. ¹³ Ocmi, mimichtam, mimichatim jém Cristo cuando immaton jém numapic anmatí iga Dios taciaputpa. Cuando moj incupicta jém Cristo, michiita jém Dios iAnama ínanamanjom juuts tum sello iga quejiñ iga Dios mimichi, juuts tajycámayñe. ¹⁴ Tachiíñe Dios iAnama iga tacjodónap iga numa tampictsonpa titam tajycámayñe Dios. Tampictsonpa cuando capsum taciaput tantumpiytam jém Diospic tamichitam. Jesic tanjújíptámpa tanJatun Dios iga agui wiap.

Jém Pablo iwágáypa Dios iga ichiñ jém wibic jixi jém icupicneyajwiip tánQmi

¹⁵ Jeeyucmi cuando ammaton iga tsam incupicpa tánQmi Jesús y iga tsam iñtoypa itumpiy jém Dios ipixiñtam, ¹⁶ da antsacpa iga anchiiba gracia Dios para mimichtam. Siempre manjspa cuando anwatpa oración. ¹⁷ Anwágáypa jém tanJatun Dios, jém tsampic wiap, jém tánQmi Jesucristo iDiosim, iga michiñ jém wibic jixi íñanamanjom iga más inwicutíyíyíñ titam minquejáypa y iga más inwixpiguíñ jém tanJatun Dios. ¹⁸ Anwagáypatim Dios iga miyícquejiñ ínanamanjom iga más incutíyíyíñ tiiga micupin y iga iñjodónatámiñ ti herencia ipictsonyajpa jém Dios ipixiñtam jém tsam wibic riqueza. ¹⁹ Minquejáypatim iga tsam wiap tanJatun Dios. Da cuyajpa ipimi, wiap tayoxpát jém tanjucicnewiip jém Cristo. Dios tanquejáy iga tsam pimi wiap ²⁰ cuando icpis jém tánQmi Jesucristo de jut it jém caaneyajwiip, iccoñ jém Dios inwimi sinyucmi. ²¹ Iccám iga anjagooyi iga injacpa itumpiy jém anjagooyiyaj y jém tsampic wiap, jém itwiip yíp naxyucmi

y jém itw̄ip siñyucmi. Jém sīppic it y jém miñpáppic ocmi. ²² Tsacta itump̄iy cosa jém tán̄omi Cristo ipuyc̄im iga injacpa. Accám̄ta iga anjagooyi iga injacpatim itump̄iy jém Dios ipixiñtam. Tsíy iga cobacpic. ²³ Y jém Dios ipixiñtam tsíy iga Cristo imijtay, icomne icumij con itump̄iy jém w̄ibic cosa.

2

Dios taciaputpa porque tsam tatoypa

¹ Mimichtam michíyñe idic juuts tum p̄ixiñ caanew̄ip porque tsam immalwatne, tsam mitán̄caíy. ² Tsam idic immalwatpa cuando danam in̄cupicne Cristo. Tsam idic immalwatpa juuts iwatyajpa jém malopic p̄ixiñtam jém ityajw̄ip yíp naxyucmi. Tsam idic in̄watpa juuts iw̄ianjam jém Wocciw̄iñ, jém mal espíritu in̄jagooyi, jém sīpáppic sauyucmi. Jeetim mal espíritu it jém p̄ixiñtam ianamanjom jém dapic icupicpa Dios. Agui icmalwatpa. ³ Taichtam tajextim idic. Tantump̄iytam tsam tammalwatpa idic juuts nimpa jém malopic j̄ixi tán̄anamanjom y tanj̄ixianjom. Jeeyucmi tampictsonpa idic jém Dios icastigo juuts jém tungac p̄ixiñtam. ⁴ Pero tan̄jatun̄ Dios tsam p̄imi tayaachanjampa. Tsam p̄imi tatoypa. ⁵ Aunque tatsíyñe idic juuts tacaane porque tsam tatán̄caíy, Dios tachi jém vida porque acp̄ista jém Cristo. Tsam tóyóypa Dios jeeyucmi michtam miciaputtam̄ta. ⁶ Tawagaacpis Dios con Cristo, sīp tan̄waganacoñ Cristo siñyucmi. ⁷ Iwat jempic iga tan̄quejáypa itump̄iy tiempo, jém miñpaap, iga tsam tóyóypa Dios y tsam tayoxpáttooba porque tan̄waganait̄ jém Jesucristo. ⁸ Dios tsam tayaachanjampa, jeeyucmi miciaputta porque in̄cupicne iga Dios w̄iap miyoxpát. Da iñyaac miniciaputta, pero Dios michi tum xaja. ⁹ Da i w̄iap iw̄iwat iga naciaputtap iyaac, iga da i w̄iap in̄icujipta iyaac. ¹⁰ Taichtam Dios tawāti. Tacjoomaset cuando moj tan̄cupic Jesucristo iga tan̄wattámiñ jém w̄itampic cosa juuts je ixunpa. Dende wiñgam ijis Dios iga tan̄w̄iwattámiñ.

Tatsíyta juuts tumti attebet

¹¹ J̄istaami iga mimichtam migentiles, da je mijudíos. Da inīita jém marca de circuncisión immijtayyucmi juuts jeeyaj. Y jém marcajyw̄ip miccámáy iññiyi: “Jém tungac mipixiñtam jém dapic mimarcaj̄iy.” ¹² J̄istaami iga wiñic mimichtam da idic miitta con Cristo. Miit in̄cutum. Da inīi derecho iga in̄waganait̄pa jém Israelpic p̄ixiñtam. Tungac mipixiñtam. Da idic iñixpicpa jém wiñicpic trato juuts ij̄ycamayñe Dios jém Israelpic p̄ixiñtam. Da idic in̄jodon̄ iga Dios miw̄iwadáypa. In̄cutum idic michíyñe yíp naxyucmi, miitta idic sin Dios. ¹³ Sīp in̄waganait̄tum Cristo. Mimichtam michíyñe idic juumi, pero sīp w̄iap in̄cunúcta nocojom porque jém Cristo itegáy iñ̄piñ. ¹⁴ Sīp Cristo iccuyaj jém pleito entre jém Israelpic p̄ixiñtam y jém tungac p̄ixiñtam iga tsíyyaj juuts tumti attebet. It idic juuts tum taañi entre jém Israelpic p̄ixiñtam y jém tungac p̄ixiñtam, pero Cristo imiswat jém taañi. ¹⁵ Cuando cunúnta cunusyucmi, iccuyaj jém wiñicpic an̄químayooyi, jém tsampic ip̄imíyypa idic jém p̄ixiñtam. Iwat jempic iga tatsíytámiñ juuts tumti tap̄ixiñ porque Cristo tam̄ichitam. Sīp tatumtitam, cuyajneum jém pleito. ¹⁶ Accaata cunusyucmi jém Cristo iga tatsíytámiñ amigo con Dios porque tan̄cuistictam tatsíyta tumti mijtay. Asíam iccuyaj jém pleito.

¹⁷ Jém Cristo miñ in̄mat yíp naxyucmi jém w̄ibic an̄māti. Nimpa iga w̄iap tantsíyta amigo con Dios. Miñ miñmadáy mimichtam jém miitw̄ip juumi. In̄madáȳtim jém Israelpic p̄ixiñtam jém itw̄ip nocojom. ¹⁸ Jém Cristo icuyucmi tantump̄iytam w̄iap tan̄cunúcta tan̄jatun̄ Dios. Tawiatámpa porque jeetim Dios īanama tayoxpátpa. ¹⁹ Jeeyucmi mimichtam dam je juumipic mipixiñtam, jém sīpáppic idic tungac naxyucmi. Pero sīp

inwaganait jém Dios ipixiñtam. Mimichtam Dios mimañictam. ²⁰ Mimichtam mijex juuts tum tic jém watnetawwip jém baseyucmi. Jém Jesucristo mismo je jém wiñtipic tsa, jém esquinajywip jut pimane jém tic. Jém wiñicpic añmatciwiñ y jém apóstolyaj jex juuts jém tsaayaj jém picnetawwip para jém base jut tsucumpa jém mastic. ²¹ Tsajcámta itumpiy jém icupicneyajwip Cristo jut pimane jém tic. Tsam jáyanap jém Dios ipixiñtam hasta cupacpa jém wibic mastic jut it Dios. ²² Jesic taichtam como Cristo tamichitam, tacumuntsajnetā iga tanwattampa tum mijpic tic jut itpa jém Dios iAnama.

3

Cutsatta jém Pablo iga inmadáypa jém dapic je de Israel

¹ Jeeyucmi ich aPablo apajnetā porque manañmadáy jém Jesucristo inquímayooyi mimichtam jém tungac mipixiñtam. ² Wí iga inñodónaiñ iga Dios achi jém yoxacuy y ayoxpát iga manañmadáypa iga Dios tsam miwíwadaytooba. ³ Añquejay Dios jém jixi, jém añnécnawwip, juuts wiñti manjáyayñe. ⁴ Cuando imaypa jém toto, wíap incutiyiy iga jém Cristo añquejay jém jixi, jém añnécnawwip idic. ⁵ Dios da inquejay yíp jixi jém wiñicpic pixiñtam. Pero siip Dios iAnama inquejay jém apóstolyaj, jém cuáyñewwip, y jém Dios inmatciwiñ ⁶ iga jém dapic je de Israel ipictsonpatim jeetim herencia juuts jém Israelpic pixiñtam. Siip jém tungac pixiñtam tsíyyaj juuts tumti mjtay con jém Israelpic pixiñtam. Ipectsonyajpatim titam ijycámayñe Dios jém imanictam, jém icupicneyajwip Jesucristo por medio de jém wibic añmati.

⁷ Dios acupin iga añcuyoxap yíp wibic añmati. Achi yíp yoxacuy juuts tum xaja porque tsam iniit ipimi, je tsam wíap. ⁸ Ich más da awíap que itumpiy jém Dios ipixiñtam, pero Dios ayoxpát, achi jém derecho iga anañmadáypa jém tungac pixiñtam jém tsam wibic riqueza de Cristo jém dapic wíap tammay. ⁹ Achiitim jém derecho iga anacjodónap itumpiy jém pixiñtam ti iwattooba Dios. Anañquejáypa jém jixi jém dapic i wíap icutiyiy, dende wiñgam inécne idic Dios, jém iwatnewwip itumpiy cosa. ¹⁰ Dios ixunpa iga siip por medio de jém icupicnewwip Cristo icjodónap jém sinyucmicpic pixiñtam, jém injacyajpáppic sinyucmi, itumpiy jém wibic jixi jém iniitwíap tanjatun Dios. ¹¹ Dios iwat juuts ijis dende wiñgam cuando icutsat tánQmi Jesucristo yíp naxyucmi. ¹² Cristo tamichi, jeeyucmi da tacinpa, tanjodon iga wíap tanjunuc Dios sin cñi porque tancupicne. ¹³ Jeeyucmi manjunucsáypa iga odoy añyaaci iga agui ayaachwattā mimichtam inçuyucmi. Annascaaba así iga Dios miwíwadáyñ.

Cristo iniit jém wibic tóyooyi

¹⁴ Jeeyucmi acosteñpa jém tánQmi Jesucristo iJatun iwiñjom. ¹⁵ Itumpiy jém ityajwip sinyucmi y jém ityajwip yíp naxyucmi ipictsonayyajpa inñyi iga iJatunim. ¹⁶ Añwágáypa Dios iga con jém wibic riqueza michiitamiñ jém ipimi inñanamanjom iga más miwíap por medio de jém iAnama ¹⁷ iga iniittamiñ tánQmi Cristo inñanamanjom porque incupicpa iga Dios wíap. Jesic da inñacpa jém wibic tóyooyi. Mijex juuts tum cuy tsam jojmi tichigiy. Mijex juuts tum tic tsam wíwatne. ¹⁸ Jesic wíap incutiyiyta con itumpiy jém Dios ipixiñtam iga jém Cristo itóyooyi da cuyajpa, tsam wíti, tsam yagats, tsam jojmi y tsam yucmi. ¹⁹ Añwágáypatim Dios iga micjodónaiñ jém Cristo itóyooyi, mex da nunca capspa tanjodóna. Añwágáypatim Dios iga iniittamiñ itumpiy jém wítampic cosa jém tachiiñewwip Dios.

²⁰ Siip tançujíptampa tanjatun Dios jém wiapaap iwat itumpiy jém wítampic cosa para taichtam. Tayoxpátpa con ipimi tánanamanjom. Más pimi tawíwadáypa Dios que juuts tanwágáypa o juuts tanjspa. ²¹ Taichtam Dios tamastic. Taichtam Jesucristo tamichi. Wí iga tançujíptampa tanjatun Dios itumpiy tiempo, da nunca cuyajpa tançujíp. Amén.

4

Dios iAnama tayoxpátpa iga tanaittámiñ tumti tanjixi

¹ Ich aPablo apajta cárcel jém tánQmi Jesucristo icuyucmi. Jistaami iga Dios micu-pin iga michíytámiñ juuts Dios mimanictam. Jeeyucmi mancunucsáypa iga siempre inwíwattámiñ juuts ixunpa Dios. ² Siempre wattaami juuts tum wibic pixiñ, dapic malo, tsam wí ianama. Wínanigaayi jém inñíwítam, nayaachanjamtamtaji con jém wibic tóyooyi. ³ Wadaytaami caso iga iniittámiñ tumti jixi con jém tantíwítam porque Dios iAnama tayoxpátpa. Odoy tájatámiñ porque tatumtitam. ⁴ Tumti mijtay jém Dios ipixiñtam. Tumti Dios iAnama tanaitta. Dios tanwejay iga tanwagaanjócpa tumti cosa. ⁵ Tumti tánQmi, tumti jém anquímayooyi jém tancupicpaap, tumti jém acchínooyi. ⁶ Tumti tanDios, tantumpiytam tanjatun. Imatspacne itumpiy cosa. Jut quej it Dios. Tanwaganaitta Dios tantumpiytam.

⁷ Pero cada tumtum de taichtam tachiiñeta jém Dios ipimi iga wíap tanwat jém iyoxacuy, Cristo taquípsáy juuts je ixunpa. ⁸ Jeeyucmi nimpá así jém Dios inmati: Cuando quím eybic sinyucmi jém Cristo, ininic jém pajnetawíp idic.

Ichi jém pixiñtam tsam jáyan wítampic xaja.

⁹ ¿Ti nimtooba iga: “Quím eybic sinyucmi”? Nimtooba iga quet hasta más jojmi nascim. ¹⁰ Jém quetwíp nascim, jeetim jém químwíp sinyucmi jut más yucmi iga itpa jut quej con jém ipimi. ¹¹ Je mismo iccám algunos iga apóstol, tunyac iga inmatpa Dios inmati, tunyac iga inmadáypa jém pixiñtam jutsap iciacput Dios, tunyac iccám iga pastor iga iwatpa cuenta jém Dios ipixiñtam, tunyac iccám iga maestro iga inquejáypa Dios inmati jém pixiñtam. ¹² Accámyajta iga iyoxpátpa jém Dios ipixiñtam iga más wíap iwatyaj jém Dios iyoxacuy y iga capsapa icuyujca jém Dios inmati jém ipixiñtam, jém tsíyñeyajwíp juuts Cristo imijtay. ¹³ Hasta que tantumpiytam tancupictámiñ con tumti tanjixi, hasta parejo tanwíxpiguiñ jém Dios iManic. Jempigam tatsíypa juuts tatsamitam, iga wíap tanwat itumpiy juuts ixunpa Cristo. ¹⁴ Dam tanwatpa juuts jém tsixtam porque da táñca imigóyayta jeeyaj jex juuts jém sawa iga nicpa yim jeexic, porque icupicpa tunyac anquímayooyi. Jém malopic anmatcwiñ agui jáyayanjichich, wíp tamigóyáy iga tacmalwatpa. ¹⁵ Pero taichtam tanañmatpa jém numapic anquímayooyi con jém wibic tóyooyi. Wí iga tamijap hasta tanactsíypa jém tammijtay icobac, jém tánQmi Cristo. ¹⁶ Taichtam jex juuts Cristo imijtay. Cada tumtum tapimane jém Cristo imijtayyucmi. Jeeyucmi tanwatpa juuts ixunpa Cristo, cuando tawiyoxatámpa, tajáyanap, hasta capsapa tanuyujca jém Cristo inquímayooyi porque tanaít jém wibic tóyooyi.

Jém jomipic vida jém tachiiñewíp Cristo

¹⁷ Síp mannímáypa y manañquímpa tánQmi inñiyimi iga odom wattaami juuts jém tunyac pixiñtam jém dapic iixpicpa Dios. Jém ijixi da para ti wí, da iyoxpátpa. ¹⁸ Cupiichane jém ijixi, da icutiíyíypa ti ixunpa Dios. Da iniiyay jém vida jém Diospic tachiiba porque da icutiíyíypa, agui malo jém ianama. ¹⁹ Da tsaap iga imalwatpa. Agui iwianjam iga iwatpa mal, tsam jixitogoyñeyaj. Agui icusúniíypa iga iwatpa itumpiy jém da wítampic cosa. ²⁰ Pero mimichtam da incuyujcaneta jém Cristo iga inwattámpa jempic, ²¹ siiga numa inmatorne jém Cristo inquímayooyi y incuyujcane jém numapic anmati jém tanquejayñewíp Jesús. ²² Mimichtam tsaci juuts jáy inwat wiñic cuando danam incupicne Cristo. Tsaci jém pecapic mijtay. Tsam pími malo jém wiñicpic jixi, miccusúniíypa jém malopic cosa agui mimigóyáypa. ²³ Cucactaami jém inñixi jém itwíp inñanamajom. ²⁴ Wati

juuts tum jomipic mipixiñ, jem iwatnewip juuts Dios, jem iwıwatpáppic, jem dapic táncayı.

²⁵ Jeeyucmi odoy migóyaayi jem inñıwıtam, nuumanmadaayi. Porque tumti mijtayyucmi tapımane.

²⁶ Siiga mijóypa, odoy táncawati. Odoy jıci iga mijóyñeeba hasta tigıypa jem jama.

²⁷ Odoy chiı lugar jem Wocciwiñ iga micmalwatpa.

²⁸ Jem númpaap idic ichaguiñ iga númpa, más wı iga yoxaiñ. Iwadiñ tum wıbic yoxacuy con ici iga wıap iyoxpát jem yaachayajpáppic.

²⁹ Odoy malanmati. Anmati jem wıtampic anmati iga inıyoxpátpa y inıwıwadáypa jem mimatonpaap. ³⁰ Odoy tsiganıyácwati jem Dios iAnama, jem taccamayñetawıip juuts tum sello, iga quejiñ iga Dios tamıchi hasta núcpa jem jama cuando taciaputtámpa.

³¹ Tsacı jem jıxi aguipic tam. Tsacı itumpıy jem jooya. Odoy jóyixi jem inñıwıtam. Tsacı iga agui mijıypa iga mijóyñe. Odoy malnımaayi jem inñıwıtam, tsacı itumpıy jem malopıc cosa. ³² Pero nawıwadaytamtaji entre mimichtam. Nayaachanjamtamtaji con jem inñıwıtam. Nawadaytamtaji perdón juuts jem tanjatun Dios tawadáy perdón por medio de Cristo.

5

Wı iga iwıwatıyajpa jem Dios imanıctam

¹ Mimichtam Dios mimanıctam jem tsampic mitoypa. Jesic wadaayi caso iga inıwattámpa juuts iwatpa je. ² Naittaami jem wıbic tóyooyi juutstim tatoypa jem Cristo. Iyaac nachııta iga accaatá por taıchtam, juuts tum ofrenda, tum sacrificio jem aguipic cınpa jem Dios iwiñjom.

³ Mimichtam wattaami juuts Dios mimıchıtam. Da ammatonıtooba iga mipejóypa, ni inıwatpa tunıac malopıc cosa, ni inıcusunıyapa jem inñıwıtam imıchi. Da wı iga iwıwatıyajpa jemıpic jem Dios ipıxiñtam, jem cuáyñeyajwıip. ⁴ Odoy nımtaami jem malopıc anmati, jem tsampic tatsaap. Odoy anmati juuts tum pıxiñ dapic jıxiıy. Odoy mal ochmıchi. Yıpyaj da inınanıgáypa jem wıbic anmati. Más wı iga tammétspa jem wıbic anmati iga tanchııba gracia Dios. ⁵ Michtam inıjodonıtam iga jem pıxiñtam jem pejoypaap, y jem iwıwatpáppic tunıac cosa dapic wı, y jem tsampic icusunıyapa jem dapic je imıchi, jextim juuts ijıspa jem watnas, jeeyaj da wıap inıuc jut inıjacpa tánomi Cristo y tanjatun Dios. ⁶ Odoy jıci iga i mimıgóyáypa con jem mıgooyı iga da malo iga imımalwatpa. Jeeyucmi ichııba Dios castıgo itumpıy jem pıxiñtam jem dapic icupıcyajpa Dios. ⁷ Jeeyucmi odoy waganasıı jexpic pıxiñtam.

⁸ Mimichtam mııtta idic jem piıchım, pero sııp mııtum jem juctianıtsocajom porque inıwagananı Cristo. Jesic wıwattaami juuts jem wıtpáppic jem juctianıtsocajom. ⁹ Jem Dios iAnama micwıwatpa iga inıwatpa juuts tum wıbic pıxiñ iga siempre mıñuumanımatpa. ¹⁰ Wattaami empeño iga inıwattámpa fı ixunpa tánomi. ¹¹ Odoy waganasıı jem malopıc pıxiñtam jem sııpáppic piıchım, jem iwıwatpáppic jem malopıc cosa jem dapic tayoxpátpa, pero anıyıjaci. ¹² Agui tatsaap tanaımat fı iyamwatıyajpa jeeyaj. ¹³ Pero cuando icuyıcquejpa itumpıy jem malopıc cosa, tsam wı quejpa porque jem juctı icuyıcquejpa itumpıy cosa. ¹⁴ Jeeyucmi nımyajpa:

Yısi, mımonıpáppic.

Tsucumi de jut fı jem caaneyajwıip,

Cristo micuyıcquejpa.

¹⁵ Nawattaji cuenta iga inıwıwatpa. Odoy wattaami juuts jem pıxiñtam jem dapic jıxiıy. Wattaami juuts jem jıxiıywıip. ¹⁶ Wattaami empeño iga inıwıwattámpa sııp ıganam fı tiempo porque sııp tsam imıalwatıyajpa jem pıxiñtam. ¹⁷ Odoy cuıxaji, pero wadaayi caso

iga inçutiiyíiñ ti ixunpa jém tánQmi. ¹⁸ Odoy uquiataami porque jém pìxiñ, jém tsampic ucpa, togoypa ivida. Más wí iga minjacpa jém Dios iAnama. ¹⁹ Nanmadaytamtajì con jém inñiwitam con jém Salmos y jém himnos y jém Dios iwañi. Wantaami, cujíptaami jém tánQmi Cristo con itumpiy iñanama. ²⁰ Siempre chiitaami gracia jém tanjatun Dios para itumpiy cosa jém tánQmi Jesucristo inñiyimi.

Wí iga tanwíwadáypa jém ityajwñp tanticim

²¹ Cada tumtum de mimichtam nacupictamtajì con jém inñiwitam porque inçintámpa tánQmi Cristo.

²² Miyomtám, mijaayiywñp, jñci iga minjacpa jém inwídaya juuts jém tánQmi minjacpa. ²³ Porque jém pìxiñ je jém cobacpic, injacpa iyomo. Jextim juuts Cristo, je jém cobacpic, injacpatim jém iglesia, je jém imijtay y je jém iciacputpáppic. ²⁴ Juuts jém Cristo ipixiñtam ijícpa iga injacpa jém Cristo, jesanetim jém yomo ijícpa iga injacpa jém iwídaya. Iwatpa itumpiy juuts inñimáypa jém iwídaya.

²⁵ Mipixiñtam, miyoomiywñp, toyì jém inñyomo juuts jém tánQmi Cristo itoypa jém ipixiñtam jém icupicneyajwñp. Iyaac nachiiñta ²⁶ iga iwítsagáypa jém ipixiñtam itañca. Icuicháyáypa ianama, icheeba con ni por medio de jém inmañi. ²⁷ Iwat así iga jém ipixiñtam, jém icupicneyajwñp, wíap inñuc Cristo iwiñjom tsam wícuayajneyaj. Jex juuts tum puctucu wí cuáyñe, da añuchñe, da inñi ni tum mancha. Ixunpa Dios iga da tancaíy ni uxañ jém ipixiñtam iga wí cuichayñe. ²⁸ Jempictim ixunpa Dios iga tum pìxiñ itoypa iyomo juuts itoypa imijtay. Jém itoypaap iyomo, natoytap iyaac. ²⁹ Porque da ñ wíap ijóyix imijtay, iwídap, iwatpa cuenta. Jém Cristo jempictim iwatpa cuenta jém ipixiñtam, iwídap jém icupicneyajwñp, jém iglesia, jém imiichipic. ³⁰ Taichtam tatsíyta juuts jém Cristo imijtay, juuts jém imayi y jém ipac. ³¹ “Jeeyucmi tum pìxiñ ichacpa ijatun y iapa iga nicpa iwaganait jém iyomo. Jesic icuistic tsíyyajpa juuts tumti mijtay.” ³² Yíp tum mijpic jixi, añécne idic. Pero ich anjísipa iga nimtooba iga Cristo con jém ipixiñtam tumtiyaj. ³³ Jeeyucmi mannímáypa: Cada tumtum de mimichtam wí iga inñóyíñ jém inñyomo juuts minitoytap inñyaac. Jém yomtám, jém jaayiywñp, wí iga iniidáyíñ respeto jém iwídaya.

6

¹ Michixtam, como Cristo mimiichitam, cupictaami jém inñjatun y inñapa. Jempam iwianjam Dios. ² Naidaayi respeto jém inñjatun y inñapa. ³ Yíp jém wiñtipic añquímayooyi jém tachiiñewñp con promesa iga miwídiñ y yagatsap imvida yíp naxyucmi siiga inwatpa así.

⁴ Mimichtam mijatunpic, odoy tsicjooyi jém immanictam. Wíactsami jém immanictam iga icupicyajiñ jém tánQmi inquímayooyi. Añquejaayi iga iwatyajiñ juuts ixunpa Dios.

⁵ Miesclavotam, cupictaami jém inñomi yíp naxyucmi. Wíixtaami, cñtaami, cuyoxataami con itumpiy iñanama juuts inçuyoxatámpa jém tánQmi Cristo. ⁶ Cuyoxataami inñomi juuts Cristo miesclavotam, da no más iga miwíxiñ jeeyaj. Wattaami con itumpiy iñanama juuts ixunpa Dios. ⁷ Wíiwattaami jém inñyoxacuy juuts inçuyoxap jém tánQmi Cristo y da juuts jém pìxiñtam. ⁸ Porque inñjodontam iga titam tanwatpa yíp naxyucmi tawíyojpa jém tánQmi Cristo siiga tanwíwatne siiga taesclavo o da taje.

⁹ Mimichtam miomipic, wíwadaytaamitim jém inñesclavo. Odoy otjímaayi iga inçótspa. Jistaami iga inçuistictam minjacpa tánQmi jém itwñp sinyucmi. Je iixpa itumpiy pìxiñtam jextim.

Jutsap tanáñata con jém malopic enemigoyaj

¹⁰ Siiip, mantiwitam, naiftaami jém tánQmi ipimi porque je tsam wiaip y michiiba jém pimi iga tsam miwaptim. ¹¹ Nacupujtaji con jém armadura jém michiiñewiip Dios iga odoy iñchaguiñ jém Dios inmati cuando mimigóyáypa jém Wocciwiñ. ¹² Porque da síp tanánata con yíp naxyucmic picixiñtam jém maayiwiiip jém pagiywiiip. Tanánatámpa jém Wocciwiñ jém iniitwiiip ipimi con itumpiy jém mal espíritu jém malopic anjagooyi jém itwiiip jém piichcim. Tanánatámpa jém mal espíritu injagooyiyaj jém siipáppic sauyucmi. ¹³ Jeeyucmi pictaami itumpiy jém armadura jém Diospic tachiiñe iga wiañ iñyaachiyta cuando micutitstap jém malopic jama. Cuando yajum miwitsacta, seguido cámtēñi, cupici Dios inmati. ¹⁴ Jesic micámteñe. Pici jém numapic anmati juuts tum soldado ichencámpa jém icinturón. Siempre micupujpa siiga inwawatpa juuts tum soldado iccámpa jém icoraza. Jesic jém enemigo da wiaip mimalwadáy. ¹⁵ Accámnei inciac impuyucmi iga miit listo iga inimatpa jém wibic anmati. ¹⁶ Naiti jém fe juuts tum escudo, jesic wiaip inicpich jém Wocciwiñ icapi jém juctiywiiip. ¹⁷ Accaami jém casco iga miciaacputpa Dios juuts tum casco icupujáypa jém soldado icobac. Pici jém espada jém tachiiñewiip jém Dios iAnama. Jém espada je jém Dios inmati. ¹⁸ Odoy tsaci iga ininwejpátpa Dios juuts minquejáy jém Dios iAnama. Cunucsaayi Dios, wágaayi titam mitogóyáy. Ittaami al tanto, odoy anyaac iñanamanjom. Anwejpaati Dios para itumpiy jém Dios ipixiñtam. ¹⁹ Anwejpaatitim Dios para aich iga achiiñ anmati iga wiaip anamat iga odoy acinñiñ iga anacjodónayajpa jém picixiñtam jém wibic anmati jém anécnewiip idic. ²⁰ Ich atsíy juuts tum embajador de jém wibic anmati. Jeeyucmi atsenneta con cadena. Anwejpáttaami Dios para ich iga odoy acinñiñ y wiaip anamat jém wibic anmati.

Jém Pablo inquímpa jém iamigoyaj

²¹ Siiip mañcutsadáypa jém Tíquico, jém tantiwí jém tsampic antoypa. Je da ichacpa iga inmatpa jém tánQmi inquímayooyi. Micjodónap ti annasca y ti síp anwat. ²² Jeeyucmi mañcutsadáy jém Tíquico iga iñjodónaiñ jutsane áñiti, iga miyoxpáñiñ iga odoy minyáctáñiñ.

²³ Siiip mantiwitam, tanjatun Dios con tánQmi Jesucristo michiiñ jém paz, jém wibic tóyooyi y jém wibic jixi iga seguido incupictámpa Dios. ²⁴ Dios iwíwadáyñiñ itumpiy jém picixiñtam jém itoyyajpáppic jém tánQmi Jesucristo jém dapic nunca ichacyajpa. Jemum cuyaj.

Jém carta jém ijáyayñewiip Pablo jém ityajwiip jém attebet Filipos

Jém Pablo ijáyáypa jém Dios ipixiñtam jém ityajwiip Filipos

¹ Ich aPablo con jém añcompañero Timoteo añcuyoxatámpa jém Jesucristo. Siip manjáyáypa mimichtam jém Dios mipixiñtam jém inçupicnetañwiip Jesucristo jém attebet Filipos. Anjáyáypatim itumpiy jém impastoryaj con itumpiy jém diáconos jém icuyoxayajpaap jém Dios ipixiñtam. ² Jém tanjatun Dios y jém tánomi Jesucristo miwíwadáyíñ, michiitámiñ jém paz iga odoy iniidiñ cobacpiji iñanamanjom.

Jém Pablo iwatpa oración para jém iamigoyaj

³ Cuando manjísapa, siempre anchiiba gracia jém tanjatun Dios para mimichtam. ⁴ Cuando anañwejpátpa Dios para mimichtam iñtumpiytam, tsam amaymay porque ⁵ dende wiñigam hasta siip, tawagayoxap iga tanañmatpa jém wibic añmatí. ⁶ Ich añwijodon iga tanjatun Dios jém mojnnewiip iwat jém wibic yoxacuy iñanamanjom, seguido iwatpa hasta cupacpa cuando núcpa jém jama iga miñgacpa jém Jesucristo yíp naxyucmi. ⁷ Wi iga manjísapa porque tsam mantoypa. Agui anyoxpát cuando aít preso y cuando añcupuj jém wibic añmatí jém añjagooyi iwiñjom y anañmadáy iga numa jém añmatí da je migooyi. Mimichtam miwíwadáytim Dios juuts ich awíwadáyñe. ⁸ Dios ijodon iga tsam pimi mantoypa iñtumpiytam con jém wibic tóyooyi jém iniitwiip Jesucristo. ⁹ Anañwejpátpa Dios iga más iniitámiñ jém wibic tóyooyi iñanamanjom y iga michiñ jáyan jém wítampic jixi. Jesic más inçutiñyíypa ti ixunpa Dios. ¹⁰ Jesic wiap inçupij jém wibic cosa. Jesic cuáyñe iñanama, da i wiap miñímáy iga mitañcaíy hasta jém jama cuando miñgacpa jém Cristo. ¹¹ Mimichtam wattaami jáyan wítampic cosa juuts tum wibic cosecha por medio de Jesucristo. Jesic ixtap iga agui wi jém tanjatun Dios, tsam cujíptap.

Jém Pablo icuyoxap Cristo yíp naxyucmi

¹² Siip mantiwitam, ansunpa iga iñjodónaiñ ti annasane yim y iga más jáyanap jém wibic añmatí cuando annasca jempic. ¹³ Itumpiy jém ityajwiip jém palacio, con los de más, ijodónayaj iga anañnúc jém Cristo inquímayooyi. ¹⁴ Casi itumpiy jém tantiwitam, jém ityajwiip yim, da cñyajpa porque iyoxpátpa jém tánomi. Icamamwatyaj ianama cuando iixyaj iga apajnetá. Jeeyucmi siip da cñyajpa iga inmatpa jém Dios inmatí.

¹⁵ Algunos inmatyajpa jém Cristo inquímayooyi porque agui acujóyíypa, tsam ajóyixpa. Pero jém tungac inmatyajpa jém Cristo inquímayooyi porque iwianjam iga iwíwatpa. ¹⁶ Jém wibic pixiñtam inmatyajpa jém Cristo inquímayooyi porque tsam tóyóypa. Ijodónayaj iga aít yim iga añcupujpa jém wibic añmatí jém añjagooyi iwiñjom. ¹⁷ Pero jém malopic añmatciwiñ inmatyajpa jém Cristo inquímayooyi porque ipictsontooba alguna cosa para je iyaac, da porque iwíwattooba. Iwatyajpa así iga más ayaachwattaiñ iganam siip aít preso. ¹⁸ Ich da anticutigiyi i inmatpa jém Cristo inquímayooyi. Ich amaymay cuando jém pixiñtam iñuumanmatpa. Amaymaytim siiga algunos inmatpa no más iga ipictsonpa algun ti para je.

Ich tsam amaymaytim ¹⁹ porque añjodon iga núcpa jama iga atoptap porque michtam inñwejpátámpa Dios para ich y ayoxpátpatim jém Dios iAnama jém tachiiñewiip jém tánomi Cristo. ²⁰ Ich añwianjam y anañjócpa titam achiiba. Da atsaap ni uxañ. Ansunpa iga ich añwíwatpa con ammijtay iga cujíptaiñ jém Cristo. Da anticutigiyi siiga atsíypa

vivo o acaaneum. ²¹ Porque iganam aít, añcuyoxap Cristo. Siiga acaaba, tum coñwiyooyi para ich. ²² Siiga danam acaane, añwatpa jém tánQmi iyoxacuy, pero siip da añjodon juppíc añcupiñpa. ²³ Tsam tánca iga añcupiñpa jup más wí. Tsam nictooba aíti con Cristo porque más pimi wí para ich. ²⁴ Pero para mimichtam más wí iga atsiyppa vivo yíp naxyucmi. ²⁵ Añwijodon iga apoychíypa yíp naxyucmi con mimichtam. Manyoxpátpa iga más miwiatámiñ y más mimaymáyatámpa porque inçupicneta. ²⁶ Cuando aítgacpa con mimichtam, jesic agui mimaymáyatámpa, tsam inçujíptámpa tánQmi Cristo.

²⁷ Wadaytaami caso iga inwíwattámpa yíp naxyucmi juuts nimpá jém Cristo inçuímayooyi. Jesic siiga nicpa mánám o danam anicpa, ammatonpa iga inwíwattámpa y da i wiap mictsac jém Dios inmafi porque tumti inñanama y tumti inñixi iniitta. Ammatonpatim iga miwagayoxatámpa con itumpiy impimi iga jém pixiñtam wiap icupicyaj jém wibic añmafi. ²⁸ Odoy jici iga michigançiñpa jém inñemigo. Cuando iixyajpa iga da micinpa, jesic tsam wiquejpa iga togoyajpa jeeyaj, ipictsonyajpa jém mijpic castigo. Pero mimichtam cuando inñampa iga da micinpa, jesic inñodon iga miciaçputtámpa Dios. ²⁹ Jém Cristo icuyucmi mimichtam da no más michiita jém derecho iga inçupicpa je, pero iga miyaachwattaptim. ³⁰ Siip míñatámpa contra jeetim enemigo juuts ich jáy añaji juuts inñixne iga ich añwat. Inñodon tam iga ich seguido añapa contra jém malopic jixi.

2

Jém Cristo ijic iga tsíy juuts tum pixiñ da ti wiap

¹ Siiga Cristo micamamwadáypa inñanama, siiga Cristo itóyooyi miyoxpátpa, siiga iniit Dios iAnama inñamanjom, siiga wí inñanama y tsam mitóyóypa, ² jesic acapsaayi jém ammaymáyaj. Naitaami tumti tóyooyi, tumti jixi y tumti inñanama. Ittaami de acuerdo. ³ Pero odoy najacujóyíyooyi, odoy nacujíptaji inñaac. Más wí iga da malo inñanama y iga más inñoypa jém inñiwitam que minitoypap inñaac. ⁴ Odoy métstaami iga miniwíwadaytap inñaac. Pero métstaami jutsap inwíwadáyta jém inñiwitam.

⁵ Iniittámiñ jeetim jixi juuts jém tánQmi Jesucristo. ⁶ Jém tánQmi Cristo jextim ijixi y jextim ipimi juuts tanjatun Dios. Iwijodon iga da je nuumi iga tsíy juuts Dios. ⁷ Pero iyaac ichac itumpiy ipimi juuts Dios. Oy iti yíp naxyucmi juuts tum mozo. Jém imijtay juuts pixiñ. ⁸ Cuando oy yíp naxyucmi juuts tum pixiñ, ijic iga tsíyíñ juuts tum pixiñ da ti wiap. Iyaac nachiita iga accaata porque asiam ixunpa ijatun. Accaata cunusyucmi juuts tum malopic pixiñ. ⁹ Jeeyucmi Dios iccám iga más mijpic añjagooyi. Ichi más wibic niyi de itumpiy, ¹⁰ iga jém Jesús inñiyimi itumpiy jém pixiñtam icosteeñayyaj. Icosteeñayyajpa itumpiy jém siñyucmi pic pixiñtam y jém ityajwip yíp naxyucmi con itumpiy jém ityajwip nascucim. ¹¹ Cada pixiñ itots inmadiñ iga jém Jesucristo je jém tánQmi iga cujíptaiñ jém tanjatun Dios.

Jém Dios ipixiñtam juuts tum wibic jucti

¹² Mantiwitam, mantoytampápic, tsam añcupicta cuando jáy tawagaítitam, siip más acupictaami iga aít juumi. Jistaami jutsap inçiputta. Cñtaami Dios. ¹³ Porque Dios iwatpa mimichtámanjom juuts je iwianjam. Michiiba jém wibic jixi iga inwatpa juuts je ixunpa, miyoxpátpa iga wíaiñ inwíwatta.

¹⁴ Iganam inwattámpa juuts ixunpa Dios odoy añataami con jém inñiwitam. Odoy nacujytamtaji, ¹⁵ iga da i wiap mipádáy inñánca. Jesic Dios mimanictam, da mitáncaiy iganam mixiiba jém malopic pixiñtámanjom, jém icupicneyajwip jém migooyi. Tsam michoctámpa yíp naxyucmi juuts tum wibic matsa añtiwanjucmi iganam ¹⁶ ininictámpa jém Dios inmafi jém tachipápic vida. Jeeyucmi tsam amaymáypa jém jama cuando

miñgacpa Cristo yíp naxyucmi iga da manxajaanquejáy jém Dios inmati ni da axajayoxa. ¹⁷ Ich agui amaymay iga wiap manyoxpát iga incupictamiñ Cristo. Siiga accaatap porque manañmadáy jém Dios inmati, da anyácpa. Amaymay y ansunpa iga mimaymáyatámiñtim porque siip Dios miwipictsonpa juuts tum wibic ofrenda porque incupicne Cristo. ¹⁸ Maymáyataami mimichtam y wagamaymáyataamitim con aich.

Jém Timoteo y jém Epafrodito

¹⁹ Siiga jém tánomi Jesús iwianjam, anjiswa iga da jáyñe mancutsadáypa jém Timoteo. Jesic cuando miñgacpa yim, más amaymáypa cuando anjodóna jutsane íñiti. ²⁰ Da anai yim ni tum pxiñ jexpictim ijxi juuts aich, jém tsampic mijispa iga wipudiñ jém invida. ²¹ Porque itumpiy imétsyajpa jutsap iniwawadayajta iyaac. Da imétsyajpa jutsap icuyoxa jém Jesucristo. ²² Pero michtam injodontam iga wibic pxiñ jém Timoteo, tsam ayoxpát aich iga ananmatta jém wibic anmati, anwaganayoxa juuts tum ammanic. ²³ Anjiswa iga mancutsadáypa jém Timoteo cuando anjodóna ti annascaaba. ²⁴ Ich ancupicpa iga tánomi ayoxpátpa iga ich da jáyñe nicpa mánám anyaac.

²⁵ Wi iga mancutsadáypa eybic jém tantíwi Epafrodito, jém michpic ancutsadáy iga achi titam atogóyay. Anwaganayoxa, tsam ájata contra jém malopic jxi. ²⁶ Jém Epafrodito tsam mijispa. Tsam miixtooba inñumpiytam. Tsam anyácne porque ijodon iga immatoneta iga mimne. ²⁷ Numa, tsam pimi mimne hasta caatooba. Pero Dios iyaachanjam. Da no más je, pero ayaachanjamtim aich iga odoy más pimi anyáguiñ. ²⁸ Jeeyucmi ancutsatpa jicsiy jém Epafrodito iga mimaymáyatámiñ cuando eybic inixpa. Jesic ich da pimi anyácpa. ²⁹ Jesic wipictsontaami juuts inñiwi porque Cristotim imichi. Maymáyataami, siempre toytaami jexpic pxiñ juuts inñoypa jém tánomi. ³⁰ Por uxa caaba jém Epafrodito porque icuyoxa jém Cristo. Je da cñpa, núc ju it jém peligro iga cupacpa iwat jém yoxacuy porque mich da wiá anyoxpátta inyaac.

3

Dios tawitsagáypa tantáncu cuando tancupicpa Cristo

¹ Siip mantíwítam, maymáyataami porque Cristo mimichitam. Para ich da je molestia iga eybic manañmadáypa jeetim jxi juuts manjáyayñe. Wi para mimichtam iga eybic immatonpa. ² Nawattamtaji cuenta de jém chimpa, jém malopic obrero, jém inmatpáppic jém migooyi. Inimiñpa jém anquímayooyi iga Dios ipixiñtam tienes que iwatpa jém marca de circuncisión jém imijtayucmi. ³ Pero taichtam tanait jém numapic marca iga Dios tamichi. Tanait Dios inama tánanamanjom jeeyucmi wiap tanjis Dios. Tsam tamaymay iga Jesucristo tamichi. Taichtam tanjodon iga tanyaac da ti wiap tanwat iga tapictsoniñ Dios. ⁴ Siiga jém wiñicpic anquímayooyi wiap taciaput, jesic ich pecam aciputne, porque ich ampimimi seguido anwatpa juuts nimpa jém wiñicpic anquímayooyi. ⁵ Awadayta jém marca de circuncisión cuando ocho día anyañe. Ich Israelpic apixiñ de jém tribu de Benjamín. Ananmatpatim jém anmati hebreo juuts inmatpa jém anjatun. An cuyucane jém wiñicpic anquímayooyi con jém fariseopic pxiñtam. ⁶ Ich tsam pimi antoypa idic jém wiñicpic anquímayooyi. Jeeyucmi tsam pimi ammalwadáy jém icupicneyajwip Jesús. Anjiswa iga da atáncaiy porque anwatne itumpiy cosa juuts nimpa jém wiñicpic anquímayooyi. ⁷ Pero itumpiy jexpic cosa, jém anjispáppic idic iga tsam wi, siip da ti cuwatcuy para ich porque ancupicneum Cristo. ⁸ Itumpiy cosa jém anaitwip idic siip anjiswa iga it wi siiga togoypa porque ánixpic jém tánomi Jesucristo. Jém Cristo icuyucmi togoy itumpiy jém anaitwip idic, siip itumpiy jexpic cosa ánixpa juuts puchi porque más wi iga ampictson Cristo, ⁹ atsiypa juuts jém Cristo imichi. Dios da apictsonpa iga wibic apixiñ o porque agui anwíwatne juuts nimpa jém Moisés inquímayooyi, pero apictsonpa iga ancupicne Cristo. Dios apictson iga wibic apixiñ porque Dios awíwadáy

por medio de jém fe. ¹⁰ Ich ansunpa iga más y más ánixpiguiñ Cristo y más anaidiñ jém Dios ipimi jém icpisnewiip Cristo. Anyaachíypa cuando ayaachwattap jém Cristo icuyucmi. Hasta núcpa iga anaitpa jexpic jixi ánanamanjom juuts iniit jém tánQmi Cristo cuando ijícpa iga accaata. ¹¹ Ananjócpa iga acpistap de jut it jém caaneyajwiip.

Wi iga tanwatpa juuts ixunpa Dios con itumpiy tampimi

¹² Da mannímáypa iga anactsíyum itumpiy. Datim wiap anwat itumpiy cosa juuts ixunpa Dios, pero seguido antúnyíypa hasta anactsíypa itumpiy juuts ixunpa Dios. Jeeyucmi amichaneum jém tánQmi Jesucristo. ¹³ Mantiwitam, ich da mannímáypa iga anactsíyñeum itumpiy. Siip no más tum cosa anwatpa. Anjamnotpa jém wiñicpic cosa, tsíypa antuuñiancim, pero con itumpiy ampimi anwatpa jém cosa jém miñpáppic. ¹⁴ Juuts tum apuesto, poyimi anicpa iga ancoñwíyíñ jém premio, jém tanwejayñewiip Dios siñyucmi iga tachiiba porque Cristo Jesús tamichi.

¹⁵ Tantumpiy, jém tanwicupicnewiip, wi iga tanjístampa jempic. Pero siiga algunos de mimichtam tunzac cosa iñjispá, jesic Dios micjodónaptim. ¹⁶ Wi iga cada tumtum seguido tanwattamiñ de acuerdo con jém jixi jém tampictsonnewiip.

¹⁷ Mantiwitam, acuixtaami juuts ich anwatpa. Ámtaami i iwíwatpa juuts ich manaquejayñe. ¹⁸ Mannímáyñeum waciy, siip eybictim mannímáypa hasta awejpa, iga tsam jáyan pixiñtam ijóyixpa jém anquímayooyi iga accaata Cristo cunusyucmi. ¹⁹ Núcpa jama iga ipictsonyajpa jém castigo jém dapic cuyajpa. Ipuu jém idios. Tsam nacujíptap iyaac iga iwatpa jém malopic cosa jém aguipic tatsaap. Tsam ijispa yíp naxyucmipic jixi. ²⁰ Pero taichtam siñyucmipic tapixiñtam. Síp tananjócta iga miñpa siñyucmi jém taciaputpáppic, jém tánQmi Jesucristo. ²¹ Tacucagáyáypa jém tammijtay jém siippic tanaif jém dapic wiap. Tachiiba tum jomipic mijtay juuts jém Cristo imijtay tsampic wiap. Tawadáypa así con ipimi jém wiapaap injac itumpiy cosa.

4

Tamayáyatamiñ porque Cristo tánQmi

¹ Jeeyucmi mantiwitam, mantoytampáppic, tsam mánixtooba. Tsam amaymay con mimichtam. Mijextam juuts tum wibic coñwiyoooyi. Quejpa iga da axajayoxa mimichtamanjom. Mantoytampáppic, odoy tsaci jém tánQmi inquímayooyi.

² Siip anacunucáyapa jém yomtám jém Evodia y jém Síntique iga odom más áñayajiñ, iga iniityajiñ tumti jixi porque icupicyajpa tánQmi. ³ Manacunucáypatim mimich, jém wibic mancompañero. Manwágáyapa iga iñyoxpádiñ yíp yomtám. Icuistic anwaganayoxa cuando ananmat jém wibic anmatí. Anwaganayoxatim jém Clemente y jém tunzac tantiwitam jém jaycámayñetawíip iñiyi jém librojom iga ipictsonpa jém vida dapic cuyajpa.

⁴ Maymáyataami itumpiy tiempo porque Cristo mimichi. Eybic mannímáypa iga maymáyataami. ⁵ Siempre wíwatí iga miixyajiñ itumpiy pixiñtam iga da mimalo. Jistaami iga da jáyñe miñpa jém tánQmi.

⁶ Odoy jisi ti iññascaaba. Anwejpaati Dios, wágaayi titam iñxunpa. Siempre cuando inwatpa oración chiitaami gracia Dios. ⁷ Dios michi jém wibic jixi iñnanamanjom iga odoy ti inchiñiñ. Da i wiap icutiíyíy yíp jixi jutsap tayoxpát Dios. Yíp wibic jixi miwadáyapa cuenta iñnama y iñjixi por medio de Jesucristo.

Jistaami jém wibic cosa

⁸ Jesic, mantiwitam, siempre jistaami jém numapic cosa. Jistaami jém wibic jixi, jém dapic malo, jém wítampic cosa, jém iwianjanjamyajpáppic jém wibic pixiñtam, jém cosa

aguipic wí tánix y itumpiy jém iwixyajpáppic jém pxiñtam. Jistaami itumpiy jém wibic cosa jém icujíppáppic Dios.

⁹ Wattaami juuts manañquejayñe juuts nimpa jém anquímayooyi jém impictsonewiip. Wattaami juuts immatoñne y juuts iñix iga ich anwatpa. Siip miwaganait tanJatun Dios iga odoy micñiñ.

Jém ofrenda jém chiiñetawip jém Pablo

¹⁰ Agui amaymay jém tánQmi iñiyimí porque mimichtam eybic anjístampa. Agui anwíwadaytooba idic, pero da impát jutsap anwíwadáy. ¹¹ Da manañmadáypa iga atogóyáy algun ti. Porque ich ananyujne iga ayaachap. Ich amaymay con titam anait. ¹² Ananyujne iga ayaachap y ananyujne iga anait jáyan. Anycuyucane iga awiitpa o da ti anaitpa. Ananyujne iga cuspa awiiqui o iga tsam ayuap. Ananyujne iga da ti atogóyáy o da ti anait. ¹³ Ich wiap anwat itumpiy cosa porque jém Cristo achi ipimi. ¹⁴ Pero mimichtam tsam inwíwatta porque tsam anyoxpát cuando ayaachwatta.

¹⁵ Mimichtam, miitwip Filipos, iñjodotam iga cuando moj anañmat jém wibic anmati, cuando aput jém naxyucmi de Macedonia, jém Dios ipixiñtam jém tunjac attebet da ayoxpát solamente mimichtam. ¹⁶ Cuando todavía da juumi anicne, cuando ait jém attebet Tesalónica, mimichtam watciy ancutsadayta jém ofrenda iga anyoxpátpa. ¹⁷ Da ammétspa jém xaja, pero ansunpa iga inwíwadiñ iga Dios miccáyáypa siñyucmi jém iñriqueza. ¹⁸ Ich ampictsonne itumpiy cosa titam atogóyáy. Siip anait jáyan hasta cutsiyñe. Agui ayoxpát jém xaja jém ancutsadayñewiip con jém tantíwi Epafrodito. Jém xaja jex juuts tum ofrenda aguipic cinpa Dios iwíñjom juuts tum sacrificio, jém tsampic iwianjam Dios. ¹⁹ Jém tanJatun Dios michiiba itumpiy cosa titam mitogóyáy porque je iniit jém siñyucmipic riqueza. Michiiba porque Jesucristo mimichitam. ²⁰ Wí iga tanjajitamiñ jém tanJatun Dios para siempre. Amén.

Anquímajtap jém amigoyaj

²¹ Dioschi itumpiy jém icupicneyajwip Jesucristo. Jém tantíwítam, jém anwaganaitwip yim, micutsadáypa watidios. ²² Itumpiy jém Dios ipixiñtam jém ityajwip yip attebet micutsadáypa watidios. Micutsadáypatim watidios jém icupicneyajwip Cristo jém ityajwip jém Romapic anjagooyi iticim.

²³ Jém tánQmi Jesucristo miwíwadáyñ iñtumpiytam. Jemum cuyaj.

Jém carta jém ijáyayñewiip Pablo jém ityajwiip jém attebet Colosas

Jém Pablo ijáyaypa jém Dios ipixiñtam Colosas

¹ Ich aPablo. Jém tánQmi Jesucristo accám juuts tum apóstol iga aŋcuyoxap jém Cristo porque asíam iwianjam Dios. Awagaitta yim con jém tantiwi jém Timoteo. ² Siip manjáyaypa mantiwítam, miiftañwiip jém attebet Colosas jém Dios mimichitam, jém incupicnetañwiip jém Cristo. Siip tanJatun Dios y tánQmi Jesucristo miwíwadáyíñ mimichtam y michiitámiñ jém wibic paz iga odoy iniidiñ jém cobacpiji iñanamanjom.

Jém Pablo iwatpa oración para jém icupicneyajwiip Cristo

³ Cuando anañwejpáttampa Dios, jém tánQmi Jesucristo iJatun, siempre anchiiba gracia Dios para mimichtam. ⁴ Porque anjodónata iga tsam inwicupicpa jém tánQmi Jesucristo y tsam iñtoytámpa jém tantiwítam jém Dios ipixiñtam. ⁵ Anchiibatim gracia Dios iga tsam ininjóctámpa iga michiiba Dios jém wítampic cosa jém miccáyayñewiip siñyucmi. Mimichtam moj ininjócta cuando immatonja jém numapic añquímayooyi iga taciaputtámpa Dios. ⁶ Yíptim mismo añquímayooyi núcne mimichtámanjom, tsam mijap, tsam tímmap icuwiiti yíp mundo. Jesatim juuts iññascata mimichtam cuando moj immatonja iga Dios tayaachanjampa y iñjodónata iga jém Dios itóyooyi je jém numapic. ⁷ Juuts miñquejayta jém Epafra jém añwaganayoxapaap aichtam, jém tsampic tantoypa. Je iwícuoyoxap tánQmi Cristo juuts tum wibic pastor mimichtámanjom. ⁸ Cuando núc yim jém Epafra acjodónata iga Dios iAnama michi jém wibic jixi iga tsam mitóyooytámpa.

⁹ Jeeyucmi aichtam dende jém jama cuando ammatonja iga incupicta jém Cristo, seguido anañwejpáttampa Dios iga miñquejaytámiñ titam ixunpa Dios iga wiañ inwatta. Anwágáypatim Dios iga michiitámiñ itumpiy jém wibic jixi, jém iniitwiip Dios iAnama, iga incutiñiytámiñ. ¹⁰ Anwágáypatim Dios para mimichtam iga seguido inwattámiñ jém wítampic cosa yíp naxyucmi juuts iwianjam jém tánQmi iga siempre inwíwattámiñ juuts miwítimap iga jáyanap jém tanJatun Dios ijixi. ¹¹ Anwágáypatim Dios iga michiiba jém tsam wibic pími jém iniitwiip Dios iga wiañ inwatta itumpiy cosa juuts je ixunpa, iga iniitpa jém pími iga wiañ iñyaachiyta cuando miyaachwattamtap, jesic mimaymáyatámpa. ¹² Siempre tanchiitámpa gracia jém tanJatun Dios porque tachi jém derecho iga wiañ tampictson itumpiy jém wítampic cosa juuts ipictsonyajpa itumpiy jém Dios ipixiñtam jém iniitwiip jém wibic juctianjsoca. ¹³ Dios tatop jém piichcim jut injacpa jém Wocciwiñ. Tananic jut injacpa jém Dios iManic jém tsampic itoypa. ¹⁴ Itegáy iñpiñ iga taciaputtámiñ, iga tawadaytámiñ perdón itumpiy jém tantánca.

Jém Cristo je jém más mijpic anjagooyi que itumpiy

¹⁵ Jém Cristo je jém Dios icuwiñ, jém dapic wiap tánix. Je jém wiñtipic, ittim idic cuando danam iwatne Dios jém siñ ni jém nas. ¹⁶ Jém tánQmi Cristo iwaganayoxa jém tanJatun Dios iga iwatyaj itumpiy cosa jém itwiip siñyucmi y jém itwiip yíp naxyucmi. Iwatyaj itumpiy cosa jém tánixpáppic y jém dapic wiap tánix. Ichac itumpiy jém anjagooyiyaj jém ityajwiip siñyucmi y jém ityajwiip naxyucmi jém dapic tánixpa. Itumpiy jém Cristo iwatí, watneyajta iga icuyoxayajpa jém Cristo. ¹⁷ Ittim idic jém Cristo cuando da ti idíyiy. Siip imatspacne itumpiy cosa con ipimi iga odoy cuyajiñ. ¹⁸ Jém Cristo je jém cobapic de jém iglesia, je jém imijtay. Je jém wiñtipic. Wiñti acpista jém Cristo iga tsíy juuts jém más mijpic anjagooyi. Wiap injac itumpiy cosa. ¹⁹ Iwianjam jém tanJatun Dios iga iwaganait jém tánQmi Jesucristo con itumpiy jém Dios ipimi. ²⁰ Por medio de Jesucristo

Dios iwíwadáy itumpiy jém ityajwíip yíp naxyucmi y jém ityajwíip sínyucmi iga iniityajiñ tumti ijixi con Dios. Jempigam iwat cuando jém Dios iManic itegáy iñipiñ cunusyucmi.

²¹ Mimichtam, wiñti da idic miixpicpa Dios. Michíyñe idic juuts tum enemigo de Dios porque tsam malo idic iñjixi, tsam jáyan malopic cosa inwatne idic. Pero síip Dios miyoxpátne iga tumtitam iñjixi con Dios. ²² Accaata jém Cristo yíp naxyucmi iga tawítsagáy tantánca iga wiñiñ tananic jém Dios iwiñjom. Tacupiñne iga tamichap Dios, cuáyñeum tánanama, dam tatáncaíy. ²³ Numa, wiap iññúc jém Dios iwiñjom siiga seguido incupicpa jém Cristo juuts tsam miwicámne, da michigóypa. Miñúcpa siiga da iñchacpa iga ininjóctampa titam michiiba jém Cristo juuts nimpá jém wibic anquímayooyi, jém immatonewíip iga Dios taciaputtampa. Síip anmattap yíp wibic anquímayooyi icuwíti yíp naxyucmi. Ich aPablo ananmatpatim yíp anquímayooyi, ancuoxap Dios.

Chiita jém Pablo jém cargo iga iyoxpátpa jém Dios ipixiñtam

²⁴ Síip ich amaymay porque ayaachwatta mimichtam incuyucmi. Jempigam cupacpa jém tánomi Cristo iyaachaji ich ammitayyucmi, jém dapic capsne idic cuando tsam yaachwatta jém Cristo para jém iglesia, je jém imíjtay. ²⁵ Dios accám juuts tum yoxacíwiñ iga ancuoxap jém ipixiñtam, jém iglesia. Achi jém cargo iga mananmadaytámiñ iñtumpiytam jém Dios inmati iga capxiñ incutiíyiyta. ²⁶ Jém jixi anécne dende wiñigam, pero síip acjodónayajawum jém imichipic, jém icupicneyajwíip jém Cristo. ²⁷ Dios iwianjam iga icjodónaiñ jém imichipic iga jém tungac pixiñtam, jém dapic je de Israel, ipictsonyapatim jém wibic riqueza juuts nimpá jém anmati jém anécnewíip idic. Nimpá iga jém Cristo miñpa íti tánanamanjom, jeeyucmi tananjóctampa jém tiempo cuando tánixtampa jém sínyucmipic Dios ipimi.

²⁸ Aichtam ananmadáypa jém pixiñtam jém Cristo inquímayooyi. Jutquej anicpa, anchi-iba jixi jém pixiñtam iga ichaguiñ jém migooyi. Ananquejáypa parejo jém wibic anmati iga jém pixiñtam iwicutíyiyajiñ iga wiap iwatyaj itumpiy jém wítampic cosa juuts ixunpa jém Cristo. ²⁹ Jeeyucmi pími ayoxap. Anwatpa con itumpiy jém pími jém achiiñewíip jém Cristo.

2

¹ Ansunpa iga iñjodónatámiñ iga tsam pími tánca anwatpa jém yoxacuy para mimichtam y para jém ityajwíip jém attebet Laodicea y para itumpiy jém tantíwítam jém dapic aixpicneyaj. ² Anwatpa jempic iga jeeyaj icpocsáyíñ íanamayaj y iga tumti jixi iniityajiñ iga natoyyajiñ. Ansunpatim iga más y más icutiíyiyíñ jém riqueza iga iwíjodónaiñ ti ixunpa Dios. Ansunpatim iga iñuntawíixpicyajiñ jém Cristo jém Diospic inécne idic. ³ Jém tánomi Cristo iniit itumpiy jém wibic jixi inécne, danam tanquejayñe. Je wiap tayoxpát iga tancutíyiyíñ jém wibic jixi, jém anécnewíip idic. ⁴ Mannímáypa así iga odoy í micseedáyíñ iñjixi con jém migooyi. ⁵ Aunque da manwaganait mimichtam, tsam manjspa ánanamanjom juuts manwaganaita. Agui amaymay cuando anjodóna iga seguido inwíwatpa y da iñchacpa iga incupictampa jém tánomi Jesucristo.

⁶ Como impictsonne jém Jesucristo juuts jém iñomi, jesic wíwattaami porque jém Cristo mimichitam. ⁷ Juuts tum cuy miwíichicmatsne, juuts tum tic miwíwatne, mipímane jém Cristoyucmi. Da iñchacpa iga incupicpa juuts minquejayñeta. Siempre chiitaami gracia Dios.

Jáyan wibic cosa tawadáy jém tánomi Cristo

⁸ Nawattamtaji cuenta iga odoy í mictsaguiñ jém Dios inmati con jém migooyi, jém dapic tayoxpátpa, jém pixiñtam ijixquimi, jém costumbre jém iwatneyajwíip jém pixiñtam

dende wiñigam. Itumpiy jexpic jixi tsucum yíp naxyucmi, da jex juuts jém tachiiñewip jém Cristo.

⁹ Jém Cristo iniit itumpiy jém Dios ipimi y jém ijixi imijtayyucmi. ¹⁰ Mimichtam micapsne con Cristo. Je jém cobacpic anjagooyi. Injacpa itumpiy jém anjagooyi, iniit itumpiy jém ipimi y jém autoridad. ¹¹ Jém Cristo miwadáytim como tum marca de circuncisión. Yíp marca da jex juuts jém marca jém watnetawip cimi. Cristo miwadáy tum marca cuando miccáyáy itumpiy jém iñtáñca. ¹² Cuando micchinta mimichtam, miwagacumta con Cristo. Cuando acpista jém Cristo, miwaganapista porque incupicta iga Dios wíap icpis jém caaneyajwip. ¹³ Mimichtam caane idic jém iñanama porque tsam mitáñcaiyta. Da iniitta jém marca de circuncisión immijtayyucmi. Pero Dios miwagachiita jém vida con Cristo. Miwadáy perdón itumpiy jém iñtáñca. ¹⁴ Dios iccuyaj jém wiñicpic anquímayooyi jém tsampic tapimíyapa idic. Iccáyapa de taichtam jém anquímayooyi, icunún jém cunusyucmi. ¹⁵ Dios imiswadáy ipimi itumpiy jém malopic anjagooyi jém tsampic iniit ipimi, jém dapic tánixpa. Cristo ichaawat, icwiñquej, icoñwíy jém cunusyucmi.

Wí iga tançusúnytámiñ jém wítampic cosa jém ityajwip siñyucmi

¹⁶ Odoy waday caso siiga i miñimáyapa iga mitáñcaiy porque da inwatpa jém inwícuy juuts nimpa jém Israelpic costumbre y siiga da iñxutstampa jém siñyay y jém jecuy jama juuts iwatyajpa jém Israelpic pixiñtam. ¹⁷ Itumpiy yípyaj costumbre jex juuts tum cumuñci, tanquejáyapa ti miñpa, pero jém mijtay je jém Cristo, da je cumuñci. ¹⁸ Odoy jici iga i mimigóyáypa y mictogóyáypa jém incoñwíyooyi jém michiitapáppic siñyucmi. Yíp malopic maestroyaj ijisyajpa jém siñyucmicpic pixiñtam juuts Dios. Tsíyyaj juuts tum pixiñ yaachapáppic porque asiam ijispa iga iwianjam Dios. Nimyajpa iga iixyay jém poñ. Tigiyúcumpa con jém cosa jém dapic icutiíyíyapa. Tsam pimi nacujítpap iyaac porque tsam iniit jém jixi yíp naxyucmicpic. ¹⁹ Jeeyaj da antuumaneyaj con jém cobacpic, jém Cristo. Jém cobac icmijap jém mijtay, icwícpa. Mijap ipac y imayi jém Diospic ichiiba.

²⁰ Dam minjacpa jém malopic pimi yíp naxyucmi. Jesic tiiga inwattampa jempic juuts jém ityajwip yíp naxyucmi. Siiga iñjicpa iga minjacpa jém anquímayooyi, ¿jesic tiiga miwaganacaata jém Cristo? ²¹ Nimpa jém anquímayooyi: “Odoy tsici jembít, odoy cuuti, odoy matspic inçijom.” ²² Itumpiy yípyaj anquímayooyi nada más jém pixiñtam ijixquiimi. Inmatpa de jém wícuy jém cuyajpáppic. ²³ Numa parece que asiam más tajixíy y más pimi wíap tanjis Dios. Jém pixiñtam ijisyajpa iga wí iga tayaachap. Nayaachwattap iyaac porque asiam ijispa iga ichacpa iga imalwatpa. Pero migóyapa porque jexpic cosa da tactsacpa iga tançusúnyyapa jém malopic cosa.

3

¹ Jesic siiga numa mipisneum con Cristo, métstaami jém wítampic cosa jém itwip siñyucmi jut coñ jém tánomi Cristo jém tanjatun Dios inwimi. ² Jistaami jém wítampic cosa jém itwip siñyucmi. Odoy jistaami jém cosa jém ityajwip yíp naxyucmi. ³ Porque miwaganaca Cristo y sip nécne jém imvida con Cristo jut it Dios. ⁴ Cristo mismo jém tamvida. Cuando miñgacpa yíp naxyucmi, jesic tawaganamiñpa con ipimi.

Jém pecapic vida y jém jomipic

⁵ Nunta tsaci iga immalwatpa, jesic tsíyapa juuts caane jém malopic jixi, jém iniitwip iñanamanjom. Mimichtam, odoy pejooyi. Odoy wati jém cosa dapic wí. Odoy cusúnyí jém malopic cosa. Odoy wati juuts nimpa jém jixi dapic wí. Odoy cusúnyí tungac imichi, porque siiga inwatpa así, jextim juuts iga iñjísapa jém watnas. ⁶ Itumpiy jém pixiñtam,

jém iwatneyajwïp jexpic táŋca, Dios ichiiba tsam mijpic castigo. ⁷ Mimichtam, pecam inwattámpatim idic jexpic táŋca. ⁸ Pero siip tsaci itumpiy jém malopic cosa. Odoy najti jém jooya íñanamanjom. Odoy jóyixooyi. Odoy malwati. Odoy cujíyooyi. Odoy malnimi. Odoy malaŋmati. ⁹ Odoy namigóyaytamtaji porque inchacne jém wiñicpic jixi y jém malopic cosa jém inwatpáppic idic mimichtam. ¹⁰ Impictson̄ta jém jomipic jixi juuts tum jomipic mipixiñ, jém cucacpaap inic hasta núcpa juuts Dios icuwiñ jém iwatwïp. ¹¹ Siiga tacjoomasetneta, jesic da tanjïspa siiga griegopic pïxiñ jém tantwï o siiga Israelpic pïxiñ. Da tanjïspa siiga tum pïxiñ iwatne jém marca de circuncisión o da iwatne. Da tanjïspa siiga dapic taich pïxiñ. Da tanjïspa siiga tum juumipic pïxiñ. Da tanjïspa siiga tum esclavo o dapic je esclavo. Porque jém Cristo tamichata tantumpiytam.

¹² Dios tsam mitoytámpa mimichtam y micupiñeta iga michíytámiñ juuts Dios mimichitam. Jeeyucmi mannímaypa, accaami jém wibic jixi juuts ixunpa Dios. Yaachanjami jém yaachayjáp̄pic. Yoxpaati i quej. Odoy nacujíptaji inyaac. Winanigaayi i quej, jesic quejpa iga da mimalo. Siiga mimalwadaytap, jesic yaachiyi, odoy cianseedayyi. ¹³ Mimichtam nawinanigaytamtaji con jém inñiwitam. Nawadaytamtaji perdón con jém inñiwitam siiga minimalwadaytamtap juuts jém tánomi miwadáy perdón jém inñánca. ¹⁴ Mimichtam, natoytamtaji, jesic quejpa iga tumti jixi iniifta. Jesic capsum inwat juuts ixunpa Dios. ¹⁵ Jém wibic paz, jém michiñewïp Cristo, minjacpa inñanamanjom iga inwinanigáyiñ jém tantwitam. Jeeyucmi minwejay iga michíytámiñ juuts tumti mijtay. Odoy tsaci iga inchiiba gracia Dios.

¹⁶ Jém Cristo inmati idiñ jáyan inñanamanjom. Nanquejaytamtaji entre mimichtam itumpiy jém wibic jixi. Nanquímtamtaji. Siiga i imalwatpa, anjijyaci. Wantaami jém salmos, jém himnos y jém wañi espiritual. Miwantámpa porque inchiítamtooba gracia jém tanjatun̄ Dios. ¹⁷ Titam inwattámpa y titam ininmattámpa, siempre wattaami itumpiy cosa jém tánomi Jesús inñiyimi. Siempre chiitaami gracia jém tanjatun̄ Dios por medio de Jesucristo.

Tañwïwadáypa itumpiy jém icupicneyajwïp Cristo

¹⁸ Miyomtam, mijaayiwïp, cupici jém inwidaya porque jempigam iwianjam jém tánomi. ¹⁹ Mipixiñtam, miyoomiywïp, toyi jém inñyomo, odoy yaachwati juuts tum malopic pïxiñ. ²⁰ Michixtam, siempre cupictaami titam miñimaytámpa jém inñjatun̄ y jém inñapa porque jempigam iwianjam jém tánomi. ²¹ Mijatun̄pic, odoy tscjooyi jém immanic porque siiga agui pimi impimíyapa, jesic jóyapa jém immanic hasta da yoxatooba. ²² Mimichtam, jém miesclavotam, wï iga inwattámiñ itumpiy cosa juuts miñimáypa jém inñomi yip naxyucmi. Da wï siiga no más inwattámpa inñyoxacuy cuando miixpa jém inñomi iga miwixiñ. Wattaami con itumpiy inñanama porque inçinpa jém tánomi Dios. ²³ Cuando inwattámpa algun yoxacuy, wattaami con itumpiy inñanama jesaptim juuts inçuyoxap jém tánomi Cristo y da je pïxiñ inçuyoxap. ²⁴ Michtam inñjodontam iga jém tánomi tachiítámpa jém herencia, jém tampictson̄páppic juuts tum xaja, porque michtam inçuyoxatámpa jém tánomi Cristo. ²⁵ Pero jém imalwatwïp ipictson̄pa jém castigo iga agui imalwatne. Jém tanjatun̄ Dios iwicïpinpa parejo itumpiy jém pïxiñtam.

4

¹ Mimichtam jém miomipic siempre wïwadaayi jém inñesclavo juuts tum wibic mipixiñ. Jistaami iga mich iniiftim tum jém inñomi sinjucmi.

² Seguido anwejpáttaami Dios con itumpiy inñixi, da mimonpa, siempre chiitaami gracia Dios. ³ Anwejpáttaamitim Dios para aichtam iga añáyayiñ tum puerta iga anañmatpa jém anmati, iga anañmadáypatim jém pïxiñtam jém Cristo inquímayooyi jém añécnewïp idic.

Yíptim an̄mat̄i anan̄núc iga s̄ip aít preso. ⁴ Wágaayi Dios iga w̄iañ anan̄quejáy parejo jém p̄ixiñtam juuts ich w̄iap anan̄mat.

⁵ W̄inan̄igaayi con jém w̄ibic j̄ixi jém dap̄ic icup̄icneyaj Jesucristo iga miw̄ixyajiñ, w̄iwat̄i iganam miw̄iap. ⁶ Siempre w̄inan̄matmatnēi jém p̄ixiñtam con jém w̄itamp̄ic an̄mat̄i juuts jém çana w̄i paac. Jesic w̄iap in̄cutson̄ jém micwác̄p̄ap̄ic.

W̄atidios cutsadáyta jém p̄ixiñtam

⁷ Jém tant̄iw̄i Tíquico, jém tsamp̄ic tantoypa, miñmadáypa titam annasca ȳim. Jém Tíquico tsam p̄imi ayoxpát. An̄wagacuyoxata ȳim jém tán̄omi Jesucristo. ⁸ Jeeyucmi man̄cutsadáy jém Tíquico iga micjodóñaiñ titam annascata ȳim y iga micamamwadaytámiñ iñanama. ⁹ Iwagananicpatim jém Onésimo, tum tant̄iw̄i jém tantoyp̄ap̄ic. Tsam ayoxpátim jém p̄ixiñ. Mimichtamp̄ic p̄ixiñ jém Onésimo. Jeeyaj miñmadayyajpa titam iñasca jém Dios ip̄ixiñtam ȳim.

¹⁰ Jém an̄compañero Aristarco, jém ts̄iyñew̄ip preso con aich, tsam w̄atidios micutsadáypa. Midioschitámpatim jém Marcos jém Bernabé iprimo. Michtam imp̄ictson̄e jém wiñtip̄ic an̄mat̄i acerca de je, pero jesic siiga nicpa mijóyáy, w̄ip̄ictson̄i. ¹¹ W̄atidios micutsadáypatim jém Jesús, iñiyit̄im Justo. Yíp tucuten̄ Israelpic p̄ixiñtam, agui amaymaywatyaj jeeyaj. Da i tungac jém Israelpic p̄ixiñ awagayoxatámpa iga anan̄mattámpa jém an̄mat̄i iga Dios in̄jacpa yíp naxyucmi. ¹² W̄atidios micutsadaytámpatim jém Epafras. Mimichtamp̄ic p̄ixiñ. Tsam icuyoxap tán̄omi Cristo. Siempre tsam in̄wejpátpa Dios para mimichtam, iwágáypa iga miyoxpátámiñ iga odoy iñchactámiñ jém Dios in̄mat̄i y iga capxiñ in̄watta itump̄iy cosa juuts ixunpa Dios. ¹³ Ich at̄s̄iy juuts tum testigo iga jém Epafras tsam mij̄ispa mimichtam y jém tant̄iw̄itam jém ityajw̄ip jém at̄tebet Laodicea y Hierápolis. ¹⁴ W̄atidios micutsadáypa jém tant̄iw̄i Demas y jém Lucas, jém tsóȳioyp̄ap̄ic, jém tsamp̄ic tantoypa.

¹⁵ Diosch̄i jém tant̄iw̄itam jém ityajw̄ip jém at̄tebet Laodicea. Diosch̄it̄im jém tant̄iw̄i Ninfa y itump̄iy jém icup̄icneyajw̄ip Jesús, jém an̄tuum̄ayajp̄ap̄ic it̄icc̄im. ¹⁶ Jesic cuando yajum immay yíp carta mimichtam, cutsadaayi jém tant̄iw̄itam jém icup̄icneyajw̄ip Jesús jém at̄tebet Laodicea. Maytaam̄it̄im jém tungac carta jém miñw̄ip Laodicea. ¹⁷ N̄ímaayi jém tant̄iw̄i Arquipo iga iccupaguiñ jém iyoxacuy, jém ichiñew̄ip tán̄omi iñiyimi.

¹⁸ S̄ip ich mismo man̄jáyáypa an̄ç̄imi iga manan̄químpa. Ich aPablo man̄cutsadáypa w̄atidios. J̄istaami iga ich aít preso. Dios miw̄iwadaytámiñ mimichtam. Jemum cuyaj.

Jém wiñtipic carta jém ijáyayñewiip Pablo jém ityajwiip jém attebet Tesalónica

Jém Pablo con icompañeroyaj ijáyay jém Dios ipixiñtam

¹ Ich aPablo. Aitta yim con wisten jém tantiwitam jém Silvano y Timoteo. Siip manjáyaytámpa mimichtam jém miittanwiip jém attebet Tesalónica jém inçupicnetanwiip Jesucristo. Mimichtam jém tanjatun Dios mimichitam y jém tánQmi Jesucristo mimichitim. Siip Dios miyoxpáttamiñ iga wiap inwatta juuts ixunpa Dios, iga odooy iniidiñ jém cobacpiji.

Jém Tesalónicapic pixiñtam tsíyyaj juuts ejemplo iga iwicupicyajpa jém Dios inmatí

² Siempre anchiiba gracia Dios para mimichtam cuando anañejpáttámpa Dios. ³ Seguido manjistámpa jém tanjatun Dios iwiñjom. Inçuyoxatámpa Dios porque inwicupicneta. Inwíwattámpa porque inñoytámpa jém tánQmi. Inyaachiytámpa cuando mimalwadaytap porque ininjóctámpa iga miñgacpa jém tánQmi Jesucristo. ⁴ Mantiwitam, mitoytampáppic Dios, anjodonam iga micupineta Dios iga michiytamiñ juuts jém imanictam. ⁵ Oy manañmadayta jém wibic anmatí, pero da je solamente con ich anañmatí. Oy manañmadayta jém wibic anmatí con Dios ipimi y con Dios iAnama. Annuntawijodon iga da je mi gooyi. Mimichtam injodonam jutsap manwaganaiña cuando oy manyoxpát.

⁶ Mimichtam moypa inwatta juuts aichtam, inwattámpatim juuts iwatpa jém tánQmi Jesús. Aunque tsam pimi miyaachwattamta, inwipictsoneta jém anmatí con jém wibic maymáyají jém michiñewiip Dios iAnama. ⁷ Hasta que mimichtam michiytámpa juuts ejemplo para itumpiy jém icupicneyajwiip Jesús jém naxyucmi de Macedonia y Acaya. ⁸ De mimichtamanjom nic juumi jém tánQmi inmatí. Da no más jém naxyucmi de Macedonia y de Acaya, pero wanpa jutquej iga mimichtam inwicupicneta Dios. Hasta aichtam dam ti más wiap annímayta jém pixiñtam porque iwicutiyyiyaj. ⁹ Porque jeeyaj mismo wiap inmatyaj jutsap mu ampictsoneta mimichtam cuando oy manjóyay. Inmatyajpa jutsa mu inñchacta iga inñjistámpa jém watnas iga inçuyoxatámpa jém numapic Dios, jém dapic caane. ¹⁰ Inmatyajtim iga ininjóctámpa iga miñgacpa jém Dios imanic jém nicnewiip sinyucmi, jém acpisnetawwiip de jut it jém caaneyajwiip. Yiptim Jesús taciaputtámpa de jém mijpic castigo jém miñpáppic.

2

Jém yoxacuy jém iwatwiip Pablo jém attebet Tesalónica

¹ Mantiwitam, mimichtam inwijodon iga cuando oy manjóyay, da axajaoy. ² Injodonitim iga tsam pimi ayaachwattamta jém attebet inñyi Filipos. Jemum tsam pimi amalnímaytamta antes que anuc jut miitta. Y ocmi mich inñtúmmitam jém Tesalónicapic pixiñtam amalwadayajtim, pero Dios acamamwadayta ananama iga manañmadayta jém wibic anmatí. ³ Da oy manañmaday jém mi gooyi. Da aoy iga mammalwadaytámpa o iga mammigóyaytámpa. ⁴ Pero siempre manañmadaytámpa juuts ixunpa Dios. Porque Dios acupineta aichtam y achiña jém wibic anmatí iga anañmadayajin jém pixiñtam jutinquej. Pero da añwattámpa juuts ixunyajpa jém pixiñtam. Añwattámpa juuts ixunpa Dios porque Dios icipinpa ti tanañ tánanamanjom. ⁵ Cuando mu ánoy jut miitta, da mançujipta iga mammigóyaytámpa. Datim oy manañmaday jém anmatí iga

mançusúnyáypa jém iñtumiñ. TanJatun Dios ijodon iga da oy mammalwadáy. ⁶ Da ammétstampa iga acujípyajiñ jém pìxiñtam. Datim ansunpa iga michtam ançujíptampa.

Siiga ansunpa, wiap mampimiyta juuts tum apóstol jém acutsatnewiip Jesucristo. ⁷ Pero da ammalwat mimichtámanjom, porque mantoytámpa juuts tum wibic yomo itoypa imanictam. ⁸ Agui mantoytámpa mimichtam, jeeyucmi anwianjam iga impictsonpa jém wibic anmati jém Diospic tachiiñe. Da no más jém anmati, pero hasta jém amvida manchiitooba meega wiap porque tsam mantoytámpa. ⁹ Mantiwitam, ¿da iñjístampa iga tsam pimi ayoxata cuando oy mananmadayta jém wibic anmati jém tachiiñewiip Dios? Ayoxata tsuucim y siññi iga da ti manwágaytampa.

¹⁰ Mimichtam michiyta juuts tum testigo y Dios tsíytim juuts testigo iga da ammalwat mimichtámanjom jém incupicnetanwiip Dios. Anwíwatta juuts tum wibic pìxiñ dapic táncay. ¹¹ Jistaami jutpic mananquímta juuts tum pìxiñ cuando inquímpan imanic. Mançamawadáy iñanama iga odoy iñchaguiñ jém Dios inmati. Mançunucsay iga odoy miñyáguiñ cuando tsam pimi mimalwadaytap. ¹² Mananquím iga siempre inwíwattamiñ juuts ixunpa Dios porque miñwejayta iga nicpa miiti jut wicom, jut injacpa Dios.

¹³ Siempre anchiiba gracia Dios iga cuando immatonata jém Dios inmati jém manamíñayñewiip, da impictsonpa juuts pìxiñtam inmati, impictsonpa juuts jém nunta Dios inmati. Jém anmati miyoxpáttampa jém incupicnetanwiip Jesús iga wíaiñ inwatta juuts ixunpa Dios. ¹⁴ Mimichtam, mantiwitam, tsam mimalwadaytamtatim juuts jém tantiwitam jém ityajwiip jém naxyucmi de Israel, jém icupicneyajwiip Dios. Michtam iñtúmmitam tsam mimalwadaytatim jex juuts jém judíos imalwadayyaj jém icupicneyajwiip Jesús jém naxyucmi de Israel. ¹⁵ Jeeyajtim iccaayaj jém tánomi Jesús juutstim iccaayaj jém wiñicpic profeta jém itúmmiyaj. Siip aichtam aquebacputtamta. Da iwíwatayajpa jém Dios iwiñjom. Da iwínanigáypa itumpiy jém pìxiñtam. ¹⁶ Da iwíanjamayaj iga ananmadáypa jém tunçac pìxiñtam jém wibic anmati iga Dios iciacputyajpa. Yíp malopic judíos jempigam más ijayanwatayajpa jém itanca. Siip da jáyñe ichiiba Dios tum mijpic castigo.

Jém Pablo nictooba eybic jém attebet Tesalónica

¹⁷ Mantiwitam, cuando da jáy hora tanatsactamta, aunque da miita, manaitta ánanamanjom. Tsam mánixtooba idic, waciy ammétsta jutsap nicpa manjóyáy eybic, pero da awiap. ¹⁸ Tsam anictamtooba idic manjóyáy. Ich aPablo waciy amméts jutsap nicpa manjóyáy, pero jém Wocçiwíñ da ajígáy. ¹⁹ Siip ananjóctampa jém jama iga miittamiñ jém tánomi Jesucristo iwiñjom cuando miñgacpa yíp naxyucmi. Mimichtam michiytámpa juuts jém wibic maymáyaj para aichtam, juuts tum wibic corona. ²⁰ Numa mimichtam incuyucmi tsam awixtamtap, tsam amaymáyatampa.

3

¹ Jesic iga tsam pimi manjísapa, da anyaachíypa. Annímáy jém ancompañero Silas iga tatsíytampa tançutum yim Atenas iganam ² mançutsadaytámpa jém tantiwí Timoteo iga niñguiñ miámta. Jempam anwatta. Je icuyoxap Dios y awaganayoxap iga ananmattámpa jém wibic anmati de Cristo. Jesic mançutsadáy jém tantiwí Timoteo iga miyoxpádiñ iga odoy iñchaguiñ jém Dios inmati, ³ iga wíaiñ iñyaachiyta cuando miyaachwattamtap. Michtam iñjodontam iga tienes que tayaachwattamtap. ⁴ Jistaami, cuando aitta con mimichtam, mananmadáy iga tayaachwattamtap. Numa jempam iññascaneta juuts michiñjodon. ⁵ Jeeyucmi, cuando da más wiap anyaachíy, ançutsat jém Timoteo iga niñguiñ miámcoñwíy siiga da iñchacne iga incupicpa jém Dios inmati. Porque ich ançinpa iga jém Wocçiwíñ wiip micmalwatpa y xajatim oy mananmadáy jém anmati.

⁶ Siip yaguiñ set jém Timoteo de mimichtam. Inimiñ jém anjmaṭi iga tsam inçupicneta Dios y tsam inñtoytámpa jém inñtiwítam. Nimpatim jém Timoteo iga mimichtam siempre anjístámpa y ánixtamtooba jextim juuts aichtam iga mánixtamtoobatim. ⁷ Jeeyucmi mantiwítam, tsam amaymaytam cuando ammaton iga nichtam da inñchacneta iga inçupicpa Dios, aunque yim annascata tum mijpic yaachaji, tsam amalwadaytamta. ⁸ Siip aitta vivo porque mimichtam da inñchac jém tánomi itun. ⁹ Tsam anchiiba gracia jém tanjatun Dios, agui amaymayatámpa jém Dios iwiñjom mimichtam inçuyucmi. ¹⁰ Tsuucim y siñni anañwejpátámpa Dios iga wiañ nic mánámta. Manañquejaytámpa titam mitogóyáy iga wiañ inçupicta parejo.

¹¹ Ansunpa iga jém tanjatun Dios y tánomi Jesús ayoxpádiñ iga nicpa mánámta. ¹² Anwagaytámpatim tánomi iga más minitoytamtañ con inñtiwítam, iga inñtoytámiñ itumpiy jém pixiñtam juustim ich mantoytámpa. ¹³ Anwagaypatim iga michiñ jém wibic jixi iga wiañ inwatta seguido juuts ixunpa Dios, jesic da mitañcaiy, cuáyñeum jém inñanama jém tanjatun Dios iwiñjom cuando miñgacpa tánomi Jesús yip naxyucmi con itumpiy jém imichipic, jém cuáyñeyajwip ianama.

4

Jém vida jém iwianjamwip Dios

¹ Mantiwítam, wiñic oy manañquejáy iga wiañ inwatta juuts ixunpa Dios. Quejpa siip iga inwatpa. Mançunucsáypa jém tánomi Jesús inñiyimi iga más y más inwicupiguiñ jém Dios injmaṭi.

² Mimichtam inñjodontam ti manañquejayta jém tánomi Jesús inñiyimi. ³ Dios ixunpa iga cuáyñeiñ jém inñanama, iga odoy i pejóyíñ. ⁴ Cada tumtum de mimichtam jodónataami jutsap iniitta jém inñyomo juuts tum wibic pixiñ cuáyñewip ianama. ⁵ Odoy picitum yomo iga agui inçusúníypa juuts jém malopic pixiñtam jém dapic icupicne Dios. ⁶ Odoy cusúníyaayi tungac pixiñ iyomo, odoy malwadaayi jém inñtiwi jempic. Dios ichécpa itumpiy jexpic táñca juuts wiñti mannímayñeum. ⁷ Porque Dios da tanwejay iga tançusúníypa jém malopic cosa, más tanwejay iga cuáyñeiñ jém tánanama. ⁸ Jém ijóyixpaap yip anquímayooyi da ijóyixpa tum pixiñ, ijóyixpa Dios mismo, jém tachiiñewip jém ianama.

⁹ Siip da manjayáypa jutpic inñtoytámpa jém tantiwítam jém icupicneyajwip Jesús. Porque tanjatun Dios miñquejay jutpic minitoytamtap con jém inñtiwítam. ¹⁰ Numa, quejpa iga tsam inñtoytámpa itumpiy jém Macedoniapic tantiwítam. Mançunucsáypa mantiwítam iga más y más inñtoytámiñ. ¹¹ Wínanigaayi jém inñtiwítam, wattaami michpic inñyoxacuy, odoy moogiyi tungac. Yoxataami inçimi juuts mannímayñe. ¹² Wíwattaami iga miwixyajiñ jém dapic icupicyajpa jém tánomi. Jesic da ti mitogóyáypa.

Miñgacpa tánomi Jesús

¹³ Mantiwítam, da ansunpa iga da inñjodontam ti inñascaaba jém caaneyajwip, jém icupicneyajwip Jesús. Mimichtam, odoy anyáctaami juuts jém pixiñtam jém dapic inñjocyajpa iga miñgacpa jém tánomi Jesús. ¹⁴ Tançupicpa iga accaata tánomi Jesús, pero ocmi acpista. Jesaptim tanjodóna iga cuando tanjatun Dios icutsatgacpa yip naxyucmi jém tánomi Jesús, jesic iwaganamiñpa itumpiy jém icupicneyajwip Jesús, jém caaneyajwip.

¹⁵ Siip manañmadaytámpa ti tanquejay jém tánomi Jesús. Nimpa iga cuando miñgacpa tánomi, wiñti ipiñpa jém ipixiñtam jém caaneyajwip. Jesic ocmi tapiñtamtaptim taichtam, jém taitwip vivo. ¹⁶ Cuando núcpa jém jama, quetpa tánomi dende siñyucmi, pimi jypa juuts tum mijpic anjagooyi. Jyypatim tum siñyucmicpic pixiñ jém cobapic.

Pimi anjɨyɨpa jém Dios itrompeta. Wiñti acpɨsyajtaɨp itumpɨy jém caaneyajwɨp jém icupɨcneyajwɨp Cristo. ¹⁷ Ocmi Dios taɨtuumaɨwattámpa taichtam, jém tatsíyñetaɨwɨp vivo. Tawagananictamtaɨp ucsanjom con jém acpɨsneyajtaɨwɨp. Jemum tanactsíyɨpa jém tánQmi Jesús anɨiwanɨyucmi. Jesic nicpa taɨti para siempre con jém tánQmi. ¹⁸ Jesic nanmadaytamtaɨjɨ yɨp wɨbɨc anɨmaɨti con jém iñɨɨwɨtam iga odoy minɨyáctamiñ.

5

¹ Siɨp mantɨwɨtam, da manjáyáyɨpa iga jup jama ni jup amɨy miñgacpa tánQmi Jesús. ² Porque mimichtam inɨwɨjodonɨtam iga cuando miñgacpa jém tánQmi, núcpa jém tánQmi ijama juuts tum númpaap miñpa tsuucim. Da i ijodonɨ juchis hora núcpa. ³ Cuando nɨmyajpa jém pɨxiñtam iga: “Da ti idíyɨy, da i jém tamalwadaypáppɨc”, jesic jeeti rato núcpa jém castigo iga actogoyyajtaɨp. Juuts tum yomo cuando toypa imanɨc iga naypa, da wɨap ipoy. ⁴ Pero michtam, mantɨwɨtam, da miñta jém piichcɨim, jesic cuando núcpa jém jama, jém tánQmi da micupiichcɨíyɨpa juuts tum númpaap. ⁵ Porque iñɨtumpɨyɨtam miñta siñni jém juctianɨtsocajom juɨt cutiwanɨane. Da taɨtta tsuucim ni piichcɨim. ⁶ Jeeyucmi da tamonɨtámpa juuts jém tunɨgac jém monɨyajpáppɨc. Wɨ iga tajɨxiɨyɨtamiñ iga taɨttamiñ listo. ⁷ Porque jém monɨyajpaap monɨpa tsuucim, jém uquiɨyaj uquiɨyajpa tsuucim. ⁸ Pero taichtam taɨtta jém juctianɨtsocajom, wɨ iga tajɨxiɨyɨiñ. Jex juuts jém soldado icámpa jém icoraza ipechoyucmi, wɨ iga taɨncupictámiñ jém Dios inɨmaɨti y tantoytámiñ jém tantɨwɨtam, jempɨgam tanacupujtaɨp. Juuts jém soldado icámpa jém icasco icobacyucmi, wɨ iga tananjócpa jém jama iga taciacputpa Dios. ⁹ Porque Dios da tacupɨɨ iga tachiiba castigo, pero tacupɨɨ iga taciacputtámpa jém tánQmi Jesucristo. ¹⁰ Accaata iga tayojáy jém tantáɨca. Jesic cuando miñgacpa, siiga tacaaneum o siiga tavivonom, nicpa tawagaɨti con je. ¹¹ Jeeyucmi mantɨwɨtam, nacamamwadaytamtaɨjɨ jém iñanama, nanquejaytamtaɨjɨ con jém iñɨɨwɨtam jém Dios inɨmaɨti juuts siɨp inɨwattámpa.

Jém Pablo inɨquímpa jém icupɨcneyajwɨp Jesús

¹² Siɨp mantɨwɨtam, manɨcunucsaytámpa iga inɨwɨixtámiñ jém pastoryaj, jém yoxayajpaap mimichtamanɨjom. Jém tánQmi icupɨɨ iga minɨquímtámpa y minɨquejaytámpa jém wɨbɨc tunɨ. ¹³ Wɨixtaami jeeyaj, toytaami porque wɨbɨc yoxajɨ iwatyajpa. Mimichtam odoy áɨɨtaami con jém iñɨɨwɨtam.

¹⁴ Mantɨwɨtam, manɨcunucsáypatim iga inɨnquímtámiñ jém dapɨc yoxayajpa iga odoy cutíñayajɨiñ. Camamwadaayɨ ianama jém cɨɨyajpáppɨc. Yoxpaati jém dapɨc wɨap icutiɨyɨy jém Dios inɨmaɨti. Yaachiɨyɨy itumpɨy jém tantɨwɨtam siiga chocóyap icutiɨyɨy jém Dios inɨmaɨti.

¹⁵ Wattaami cuenta iga odoy i icianɨseedáyɨpa jém imalwadayñewɨp. Siempre nawɨwadaytamtaɨjɨ con jém iñɨɨwɨtam. Wɨwadaayɨtim itumpɨy jém pɨxiñtam.

¹⁶ Maymáyaɨtaami siempre. ¹⁷ Odoy tsaci iga inɨnwejpáttámpa Dios. ¹⁸ Ti quej iññascaaba, chiitaami gracia Dios, porque jempam iwɨanɨjam tanɨɨatunɨ Dios iga inɨwattámpa mimichtam, porque jém Jesucristo mimɨichitam.

¹⁹ Odoy acpɨchaayɨ jém Dios iAnama ijucti. ²⁰ Siiga Dios iAnama ichi jɨxi jém pɨxiñ iga inɨmadiñ jém Dios inɨquímayooyɨ, odoy jóyɨxi. ²¹ Pero siempre ámcoñwɨyɨy itumpɨy jém jɨxi iga wɨaiñ inɨcupɨɨ jém wɨbɨc. ²² Pero tsaganɨputi itumpɨy jém malopɨc cosa.

²³ Siɨp tanɨɨatunɨ Dios, jém iniitwɨp jém wɨbɨc paz, miñuntawɨtsagáyɨiñ jém iñanama, jém inɨjɨxi y jém immɨɨtɨy iga michíyɨtámiñ limpio y cuáyñe cuando miñgacpa yɨp naxyucmi jém tánQmi Jesucristo. ²⁴ Jém minɨwejayñewɨp da miɨgópɨpa, siempre iccupacpa juuts tajɨycámayñe.

Jém Pablo idioschiiba jém tantɨwɨtam, ichiiba bendición

²⁵ Mantɨwɨtam, anɨwejpátaami Dios para aichtam.

²⁶ Dioschitaami itumpiy jém tantiwitam con tum wibic anacatsuuchi.

²⁷ Manwágáypa jém tánomi iñiyimi iga immáyaytámiñ yip toto jém tantiwitam itumpiy jém ityajwip jem.

²⁸ Sip jém tánomi Jesucristo miwíwadaytámiñ iñtumpiytam. Jemum cuyaj.

Jém segunda carta jém ijáyayñewiip Pablo jém ityajwiip jém attebet Tesalónica

Jém Pablo con icompañeroyaj ijáyáy jém Dios ipixiñtam

¹ Ich aPablo. Awagaitta con jém Silvano y Timoteo. Siip manjáyaytámpa mimichtam miiftanwiip jém attebet Tesalónica, jém inçupicnetanwiip Jesucristo. Mimichtam jém tanJatun Dios mimichitam y jém tánQmi Jesucristo mimichitam. ² Jém tanJatun Dios y jém tánQmi Jesucristo miwiwadaytamiñ iga odoy iniidiñ jém cobacpiji iñanamajom.

Chiitap castigo jém táncaywiip cuando miñgacpa Cristo

³ Mantiwitam, wi iga tsam anchiiba gracia tanJatun Dios para mimichtam porque más y más inçupictámpa jém Dios inmati, más y más minitoytamtap con jém iñtiwitam. ⁴ Siempre mançujíptámpa cuando nicpa ananmat jém Dios inmati tunyac attebet. Annímáypa jém Dios ipixiñtam iga tsam inwícupictámpa jém Dios inmati. Da iñchactámpa jém Dios inmati cuando tsam micpóyta y tsam miyaachwatta. Tsam iñyaachiyta. ⁵ Jesic wi quejpa iga wicpíjópá Dios. Quejpatim iga mimichtam miifta juuts wibic mipixiñ iga wiap iñtiyita jut injacpa Dios. Jeeyucmi siip miyaachatámpa.

⁶ Ijodon Dios iga wi iga ichiiba castigo jém mimalwadayñewiip. Iyaachwatpa jém miyaachwatneyajwiip. ⁷ Jesic cuando miñgacpa yíp naxyucmi jém tánQmi Jesús, tacjejtámpa iga odoy más tayaachatamiñ. Iwaganamiñpa jém siñyucmipic pixiñtam jém iniitwiip jém Dios ipimi. ⁸ Inimiñpatim jém siñyucmipic jucti iga iñoquetyajpa jém dapic iixpicyajpa Dios, jém dapic icupicyajpa jém wibic anmati iga tánQmi Jesús taciacputtamtooba. ⁹ Chiijajtap castigo jém malopic pixiñtam, actogoyajtap para siempre. Da wiap iityaj jém tánQmi iwiñjom ni da wiap iixayyaj jém ipimi. ¹⁰ Jesic cuando miñgacpa yíp naxyucmi jém tánQmi Jesús, tsam iwixiyajpa itumpiy jém ipixiñtam jém cuáyñewiip ianama, ipooñanjamyajpa jém icupicneyajwiip jém Dios inmati. Miittámpatim mimichtam porque inçupicneta titam mananmadayta.

¹¹ Jeeyucmi siip anañwejpáttámpa Dios iga michiyiñ juuts jém Dios mipixiñtam porque Dios micupinta. Anwagáypatim Dios iga iccupaguiñ con ipimi juuts mimichtam inwanjamta y jém yoxacuy jém inwattampáppic porque inçupicneta Jesús. ¹² Jempigam tsam cujítap jém tánQmi Jesucristo mimichtam inçuyucmi, y micujíptámpatim jém tánQmi porque tsam tatoypa tanJatun Dios y tánQmi Jesús.

2

Tanmadaytap jutsap imiñ jém tánQmi

¹ Siip, mantiwitam, mananmadáypa jutsap imiñgac yíp naxyucmi jém tánQmi Jesucristo y jutsap tantuumawatta jém tánQmi iwiñjom cuando miñgacpa. Mannímáypa, mantiwitam, ² siiga immatoñtámpa iga núcneum jém jama iga miñgacpa jém tánQmi Jesús, odoy cupictaami, odoy anyáctaami. Siiga miñpa miñmadáy tum anmatciwiñ o tum pastor, odoy cupictaami. Siiga tum pixiñ miñmáypa iga jém Pablo ijáyáy tum toto iga núcneum jém jama cuando miñpa tánQmi, odoym cupictaami. ³ Odoy i mimigóyaytamiñ porque da miñgacpa yíp naxyucmi jém tánQmi Jesucristo hasta núcpa jém tiempo iga jém pixiñtam ichacyajpa jém Dios inquímayooyi, hasta que tsucumpa jém malopic anjagooyi, jém ijóyixpáppic itumpiy jém wibic anquímayooyi, jém ipictsonpáppic jém mijpic castigo jém

juctjōm jut da nunca píchpa. ⁴ Yíp malopic anjagooyi tsucumpa en contra de Dios, jém ijisyajpáppic jém pxiñtam. Tsam nacujíptap iyaac. Nicpa coñi jém Dios imasticjōm juuts tum dios. Nímanṭaayap iga: Ich aDios.

⁵ ¿Que da iñjisa iga mananmadáy yípyaj cosa cuando oy aiti con mimichtam? ⁶ Mimichtam, iñjodon iapaap jém dapic ijícpa iga tsucumpa jém malopic anjagooyi antes que núcpa jém ijama. ⁷ Siip itum jém malopic anjagooyi ipimi iga imalwatpa, pero anécne, danam wiñquejne. Togoy no más iga accáyṭap jém dapic ijícpa iga tsucumpa. ⁸ Jesic ocmi wiñquejpa jém malopic anjagooyi, pero tánŌmi Jesucristo, cuando miñgacpa yíp naxyucmi, iccaaba con jém ipimi jém putpáppic ijipjōm, ictogoypa jém malopic anjagooyi con jém ichōca. ⁹ Cuando núcpa yíp malopic anjagooyi, iwatpatim juuts jém Wocciwiñ. Iniit itumpiy ipimi, wiap iwat jém señales y jém milagro iga imigóyayjpa jém pxiñtam. ¹⁰ Iniittim itumpiy jém malopic jixi iga imigóyáypa jém pxiñtam jém togoyajpaap. Togoyajpa porque da icupicyaj jém numapic anṃati iga iciacputyajpa Dios. ¹¹ Jeeyucmi Dios ijíc iga namigóyayjtañ con jém malopic jixi iga icupicyajpa jém migooyi, ¹² iga chiiyajṭap mijpic castigo itumpiy jém dapic icupicyajtooba jém numapic anṃati, jém aguipic iwianjamyaj iga imalwatyajpa.

Dios tacupiñeta iga taciacputtámpa

¹³ Pero aichtam tienes que siempre anchiitámpa gracia Dios por mimichtam, mantiwitam, mitoytampáppic jém tánŌmi, porque dende wiñgam Dios micupiñeta iga miciaacputtámpa, iga jém Dios iAnama miccáyáypa iñtanca porque incupicta jém numapic anṃati. ¹⁴ Jesic cuando oy mananmadáy jém wibic anṃati, Dios miñwejay iga miciaacputtámpa iga miwagaittámpa siñyucmi con tánŌmi Jesucristo.

¹⁵ Jeeyucmi, mantiwitam, mannímaytámpa iga odoy tsactaami jém Dios inṃati. Siempre jistaami jém anquímayooyi, jém mananmadayñewiip y jém manjayayñewiip. ¹⁶ Tsam tatoytámpa jém tanjatun Dios y jém tánŌmi Jesucristo. Tsam tayaachanjampa para siempre. Tachiita jém jixi iga odoy ti tançinñ. Tacjodōṃata iga nicpa tañti con Dios. ¹⁷ Siip Dios micamamwadaytamiñ iñanama, miyoxpáttamiñ iga wiap inwatta jém wítampic cosa juuts ixunpa Dios iga iniñmattámpa jém wítampic anṃati.

3

Anwejpaati Dios para aichtam

¹ Jesic, mantiwitam, anwejpátaami Dios para aichtam iga ayoxpáttamiñ Dios cuando ananmattámpa jém wibic anṃati iga más jicsci y núcpa jém Dios inṃati jutquej. Wágaayi Dios iga ayoxpáttamiñ cuando ananmattámpa jém wibic anṃati iga jém pxiñtam iwipictsonyajiñ jém anṃati juutstim mimichtam inwipictsoneta. ² Wágaytaami Dios iga aciacputtamiñ de jém malopic pxiñtam y de jém tamalwadaypáppic. Porque da itumpiy pxiñtam icupicyajpa Dios. ³ Pero jém tánŌmi siempre iwatpa juuts tajycámayñe. Y jém tánŌmi miyoxpáttámpa iga wiañ inwatta juuts ixunpa Dios. Miwattámpa cuenta iga odoy i wiañ micmalwat. ⁴ Anjodon iga inwatneta juuts mannímayñeta y seguido inwattámpa porque jém tánŌmi miyoxpáttámpa. ⁵ Siip ansunpa iga tánŌmi Jesús miyoxpáttamiñ iga más iniidiñ jém tanjatun Dios itóyooyi, iga wiañ iñyaachiyta juuts iyaachiy jém tánŌmi Cristo.

Wi iga tayoxap

⁶ Siip, mantiwitam, mampimíypa jém tánŌmi Jesucristo iñiyimi, odoy anpiñti jém tantiwitam jém dapic yoxayajpa, jém dapic iwatyajpa juuts nimpá jém anquímayooyi jém manchiñewiip. ⁷ Cuando oy aiti con mimichtam, da antsac anyoxacuy. Wi

iga mimichtam inwattámiñtim juuts aichtam. ⁸ Cuando oy aiti con mimichtam, da manwágáy jém inwícuy, itumpiy manyojáy. Tsam pimi ayoxata tsuucim y siñni iga odoy manwadaytámiñ molestia. ⁹ Numa, wi idic iga michtam anchiiba jém wícuy porque oy manyoxpát, pero da anwianjam iga ansáypa jém wícuy. Pimi ayoxata iga manaquejayta iga jém Dios ipixiñtam tsam yoxayajpa. ¹⁰ Cuando oy aítitam con mimichtam, mananmadáy yíp anquímayooyi: Siiga da miyoxap da miwícpa. ¹¹ Ammatonja iga algunos de mimichtam da miyoxatámpa. Tsam micutíñatámpa. Tsam immoogíypa jém inñiwítam. ¹² Siiga da miyoxap, siip mananquímpa jém tánomi Jesucristo inñiyimi, mannímaypa iga miyoxatámiñ iga iniittámiñ titam incúttámpa.

¹³ Mantiwítam, odoy sopstaami iga inwíwattámpa. ¹⁴ Siiga algun i da icupicpa yíp anmati, jém manjáyayñewip, jesic ixpici iapaap jém pixiñ, odoy anpitsi iga tsaaiñ. ¹⁵ Pero odoy jóyixtaami juuts tum enemigo, más nuumanquejaayi ti ixunpa Dios porque tantiwítim.

Jém tánomi Jesucristo miwíwadaytámiñ

¹⁶ Jém tánomi, jém iniitwip jém paz, michiitámiñ jém paz iga miwinanigayyajiñ jém inñiwítam. Siip tánomi miwaganaittámiñ inñumpiytam.

¹⁷ Ich aPablo. Siip manjáyáypa ançimi iga mananquímtámpa. Jesic quejpa iga ich mismo anwat yíp toto. Yimpigam siempre anjaypa. ¹⁸ Siip tánomi Jesucristo miwíwadaytámiñ inñumpiytam. Jenum cuyaj.

Jém wiñtipic carta jém ijáyayñewiip Pablo jém Timoteo

Jém Pablo ijáyaypa jém Timoteo

¹ Ich aPablo. Jém tánQmi Jesucristo accám iga aapóstol. Acutsat juuts ipimíy tanJatun Dios jém taciaputpáppic. Acutsattim tánQmi Jesucristo jém tananjóctampáppic. ² Siip manjáyaypa miTimoteo. Mich michíyapa juuts annuntamanic porque inçupicne jém wibic anmañti jém manamíñayñewiip. Siip tanJatun Dios con tánQmi Jesucristo miyoxpátpa iga witsíyíñ jém íñanama. Miyaachanjampa. Michiiba jém wibic paz iga odoy iniidiñ jém cobacpji.

Wi iga tanwogáyíñ jém inquejyapáppic jém migooyi

³ Wiñic cuando danam anicne jém naxyucmi Macedonia, mannímáy iga yim michíyapa jém atebet Efeso. Anmadaayi jém tantiwitam jém dapic iwicutiyyiñe jém Dios inmañti iga odoy inmadayyajiñ jém tunjac anquímayooyi jém migooyipic. ⁴ Nímaayitim jém tantiwitam iga odoy inquejyayajiñ jém pixiñtam jém wiñicpic jixi porque je puro jixquiimi, tamigóyaypa. Nímaayitim iga odoy inquejáyíñ jém tantiwitam iga ijisyajpa jém wiñicpic itúmmiyaj juuts tum dios. Porque jém wiñicpic jixi da tayoxpátpa. Más wi iga tananquejáyíñ jém Dios inmañti iga jém pixiñtam wiaíñ icutiyyiyaj jutpic icupicyajpa Dios.

⁵ Pero siip mannímáytañpa ti ansuntámpa. Anwianjam iga minitoymtañ con itumpiy jém tantiwitam. Siip wiañ inwat siiga cuáyñeum íñanama y siiga iniitta jém wibic jixi íñanamanjom y siiga numa inçupictámpa jém tánQmi Jesucristo. ⁶ Algunos jém Efesopic pixiñtam iwattooba idic juuts ixunpa Dios, pero ocmi ichacpa jém Dios inmañti. Inmattooba idic jém Dios inmañti, pero da icutiyyíyapa. Inejaanmadáy jém pixiñtam. ⁷ Tsíytooba juuts tum maestro iga inquejáyapa jém Moisés inquímayooyi, pero da icutiyyíyapa ti inmatpa. Tsam pimi najíyóyapa, pero da icutiyyíyapa ti nimpapa.

⁸ Tanjodonjam iga wi jém Moisés inquímayooyi. Dios ichac jém anquímayooyi iga acjodonjatap jém malopic pixiñtam iga tancaiy. ⁹ Dios da ichac jém Moisés inquímayooyi para jém wibic pixiñtam. Tsacta jém anquímayooyi para jém dapic iwatyajpa juuts ixunpa Dios, jém dapic icupicyajpa Dios, jém ijóyixyapáppic Dios, jém tancaiywiip. Tsacta jém anquímayooyi para jém malopic pixiñtam y jém dapic ijisyajpa Dios, y para jém iccaayajpáppic ijatun o iapa y para jém accaoyajpáppic. ¹⁰ Tsactatim jém anquímayooyi para jém pejoyyapáppic, jém pixiñ jém inúgaypáppic tum pixiñ juuts tum yomo, jém inúmpáppic tum tsixi o tum yomo iga ininicpa, jém iwatpáppic quejaj iga icumigóyapa itiwitam, jém tamigóyaypáppic y itumpiy jém pixiñtam jém dapic iwatyajpa juuts nimpapa jém Jesucristo inquímayooyi. ¹¹ Siip mannímáyapa iga yiptim anquímayooyi, jém wibic anmañti, achiñe Dios iga ananmadáyapa jém pixiñtam. Agui wi jém tanJatun Dios. Tanjuciptámpa siempre.

Dios tsam iyaachanjampa jém Pablo

¹² Siip anchiiba gracia tánQmi Jesucristo. Tsam pimi ayoxpátne iga wiañ ananmat jém wibic anmañti. Acupineta iga ançuyoxap tánQmi Jesús porque iix iga da antsacpa jém wibic anmañti. ¹³ Wiñic tsam pimi ammalnámáy jém tánQmi Jesucristo. Ammalwadáy y ançujiy jém icupicneyajwiip Jesús. Pero ocmi Dios ayaachanjam porque danam ançupicne tánQmi Jesús. Da idic ançutiyyíyapa, jeeyucmi ammalwatpa. ¹⁴ Tsam pimi ayaachanjam jém tánQmi. Agui ayoxpátne iga wiañ ançupic jém Jesucristo. Anquejáy jutpic tatoypa porque taichtam Cristo tamichitam.

15 Siip manañquejáypa tum numapic añquímayooyi. Wi iga tançupictámpa tantumpiytam. Nimpa así: Oy iti yip naxyucmi jem tánQmi Jesucristo iga iciacputyajiñ jem tánçaiywip. Ich aPablo más pimi atañçaiy que itumpiy jem pixiñtam. 16 Pero ityajtim tsam jáyan jem pixiñtam jem dapicnam icupicyaj jem tánQmi Jesucristo iga ipictsonyajpa jem vida dapic cuyajpa. Jeeyucmi ayaachanjam Dios. Ich tsam jáyan táñca añwat contra Dios, pero accáyáy jem antañca. Jempam Dios inquejáy itumpiy jem pixiñtam iga tayaachanjampa jem tánQmi Jesucristo. Da jobit tachiiba castigo. 17 Tsam tançujíptámpa tanJatun Dios para siempre porque tsam pimi wi tanJatun Dios. Je jem más mijpic anjagooyi, da nunca cuyajpa. Da wiap tánixta, pero tanjodon iga da nunca caaba. Da i tungac Dios no más tanJatun Dios, jem itwip sinyucmi. Jempigam tançupictámpa.

18 Siip miTimoteo, mammanic, manañquímpa iga seguido inwatpa jem Dios iyoxacuy. Wiñic jem Dios inmatciwiñ micupin iga incuyoxap Dios. Jesic jisi ti miñimáy jem anmatciwiñ iga incamawadiñ inñanama. 19 Odoy tsaci iga incupicpa jem tánQmi Jesús. Siempre wati jem witampic cosa juuts inñispa inñanamanjom. Porque algunos jem tantiwitam da iwatpa jem witampic cosa juuts inñispa inñanamanjom. Jesic moj imalwat hasta ichac jem Dios inmati. 20 Jempam iwatyaj jem Himeneo y jem Alejandro. Ocmi añçijunçotyaj jem Wocciwiñ inñinjom iga icutiyyajiñ iga da wi tançuiy jem tanJatun Dios.

2

Jutsap tanañwejpát Dios

1 Siip manchiiba jem wibic jixi. Wi iga tanwattámpa oración. Anwejpáttaami Dios para itumpiy jem pixiñtam. Chi gracia Dios iga tachiiba tanyoxaji. Wágaayi Dios iga iyoxpadiñ itumpiy jem pixiñtam. 2 Anwejpáttaami Dios para jem tanañjagooyiyaj y para itumpiy jem iniitwip algun cargo. Wágaayi Dios iga iyoxpadiñ jem anjagooyiyaj iga odoy idiñ jem pleito, iga da ti idiyíypa, iga wiap tanwat juuts ixunpa Dios, iga tawixtamiñ itumpiy jem pixiñtam. 3 Dios taciapputta jeeyucmi iwianjam iga tanañwejpátámpa. 4 Porque ixunpa Dios iga ciacputyajtaiñ itumpiy jem pixiñtam y iga acjodónayajtaiñ jem numapic añquímayooyi. 5 Tum Dios it. Da i tungac más Dios. Nada más it tum tacupujpápic jem Dios iwiñinjom, je jem Jesucristo, pixiñtim juuts taichtam. Da i tungac tacupujpápic. 6 Jem Jesucristo iyaac nachiifta iga accaatañ iga tayojáy tantañca. Jesic cuando núc jem jama, Dios tacjodóna iga taciapputtooba tantumpiytam. 7 Jeeyucmi Dios acupin iga anañmadáyiñ jem tungac pixiñtam tiiga accaata jem Jesucristo. Dios acutsat juumi iga anañmadáyiñ jem dapic je de Israel jutsap icupicyaj jem Jesucristo. Anacjodóna jem numapic añquímayooyi. Numa Dios acupin. Da mammigóyáypa.

8 Jesic ansunpa iga cada lugar jut antuumayajpa jem Dios ipixiñtam, inwejpátyajiñ jem tanJatun Dios, pero da wi siiga tatañçaiy. Da wi iga tanajóyixtamtap con tantiwitam o iga táñatámpa. 9 Ich ansunpa iga jem yomtam icutiyyajiñ juutspic tecxi iccámpa juuts ixunpa Dios. Wi iga iccámiñ jem tecxi juuts jem witampic yomtam, da juuts jem pejoyyajpaap. Odoy iccámiñ jáyan jem cadena de oro ni jem nançan jem tsoowiywip. Odoy iccámiñ jáyan jem wayañnúccuy jem tsoyajpápic iga cusúnytaiñ. Odoy iccámiñ jem punctucu jem tsoowiywip iga agui ámtaiñ. 10 Pero siiga Dios imichi jem yomtam, jesic wi iga iwadiñ jem witampic cosa. Jesic quejpa iga wibic yomo. 11 Wiap icuyujcayaj jem Dios inmati jem yomtam. Pero iwicumatóniñ junimpa jem Dios inmatciwiñ. Odoy añmatmatneyajiñ cuando wattap jem culto. 12 Ich da anaccámpa tum yomo juuts maestro iga iccuyujpa jem pixiñtam. Da wi iga tsíypa tum yomo juuts tum pastor iga injacpa jem pixiñtam. Más wi iga odoy jiyajiñ jem yomtam cuando itpa jem culto. 13 Porque wiñi

iwat Dios jém Adán. Ocmi iwat jém Eva. ¹⁴ Da i imigóyáy jém Adán, pero migóyayta jém Eva, jesic moj iwat táŋca. ¹⁵ Pero Dios iyoxpátpa jém yomtam cuando icnaypa tum tsixi siiga icupicpa Dios. Porque Dios iwianjam iga jém yomtam itóyiñ jém Jesucristo y iga iwadiñ jém wítampic cosa. Wi iga tsíyiñ juuts tum wibic yomo.

3

Juutspic p̄ixiñ tanaccámpa juuts tum pastor

¹ Numa jém aŋmati jém inmatnewiip jém p̄ixiñtam. Nimyajpa iga, Siiga tum p̄ixiñ iwianjam iga tsíypa juuts tum pastor iga injacpa jém Dios ip̄ixiñtam, jesic imétspa tum wibic yoxacuy. ² Siip manaquejáypa juutspic p̄ixiñ wi iga injacpa jém Dios ip̄ixiñtam: jém tumpic iyomo iniit, jém dapic icusúniypa jém malopic cosa, jém iwixpáppic jém itiwitam, jém jixiywip, jém wiapaap inquej jém Dios inmati, y siiga miñpa tum p̄ixiñ juumipic, icwíguiñ. ³ Pero da wi jém ucpáppic p̄ixiñ ni jém cósoypáppic. Da wi iga aŋayajpa con itiwitam. Más wi iga natoyyajtaiñ. Datim wi siiga icusúniyáypa jém itiwitam itumiñ. ⁴ Ixunpa Dios iga jém pastor wiap injac itumpiy jém ityajwip iticcim y jém ichixtam iwatpa juuts ip̄imíypa ijatun. Da ijóyixpa. ⁵ Porque siiga tum p̄ixiñ da wiap injac jém ityajwip iticcim, jesic datim wiap injac jém Dios ip̄ixiñtam. ⁶ Da wi iga tsíypa juuts tum pastor jém yaguiñpic icupicne jém Dios inmati porque wiap inicujíptā iyaac. Jesic Dios ichiiba castigo juuts jém Wocciwiñ cuando mu ichiita castigo cuando minicujíptā. ⁷ Tancupiŋpa tum wibic p̄ixiñ iga injaguiñ jém Dios ip̄ixiñtam, jesic jém dapic icupicneyaj Dios, iwixyajpatim. Siiga da iwixyajpa jeeyaj, jesic jém Wocciwiñ wiap icoñwíy iga icmalwatpa.

Juutspic p̄ixiñ jém diácono

⁸ Siip mannímáypa juutspic p̄ixiñ jém diácono, jém icuyoxapáppic jém pastor. Dios ixunpa wibic p̄ixiñ, jém dapic migóypa. Da iwianjam jém ucpáppic p̄ixiñ ni jém icusúniypáppic tumiñ. ⁹ Dios ixunpa iga iwicupiguiñ parejo jém wibic aŋmati jém Diospic tachiiñe. Da iwianjam jém inyamnewiip itánca ianamanjom. ¹⁰ Pero wiñti tanámcoñwíypa jém p̄ixiñ, tancutitspa siiga wibic p̄ixiñ. Siiga da táŋcaíy, jesic wiap iwat jém yoxacuy. ¹¹ Dios ixunpa iga jém p̄ixiñ iyomo wibictim yomo. Iwixyajpa jém itiwitam. Da wi iga imalwatpa. Datim wi siiga icujíypa jém itiwitam. Wi jém yomo siiga siempre iwatpa juuts ixunpa Dios. ¹² Wi siiga jém diácono iniidiñ tum jém iyomo. Wi siiga jém ichixtam con itumpiy jém ityajwip iticcim iwatyajpa juuts ip̄imíypa jém p̄ixiñ. ¹³ Siiga jém p̄ixiñ iwiyoxpátpa jém pastor, jesic kujíptap. Jesic ocmi jém p̄ixiñ wiaptim inmat jém tánomi Jesucristo inmati y da cŋpa.

Agui wi jém Dios inquímayooyi

¹⁴ Ich nictooba manjóyáy jobit, pero wiñti manjáyáypa yíp toto. ¹⁵ Jesic siiga da jobit anúcpa, manacjodónap jutsap iwatyaj jém Dios ip̄ixiñtam juuts ixunpa Dios. Porque Dios ip̄ixiñtam jex juuts tum tic y Dios ichiiba jém wibic aŋmati iga iccáyiñ. Dios ixunpa iga iwadiñ cuenta jém wibic aŋmati. Agui wi tanjatun Dios jém vivopic. ¹⁶ Agui tampooñanjamtámpa cuando tancutiiyítámpa ti iwat Dios yíp naxyucmi:

Oy iti yíp naxyucmi jém tanDios juuts tum p̄ixiñ,

maayíyitim juuts taichtam.

Dios iAnama tanquejáy iga numa jém Cristo.

Jém sinyucmipic p̄ixiñtam oy iyoxpátayaj.

Jém tunjac p̄ixiñtam, jém dapic je de Israel,

imatonyaj jém wibic aŋmati.

Jutquej jém p̄ixiñtam icup̄icyaj jém tán̄omi Cristo.
Jesic eyb̄ic naquímt̄a s̄inyucmi.

4

Jém p̄ixiñtam jém ichacyajp̄áppic jém Dios in̄mat̄i

¹ Jém Dios iAnama tan̄quejáy iga núcpa jém tiempo iga jém p̄ixiñtam ichacyajpa jém Dios in̄mat̄i. Jesic mojpam iwatyaj juuts in̄imáypa jém mal espíritu jém tamigóyayp̄áppic. Icup̄icyajpa jém Wocciwiñ in̄químayooyi. ² Jém inimiññew̄ip̄ jém migooyi iwatpatim juuts tum̄ wib̄ic p̄ixiñ iga w̄iañ tamigóyáy. Tánixpa iga quénam wib̄ic p̄ixiñ, pero puro migooyi inis̄iba. Da najam̄tap iga malo. ³ In̄quejáypa jém icuyujc̄wiñ iga tan̄caíypa tum̄ p̄ixiñ siiga an̄coom̄iypa. N̄impatim iga tan̄caíypa siiga ic̄ispa algunos jém w̄iccuy. Pero da w̄i jém j̄ixi porque Dios ichac itump̄iy jém w̄iccuy iga w̄i tan̄c̄is. Siiga wiñti tanañwejp̄átpa Dios iga tanchiiba gracia, jesic w̄iap tan̄c̄is cualquier jém w̄iccuy. Porque tan̄cup̄icneta jém tán̄omi Cristo y tan̄cut̄iyȳñeta jém num̄ap̄ic an̄químayooyi. ⁴ Siiga tanchiiba gracia Dios, jesic da tat̄an̄caíy siiga tan̄c̄ispa cualquier jém w̄iccuy porque w̄i itump̄iy jém w̄iccuy jém ichacnew̄ip̄ Dios. ⁵ W̄itsacnet̄a jém w̄iccuy con Dios in̄mat̄i y con oración, da tact̄an̄caíypa siiga tan̄c̄ispa.

W̄i iga seguido tan̄cuyujcaaba jém Dios in̄mat̄i

⁶ Siiga mich in̄quejáypa jém tant̄iw̄itam jemp̄ic, jesic quejpa iga in̄wicuyox̄ap jém Jesucristo. W̄i iga seguido in̄cuyujcaaba jém Dios in̄mat̄i, jesic Dios miyox̄p̄átpa iga más in̄cut̄iyȳiñ jém wib̄ic an̄químayooyi. ⁷ Ts̄aci jém malopic cuento, odoy an̄madaayi porque puro j̄ixquiimi. Je jém wiñ̄icp̄ic j̄ixi. Duro cuyujcaí jém Dios in̄mat̄i iga w̄iañ in̄wat juuts ixunpa Dios. ⁸ Siiga tum̄ p̄ixiñ seguido yox̄ap, jesic in̄yujpa jém iyox̄acuy. Jesap̄tim taichtam, siiga seguido tan̄cuyujcat̄ampa jém Dios in̄mat̄i y tan̄watt̄ampa juuts ixunpa Dios, jesic tanañyujpat̄im. Jesic más w̄iap tan̄wat juuts ixunpa Dios. Siiga tanañyujpa iga tan̄watpa juuts ixunpa Dios, je ts̄am tayox̄p̄átpa ȳip naxyucmi y tayox̄p̄átpat̄im s̄inyucmi. ⁹ Ȳip an̄químayooyi je jém num̄ap̄ic, da mam̄migóyáypa. W̄i iga in̄cup̄ict̄amiñ, iga in̄watt̄amiñ juuts mann̄imáypa. ¹⁰ Jeeyucmi ts̄am p̄imi ayox̄at̄ampa, agui yaach̄ap an̄watta jém Dios iyox̄acuy porque an̄cup̄ict̄ampa iga jém vivopic tan̄Dios taw̄iwadáypa juuts taj̄ycámayñe. Porque jém tan̄Dios oy iyojáy itump̄iy jém p̄ixiñtam it̄an̄ca, jesic w̄iap ic̄ip̄utyaj jém p̄ixiñtam jém icup̄icneyajw̄ip̄ Jesús. ¹¹ S̄ip̄ miTimoteo, an̄quejaayi jém imp̄ixiñtam ȳip an̄químayooyi. N̄imaayi iga icup̄icyajiñ. ¹² Siiga algunos jém ts̄amip̄ic miñimayyajpa iga: Agui mich̄ixiñam, jesic odoy wadaayi caso. Siempre w̄iwat̄i jém tant̄iw̄itam iwiñ̄jom, jesic cuando miixyajpa, ijodonyaj ti ixunpa Dios. Odoy an̄mat̄i jém da wib̄ic an̄mat̄i. An̄quejaayi jém num̄ap̄ic tóyooyi. Siempre cup̄ici titam taj̄ycámayñe Dios. Odoy ch̄i lado jém malopic j̄ixi iga micmalwatpa. ¹³ Wat̄i jém Dios iyox̄acuy con itump̄iy imp̄imi hasta cuando anúc̄pa jem̄ic. Máyaayi Dios in̄mat̄i jém tant̄iw̄itam. Yox̄paati iga iw̄icut̄iyȳyajiñ ti ixunpa Dios. An̄quejaayi parejo jém tán̄omi in̄químayooyi. ¹⁴ Odoy ts̄aci jém wib̄ic j̄ixi jém michiññew̄ip̄ Dios. J̄isi iga juts̄a miimp̄ict̄son̄ jém wib̄ic j̄ixi cuando mich̄icunugáy in̄cobac jém pastoryaj. Jesigam miñimáy jém Dios in̄mat̄ic̄wiñ iga Dios michiiba jém wib̄ic j̄ixi.

¹⁵ Seguido wat̄i jém w̄itamp̄ic cosa con itump̄iy in̄j̄ixi, jesic miixtap iga mástim w̄iabam in̄yox̄a. ¹⁶ Cuidado iga immalwatpa. Odoy neja an̄mat̄i jém Dios in̄mat̄i. Siempre wat̄i jém w̄itamp̄ic cosa jém manan̄madayñew̄ip̄. Jesic Dios mic̄iacputpa mimich y ic̄iacputpat̄im itump̄iy jém imaton̄neyajw̄ip̄ in̄in̄mat̄i.

5

Chiitap jixi jém Timoteo jutpic iwatpa iyoxacuy

¹ Odoy wogaayi tum tsamipic pixiñ siiga imalwatpa. Anjijajaci juuts tum injatun. Winanigaayitim jém pixiñtam jém dapicnam tsamiyaj juutstim tum inñiwí. ² Anmadaayi jém chomtám juuts tum inapa. Anmadaayitim jém woñtam juuts inuntatiwi. Odoy cusúniyi jém woñtam.

³ Dios ixunpa iga tanyoxpádiñ jém cunoya, jém yompic, jém nunta icutumpigam, jém dapic iniñ i iyoxaáypa. ⁴ Siiga jém cunoya iniñ imaníc o iocmaníc jém wíapaap iyoxpát, jesic anquimi iga iyoxpádiñ juuts ixunpa Dios. Jempigam tanyojpa jém tanjatun o tánapa iga táncaá matactsam. Siiga tanwatpa jempic, jesic maymay Dios. ⁵ Pero jém nunta cunoya, jém dampigam iniñ i iyoxaáypa, tsam inwejpátpa Dios iga Dios iyoxpádiñ. Seguido iwatpa oración tsuucim y siñi. ⁶ Pero jém cunoya, jém dapic iwatpa juuts ixunpa Dios, icusúniypa jém malopic cosa. Tsíypa jém yomo juuts caane. ⁷ Anquejaayi jém Dios ipixiñtam yíp wibic anquímayooyi. Jesic wíap iwatyaj juuts ixunpa Dios. ⁸ Siiga tum pixiñ da iyoxpátpa jém ityajwíp iticim, jém inuntatiwitam, jesic quejpa iga ichacneum jém Dios inmatí. Jém pixiñ más táncaiy que jém dapic icupicpa Dios.

⁹ Jesic cuando inwatpa jém lista de jém cunoytam, jém yomtampic, odoy accaami en la lista jém dapicnam pimi tsami. Accaami en la lista jém nasnewíp sesenta iamtiy, jém tunçitpic ancoomiyne. ¹⁰ No más accaami en la lista jém wítampic cunoytam, jém iwíactsamneyajwíp jém ichixtam y jém iwípicsonpaap iticim jém juumipic pixiñtam. Jém yomo icuyoxap jém Dios ipixiñtam, iyoxpátpatim jém yaachayajpápic. Jém yomo iwatpa itumpiy jém wítampic cosa.

¹¹ Odoy accaami en la lista jém mañcunoytam jém dapicnam tsami. Porque ocmi cusúniyóypa jém yomo, jáyíypa. Ichacpa jém tánomi Cristo iyoxacuy. ¹² Jesic táncaiy jém yomo porque da iccupac juuts ijycámayne Dios. ¹³ Jém mañcunoytam agui cutíñap iyoxa. Iwíanjám iga joypa yim jeexic tiganjom. Agui icujiypa jém itiwitam, inmatpa puro migooyi. Inmatpa jém cosa dapic wítam. Iodançhiíypa jém itiwitam. ¹⁴ Ich animpa más wí iga jém mañcunoytam jaayíyíñ eybic iga iniidiñ ichixtam y iwadiñ cuenta jém itic con imanictam. Jesic jém tánenemigoyaj da wíap tamalnímáy. ¹⁵ Porque algunos jém cunoytam ichacne jém Dios inmatí, itúnjyyajpa jém Wocçiwíñ inquímayooyi.

¹⁶ Siiga algunos jém tantiwitam iniñ tum cunoya iticim, nímaayi iga imatspaguiñ y ichiñ itumpiy iwíccuy. Jesic los de más, jém icupicneyajwíp Jesús, da iwatyajpa gasto. Wíap iyoxpátay jém nunta cunoyapigam jém inuntacutumpigam.

¹⁷ Siiga jém pastoryaj wíap injacyaj jém Dios ipixiñtam y siiga pimi yoxayajpa iga inmatyajpa jém Dios inmatí, jesic Dios ixunpa iga tanwijojpa. ¹⁸ Porque nimpa jém Dios inmatí iga: “Odoy quiñianjupí jém inñix cuando inepnecotspa jém trigo iga inñobáypa jém ipac.” Nimpatim jém Dios inmatí iga: “Jém yoxaciwíñ wí iga ipicsonjñ jém iconwíyooyi.”

¹⁹ Odoy naquímaayi iquejaj tum pixiñ siiga iquejajwadáypa tum pastor siiga da iniñ wisten o tucuten testigo. ²⁰ Pero siiga táncaiy jém pastor, jesic wogaayi jém Dios ipixiñtamanjom iga imatonjajiñ. Jesic cinyajpa itumpiy iga iwatpa jém tánca. ²¹ Siñ cupici juuts mannímáypa porque tanjodon iga taixtámpa tanjatun Dios y tánomi Jesucristo con jém siñyucmipic pixiñtam. Siiga imalwatpa tum jém tánamigo, jesic tanwogáypatim. Tançipinpa parejo porque da wí iga tananyámáypa itánca. ²² Pero cuando incupinpa tum pixiñ iga iniccámpa juuts tum pastor, jesic chocoymi cuaami hasta impátpa tum pixiñ wibic. Porque siiga imalwatpa jém pixiñ, mich iniñ la culpa. Cuidado iga mitáncaiypatim mex mich.

²³ Siip miTimoteo, como siempre toypa impuu, da no más naps ni ññucpa, ucitim uxan jém vino iga mipixiñ porque mich siempre mimimne.

²⁴ Cuando inçupinpa jém pìxiñtam iga iwatpa jém Dios iyoxacuy, algunos quejpa iga tãñcaíy, jesic je da tampicpa. Pero algunos da quejpa iga tãñcaíy hasta tañcipinpa, jesigam quejpa iga tãñcaíy. ²⁵ Jesaptim it algunos jém pìxiñtam agui wiquejpa iga iwatpa jém wítampic cosa. Pero ittim algunos jém iwatpáppic jém wítampic cosa y da jobit quejpa. Pero ocmi wiquejpatim.

6

¹ Itumpiy jém esclavopic, jém icupicnewiip Dios, wí iga iniidáyíñ respeto jém iomi, iga iwixiñ. Jesic da i imalnímáypa jém tanJatun Dios y jém inquímayooyi. ² Siiga jém esclavo iomi icupicpatim Dios, jesic da wí iga ijóyixiñ porque jém iomi tsíyum juuts tum itíwi. Más wí iga jém esclavo iwícuyoxap jém iomi porque icupicpatim. Siiga iwícuyoxap, jesic más wítapa jém iomi, jém itoypáppic. Siip, miTimoteo, anquejaayi jém tantiwitam itumpiy yípyaj cosa, yoxpaati iga iwatyajiñ juuts ixunpa Dios.

Jém nunta numapic riqueza

³ Pero it algunos jém pìxiñtam inimiñpa tunjac anquímayooyi jém dapic wí. Jém anquímayooyi da jex juuts jém tánomi Jesucristo inquímayooyi. Yíp tunjac anquímayooyi da tañquejáypa juuts ixunpa Dios. ⁴ Pero da jixiíy jém pìxiñ, jém inimiññewiip jém tunjac anquímayooyi. Agui nacujíptap. Agui añatooba. Inacatooba jém inquímayooyi hasta casi locojap. Cuando it yíp malopic jixi, agui nacunaíyyajtap. Agui iwianjam iga añayajpa jém pìxiñtam. Tsam namalmalnímayyajtap. Imalcujisyajpa jém itiwitam. ⁵ Yípyaj pìxiñtam siempre ictsucumpa jém pleito. Puro migooyi inisiba. Tsam iniityaj jém malajixi ianamanjom. Iwattooba jém Dios iyoxacuy no más iga ricojaiñ.

⁶ Numa taricojap siiga tañcupicpa jém Jesucristo inquímayooyi siiga da tañcusúníyáypa tunjac pìxiñ imichi. ⁷ Cuando matannay da ti tanamiñ. Y cuando tacaaba datim ti tananicpa. ⁸ Siiga tanaít tañwíccuy y tampuctucu, jesic tamaymáyaíñ. ⁹ Da wí tum pìxiñ siiga icusúníyapa jáyan tumiñ porque wiap icmalwat jém Wocciwiñ, da ichacpa jém malopic ijixi. Tsam icusúníyapa wati jém malopic cosa. Jesic da wí itpa jém pìxiñ. Togoypa ianama. Da nicpa iti con Dios. ¹⁰ Da wí iga tañcusúníyapa jáyan tumiñ. Jexpic jixi juuts jém malopic tichic, ictsucumpa itumpiy jém malopic cosa. Algunos tsam icusúníyapa jém tumiñ hasta ichacpa jém Dios inmati. Jexpic pìxiñ iyaac naccoowatap con jém mijpic anyaqui.

Wí iga tañwattámiñ Dios iyoxacuy con itumpiy tanjixi

¹¹ Pero mich miTimoteo, Dios mipixiñ. Cuidado iga inwatpa jém malopic cosa. Mich siempre wati jém wibic cosa juuts ixunpa Dios. Cupici iga Dios wiap iwat itumpiy cosa. Toyi itumpiy jém pìxiñtam. Siiga pimi mimalwadaytap, odoy tsaci jém Dios inmati. Ponwati ññanama, jesic quejpa iga da mimalo. ¹² Wati con itumpiy injixi juuts ixunpa Dios. Wícupici jém Dios inmati iga impicstóniñ jém vida jém dapic cuyajpa. Jeeyucmi Dios micupin iga michiiba jexpic vida. Jisi cuando ininmadáy jém tantiwitam iga moj inçupic jém Cristo. ¹³ Jisi iga Dios tachiiñe vida tantumpiytam. Jisitim iga da cinpa jém tánomi Jesucristo cuando anwejayta jém Pilato iwiñjom. Siip taitta tanJatun Dios iwiñjom y tánomi Jesucristo iwiñjom. MiTimoteo, mannímáypa iga ¹⁴ wati juuts nimpá jém Dios inquímayooyi hasta jém jama cuando miñgacpa yíp naxyucmi jém tánomi Jesucristo. Jesic da i wiap miñímáy iga mitãñcaíy. ¹⁵ Cuando núcpa jém tiempo iga Dios ixunpa, cutsattap eybic jém Jesucristo yíp naxyucmi. Itumpiy jém pìxiñtam icujípyajpa

jém tanJatun Dios porque je jém más mijpic anjagooyi que itumpiy. Dios injacpa itumpiy jém reyyaj, injacpatim itumpiy jém anjagooyiyaj. ¹⁶ Solamente jém tanJatun Dios dapic nunca caaba. Jut it Dios, agui pimi tsocpa jém jucti, da i wiap icunúc. Da i nunca iix tanDios y sip datim i wiap iix. Tsam tanjajiptampa porque je da nunca yajpa jém ipimi. Yibam jém numapic anmati. Amén.

¹⁷ Nímaayi jém ricopic pixiñ iga odoy nacujiptañ y odoy ijixiñ iga wiap iwat itumpiy cosa con itumiñ porque wiap iyaj jém itumiñ. Más wi iga icupiguiñ Dios porque Dios tachiiba itumpiy jém wibic cosa iga tamaymayap. ¹⁸ Nímaayi jém ricopic pixiñ iga iwadiñ jém wítampic cosa con itumiñ. Nímaayi iga iyaachanjaamiñ jém yaachayajpápic iga ichiiyajiñ titam itogóyáy. ¹⁹ Siiga jempigam iwatyajpa, jesic iniitpa jém sinyucmipic riqueza jém dapic yajpa. Jesic ocmi ipictsonpa jém vida iga nicpa iti con Dios.

Anquímtap jém Timoteo

²⁰ MiTimoteo, watí cuenta jém Dios inmati jém impictsonewip porque it jém pixiñtam nımyajpa iga sabioyaj, pero puro migooyi inisiba. Jém migooyi da tayoxpátpa iga tanwatpa juuts ixunpa Dios. Mich odoy túnyiyi jexpic migooyi. ²¹ Algunos icupicyajtooba idic jém wibic anmati, pero jexpic migooyi ictsacpa jém Dios inmati.

Sip miTimoteo, iniidiñ Dios itóyooyi. Amén. Jemum cuyaj.

Jém segunda carta jém ijáyayñewiip Pablo jém Timoteo

Jém Pablo ijáyaypa jém Timoteo

¹ Ich aPablo. Dios acupij iga anañmatpa jém Jesucristo inqúimayooyi. Accám iga aapóstol iga anañmadayyajiñ jém pìxiñtam iga wiap ipictsonyay jém vida eterna siiga icupicyajpa jém tánQmi Jesucristo. ² Siip miTimoteo, manjáyaypa. Mich michíypa juuts tum mammanic. Tsam mantoypa. Siip anwágáypa tanJatun Dios y tánQmi Jesucristo iga miyaachanjaamiñ y iga miyoxpádiñ iga wiap inwat juuts ixunpa Dios. Anwágáypatim Dios iga michiiba jém wibic paz iga odoy iniidiñ jém cobacpiji.

Pimiyta jém Timoteo iga inmadíñ jém wibic anmati

³ Siempre anchiiba gracia Dios para mimich. Tsuucim y siñni manjispá y anwágáypa Dios iga miyoxpádiñ. Ich anjodon ananamanjom iga anwatpa juuts apimiy Dios jempectim juuts iwatyay jém wiñicpic antúmmitam. ⁴ Anjispá cuando mamanañquím, agui miñyác hasta miwejpa iga tanatsacanputta. Jeeyucmi agui mánixtooba siip. Cuando mánixpa, jesic agui amaymáypa. ⁵ Anjispá iga inwicupicne jém Dios inmati juuts icupicyay jém inapchomo jém Loida y jém inapa jém Eunice. Numa, quejpa iga mich inwicupicnetim Dios.

⁶ Cuando mantsiccunúgáy incobac, jesigam Dios miccám juuts tum pastor. Michi tum jixi wibic iga wiañ inwat jém Dios iyoxacuy. Jesic odoy tsaci jém wibic jixi, seguido wati juuts miñquejáy Dios. ⁷ Dios iAnama tacamamwadáy tánanama iga odoy tançinjiñ i quej. Tachiiba jém pimi iga wiañ tanwat juuts ixunpa Dios. Tayoxpátpa iga tantóyiñ itumpiy jém pìxiñtam y iga wiap tananjacta tanyaac. ⁸ Odoy tsaaji iga ininmadáypa i quej jutsap icupic jém tánQmi Jesús. Odoy tsaaji iga ich apajnetá iga ananúc jém Dios inmati. Odoy wadaayi caso siiga mimalwadaytap cuando nicpa ininmat jém wibic anmati porque Dios miyoxpátpa iga inyaachíyiñ. ⁹ Dios taciaputneta. Tacupij iga tatsíyiñ juuts jém Dios ipixiñtam. Pero Dios da taciaput iga agui wibic tapixiñtam, taciaput porque agui tayaachanjampa. Tsam wiñigam antes que iwatpa yip nas, ijis Dios iga icutsatpa jém Jesucristo iga tayoxpátpa. ¹⁰ Siip oy yip naxyucmi jém Jesucristo jém taciaputpaap iga tanquejáypa iga Dios tsam tayaachanjampa. Accaata jém Jesucristo iga tajojáy tantánca, jeeyucmi siip da tançinpa iga tacaaba porque tanquejáy siiga tancupicpa jém tánQmi Jesucristo, jesic nicpa taíti con Dios, da togoypa tánanama.

¹¹ Dios acupij iga aapóstol, acutsat juumi iga anañmadayyajpa jém wibic anmati jém tungac pìxiñtam jém dapic je de Israel. Acutsat iga anañquejayyay jém Dios inmati. ¹² Jeeyucmi apajta cárcel, pero ich da atsaap porque anwixpicpa jém tánQmi Cristo y tsam ancupicpa iga je wiap iwat juuts ajycámayñe. Ich ançijunçot ananama jém tánQmi Cristo icijjom iga awadáyiñ cuenta. Anjodon iga je wiap awadáy cuenta jém ananama hasta núcpa jém jama iga miñgacpa yip naxyucmi.

¹³ Odoy tsaci jém numapic anmati jém manañquejayñewiip. Anmati juuts manañquejayñe. Seguido cupici Dios. Toyi jém tantiwitam porque tantumpiytam jém Jesucristo tamichitam. ¹⁴ Wadaayi cuenta jém Dios inmati jém michiñewiip Dios. Cuidado iga ininmatpa jém migooyi jém dapic je Dios inmati. Dios michi jém Dios iAnama iga miyoxpádiñ.

¹⁵ Mich injodon iga itumpiy jém Asiapic pìxiñtam acupóyayyay, da ayoxpát. Acupóyáytim mex jém Figelo y Hermógenes. ¹⁶ Pero jém Onesíforo watciy oy aám jut apajnetá. Da tsaap jém pìxiñ iga atsenneta con cadena. Jém Onesíforo tsam

acmaymáya. Jeeyucmi s̄ip anañwejpátpa Dios iga iyaachanjaamiñ jém Onesíforo it̄iwitam. ¹⁷ Cuando anúc jém Roma, moj acuám jém Onesíforo hasta que apát. ¹⁸ W̄i iga tánQmi iyaachanjaamiñ jém Onesíforo cuando núcpa jém jama iga c̄ipínóypa jém tánQmi. Mich in̄wijodon̄ jutsp̄iy ayoxpát cuando aoy jém Efeso.

2

Tum wibic soldado de Cristo

¹ Mich miTimoteo, michíypa juuts tum mammanic. Wat̄i juuts ixunpa Dios con itump̄iy imp̄imi porque miyoxpátpa jém tánQmi Jesucristo. ² Mich wat̄ciy immaton̄ne itump̄iy jém an̄mat̄i jém anañmadayñew̄ip jém pixiñtam. S̄ip an̄quejaayi jeetim an̄mat̄i jém w̄itampic pixiñtam jém wiapaap in̄quejajayaj jém tun̄gac pixiñtam.

³ Yaach̄iyi siiga miyaachwattap porque mich michíypa juuts jém Jesucristo isoldado jém icupicpaap jém in̄jagooyi. ⁴ Jém soldado da w̄iap iwat tun̄gac yoxacuy porque tienes que iwatpa juuts ip̄imíypa jém in̄jagooyi. ⁵ Jex como tum m̄ichi, siiga da tan̄watpa juuts n̄impa jém wiapaap im̄ich, jesic da tan̄coñwíypa. ⁶ Jém ts̄ampic yoxap cam̄jom, iniit derecho iga wiñti ipictson̄pa jém ictsíypaap de jém cosecha. ⁷ W̄ij̄isi ti manañmadáy, jesic ocmi Dios miyoxpátpa iga w̄iap in̄cut̄iȳiy jutsap in̄wat jém Dios iyoxacuy.

⁸ Seguido j̄isi jém tánQmi Jesucristo. Accaata, pero Dios icp̄is. Jém Jesucristo ts̄iy juuts jém an̄jagooyi David iocmanic iman̄ic. Asíam n̄impa jém wibic an̄mat̄i jém anañmatpáppic. ⁹ Ts̄am p̄imi ayaachwattap iga anañmatpa jém wibic an̄mat̄i. Atsent̄a con cadena juuts tum accaoyñew̄ip. Ich apajta, pero Dios in̄mat̄i da ts̄iy preso. Tienes que nicpa jut̄quej. ¹⁰ Ts̄am antoypa jém Dios ipixiñtam jém Diospic icupin̄ne. Ansunpa iga jém Jesucristo iciacpudiñ jém pixiñtam iga nicpa tan̄waganait̄ Jesucristo itump̄iy tiempo. Jeeyucmi anyaaquíypa cuando amalwadaytap.

¹¹ Ȳibam an̄mat̄i jém numapic. N̄impa así:
Siiga tan̄cupicpa iga accaata jém Jesucristo iga tajoáy tant̄anca,
jesic tan̄jodon̄ iga tan̄waganait̄pa jém tánQmi Jesucristo para siempre.

¹² Siiga tanyaachíypa iga tayaachwattap,
jesic nicpa tan̄waganait̄ jém Cristo cuando in̄jacpa itump̄iy jém pixiñtam.
Taccámtaptim juuts tum an̄jagooyi iga tanañjacpa jém pixiñtam.
Siiga tananyampa iga tan̄cupicne jém Jesucristo,
jesic jém Jesucristo tan̄yampatim.

¹³ A veces da tanaccupacpa juuts tan̄jycámayñe Dios,
pero da jex jém tánQmi Jesucristo.
Tienes que icupacpa juuts taj̄ycámayñe
porque jém tánQmi Jesucristo da w̄iap tam̄igóyáy.

Tum wibic yoxac̄iwiñ jém icuyoxapáppic Dios

¹⁴ An̄madaayi jém tant̄iwitam ȳip an̄químayooyi porque Dios taixñe. Nímaayi así:
“Odoy añacataami jém Dios in̄químayooyi porque jém pleito da tayoxpátpa. Jém pleito icmalwatpa jém tant̄iwitam jém imaton̄yajpáppic.” ¹⁵ S̄ip miTimoteo, wat̄i con itump̄iy in̄j̄ixi juuts ixunpa Dios, jesic Dios miw̄ixpa. W̄ian̄quej̄i jém Dios in̄mat̄i jém numapic. Jesic michíypa juuts tum wibic yoxac̄iwiñ y da michaap iga miixaytap jém in̄yoxaji. ¹⁶ Odoy tiḡiyuumi jut̄ añayajpa jém pixiñtam jém dapic icut̄iȳiyajpa jém Dios in̄mat̄i. Da j̄ixíy jém pixiñtam, ts̄am añayajpa hasta más icupicyajpa jém m̄igooyi. ¹⁷ Ȳip malopic an̄químayooyi an̄picpa juuts tum malopic puuci tannacyucmi. Jém Hime-neo y jém Fileto jexpigam an̄químayooyi in̄quejajpa. ¹⁸ Jeeyaj ichacyaj jém numapic

anquímayooyi. Inqueyajpa yíp malopic p̄ixiñtam iga nasneum jém tiempo iga acp̄isyajtap jém caaneyajw̄ip. Imigóyayaj jém icup̄icneyajw̄ip Jesús hasta ictsacpa jém Dios in̄māti. ¹⁹ Pero da ì w̄iap ictogoy jém w̄ibic anquímayooyi porque Dios ichac tum base w̄icámne. Jemum jayñeta: “Jém tán̄omi iixp̄icpa jém im̄ichipic.” Y jém tungac jém an̄māti n̄impa iga: “Itump̄iy jém in̄wejp̄atyajp̄áppic jém tán̄omi in̄iyimi, ichacyajpa iga imalwatpa.”

²⁰ Jém rico iticj̄om it jém w̄itampic ch̄ima de plata y de oro. Pero ittim jém nasch̄ima jém dap̄ic w̄i. Jém w̄ibic ch̄ima codaytap jém w̄itampic cosa, pero jém nasch̄ima codaytap jém da w̄ibic cosa. ²¹ Siiga tum p̄ixiñ ichacpa iga imalwatpa, jesic ts̄iypa juuts tum w̄ibic yoxac̄iwiñ w̄iap iwat itump̄iy w̄ibic cosa juuts ixunpa Dios.

²² Como danam mich̄ami odoy cusúniȳi jém malopic cosa juuts jém icusúniyyajp̄áppic jém woñjaych̄ixtam. Seguido w̄ati jém w̄itampic cosa juuts ixunpa Dios. Seguido cup̄ici jém tán̄omi Jesús. Toyi itump̄iy jém p̄ixiñtam. Yoxpaati jém tant̄iw̄itam iga odoy áñayajiñ. Jempam iwatyajpa itump̄iy jém p̄ixiñtam, jém w̄icuáyñew̄ip ianama, jém in̄wejp̄atyajp̄áppic jém tán̄omi. ²³ Odoy tiḡiyuumi jut̄ in̄acayajpa jém Dios in̄químayooyi. Jexpic p̄ixiñtam da j̄ixiyyaj, da iw̄icut̄iyyajpa jém Dios in̄māti. Tanj̄odon̄ iga siempre ictsucumpa jém pleito. ²⁴ Da w̄i iga áñapa jém pastor jém icuyoxapaap Dios. Dios ixunpa iga itóyiñ jém it̄iw̄itam, jesic quejpa iga da malo jém ianama. Ixunpatim iga jém pastor iw̄ianquejáyiñ jém ip̄ixiñtam, chocoȳmi inin̄iguiñ jém icuyujc̄iwiñ. ²⁵ Inquejáyiñtim chocoȳmi jém icup̄icneyajw̄ip jém m̄igooyi. Porque Dios w̄iap ichi j̄ixi jém p̄ixiñtam iga ichaguiñ jém m̄igooyi iga icup̄iguiñ jém Dios in̄māti. ²⁶ Jesic putyajpa jém p̄ixiñtam jém Woc̄c̄iwiñ ic̄ij̄om. Mojp̄a icut̄iyȳi jém numapic anquímayooyi. Porque jém Woc̄c̄iwiñ imatsne id̄ic, jeeyuc̄mi iwatyajpa id̄ic juuts je ixunpa.

3

Ti iwatyajpa jém p̄ixiñtam jém in̄an̄pigam jama

¹ Sīp ansunpa iga in̄w̄icut̄iyȳiñ ti miñpa. Cuando núcpa jém in̄an̄pigam jama, ts̄am yaachwatyajtap jém Dios ip̄ixiñtam. ² Jém malopic p̄ixiñtam natoytap iyaac, da itoypa jém it̄iw̄itam, agui icusúniypa tumiñ, agui nacuj̄iptap, n̄impa iga ich agui aw̄iap, imalmaln̄imáypa ì quej, da icup̄icpa ijatun̄ ni iapa, da ij̄ispa tum p̄ixiñ iga iw̄iwadayñe, iwatpa contra jém Dios in̄químayooyi. ³ Jém malopic p̄ixiñtam da iw̄iwadaytooba jém it̄iw̄itam, da iyaachanj̄ampa, agui icuj̄iypa. Ts̄am imalwatpa juuts ij̄ispa ij̄ixianj̄om. Ts̄am bruto. Ts̄am ij̄oyixpatim itump̄iy jém w̄itampic cosa. ⁴ Imalwadáypa jém iamigoyaj. Da imaton̄pa iga tananj̄iyjacpa. N̄impa iga ich más aw̄iap. Ts̄am icusúniypa itump̄iy jém malopic cosa. Da itoypa Dios ni uxan̄. ⁵ Ȳip malopic p̄ixiñtam n̄iman̄taayap iga numa icup̄icneyaj Dios, pero migóypa. Y como da icup̄icpa Dios, jesic da ip̄ictson̄pa jém Dios ip̄imi iga w̄iap iwat jém w̄itampic cosa.

Odoy waganas̄i jexpic malopic p̄ixiñtam. ⁶ Algunos de jeeyaj, como ts̄am malo ij̄ixi, tiḡiyyajpa hasta ticj̄om iga in̄madayajpa jém yomtam jém m̄igooyi. Algunos jém yomtam agui cūixi, da icut̄iyȳiypa, jesic icup̄icpa jém m̄igooyi. Da w̄iap icut̄iyȳi porque ts̄am t̄añcaíy, ts̄am icusúniypa jém malopic cosa. ⁷ Jém cūixipic yomtam siempre icuyujcatooba cualquier anquímayooyi. Pero da w̄iap icut̄iyȳi jup jém numapic. ⁸ Wiñigam jém Moisés iniit w̄isten ienemigo, n̄awatyaj. Tum jém Janes y tum jém Jambre. Jeeyaj ts̄am imaln̄imayajpa jém Moisés. Jesaptim sīip, jém malopic p̄ixiñtam n̄icyajpa encontra de jém numapic anquímayooyi. Ts̄am malo ij̄ixi, da nunca w̄iap iwat juuts n̄impa jém Dios in̄químayooyi. ⁹ Da jáypa icuyaj iga imigóyayajpa jém p̄ixiñtam, porque ts̄am w̄iquejpa iga m̄igooyi. Jempictim in̄asca jém Janes y Jambre.

Inquímpa Pablo jém Timoteo

¹⁰ Siīp mich miTimoteo, iñjodon̄ itump̄iy jém ichpic̄ anañquímayooyi. Iñjodon̄ iga ich da ammalwatpa, siempre añwatpa juuts ixunpa Dios. Iñjodon̄tim̄ iga siempre añcupic̄ne Dios y ich chocoȳmi anañquejáypa jém p̄ixiñtam̄ jém Dios in̄mati. Iñjodon̄tim̄ iga tsam̄ antoypa itump̄iy jém p̄ixiñtam̄, da antsac̄ne iga anañmatpa jém Dios in̄mati. ¹¹ Mich iñjodon̄ iga jutin̄quej̄ amalwadayta. Tsam̄ p̄imī ayaachwatt̄a cuando oy anañmat̄ jém Dios in̄mati jém Antioquía, jém Iconio y jém Listra. Jém malopic̄ p̄ixiñtam̄ tsam̄ p̄imī amalwadáy, pero ich̄ anyaachíy porque t̄an̄omī ayoxpát. ¹² Siiga tantsacpa iga tammalwatpa y tatsíypa juuts jém Jesucristo ip̄ixiñtam̄, jesic̄ aguī tajóyix̄tap, tamalwadaytap. ¹³ Pero it̄ jém malopic̄ p̄ixiñtam̄ níman̄taayap̄ iga ich̄ añcupic̄ne Dios no más iga w̄iañ tamigóyáy. Jeeyaj̄ da ichacpa iga imalwatpa hasta más p̄imī imalwatpa. Imigóyayyajpa it̄iw̄itam̄ hasta iyaac̄ namigóyaytap.

¹⁴ Pero mich miTimoteo, seguido cupic̄ī jém Dios in̄mati jém manañquejayñew̄īp̄ porque iñjodon̄ iga da je migooyi. Iñjodon̄tim̄ iga w̄ibic̄ p̄ixiñ̄ jém min̄quejayñew̄īp̄ jém w̄ibic̄ añmati. ¹⁵ Dende mich̄ixiñam̄ íñixpic̄pa jém Dios in̄mati jém jayñet̄aw̄īp̄. Yíptim̄ añmati min̄quejáypa iga Dios mic̄iacputpa siiga in̄cupic̄pa Jesucristo. ¹⁶ Dios ichī j̄ixī jém p̄ixiñtam̄ jém ijayñeyajw̄īp̄ jém Dios in̄mati. W̄ī para tan̄quejáypa jém numapic̄ añquímayooyi, para tan̄j̄iyjacpa, para tan̄umtsacpa, para taw̄ian̄quejáypa iga tanait̄pa t̄um̄ vida numapic̄, ¹⁷ iga jém Dios ip̄ixiñtam̄ w̄icuyujne, da ti itogóyáypa, w̄iap̄ iw̄at̄ itump̄iy jém Dios iyoxacuy.

4

¹ Miñgacpa yíp̄ naxyucmī jém t̄an̄omī Jesucristo iga ich̄pin̄pa itump̄iy jém p̄ixiñtam̄ jém vivopic̄ y jém caaneyajw̄īp̄. Miñpa in̄jac̄ itump̄iy jém p̄ixiñtam̄. Siīp miTimoteo, j̄isī iga jém tan̄jatun̄ Dios y jém t̄an̄omī Jesucristo miixpa iga s̄ip̄ manañquím ² iga seguido añmadaayī jém Dios in̄mati jém p̄ixiñtam̄. Odoy wadaayī caso siiga da icupic̄yajtooba. An̄j̄iyjac̄ī jém imalwatyajp̄appic̄, wogaayī, añquiimī iga ichaguiñ̄ iga imalwatpa. Chocoȳmī nanicyaj̄ī con jém w̄ibic̄ añquímayooyi. ³ Porque núcpa j̄ama iga jém p̄ixiñtam̄ da imaton̄yajtooba jém numapic̄ añquímayooyi. Icusúnyyajpa jém malopic̄ añquímayooyi. Jém p̄ixiñtam̄ in̄wejayyajpa j̄ayan̄ jém maestroyaj. An̄tuum̄ayajpa jém in̄matyajp̄appic̄ migooyi. Porque jém p̄ixiñtam̄ aguī iw̄ian̄jam̄ iga imaton̄yajpa jém migooyi. ⁴ Ichacyajpa jém numapic̄ añquímayooyi iga imaton̄yajpa jém j̄ix̄quimipic̄. ⁵ Nawattaj̄ī cuenta iga odoy immalwadiñ̄. Yaach̄iȳī cuando mimalwadaytap. Mich̄ mich̄íypa juuts t̄um̄ Dios in̄mat̄cīwiñ̄, jesic̄ añmati jém w̄ibic̄ añmati, w̄iw̄at̄ī jém iñyoxacuy juuts ixunpa Dios.

⁶ Siīp ich̄ aitum̄ iga anachiit̄ap̄ para Dios juuts t̄um̄ sacrificio. Siīp núctooba jém hora iga accaat̄ap̄. ⁷ P̄imī ayox̄a. Siīp cupacum̄ jém anyoxacuy. Da antsac̄ iga añcupic̄ jém Dios in̄mati. ⁸ Jesic̄ añjodon̄ iga achiiba Dios jém w̄ibic̄ xaja, jém corona, porque ich̄ añwat juuts ixunpa Dios. Jém t̄an̄omī Cristo jex juuts t̄um̄ w̄ibic̄ juez, achiiba jém w̄ibic̄ xaja cuando miñgacpa yíp̄ naxyucmī. Da no más ich̄tī achiit̄ap̄, chiit̄aptim̄ itump̄iy jém p̄ixiñtam̄, jém in̄jóc̄p̄appic̄ iga miñgacpa yíp̄ naxyucmī jém t̄an̄omī Cristo.

Jém Pablo iixtooba Timoteo

⁹ MiTimoteo, miñ̄ī aaamī jobit̄. Tsam̄ mánixtooba. ¹⁰ Atsagan̄put̄ jém ánamigo Demas. Tsam̄ icusúnȳypa itump̄iy cosa jém ityajw̄īp̄ yíp̄ naxyucmī. Nic̄ it̄ī jém attebet Tesalónica. Jém Crescente nic̄ it̄ī jém attebet Galacia. Jém Tito nic̄ it̄ī jém attebet Dalmacia. ¹¹ Tsíy con aich̄ no más jém Lucas. Jesic̄ miTimoteo, nīgī meetsī jém Marco. Nam̄iñ̄ī ȳim̄.

Je wíap ayoxpát. ¹² Ançutsat jém ánamigo Tíquico jém attebet Efeso. ¹³ Jesic mimiñpa, anamíñaayi jém anyooti jém antsacnewiip jém tánamigo Carpo iticcim jém attebet Troas. Anamíñaayitim jém anlibroyaj y odoy jaamanoti jém ampergamino.

¹⁴ Jém Alejandro, jém iwatpáppic jém tñcuyxuuj, tsam pimi amalwadáy. Pero Dios ichiiba castigo. ¹⁵ Cuidado da mimalwadáypatim jém Alejandro. Porque jém pixiñ tsam ijóyixpa jém Dios inmati.

¹⁶ Cuando wiñti aquejajwadayta, da i ayoxpát iga acupuj. Ich anyaac anacupujta. Itumpiy jém ánamigoyaj acupóyayyaj. Siip ich anañwejpátpa Dios iga odoy i ichiiyajiñ castigo jém ánamigoyaj iga acupóyayyaj. ¹⁷ Pero tánomi da atsac añcutum, achi ipimi. Jeeyucmi wia manamat jém wibic añmati iga imatonjaj jém tunjac pixiñtam jém dapic je de Israel. Jempigam jém tánomi atop de jém cañ ijipjom. ¹⁸ Aciacput iga odoy i wiañ acmalwat. Awatpa cuenta hasta anúcpa siñyucmi jut injacpa Dios. Wi iga siempre tançujíptamiñ jém tanjatuj Dios. Amén.

Anquímyajta jém Timoteo con iamigoyaj

¹⁹ Ançutsadáypa watidios jém ánamigoyaj, jém Prisca y jém Aguila y jém ityajwip jém Onesíforo iticcim. ²⁰ Tsíy jém ánamigo Erasto jém attebet Corinto. Antsac jém ánamigo Trófimo jém attebet Mileto porque mimne. ²¹ Siiga miwíap miñi yim antes que núcpa jém tiempo de succuc. Siip michiiyajtooba watidios jém Eubulo y jém Pudente y jém Lino y jém Claudia con itumpiy jém tantiwitam jém ityajwip yim.

²² Jém tánomi Jesucristo miwaganaittamiñ, mimichtam, miwíwadaytamiñ. Jemum cuyaj.

Jém carta jém ijáyayñewiip Pablo jém Tito

Jém Pablo ijáyáy Tito

¹ Ich aPablo, anꝓuyoxap Dios. Ich acutsat Jesucristo juuts tum apóstol. Dios acupiñ iga anyoxpádiñ jém Dios ipixiñtam jém icupiñneyajwiip Dios. Acutsat iga ananquejayyajiñ jém numapic anꝓuímayooyi iga ijodónayajiñ jutpic ijsyaypa Dios, ² iga tananjócpa jém vida jém dapic cuyajpa. Porque Dios tajycámayñe dende wiñigam, antes que wattap yíp nas. Tanjodon iga Dios da migóypa. ³ Siip núcum jém tiempo iga tacjodónap jém wibic anꝓati. Accámta juuts tum jém Dios inꝓatciwiñ iga ananmadiñ jém wibic anꝓati juuts apimiyñe Dios jém taciaputpáppic. ⁴ Siip miTito, manjáyáypa juuts tum mammanic porque tanaitta tumti fe. Siip tanJatun Dios y tánQmi Jesucristo, jém taciaputpáppic, miyoxpátpa iga wiñiñ inwat juuts je ixunpa, michiitámiñ jém paz iga odoy ti inꝓiñiñ.

Yoxap jém Tito jém isla de Creta

⁵ Mantsac jém lugar Creta iga iniccupaguiñ titam itogóyáy jém Dios iyoxacuy, iga iniccámiñ tum cobacpic anjagooyi cada atebet iga injaguiñ jém Dios ipixiñtam juuts mannímayñe. ⁶ Cupiñi tum pxiñ jém dapic imalwatpa, jém iniitwiip no más tum iyomo. Wi iga jém imanictam icupicyajpatim Dios. Da wi siiga imalwatyajpa. Da wi siiga da cupigóypa. ⁷ Jém injacpáppic Dios ipixiñtam, da wi iga imalwatpa ni uxan porque iwatpa cuenta jém Dios iyoxacuy. Da wi jém pxiñ jém dapic iwianjam iga tanjixianchiíypa. Da wi iga tsam jóytero, da wi iga tsam ucpa. Da wi iga tsam cótsóypa. Datim wi iga tsam icusúnyypa tumiñ jém dapic imiichi. ⁸ Wi iga icwíguiñ jém miñyajpáppic juumi y ichiiba jut monpa. Wi iga itóyiñ jém wítampic cosa, iga jixiíyiñ jém pxiñ. Wi tum pxiñ jém ichacnewiip jém malopic ijixi, iga wiñiñ iwat itumpiy cosa juuts ixunpa Dios. Wi iga nawattaiñ cuenta iyaac iga odoy imalwadiñ. ⁹ Wi tum pxiñ jém dapic ichacpa jém wibic anꝓuímayooyi jém anquejayñetawiip. Jesic wiap icamamwadáy ianama jém itiwitam con jém wibic anꝓuímayooyi. Wiaptim injiyjac jém anayajpáppic contra jém Dios inꝓati iga ichacyajiñ jém miñooyi.

¹⁰ Ityaj jáyan jém ijóyixyajpáppic jém Dios inꝓati. Tsam imigóyayyajpa jém itiwitam con jém malopic inꝓuímayooyi. Jém icupicneyajwiip idic jém judíos inꝓuímayooyi agui iwianjamayaj jexpic miñooyi. ¹¹ Jeeyaj wi iga tananúgáypa ijip porque ictogoyáypa jém wibic ijixi jém Dios ipixiñtam. Inquejáypa jém da wibic anꝓuímayooyi iga imalcoñwiypa jém tumiñ.

¹² Tum profeta de jeeyaj nimpa iga: “Agui migoyyajpa jém Cretapic pxiñtam. Tsam bruto, tsam malo ijixi. Agui wicyajpa. Agui cutiñ, da yoxayajpa.” ¹³ Numa, da migóypa jém pxiñ. Jeeyucmi wi iga pimi tananꝓuímyajiñ iga iwicupiguiñ jém Dios inꝓati. ¹⁴ Pimi anꝓuímyaji iga odoy iwadayyajiñ caso jém miñooyi jém ijixquímnewiip jém judíos. Anꝓuímyaji iga ichacyajiñ jém anꝓuímayooyi jém iwatneyajwiip jém pxiñtam jém ijóyixyajpáppic jém numapic anꝓati.

¹⁵ Siiga Dios iwítsagáypa ijixi tum pxiñ, jesic ijispa iga itumpiy cosa wi. Pero jém dapic wítsagayñeta ijixi, jém dapic icupicpa Dios, ijispa iga itumpiy cosa malo. Da wibic jixi iniit ijixianjom, da wítsagayñeta jém ijixi. ¹⁶ Jeeyaj nımyajpa iga iixpicaypa Dios, pero quejpa iga migóypa porque da iwıwatyajpa juuts ixunpa Dios. Da icupicyajpa jém Dios inꝓuímayooyi. Tsam jóyixoyyajpa. Da iwatyajpa ni uxan juuts ixunpa Dios. Da wiap iwat ni tum wibic yoxacuy.

2

Jém wibic anquejayooyi

¹ Pero mich miTito, wianqueji jém wibic anquímayooyi. ² Nímaayi jém tsamitampic iga: “Dios ixunpa iga cucacneñ inñixi, iga mijixiytámiñ. Wíwattaami iga miwixyajiñ jém inñiwitam. Seguido cupici jém tánomi Jesús, toyi jém tantiwitam, yaachiyi cuando miyaachwattap.” ³ Jempictim anquejaayi jém tsamipic yomtám, nímaayi iga: “Dios ixunpa iga inwattámiñ juuts jém wibic yomtám jém dapic táncáiy. Odoy cujiyi jém inñiwitam. Da wí siiga tsám miuctámpa. Jesic michiytámpa juuts wibic ejemplo.” ⁴ Anquejayyaji jém mañyomtám iga itóyiñ jém iwídaya con imanictám. ⁵ Wí iga jixiyiñ jém mañyomtám, iga iwatyajiñ juuts jém wítampic yomtám, iga iwatyajiñ cuenta jém itic, iga iwínanigáyiñ i quej y iga icupiguiñ jém iwídaya iga odoy i imalnímáyiñ jém Dios inñi.

⁶ Jempictim anquiimi jém woñjaychixtam iga jixiyiñ. ⁷ Pero miTito, siempre wati juuts ixunpa Dios. Cuando miixyajpa jém impixiñtam iga inwíwatpa, jesic jempictim iwatyajpa mex jeeyaj. Siip wianquejaayi con itumpiy inñixi iga miwixyajiñ jém inçuyujcwiñ. ⁸ Siempre wianmati jém wibic anmati iga odoy i miñímáyiñ iga inñimatpa migooyi. Jesic jém nicyajpáppic en contra de taichtám agui tsaap. Da wíap tamalnímáy.

⁹ Anquiimi jém esclavoyaj, nímaayi: “Cupictaami jém inñomi. Siempre wattaami juuts mipimíyypa iga miwixiñ. Odoy anjibaccuumi. ¹⁰ Odoy cunúmaayi jém inñomi, pero siempre wíwattaami jém inñoxacuy iga jém inñomi miniidáyiñ confianza, jesic wíixtap jém Dios inquímayooyi, jém taciaputpaap.”

¹¹ Dios tanquejayñe iga tayaachanjámpa tantumpiytam. Siip iciacputyajtooba itumpiy jém pixiñtam jutinquej yíp naxyucmi. ¹² Cuando tánixpa iga tayaachanjámpa Dios, jesic tantsacpa itumpiy jém jixi jém dapic iwíanjám Dios. Tantsacpatim iga tançusúníyypa jém malopic cosa juuts icusúníyypa jém ityajwíp yíp naxyucmi. Dios ixunpa iga tajixiyiñ, iga tatsiytámpa juuts wibic pixiñtam, iga siempre tanwattámpa yíp naxyucmi juuts ixunpa Dios. ¹³ Siip agui tamaymay iganam tananjóctámpa iga miñgacpa yíp naxyucmi jém más mijpic Dios ipimi, jém Jesucristo jém taciaputpáppic. ¹⁴ Iyaac nachitá iga accatá iga tacupujpa de itumpiy cosa dapic wí. Tacujicháyáy tánanama iga tatsiytámiñ wíbigam tapixiñtam, jém Cristopic tamichitam. Jeeyucmi agui tanwíanjám iga tanwíwatpa.

¹⁵ MiTito, anquejaayi jém impixiñtam yíp wítampic cosa. Anquímajyi, wogayyaji jém dapicnam iwícupicyajpa juuts tum minjagooyi. Odoy jüci iga i mijóyixiñ.

3

Ti wíap iwatyaj jém icupicnewíp Dios

¹ Acjisi jém impixiñtam iga icupicyajiñ jém gobierno y jém anjagooyiyaj, iga iwatyajiñ juuts ipimíyypa, iga ityajiñ listo iga iwatyajpa itumpiy jém wítampic cosa. ² Nímaayitim iga odoy i imalnímáyiñ, iga odoy anayajiñ. Wí iga iwíixiñ i quej, iga iwínanigáyiñ itumpiy jém pixiñtam juuts tum pixiñ dapic malo.

³ Wiñic taichtám da idic tajixiyta. Da idic tançupictámpa Dios. Tatsiyñeta idic juuts esclavo de itumpiy jém malopic jixi porque tatogoyñeta idic. Tsám idic tançusúníyypa itumpiy jém malopic cosa. Tsám idic tammalwatpa y tsám tacunaíyóyypa. Tsám tanajóyixtamtap idic. ⁴ Pero jém tanjatun Dios, jém taciaputpáppic, tanquejáy iga tsám tayaachanjámpa. Tanquejáyitim iga tsám itoypa itumpiy jém pixiñtam. ⁵ Jesic Dios taciaputta, pero da porque tsám tanwíwattámpa, pero taciaputta porque tsám

tayaachanjampa. Tacujicháyáypa tánanama, tanayxetum cuando tacjoomaset por medio de jém Dios iAnama. ⁶ Dios tachi iAnama tsam jáyan por medio de Jesucristo jém taciaputpaap. ⁷ Dios tsam tayaachanjampa, jeeyucmi tatsíyum juuts tum wibic pxiñ, cuáyñewiip ianama. Siip tananjóctámpa iga tampictsonpa jém vida eterna juuts tum herencia.

⁸ Yibam jém numapic anmati. Wiunquejaayi con itumpiy impimi jém icupicneyajwip Dios iga seguido iwíwatyajpa. Yip anmati tsam wi, tsam tayoxpátpa tantumpiytam.

⁹ Odoy tigiyuumi cuando áñayajpa jém cuixipic pxiñtam ni con jém iwatyajpáppic jém lista de jém wiñicpic itiwitam, jém caaneyajwíppigam. Datim wi iga iníñacaaba jém wiñicpic anquímayooyi. Porque jexpic cosa da ti cuwatcuy, da tayoxpátpa.

¹⁰ Siiga tum pxiñ icujíñáypa jém Dios ipxiñtam iga nawécyajtaiñ, jesic anjijajaci tunçiy hasta wisciy. Pero siiga da miwadáy caso, jesic quebacputi de mimichtámanjom.

¹¹ Tanjodon iga jexpic pxiñ togoyñe iiti, tsam táñcaíy. Con jeetim itánca nachiiatap castigo.

Jém Pablo iixtooba jém Tito

¹² Siip miTito, cuando mañcutsadáy jém Artemas o jém Tíquico, jesic siiga miwiap, nigí ameetsi jém attebet Nicápolis. Porque ich anjisne iga jemum apoychíypa jém tiempo de succuc. ¹³ Cuando nicyajpa jém licenciado jém Zenas, con jém icompañero, Apolos, jesic yoxpaati con itumpiy titam miwiap iga odoy ti itógoyayyajiñ. ¹⁴ Wi iga jém tantiwitam icuyujcaiñ iga seguido wiyoxaiñ, jesic iniitpa titam itogóyáy iga wiaptim iyoxpádóy. Jesic da xaja ityaj.

Anquímuyajtap jém Tito con iamigoyaj

¹⁵ Itumpiy jém anwaganaitwip yim micutsadáypa watidios. Dioschijaji jém tánamigoyaj jem ic jut miit, jém icupicneyajwip Jesús. Tanjatun Dios miwíwadaytámiñ iñtumpiytam. Jemum cuyaj.

Jém carta jém ijáyayñewiip Pablo jém Filemón

Jém Pablo ijáyaypa jém Filemón

¹ Ich aPablo, apajnetā jém Jesucristo icuyucmi, con jém tantīwi, jém Timoteo, siip manjáyaytámpa miFilemón, mantoytampáppic, jém tanwaganayoxapaap. ² Anjáyaypatim jém tantīwi, Apia, con jém tancompañero jém Arquipo con itumpiy jém Dios ipixiñtam, jém an̄tuumayajpaap mich iñticciim. ³ Siip tanJatun̄ Dios con jém tánQmi Jesucristo miwīwadaytamiñ, michiitamiñ jém wibic paz iga odoy micijntamiñ.

Jém Filemón tsam tóyóypa, tsam icupicpa jém Jesucristo

⁴ Siempre anchiiba gracia tanJatun̄ Dios cuando manjīspa mimich iganam an̄watpa oración. ⁵ Porque ammaton̄ne iga tsam iñtoypa jém tánQmi Jesús y tsam in̄wicupicne. Ammaton̄netim iga agui iñtoypa itumpiy jém icupicneyajwīp Dios. ⁶ An̄wagáypa Dios iga seguido in̄iquejáypa jém icupicneyajwīp Dios juuts mich in̄cupicne iga wīaiñ icutiyyiyaj itumpiy jém wibic cosa, jém tachiiñewiip tánQmi Cristo. ⁷ Ich tsam amaymay, da anyácpa, porque mich tsam iñtoypa jém tantīwitam. Siip mantīwi, mimich in̄cuyucmi jém Dios ipixiñtam icamamwatyaj ianama.

Jém Pablo iwácpa tum favor para jém Onésimo

⁸ Jeeyucmi, aunque anait derecho iga mampimíypa jém Cristo iñiyimi iga ti wīap in̄wat, ⁹ más wī iga man̄cunucsáypa iga in̄wadiñ juuts ich ansunpa porque agui mantoypa. Ich aPablo, ich awid̄ayam, siip apajnetā jém Jesucristo icuyucmi. ¹⁰ Siip man̄cunucsáypa iga in̄wipictson̄iñ jém immozo Onésimo cuando núcgcacpa iñticciim porque tsíy juuts tum ammanic, porque yim̄ jut apajnetā, moj icupic jém tánQmi.

¹¹ Wiñic yip̄ Onésimo tum esclavo da para ti wī para mimich. Pero siip wī para mimich y wī para aich. ¹² Siip man̄cutsadáypa eybic, jesic pictson̄i juutstim aich ampictson̄pa. ¹³ Ich ansunpa idic iga tsíyñ jém Onésimo con aich iga ayoxpádiñ juutstim mimich iganam apajnetā jém wibic an̄mati icuyucmi. ¹⁴ Pero da ti wīap an̄wat siiga da in̄wianjam. Siiga an̄wīwadáypa, da mampimíypa. Wati juuts mich iñxunpa. ¹⁵ Ich an̄impa iga michagan̄putne idic tum tiempo jém Onésimo iga impictson̄pa eybic iga wīaiñ in̄waganait para siempre. ¹⁶ Dam juuts tum esclavo, pero más que juuts tum esclavo, juuts tum iñtīwi jém tsampic iñtoypa. Ich antoypa, pero mimich tienes que más iñtoypa porque siip miwīcuyoxap y tsíytim juuts tum iñtīwi porque icupicpatim jém tánQmi.

¹⁷ Siiga tacompañero, jesic wipictson̄i jém Onésimo juutstim aich mismo. ¹⁸ Siiga mimalwadayñe o siiga mijatsne, jesic ich atseeci, manyojáypa. ¹⁹ Ich aPablo manjáyaypa an̄ciimi así: Ich manyojpa. Pero jisi iga mich mismo anjatsnetim iñyaac. ²⁰ Numa, mantīwi, ayoxpaati porque in̄cupicpa jém tánQmi. Acmaymáajī iga odoy anyáguiñ án̄anamanjom̄ porque Cristo tamichitam.

²¹ Manjáyaypa porque ich anjodon̄ iga mich an̄cupicpa. Anjodon̄tim iga más in̄watpa que juuts mannímáypa. ²² Man̄wágáypatim iga awītsagaayi tum lugar jut anúcpa. Porque anjīspa iga Dios mimatón̄áypa iñoración iga acutsigaytāñ iga eybic nicpa manjójay.

Anquímtap jém Filemón con jém itīwītam

²³ Micutsadáypa watidios jém Epafra, awagapajnetatim iga icupicpa Jesucristo. ²⁴ Micutsadáypatim watidios jém Marcos, jém Aristarco, jém Demas y jém Lucas, jém an̄waganayoxayajpaap.

²⁵ Siip jém tánomi Jesucristo miwawadaytamiñ mimichtam íñanamanjom. Jenum cuyaj.

Jém carta jém jayñeta_wip jém hebreopic pixiñtam

Dios icutsat jém iMānic yíp naxyucmi iga inmadíñ

¹ Wiñgam Dios ijíyáy watciy jém tanjatun_wewetam. Varios forma ijíyáy. Chiita jixi jém wiñicpic anmatciwiñ iga inmadayyajiñ jém Dios ipixiñtam. ² Pero sip yíp ocni_pic tiempo Dios icutsat iMānic iga tanmadáyiñ. Yíptim Dios iMānic cupiñta iga imichap itumpiy jém Dios imichi. Jeetim iMānic iwaganayoxa Dios cuando mu iwatyaj itumpiy cosa jém itwip yíp naxyucmi y jém itwip siñyucmi. ³ Agui pimi witsocpa jém Dios iMānic juustim jém tanjatun Dios. Jextim ipimi. Jeetim mismo icuwiñ juuts jém tanjatun Dios. Yíptim Dios iMānic iniit icijom itumpiy jém Dios iwati iga iwatpa cuenta con Dios inmati jém iniitwip ipimi. Jesic cuando yaj tacujicháyáy jém tantánca, nic coñi siñyucmi jém tanjatun Dios itrono inwicimi.

Jém Dios iMānic más mij que jém siñyucmic pic pixiñ

⁴ Accám_ta jém Dios iMānic juuts tum más mijpic anjagooyi que jém siñyucmic pic pixiñtam. Ipicsonne jeetim i_jatunpic iníy_i y jém i_jatun ipimi, jeeyucmi más wip que jém siñyucmic pic pixiñtam. ⁵ Porque Dios da nunca inímáy ni tum siñyucmic pic pixiñ:

Mich mamMānic. Yíp jama mammanigap.

Datim inímáy Dios tum siñyucmic pic pixiñ:

Mich anjatun, ich mammanic.

⁶ Pero cuando Dios inimiñ yíp naxyucmi jém Wiñtipic iMānic, nimpa Dios:

W_i iga itumpiy jém siñyucmic pic pixiñtam ijisyajiñ jém Dios iMānic.

⁷ Dios inmatpa de jém siñyucmic pic pixiñtam cuando nim:

Dios icsetpa jém siñyucmic pic pixiñtam juuts sawa.

Icsetpa jém icuyoxayajpaap juuts tum jucti tsam pimi yótpa.

⁸ Pero Dios inmatpa de jém iMānic cuando nim:

Mich miDios. Mich minjagooyi.

Da nunca miputpa iga minjagooyi.

Inñuumanjacpa jém pixiñtam.

⁹ Tsam inñoypa jém wibic jixi.

Tsam inñoyixpa jém malopic jixi.

Jeeyucmi micupin Dios, mich inDios,

más micmaymáyp que itumpiy jém inwaganasiyajpaap.

¹⁰ N_imtim Dios:

Mich miQmi.

Mich inwat yíp mundo cuando moj iti itumpiy cosa.

Inwattim jém siñ con in_ci.

¹¹ Cuyajpa jém siñ y jém nas, pero mich da nunca micuyajpa.

Michiypa para siempre.

Widáyap jém siñ y jém nas juuts tum yooti.

¹² Impacspa jém siñ y jém nas juuts tum puctucu.

Incucacpa juuts yooti.

Pero mich da nunca micucacpa.

Ni da nunca micuyajpa.

¹³ Dios da nunca inímáy ni tum siñyucmic pic pixiñ juuts inímáy jém iMānic:

Coñi yim anawimi hasta que manacconwíypa jém inenemigoyaj.

14 Jém sinyucmipic pixiñtam tum anama. Icuyoḡayajpa Dios. Jeeyaj cutsatyajta iga iyoxpátayajñ jém pixiñtam jém ipictsonyajpáppic jém wibic anmati iga ciacputyajtap.

2

Wati cuenta iga da inñhacpa jém wibic anmati

1 Jeeyucmi wı iga más pimi tanwadaytámiñ caso jém wibic anmati jém tammatoḡnewiip iga odoy tantsactámiñ jém wibic tun. 2 Wiñigam jém sinyucmipic pixiñtam inimiñyay jém wiñicpic anquímayooyi. Tsam wiñuejpa iga da je miḡooyi. Jém imalwatneyajwıp, jém dapic icupicyaj, chiijajta castigo conforme juuts iwat. Siiga chiijajta castigo jém dapic icupicyaj jém wiñicpic anquímayooyi, 3 ¿jesic jutsap tançiput taichtam de jém miipic castigo siiga da tanwadap caso jém wibic anmati iga Dios wiap taciacput? Jém tánomi Jesucristo oy yıp naxyucmi iga inmadáy jém pixiñtam jém wibic anmati. Jesic ocmi jém imatoḡneyajwıp jém wibic anmati tanmadáypatim taichtam iga da je miḡooyi. 4 Dios inquejáytim jém pixiñtam iga numa jém inmati con wati jém milagro, jém seña y jém cosa dapic oypa tánix. Jém pixiñtam chiijajtatim jém Dios iAnama ianamanjom iga wıaiñ iwatyaj juuts ixunpa Dios. Cada tumtum chiitap tungac yoxacuy juuts iwıanjam Dios.

Jesucristo wiap iyoxpát jém ipixiñtam

5 Dios da iccámpajém sinyucmipic pixiñtam juuts anjagooyiyaj iga injacpa jém jomipic naxyucmi jém miñpáppic, jém siipaap mananmadáy. 6 It jut jaycámneta, nimpa:

ManJatun Dios, ¿tiapaap jém pixiñ iga tsam inñispa?

¿Tiiga tsam inyoxpátpa jém nayñewıp yıp naxyucmi?

7 Inñhac jém nayñewıp yıp naxyucmi juuts da ti wiap, más quetne jém ipimi que jém sinyucmipic pixiñtam.

Pero ocmi jém nayñewıp yıp naxyucmi chiitap autoridad juuts tum miipic anjagooyi iga injacpa itumpiy cosa jém michpic inwatne.

8 Cıijunodayñeta itumpiy cosa iga injacpa.

Cuando Dios ichac iga injacpa itumpiy cosa, da i ni tum cosa jém dapic injacpa. Pero siip danam quejpa iga injacpa itumpiy cosa. 9 Jém Jesucristo tsıy tum rato juuts tum pixiñ da ti wiap. Más da wiap que jém sinyucmipic pixiñtam. Pero siip tánixpa iga jém tánomi Jesucristo accámta juuts tum miipic anjagooyi, tsam cuıjıtap porque tsam yaachwattá cuando accaata cunusyucmi. Agui tatoytámpa Dios, jeeyucmi ijíc iga accaata jém Jesucristo para itumpiy jém pixiñtam.

10 Itumpiy cosa jém itwıp jém Dios imıchi, je iwati. Ixunpa Dios iga jém imanictam iwaganaityajıñtim jut wıcom, jut it Dios. Jeeyucmi ijíc iga tsam yaachwadayta jém tumpic imanıc iga wıaiñ iciacput jém pixiñtam. 11 Jém Jesucristo iJatun tanJatunım porque tawıtsagayta jém tantánca. Jeeyucmi jém Jesucristo da tsaap cuando tanımáypa iga: Mantıwıtam. 12 Yıımpic nim jém Jesucristo:

ManJatun Dios, ananmadáypa jém antıwıtam juutspic miDios.

Manwánáypa jém himno jut antuumayajpa jém imanictam.

13 Nımtim jém Cristo:

Ich tsam ancupıcpa iga Dios wiap ayoxpát.

Eybıctim nimpa:

Yım anwaganaita jém ammanictam, manJatun Dios, jém anchiiñewıp.

14 Tum pixiñ imanictam jextim imayı y jextim inñipiñ. Jesanetim jém Jesucristo, jextim inñipiñ y jextim imayı juuts taichtam. Jeeyucmi miñ juuts taichtam iga wıaiñ ica. Jempıgam iccuyajáy jém Wocçıwiñ ipimi jém wiapaap tacca. 15 Jempıgam iwat

iga wíaiñ iciacputyaj jém pìxiñtam jém icìnyajpáppic iga caaba, porque itumpiy ivida tsíyñeyaj idic juuts esclavo. ¹⁶ Porque da oy yíp naxyucmi jém Jesucristo iga iyoxpátpa jém siñyucmipic pìxiñtam, pero oy iga iyoxpátpa jém Abraham imanictam, jém Israelpic pìxiñtam. ¹⁷ Jeeyucmi tsíy jém Jesucristo juuts jém itiwitam, yíp naxyucmipic pìxiñtam, iga wíaiñ iwat jém cobacpic panij iyoxacuy jém Dios iwiñjom. Jém Jesucristo tum panij jém tsampic tayaachanjampa y wíap iccupac titam tajycámayñe. Iccáyápa jém pìxiñtam itánca iga ipicstóniñ Dios. ¹⁸ Tsam yaachwatta yíp naxyucmi jém tánomi Jesucristo, tsam cutítsta, jeeyucmi wíap tayoxpátta cuando tacutítstamtap.

3

Más mijpic carga chiita Jesucristo que jém Moisés

¹ Jesic mantiwitam, jém cuáyñewip íñanama, micupineta iga michíytámpa juuts Dios mimichitam. Sip jistaami jém tánomi Jesucristo, jém icutsatnewip Dios, jém cobacpic panij de jém wibic anquímayooyi, jém tancupicpáppic. ² Cuando oy íti yíp naxyucmi iccupac itumpiy cosa juuts ixunpa Dios, jém iccámnewip iga iwatpa jém Dios iyoxacuy. Jextim iwat juuts jém Moisés cuando iccupac juuts ixunpa Dios icuwiti jém Dios iticcim. ³ Mástim pími cujíptap Jesús que jém Moisés, juuts jém iwatpáppic tum tic más cujíptap que jém tic jém watnetawip. ⁴ Porque itumpiy ticyaj pìxiñ iwati, pero Dios iwat itumpiy jém ityajwip. ⁵ Numa jém Moisés iccupac itumpiy cosa juuts ixunpa Dios. Icuyoxa Dios juuts tum mozo icuwiti jém Dios iticcim. Jém Moisés iyoxacuy iga inmatpa jém anmati jém ocmipic inmatpa parejo jém Cristo. ⁶ Pero jém Jesucristo, jém Dios iManic, imichi jém tic. Taichtam jém tatic. Tsam tamaymay siiga seguido tancupicpa y da tantsacpa iga tananjócpa titam tajycámayñe Dios.

Jejaypa jém Dios ipixiñtam

⁷ Jeeyucmi juuts nimpa jém Dios íñanama:
Siiga yíp jama immatonpa Dios ijíyi,
⁸ Odoy camamwati íñanama.
Odoy jistaami iga da incupictámpa juuts iwatyaj jém wiñicpic pìxiñtam cuando tsucumyaj
acontra de jém Moisés jém titsinaxyucmi.
Tsam icutitsyaj Dios siiga numa ichiiba castigo.
⁹ Jemic jém wiñicpic injatunwewetam tsam acutitsyajpa, nimpa Dios.
Cuarenta amtíy iixyaj jém wibic milagro jém anwadayñewip.
¹⁰ Jeeyucmi anjójix jeeyaj, jém ityajwip jesan tiempo.
Siempre jixitogoyyaj íñamanjom, da nunca iixpicyaj jém antun.
¹¹ Jeeyucmi anjójixyaj jeeyaj y anjycámáy iga da nunca tigiyyajpa jut wicom jut jejaypa
con aich.
¹² Mantiwitam, nawattamtaji cuenta iga ni tum de mimichtam odoy iniidiñ
jém malopic jixi íñanamanjom jém mictsacpáppic iga incupicpa Dios jém vivopic.
¹³ Nanquímtamtaji con jém inñiwitam cada jama iganam it tiempo iga odoy mimigóyayiñ
jém tánca jém itwip íñanamanjom iga ni tum de mimichtam odoy michiyiñ juuts ene-
migo con Dios. ¹⁴ Siiga seguido tancupicpa iga Dios wíap tayoxpát hasta jém inanjigam
jama juuts cuando moj tancupic, jesic tanjodon iga tanwaganaít jém Cristo.
¹⁵ Jistaami junimpa jém Dios inmati:
Siiga yíp jama immatonpa jém Dios ijíyi,
odoy camamwati íñanama.
Odoy jistaami iga da incupictámpa,
juuts iwatyaj jém wiñicpic pìxiñtam cuando tsucumyaj
acontra de jém Moisés.

¹⁶ ¿Lapaap jém p̄ixiñtam jém imatonneyajw̄ip jém Dios in̄māti, pero oc̄mi tsucumyaj acontra de jém Moisés? Jeetim p̄ixiñtam jém itopneyajw̄ip jém Moisés jém naxyuc̄mi de Egipto. ¹⁷ ¿Lapaap jém p̄ixiñtam jém tsamp̄ic ijóyix Dios cuarenta am̄tiy? Jém tsamp̄ic imalwatyaj, jém caayajw̄ip jém titsinaxyuc̄mi. ¹⁸ ¿Lapaap ij̄ycámayñe Dios iga da nunca tiḡiyajpa jém w̄icom̄ j̄ut jeyyajpa con je? Jém dap̄ic icup̄icyajpa. ¹⁹ Jesic tánixpa iga jém wiñ̄ic̄p̄ic p̄ixiñtam da w̄iā mitiḡiyaj jém w̄icom̄ j̄ut jeyyajpa jém Dios ip̄ixiñtam porque da icup̄icyaj iga Dios w̄iap̄ iyoxp̄at.

4

¹ Dios taj̄ycámayñe iga it̄um lugar j̄ut nic̄pa tajeji con je. Jesic iganam tanait̄ jém promesa, w̄ī iga tanawattamt̄iñ cuenta iga w̄iāiñ̄ iñ̄tiḡiyta jém w̄icom̄ j̄ut jeyyajpa jém Dios ip̄ixiñtam. W̄ip̄ algunos de mimichtam da mitiḡiyt̄ampa. ² Porque taichtam tan̄madayt̄amt̄im̄ jém w̄ib̄ic̄ an̄māti iga Dios taciacputpa juuts an̄madayyajt̄a jém wiñ̄ic̄p̄ic p̄ixiñtam. Pero jeeyaj ixajamaton̄yaj, da iyoxp̄atyaj jém w̄ib̄ic̄ an̄māti porque da icup̄icyaj cuando imaton̄yaj. ³ Pero taichtam w̄iap̄ tantiḡiy j̄ut jeyyajpa jém Dios ip̄ixiñtam porque tan̄cup̄ic̄ ti tanímáy Dios. Jém dap̄ic icup̄ic̄pa da w̄iap̄ itiḡiyaj. N̄impa Dios: Tsam̄ p̄imī ajóyñe jeeyuc̄mi an̄j̄ycámáy jém p̄ixiñtam jém dap̄ic̄ acup̄icyajpa iga da nunca tiḡiyajpa j̄ut jeyyajpa.

Da ij̄ic̄pa Dios aun̄que cupacneum jém lugar dende moj̄ it̄i ȳip̄ mundo. ⁴ It̄ j̄ut n̄impa jém Dios in̄māti:

Jeypa Dios jém sietep̄ic̄ jama cuando cupacneum it̄ump̄iy jém iyoxacuy.

⁵ Eybictim̄ n̄impa jém Dios in̄māti:

Da nunca tiḡiyajpa j̄ut jeyyajpa con aich.

⁶ Pero tiḡiypanam algunos j̄ut jeyyajpa. Pero jém wiñ̄ic̄p̄ic̄ p̄ixiñtam, jém moiw̄ip̄ imaton̄yaj jém w̄ib̄ic̄ an̄māti, da tiḡiyajpa porque da icup̄icyaj. ⁷ Jesic̄ eyb̄ic̄ icup̄in̄ Dios tum̄ jama cuando jém p̄ixiñtam w̄iap̄ itiḡiyaj j̄ut jeyyajpa. Sīp̄ núcneum jém jama. N̄impa así jém David:

Ȳip̄ jama siiga immaton̄t̄ampa ti n̄impa Dios, odoy camamw̄atī iñ̄anama.

⁸ Meega jém Josué w̄iā mu ininicyaj jém Israelp̄ic̄ p̄ixiñtam j̄ut jeyyajpa, jesic̄ da eyb̄ic̄ n̄impa Dios iga miñ̄pa tun̄gac̄ jama. ⁹ Tan̄jodon̄ iga ts̄yñam̄ j̄ut jeyyajpa jém Dios ip̄ixiñtam. ¹⁰ Porque cuando tiḡiypana tum̄ p̄ixiñ j̄ut jeyyajpa jém Dios ip̄ixiñtam, jesic̄ quejpa iga yajum̄ iwat̄ jém iyoxacuy jesanetim̄ juuts Dios jeypa cuando yaj iwat̄ jém iyoxacuy cuando iwat̄ ȳip̄ mundo. ¹¹ Jesic̄ w̄ī iga tan̄watt̄ampa empeño iga tatiḡiyt̄ampa j̄ut jeyyajpa jém Dios ip̄ixiñtam. W̄ip̄ iwatyajpa algunos juuts iwatyaj jém p̄ixiñtam jém dap̄ic̄ icup̄icyaj titam̄ iñ̄imáy Dios.

¹² Jém Dios in̄māti vivo y tsam̄ iniit̄ ip̄imi. Tsam̄ tsupa, más que jém espada jém icudosladop̄ic̄ an̄mejne. Jém Dios in̄māti tiḡiypana hasta más jojm̄i jém p̄ixiñ̄ ianaman̄jom̄ y ij̄ixian̄jom̄. Tiḡiypana hasta jém p̄ixiñ̄ ipactopaan̄jom̄ hasta jém pac̄ ituupaan̄jom̄. Tan̄quej̄aypa siiga w̄ī jém tan̄j̄ixi o da w̄ī. ¹³ Dā j̄ ni tum̄ cosa an̄nécne jém iwat̄new̄ip̄ Dios, je w̄iap̄ iix. Cuchichayñetā it̄ump̄iy cosa, ánȳñe iga w̄iap̄ iix Dios. It̄ump̄iy ij̄odon̄ Dios titam̄ tan̄watpa, tienes que c̄ip̄int̄ap.

Jesús jém más m̄ij̄p̄ic̄ cobac̄p̄ic̄ pan̄ij

¹⁴ Taich̄ tanait̄ta tum̄ cobac̄p̄ic̄ pan̄ij jém más m̄ij̄p̄ic̄, je jém Jesús jém Dios iMan̄ic̄. Nic̄ s̄inyuc̄mi jém Dios iwiñ̄jom̄ iga tacupujpa. Jeeyuc̄mi w̄ī iga da tantsac̄pa iga tan̄cup̄ic̄pa juuts tanním̄ayñe. ¹⁵ Porque tanait̄ta tum̄ cobac̄p̄ic̄ pan̄ij tsam̄ tayaachanj̄ampa cuando danam̄ w̄iap̄ tan̄wat̄ it̄ump̄iy juuts ixunpa Dios, porque tsam̄ yaachā, tsam̄ p̄imī cut̄it̄stā jextim̄ juuts taichtam, pero je da nunca tan̄cawat. ¹⁶ Jeeyuc̄mi tan̄cunúct̄ampa sin̄ c̄in̄i j̄ut

coñ jém tanJatun Dios, jém tsampic tatoypa. Je tsam tayaachanjampa taichtam porque agui tawixpa y wiap tayoxpát juchixquej.

5

¹ Itumpiy jém cobacpic panij cupinneyajta yíp naxyucmi, accámnetā iga ichiiba Dios jém ofrenda y jém sacrificio para jém pixiñtam itánca. ² Wiap iyaachanjām jém dapic jixiyyaj, jém togoyñeyajwip, wiaptim icutin. Ijampatim cuando cutitstap. ³ Y como táncaiytim jém panij, iccaaba jém animat iga iyojpa jém itánca, jempictim iwatpa para jém pixiñtam iga iyojāpa jém itánca jém Dios iwiñjom.

⁴ Da j wiap iniccámta iyaac iga panij. Solamente Dios wiap iccám iga panij, juuts iccám jém Aarón. ⁵ Jesanetim jém Cristo. Da naccámta iyaac iga jém cobacpic panij, pero Dios iccám. Nímayta:

Mimich mammanic. Yíp jama mammanigap.

⁶ Juuts nimpā jém tungac añeymi, jut jayñeta:

Mich mipanij para itumpiy tiempo.

Da nunca miputpa.

Mijextim juuts jém wiñicpic panij jém Melquisedec.

⁷ Cuando jáy iti yíp naxyucmi jém Jesucristo, tsam inwejpátpa Dios, iwágáypa iga iyaachanjaamiñ. Pimi jypa, agui wejpa cuando iwágáypa jém wiapaap iciacput cuando accaatap. Matónayta jém Cristo porque iccupacpa juuts iñimayñe Dios. ⁸ Mex iga jém Dios iManic, inyuj iga iyaachíypa cuando yaachwattap iga más wiap iwat itumpiy cosa juuts ixunpa Dios. ⁹ Jesic yajum iwat jém Cristo itumpiy juuts ixunpa Dios, jesic wiap iciacputyaj itumpiy jém pixiñtam jém icupicneyajwip. ¹⁰ Dios iccám jém Jesucristo iga cobacpic panij juuts jém Melquisedec.

Acjodónqata iga odoy ichaguiñ jém Dios inmatí

¹¹ Tsam jáyan cosa manañmadaytamtooba de jém Cristo, pero tsam tánca manañmadáy porque mimichtam agui tánca incutiñiyta. ¹² Wiñigam moj incuyujcata jém Dios inmatí. Wiabam idic iga michiyta juuts maestro. Pero sip eybic iñxunpa iga minquejaytaiñ jém añquímayooyi dapic tánca. Como eybic incuyujcatooba jém Dios inquímayooyi dapic tánca, mijex juuts tum tsixi jém iucpáppic leche, jém dapic wiap icút wíccuy. ¹³ Jém iucpáppic leche tum tsixi, jex juuts jém dapic icutiñiyta jém wibic anmatí. ¹⁴ Pero jém wíccuy para jém tsamipic, jém wiapaap icutiñiyta jém añquímayooyi, wiap icipin jup jém wibic y jup jém malopic.

6

¹ Jempigam tanwattámpa hasta tanúcpa juuts tum pixiñ jixiyywip. Da eybic tançuyujcasētpa jém Cristo inquímayooyi jém mojjwip tançuyujca. Da tanatsucumsetpa eybic jém base. Da eybic tançuyujcaaba jutsap tantsac jém wiñicpic costumbre jém taccaapáppic, porque tantsacneum. Da eybic tançuyujcaaba jutsap tançupic Dios porque tançupicneum. ² Da eybic tançuyujcasētpa jutsap icchintā jém Dios ipixiñtam, ni jém costumbre cuando jém pastor ichiccunúc ici jém icobacyucmi jém icupicnewip Cristo, ni jutsap icpisayta jém caaneyajwip, ni jém añquímayooyi iga cipiñyajtāp jém pixiñtam y chiitap castigo jém dapic cuyajpa. ³ Jempigam tanwattámpa siiga Dios iwianjam.

⁴ Siiga tum pixiñ ipictson jém wibic juctiantsooca, y ixucneum iga agui wí jém wibic xaja, jém tachiñnewip Dios, y ipictsonneum jém Dios iAnama, ⁵ agui iwianjam jém Dios inmatí y iixñetim iga tsam wí jém Dios ipimi jém miñpáppic tachiiba. ⁶ Siiga eybic cutinpa jém pixiñ, da eybic wiap ichucum. Da eybic icucacpa jém ijixi. Porque jeeyaj iyaac sip

icunúñyaj cunusyucmi jém Dios iMānic, tsām ixaayiyajpa jém p̄ixiñtam iwiñjom, ⁷ jex juuts jém nas jém iucpáppic tuj. Siiga w̄iputpa jém ñipñibooyi, jesic w̄i para jém p̄ixiñtam jém iyoxacapaap y Dios ichi bendición jém nas. ⁸ Pero siiga chióypa jém ap̄ityaj y jém malop̄ic p̄im, da para ti w̄i. Ichiiba castigo Dios, ocmi nooquettap.

Siiga seguido tan̄cup̄icpa, da i w̄iap tactsac jém Dios in̄mat̄i

⁹ Pero mex iga manañmadáypa jemp̄ic, mant̄iw̄itam, mantoytampáppic, anjodon iga michtam iniitta jém más w̄ibic bendición, jém tachiiñew̄ip Dios cuando taciaputpa. ¹⁰ Porque num̄cip̄iñóypa jém tan̄jatun̄ Dios. Jeeyucmi da ijaaman̄notpa titam in̄watneta y iga hasta siip tsām iñyoxpáttampa jém in̄t̄iw̄itam jém icup̄icneyajw̄ip Cristo porque tsām in̄toytámpa Dios. ¹¹ Pero ansuntámpa iga cada tum̄tum de mimichtam seguido in̄w̄iwattámiñ con itump̄iy in̄anama hasta jém in̄añp̄igam jama hasta que iccupacpa Dios titam taj̄ycámayñe. ¹² Da ansunpa iga micutiñatámiñ, pero ansunpa iga in̄wattámiñ juuts jém p̄ixiñtam jém in̄jócyajpáppic titam ij̄ycámayñe Dios. Ip̄ictson̄yajpa porque seguido icup̄icyajpa iga Dios w̄iap iyoxpát. Iyaach̄iyajpa cuando da jobit cupacpa jém promesa.

¹³ Cuando Dios ij̄ycámayñe jém Abraham, in̄imáy: “Ich anyaac man̄j̄ycámáypa anniȳimi iga man̄w̄iwadáypa.” Da i tun̄gac más w̄iapaap, jeeyucmi n̄impa: “Ich anniȳimi.” ¹⁴ N̄impa Dios: “N̄uma, tsām p̄imi man̄w̄iwadáypa. Manchiiba tsām jáyan̄ in̄ocman̄ictam.” ¹⁵ Jém Abraham tsām iyaach̄iypa, in̄jócpa hasta que ip̄ictson̄pa titam ij̄ycámayñe Dios. ¹⁶ Cuando jém p̄ixiñtam ij̄ycám̄pa, n̄im̄yaj: W̄ijodios porque ijodon iga Dios más w̄iap que jeeyaj y w̄iap ichi castigo siiga da in̄uuman̄matpa. Siiga i ichacpa Dios juuts tum̄ testigo iga da migóypa, jesic da ti más w̄iap in̄im̄yaj. ¹⁷ Dios in̄quejáy jém p̄ixiñtam jém ip̄ictson̄yajpáppic jém herencia iga iccupacpa juuts ij̄ycámayñe y da nunca icucacpa ij̄xi. Jeeyucmi iyaac ij̄ycám̄ iga da migóypa. ¹⁸ It wisten cosa jém dap̄ic cucacpa, con jeam quejpa iga Dios da migóypa. Jeeyucmi tanaittámiñ tum̄ w̄ibic maymáyaaji iganam tanañjócpa iga Dios tayoxpátpa. ¹⁹ Ȳip esperanza ts̄iy juuts ancla para jém tanañnama, w̄icámne iga odoy tantsaguiñ jém Dios in̄mat̄i. Tayoxpátpa iga tanúc̄pa jém Dios iwiñjom, jém puctuctaañi iweñtan̄, jém sin̄yucm̄ip̄ic mast̄icjom, ²⁰ jut̄ t̄igiyñe jém Jesús por taichtam iga t̄añáyáy jém tun̄. Je ts̄iy juuts tum̄ pan̄ij jém dap̄ic nunca putpa, jextim juuts jém Melquisedec.

7

Jesús cobac̄pic pan̄ij jextim juuts jém Melquisedec

¹ Ȳip Melquisedec rey de jém attebet Salem, jém yucm̄ip̄ic Dios ip̄an̄ij. Oy jém Abraham iccucaayyaj jém tun̄gac p̄ixiñtam ireyyaj. Jesic cuando set jém Abraham, jém pan̄ij nic ichon̄ tunjom. In̄wejpát Dios para jém Abraham iga iw̄iwadáyñ. ² Cuando icoñw̄iy jém Abraham jut̄ oy añaj̄i, jesic itobáy jém reyyaj im̄chi. Jesic cuando ipát jém Melquisedec, ichi jém décima parte de itump̄iy jém itopnew̄ip. Jém Melquisedec in̄iyi n̄imtooba jém rey jém iw̄iwatpáppic. Ts̄iy juuts rey de Salem, taichtam tanañmat̄imi n̄imtooba jém ijacpáppic jém pleito. ³ Jém Melquisedec da jatun̄ȳi ni da aab̄iy. Datim i ijodon̄ jut̄ tsucum. Da i ijodon̄ juchix nay ni juchix caaba. Jex juuts jém Dios iMānic, da nunca putpa iga pan̄ij.

⁴ J̄istaami iga agui m̄ip̄ic cargo iniit jém Melquisedec. Porque jém tan̄jatun̄wewe jém Abraham ichi jém décima parte de itump̄iy jém itobayñew̄ip jém reyyaj. ⁵ Jém Israelp̄ic pan̄ijyaj, jém Leví iocman̄ictam, iniit jém an̄químayooyi iga ip̄ictson̄yajiñ jém décima parte de itump̄iy jém iniitw̄ip̄ic jém it̄iw̄itam, jém Israelp̄ic p̄ixiñtam. Jeeyaj ijatun̄wewet̄im jém Abraham. ⁶ Pero jém Melquisedec, mex iga da je jém Leví iocman̄ic, ip̄ictson̄ jém décima parte jém ichīw̄ip̄ic jém Abraham. Y ocmi in̄wejpát Dios iga iw̄iwadáy jém Abraham.

Jeetim Abraham jém iwadayñewiip Dios jém promesa. ⁷ Quejpa iga jém ichiipáppic bendición iniit más mijpic cargo que jém ipictsonpáppic jém bendición. ⁸ Yim entre mimichtam, jém ichécpáppic jém décima parte, p̄ixiñtim, caabatim. Pero jut ijaychacne jém Dios inmati, inmatpa de jém Melquisedec juuts tum p̄ixiñ dapic caaba. ⁹ Wiap tanim iga jém Leví con itumpiy iocmanictam, jém panijyaj, ichiijajtim jém Melquisedec jém décima parte jeeti rato cuando jém Abraham ichi jém décima parte. ¹⁰ Cuando jém Melquisedec nic ichon jém Abraham, jextim juuts jém Abraham iniit imijtayyucmi iocmanic jém Leví mex iga danam nayñe.

¹¹ Jém Levitapic panijyaj ichiijaj jém Moisés inquímayooyi jém nación de Israel. Levitapic p̄ixiñtim jém Aarón. Jesic meega jeeyaj wiap mu iwitsagayyaj jém p̄ixiñtam itañca, jém icupicneyajwip jém Moisés inquímayooyi, jesic da tansunpa iga miñpa tungac panij juuts jém Melquisedec y da jex juuts jém Aarón. ¹² Porque cuando cucacum jém panij, tienes que cucapatim jém anquímayooyi. ¹³ Cuando nimpa iga miñpa tungac panij, inmatpa de jém tánomi Jesucristo. Da je levitapic p̄ixiñ. Tungac grupo de jém Israelpic p̄ixiñtam tsucum, jém dapic queman i iccám juuts panij. ¹⁴ Porque tsam tanwijodon iga jém tánomi tsucum de jém tribu de Judá. Jém Moisés da inmat iga tsucumpa panijyaj de jém tribu.

¹⁵ Tsam wiquejpa iga jomipic panij porque jex juuts jém Melquisedec. ¹⁶ Nimpa jém Moisés inquímayooyi iga tsucumpa jém panijyaj de jém levitapic p̄ixiñtam. Pero yip jomipic panij da tsucum juuts nimpa jém anquímayooyi, pero accámta juuts panij porque iniit jém vida jém dapic cuyajpa. ¹⁷ Porque inmatpa así Dios de jém tánomi Jesucristo:

Mich tum mipanij, da nunca miputpa.

Mijex juuts jém Melquisedec.

¹⁸ Jesic jém wiñicpic anquímayooyi cuyajum. Da wiap iyoxpát jém p̄ixiñtam. Da para ti wi. ¹⁹ Yip anquímayooyi da wiap iwitsagáy ni tum p̄ixiñ itañca. Pero sip núcneum tum p̄ixiñ más wiap. Tananúcpa jém Dios iwiñjom.

²⁰ Dios ijycámayñe iga iccám jém iManic juuts panij. ²¹ Jém levitapic p̄ixiñtam cuando accámta juuts panij, Dios da tsíy juuts testigo iga accámta. Pero Dios tsíy juuts testigo iga accámta jém iManic juuts panij. Nimpa así jém Dios inmati:

Tanjatun Dios ijycámáy y da nunca icacsetpa ijixi. Nimpa:

“Sip manaccám juuts tum panij.

Da nunca miputpa.

Mijex juuts jém Melquisedec.”

²² Jeeyucmi tanjodon iga Jesús wiap iccupac jém más wibic trato. ²³ Jém tungacpic panij, jém levitapic, tsam anpicyaj, tsam jáyana. Porque jeeyaj caayajpa, da wiap ichiy seguido juuts panij. ²⁴ Pero Jesús da caaba. Da nunca putpa iga panij, da iccampa tungac.

²⁵ Jeeyucmi wiap iciacputyaj para siempre itumpiy jém icunúcyajpáppic Dios porque icupicneyaj Jesús. Porque je da nunca caaba. Itpa para siempre iga icupujpa jeeyaj Dios iwiñjom.

²⁶ Yicxp̄ic cobacpic panij wiap tayoxpátta porque tsam iwíwatpa, datim táñcaiy, cuáyñe ianama, da jex ijixi juuts jém malopic p̄ixiñtam. Nanicta más yucmi de yip sin hasta jut it jém tanjatun Dios. ²⁷ Da jex juuts jém tungac panij jém levitapic. Jeeyaj iccaaba cada jama jém animat iga iyoyáypa jém p̄ixiñtam itañca. Wiñti iyoypa iyaac jém itañca, ocmi iyoyáypa jém p̄ixiñtam itañca. Pero Jesús tunçiy iyoyáy jém p̄ixiñtam itañca para siempre cuando ijic iga accaata. ²⁸ Jém wiñicpic anquímayooyi iccám juuts panij tum p̄ixiñ táñcaiywip. Pero más ocmi de jém wiñicpic anquímayooyi, jém tanjatun Dios iccupac juuts ijycámne, iccám iManic juuts panij. Iniit itumpiy jém wibic jixi para siempre.

8

Jém Jesucristo wíap tacupuj

¹ Manañmadáy jémpic porque mannímaytamtooba iga tanaitta tum cōbacpic panij siñyucmi. Siip coñ jém trono inwimi jut injacpa tanJatun Dios. ² Yíp panij icuyoxap Dios jém wicōm jut it jém Dios ipimi, jém nunta mastic jém iwatnewip Dios. Da jém pxiñtam iwati. ³ Itumpiy jém cōbacpic panij accámyajta iga nicpa ichac jém ofrenda y jém sacrificio jém Dios iwiñjom. Jeeyucmi yíp panij tienes que ininipatim tum ofrenda jém Dios iwiñjom. ⁴ Meega itpa yíp naxyucmi, da wíap ichiy juuts panij porque yim it jém panijyaj, wíap nicpa ichacyaj jém ofrenda juuts nimpa jém Moisés inquímayooyi. ⁵ Yípyaj panijyaj icuyoxayajpa Dios yíp naxyucmic masticjom, iforma jex juuts jém nunta mastic jém itwip siñyucmi. Tanjodon iga jex juuts tum cuwiñ porque cuando jém Moisés iwat jém puctucmastic, iñímáy Dios: “Watí juuts jém manañquejayñewip jém cotsicyucmi.” ⁶ Pero siip yíp siñyucmic panij ipictson más wibic yoxacuy que jém wiñtipic panij. Siip tacupujpa con jém más wibic trato que jém wiñtipic porque watneta de acuerdo con jém más wibic promesa.

⁷ Meega jém wiñtipic trato tawitsagáy tantánca, jesic da idic tansunpa tungac trato.

⁸ Pero Dios iix iga jém wiñtipic trato da wíap iyoxpát jém pxiñtam. Nimpa jut jayñeta jém Dios inmatí:

Nimpa tanJatun Dios:

Núcpa jama iga anwatpa jém jomipic trato con jém ityajwip jém naxyucmi de Israel y jém naxyucmi de Judá.

⁹ Yíp trato da jex juuts jém anwadayñewip jém ijatunweweyaj jém jama cuando ammatsáy ici iga antopyaj jém naxyucmi de Egipto.

Pero como jeeyaj da iccupacyaj jém wiñtipic trato jém anwadayñewip, jeeyucmi ich antsactim mex jeeyaj, nimpa Dios.

¹⁰ Yíbam jém jomipic trato jém anwatpápic con jém nación de Israel cuando núcpa jém jama.

Nimpa así jém tanJatun Dios:

Anaccámpa jém ananquímayooyi jém ijixianjom y anjaycámáypa ianamanjom.

Y jém pxiñtam ich aDiosyaj.

Y jeeyaj ich ampixiñtam.

¹¹ Cuando núc jém tiempo, da i inquejáypa jém ivecinoyaj ni jém itiwitam iga: Ixpici jém tánomi.

Porque itumpiy jém pxiñtam aixpicyajpa jém xutupic y jém miltampic.

¹² Anwadáypa perdón iga agui imalwatneyaj.

Da nunca anjisáypa jém itánca.

¹³ Cuando Dios inmatpa de tum jomipic trato, quejpa iga dam más tayoxpátpa jém pecapic, da jáyñe iccuyajpa.

9

Jém naxyucmic mastic y jém siñyucmic mastic

¹ Jém wiñtipic trato iniit jém anquímayooyi jutsap tanjis Dios jém lugar jut it jém Dios ipimi yíp naxyucmi. ² Watta jém puctucmastic con wisten cuarto. Jém wiñtipic cuarto iñiyi jém lugar jut it jém Dios ipimi. Jem it jém nooquejucy tuncuy, jém mesa y jém caxtánañi jém Diospic imichi. ³ Iweñtan de jém tungac puctuctaañi it jém tungac cuarto iñiyi jém lugar jut núcpa Dios. ⁴ Jem it tum altar de oro jut nootap jém poma. Ittim jém baúl jut tsacta jém wiñtipic trato. Cutsitneta icumij jém baúl con oro. Jém baúljom it

tum xanu de oro jut cotta jém wíccuy, jém maná. Jém baúljom ittim jém Aarón iwaycuy jém anñayñewiip y jém tsaatabla jut jayñeta jém diez anquímayooyi jém wiñtipic trato. ⁵ Jém baúlyucmi it wisten jém sajiywíip, jém querubines. Tanquejáypa iga jemum it Dios. Jemum núcpa jém Dios ichoça. Itimne ixaj, icujimne jém lugar jut tsactap jém sacrificio jut vojaytap jém pixiñtam itánca. Pero siip da i tiempo iga manwianmadáypa itumpiy yípyaj cosa.

⁶ Jesic cuando wítsacne itumpiy cosa así, seguido tigiyajpa jém panijyaj jém wiñtipic cuarto iga iwatyajpa juuts nimpa jém wiñicpic anquímayooyi. ⁷ Pero jém tungac cuarto, no más jém cobacpic panij wiap itigiy. Cada amtiy tigiyapa tunçiy. Da wiap itigiy sin nñipiñ iga iyojpa jém itánca, ocmi iyojáypatim jém pixiñtam itánca. ⁸ Jempigam tanquejáy jém Dios iAnama, iganam it jém wiñtipic puctucmastic, danam quej jém tun hasta jut it jém tanjatun Dios, jém lugar cuáyñewiip. ⁹ Itumpiy yípyaj cosa tsíy juuts tum ejemplo para siip. Jém ofrenda y jém sacrificio jém chiiñetawíip Dios da iñuntawítsagáy jém pixiñtam itánca jém iwatnewiip jém sacrificio iga cuáypa ianama. ¹⁰ Jém sacrificio y jém ofrenda je nada más asunto de wíccuy y níccuy y jutsap icheeyaj imijtay según jém wiñicpic costumbre hasta que Dios icjoomasetpa itumpiy cosa.

¹¹ Pero siip miññeum jém Cristo, jém cobacpic panij. Imñichi itumpiy jém más wibic cosa, jém miñpáppic. Yíp mastic jut yoxap jém Cristo más wíti y más wibic. Da je jém pixiñ iwati, da je yíp naxyucmipic. ¹² Tigiy tunçiy jut it Dios para siempre. Da ininic jém chivo iññipiñ ni jém becerro iññipiñ, pero iyaac ininic jém iññipiñ iga iyojáy jém pixiñtam itánca iga ipictsonyajiñ jém vida jém dapic cuyajpa. ¹³ Jém becerro iññipiñ y jém chivo iññipiñ cuxicstap jém pixiñtam iga cuáyñ jém imijtay. Jém becerra icuyjam, jém noonetawíip jém altaryucmi, cuyintap jém pixiñtam iga cuáyñ jém imijtay. Jém nñipiñ y jém cuyjam iyoxpátpa jém pixiñtam iga cuáyñ jém imijtay según jém costumbre. ¹⁴ Pero más wí jém Cristo iññipiñ. Porque jém Dios iAnama, jém dapic cuyajpa, iyoxpát jém Cristo cuando iyaac nachiiita juuts sacrificio sin tánca. Jém iññipiñ tacujicháyáypa tánanama iga da más tanjísipa jém wiñicpic anquímayooyi, jém dapic tayoxpátpa. Siip wiap tançuyoxa jém vivopic Dios.

¹⁵ Jeeyucmi jém Cristo wiap tacupuj con jém jomipic trato. Ichiiba jém vida jém dapic cuyajpa itumpiy jém icupiñneyajwíip Dios juuts ijíycámayñe. Wiap iwat jempic porque accaata iga iyojáy itumpiy jém pixiñtam itánca, jém dapic wiap iwítsac jém wiñtipic trato. ¹⁶ Siiga tum pixiñ iwatpa trato con imaníc iga ichiiba itumpiy jém jeepic imñichi cuando caaba, jesic tienes que ixtap iga caaneum. Ocmi jém imaníc wiap ipictson titam ijíycámayñe. ¹⁷ Tum trato da iniñ ipimi siiga danam caane jém iwatnewiip jém trato. Pero cuando caaneum jém pixiñ, jesic iniñtum ipimi jém trato. ¹⁸ Jeeyucmi accaayajta jém animatyaj iga con iññipiñ iniidiñ ipimi jém wiñtipic trato. ¹⁹ Cuando jém Moisés yaj inmadáy jém pixiñtam itumpiy jém anquímayooyi, ipic jém becerro iññipiñ con jém chivo iññipiñ, inimot con ni. Ipic jém hisopo inçis, ichen con jém tsabatspic lana, icot nñipiñjom, con jeam icuxics jém toto jut jayñeta jém anquímayooyi. Icuxicstim itumpiy jém pixiñtam. ²⁰ Iganam iwatpa jempic jém Moisés, iñímáy jém pixiñtam: “Con yíp nñipiñ quejpa iga jém trato iniñ ipimi jém Diospic tawadayñe para taichtam.” ²¹ Jém Moisés icuxicstim con jém nñipiñ jém puctucmastic y itumpiy jém traste jut ijísyajpa Dios. ²² Porque nimpa jém wiñicpic anquímayooyi iga casi itumpiy cosa tienes que cuáypa con jém nñipiñ. Siiga da itegáypa jém nñipiñ, jesic da i imatónáypa jém itánca.

Accaata jém Cristo iga tajojáy tantánca

²³ Jeeyucmi ixunpa jém sacrificio iga cuáyñ jém cuwiñ de jém cosa jém itwíip sinjucmi, pero jém sinjucmipic cosa ixunpa más wibic sacrificio que jém watnetawíip

yíp naxyucmi. ²⁴ Jesic cuando jém Cristo tayojáy tantánca, da iwat yíp naxyucmipic masticjom jém iwatnewiip jém pixiñtam. Porque jém puctucmastic nada más tum cuwiñ de jém nunta mastic jém itwiip sinyucmi. Pero tigiy jém Cristo sinyucmi, icunúc jém tanJatun Dios iwiñjom iga tacupuja. ²⁵ Da tigiy jém sinyucmipic masticjom iga iwatpa watciy jém sacrificio juuts jém cobacpic panij iwatpa cada amtiy con jém nipiñ dapic imichi. ²⁶ Porque siiga da wiap iwat tunçiy jém sacrificio, jesic tienes que watciy accaatap jém Cristo dende watta yíp mundo. Pero da iwat jempic. Siip cuando núctooba jém iñanpigam jama wiñquej jém Cristo. Iyaac nachiita iga accaata iga iccáyápa jém pixiñtam itánca. ²⁷ Dios ichac iga tunçiy caaba itumpiy jém pixiñtam y ocmi cipiñtap, chiitap castigo jém malopic. ²⁸ Jesanetim tunçiy nachiita jém Cristo iga accaata iga iccáyápa jáyan jém pixiñtam itánca. Ocmi wiñquejpa eybic yíp naxyucmi jém Cristo. Dam miñpa iccáyáy jém pixiñtam itánca, miñpa iciacputyaj jém injócneyajwiip.

10

¹ Jém Moisés inqúimayooyi juuts tum cumuçi de jém wibic cosa jém miñpáppic. Da nunta numa jém cosa jém miñpáppic ocmi, jém anqúimayooyi no más tum cuwiñ. Jém Moisés inqúimayooyi da wiap iwıtsagáy jém pixiñtam itánca jém icunúcneyajwiip Dios con jém sacrificio jém iwatyajpáppic cada amtiy. ² Meega jém anqúimayooyi wiap iciacput jém pixiñtam, jesic da eybic iwatyajpa jém sacrificio porque una vez wıtsacnetawum itánca jém iwatneyajwiip jém sacrificio, da más ijampa iga táncaíy. ³ Pero cuando iwatyajpa jém sacrificio cada amtiy, ijısyajpa iga táncaíy. ⁴ Porque jém toro iñipiñ y jém chivo iñipiñ da nunca wiap iccáyáy jém pixiñtam itánca.

⁵ Jeeyucmi cuando miñ yíp naxyucmi jém Cristo, iñimáy tanJatun Dios: Mich da inwianjam jém sacrificio ni ofrenda.

Pero anchi jém ammiytay iga accaatap.

⁶ Datim inwianjam iga nooquettap jém animat jém altaryucmi ni jém sacrificio iga accáyaytaiñ jém pixiñtam itánca.

⁷ Jesic ocmi anim:

“Yim aít iga anwatpa juuts mich inwianjam, manJatun Dios, juuts jayñeta jém librojom de aich.”

⁸ Wiñtı nim jém Cristo iga: “Mich da inwianjam jém sacrificio, ni ofrenda, ni jém animat nooquettapaap jém altaryucmi, ni jém sacrificio iga accáyaytaiñ jém pixiñtam itánca.” Mex jém wiñcpiç anqúimayooyi ipimíyapa jém pixiñtam iga iwatyajiñ. ⁹ Ocmi nımtim jém Cristo: “Ich amiñ yim iga anwatpa juuts mich inwianjam, manJatun Dios.” Yíp nımttooba iga Dios iccáyapa jém wiñtipic, iccámpa jém ocmipic. ¹⁰ Cristo ijíc iga accaata tunçiy para itumpiy jém pixiñtam. Jeeyucmi Dios tacujicháyáy tánanama.

¹¹ Itumpiy jém Israelpic panijyaj iwatyajpa cada jama jém masticjompic yoxacuy. Seguido iwatyajpa jeetim sacrificio, mex da nunca wiap iccáyáy jém pixiñtam itánca.

¹² Pero jém Jesucristo tunçiy ijíc iga accaata iga iyojáy jém pixiñtam itánca para siempre. Jesic ocmi nic coñi jém Dios inwimi. ¹³ Jemum síp injóc hasta que Dios icoñwıyapa jém ienemigoyaj. ¹⁴ Tunçiy chióy imiytay juuts ofrenda iga accaata jém cunusyucmi iga iwıtsagáy jém pixiñtam itánca iga iccáyáy iñanama para siempre. ¹⁵ Jém Dios iñanama tanmadáytım jempic porque nimpa:

¹⁶ Ocmi ich anwatpa tungac trato con jeeyaj cuando núcpa jém tiempo.

Nimpa Dios:

Anaccámpa jém ananqúimayooyi jém pixiñtam iñanamanjom.

Anjaycunúcpa ijıxianjom.

17 Nĩmtim Dios:

Da nunca anjĩsáypa jém pĩxiñtam itán̄ca, da nunca anjĩspa iga agui imalwatne.

18 Cuando tawadayñetawum perdón jém tantán̄ca, da eybic ixunpa Dios iga tanwatpa sacrificio iga tanyojpa jém tantán̄ca.

Wĩ iga tan̄cunúctamiñ Dios

19 Jeeyucmi mantiwitam, siip da taciñpa. Wiap tantigiy jém Lugar Cuáyñewiip, juť it Dios, porque jém Jesucristo itegáy iñĩpiñ para taichtam. 20 Siip tanait jém jomipic tun, jém vivopic, juť wiap tantigiy juť it Dios. Porque Cristo íngáy jém puctuctaani iga wiain tannas jém iweñtan. Jém puctuctaani nimtooba jém Cristo imijtay cuando accaata. 21 Tanait tum mijpic tampanij, jém cobapic, injacpa jém Dios iticmi icutero. 22 Jeeyucmi wiap tan̄cunúcta Dios con tum wibic tán̄anama, tannuntawicupicpa Dios. Tacujicháyayñetawum tán̄anama iga da más tanjĩspa jém tantán̄ca. Tacutseayñetawum jém tammijtay con jém wibic ni. 23 Seguido tananjóctampa iga Dios taciaputtampa. Da tantsactampa iga tan̄cupictampa porque Dios iccupacpa juuts tajycámayñe. 24 Wĩ iga tammétstamiñ jutsap tanayxpáttamtā con jém tantiwitam iga tanatoytamtaiñ, iga tawiwadaytamiñ i quej. 25 Da tantsactampa iga tan̄tuumatampa con jém tantiwitam juuts iwatyajpa algunos jém dapic an̄tuumayajpa. Wĩ iga tananquĩmtamtap iga tan̄wattamiñ juuts ixunpa Dios y más siip porque quejpa iga dam jáyñe miñpa jém tán̄omi.

26 Siiga in̄wianjam iga seguido in̄watpa tán̄ca cuando in̄wijodon̄ jém numapic an̄quĩmayooyi, dam i tun̄gac sacrificio iga miyojáypa iñtan̄ca. 27 Tsíy no más jém mijpic castigo jém tsampic iyaachwatpa ienemigoyaj juuts ijycunúcne Dios, yajpa iccucaáy jém juctjom jém aguiptic yótpa. 28 Wiñgam siiga tum pĩxiñ da iwatpa juuts nimpa jém Moisés in̄quĩmayooyi, siiga it wisten o tucuten testigo iwiñpacchiiba, jesic jém pĩxiñ accaatap, da i iyaachanjampa. 29 Jĩstaami iga tsam mijpic castigo ichiiba Dios tum pĩxiñ siiga nimpa iga da ti cuwatcuy jém Dios iManic, y siiga tsam ijóyixpa jém Cristo iñĩpiñ de jém jomipic trato, jém iccuáyñewiip jém pĩxiñ ianama. Chiitaptim mijpic castigo siiga i imalnímáypa jém Dios iAnama jém tan̄quejaypáppic iga tsam tayaachanjampa Dios. 30 Tánixpicpa jém nimnewiip: “Ich anait derecho iga antségáypa jém malopic pĩxiñtam itán̄ca, ich anacyojpa iga imalwatyaj.” Nĩmtim: “Dios icĩpiñpa jém ipĩxiñtam.” 31 Cĩñi iga micutiñpa jém vivopic Dios icijjom.

32 Pero jĩstaami jém jama jém nasnewiip cuando mimichtam yaguiñ impictson̄ta jém juctiant̄soca. Tsam micutitstamtā. Iñyaachiyta cuando iññascata jém mijpic yaachaji. 33 Algunos de mimichtam tsam mimalnímaytamta y mimalwadaytamta jém pĩxiñtaman̄jom. Miwagayaachatim con jém iñamigoyaj cuando iñascayaj jem̄pic. 34 Mimichtam, tsam iñyaachanjamtā jém pajneyajtaw̄ip. Da minyácneta cuando miccáyaytā jém iñtic o itumpiy jém iniitw̄ip, numa agui mimaymaytam. Porque in̄jodon̄tam iga iniifta jém tsam w̄itampic cosa siñyucmi jém dapic nunca cuyajpa. 35 Mimichtam tsam iñjĩspa iga Dios wiap miyoxpát, jesic odoy tsaci iga iñjĩspa jem̄pic porque siiga seguido iñjĩspa jem̄pic, impictson̄pa tum wibic coñwiyooyi. 36 Yaachiytaami iga in̄wattampa juuts ixunpa Dios iga impictson̄tampa titam tajycámayñe. 37 Nimpa jém Dios in̄mat̄i:

Da jáyñe miñpa jém miñpáppic.

Da tán̄caap.

38 Jém an̄wĩtsagayñewiip itán̄ca iniit jém vida porque acupicne, nimpa Dios.

Pero el que ichacpa iga acupicpa, aich da an̄wianjam.

39 Pero taichtam da tajex juuts jém setpáppic ituuñan̄cim, jém nicpáppic juť ipictson̄pa jém castigo. Taichtam seguido tan̄cupicpa Dios iga da togoypa jém tán̄anama.

11

Jém wiñicpic pìxiñtam jém tsampic icupicyajpa Dios

¹ Siiga tanait fe, tanjucpica Dios, tannuntawijodon iga tampictsonpa titam tananjóne. Tanjodonjim iga numa tachiiba Dios jém cosa jém dapic tánixñe. ² Jempictim iwatyaj jém wiñicpic pìxiñtam, Dios iwixyay porque tsam icupicyaj.

³ Como tanait fe, tanjodon iga Dios iwat itumpiy cosa jém itwip naxyucmi y sinyucmi. Ipimiy iga idiñ, jesic itum. Dios ipic jém cosa jém dapic i wiap iix iga iwatpa jém cosa jém wiapaap tánix.

⁴ Como tsam iniit fe, jém Abel agui icupic iga Dios wiap iyoxpát, jeeyucmi ichi más wibic ofrenda que jém ichiwiip jém Caín. Quejpa iga wibic pìxiñ porque Dios iwipictsonáy jém iofrenda. Mex caane jém Abel, hasta sip inmatpa iga tsam icupic Dios.

⁵ Como tsam iniit fe, jém Enoc icupic Dios. Siwiñ nanicta, da ca. Dam i ipát porque Dios ininic. Nim jém Dios inmati: “Antes que nanictap jém Enoc, iwat juuts Dios ixunpa.”

⁶ Pero da i wiap iwat juuts ixunpa Dios siiga da iniñ fe, siiga da icupicpa iga Dios wiap iyoxpát. Jém icunúcpappic Dios tienes que icupicpa iga it, y iga Dios ichiiba jém wibic coñwiyooyi jém pìxiñtam jém imétsyajpappic.

⁷ Como tsam iniit fe jém Noé, cuando Dios icjodóna iga miñpa jém cosa jém dapicnam queman tánix, como tsam cñ, iwat tum barco iga iciacputyajpa jém iyomo y jém ichixtam. Con jeetim fe, jém iniitwip jém Noé, ichiiba castigo itumpiy jém ityajwip yip naxyucmi. Jeeyucmi Dios ipictson jém Noé juuts tum wibic pìxiñ porque icupic iga Dios wiap iyoxpát.

⁸ Como tsam iniit fe jém Abraham, cuando inwejay Dios, icupic, nic tum lugar jut Dios ijycámayñe iga ichiiba. Put de jém iticmi, aunque da ijodon jut nicpa. ⁹ Como tsam iniit fe jém Abraham, nic iti como tum juumipic pìxiñ jém tungac naxyucmi jém Diospic ijycámayñe. Jáy iti con jém Isaac y Jacob jém punctucticjom. Jeeyaj ipictsonyajtim jeetim promesa. ¹⁰ Porque jém Abraham tsam injócpa jém atebet jém wíwatnewip, jém iniitwip wibic base, jém arquitecto y jém iwatnewip Dios mismo.

¹¹ Como tsam iniit fe jém Sara, icupicpatim. Tsami jém yomo, nasneum it tiempo iga manigíypa, pero Dios iyoxpát iga manigíyiñ. Icnay tum jaychixi porque icupic iga Dios iccupacpa juuts ijycámayñe. ¹² Jém Abraham tsam wídaya, caatoobam, pero núc iga iniit tsam jáyan imanictam juuts jém matsa, jém itwip sinyucmi, y juuts jém pooy, jém itwip jém lamar anñaca, da wiap tammay.

¹³ Itumpiy jém wiñicpic pìxiñtam, jém icupicneyajwip Dios, caayaj. Da iixyay jém promesa jém ijycámayñewip Dios iga ichiiba. Pero como tsam iniit fe, icupicyaj, juumi iixyay jém promesa. Tsam maymayyay cuando iixyay iga miñpa. Inimayyay iga: “Ich da yimpic apixiñ. Ich juuts awidanñaxi yip naxyucmi.” ¹⁴ Cuando nimyay jempic, tsam wíquejpa iga imétsyajpa tungac nas jém imichipic. ¹⁵ Meega ijisyaj jém naxyucmi jut tsucumyay, wiap ixetyaj eybic jemic. ¹⁶ Pero ixunyajpa tum wibic naxyucmi, tum sinyucmic lugar. Jeeyucmi da tsaap jém tanjatun Dios cuando nimpa: Michtam anDios. Porque iwitsagay tum atebet para jeeyaj.

¹⁷ Como tsam iniit fe jém Abraham, cuando cutitsta, inimiñ jém Isaac iga iccaaba juuts tum sacrificio. Iccaaba idic jém tumpic imanic mex Dios ijycámayñe iga nay jém tsixi. ¹⁸ Nimayta jém Abraham iga por medio de jém imanic Isaac, tsam anpicpa jém imanictam. ¹⁹ Jém Abraham iwijodon iga Dios wiap icpis jém caaneyajwip. Y como da ijic Dios iga iccaaba jém imanic, wiap tanim iga jém Abraham eybic ipictson imanic juuts tum acpisnetawip de jut it jém caaneyajwip.

²⁰ Como tsam iniit fe jém Isaac, icupic iga Dios wiap iyoxpát. Jeeyucmi ijycámáy imanictam jém Jacob y Esaú iga núcpa jama iga iwíwadáypa Dios. ²¹ Como tsam iniit fe

Jém Jacob, icupic iga Dios wiap iyoxpát. Cuando caatooba ijycámáypa cada tumtum jém José imanictam iga iwíwadáyíñ Dios. Teñchucum con ibaston jém wídaya iga inwejpátpa Dios. ²² Como tsam iniit fe jém José, icupic iga Dios wiap iyoxpát, jesic antes que caaba inímáy jém Israelpic pixiñtam iga ocmi putyajpa jém naxyucmi de Egipto. Pimiyajta iga itajquímáyíñ ipac cuando putyajpa.

²³ Como tsam iniit fe jém Moisés ijatun con iapa, icupicyaj iga Dios wiap iyoxpát. Cuando nay jém tsixi, inec tres meses porque iix iga tsam wibic tsixi. Da icinyajpa jém orde, jém reypic ichiñe. ²⁴ Como tsam iniit fe jém Moisés, icupic iga Dios wiap iyoxpát, jesic cuando pixiñtam, da ijic iga imanigap jém Faraón iyommanic. ²⁵ Más iwianjam iga yaachwattaiñ con jém Dios ipixiñtam que iga maymáypa tum rato iga iwatpa juuts iwianjamyaj jém malopic pixiñtam. ²⁶ Ijis iga vale más iga yaachwattap jém Cristo icuyucmi que iga ipictsonpa itumpiy jém riqueza jém itwip Egipto porque iix tum tsam wibic coñwyooyi jém Diospic ichiiba. ²⁷ Como tsam iniit fe jém Moisés, icupic iga Dios wiap iyoxpát, jeeyucmi put de jém naxyucmi de Egipto. Da icin jém Egiptopic rey iga agui jóyñe. Seguido iwatpa juuts inímáy Dios, juuts jesic iixñe jém Dios jém dapic tánixpa.

²⁸ Como tsam iniit fe jém Moisés, icupictim iga Dios wiap iyoxpát. Iwat jém pascuasín. Ipiimiy jém ipixiñtam iga icuxicsyajpa jém tic ipuerta con nipiñ iga cuando naspa jém sinyucmic pic pixiñ, jém accaoypaap, da iccaaba ni tum jém Israelpic pixiñ icoponmanic. ²⁹ Como tsam iniityaj fe jém Israelpic pixiñtam, icupicyaj iga Dios wiap iyoxpát. Widanjacyajpa jém tsabats lamar juuts titsinaxyucmi. Pero cuando jém Egiptopic pixiñtam nasyajpa idic, jemtum jicjicayaj.

³⁰ Como tsam iniityaj fe, jém Israelpic pixiñtam icupicyaj iga Dios wiap iyoxpát, jesic siete jama icuwitxetyaj jém atebet Jericó, ocmi cujegáy jém tsaataañi. ³¹ Como tsam iniit fe jém yomo Rahab, jém pejoypáppic idic, icupic iga Dios wiap iyoxpát. Da iwaganaca jém dapic icupicyaj, porque inec jém wisten jém Israelpic pixiñ jém icuixyajwip jém naxyucmi de Canaán.

³² ¿Ti más wiap annim? Da anaj tiempo iga anañmatpa de jém Gedeón, jém Barac, jém Sansón, jém Jefe, jém David, jém Samuel y jém wiñicpic profetayaj. ³³ Como tsam iniityaj fe, icupicyaj iga Dios wiap iyoxpát. Jesic iconwiyaj jém tungac naxyucmi, iwianjacyaj jém Dios ipixiñtam, ipictsonyaj jém promesa jém ijycámayñewip Dios, inñuc jém can ijip. ³⁴ Icpich jém jucti jém tsampic yótpa, ciiputyaj iga accaayajtap con jém espada, chiita pimi jém dapic iniñ ipimi, tsam iniityaj ipimi cuando áñayajpa, ichicpoypa jém soldado jém tungac naxyucmic. ³⁵ Algunos jém yomtam ipictson eybic imanic jém caanewip idic, acpisyajtawum.

Tungac jém Dios ipixiñtam matsta, tsam yaachwatta hasta accaata algunos. Y como da inñeepa iga icupicpa Dios, da icutsigáypa. Iwatpa así iga ipictsonyajpa tum más wibic vida cuando pisyajpa jém caaneyajwip. ³⁶ Tungac más tsam saayiyta, tsam cótsta, tsenta con cadena, cotta cárcel. ³⁷ Tungac tsaanáscata, wiganajta icucmi con sierra, accaata con espada. Algunos oyyaj yim jeexic. Iccámneyaj jém borrego icuero y jém chivo icuero. Tsam yaachayaj. Tsam yaachwatta. Agui anyácneyaj iga tsam malwadayta. ³⁸ Yip pixiñtam vale más jém Dios iwiñjom que jém dapic icupicyajpa Dios. Jáy siiyaj jém titsinaxyucmi y jém cotsiganjo. Ityaj jém tsaajosjom y jém nasjosjom. ³⁹ Ni tum de jeeyaj da ipictson jém ijycámayñewip Dios mex icupic iga Dios wiap iyoxpát porque tsam iniityaj fe. ⁴⁰ Porque Dios tajispatim taichtam iga tachiiba tum más wibic cosa. Da iwíwadáypa jeeyaj hasta que tawíwadáypatim taichtam con jeeyaj.

12

Cotstap jém Dios imanictam iga más iwíwatyajiñ

1 Jeeyucmi w_i iga tantsacpa jém tantánca jém tsámpic tacmalwatpa. W_i iga tanyaachíyíñ itumpiy cosa iga tanwattámpa juuts ixunpa Dios porque tánix iga jáyan jém wiñicpic pixiñtam agui icupicneyaj iga Dios w_iap iyoxpát juuts tacuwoyxetne jém ucsi. 2 W_i iga tánámmatspa jém Jesús jém tachiipáppic jém fe. Tsám tayoxpát cuando moj tancupic Dios y seguido tayoxpátpa hasta tanaccupacpa. Tsám maymay jém Jesús iga yaachwatta cunusyucmi porque ijodon iga asíam icoñwíyppa jém ienemigoyaj. Da tsaap iga accaata juuts tum malopic pixiñ. Ocmi nic coñi jém Dios itrono inwimi. 3 Jistaami iga agui iyaachiy jém Jesús cuando iyaachwatyaj jém malopic pixiñtam. Jeeyucmi mannímáyppa: Odoy sopstaami iga inwattámpa juuts ixunpa Dios, odoy tsactaami iga incupicpa Dios. 4 Numa tsám pími mínatámpa contra jém tánca, pero hasta siip danam mictegáy iññipiñ. 5 ¿Que iñjaamanotneta iga Dios minquím juuts mimanic? Nimpa así jém Dios inmati jut jayñeta:

Mammanic, odoy jóycaí cuando micótspa jém injatun Dios.

Yaachiyi cuando michiiba castigo iga incupiguiñ.

6 Porque jém tanjatun Dios inuumanquímppa jém itoyyajpáppic.

Ícótspa itumpiy jém ipictsonpáppic juuts imaníc.

7 Yaachiytaami mimichtam cuando iññascaaba jém yaachaji. Asíam minquejáyppa Dios iga inwíwadiñ. Miwixpa Dios juuts tum mimanic. ¿Que it tum tsixi da icótspa ijatun?

8 Pero siiga Dios da micótspa juuts iññascaaba itumpiy jém imanictam, jesic da je Dios mimanic. Michiyppa juuts mipejpen. 9 Yip naxyucmipic tanjatun tacótspa, pero da tajóyppa, tanwixpa. Jesic más w_i iga tancupicpa jém anjatun Dios jém dapic tánixpa, jesic tanaitpa jém vida. 10 Yip naxyucmipic tanjatun tacótspa tum rato juuts je iwianjam. Pero jém tanjatun Dios tacótspa iga tayoxpátpa iga tanwíwattámiñtim juuts iwatpa je iga da tatáncaíyppa. 11 Numa tum pixiñ da iwianjam cuando cótstap. Jeeti rato tsám toypa. Pero ocmi siiga tancupicpa, tayoxpátpa iga tanwíwatpa, agui tamaymay.

Da w_i tanimpa iga da para ti w_i jém Dios inmatí

12 Chii pími jém inci jém sopsnewip. Chii pími jém incoso jém dapic cámpa iteñ.

13 Numtsaci jém tun jut miwittámpa, jesic jém cuxujpic idic da putpa tunjom, pispa.

14 Wadaayi caso iga inwinanigáyppa itumpiy jém pixiñtam. Seguido wíwati juuts ixunpa Dios porque jém dapic iwíwatpa da iixpa tanjatun Dios. 15 Nawattaji cuenta iga odoy inchaguiñ jém wibic anmati iga Dios tayaachanjampa y tayoxpátpa. Odoy tsiiyi ni tum de mimichtam juuts tum tichic tsámpic tam jém inayi. Imalwadáyppa jáyan jém ityajwip jem. 16 Ni tum de mimichtam odoy pejoytaami ni odoy yamtsaayaji tum woñi. Odoy jóyixi jém Diospic imichi juuts iwat jém Esaú. Por tum chima wíccuy icucac jém herencia jém imichipic idic. 17 Michtam inwijodontam iga cuando jém Esaú ipictsontooba titam ichiiba idic jém ijatun, da i ichi. Mex tsám wej jém Esaú, dam wia icucac ijixi iga imalwat.

18 Mimichtam da incunúcta jém cotsic jém wíapaap tantsic juuts icunúcyaj jém Israelpic pixiñtam. Agui yótpa jém jucti, cupiicha. Ocmi más pími piichi, agui pími poypa jém sawa. 19 Mimichtam datim immatonja jém trompeta injiyi ni jém Dios ijiyi. Jém imatonjaywip icunucsayyaj iga odom más jiyiñ. 20 Da wíap iyaachiyay titam inímáy Dios. Nímayyajta: “Siiga tum pixiñ ichicpa jém cotsic o tum animat, jesic náscataami tsaami o tipcatañ con capi.” 21 Tsám pími ichiganjéc jém Moisés cuando iix. Tsám cñpa. Nimpa: “Tsám pími acñ hasta acuetsáyppa.”

22 Pero, mimichtam, incunúctetámum jém cotsic Sión, jém vivopic Dios iattebet, jém sinyucmipic Jerusalén, jut antuumaneyaj tsám jáyan mil jém sinyucmipic pixiñtam 23 iga icujípyajppa Dios. Incunúctetámum jut antuumaneyaj jém Dios imanictam jém icupicneyajwip Jesucristo jém accámayñeyajwip iñiyi sinyucmi. Incunúctetámum jém tanjatun Dios,

jém ic̄ip̄in̄páppic itump̄iy p̄ixiñtam, y hasta jūt it jém w̄ibic p̄ixiñtam ianamayaj jém iw̄itsagayñeyajw̄ip Dios. ²⁴ In̄cunúcn̄etámum jém Jesús jém tacupujpáppic con jém jom̄ipic trato, y jém iñ̄ipiñ jém tacuáyñew̄ip. Tsam w̄i quejpa iga más w̄i que jém Abel iñ̄ipiñ.

²⁵ Mimichtam, cup̄ictaami titam tan̄madayta Dios, odoy jóyixi. Porque siiga da c̄ip̄utyaj jém wiñ̄icp̄ic p̄ixiñtam cuando an̄madayyaja ȳip naxyucmi, jesic mucho más mimichtam da mic̄ip̄uttámpa siiga da immatontámpa cuando Dios mij̄iyaytámpa dende sin̄yucmi.

²⁶ Wiñ̄igam cuando jiypa Dios, agui tsigóypa jém nas. Pero siip̄ ijycámne, n̄impa: “Eȳbic anactsigóypa jém nas, pero da solamente jém nas, anactsigóypatim jém siñ̄.”

²⁷ Cuando n̄impa: “Eȳbic anactsigóypa”, tan̄cutīiȳiypa iga Dios iccáypa jém tsigoypáppic, jém iwatnew̄ip Dios, ichacpa jém cosa jém dap̄ic tsigóypa. ²⁸ Tatigiytámpa jūt in̄jacpa Dios jūt da ī ictsigóypa, jeeyucmi tanchiitámpa gracia Dios. Tan̄jístámpa Dios juuts je iw̄ianjam. Tantoytámpa y tan̄c̄iñtámpa. ²⁹ Jém tan̄jatun̄ Dios je tum̄ mij̄pic jucti, nooquedóypa.

13

Ti iw̄ianjam Dios iga tan̄watpa

¹ Odoy tsaci iga minitoytam̄tap con iñ̄tiw̄itam. ² Odoy jam̄nooti iga in̄w̄ipictson̄pa jém miñ̄yapáppic juumi. Acw̄ictaami. Jemp̄igam algunos ipictson̄yaj jém sin̄yucm̄ipic p̄ixiñtam mex iga da ijodon̄.

³ J̄istaami jém presoyaj juuts miwagapajnet̄a con jeeyaj. J̄istaami jém malwadayñet̄aw̄ip porque mimichtam inīttim jexp̄ic mij̄tay. Wiap̄tim iñ̄nasca jemp̄ic.

⁴ Itump̄iy jém an̄coomiyñeyajw̄ip w̄i iga nap̄icyajtap y da imalwatyajpa. Pero Dios ichiiba castigo jém ichayapáppic tungac yomo y jém pejoypaap.

⁵ Odoy cusúnīyi jém tumiñ̄. Maymáyāji con titam iniit̄ siip̄ porque n̄impa Dios: “Da nunca mantsacpa iga manyoxpátpa. Da nunca michiypa in̄cutum.” ⁶ Wiap̄ tanim: An̄wijodon̄ iga Dios ayoxpátpa.

Da ti an̄c̄iñpa.

Da ī wiap̄ amalwadáy.

⁷ J̄istaami ti iwatyaj jém pastoryaj, jém min̄madayñew̄ip jém Dios in̄māti iga tsam iw̄iwatyaj y tsam iniityaj fe. Jemp̄ictim w̄icup̄ictaami mimichtam iga Dios wiap̄ miyoxpátpa.

⁸ Jém Jesucristo da cucacpa. Jeetim matic, jeetim ȳip jama y jeetim itump̄iy tiempo.

⁹ Odoy j̄ici iga ī mimigóyáypa iga min̄quejáypa tungac an̄químayooyi dap̄ic jex juuts jém imp̄ictson̄new̄ip. Más w̄i iga ipim̄chiiba iñ̄anama jém Dios itóyooyi que iga tan̄cútpa jém w̄iccuy juuts n̄impa jém wiñ̄icp̄ic costumbre. Porque jém costumbre da tayoxpátpa iga tan̄watpa juuts ixunpa Dios.

¹⁰ Taichtam tanaít tum̄ altar jūt tsact̄a jém ofrenda, jém dap̄ic wiap̄ icútyaj jém yoxapáppic ȳip naxyucm̄ipic masticjom̄. ¹¹ Jém cobacp̄ic pan̄iyaj icotyaj jém anim̄at iñ̄ipiñ jém cuarto jūt it Dios. Ichiiba juuts tum̄ ofrenda iga iccáyáypa jém p̄ixiñtam itán̄ca. Pero jém anim̄at im̄j̄tay noaytap̄ an̄sicmi de jém atebet. ¹² Jextim jém Jesucristo tsam yaacha, accaatā an̄sicmi de jém atebet iga iccáyáy jém p̄ixiñtam itán̄ca con jém iñ̄ipiñ. ¹³ Jesic tan̄ictámpa an̄sicmi de jém atebet jūt it Jesús iga tayaachwattam̄tañ̄.

¹⁴ Porque ȳip naxyucmi da tanāi tum̄ atebet jém dap̄ic cuyajpa. Pero tan̄anjóctámpa jém atebet jém miñ̄páppic ocmi. ¹⁵ Jeeyucmi w̄i iga seguido tan̄cujíptámpa Dios por medio de Jesucristo. Cuando tan̄cujíppa Dios jex juuts tanchiiba tum̄ sacrificio. ¹⁶ Odoy jam̄nooti iga in̄w̄iwadáypa jém iñ̄tiw̄itam iga iñ̄yoxpátyajpa con titam iniit̄. Siiga in̄watpa así jex juuts tum̄ sacrificio jém iw̄ianjampáppic Dios.

¹⁷ Cup̄ici jém pastoryaj jém min̄madaypáppic jém Dios in̄māti. J̄ici iga min̄jacpa porque Dios iccám juuts tum̄ an̄jagooyi iga miwadáypa cuenta jém iñ̄anama. Núcpa jama iga Dios

ic̄ip̄in̄pa jém pastor siiga iw̄ian̄jacne. Jesic maymay jém pastor siiga w̄iap̄ iñímáy Dios iga in̄w̄iwatne. Pero siiga da in̄w̄iwatne, jesic anyácpa jém pastor. Siiga da in̄cup̄icpa, jesic datim w̄i para mimich.

¹⁸ An̄wejpátaami Dios para aichtam. An̄wijodontam iga da s̄ip̄ ammalwat. Siempre an̄watpa juuts t̄um w̄ibic p̄ixiñ. ¹⁹ Mañcunucsáypa iga in̄in̄wejpáttámiñ Dios para aich iga Dios ijícpa iga da jáyñe asept̄a eyb̄ic j̄ut̄ miitta.

An̄quím̄yajt̄a jém p̄ixiñt̄am

²⁰ S̄ip̄ Dios jém tachiiñew̄ip̄ jém w̄ibic j̄ixi tán̄an̄aman̄jom, jém ic̄p̄isnew̄ip̄ tán̄omi Jesucristo de j̄ut̄ it̄ jém caaneyajw̄ip̄, je jém mījpic pastor, tawatpa cuenta juuts tabor-rego, itegáy iñ̄ipiñ iga tawadáy jém j̄omip̄ic trato jém dap̄ic cuyajpa, ²¹ ȳiptim Dios miȳoxpáttámpa iga mich̄iyiñ juuts t̄um w̄ibic mip̄ixiñ iga da ti mitogóyáypa. Jesic w̄iap̄ in̄wat it̄ump̄iy cosa juuts je ixunpa por medio de Jesucristo jém tañcujíptampáppic siempre. Amén.

²² Mant̄iw̄itam, mañcunucsáypa iga yaach̄iyi iga man̄an̄químpa con ȳip̄ an̄m̄ati, porque da juchañ man̄jáyáy ȳip̄ toto. ²³ Jodón̄aji iga jém tant̄iw̄i Timoteo cutsigayñet̄awum. Siiga jobittim núcpa ȳim̄ an̄wagananicpa cuando nicpa mánám̄ta mimichtam.

²⁴ Dioschitaami it̄ump̄iy jém pastor jém miñmadayt̄ampáppic jém Dios in̄m̄ati y it̄ump̄iy jém tant̄iw̄itam jém ic̄up̄icneyajw̄ip̄ Cristo. Jém miññeyajw̄ip̄ de jém naxyucmi Italia micutsadayt̄ampa w̄ati Dios.

²⁵ Dios miw̄iwadayt̄amiñ iñt̄ump̄iytam. Amén. Jemum cuyaj.

²² Wattaami juuts nĩmpa jém Dios inĩmati. Siiga no más inĩxajamatõpa y da iniccupacpa juuts nĩmpa jém Dios inĩquĩmayooyi, jesic inĩyaac minimĩgõyaytap. ²³ Siiga tum pĩxiĩ imatõpa jém Dios inĩmati, pero da iwatpa juuts nĩmpa jém Dios inĩquĩmayooyi, jesic jém pĩxiĩ jex juuts tum pĩxiĩ iámpa iwiĩpac tum tescatjom. ²⁴ Iámpa juuts jém iwiĩpac, jesic ocmi iccáypa jém tescat, jeeti rato ijaamañnotpa juuts jém iwiĩpac. ²⁵ Pero siiga tum pĩxiĩ seguido iámpa jém wibic anĩquĩmayooyi, jesic da ijaamañnotpa, seguido iwatpa juuts nĩmpa jém anĩquĩmayooyi. Jesic jém pĩxiĩ tsam wĩitpa. Yĩp anĩquĩmayooyi tactsacpa iga tammalwatpa.

²⁶ Siiga tum pĩxiĩ nĩmpa iga icupicpa jém Dios inĩmati, pero da wiap ichac iga migõypa y malnĩmpa, jesic namĩgõyaytap iyaac jém pĩxiĩ. Da ti cuwatcuy jém ireligion. ²⁷ Jém iniiwĩp jém wibic religiõn, jém dapic tãncay Dios iwiĩjom, iyõxpátpa jém yuctucuyaj y jém cunoyayaj jém yaachayajpáppic. Nawattaptim cuenta iyaac iga odoy imalwadiĩ juuts jém malopic pĩxiĩtam, jém imalwatyajpaap, jém ityajwĩp yĩp naxyucmi.

2

Wĩxi itumpiy jém pĩxiĩtam

¹ Mantĩwĩtam, siiga numa inĩcupictámpa jém tánõmi Jesucristo jém itwĩp sĩnyucmi, jesic odoy nejatõyooyi. ² Siiga tigĩypa tum pĩxiĩ jut inĩwattámpa culto agui wĩcuyajne, iccámne tum cucuma de oro y tigĩypatim tum pĩxiĩ tsam pobre, da wĩcuyajne, ³ jesic siiga inĩwĩpictõpa jém pĩxiĩ jém wĩcuyajnewĩp y inĩĩmáypa: “Mĩni micoñi yĩm jut wĩcom.” Pero inĩĩmáypa jém pobrepic: “Mich jemum teñi o coñi yĩm naxyucmi.” ⁴ Siiga inĩwattámpa así, jesic quejpa iga miñejatõyõypa. Michiy juuts jém malopic juez jém dapic cĩpĩjõypa parejo.

⁵ Mantĩwĩtam mantoytampáppic, matõntaami. Tanjatun Dios icupin jém pobreyaj yĩp naxyucmi iga ichiiba jém sĩnyucmĩpic riqueza cuando icupicyajpa Jesucristo. Dios ijĩycámayñe iga ichiiba jém derecho iga nicpa iti con Dios itumpiy jém tsampic itoyyajpa. ⁶ Pero mimichtam inĩchaawatta jém pobreyaj. ¿Que da inĩjõdõntam iga jém ricopic pĩxiĩ mitobáyáypa jém michpic immĩchi, pĩmĩmi mininicpa jém anjagooyicim? ⁷ Yĩptim rico tsam imalnĩmáypa jém tánõmi Cristo inĩyi, mimichtam inĩyĩtim.

⁸ Jém más mĩppic anĩquĩmayooyi, jém jayñewĩp jém Dios inĩmati, nĩmpa iga: “Toyĩ inĩĩwi juuts minitoytap inĩyaac.” Siiga numa inĩwatpa juuts nĩmpa jém mĩppic anĩquĩmayooyi, jesic sĩp inĩwĩwat. ⁹ Siiga miñejatõyõypa, jesic sĩp inĩwat tãncã. Inĩwatpa contra jém Dios inĩquĩmayooyi. ¹⁰ Siiga tum pĩxiĩ iwatpa juuts nĩmpa itumpiy jém Moisés inĩquĩmayooyi, pero tum punto da icupacpa, jesic iniiĩtim la culpa jextim juuts iga iwatpa acontra itumpiy jém anĩquĩmayooyi. ¹¹ Jém nĩmnewĩp iga: Odoy pejooyi, nĩmtim iga: Odoy accaoyi. Siiga da mipejõypa, pero miccaõypa, jesic mitãncayĩtim. Inĩwatnetim acontra jém Dios inĩquĩmayooyi. ¹² Siempre anĩmattaami jém anĩmati dapic malo. Wĩwattaami porque inĩjõdõntam iga Dios tacĩpinpa con jém tánõmi Cristo inĩquĩmayooyi. Yĩptim anĩquĩmayooyi tactsacpa jém malopic jĩxi. ¹³ Tanjatun Dios da iyaachanjampa jém pĩxiĩtam jém dapic iyaachanjamyajpa jém itĩwĩtam, icĩpinpa y ichiiba castigo. Pero jém iyaachanjampáppic jém itĩwĩtam, da ti icĩnpa cuando nũcpa jém hora iga cĩpĩjõypa Dios porque je iyaachanjapatim.

Siiga numa tanĩcupicpa jém Cristo, jesic tanĩwĩwatpa

¹⁴ Mantĩwĩtam, da para ti wĩ siiga tum pĩxiĩ iniiĩ fe, nĩmpa iga icupicpa Cristo, pero ocmi da iwĩwatpa juuts ixunpa Dios. Siiga nĩmpa iga icupicpa Cristo, pero da iwĩwatpa, jesic Dios da icĩacputpa. ¹⁵ Siiga tum tantĩwi o tum tanyõmtĩwi, jém icupicnewĩp Cristo, da inii ipuctucu ni datim inii tĩtam icũtpa cada jama, ¹⁶ pero siiga tum de mimichtam

iññímáypa: “Chogoyñicsim, najocoxwattaji iga odoy mixucuscaiñ, wíwiici”, pero siiga da iñchiiba titam itogóyáy jém imijtáy, ¿para ti wí iga iññímáy jempic? ¹⁷ Jesanetim jém iniitwíp jém fe, siiga da iwíwatpa, tsíy juuts caane. ¹⁸ Algunos nimpá iga icupicpa Cristo iga iciacpudiñ Dios. Pero tungac nimpá iga iwíwatpa iga iwípicstóniñ Dios. Pero da quejpa siiga tum píxiñ icupicpa Cristo siiga da iwíwatpatim. Numa cuando tanwíwadáypa jém tantíwítam, tsam wíquejpa iga tancupicpa Cristo. ¹⁹ Mich incupicpa iga nada más it tum Dios. Wí iga incupicpa. Jém mal espíritu icupicyajpatim iga no más tum Dios it y tsam cinyajpa, tsam cuetsáypa. ²⁰ Odoy cuixaji, ¿que da iñjodon siiga tum píxiñ ijispa iga icupicpa Cristo, pero da iwíwatpa, jesic jém ife da para ti wí? ²¹ Tanjodon ti iñasca jém wiñicpic tanjatunwewe jém Abraham. Dios ipictson jém Abraham juuts tum píxiñ dapic táncaiy porque iwat ti iñímáy Dios. Ichiiba idic jém imaníc Isaac juuts tum ofrenda jém altaryucmi. ²² Jesic quejpa iga jém Abraham iniit fe porque iwat juuts ixunpa Dios. Jempigam quejpa iga numa iniit fe cuando iwat juuts iñímáy Dios. ²³ Asíam cupacpa jém anmati juuts jayñeta: “Jém Abraham icupic Dios jeeyucmi Dios ipictson juuts tum píxiñ dapic táncaiy. Nímayta jém Abraham iga Dios iamigo.”

²⁴ Jesic iñixta iga Dios iwítsagáypa tum píxiñ itánca porque iwatpa juuts ixunpa Dios, da solamente iga iniit jém fe. ²⁵ Jesatim jém yomo Rahab, jém pejoypaap, Dios ipictson juuts tum yomo dapic táncaiy porque icyam jém wisten jém icuixayyappaap jém nas y ocmi inquejáy tungac tun iga odoy i wíñiñ imats. Jém yomo iwat juuts ixunpa Dios, jeeyucmi wítsagayta jém itánca. ²⁶ Siiga tum píxiñ imijtáy da anamajíy, jesic caane. Jesanetim siiga tum píxiñ nimpá iga iniit fe, pero da iwatpa juuts ixunpa Dios, jesic jém fe caanetim.

3

Jém píxiñ itots

¹ Mantíwítam, da wí iga agui jáyan de michtam michíytámpa juuts mimaestrotam. Iñjodontam iga aichtam jém amaestrotam más pími awíciipintap que jém dapic je maestro. ² Tantumpiytam wátcy tammalwatpa, pero él que da nunca malnimpá, jesic je tsam wíbic píxiñ. Wíap injac itumpiy jém imijtáy. ³ Jempictim tanaccámáypa tum freno jém cawaj iga tacupiguiñ. Jempam tananjacpa jém cawaj. ⁴ Jistaami jém barco tsam mij. Jém sawa tsam pími ininicpa. Pero jém barco iomi iyácsētpa jém barco, con tum xutu timón wíap ininic jut ixunpa. ⁵ Jextim jém tantots tum cosa tsam xutu, pero wíap ictsucum jáyan pleito. Wíap tannooquet jáyan mijtampic cuyyay con tum xutu jucti. ⁶ Jém tantots jex juuts tum jucti. Wíap ictsucum jáyan malopic cosa, tsam jáyanap hasta icmalwatpa tum píxiñ icutero. Tamalwadáypa itumpiy jém tamvida. Yíp jucti tsucum jém infierno. ⁷ Jém píxiñtam wíap imanxuwatyaj jém jimñi animatyaj, jém jon, jém tsañ y jém ityajwíp jém lamar. ⁸ Pero da i ni tum píxiñ wíap imanxuwat jém itots. Tsam pími malo, da ijicpa iga tananjacpa. Jex juuts jém veneno jém accaoypápic. ⁹ Con tantots tanjupitámpa tanjatun Dios y con tantots tanjuyitámpa jém tantíwítam jém Diospic iwatne juuts je. ¹⁰ Con jeetim tanjip tacujibóypa y tacujíyóypa. Mantíwítam, da wí iga inwattámpa jempic. ¹¹ Tumti níxcuy da wíap iput jém wíbic ni y jém tãpic. ¹² Mantíwítam, tum tsuj da wíap iwat jém aceitunas itim. Y tum uvas da wíap iwat jém tsuj itim. Datim wíap iput tumti níxcuy jém canani y jém wíbic ni.

Tanquejáypa jup jém wíbic jixi

¹³ Siiga mijixiíy algunos de mimichtam y incutiíyíypa ti ixunpa Dios, jesic seguido wíwati iga quejiñ iga mijixiíy y da mimalo. ¹⁴ Siiga agui micujóyíyóypa y tsam miñajajóypa y tsam incusúnyíypa itumpiy jém wítampic cosa para mich mismo, jesic odoy nacujíptaji iñyaac iga tsam mijixiíy. Siiga inwattámpa así, minimigóyaytap iñyaac,

da iññuumanjmatpa. ¹⁵ Yíp jixi da miññe de Dios. Tsucum yíp naxyucmi, jém Wocciwiñ ictsucum. ¹⁶ Porque jut it jém cujóyiyoooyi y jém najajooyi, agui cujiñayñe jém pixiñtam, tsam imalwatyajpa. ¹⁷ Jém iniitwip jém Dios ijixi ichacpa iga imalwatpa, da áñapa con itiwitam. Wibic pixiñ, da malo. Matóñóyapa. Iyaachanjampa jém yaachayajpáppic, iwíwadáyapa i quej. Seguido iwatpa juuts ixunpa Dios y da tamigóyáyapa. ¹⁸ Jut da áñayajpa jém pixiñtam y da i jém pleito, tsam anpicpa jém wibic jixi.

4

Da wi iga tantoypa jém cosa jém itwip yíp naxyucmi

¹ ¿Tíiga tsam míñatámpa con jém iñtíwítam? ¿Tíiga tsam it jém pleito? Tsucum jém malopic jixi iññamanjom iga míñatámpa. ² Mimichtam tsam inçusúníyapa jáyan cosa, pero da i michiiba, jeeyucmi tsam miccaóyapa. Tsam inçusúníyapa tungac pixiñ imichi, pero cuando da i michiiba, jesic tsam míñatámpa. Da impictsonpa titam iñxunpa porque da inwágáyapa Dios. ³ Inwágáyapa Dios alguna cosa, pero je da michiiba porque inwágáyapa iga immalwatpa. ⁴ A que mimichtam, inçupictip Dios. ¿Que da iñjodonjam siiga iñtoypa jém malopic cosa jém ityajwip yíp naxyucmi, jesic iñjóyixpa jém tanjatun Dios? Siiga iñtoypa jém malopic cosa, jesic eybic michiíyapa juuts enemigo de Dios. ⁵ Da xajanimpa jém Dios inmati: “Jém Dios iAnama, jém tachiiñewip Dios, tsam tatoypa y tawatpa cuenta iga odoy tantsagáyiñ jém Dios inmati.” ⁶ Numa, Dios tsam pimi tayaachanjampa. Asíam nimpá jém Dios inmati jut jayñeta: “Dios da iyoxpátpa jém pixiñ jém nacujíptapáppic. Pero iyaachanjampa jém dapic nacujíptap.” ⁷ Jesic wattaami juuts miñimáyapa Dios. Odoy jic iga micmalwatpa jém Wocciwiñ, jesic micupóyáyapa. ⁸ Cunúctaami Dios, jesic micunúcpatim Dios. Mitánçaiyciwiñ, cujichaayi inçi. Siiga miñimpa iga iñtoypa Dios, pero iñtoypatim jém malopic cosa, jém ityajwip yíp naxyucmi, jesic cujichaayi jém iññanama, tsaci iga immalwatpa. ⁹ Anyáctaami. Wejtaami. Tsaci iga mixictámpa, wejtaami. Jém maymáyaj setpa iga anyaaqui. ¹⁰ Miñi micosteñi jém tanjatun Dios iwíñjom juuts da ti miwíap, jesic Dios micquímpa yucmi.

Jém icujíypáppic jém itwi

¹¹ Mantíwítam, odoy nacujíyamtajá con jém iñtíwítam. Jém icujíypáppic jém itwi, icujíypatim jém Dios inquímayooyi. Siiga icujíyapa jém wibic anquímayooyi, jesic tsíyapa juuts tum juez, da iwatpa juuts nimpá jém anquímayooyi. ¹² It tum jém Tachiipáppic jém Anquímayooyi, jeetim jém Juez. Je wíap taciapcut. Wíaptim tactogoy. ¿Pero mimich miñapaap iga inçipinpa iñtíwi juuts mijuez?

Da tanjodon ti miñpa ocmi

¹³ Amatonjtaami mimichtam, jém miñimpáppic iga: “Yíp jama o joymi anicpa tum atebet. Nicpa anyaj tum amtíy iga amáymayóyapa iga anwatpa tumiñ.” ¹⁴ Ni da i ijodon ti naspá joymi. ¿Tí jém tamvida? Jex como tum oma. Itpa tum rato, pero ocmi togoypa. ¹⁵ Más wi iga miñimpa iga: “Siiga Dios iwianjam, jesic tanaitpa tamvida y tanwatpa cualquier cosa.” ¹⁶ Pero mimichtam tsam minicujíptap iñyaac, iñjispá iga agui miwíap. Agui malo iga minicujíptap iñyaac. ¹⁷ Jém ijodonpic iga wíap iwíwat, pero da iwatpa, jesic iwatpa táñca.

5

Chiitap jixi jém ricopic pixiñtam

¹ Matonjtaami miricotam, anyáctaami, pimi anwejtaami porque miñpa tum mijpic yaachaji para mimichtam. ² Pucneum jém iñriquesa, jém impuctucu icútneum wechi.

³ Jém oro y jém plata jém iniitw̄ip, s̄ip itsneum. Cuando íñixpa iga itsneum, jesic quejpa iga datim jáypa jém immijtay. Pucpatim. Miñootaptim juctjom. Ininjtuumawatpa jáyay jém riqueza para jém íñajpigam jama. ⁴ Mimichtam miricopic, da injw̄iyoj jém immozoyaj, s̄ip miquejajwadayñe iga da injw̄iyoj. S̄ip matónañetawum jém quejaj jém tanjatun Dios iwiñjom. ⁵ Tsam p̄imi miwiñt ȳip naxyucmi. Inwat titam íñjis íñanamanjom. Cusum injwat titam íñxunpa. Mijex juuts tum xix acp̄inetaw̄ip iga accaatap. ⁶ Miricopic mipixiñtam tsam mimalo. Íñchi castigo jém pixiñtam jém dapic táncaiy, iniccaayaj, y jeeyaj ijicyaj.

Tanyaach̄iypa iganam tananjóctámpa jém tánomi

⁷ Jeeyucmi, mant̄iwitam, yaach̄iyi iga mimalwadaytap hasta miñgacpa ȳip naxyucmi jém tánomi. Jém yoxayajpaap camjom injócpa jém wiñtipic tuj y jém ocm̄ipic tuj iga wiñiñ ipictson jém wibic cosecha. ⁸ Yaach̄iyi, mimichtam, iganam injóctámpa jém tánomi. Odoy tsaci jém Dios injmati porque da jáyñe miñpa jém tánomi. ⁹ Mant̄iwitam, odoy naquejajwadaytamtaji con jém íñt̄iwitam, jesic mimichtam Dios datim mic̄ipinpa. Jém juez it jém puerta anaca. ¹⁰ Mant̄iwitam, jistaami jém wiñicpic anmat̄ciwiñ jém injmatyajpáppic jém Dios injmati. Jeeyaj iyaach̄iyaj cuando yaachwatyajta. W̄i siiga tanyaach̄iytampatim taichtam cuando tayaachwattatp. ¹¹ Numa mannímáypa, tanjodon iga tsam maymay jém pixiñtam jém iyaach̄iyñew̄ip cuando yaachwattap. Michtam immatoneta ti íñasca jém Job iga tsam iyaach̄iy cuando yaachwattap y tanjodontim iga ocm̄i Dios tsam iw̄iwadáy jém Job. Quejpa iga tatoypa Dios y tayaachanjampa.

¹² Y s̄ip mant̄iwitam, manchiiba tum wibic jixi. Odoy tsaci Dios juuts tum testigo iga da mimigóypa. Odoy n̄imi: “W̄ijodios.” Cuando miñimtooba iga: “J̄i”, jesic n̄imi “J̄i.” Cuando miñimtooba: “Da”, jesic n̄imi “da” iga odoy michiitámiñ castigo Dios.

Cuando tanajwejpátpa Dios, je tsam tayoxpátpa

¹³ Siiga tum de mimichtam miyaachwattap, jesic w̄i iga injwejpádiñ Dios. Siiga mimaymay, jesic wánaayi Dios tum wañi iga injcujíppa Dios. ¹⁴ Siiga tum de mimichtam mimimne, jesic w̄i iga injwejáypa jém anjagooyiyaj, jém injacyajpáppic jém Dios ipixiñtam, iga injwejpádayyajiñ Dios para jém mimnew̄ip, iccámayyajiñ aceite jém tánomi Jesucristo íñiyimi. ¹⁵ Siiga numa iniit fe cuando injwejpátpa Dios, jesic p̄ispa jém mimnew̄ip. Jém tanjatun Dios icp̄ispa. Siiga táncaiy, jesic Dios iwadáypa perdón jém itánca.

¹⁶ Jeeyucmi mannímáypa, Nanmadaytamtaji jém íñtánca con jém íñt̄iwitam. Nanwejpádaytamtaji Dios con jém íñt̄iwitam iga mipistámiñ. Cuando tum wibic pixiñ, dapic táncaiy, injwejpátpa Dios con itump̄iy jém íñnama, tsam w̄iap, Dios imatónáypa. ¹⁷ Jém profeta Elias pixiñtim juustim taichtam. Inwejpát Dios con itump̄iy íñnama iga odoy chijóyiñ jém tuj. Y numa tres años y medio da chijóy tuj jém naxyucmi. ¹⁸ Ocm̄i cuando injwejpátpa Dios eybic, moygacum chíoy jém tuj. Jesic jém naxyucmi eybic w̄iputpa jém cosecha.

¹⁹ Mant̄iwitam, siiga algunos de mimichtam ichacpa jém numapic anmati y siiga tum de mimichtam inicsetpa iga icupiguiñ eybic jém numapic anmati, jesic mich injw̄iwatpa. ²⁰ Jodónataami siiga íñyoxpátpa tum jém tant̄iw̄i, jém táncaiyw̄ip, iga ichacpa jém malopic tun, jesic tsam íñyoxpátpa iga odoy togóyiñ jém íñnama porque wadayta perdón jém itánca tsam jáyay. Jenum cuyaj.

Jém wiñtipic carta jém ijayñewiip Peto

Jém Peto ijáyáy jém Dios ipixiñtam jém nicnewiip juumi

¹ Ich aPeto. Acupiñne jém Jesucristo iga atsiy juuts tum apóstol. Siip manjáyáypa mimichtam miIsraelpic mipixiñtam, micupóyaytañwiip hasta jém tungac naxyucmi jém Ponto, Galacia, Capadocia, Asia y Bitinia. ² Micupiñneta jém tanjatun Dios. Tsam wiñigam ijodon Dios iga michiytampa juuts jém imanictam. Dios iAnama micujicháyayta jém iñanama iga wiap inwatta juuts ixunpa jém Jesucristo. Micupiñneta iga miwitsagayta jém iñtanca con jém Cristo iñipiñ. Siip anwágáypa Dios iga miwíwadaytamiñ y iga odoy iniittamiñ jém cobacpiji.

Tananjóctampa jém tiempo iga Dios tawíwadaytampa

³ Tanjucijiptampa tanjatun Dios jém tánomi Jesucristo ijatun. Dios tacnayxetta eybic porque tsam tayaachanjanta. Jeeyucmi iganam taifta yíp naxyucmi, tananjóctampa jém tiempo cuando nicpa taifti con Dios. Tanjodon iga numa porque pis jém Jesucristo de jut it jém caaneyajwiip. ⁴ Dios taccáyayñe tum wibic herencia siñyucmi. Da i wiap imiswat. Tum wibic cosa cuáyñe, da togoypa, dapic jex juuts tum moya iga xichpa. ⁵ Mimichtam incupictampa iga Dios wiap miyoxpáta, jeeyucmi miwattampa cuenta con jém ipimi iga da ti iñnascaaba hasta núcpa jém tiempo cuando taciacputtampa. Siip witsacneum itumpiy cosa. Jesic cuando núcpa jém iñanpigam jama, quejpa ti tawadaytampa Dios.

⁶ Jeeyucmi wi iga mimaymáyatamiñ mex iga siip watciy mipoyyaachwattamtap, micutitstamtap. ⁷ Cutitstap jém oro con jucti siiga nunta oro. Jesanetim mimichtam siiga iñyaachiytampa cuando miyaachwattamtap, jesic quejpa iga numa incupictampa Dios. Siiga iñyaachiytampa, pero da iñchacpa jém Dios inmati, jesic cuando miñgacpa Jesucristo, miwipictsontampa Dios, tsam micujiptampa.

⁸ Mimichtam tsam iñtoytampa jém Jesucristo mex da iñixñeta. Da wiap iñixta, pero iñjodontam iga je wiap miyoxpáta. Jesic tsam mimaymáyata con jém wibic maymáyaj juuts jém itwip siñyucmi, jém dapic wiap tanañmat con yíp naxyucmic anmati. ⁹ Mimichtam incupicneta jém Cristo, jeeyucmi Dios miciacputneta.

¹⁰ Jém wiñicpic anmatciwiñ ninyaj iga Dios tsam itoypa jém pxiñtam, núcpa jama iga iciacputpa. Pero como da iwicutiyiyay, tsam icipinyaj jeetim inmati jém ijayñeyajwiip iga ijodónayajiñ ti nimtooba. ¹¹ Jém Dios iAnama, jém tachiñewiip jém Cristo, icjodóna jém wiñicpic anmatciwiñ iga tsam yaachwattap jém Cristo yíp naxyucmi. Ocmi acpistap, nanictap siñyucmi. Jeetim anmatciwiñ tsam icipinyaj jém inmati iga ijodónayajiñ i iñascaaba jempic y juchis naspa jexpic cosa. ¹² Dios inquejáy jém wiñicpic anmatciwiñ iga jém inmati da para jeeyaj, pero para taichtam. Siip mimichtam impictsonta jeetim anmati cuando oy inmadayta jém inmatyajpáppic jém wibic anmati con jém Dios iAnama ipimi, jém cutsatnetawip yíp naxyucmi. Hasta jém siñyucmic pxiñtam ijodónatooba ti nimtooba jém anmati.

Dios ixunpa iga tanwíwattamiñ yíp naxyucmi

¹³ Jistaami jutsap inwíwatta juuts ixunpa Dios. Naittaami jém wibic jixi iñanamanjom. Odoy tsaci iga ininjóctampa jém wibic cosa jém tajycamayñewiip Dios iga tachiiba porque tsam tatoypa. Tampictsonpa cuando miñgacpa yíp naxyucmi jém tánomi Jesucristo. ¹⁴ Siip wattaami juuts jém wibic tsixtam, jém icupicyajpaap jém ijatun. Tsactaami iga immalwattampa juuts jáy inwatta wiñic cuando danam iñixpicneta Dios. ¹⁵ Titam

inwattámpa, wíwattaami juuts tum wibic p̄ixiñ juuts ixunpa Dios. Porque da tãñcaíy ni uxañ jém tanjatun Dios jém tacupinewiip. ¹⁶ Porque nimpa así jém Dios inmati: “Tsaci itumpiy jém inñtãñca iga cuáyiñ jém inñanama porque ich da atãñcaíy ni uxañ.”

¹⁷ Siiga numa Dios inñjatun, jesic cñtaami iga immalwattámpa iganam miitta yíp naxyucmi. Porque Dios icipiñpa parejo itumpiy jém p̄ixiñtam titam iwatyaj. ¹⁸ Michtam inñjodon iga Dios taciaputta iga da más tanwatpa jém malopic cosa yíp naxyucmi, jém dapic para ti wí, juuts iwatyaj jém tanjatunwewetam. Inñjodontim iga da tajoáy tantãñca con jém oro ni jém plata jém cuyajpápic, ¹⁹ pero tajoáy tantãñca con jém Cristo inñipiñ jém tsampic wí. Jém Cristo juuts tum cordero jém dapic inii ni tum mancha ni dapic misane. ²⁰ Wiñgam cuando danam iwatne yíp nas, Dios ijodon iga jempigam iyoáypa jém p̄ixiñtam itãñca. Jesic ocmi cuando núctooba jém inñpigam jama, wiñquej jém Cristo iga tayoxpátámpa. ²¹ Tachiita jém jixi iga tancupictamiñ Dios jém icpisnewiip jém Cristo, ocmi ininic jém Dios inwimi. Jesic tancupicpa iga Dios icutum wiap tayoxpát. Tananjóctámpa jém tiempo cuando nicpa tañti con Dios.

²² Siip mimichtam wiap inñuntatoýta jém inñiwitam porque cuáñeum inñanama. Cuando moj incupic jém numapic anquímayooyi, jesic Dios inñanama miccáyay inñanamanjom jém naja y jém jooya. Jesic natoytamtaji con jém inñiwitam con itumpiy inñanama y itumpiy impimi. ²³ Miñayxetnetámum porque incupicneta jém Dios inmati jém dapic cuyajpa. Yíp jomipic vida, jém dapic cuyajpa, da jex juuts yíp naxyucmipic vida, jém cuyajpápic, jém michiñewiip jém inñjatun. ²⁴ Nimpa jém Dios inmati:

Jém p̄ixiñtam jém ityajwiip yíp naxyucmi jex juuts jém pim jém itwiip copjom.

Jém p̄ixiñtam ipimi jex juuts jém pim imoya.

Titspa jém pim, túcpa jém imoya.

²⁵ Pero Dios inmati da nunca cuyajpa.

Yíp anmati jeetim jém minmadayñetawwiip mimichtam iga Dios taciaputtámpa.

2

¹ Jesic tsactaami itumpiy jém malopic jixi. Odoy migooyi, odoy nimanñtaayaji iga inñiwatpa, odoy cunaíyooyi, odoy cujíyooyi. ² Mijex juuts tum xutu tsixi jém yaguiñpic nay, tsam tsútstooba. Jesanetim mimichtam yaguiñ incupicneta Dios, jesic métstaami jém wibic anmati, jém dapic motne iiti con jém migooyi. Jém anmati tsam tayoxpátpa iga más y más wiap tanwatta juuts ixunpa Dios hasta núcpa jém jama cuando taciaputtámpa Dios. ³ Mimichtam inñjodontam iga Dios tsam tatoypa.

Jém Cristo je jém wibic tsa

⁴ Siip cunúctaami jém tánomi Cristo. Je juuts tum wibic tsa jém tachiipápic vida. Jém p̄ixiñtam ipatsayyaj jém tsa, pero Dios icupin para je porque iix iga agui wí. ⁵ Mimichtam mijex juuts jém tsaayaj para jém tic inñtaana, pero iniitta vida. Jesic jíctaami iga Dios mipictámpa iga iwatpa tum imastic jut itpa jém Dios inñanama. Jici iga miccámpa Dios juuts tum mipanij iga incuyoxatámpa Dios. Jesic Dios iwianjam iga inñwatpa jempic porque Cristo mimichitam. ⁶ Nimpa así jém Dios inmati jut jaychacne:

Ich antsac tum tsa jém naxyucmi Israel jut mojpa anacten jém antic.

Agui wibic tsa, ich mismo ancupiñne.

Jém icupicnewiip yíp wibic tsa, da i wiap ichaawat.

⁷ Siiga incupictámpa, jesic inñjodontam iga tsam wibic tsa. Pero jém dapic icupicpa, inñascaaba juuts nimpa jém Dios inmati jut jaychacneta:

Jém iwatyajpápic jém tic ipatsayyaj jém tsa.

Pero ocmi jeetim tsa pinñta.

Siīp jeetim tsa icóppacne jém tic.

⁸ Nimitim jém Dios in̄māti:

Jém p̄ixiñtam in̄epyajpa ipuy ȳip tsaayucmi.

Yíptim tsa ipaccaaba jém p̄ixiñtam.

In̄eppa ipuy jém p̄ixiñtam porque da iwadāp caso jém wib̄ic an̄māti. Dende wiñigam Dios nim iga togoyyajpa jém dap̄ic icup̄icyajpa jém wib̄ic an̄māti.

Jém Dios ip̄ixiñtam jém im̄ichip̄ic

⁹ Mimichtam micup̄in̄eta Dios iga mim̄ichata. Miccámta juuts mipanijtam iga in̄cuyoxatámpa jém an̄jagooyi Cristo. Michíytámpa juuts tum wib̄ic mip̄ixiñtam dap̄ic táncáiy. Mimichtam jém Dios mim̄ichitam. Micup̄in̄tamta iga in̄wattámiñ itump̄iy jém wib̄ic cosa jém iwatnew̄ip Dios. Mitopta jém piichc̄im, minin̄ictamta jém juctian̄tsocajom. ¹⁰ Mimichtam wiñic da je Dios mip̄ixiñtam, pero siīp Diosam mip̄ixiñtam. Wiñic da i miyaachanjámpa, pero siīp Dios miyaachanjámtámpa.

Taitta ȳip naxyucmi iga tan̄cuyoxatámiñ Dios

¹¹ Mant̄iwitam mantoytampáppic, mimichtam mijextam juuts jém p̄ixiñtam jém nicpáppic juumi porque danam miñúcne jém in̄ñicmi sin̄yucmi. Siīp man̄cunucsáypa iga odoy jīici iga jém malop̄ic j̄ixi micmalwatpa. Porque jém malop̄ic j̄ixi tsam in̄in̄japa jém in̄anama. ¹² Iganam miitta jém tun̄gac p̄ixiñtáman̄jom, jém dap̄ic iixp̄icyajpa Dios, w̄iwattaami. Jesic siiga miñímáypa iga mich micriminal, núcpa jama iga iixyajpa iga numa in̄w̄iwatne y da ti mal in̄watneta. Jesic jém tun̄gac p̄ixiñtam tsam icuj̄ipyajpa Dios cuando núcpa jém jama iga ic̄ip̄in̄pa jém p̄ixiñtam.

¹³ Siempre cup̄ictaami jém an̄jagooyiyaj, jém iccámneyajw̄ip jém p̄ixiñtam, porque jem̄pam ixunpa jém tán̄omi Cristo. Tan̄cup̄ictámpa jém más mijp̄ic an̄jagooyi, jém rey, porque je iniit jém más mijp̄ic cargo. ¹⁴ Tan̄cup̄ictámpatim jém gobernador jém iccámnew̄ip jém rey. Porque accám̄ta jém gobernador iga ichiñ castigo jém imalwatyajpaap y iga cuj̄iptāiñ jém iw̄iwatyajpaap. ¹⁵ Dios ixunpa iga in̄cup̄ictámpa jém an̄jagooyiyaj porque jem̄pam in̄in̄j̄iyajpa jém malop̄ic p̄ixiñtam, jém dap̄ic j̄ixīy, jém mimaln̄imaypaap.

¹⁶ Siīp da más michíyta juuts tum preso porque Dios miciacputnetámum. Micut̄sigayñetāwum iga in̄w̄iwattámiñ. Jesic odoy j̄isi iga w̄i iga immalwattámpa juuts mich in̄xunpa. Siīp cuyoxataami Dios juuts tum nunta esclavo. ¹⁷ W̄ixtaami itump̄iy jém p̄ixiñtam, odoy jóyixtaami. Natoytam̄taji con tant̄iwitam jém icup̄icneyajw̄ip Cristo. C̄in̄taami Dios. W̄ixtaami jém rey.

Tanyaach̄iypa cuando tayaachwattap juuts iwat jém Cristo

¹⁸ Miesclavotam, w̄ixtaami jém in̄ñomi. Siempre wattaami titam miñímáypa. Da no más in̄cup̄icpa jém wib̄ic p̄ixiñ jém tsamp̄ic mitoypa, pero cup̄ictaam̄tim siiga malo jém in̄ñomi siiga tsam mip̄im̄iypa. ¹⁹ Siiga chiitap castigo tum p̄ixiñ cuando da ti iwatne y siiga iyaach̄iypa porque ijod̄on̄ iga iixpa Dios, jesic w̄ixtap jém p̄ixiñ. ²⁰ ¿Pero tiiga tan̄cuj̄ippa tum p̄ixiñ siiga iyaach̄iypa cuando chiitap castigo iga imalwatne? Pero siiga michiitap castigo cuando in̄w̄iwatne y siiga in̄yaach̄iypa, jesic numa miw̄ixpa Dios. ²¹ Dios tacup̄in̄ta iga tan̄w̄iwattámpa y tannascaaba jém yaachaji porque jém tán̄omi Jesucristo tsam p̄imi yaachwattá taichtam tan̄cuyucmi. Tatsagayta tum ejemplo iga tantún̄iypa jém Cristo y tan̄wattámpatim juuts je. ²² Je da iwat ni tum tánc̄a. Da i imigóyay. ²³ Cuando tsam maln̄imayta jém tán̄omi Cristo, da icutson̄, da imaln̄imay jém ienemigoyaj. Cuando tsam p̄imi yaachwattá, da icumec jém ienemigoyaj. Pero je

ichagáy iga ichiñ Dios castigo porque ijodon iga icipinpa parejo. ²⁴ Jém Cristo iyaac nachitá iga accaata cunusyucmi iga tajoáy tantánca. Tapictónáy taichtam tancastigo imijtayyucmi iga tactsactamiñ jém tantánca, iga seguido tanwíwattamiñ yíp naxyucmi juuts ixunpa Dios. Accoowata jém Cristo iga mimichtam mipistamiñ. ²⁵ Mimichtam mijextim idic juuts jém borregoyaj jém togoyñewip. Pero sip mixettámum jém wibic pastorcim jut it jém tawadaypápic cuenta jém tánanama.

3

Anquímeyajtap jém ancoomíyyajwip

¹ Jesanetim miyomtam mijaayiwip. Siempre wattaami juuts miñimáypa jém inwídaya. Jesic siiga algunos da icupictooba jém Dios inmati cuando ininmadáypa, jesic núcpa jama iga icupicpatim Cristo ² cuando iix jém iyomo iga agui iwíwatpa porque icinpa Dios y iwixpatim jém iwídaya. ³ Odoy cusúniyi jém wibic cuyajcuy, jém wibic puctucu y jém cosa de oro. Odoy meetsi jutpic inwítsacpa jém inway iga micusúniyiñ jém pxiñtam. ⁴ Pero wí iga miixtap porque wibic miyomo y wibic jixi iniiit íñanamanjom. Jém wibic jixi da togoypa juuts jém cuyajcuy. Siiga da mimalo y da michoti, jesic Dios más iwianjam que jém cuyajcuy de oro. ⁵ Jesanetim wiñgam jém wibic yomtam, jém icupicneyajwip Dios, iniityajtim jém wibic jixi íñanamanjom. Seguido iwatyajpatim juuts iñimáypa jém iwídaya. ⁶ Jempictim iwat jém Sara. Icupictim jém iwídaya jém Abraham. Iñimáy jém Abraham iga: Mánomi. Sip mimichtam michiytampa juuts jém Sara iyommanictam siiga seguido inwíwattampa y da ti inçintampa.

⁷ Jesanetim mipixiñtam miyoomiywip, winaiti jém iñyomo juuts tum pxiñ jixiywip. Wídaji jém iñyomo. Jistaami iga jém yomtam da jex ipimi juuts tum pxiñ. Jistaamitim iga incuistictam inwagapictsontampa titam tajycámayñe Dios, jém vida jém dapic cuyajpa. Porque siiga da inwíwadáypa jém iñyomo, jesic da wíap ininwejpátta Dios.

Yaachwatta jém Cristo iga iyoxpátta jém táncaiywip

⁸ Sip mannimaytampa inñumpiytam. Naittaami tumti jixi con jém tantíwítam, natoytamtaji juuts miñuntatíwítam. Yaachanjamtaami jém yaachayajpápic. Odoy nacujíptaji iñyaac. ⁹ Siiga i mimalwadáypa o mimalnimáypa, odoy cianseedaayi. Más wí iga tanwíwadáyíñ jém tamalwadaypápic porque cuando Dios tacupin, tajycámáy iga tawíwadáypa. ¹⁰ Nimpa así jém Dios inmati:

Siiga inwattooba jém wibic cosa yíp naxyucmi,

siiga inxunpa iga miwídiñ,

jesic tsaci iga immalnimáypa jém inñíwítam.

Odoy migooyi.

¹¹ Tsaci iga immalwatpa, siempre wati jém wibic cosa.

Meetsi con itumpiy íñanama jutsap inwinanigáy jém inñíwítam.

¹² Porque Dios siempre iixpa jém iwíwatyaajpaap.

Iwatpa cuenta.

Imatonpa Dios cuando inwejpátayajpa.

Pero ijóyixpa jém imalwatyaajpaap.

¹³ ¿I mimalwadáypa siiga inwíwatpa con itumpiy íñanama? ¹⁴ Pero siiga miyaachwattap porque inwíwatpa juuts ixunpa Cristo, jesic maymáyají porque Dios miwíwadáypa. Odoy cini jém micumecpaap. Odoy wadaayi caso. ¹⁵ Siempre jistaami íñanamanjom iga jém Jesucristo je tánomi. Ittaami listo iga incutsonpa cuando i micwácpa tiiga injodon iga Dios miwípicsonpa. Pero wixi, chocoymi anmadaayi. Jistaami iga Dios taixtampa. ¹⁶ Siempre wíwati iga da inñispa iga mitáncaiy íñanamanjom. Jesic siiga i

mimalnámáypa, tsam tsaayajpa cuando ixtap iga siempre inwíwatpa juuts minquejayñe jém tánQmi Cristo. ¹⁷ Siiga Dios ixunpa iga miyaachwattap cuando inwíwatpa, jesic it wí. Pero da wí siiga miyaachwattap porque immalwatne.

¹⁸ Tsam pimi yaachwatta jém tánQmi Cristo. Accaata iga tayojoyta tantánca tunçiy para siempre. Accaata jém wibic pixiñ iga iyojáy itumpiy jém malopic pixiñtam itánca iga tananictamtaiñ Dios iwiñjom. Accaata jém Cristo imijtay, ocmi pis, eybic ipictson ianama. ¹⁹ Cuando ca jém imijtay, oy inmadáy jém wibic anmati jém caaneyajwip jut pajneyajta. ²⁰ Anmadayyajta jém pixiñtam ianamayaj, jém dapic icupicyaj wiñgam cuando jém Noé iwat jém mijpic barco. Jeetim tiempo cuando Dios tsam iyaachiy iganam injóctip iga ichacyajiñ jém pixiñtam iga imalwatyajpa. Pero da wati ciiputyaj solamente ocho jém pixiñtam y yomtam. Cuando miñ jém mijpic nicoma, ciiputyaj jém niwiñpacyucmi. ²¹ Jesanetim sip jém ni tayoxpátpa iga taciacputtamiñ cuando tacchintamta nicim. Da tacchintamta iga cuáyiñ tannaca. Pero cuando tacchintamta, tanwágáypa Dios iga tawítsagáyiñ tantánca. Tanjodon iga wíap tawadáy Dios porque icpis jém tánQmi Jesucristo. ²² Sip nicne sinyucmi jém tanjatun Dios inwimi jut accámta iga jém más mijpic anjagooyi iga injaguiñ itumpiy jém sinyucmipic pixiñtam y itumpiy jém anjagooyiyaj, jém ityajwip jutquej.

4

Tañcuyoxap Dios con jeetim pimi jém tachiñewip

¹ Tsam yaachwatta jém tánQmi Cristo cuando oy iti yíp naxyucmi. Jesic mimichtam naittaamitim jeetim jixi juuts jém tánQmi Cristo. Jictaami iga miyaachwattamtap, jesic quejpa iga inñchacneum jém inñtánca. ² Siiga jempam tanwattámpa, quejpa iga tasiítámpa yíp naxyucmi juuts tum pixiñ dapic icupicpa jém malopic jixi, pero tanwattámpa jém wítampic cosa juuts iwianjam Dios. ³ Sip cusum inwatta juuts iwianjamyaj jém tungac pixiñtam, jém dapic icupicyajpa Dios. Tsam pimi immalwatne idic. Tsam incusúníypa idic jém malopic yomtam y jém tungac malopic cosa. Tsam idic miucpa, tsam mixínap. Tsam miuquiap con jém ucyajpáppic pixiñtam. Tsam inñjiswa idic jém watnas jém ijóyixpáppic Dios. ⁴ Sip jeetim pixiñtam jém inñamigoyaj idic, agui mipooñanjamyajpa porque da eybic inwattámpa itumpiy jém malopic cosa juuts inwatneta idic. Jeeyucmi tsam mimalnámayyajpa. ⁵ Pero núcpa jama iga nanicyajtap jém Dios iwiñjom iga quejiñ jém itánca jut ciipiñyajtap itumpiy jém malopic pixiñtam jém ityajwip vivo y jém caaneyajwip. ⁶ Jeeyucmi anmadayyajtatim jém wibic anmati jém pixiñtam jém caaneyajwip cuando vivoyaj. Ciipiñyajtap jeeyaj juuts itumpiy jém pixiñtam jém ityajwip yíp naxyucmi, pero Dios iciacputpa iga nicpa itiyaj ianamayaj jut it Dios.

⁷ Sip núctooba jém inñapic jama cuando cuyajpa itumpiy cosa. Wí iga mijixiityámiñ, ittaami al tanto, anwejpátaami Dios. ⁸ Pero más ixunpa Dios iga tanatoytamtaiñ con jém tantiwitam. Porque siiga numa tantoypa jém tantíwi, wíap tanwadáy perdón jáyan jém itánca. ⁹ Wípicsontaami jém tantiwitam, jém miññeyajwip juumi. Acwíctaami, chiitaami lugar jut monpa. Odoy cujiyaami. ¹⁰ Cada tumtum de mimichtam michiñeta Dios tum pimi iga wíaiñ inwatta jém Dios iyoxacuy. Jesic con jeetim pimi cuyoxataami jém inñiwitam juuts tum wibic miyoxaciwiñ porque cada tumtum tachiitamta tungac jém yoxacuy. ¹¹ Jesic siiga wíap inñmat jém Dios inmati, anmati juuts tum jém Dios inmatciwiñ. Siiga incuyoxap jém tantiwitam, wíwadaayi con itumpiy impimi, jém michiñewip Dios. Siiga jempic tanwattámpa, jesic tsam cujítap jém tanjatun Dios porque tançupictámpa jém tánQmi Jesucristo. Wí iga tançujíptamiñ jém tanjatun Dios para itumpiy tiempo porque je iniit itumpiy ipimi. Amén.

Jém Dios ipixiñtam wiap iyaachiyaj jém yaachaji

¹² Mantiwitam mantoytampáppic, odoy ámanjactaami cuando iññascatámpa jém mijpic yaachaji iga micutítstamtap. Odoy jisí iga jém Dios ipixiñtam da iññascayajpa jém yaachaji.

¹³ Pero maymáyaataami cuando iññascatámpatim jém yaachaji juuts iññascane jém tánomi Jesús. Porque núcpa jama cuando tsam pími mimaymáyatámpa cuando miñgacpa yíp naxyucmi jém tánomi Jesucristo con itumpiy ipími. ¹⁴ Siiga tsam mimalnímaytap jém tánomi Jesucristo icuyucmi, jesic maymáyaataami porque iniit jém Dios iññanama iññanamanjom jém tachiipáppic jém Dios ipími. ¹⁵ Pero da wi siiga miyaachwattamtap porque iga miccaóypa, miñúmpa, immalwatpa o iga mitigiytigiy cúmpa jém tunḡac pxiñ iasunto. ¹⁶ Pero siiga algunos de mimichtam miyaachwattamtap iga micristiano, jesic odoy tsaaji, mas tanꞑujíptámpa Dios porque tanaif jém Cristo iññiyí.

¹⁷ Núcneum jém tiempo iga mojpá icipin Dios jém ipixiñtam jém imichipic. Siiga tacipin támpa taichtam, jém Dios tamichitam, ¿jesic ti iññascayajpa jém malopic pxiñtam jém dapic icupicyajpa jém Dios inmati? ¹⁸ Nimpa jém Dios inmati:

Tsam tánca iga ciacputyajtámpa jém wibic pxiñtam.

Jesic jém malopic pxiñtam jém dapic icupicpa Dios tienes que ipictsonyajpa jém mijpic castigo jém dapic cuyajpa.

¹⁹ Jeeyucmi mannímaypa siiga miyaachwattamtap porque jempam iwianjam Dios, jesic seguido wíwattaami, cupictaami iga Dios wiap miciaçputta. Tanꞑodon iga jém tanjatun Dios, jém iwatnewip itumpiy cosa, siempre iccupacpa juuts tajíycámayñe.

5

Anꞑúmyajtámpa jém icupicneyajwip Cristo

¹ Jesic miwídaytam, jém ininjactampáppic jém Dios ipixiñtam, sip mananꞑuímpa. Ich anaiftim jexpicim cargo juuts mimichtam. Ich ánixñe cuando tsam yaachwattá jém tánomi Jesucristo. Ich ananjócpatim jém tiempo cuando wiñquejpa eybic jém tánomi Cristo con itumpiy ipími. ² Wattaami cuenta jém Dios ipixiñtam jém anꞑuumayajpáppic jut miifta, jex juuts tum wibic pastor iwatpa cuenta jém iborregoyaj. Wattaami jém Dios iyoxacuy porque inwianjamta, juuts ixunpa Dios, da porque mipimiytamtap, ni porque incoñwiytamtooba tumiñ. Wattaami jém iñyoxacuy con itumpiy iññanama. ³ Odoy pimiyí jém impixiñtam juuts tum malopic anjagooyi. Pero wíwattaami mimichtam iga miixyajiñ jém impixiñtam iga inwíwatpa. ⁴ Jesic cuando wiñquejpa jém Cobacpic Pastor, jém tánomi Jesucristo, michiitamtap jém wibic corona jém dapic cuyajpa. Miwagaittámpa jém wibic juctianꞑocajom.

⁵ Jesanetim mimichtam jém dapicnam michamitam, wattaami juuts nimpa jém wídaytam jém ininjagooyiyaj. Jistaami iñtumpiytam jutsap inwíwadáy jém iññiwitam. Odoy jisí iga más miwíap que jeeyaj. Porque nimpa jém Dios inmati:

Dios da iwípicsonpa jém pxiñtam jém tsampic nacujíptámpa iyaac, pero tsam iyoxpátpa jém pxiñtam jém dapic nacujíptámpa iyaac.

⁶ Jesic costeeñayí jém Dios ipuycim. Jici iga minjacpa jém tanjatun Dios porque núcpa jama iga miwíwadáypa. ⁷ Odoy iniidiñ jém cobacpíji. Odoy jisí ti iññascaaba. Cijunꞑodaayí itumpiy jém imvida jém tanjatun Dios icijom porque tsam tawattámpa cuenta.

⁸ Jixiytaami, ittaami al tanto porque jém tánenemigo jém Wocciwiñ siba nocojom juuts tum mijpic cañ agui pímpa. Tsam imétsa ti icispa. ⁹ Odoy jici iga jém Wocciwiñ micmalwatpa. Seguido cupici iga Dios wiap miyoxpát. Jodonꞑataami iga jém icupicneyajwip Cristo icuwíti yíp naxyucmi, iññascayajpatim jeetim yaachaji juuts iññascatámpa mimichtam. ¹⁰ Da jáypa miyaachwattamta hasta que jém tanjatun

Dios, jém tsampic tatoypa, iyaac miyoxpáttámpa. Michiitámpa jém wibic jixi iga da ti mitogóyáypa, iga da i wiap mictsac jém wibic anmati. Michiitámpa jém ipimi iga odoy i wiañ micmalwat iga seguido inwíwattámpa juuts ixunpa Dios. Miñwejayñeta iga miwagaittámiñ con jém tánomi Jesucristo juñ it jém wibic juctiañtsoca jém dapic cuyajpa. ¹¹ Wi iga tançujíptámiñ jém tanJatun Dios para itumpiy tiempo porque je iniit itumpiy ipimi. Amén.

Anquímyajtap jém pixiñtam

¹² Síp mançutsadáypa yíp toto con jém tantíwi Silvano. Ich animpa iga wibic pixiñ. Da juchan manjáyáy iga mananquímpa ti wiap inwatta. Mananmadáypa iga iniittámiñ jém numapic tóyooyi jém tachiiñewíp Dios. Jesic odoy tsactaami jém numapic tóyooyi.

¹³ Jém Dios ipixiñtam, jém ityajwíp yim jém atebet Babilonia, micutsadáypa watidios. Jeeyaj cupiñneyajtatim juuts mimichtam. Midioschiibatim jém Marco jém tsíyñewíp juuts ich ammanic. ¹⁴ Mimichtam nadoschitamtají con tum anñacatsuuchi juuts tum seña iga minitoytamtap. Síp mimichtam jém Cristo mimichitam. Naiftaami jém wibic jixi iñanamanjom iga odoy ti inçiñtámiñ. Jemum cuyaj.

Jém segunda carta jém ijayñewiip Peto

Jém Peto ijáyá jém Dios ipixiñtam

¹ Ich aXimoy anniyitim Peto. Anꝥuyoxap jém Jesucristo. Ich accám iga aapóstol, jém acut-satnetawwip. Manjáyápa mimichtam jém inꝥupicnetanwip jeetim wibic anꝥuímayooyi juuts aichtam. Jeeyucmi tawipictsonꝥtámpa jém tanꝥatunꝥ Dios y jém tánꝥmi Jesucristo jém taCiacputpáppic. ² Wi iga más y más jáyanꝥap jém wibic tóyooyi y jém paz cuando más inꝥwixpictámpa jém tanꝥatunꝥ Dios y jém tánꝥmi Jesucristo.

Tumti jixi tanait con Dios

³ Tachiifatim jém ipimi iga wiañ tanwatta yip naxyucmi itumpiy jém witampic cosa juuts iwianꝥam Dios porque tánixpicneta jém Cristo. Tacupinꝥneta iga tampictsonꝥtámiñ jém Dios ipimi porque tsam iniit jém wibic juctianꝥsoꝥa, tsam cuáyñe ijixi. ⁴ Jeeyucmi tachi jém promesa tsam mij. Con ipimi tachiitámpatim itumpiy jém tsam witampic cosa, jém tsampic tayoxpátpa juuts tajycámayñe. Cuando tampictsonꝥpa jém witampic promesa, jesic tumti tanjixi con Dios. Tactsacpa iga tammalwatpa y iga tanꝥcusúníyꝥpa jém malopic cosa jém itwip yip naxyucmi. ⁵ Jeeyucmi mannímáyꝥpa, wattaami empeño con itumpiy iñanama iga más y más inꝥwíwattámpa juuts iwianꝥam Dios porque tsam iniit fe. Jesic cuando más inꝥwíwattámpa, impictsonꝥtámiñ jém wibic jixi. ⁶ Siiga iniitta jém wibic jixi, jesic wiꝥp ininꝥacta iñyaac iga odoy i micmalwadiñ. Siiga iñyaac mininꝥactap, jesic iñyaachíyꝥpa cuando miyaachwattap. Siiga wiꝥp iñyaachiyta, jesic más cuáyñe iñjixi. ⁷ Siiga cuáyñe iñjixi, jesic inꝥwinanigaytámpa jém iñtíwítam. Cuando inꝥwinanigáyꝥpa jém iñtíwítam, jesic iniitpa jém wibic tóyooyi.

⁸ Siiga jáyanꝥap yipyaj witampic cosa, jesic quejpa iga da iñxajaixpic jém tánꝥmi Jesucristo. Wiꝥp inꝥwatta jém Dios iyoxacuy. Da michíyꝥpa juuts tum pxiñ jém dapic para ti wi. ⁹ Pero jém dapic iniit yip wibic cosa jex juuts tum cáchtí, jextim juuts jém dapic juumi ixixóyꝥpa. Ijaamanꝥnot iga accáyayñeta jém itánꝥa jém iwatnewwip idic. ¹⁰ Jeeyucmi mantíwítam, wadaytaami caso iga inꝥwíwattámiñ con itumpiy impimi, jesic quejpa iga numa Dios micupinꝥneta y miñwejayñeta. Porque siiga seguido inꝥwíwattámpa, da nunca micutinꝥpa. ¹¹ Siiga inꝥwattámpa jempic, michiitámpa lugar iga miñúcꝥpa sinꝥyucmi. Tsam miwipictsonꝥtap juꝥt inꝥjacpa jém tánꝥmi Jesucristo, jém taCiacputpáppic, juꝥt da nunca cuyajpa ipimi.

¹² Jeeyucmi da antsacpa iga manacjísꝥpa yip wibic jixi iga odoy iñjaamanꝥnodiñ mex iga inꝥwijodonꝥtam jém numapic anꝥuímayooyi y da iñchacneta hasta siip. ¹³ Ich animpa wi iganam avivo iga mantsicyuspa iga odoy iñjaamanꝥnodiñ titam inꝥcuyucane. ¹⁴ Porque jém tánꝥmi Jesucristo acjodonꝥa iga dam jáyñe acaaba. ¹⁵ Anꝥwatpa empeño iga manchiitámpa yip wibic jixi iga cuando acaaneum, iñjístámiñ titam mannímáy.

Jém Peto iix cuando jém Cristo ipictsonꝥ itumpiy ipimi

¹⁶ Da mammigóyayta cuando oy manꝥaquejáy ti iñasca jém tánꝥmi Jesucristo, cuando oy yip naxyucmi con ipimi. Da je pxiñtam ijixquiimi. Porque aichtam ánixñeta ánixcuymi cuando jém Cristo ipictsonꝥ jém ipimi iga más mijpic anꝥjagooyi. ¹⁷ Ánixñeta cuando jém tanꝥatunꝥ Dios iccám jém Cristo iga más mijpic anꝥjagooyi con itumpiy ipimi. Ammatonꝥta jém Dios ijíyí jém wibic juctianꝥsoꝥajom. Nimpa iga: “Yip jém amManic jém tsampic antoꝥpa. Ich tsam amaymay con je.” ¹⁸ Aichtam mismo ammatonꝥta jém ijíyí, jém miññewwip sinꝥyucmi, cuando anꝥwaganaitta jém tánꝥmi Jesucristo jém cotsicyucmi

juṭ núc jém Dios ipimi. ¹⁹ Siip másṭim tanwíjodon iga da je miḡooyi jém anṃaṭi jém ijaychacnewiip jém wiñicpic anṃaṭicwiñ cuando inṃatyaj ti miñpa. Jesic mimichtam wí iga inṃadaytámpa caso jém inṃaṭi porque je jex juuts tum wibic jucti, jém tsocpáppic piichcim. Tsam tayoxpátpa jém wiñicpic anṃaṭi hasta icuquejama cuando químpa jém wítmatsa iñanamanjom. ²⁰ Wiñti jodónataami iga ni tum pxiñ da wiap ijs iyaac ti nimtooba jém wiñicpic anṃaṭi, jém ijaychacneyajwip jém wiñicpic profeta. ²¹ Porque jém wiñicpic profeta da nunca inṃatyaj ijiximi juuts je ixunpa. Pero jém Dios iAnama ichi jixi iga wiap inṃatyaj juuts iwianjam Dios.

2

Miñpa jém miḡooyajpaap (Jud. 4-13)

¹ Pero wiñic ittim idic jém Dios ipixiñtamanjom jém malopic profeta jém miḡooyapaap. Jesanetim siip ittim jém miḡooyajpaap mimichtamanjom. Miyamanquejáypa jém miḡooyi, jém tsampic mimalwadáypa. Innécyajpa jém tánQmi Cristo jém tajojayñewiip tantánca. Iga tsam imalwatyajpa jém pxiñtam, da jáypa ichiiba castigo Dios. Iñuntaactogoypa. ² Jáyan pxiñtam itúnyyaypa jém miḡooyi jém inimiñpáppic yíp malopic maestroyaj. Jeeyaj icuyucmi tsam malnímaytap jém numapic anquímayooyi. ³ Tsam icusúnyyaypa jém tumiñ. Jeeyucmi ijixquím jém miḡooyi iga mitobáypa jém iñtumiñ. Pero da jáypa chiitap castigo porque dende wiñigam Dios ijycámayñe iga icyojpa jém itánca jexpic pxiñtam.

⁴ Wiñic Dios da iwadáy perdón jém siñyucmic pxiñtam jém iwatnewiip tánca. Icot jém josjom, pajnetá jém piichcim, jém infierno, hasta que núc jém jama iga chipintap. ⁵ Ni datim iwadáy perdón jém wiñicpic pxiñtam, jém ityajwip yíp naxyucmi cuando it jém Noé. Dios icutsat jém diluvio iga ictogoypa jém malopic pxiñtam. Pero iciacput jém Noé jém inṃadayñewiip jém pxiñtam iga iwíwadiñ juuts ixunpa Dios. Ciacputyajta ocho con jém Noé. ⁶ Dios ictogoytim jém wisten attebet jém Sodoma y Gomorra. Iñooquet. Tsíy naps cuyjam. Iwadáy jempic iga tsíyñ juuts tum ejemplo jém wisten attebet para jém malopic pxiñtam jém miñpáppic ocmi. ⁷ Pero Dios iciacput jém wibic pxiñ jém Lot. Yíp pxiñ tsam anyác iga agui imalwatyajpa jém malopic pxiñtam. ⁸ Yíp wibic pxiñ iwaganait jém malopic pxiñtam. Itumpiy jama tsam ijispa ianamanjom, tsam anyácpa cuando iix y imaton iga pimi imalwatyajpa jeeyaj. ⁹ TánQmi Dios ijodon jutsap iciacput jém wibic pxiñtam, jém icupicneyajwip, cuando cutítstap. Pero jém malopic pxiñtam ichacpa aparte hasta núcpa jém jama iga chipintap, chiitap castigo.

¹⁰ Dios ichiiba castigo itumpiy jém malopic pxiñtam, jém imétsyajpáppic iga imalwatpa juuts ixunpa iyaac, jém ijóyixpáppic iga injacpa Dios. Da iwianjamyaj iga injacpa. Tsam jáyayanjichich. Da matónóypa. Da icinpa jém mijpic anjagooyiyaj jém itwip siñyucmi, tsam imalnímáypa. ¹¹ Pero jém siñyucmic pxiñtam aunque más wiap y tsam iniit ipimi, da iniquímpa quejaj Dios iwíñjom contra jém malopic.

¹² Yípyaj ijóyixpáppic Dios jex juuts jém jimñi animatyaj dapic jixiíy. Nay iga matstap y accaatap. Tsam imalnímáypa jém wibic jixi jém dapic icutíyíypa. Núcpa jama iga accaayajtap jeeyaj juuts jém jimñi animatyaj. ¹³ Tsam yaachwattap jeeyaj iga agui iyaachwatyaj jém itiwitam.

Tsam maymay iga imalwatyajpa siñni juṭ ixtap, da tsaap. Nímanṃtaayap iga icupicpatim Cristo iga mimigóyáypa. Tsam táncaíy, tsam imalwatyajpa iganam miwagawíctámpa. ¹⁴ Tsam icusúnyyapa jém malopic yomtám. Da cuspa imalwatyaj. Tsam imigóyáypa jém tantiwitam iga icmalwatpa jém dapic iwícupicne jém wibic anquímayooyi. Agui inyujne

iga icusúniypa jém itiwitam imichi. Dios ijycámayñe iga ichiiba castigo jexpic pixiñtam. ¹⁵ Togoyñeyaj porque ichacyaj jém numapic tun. Iwatyajpa juuts iwat jém wiñicpic anmatcwiñ jém Balaam jém Beor imanic. Jém Balaam imalwatpa iga icoñwíypa tumiñ. ¹⁶ Pero wogayta jém profeta Balaam iga imalwatpa. Jém iburro ijíyáy juuts tum pixiñ. Mex iga da jypa jém animatyaj, injiyjac iga ichaguiñ iga locojane.

¹⁷ Yípyaj pixiñtam juuts tum niixcuy titsnewip, jex juuts jém ucsi jém dapic tujíy, jém tsampic inipoy jém sawa. Dios ijycámáy iga ichiiba castigo jém piichcim, jut tsam pimi piichi, jut da nunca putpa. ¹⁸ Tsam anmatyajpa, pero da ti cuwatcuy jém inmati. Inímayyaj jém pixiñtam iga wi iga imalwatyajpa. Nímaytap iga wíap iwatyaj titam icusúniypa ianamanjom. Icmalwatpa jém pixiñtam jém yaguiñpic ichacneyaj jém malopic vida. ¹⁹ Inímáy jeeyaj iga iniif libertad iga iwatyajpa juuts ixunpa iyaac. Pero yíp malopic maestro je mismo tsíy juuts tum esclavo. Datim wíap iwat juuts ixunpa iyaac, pero jém malopic jixi injacpa juuts tum esclavo. Siiga i injacpa jém malopic jixi, tsíypa juuts esclavo. ²⁰ Siiga i iixpicpa jém tánomi Jesús, jém taciacputpáppic, y siiga ichac iga imalwatpa juuts iwatyajpa jém ityajwip yíp naxyucmi, pero ocmi eybictim mojpa imalwat juuts iwatpa wiñti, jesic jém malopic jixi icoñwíy. Tsíy jém pixiñ juuts tsenta con cadena. Más pimi malo que cuando danam icupicne Cristo. ²¹ Más wi jém pixiñ meega da iixpicne jém numapic tun que iga cuando iixpicne, ocmi ichacpa iga icupicpa jém wibic anquímayooyi jém ichiñewip Dios. ²² Iníascaaba jém pixiñ juuts nimpa jém anmati jém dapic je migooyi: “Jém chimpa eybic icútpa jém iichi. Jém yoya, jém wíacchinetawip, eybic chinpa tuutjom.”

3

Miñgacpa jém tánomi

¹ Mantiwitam, mantoytampáppic, wisciyam manjáyaypa. Siip manacjspa eybic jém wibic jixi jém iniitwip inamanjom ² iga odoy injucisaytamiñ ti ninyajpa jém wiñicpic profeta y jém tánomi inquímayooyi jém taciacputpáppic. Jeetim anmati minquejáy jém tungac apóstolyaj.

³ Wiñti, jodónataami iga jém inapigam jama miñyajpa jém malopic pixiñtam, tsam iwadayyajpa burla jém wítampic cosa. Tsam iwatyajpa itumpiy jém malopic cosa juuts ijisyajpa jeeyaj ianamanjom. ⁴ Acwágooyajpa: “¿Que da mijycámáy jém Cristo iga miñgacpa? ¿Siip jut it? Dende caaneyaj jém wiñicpic pixiñtam, itumpiy cosa jextim, da cucacne dende watnetá yíp mundo.” ⁵ Yípyaj icujisáy iga da jex itumpiy cosa dende wiñic. Porque wiñigam Dios inímáy jém siñ iga idiñ y jesic itum. Dios inímáy jém nas iga pudiñ niichim, tsíyiñ titsijom, jesic putum. Con jeetim ni iwat jém nas. ⁶ Ocmi Dios icmiñ jém diluvio, ictogoy itumpiy jém itwip idic yíp naxyucmi. ⁷ Pero jém nas y jém siñ jém itwip siip, juuts nimpa jém mismo anmati, injócyajpa jém jama cuando nooquettap con jucti. Injócyajpa jém inapigam jama cuando cipiñyajtáp itumpiy jém malopic pixiñtam iga actogoyyajtáp.

⁸ Mantiwitam, mantoytampáppic, jém tánomi da táñcaap inimiñ jém castigo porque para je tum jama juuts tum mil amtíy. Y tum mil amtíy juuts tum jama. ⁹ Jém tánomi da chocóyap iccupac juuts tajycámayñe juuts ijisyajpa algunos. Da jáypa iccupacpa, pero tsam iyaachíypa jém ityajwip yíp mundo, da jobit ichégáy jém itánca porque tsam iyaachanjampa. Da ixunpa iga togoypa ni tum. Ixunpa iga itumpiy jém pixiñtam icucacyajni ijixi.

¹⁰ Jém jama, cuando miñgacpa jém tánomi, icupiichcíypa jém pixiñtam juuts tum númpaap tsuuchim. Actogoytáp itumpiy cosa jém tánixpáppic siñyucmi. Nooquettap. Tsam

pimi tiñpa juuts tum mijpic jucti. Nooquettaptim yíp nas y itumpiy cosa jém ityajwip yíp naxyucmi.

¹¹ Como tanjodon iga togoypa itumpiy yípyaj cosa, wí iga tanwíwattámiñ juuts ixunpa Dios. ¹² Iganam tananjóctámpa jém tiempo, wí iga tanwattámiñ titam wiap tanwat iga más jicsciy miñpa jém jama cuando Dios icipinpa jém pixiñtam. Cuando núcpa jém jama nooquettap jém siñ. Jém dapic jípsa, accunoomaytap. ¹³ Pero taichtam tananjóctámpa iga Dios icjoomasetpa jém siñ y jém nas porque jempam ijycámne. Nicpa íti naps jém wibic pixiñtam jém jomipic naxyucmi.

¹⁴ Jeeyucmi mantiwítam, mantoytampáppic, iganam ininjóctámpa, watí empeño iga inwíwattámpa juuts miwiap. Jesic cuando miñpa Cristo, mipátpa iga da síp iníñata, da immalwattámpa, da mitáñcaiyta. ¹⁵ Cutiiyiytaami iga jém tánomi tsam iyaachíypa jém malopic pixiñtam iga iciacputpa. Jempictim mijáyáy jém tantíwi Pablo jém tsampic tantoypa. Wiap miñmadáy ti miñpa porque Dios ichi jém jixi. ¹⁶ Cuando ijaychac jém toto jém Pablo, siempre inmatpatim jeetim anquímayooyi juuts ichpic anañmat. Numa, uxañ táñca tanicutiiyíypa jém Pablo inquímayooyi. Jém pixiñtam, jém dapic wícuyujne y jém dapic jixíy, iñejacutiiyíypa titam ijaychac jém Pablo. Iñejacutiiyítim jém tungac parte jém Dios inmatí. Jempic nactogoyajtap iyaac.

¹⁷ Pero mimichtam, mantiwítam, mantoytampáppic, manacjodónane wiñti iga tsam it jém migooyi. Jesic cuidado iga i mictsacpa jém Dios inmatí con jém migooyi jém inmatpáppic jém malopic pixiñtam. ¹⁸ Siñ más y más cutiiyiytaami jém wibic jixi jém tachiiñewip jém tánomi Jesucristo, jém taCiacputpáppic. Wítim iga más jáyanap jém Cristo itóyooyi íñanamajom. Tanjújptámiñ siñ jém tánomi Cristo para itumpiy jama. Jemum cuyaj.

Jém wiñtipic carta jém ijayñewiip jém Xiwan

*Nimpa jém Xiwan iga iixñe jém Cristo
(Jn. 1:1; Ap. 19:13)*

¹ Jém Cristo ittim idic dende wiñigam cuando danam i yíp mundo. Pero siip wiap mannimáy iga ánixñeta ánixcuymi. Ammatoñneta. Anámta. Antsic con añci. Iñiyitim jém Anmañti, je jém vida jém tachiiñewiip Dios. ² Awiñquejayta jém vida. Ánixñeta, jeeyucmi wiap manañmadáy iga núcneum y wiap manañquejay iga jém Cristo jeam jém vida jém dapic cuyajpa. Ittim idic dende wiñigam con jém tanJatun Dios, jesic ocmi awiñquejayta. ³ Siip manañmadáypa ti ánixñeta y ti ammatoñneta iga wiañ tanaitta tumti jixi juutstim aich anaitta tumti jixi con tanJatun Dios y con jém Jesucristo jém Dios iManic. ⁴ Jeeyucmi manjáyaypa iga iniittámiñ jém maymáayaji jém numapic.

Jém tanJatun Dios tum wibic jucti agui witsocpa

⁵ Yibam jém wibic anmañti jém tanquejayñewiip jém Jesucristo. Siip manañmadáypa mimichtam. Nimpa jém anmañti iga jém tanJatun Dios jex juuts tum wibic jucti. Agui wi tsoepa. Jut it Dios da i piichi, je da táñcaiy ni uxañ. ⁶ Siiga tanimpa iga tumti tanjixi con tanJatun Dios, pero tasiibatim piichcim, jesic tamigóypa. Da tanwatpa juuts nimpa jém numapic anmañti. ⁷ Pero siiga tasiiba juctianñsocajom juuts jém tanJatun Dios it jém juctianñsocajom, jesic numa tumti jixi tanaitta y jém Jesucristo iñipiñ, jém Dios iManic, taccáyaypa itumpiy jém tantánca.

⁸ Pero siiga tanjiswa iga da tatáncaiy, jesic tanamigóyaytap tanyaac. Da tanai jém numapic anmañti tánanamanjom. ⁹ Pero siiga tanañmadáypa Dios iga agui tammalwatne, jesic tanjodon iga tayoxpátpa porque Dios tajycamayñe iga tayoxpátpa. Tawitsagáypa itumpiy jém tantánca, taccáyaypa tánanamanjom. ¹⁰ Pero siiga tanimpa iga da tatáncaiy, jesic tamigóypa y tanimpa iga migóypatim jém tanJatun Dios. Quejpa iga da numa tancupicne jém inmañti.

2

Jém Jesucristo je jém tacupujpáppic

¹ Mammanictam, siip manjáyaypa yíp toto iga odoy immalwadiñ. Pero siiga i imalwatne, jém Jesucristo wiap icupuj jém Dios iwiñjom porque je da ti mal iwat. ² Accaata jém Cristo iga tajojayta tantánca. Y da no más taichtam tajojayta jém tantánca, pero iyojáytim itumpiy jém pixiñtam itánca icuwiti yíp naxyucmi.

³ Siiga seguido tanwatpa juuts tanimáypa Dios, jesic tanjodon iga numa tánixpicne jém Cristo. ⁴ Pero siiga tum pixiñ nimpa iga: Ich ánixpicpa jém Cristo, pero da iwatpa juuts nimpa jém wibic anmañti, jesic migóypa jém pixiñ. Da iniñ jém numapic anmañti iñanamanjom. ⁵ Pero siiga tum pixiñ iwatpa juuts nimpa jém Cristo inmañti, jesic numa quejpa iga jém pixiñ tsam itoypa Dios. Siiga seguido tanwatpa juuts nimpa jém Cristo inmañti, jesic tanjodon iga tanwaganaitta jém tanJatun Dios. ⁶ Siiga tum pixiñ nimpa iga: Ich anwaganait tanJatun Dios, jesic wi iga iwadiñ jém wítampic cosa juuts iwatpa jém Jesucristo.

Jém jomipic añquímayooyi

⁷ Mantiwitam, da manjáyaypa tum jomipic añquímayooyi, pero manjáyaypa jeetim pecapic añquímayooyi jém iniitwip dende wiñti. Yíp añquímayooyi jém moiwip

impictson̄ta. ⁸ Manjáyáypa juuts tum jomipic anquímayooyi porque Cristo oy tanquejáy iga tanatoytamtañ̄ y mimichtam inwattámpa jem̄pic. Siip nasneum jem̄ piichi y núcneum jem̄ numapic juctian̄tsoc̄a.

⁹ Siiga n̄mpa tum̄ p̄ixiñ̄ iga: Ich aít jem̄ juctian̄tsoc̄ajom̄, pero ijóyixpa jem̄ it̄iwitam, jesic̄ migóypa jem̄ p̄ixiñ̄. Quejpa iga danam putne jem̄ piichc̄im. ¹⁰ Pero siiga tum̄ p̄ixiñ̄ itoypa it̄iw̄i, jesic̄ it̄ jem̄ juctian̄tsoc̄ajom̄ y da ī wiap̄ icmalwat. ¹¹ Pero siiga tum̄ p̄ixiñ̄ ijóyixpa jem̄ it̄iw̄i, jesic̄ ts̄iypa jem̄ piichc̄im. Da ichacpa iga imalwatpa. Jexpic̄ p̄ixiñ̄ da ijodon̄ jut̄ nicpa porque jem̄ piichi da iguixixóypa.

¹² Mamman̄ictam, manjáyáypa porque Dios miwadayñ̄eum perdón jem̄ iñt̄ánca porque jem̄ Cristo miyójay jem̄ iñt̄ánca. ¹³ Micham̄itampic, manjáyáypa porque incupic̄neum jem̄ Cristo jem̄ itw̄ip̄ dende wiñ̄igam. Manjáyáypatim, jem̄ dapic̄nam micham̄itam, porque incoñ̄wiñ̄eum jem̄ Woccīwiñ̄. Manjáyáypatim mich̄ixtam porque iñ̄ixpic̄neta jem̄ tan̄jatun̄ Dios. ¹⁴ Manjáyáypa micham̄itampic porque incupic̄neum jem̄ Cristo jem̄ itw̄ip̄ dende wiñ̄igam. Manjáyáypatim jem̄ dapic̄nam micham̄itam porque ts̄am miwiap̄. Iniit̄ jem̄ Dios in̄mat̄i iñ̄anaman̄jom̄. Incoñ̄wiñ̄eum jem̄ Woccīwiñ̄.

¹⁵ Ts̄aci iga iñ̄toypa itump̄iy jem̄ malopic̄ cosa jem̄ ityajw̄ip̄ ȳip̄ naxyuc̄mi. Porque siiga tum̄ p̄ixiñ̄ itoypa jem̄ malopic̄ cosa jem̄ ityajw̄ip̄ ȳip̄ naxyuc̄mi, jesic̄ da itoypa jem̄ tan̄jatun̄ Dios. ¹⁶ Jem̄ da w̄ibic̄ p̄ixiñ̄tam ts̄am icusún̄iypa itump̄iy jem̄ malopic̄ cosa jem̄ ijs̄new̄ip̄ ianaman̄jom̄. Titam iixpa imalwatpa, icusún̄iypatim. Agui nacuj̄iptap̄ iyaac iga agui w̄i it. Itump̄iy ȳip̄ malopic̄ j̄ixi jem̄ ityajw̄ip̄ ȳip̄ naxyuc̄mi da miñ̄pa de Dios. Jem̄ malopic̄ j̄ixi tsucumpa ȳip̄ naxyuc̄m̄ipic̄ p̄ixiñ̄tam ijs̄xian̄jom̄. ¹⁷ Cuyajpa ȳip̄ mundo y cuyajpatim itump̄iy jem̄ malopic̄ cusún̄iyooyi. Pero jem̄ iwatyajp̄appic̄ juuts ixunpa Dios da nunca cuyajpa. Jeeyaj ts̄iyyajpa para siempre.

Jem̄ Cristo ienemigo je jem̄ contracr̄isto

¹⁸ Mamman̄ictam, siip̄ núctoobam jem̄ in̄an̄pigam̄ jama. Mimichtam immaton̄neta iga miñ̄pa tum̄ p̄ixiñ̄ n̄iman̄taayap̄ iga jeam jem̄ Cristo. Ts̄am án̄apa contra jem̄ Cristo. Siip̄ núcneum w̄ati jem̄ án̄ayajp̄appic̄ contra jem̄ Cristo. Jeeyuc̄mi tan̄jodon̄ iga núctoobam jem̄ in̄an̄pigam̄ jama. ¹⁹ Jeeyaj ityaj̄ idic̄ con taichtam, pero da iñ̄untacupic̄neyaj Dios. Jesic̄ oc̄mi cupudayyaj con taichtam. Siiga n̄ma icupic̄yajpa Dios, jesic̄ tienes que tan̄waganait̄ámpa hasta siip̄. Pero cupudayyaj iga quejiñ̄ iga da tawaganait̄a ni tum̄ de jeeyaj.

²⁰ Pero jem̄ tán̄omi Cristo michiñ̄eta jem̄ Dios iAnama, jeeyuc̄mi iñ̄tump̄iytam̄ wiap̄ in̄cut̄īiȳiypa jem̄ w̄itampic̄ anquímayooyi. ²¹ Jesic̄ da manjáyáypa iga da in̄cut̄īiȳiypa jem̄ numapic̄ anquímayooyi. Manjáyáypa porque mich̄ iñ̄ixpic̄pa jem̄ numapic̄ anquímayooyi. In̄jodon̄tim iga jem̄ numapic̄ anquímayooyi da je m̄igooyi.

²² ¿Jesic̄ iapaap jem̄ m̄igoypaap? Jem̄ m̄igoypaap je jem̄ n̄imp̄appic̄ iga jem̄ Jesús da je Cristo jem̄ icutsatnew̄ip̄ Dios. Jem̄ m̄igóypappic̄ je jem̄ contracr̄isto. Ȳip̄ malopic̄ p̄ixiñ̄ in̄nécpa jem̄ tan̄jatun̄ Dios y in̄nécpatim jem̄ Dios iMan̄ic. ²³ Porque siiga tum̄ p̄ixiñ̄ da icupic̄pa jem̄ Dios iMan̄ic, jesic̄ datim iixpic̄pa jem̄ tan̄jatun̄ Dios. Pero siiga tum̄ p̄ixiñ̄ icupic̄pa jem̄ Dios iMan̄ic, jesic̄ iixpic̄patim tan̄jatun̄ Dios.

²⁴ Jeeyuc̄mi mann̄imáypa iga odoy ts̄aci iga incupict̄ámpa jem̄ w̄ibic̄ anquímayooyi jem̄ moiw̄ip̄ min̄quejaytam̄ta. Siiga da iñ̄chacpa, jesic̄ seguido miwaganait̄ámpa jem̄ tan̄jatun̄ Dios y jem̄ iMan̄ic Jesucristo. ²⁵ Jem̄ Jesucristo taj̄yc̄amayñ̄e iga tachiiba jem̄ vida iga nicpa taít̄i con Dios.

²⁶ Manjáyáypa iga ts̄am it̄ jem̄ tamigóyayajp̄appic̄. ²⁷ Pero michtam iniitt̄ámum jem̄ Dios iAnama jem̄ michiñ̄ew̄ip̄ jem̄ Cristo. Iniitum̄ iñ̄anaman̄jom̄. Jeeyuc̄mi da iñ̄xunpa iga

i minquejáypa porque jém Dios iAnama minquejaytámpa itumpiy jém wibic jixi. Je jém numapic anquímayooyi, da je migooyi. Jesic odoy tsaci iga inwatpa juuts ixunpa jém Cristo juuts minquejáy jém Dios iAnama.

²⁸ Siip, mammanictam, wagaiftaami con jém tánQmi Jesucristo, jesic da tançintámpa cuando miñgacpa yíp naxyucmi, da tatsaqtámpa cuando tanánámmocpa. ²⁹ Michtam inñodon iga da táncaiy jém Cristo. Jesic jodónataami iga itumpiy jém iwíwatyajpáppic nayñeyaj iga Cristo imanigap.

3

Nimpa jém Xiwan ti iwatyajpa jém Dios imanictam

¹ Ixi iga tsam pími tatoypa tanjatun Dios. Jeeyucmi tatsiytámpa iga Dios tamanictam. Yíp da je migooyi. Taichtam jém Dios tamanictam. Jeeyucmi jém dapic icupicyajpa Dios da tawixyajpa porque datim iixpicyajpa jém tanjatun Dios. ² Mantíwítam mantoytampáppic, siip taichtam Dios tamanictam. Da tanjodon siip juutspic tapixiñtam tatsiytámpa cuando tampictsonpa jém jomipic tammijtay. Pero tanjodon iga cuando miñgacpa yíp naxyucmi jém tánQmi Jesucristo, jesic tatsiytámpa jextim juuts jém Cristo. Porque cuando miñgacpa jém tánQmi, jesic tánixtámpa juutspic pxiñ. ³ Itumpiy jém pxiñtam jém injócyajpáppic iga miñgacpa jém tánQmi Cristo, tienes que ichacyajpa jém itánca iga cuáyñeiñ jém ianama porque da táncaiy jém Cristo.

⁴ Jém pxiñtam, jém iwatyajpáppic tánca, da icupicne jém Dios inquímayooyi. Itumpiy jém tánca it en contra de Dios inquímayooyi. ⁵ Michtam inñodon tam iga jém Cristo oy yíp naxyucmi iga iccáyáypa jém pxiñtam itánca. Inñodon tim iga jém Cristo da táncaiy ni uxañ. ⁶ Siiga tum pxiñ iwaganait jém Cristo, jesic da seguido iwatpa tánca. Pero itumpiy jém pxiñtam jém imalwatyajpáppic da icupicyajpa ni da iixpicyajpa Dios. ⁷ Mammanictam, cuidado iga i mimigóyáypa iga mictsactámpa jém Dios inmati. Siiga tum pxiñ seguido iwatpa juuts ixunpa Dios, jesic wibic pxiñ, jextim juuts jém tánQmi Cristo. ⁸ Pero siiga tum pxiñ da ichacpa itánca, jesic quejpa iga tsíypa juuts jém Wocciwiñ imichi. Porque dende wiñgam imalwatpa jém Wocciwiñ. Jeeyucmi jém Dios imanic oy yíp naxyucmi iga iccuyajáypa jém Wocciwiñ ipimi.

⁹ Jém Diospic imanictam ichacpa jém itánca. Da más imalwatpa. Siiga tanait jém vida jém Diospic tachiiñe, jesic da wíap tammalwat seguido porque Dios tamanigane. ¹⁰ Asíam tanjodónap iapaap jém Dios imanictam y iapaap jém Wocciwiñ imanictam. Jém dapic iwíwatpa da je Dios imanic ni jém dapic itoypa itíwítam.

Jém Dios ipixiñtam natoyyajtap con jém itíwítam

¹¹ Wiñgam tampictson yíp anquímayooyi: Wí iga tanatoytamtaiñ con jém tantíwítam. ¹² Da wí siiga tanwatpa juuts jém Caín, porque je jém Wocciwiñ imichi, icca itíwi. ¿Tíiga icca itíwi? Porque jém Caín iwatpa juuts ixunpa jém Wocciwiñ, pero jém itíwi iwatpa juuts ixunpa Dios.

¹³ Mantíwítam, odoy pooñanjamtaami siiga jém malopic pxiñtam tsam mijóyixpa. ¹⁴ Tatsiyñeta idic juuts tum pxiñ caane, pero siip taichtam tavolo. Tanjodon iga tavolo porque siip tantoypa jém tantíwítam. Jém pxiñ jém dapic itoypa itíwi jex juuts tum pxiñ caane. ¹⁵ Itumpiy jém ijóyixpáppic itíwi jex juuts tum accaoypaap. Y michtam inñodon tam iga jém accaoypáppic pxiñ da ini jém vida jém dapic cuyajpa. ¹⁶ Jesic asíam tançutñiyíypa jutsap tantoy jém tantíwítam porque jém Cristo iyaac nachiiñta iga accaata iga tajojáy tantánca. Jesic wítim iga tanjiguiñ iga taccaatap iga tanyoxpátpa jém tantíwítam jém icupicneyajwíp Jesús. ¹⁷ Siiga tum pxiñ tsam iniit iwíccuy y itumpiy cosa y iix iga pími

yaachap jém itiwí, pero da iyaachanjampa, jesic quejpa iga jém p̄ixiñ da itoypa Dios. ¹⁸ Mammanictam, da w̄i iga tannímáypa jém tant̄iwí iga: Mant̄iwí, tsam mantoypa, pero ocmi da tanyoxpátpa. Siiga jém in̄t̄iwí itogóyá algun ti, jesic yoxpaati, yaachanjami.

Jutsap tanjodón iga Diosam tam̄ichitam

¹⁹ Siiga tantoypa tant̄iwitam, jesic tanjodon iga tanait jém numapic anquímayooyi. Jesic da tan̄c̄iŋpa iga tanúcpa jém Dios iwiñjom. ²⁰ Siiga tanj̄ispa tánanamanjom iga agui tammalwatne idic, jesic odoy wadaayi caso porque Dios más mij que taichtam y Dios iixpicpa itumpiy jém p̄ixiñtam ianama. ²¹ Jesaptim, mant̄iwitam, siiga da tanj̄ispa tánanamanjom iga agui tammalwatne, jesic da tan̄c̄iŋpa iga tanúcpa jém Dios iwiñjom. ²² Siiga tanwágáypa Dios alguna cosa, jesic tachiiiba porque seguido tan̄cupicpa jém Dios inquímayooyi y tanwatpa juuts iwianjam Dios. ²³ N̄impa jém Dios inquímayooyi iga tan̄cupictamiñ jém iManic in̄iyi, jém Jesucristo. N̄impatim iga tanatoytamtaiñ con jém tant̄iwitam juuts tanímayñe. ²⁴ Itumpiy jém icupicneyajw̄ip jém Dios inquímayooyi ityaj con Dios. Itim Dios con jém ip̄ixiñtam. Tanjodon iga tanwaganait Dios porque tachiiñeta jém Dios iAnama.

4

Quejpa jupp̄ic jém malopic esp̄iritu jém tamigóyayp̄appic

¹ Mant̄iwitam mantoytamp̄appic, odoy cup̄ici itumpiy jém an̄matc̄iwiñ jém n̄imyajp̄appic iga iniit jém Dios iAnama. Pero wiñti cut̄itsi jém inquímayooyi, jesic quejpa siiga Dios icutsatne. Porque tsam it jém malopic an̄matc̄iwiñ jém tamigóyayp̄appic. Ininúcyajpa jém m̄igooyi jut̄iŋquej. ² Siiga jém an̄matc̄iwiñ n̄impa iga jém Jesucristo oy ȳip naxyucmi juuts tum̄ p̄ixiñ, maaȳitim juuts taichtam, jesic tanjodon iga jém an̄matc̄iwiñ iniit jém Dios iAnama. Jemp̄igam tánixpicpa siiga iniit jém Dios iAnama. ³ Pero siiga da inmatpa jém p̄ixiñ iga maaȳitim jém Cristo juuts taichtam, jesic da ini jém Dios iAnama. Jém p̄ixiñ iniit jém mal esp̄iritu. Y jém mal esp̄iritu it en contra de jém Cristo. Michtam in̄jodontam iga miñpa jém an̄ap̄appic contra jém Cristo y s̄ip núcneum ȳip naxyucmi.

⁴ Pero mimichtam, mammanictam, Dios mim̄ichitam. Incoñw̄iyñeum jém malopic an̄matc̄iwiñ jém tamigóyayp̄appic. Porque jém Dios iAnama, jém iniitw̄ip in̄anamanjom, más w̄iap que jém iniitw̄ip jém malopic p̄ixiñtam ianamanjom, jém dap̄ic icupicneyaj Dios. ⁵ Jém malopic an̄matc̄iwiñ iniityaj ȳip naxyucm̄ipic j̄ixi, jesic cuando inmatyajpa jém malopic anquímayooyi, ȳip naxyucm̄ipic p̄ixiñtam imatonyajpa. ⁶ Pero taichtam Diosam tam̄ichitam. Cuando tanañmatpa jém Dios in̄mati, jesic jém icupicneyajw̄ip Dios imatonyajpa. Pero jém dap̄ic je Dios im̄ichi jeeyaj da imatonyajpa. Jemp̄igam w̄iap tánixpic jém Dios iAnama y jém mal esp̄iritu jém tamigóyayp̄appic.

Dios tsam tóyóypa

⁷ Mant̄iwitam mantoytamp̄appic, w̄i iga taichtam tanatoytamtaiñ con jém tant̄iwitam porque Dios tachiiñe jém j̄ixi iga tanatoytamtaiñ. Y itumpiy jém itoyyajp̄appic itiwí je jém Dios imanictam y jeeyaj iixpicyajpa Dios. ⁸ Jém dap̄ic itoypa itiwí jesic datim iixpicpa Dios porque tsam tóyóypa Dios. ⁹ Dios tan̄quejáy j̄up̄ic tatoypa cuando icutsat ȳip naxyucmi jém tum̄pic iManic iga tachiiitamiñ jém vida jém dap̄ic cuyajpa. ¹⁰ Ȳimp̄ic quejpa jém w̄ib̄ic tóyooyi. Da iga tantoypa Dios, pero iga Dios tatoytámpa taichtam. Jeeyucmi icutsat iManic iga tajojáy tant̄an̄ca.

¹¹ Mant̄iwitam mantoytamp̄appic, iga tsam tatoypa Dios jesic w̄itim iga tanatoytamtaiñ con jém tant̄iwitam. ¹² Da j̄i nunca oypa iix jém tan̄jatun̄ Dios, pero siiga tanatoytamtap con tant̄iwitam, jesic tanjodon iga tanaitta Dios tánanamanjom. Y másim

quejpa iga tatóyóypa. ¹³ Dios tachiiñeta jém iAnama, jeeyucmi tanjodon iga tait con Dios y Dios it con taichtam. ¹⁴ Anyaac ánixñeta jém Jesucristo y siip ananmattámpa jutinqej iga jém tanJatun Dios icutsat jém iManic yíp naxyucmi iga iciacputpa itumpiy jém pixiñtam jém ityajwip yíp naxyucmi. ¹⁵ Siiga tum pixiñ inmadáypa jém itiwitam iga jém Jesucristo jém Dios iManic, jesic jém pixiñ it con Dios y jém Dios it con jém pixiñ.

¹⁶ Tanjodon y tancupicpa iga Dios tsam tatoypa porque Dios tsam tóyóypa. Y jém pixiñ jém tóyoypáppic it con Dios y Dios ittim con jém pixiñ. ¹⁷ Siiga seguido taittámpa con Dios, jesic más tancutiyyitámpa jutsap tantoy Dios. Y cuando núcpa jém jama iga Dios ichiiba castigo jém malopic pixiñtam, jesic taichtam da tançintámpa. Taichtam tajextim juuts jém Cristo cuando jáy iti yíp naxyucmi. ¹⁸ Jut it jém tóyooyi da i jém çini porque jém numapic tóyooyi iccáypa itumpiy jém çini. Pero siiga tum pixiñ icinpa jém Dios icastigo, jesic quejpa iga da iniñ jém numapic tóyooyi.

¹⁹ Taichtam tantoytámpa Dios porque wiñti tatoyta. ²⁰ Pero siiga tum pixiñ nimpa iga: Ich antoypa Dios, pero ijóyixpa itiwí, jesic migóypa jém pixiñ. Porque siiga da itoypa itiwí jém iixñewip, jesic datim wiap itoy jém Dios jém dapic tánixpa. ²¹ Dios tachi yíp anquímayooyi: “Siiga inñtoypa Dios, jesic toyitim mex jém inñiwitam.”

5

Jém icupicneyajwip jém Cristo icoñwiyñeum jém Wocciwiñ ipimi

¹ Siiga incupicpa iga jém Jesús je jém Cristo, jesic Dios mimanic. Siiga tantoypa jém Jatunpic, jesic tienes que tantoytámpatim jém imanictam. ² Jesic tanjodon iga numa tantoypa jém Dios imanictam siiga tantoypa Dios y tanwattámpa juuts tanímáypa. ³ Siiga tanwatpa juuts nimpa jém Dios inquímayooyi, jesic quejpa iga tantoypa Dios. Y jém Dios inquímayooyi da tancha iga tanwatpa. ⁴ Porque jém Dios imanictam wiap icoñwiy itumpiy jém malopic jixi jém ityajwip yíp naxyucmi. Wiap tançoñwiy porque tancupicne jém Jesucristo. ⁵ Pero nada más jém icupicneyajwip iga jém Jesús je jém Dios iManic wiap icoñwiy itumpiy jém malopic jixi.

Tucuten testigo tanquejáypa iapaap jém Jesucristo

⁶ Oy iti jém Jesucristo yíp naxyucmi, acchinta niicim, itegáy inñipiñ jém cunusyucmi. Da je solamente con ni, pero tanquejayta con jém ni y con jém nñipiñ iga da je migooyi. Dios iAnama tsíypatim juuts tum testigo iga jém oyñewip numa jém Dios iManic porque jém Dios iAnama da inisiiba jém migooyi. ⁷ Tucuten testigo it sinyucmi: jém tanJatun Dios, jém tánomi Jesucristo y jém Dios iAnama. Icutres tsíy juuts tumti. ⁸ Ittim tucuten testigo yíp naxyucmi: jém Dios iAnama tsíy juuts tum testigo, y jém ni tsíy juuts tum testigo, y jém nñipiñ tsíy tim juuts tum testigo. Icutres it de acuerdo. ⁹ Tancupicpa jém pixiñtam cuando inmatyajpa juuts testigo. Pero más wibic testigo jém tanJatun Dios. Tanímayñe iga Jesucristo je jém iManic. ¹⁰ Jém icupicneyajwip jém Dios iManic chiiñeta jixi ianamanjom iga numa jém Jesús je jém Dios iManic. Pero jém pixiñ, jém dapic icupicpa Dios, nimpa iga migóypa jém tanJatun Dios porque da icupicpa titam tanmadáy Dios de jém iManic. ¹¹ Tacjodónaneta iga Dios tachiiñetámum jém vida jém dapic cuyajpa, yíp vida iniit jém Dios iManic. ¹² Jém iniitwip jém iManic, iniitum jém vida. Pero jém dapic iniñ jém Dios iManic, je da iniñ jém vida.

¹³ Manjáyáypa mimichtam jém incupicnetanwip jém Dios iManic inñyi iga inñuntawijodon iga impictsonneta jém vida jém dapic cuyajpa.

¹⁴ Siiga tanwágáypa Dios jém witampic cosa juuts ixunpa Dios, jesic tanjodon iga tamatonpa. Tanjodon iga Dios iccupacpa juuts tajycámayñe. ¹⁵ Siiga tanjodon iga Dios

tamatonpa cuando tanaŋwejpátpa, jesic tanjodon̄tim iga tachiñeum jém wibic cosa jém tanwágayñewiip. ¹⁶ Siiga tánixpa tum tant̄wi iwat tum táŋca jém dapic iccaaba, jesic w̄i iga tanaŋwejpádáyin̄ Dios para je. Jesic Dios ichiiba vida jém tant̄wi siiga da iwat jém táŋca jém taccaapáppic. Porque it jém táŋca jém taccaapáppic. Da mannímáypa iga ininwejpádáyin̄ Dios para jém p̄ixin̄ siiga iwatpa jexpic táŋca. ¹⁷ Itump̄iy jém malopic cosa jém iwatyajpáppic jém p̄ixin̄tam táŋcatim. Pero it jém táŋca jém dapic iccaaba jém p̄ixin̄.

¹⁸ Tanjodon̄ iga jém tsíyñeyajwiip juuts jém Dios iman̄ictam ichacneyajum iga imalwatpa porque jém Cristo iwatpa cuenta iga jém Wocciwiñ odoy w̄iñ icmalwat.

¹⁹ Tanjodon̄ iga Dios tamaniganeta. Tanjodon̄tim iga itump̄iy jém malopic p̄ixin̄tam ȳip naxyucmi ityaj jém Wocciwiñ icijom.

²⁰ Tanjodon̄tim iga oy ȳip naxyucmi jém Dios iman̄ic iga tachiiba jém wibic j̄ixi iga w̄iñ tan̄cut̄iȳy jupp̄ic jém numapic Dios. Siip tanwaganait̄tampa jém numapic Dios, je jém tán̄omi Jesucristo. Je jém numapic Dios jém tachiñewiip jém vida jém dapic cuyajpa.

²¹ Mammañictam, odoy j̄istaami jém watnas jém dapic je nunta Dios. Jemum cuyaj.

Jém segunda carta jém ijayñewiip jém Xiwan

Jém numapic anquímayooyi tayo xpátpa iga tanatoytamtañ con jém tantiwitam

¹ Ich aXiwan, atsamipic anjagooyi. Siip manyomtíwi, jém micupiñnewiip Dios, manjáyáypa mimichtam con jém immanictam. Numa tsam mantoytámpa. Da no más ich mantoypa, mitoytámpatim itumpiy jém icupicneyajwiip jém numapic anquímayooyi.

² Mantoytámpa mimichtam porque tan cupictámpa jém numapic anquímayooyi jém tanaitwiip tánanamanjom, jém tanwaganaitwiip para itumpiy tiempo. ³ Siip tanjatun Dios y jém tánomi Jesucristo, jém Dios imaníc, miwíwadaytámpa y miyaachanjamtámpa mimichtam. Michiitámpa jém wibic paz iga odoy micintámiñ. Jempam miwadaytámpa Dios con jém numapic anquímayooyi y jém wibic tóyooyi.

⁴ Ich tsam amaymay iga ampát algunos jém immanictam agui iwíwatyajpa juuts nimpá jém numapic anquímayooyi, jém tanímayñewiip jém tanjatun Dios. ⁵ Manyomtíwi, siip mancunucsáypa iga natoytamtañ con jém tantiwitam. Da manjáyáypa tum jomipic anquímayooyi. Yíp anquímayooyi jeetim jém mojawip tampictson. ⁶ Siiga tanait jém wibic tóyooyi, jesic tanwattámpa juuts nimpá jém Dios inquímayooyi. Yíp anquímayooyi jeetim jém wiñtipic tammatoñne iga tatóyoytámiñ.

Tsam it jém tamigóyayajpáppic

⁷ Siip siiyajpa jutínquej jáyan jém migoyyajpaap. Nimyajpa iga jém Jesucristo da oy ití yíp naxyucmi juuts tum pxiñ. Yíp migoyyajpaap it en contra de jém Cristo. ⁸ Wattaami cuenta mimichtam iga odoy togóyiñ jém incoñwiyooyi porque tsam pimi miyoxata. Wí iga capsá impictson jém incoñwiyooyi jém michiipáppic Dios.

⁹ Siiga j ichacpa jém Cristo inquímayooyi iga incodíypa y ijáyaníypa más jém anmáti, jesic jém pxiñ da iwaganait Dios. Pero siiga tum pxiñ da ichacpa jém Cristo inquímayooyi, iwaganait tanjatun Dios y iwaganaittim jém Dios imaníc. ¹⁰ Siiga núcpa inñicim tum anmátcíwiñ jém dapic inmatpa parejo jém Cristo inquímayooyi, jesic odoy jígaañ iga tigíypa con mimichtam. Datim wí iga tandioschiiba jém pxiñ. ¹¹ Porque siiga tannímáypa jém malopic anmátcíwiñ iga: Dios miwíwadáyiñ, jesic jempam tanyoxpátpa iga imalwatpa.

Cuyajum jém toto

¹² Tsam jáyan cosa manjáyaytooba idic, pero da más manjáyáypa con toto y tinta. Anjísipa iga nicpa manjóyáy iga tanmatmatneeba con mimich, jesic agui tamaymáyatámpa.

¹³ Jém inñchitsi imanictam, jém icupiñnewiip Dios, micutsadáypa watidios. Jenum cuyaj.

Jém tercera carta jém ijayñewiip jém Xiwan

Wi iga tanyoxpátpa jém Dios ipixiñtam

¹ Ich aXiwan atsamipic anjagooyi. Siip manjáyáypa, mánamigo Gayo, ich numa tsam mantoypa.

² Siip mantiwi, jém mantoypáppic, anañwejpátpa Dios para mimich iga odoy mimimneiñ, iga miwidiñ juustim tsam wi it jém iñanama. ³ Ich agui amaymay cuando algunos jém tantiwitam oy añmadáy iga mich da iñchacne jém numapic añquímayooyi, iga siempre tsam inwíwatpa. ⁴ Numa tsam pimi amaymáypa cuando ammaton iga jém ammanictam agui iwíwatyajpa juuts nimpá jém numapic añquímayooyi.

⁵ Mantíwi, mantoypáppic, agui miwi iga seguido iñyoxpátpa jém tantiwitam jém tungac pxiñtam jém dapic de mimichtam. ⁶ Jeeyaj cuando oy yim jut añtuumayajpa jém Dios ipixiñtam, nimyaj iga mich tsam wibic mipixiñ. Siip mancunucsáypa iga más iñyoxpádiñ yípyaj jém Dios ipixiñtam juuts iwianjam Dios. Chi titam itogóyay iga wiañ iñicyaj más juumi. ⁷ Nicyajpa juumi iga icuyoxayajpa jém Cristo. Da ti ipictsonyajpa de jém tungac pxiñtam jém dapic icupicneyaj Dios. ⁸ Jeeyucmi wi iga tanyoxpátámiñ jexpic pxiñtam iga tanwaganayoxap jém inmatyajpaap jém numapic añquímayooyi.

Jém pxiñ Diótrefes tsam imalwatpa

⁹ Anjáyay tum toto jém icupicneyajwiip Jesús jemum jut it jém pxiñ iñyi Diótrefes. Pero jém Diótrefes da awipictsona porque agui iwianjam iga tsíypa juuts tum mijpic añjagooyi iga injacpa jém Dios ipixiñtam. ¹⁰ Jeeyucmi cuando anicpa jemíc, añwogáypa jém Diótrefes iga odoy imalwadiñ. Tsam migóypa, tsam acujyapa. Tsam malotim jém pxiñ porque datim ipictsonpa jém Dios inmatcwiñ cuando nicpa najíyooyi. Datim ijígyapa iga i yoxpátpa jém Dios inmatcwiñ. Y siiga algunos ipictsonpa iga icwícpa, jesic jém Diótrefes iquebacputpa jém masticjom jut añtuumayajpa porque da iwianjam.

¹¹ Mantíwi, mantoypáppic, odoy wati juuts iwatpa yip malopic pxiñ. Wati juuts iwatpa jém wibic pxiñtam. Porque jém iwatyajpáppic juuts ixunpa Dios tsíyyajpa juuts jém Dios imichi. Pero jém malopic pxiñtam da iixpicyajpa Dios.

Wibic pxiñ jém Demetrio

¹² Pero itumpiy jém pxiñtam nimyajpa iga wibic pxiñ jém Demetrio. Quejpa iga iwatpa juuts nimpá jém numapic añquímayooyi. Aichtam animtámpatim iga jém Demetrio iwíwatpa. Mimichtam iñjodonam iga siempre mannuumanmadáypa.

Cuyajum jém toto

¹³ Tsam it jáyan cosa iga manjáyaytooba idic, pero da más manjáyáypa cimi. ¹⁴ Porque da jáyñe nicpa mánám. Jesic wíap tanañmat con mimich.

¹⁵ Dios miwattámiñ cuenta mimichtam. Jém iñamigoyaj, jém ityajwiip yim, tsam wátidios micutsadaytámpa. Awadaayi tum favor. Dioschiyaji cada tumtum jém tánamigoyaj jém ityajwiip jemíc. Jemum cuyaj.

Jém carta jém ijayñewiip jém Judas

Jém Judas ijáyáypa jém Dios ipixiñtam

¹ Ich aJudas añcuyoxap jém tánQmi Jesucristo. Jém Jacobo antiwi. Siip manjáyáypa mimichtam jém aguipic mitoypa tanJatun Dios, jém miñwejayñewiip. Miwatneta cuenta jém tánQmi Jesucristo. ² Wi iga miyaachanjamtámiñ Dios y iga jáyanaiñ jém paz y jém wibic tóyooyi.

Jém malopic maestroyaj inquejpa migooyi (2 P. 2:1-17)

³ Mantiwitam, mantoytampáppic, tsam anjisa iga manjáyáypa más parejo titam tannascaaba cuando taciaputtámpa jém tánQmi Jesucristo. Pero siip anjisa iga más wi iga manjáyáypa iga miñpa jém enemigoyaj. Manañquimpa iga seguido míñatámiñ con jém ijóyixpáppic jém wibic añmati iga tancupicpa Cristo. Tunçiy ichac Dios yíp wibic añmati para siempre. ⁴ Algunos jém malopic pixiñtam yamtigiyñeyaj con jém Dios ipixiñtam. Pero dende wiñigam jaycámnetá jém Dios inmati iga jexpic pixiñtam ichiiba castigo tanJatun Dios. Yíp malopic pixiñtam da imatonyajpa ti iñimáypa Dios. Nimyajpatim iga wiap tanwatta itumpiy malopic cosa juuts tançusúnyypa tánanamanjom y da tachiiba castigo Dios porque tsam tóyóypa. Jeeyaj innécyajpa jém tanAnjagooyi, jém tánQmi Jesucristo.

⁵ Manacjisa, aunque michtam injodonam itumpiy yípyaj cosa, iga tanJatun Dios cuando itop jém ipixiñtam jém naxyucmi de Egipto, iccucaayyaj itumpiy jém dapic icupicyaj. ⁶ Wiñigam algunos jém siñyucmipic pixiñtam ichacyaj jém icargo jém ichiñewiip Dios. Ichacyaj iticmi iga iwatyajpa juuts iwianjamyaj iyaac. Pero siip matsyajta, pajta para siempre jém piichcim hasta jém inañpigam jama cuando Dios icipinpa jém malopic pixiñtam y ichiiba jém castigo. ⁷ Jistaamitim jém pixiñtam jém ityajwiip idic jém Sodoma y Gomorra con jém tungac tiganjoj, jém ityajwiip nocojom. Jeeyaj tsam pimi imalwatyaj juuts jém malopic siñyucmipic pixiñtam. Tsam icusúnyyajpa itumpiy jém malopic cosa. Tsam pejoyyajpa. Pixiñ con pixiñ nacusúnyyajta. Yomo con yomo nacusúnyyajta. Jesic Dios ichi tum miipic castigo. Jipsquetyajpa jeeyaj jém juctjom jut da nunca pichpa. Tsíyyaj juuts tum ejemplo para itumpiy jém pixiñtam.

⁸ Jesanetim jém yamtigiyñeyajwiip con mimichtam, jém mawíñayajpáppic, imalwatyajpa con imijtay. Da ijicpa iga anjactap. Tsam injibaccúmpa, imalnímáypa jém siñyucmipic añjagooyiyaj. ⁹ Wiñic jém arcángel Miguel tsam añayaj con jém Wocciwiñ, inçayajpa jém Moisés imijtay. Pero jém Miguel da iquejajwadáy jém Wocciwiñ, da imalnímáy, nada más iñimáy iga: Jém anJatun Dios miñjijácpa. ¹⁰ Yíp malopic maestroyaj, jém yamtigiyñewiip con mimichtam, tsam imalnímayyajpa jém cosa jém dapic iixpicayajpa. Pero icutiyyayyajpa jém malopic jixi juuts jém animatyaj dapic jixiíy. Jesic namiswatyajtap entre jeeyaj.

¹¹ Agui uuguytim yípyaj pixiñtam porque tsam imalwatyaj juuts jém Caín. Ipic tungac tun iga ricojap juuts jém Balaam. Cucaayyajpa juuts jém rebelde Coré. ¹² Cuando miwagasinatámpa con jém iñtiwitam, jém iñtoytampáppic, jesic miñyajpatim yípyaj malopic pixiñtam. Niñantaayap iga iñamigo, pero da je. Tum tsaaji para mimichtam. Tsam wícyajpa y ucyajpa. Nawidatap iyaac. Da iniayyaj respeto jém tánQmi Jesucristo. Yípyaj jex juuts jém ucsi jém dapic ini tuj, jém sawa icmiñpa yim, icnicpa jeexic. Jextim juuts

tum cuy jém dapic tím̄ap y s̄ip nasum itiem̄po, wixquím̄net̄awum con it̄ichic, wisciy caane. ¹³ Tsam tsigóypa jém lamar cuando p̄imi poypa jém sawa. Ichacpa lamar an̄naca jém n̄imoya y jém puchi. Yíp malopic p̄ixiñtam jextim juuts jém n̄ipoa. Tsam an̄matyajpa, pero inimiñpa jém j̄ixi dapic w̄i. Juuts tum matsa jém dapic ij̄odon̄ jut nicpa, jeeyaj acnic̄yajt̄ap jém piichc̄im̄ jut tsam p̄imi piichi. Tsacnet̄a iga jemum ts̄iy itump̄iy tiempo.

¹⁴ Wiñic it̄ idic tum w̄ibic p̄ixiñ in̄iyi Enoc. Je jém septimo nay despues de jém Adán. Chiit̄a j̄ixi jém Enoc iga w̄iañ in̄mat ti miñpa. N̄impa: “Ámtaami mimichtam, Dios an̄quejáy iga miñpa yíp naxyucmi jém tán̄omi. Iwaganamiñpa tsam jáyan̄ mil jém ip̄ixiñtam jém cuáyñeyajw̄ip. ¹⁵ Miñpa jém tán̄omi iga ic̄ip̄in̄pa y ichiiba castigo itump̄iy jém t̄añcaiyajw̄ip. Miñpa iga in̄quejáypa iga t̄añcaiy itump̄iy jém ij̄oyixyajp̄appic Dios porque tsam jáyan̄ malopic cosa iwatyaj contra jém Dios in̄quím̄ayooyi. Yíp malopic p̄ixiñtam tsam imaln̄imayyaj jém tán̄omi jeeyucmi chiij̄ajt̄ap castigo.” ¹⁶ Tsam j̄óyteroyaj, i quej imaln̄imáypa. Imétsyajpa itump̄iy jém malopic cosa juuts icusúniyyajpa. An̄matyajpa juuts agui w̄iap. Agui nacuj̄ipt̄ap iyaac. Imigóyayyajpa jém it̄iw̄itam, icuj̄ipyajpa iga itobáypa titam ixunpa.

Chiit̄ap j̄ixi jém icup̄icneyajw̄ip Jesús

¹⁷ Mimichtam, mantoytamp̄appic, j̄istaami jém an̄mat̄i, jém in̄matnew̄ip jém apóstolyaj de jém tán̄omi Jesucristo. ¹⁸ N̄im̄yaj: “Cuando núcpa jém in̄an̄pigam̄ jama, it̄pa jém malopic p̄ixiñtam. Tsam saaȳyóypa, tsam xiccaóypa. Siempre iwatyajpa juuts iw̄ian̄jam̄ jeeyaj, jém dapic iw̄ian̄jampa Dios.” ¹⁹ Ȳipyaj iw̄écyajpa jém Dios ip̄ixiñtam. Iniityaj yíp naxyucm̄ipic j̄ixi. Da in̄iyaj jém Dios iAn̄ama ian̄aman̄jom.

²⁰ Pero michtam, mantoytamp̄appic, seguido cuyujcaí jém Dios in̄mat̄i iga más y más w̄iap in̄wat juuts ixunpa tán̄omi. J̄igaaȳi iga miyoxp̄át̄pa jém Dios iAn̄ama cuando in̄watt̄ampa oración. ²¹ Cada tumtum de mimichtam nawattaj̄i cuenta in̄yaac iga odoy in̄chactámiñ jém tan̄Jat̄un̄ Dios it̄óyooyi. An̄j̄óctaami jém jama iga miyaachanj̄ampa jém tán̄omi Jesucristo cuando michiit̄ampa jém vida dapic cuyajpa.

²² Yaachanj̄ami jém dapic iw̄icut̄iyȳȳipa. W̄ian̄quejaaȳi. ²³ Ciacput̄it̄im̄ jém j̄ipsquet̄p̄appic, top̄i de jém juct̄jom̄. Jém tun̄gac, yaachanj̄ami, c̄in̄it̄im̄. J̄óyixaȳi hasta jém ipuct̄ucu jém imanchaj̄iyw̄ip con jém im̄ijt̄ay.

Icuj̄ippa tan̄Jat̄un̄ Dios

²⁴ S̄ip tan̄cuj̄ipt̄ampa jém w̄iapaap tawat cuenta iga da tacutin̄pa. Agui p̄imi tamaymay iga tacwiñquejpa sin t̄añca Dios iw̄iñjom̄. ²⁵ Jém tump̄ic Dios, jém taciacput̄tampaap por medio de tán̄omi Jesucristo, tsam c̄uj̄ipt̄ap. Je jém más mij̄pic an̄jagooyi. Iniit̄ itump̄iy ip̄imi. Iniit̄ itump̄iy autoridad. It̄ pecam, it̄ s̄ip, it̄ itump̄iy tiempo. Amén. Jemum cuyaj.

Jém toto jém ijayñewiip jém Xiwan iga tanquejáypa ti miñpa

Jém Jesucristo icjodóna jém Xiwan ti miñpa

¹ Yümpic icwiñquej Dios jém Jesucristo iga je inquejáyiñ jém icuyoxayajpaap ti miñpa da jáyñe. Jesucristo icutsat tum jém sinyucmipic pxiñ iga icjodónaiñ jém Xiwan jém icuyoxapaap jém Jesucristo. ² Ich aXiwan, annuumanmatpa jém Dios inmati y jém anímayñewiip Jesucristo con itumpiy jém ánixwiip. ³ Tsam maymay jém imaypaap y jém imatonyajpaap yíp anmati titam miñpa. Maymáayajpatim jém icupicyajpaap juuts jayñeta porque da jáyñe núcpa jém ínanpigam jama.

Jém Xiwan ijáyay jém siete grupo

⁴ Ich aXiwan, siip manjáyáypa mimichtam jém minuumatampaap jém siete grupo jém miittanwiip jém naxyucmi de Asia. Miwíwadaytamiñ Dios, michiitamiñ jém paz ínanamanjom iga odoy ti inçintamiñ. Da nunca cuyajpa jém tanjatun Dios, it dende wiñgam, ittim siip, it para siempre. Miwíwadaytampatim jém siete espíritu jém ityajwiip jém Dios itrono iwiñjom. ⁵ Miwíwadaytampatim jém tánomi Jesucristo jém wibic testigo jém dapic migóypa. Je jém wiñtipic acpisneta de jut it jém caaneyajwiip. Más mijpic anjagooyi, injacpa itumpiy jém reyyaj de yíp naxyucmi. Tsam tatoypa. Taccáyáypa jém tantanca porque itegáy jém iñpiñ. ⁶ Jém Cristo taccámta juuts tanjagooyi, juuts tapanij iga tançuyoxatamiñ tanjatun Dios jém Cristo iDios y íjatun. Wí iga tançujíptamiñ porque je iniit itumpiy ipimi para siempre, da nunca cuyajpa. Amén.

⁷ Ixtaami. Miñgacpa yíp naxyucmi jém tánomi Cristo jém ucsanjom. Itumpiy jém pxiñtam icuwiiti yíp naxyucmi iixyajpa cuando miñpa. Iixyajpatim jém Israelpic pxiñtam jém ichenwiip. Tsam weyjajpa itumpiy jém pxiñtam cuando iixyajpa jém Cristo. Jempigam ínascayajpa.

⁸ Nimpa jém tánomi Cristo jém iniitwiip itumpiy ipimi: “Ich jém awiñtipic y jém ínanpic juuts jém letras alfa y omega.” Ich aít dende wiñgam, aittim siip, aítpa para siempre.

Jém Xiwan iix Cristo juuts tum poñ

⁹ Mantiwitam, ich aXiwan, manacjodónap iga ich annascanetim jém yaachaji juuts mimichtam jém tánomi Cristo icuyucmi. Je tsam tayoxpátpa iga tanyaachíypa iganam tananjóctampa jém jama iga nicpa tawagaiti jut injacpa jém tánomi Cristo. Apajta jém isla iñiyi Patmos porque ananmatpa jém Dios inmati y ananmatpa iga jém Jesucristo tawíwadáypa. ¹⁰ Ich aít en el Espíritu cuando núc jém tánomi ijama. Jesic ammaton antuuñiançim tum mijpic jiyi juuts tum trompeta injiyi. ¹¹ Nimpa jém jiyi:

—Ich jém awiñtipic y jém ínanpic juuts jém letras alfa y omega. Titam ínixpa siip jaycaami tum librojom. Cutsadaayi jém siete grupo jut antuumayajpa jém Dios ipxiñtam jém naxyucmi de Asia. Cutsadaayi jém ityajwiip jém atebet Efeso, Esmirna, Pérgamo, Tiatira, Sardis, Filadelfia y Laodicea.

¹² Jesic aámset antuuñiançim iga ánixiñ i ajíyáy. Cuando aámset, ánix siete jém nooquejucuy tuncuy de oro. ¹³ Jut it jém siete nooquejucuy tuncuy de oro, jemum icucmi teñ tum pxiñ, íamooyi juuts jém Miññewiip Sinyucmi. Iccámne tum yagats yooti núcne hasta ipuyucmi. Iccámnetim ipechoyucmi juuts tum wiñtipic cinturón de oro. ¹⁴ Jém iway jém itwiip icobacyucmi tsam popo juuts lana. Pimi popo juuts nieve. Agui tsocpa jém iixcuy juuts tum jucti agupic yótpa. ¹⁵ Jém ipuy agui tsocpa juuts wibic bronce. Tsocpa juuts

tijcuy pijneta juctjom. Tsam pimi jiyapa juuts tiñpa jem ni cuando comne. ¹⁶ Imatspacne siete matsa inwiciimi. Jem ijipjom putpa tum espada agui tsupa icudoslado. Jem iamooyi pimi tsocpa juuts jem jama cuando agui pimi pijpa.

¹⁷ Cuando anix, acutiñ ipuycim juuts acaane. Jesic atsic con inwici. Animay:

—Odoy ciji. Ich jem awiñtipic y jem inapic. ¹⁸ Ich jem avivopic. Accaata, pero siip ait vivo para siempre. Ich anaif jem llave para jem lugar jut pajyajap jem caaneyajwip. ¹⁹ Jaycaami titam inixne, titam inixpa siip y jem miñpappic ocmim. ²⁰ Siip manaquejyapa jem jixi jem anecnewip, ti nimtooba jem siete matsa jem ammatpacnewip anañwiciimi y jem siete nooquejucuy tuncuy de oro. Jem siete matsa nimtooba jem siete anmatciwiñ jem inmatyapappic jem Dios inmati para jem siete grupo de jem Dios ipixiñtam jut antuumayajpa. Y jem nooquejucuy tuncuy de oro nimtooba jem siete mastic jut antuumap jem Dios ipixiñtam.

2

Cutsadayta anmati jem ityajwip jem attebet Efeso

¹ Jaaayai jem pixiñ jem inmatpappic jem Dios inmati jut antuumayajpa jem Dios ipixiñtam jem attebet Efeso. Nimaayi: “Yimpic nimpa jem iniitwip jem siete matsa icijjom, jem sipappic jut tunnetaj jem nooquejucuy: ² Ich anjodon iga mimichtam tsam inwawattampa y manixpicpa iga tsam pimi miyoxatampa y iga inyaachiytampa jem mijpic yaachaji. Anjodontim iga da inwaniganigtampa jem malopic pixiñtam. Anjodontim iga incutitstampa jem pixiñtam jem nimanayaapappic iga Dios icutsatne. Tsam wiquejpa iga migoypaap. ³ Tsam inyaachiytampa cuando miyaachwattamtap y cuando mimalwadaytamtap ich ancuyucmi. Da inchacneta iga antunijpa. ⁴ Pero anaif algo en contra de mimichtam. Porque dam jespuy antoypa juuts wiñti cuando moj ancupicta. ⁵ Jeeyucmi jistaami jutsap antoyta wiñti cuando danam micutiñneta. Cucactaami jem injixi. Eybic wattaami juuts moj inwatta wiñti. Siiga da incucactampa jem injixi, ich da jayne anicpa jemc, manaccayaypa jem innooquejucuy tuncuy y da mas tsocpa jem wibic jucti jut miitta. ⁶ Pero tum wibic cosa inwatta. Injoxitampa ti iwatyajpa jem icupicneyajwip jem nicolaitaspic inquimayooyi. Ich anjoxipatim jem anquimayooyi. ⁷ Siiga mitatsigyta, matonntaami ti nimpa jem Dios inama jut antuumayajpa jem Dios ipixiñtam. Nimpa asi: Siiga incoñwiyta jem enemigo, jesic manchiiba jem wibic cuy itim iga incutpa jem michiapappic vida. It jem cuy jut tsam wicom jut it Dios.”

Cutsadayta anmati jem ityajwip jem attebet Esmirna

⁸ Jaaayitim jem pixiñ jem inmatpappic jem Dios inmati jut antuumayajpa jem Dios ipixiñtam jem attebet Esmirna. Nimaayi: “Yimpic nimpa jem wiñtipic y jem inapic, jem caanewip idic, pero siip vivojam: ⁹ Ich anjodon ti sip inwatta. Anjodon iga tsam miyaachwattamtap y tsam miyaachap, pero iniitta tungac riqueza. Anjodontim iga tsam mimalmalnimaypa jem pixiñtam jem isyapappic iga nunta Israelpic pixiñtam, pero da je. Jeeyaj jem Wocciwiñ imichi. ¹⁰ Odoy cijaami iga tsam miyaachwattamtap. Jem Wocciwiñ micottampa carcel algunos de mimichtam iga micutitstamtap. Tsam pimi miyaachwattamtap diez dia. Pero yaachiytaami hasta micaaba, jesic ocmi manchiiba jem vida jem dapic cuyajpa juuts tum coñwiyooyi. ¹¹ Siiga mitatsigyta, matonntaami ti nimpa jem Dios inama jut antuumayajpa jem Dios ipixiñtam. Nimpa yimpic: Siiga incoñwiyta jem enemigo da wisciy micaaba. Yip nimtooba iga da miñicpa jut chiijajtap castigo para siempre.”

Cutsadayta anmati jem ityajwip jem attebet Pergamo

¹² 'Jáyaayitim jém inmatpáppic jém Dios inmati jut antuumayajpa jém Dios ipixiñtam jém atebet Pérgamo. Nímaayi: "Yimpic nimpa jém iniitwip jém espada jém aguipic tsupa icudoslado. ¹³ Nimpa iga ich anjodon ti inwattámpa. Anjodon tim iga miitta jém lugar jut injacpa jém Wocciwiñ. Da inchactámpa iga ancupicpa ni da ininecpa iga ancupicneta ni jém jama cuando accaata jém incompañero Antipas. Jém pixiñ tsam iñuumanmatpa ich anamati. Accaata jut miitta mimichtam jém atebet jut it jém Wocciwiñ. ¹⁴ Pero anait algo en contra de mimichtam. Inwaganaita jém atebet Pérgamo algunos jém malopic pixiñtam jém dapic ichactooa jém Balaam inquímayooyi. Wiñigam jém Balaam inquejáy jém Balac jutsap icmalwat jém Israelpic pixiñtam. Inquejáy iga wi iga icisayajpa jém mayi jém accaanetawip jém watnas iwiñjom. Inquejáy tim iga wip imalwatyaj con jém malopic yomtam. ¹⁵ Inwaganaitatim algunos jém pixiñtam jém dapic ichactooa jém nicolaítaspic inquímayooyi. Ich anjóiypatim jém anquímayooyi. ¹⁶ Jeeyucmi mannímaypa: Tsactaami iga immalwattámpa. Siiga da inchactámpa iga immalwatpa jesic da jáyñe anicpa jut miitta. Nicpa añaji contra jém malopic pixiñtam con jém espada jém anaitwip anjipjom. ¹⁷ Siiga mitatsigiyta, matonjaami ti nimpa jém Dios iAnama jut antuumayajpa jém Dios ipixiñtam. Nimpa yimpic: Siiga incoñwíypa jém enemigo, manchiiba jém wiñicpic wíccuy, jém maná, jém nécnawip. Manchiiba tum tsa aguipic popo. Jaycámayñeta jém tsaayucmi tum jomipic niyi. Da i ijodon i iñiyi jaycámayñeta jém tsaayucmi solamente ijodon jém ipictsonpáppic."

Cutsadayta anmati jém ityajwip jém atebet Tiatira

¹⁸ 'Jáyaayitim jém pixiñ jém inmatpáppic jém Dios inmati jut antuumayajpa jém Dios ipixiñtam jém atebet Tiatira. Nímaayi: "Nimpa así jém Dios iManic jém aguipic tsocpa iixcuy juuts yótpa tum jucti, jém aguipic tsocpa ipuy juuts jém wibic bronce: ¹⁹ Ich anjodon itumpiy titam inwattámpa, iga tsam mitóyoytámpa, iga tsam incupictámpa Dios, iga tsam incuyoxatámpa jém iñtíwítam, iga tsam iñyaachiytámpa cuando miyaachwattamta. Siip más inwíwatpa que cuando moj incupicta. ²⁰ Pero anait algo en contra de mimichtam porque iñjictámpa iga jém malopic yomo, Jezabel, inquejpa jém malopic inquímayooyi. Nímanjaayap iga inmatpa jém Dios inmati. Tsam imigóyáypa jém ampixiñtam jém acuyoxapáppic. Nimpa wi iga pejóypa y wi iga icispa jém mayi jém accaanetawip jém watnas iwiñjom. ²¹ Anchi lugar jém yomo iga ichaguiñ jém malopic jixi, pero da icucactooa jém ijixi. Da ichactooa iga pejóypa. ²² Siiga siip da ichacpa iga iwatpa mal, jesic anacmatspa tum mimnei tsam pimi jém yomo. Y jém malopic pixiñtam, jém pejoyajpáppic con jém yomo, anyachwatpa con tum castigo siiga da ichacpa iga itúñíypa jém migooyi. ²³ Anaccaaba jém ipixiñtam jém icupicneyajwip jém migooyi. Jesic itumpiy jém Dios ipixiñtam ijodónayajpa iga ich anjodon ti iniit ianamanjom jém pixiñtam y ti iniit jém ijixianjom. Cada tumtum de mimichtam manyojpa juuts inwatneta. ²⁴ Pero los de más de mimichtam miifanwip jém atebet Tiatira, da impictsonja yip malopic anquímayooyi ni da incuyujcata jém Wocciwiñ imigooyi. Siip da manchiiba tungac anquímayooyi. ²⁵ Solamente wattaami seguido juuts manaquejayñe hasta amiñpa jut miitta. ²⁶ Siiga incoñwíypa jém enemigo y da inchacpa iga inwatpa juuts ich anwianjam hasta que miñpa jém inanjigam jama, jesic manchiiba jém pimi iga ininjactámpa yip naxyucmipic pixiñtam. ²⁷ Ininjactámpa con tum tinucuy vara con jeetim pimi juuts achiiñe jém anjatun Dios. Y yip naxyucmipic naciónyay cuyajpa ipimi juuts cusámáypa tum nas suun. ²⁸ Jesic manchiibatim jém wítmatsa jém químpaap jém cuquejacim. ²⁹ Siiga mitatsigiyta, matonjaami ti nimpa jém Dios iAnama jut antuumayajpa jém Dios ipixiñtam."

3

Cutsadayta aḡmaṭi jém ityajwḡp jém attebet Sardis

¹ 'Jáyaayitim jém p̄ixiñ jém inmatpáppic jém Dios inmaṭi juṭ aṇtuumayajpa jém Dios ip̄ixiñtam jém attebet Sardis: Nímaayi: “Nimpa así jém iniitwḡp jém siete espíritu de Dios jém imatspacnewḡp jém siete maṭsa inw̄ic̄imi: Ich anjodon itumpiy titam inwattámpa. Nimyajpa iga mivivo, pero micaane. ² Nawattaji cuenta, odoy monṭaami. Más p̄imch̄i jém w̄ibic̄ j̄ixi jém uxan̄pic ts̄yñe porque cuyajtooba jém w̄ibic̄ j̄ixi juuts caatooba. Ánix iga da caps̄a inw̄iwatta jém tan̄Jatun̄ Dios iwiñjom. ³ J̄istaami jém anquímayooyi jém impictson̄newḡp. Odoy ts̄aci iga in̄cup̄ic̄pa. Ts̄aci iga immalwatpa. Siiga da miitta al tanto, jesic amiñpa juuts tum númpaap tsuuc̄im. Maṇcupiich̄iypa. Da in̄jodon̄ juch̄ix hora miñpa manchi jém castigo. ⁴ Pero ittim con mimichtam jém attebet Sardis algunos jém p̄ixiñtam jém dap̄ic̄ imalwatne, jém dap̄ic̄ ituudiyñe ipuctucu. Jeeyaj w̄iap aṇwaganawityaj w̄iaccuyajnet̄a con jém popop̄ic̄ puctucu. W̄iap icám jém popop̄ic̄ puctucu porque da imalwatne. ⁵ Siiga ī icoñw̄iypa jém enemigo, accámaȳtap tum popyooti y da nunca anactogóyáypa in̄iyi jém librojom juṭ jaycámnet̄a jém p̄ixiñtam in̄iyi jém anchiipáppic jém vida jém dap̄ic̄ cuyajpa. Núc̄pa jama iga amp̄ictson̄pa jém an̄Jatun̄ Dios iwiñjom juṭ it jém sin̄yuc̄m̄ic̄ p̄ixiñtam. Ich anan̄madáypa iga jém p̄ixiñ ich am̄m̄ichi. ⁶ Siiga mitatsiḡiyta maton̄taami ti nimpa jém Dios iAnama juṭ aṇtuumayajpa jém Dios ip̄ixiñtam.”

Cutsadayta aḡmaṭi jém ityajwḡp jém attebet Filadelfia

⁷ 'Jáyaayitim jém p̄ixiñ jém inmatpáppic jém Dios inmaṭi juṭ aṇtuumayajpa jém Dios ip̄ixiñtam jém attebet Filadelfia. Nímaayi: “Nimpa ȳimp̄ic̄ jém Cristo jém dap̄ic̄ tan̄caiy, jém inmatpáppic jém numap̄ic̄ aḡmaṭi. Je iniit jém llave de jém rey David. Jém Cristo una vez in̄yáñeum jém puerta da ī w̄iap in̄núc. Cuando in̄núcneum jém puerta da ī w̄iap in̄yá. ⁸ Ich anjodon̄ titam in̄watnet̄a. S̄iip, antsacne tum puerta in̄wiñjom, an̄yáñe. Da ī w̄iap in̄paj. Maṇwadáy así porque aunque uxan̄ imp̄imi, agui in̄wadaytámpa caso iga in̄cupictámpa ich anan̄maṭi. Da in̄in̄néctámpa ich ann̄iyi. ⁹ S̄iip ich an̄c̄ijun̄cotpa jém in̄tuumawatnewḡp jém Woc̄c̄iwiñ, jém nimyajpaap iga nunta judíos pero da je, migóypa. S̄iip ich an̄watpa iga miñyajiñ y costenyajiñ impuyc̄im iga iixyajpa iga agui mantoypa. ¹⁰ Mimichtam ts̄am in̄watne juuts mann̄imayñe. In̄yaachiyta jém yaachaji. Jeeyuc̄mi maṇcupujpa iga odoy in̄ñascatámiñ jém mij̄pic̄ yaachaji cuando núc̄pa jém jama iga ts̄am cut̄it̄stap̄ itumpiy jém p̄ixiñtam jém ityajwḡp ȳip naxyuc̄mi. ¹¹ Da jáyñe amiñgac̄pa. Odoy ts̄aci jém w̄ibic̄ aḡmaṭi jém iniitwḡp iga odoy ī w̄iañ miccáyáy jém in̄coñw̄iyooyi. ¹² Jém icoñw̄iypaap jém enemigo, anaccámpa juuts jém Dios im̄astic̄ icom iga icóppac̄pa jém im̄astic̄. Jemum nic̄pa it̄i para siempre. Da nunca putpa. Anjaycámáypa jém an̄Jatun̄ Dios in̄iyi jém p̄ixiñ iwiñpacyuc̄mi. Anjaycámáypatim jém jom̄ip̄ic̄ Jerusalén in̄iyi jém miñpáppic sin̄yuc̄mi. Jém an̄Jatun̄ Dios im̄ichi jém icutsatpaap ȳip naxyuc̄mi. Ocm̄i anjaycámáypatim jém p̄ixiñ iwiñpacyuc̄mi jém jom̄ip̄ic̄ ann̄iyi. ¹³ Siiga mitatsiḡiyta, maton̄taami ti nimpa jém Dios iAnama juṭ aṇtuumayajpa jém Dios ip̄ixiñtam.”

Cutsadayta aḡmaṭi jém ityajwḡp jém attebet Laodicea

¹⁴ 'Jáyaayitim jém p̄ixiñ jém inmatpáppic jém Dios inmaṭi juṭ aṇtuumayajpa jém Dios ip̄ixiñtam jém attebet Laodicea. Nímaayi: “Nimpa así jém dap̄ic̄ migóypa, jém w̄ibic̄ testigo jém nuuman̄matpaap, jém cobap̄ic̄, jém moiwḡp iwat itumpiy cosa. ¹⁵ Ich anjodon̄ itumpiy titam in̄wattámpa. Anjodon̄tim iga da mipagac̄ ni da mipijpa. Ȳip nimtooba iga da p̄imi anjójixpa ni da p̄imi antoypa. Más w̄i meega anjójixpa o antoypa. ¹⁶ Pero como mijocox no más y da mipagac̄ ni da mipijpa, jesic mantsujputpa juuts tum cosa dap̄ic̄ w̄i.

17 Mimichtam miñimtámpa iga tsam mirico, tsam iniit jém iñyoꝝaji y da ti mitogóyáy. Pero da iñjodotam iga tsam miyaachap, tsam miuuguytim. Tsam mipobre, micáchtí, inꝑcusíci. 18 Jeeyucmi ich manañquímpa: Juytaami jém wibic oro jém ichꝑic anaít jém wítsacnewiꝑ jém juctjom iga iniittámiñ jém wibic riqueza. Juytaamítim jém popoꝑic yooti jém ichꝑic anaít iga inꝑcusuyꝑa jém immijtay porque inꝑcusíci iga odoy michaaíñ. Coti iñixcom jém ixꝑcuy ichoy iga miixixóyiñ. 19 Jém antoyꝑáꝑꝑic aꝑwogáꝑa siiga imalwatꝑa. Anchüba castigo iga ichaguíñ iga imalwatꝑa. Wíwattaami con itumpiy iñanama. 20 Ixi, ich yim ateiñ tum puerta aꝑnaca. Síꝑ antics jém puerta. Anjáyáꝑa jém tic iomi. Siiga amatónáꝑa jém anjyi y ínáꝑa jém puerta, jesic ich atigiyꝑa jém ꝑixiñ iticjom. Aꝑwaganawícꝑa jém ꝑixiñ. 21 Itumpiy jém icoñwiyyajwiꝑ jém enemigo anchüba tum lugar iga aꝑwaganacoñꝑa jém anjagooyi icoñꝑucuyucmi. Jextim juuts aich cuando aꝑcoñwíꝑ jém ánenemigo, niꝑ aꝑwaganacoñ jém anꝑatunꝑ Dios icoñꝑucuyucmi, jém itrono. 22 Siiga mitatsigiyta, matonꝑtaami ti nimpá jém Dios iAnama ꝑut aꝑtuumayajꝑa jém Dios ipixiñtam.”

4

Jém ityajwꝑ siꝑꝑucmi ijisyajꝑa Dios

1 Jesic ocmi aámquím, ánix tum puerta áꝑáꝑñe siꝑꝑucmi. Eyꝑic ammatonꝑ jém jyi jex juuts jém trompeta inꝑꝑyi. Ajáyáy. Anímáy:

—Quiimi yim. Manañquejáyꝑa ti miñꝑa ocmim.

2 Jesic jeeti rato tsam anaít jém Dios iAnama. Ánix iga tunne tum anjagooyi icoñꝑucuy siꝑꝑucmi. Coññim jém icoñꝑucuyucmi. 3 Jém coñwiꝑ jém anjagooyi icoñꝑucuyucmi jém iámooyi jex juuts tum jém wibic tsa jém aguꝑic tsoꝑa jém jaspe y de cornalina. ꝑut it jém coñꝑucuy icuwoyꝑetne tum júꝑꝑichi agui tsus juuts tum esmeralda. 4 Ánixtim tunꝑac veinticuatro jém anjagooyi icoñꝑucuy icuwoyꝑetne jém miꝑꝑic coñꝑucuy. Jemum coñꝑaj veinticuatro wídaytam. Agui popo ipuctucu. Cada tumtum iccámneyaj tum corona de oro icobacyucmi. 5 Jém anjagooyi icoñꝑucuyucim ꝑutꝑa majiywiñ. Agui tiñꝑa, agui nácsóꝑa. Jém coñꝑucuy iwiñjom yóꝑa siete jucti de jém siete espíritu jém Diosꝑic imꝑchi. 6 Jém anjagooyi icoñꝑucuy iwiñjom it tum lamar tanꝑuámnaꝑa juuts tum vidrio juuts tum cristalino.

It cuatro vivopꝑic cosa icuwoyꝑetneyaj jém coñꝑucuy. Icutero naps ixꝑcuy iwiñjom y ituuñiaꝑꝑim. 7 Tum jém vivopꝑic cosa juuts tum caꝑ. Jém tunꝑac juuts tum mañtoro. Jém tunꝑac iwiñꝑac juuts tum ꝑixiñ. Jém tunꝑac juuts tum tajꝑi queꝑa ixi. 8 Icucuatro jém vivopꝑic cosa cada tumtum iniit seis ixaj. Jém ixajꝑucmi y jém ixajꝑucim naps ixꝑcuytim.

Siññi y tsuucim da jeꝑꝑajꝑa. Seguido niꝑꝑajꝑa:

Tsam miwí, tsam miwí, tsam miwí, mánꝑmi Dios,
mich iniit itumpiy impimi.

Miit dende wiñgam,

miittim siꝑ,

miit para siempre.

9 Jém vivopꝑic cosa icujíꝑꝑa y ichiiba gracia jém coñwiꝑ jém anjagooyi icoñꝑucuyucmi jém dapꝑic nunca cuyajꝑa. Cada vez iwatꝑa así 10 jesic jém veinticuatro wídaytam icosteeñayaj jém Dios iwiñjom ꝑut coñ jém coñꝑucuyucmi. Ijisyajꝑa tanꝑatunꝑ Dios jém dapꝑic nunca cuyajꝑa ivida. Jesic jeeyaj ipatsꝑedáy jém corona jém anjagooyi icoñꝑucuy iwiñjom. Niꝑꝑajꝑa:

11 Mánꝑmi Dios, wí iga maꝑꝑajꝑatámpa.

Maꝑꝑajꝑa iga tsam miwíꝑ y tsam iniit impimi.

Mich inꝑwat itumpiy cosa.

Ityaj itumpiy cosa porque mich inꝑꝑanꝑam.

Jeeyucmi inꝑwatne.

5

Jém libro y jém Cordero

¹ Jesic ánix iga jém coñwiiip jém coñcuyucmi imatspacne tum libro inwiciimi. Jém libro juuts tum yagatspic toto wotneta. Jayñetím anšicmi y jayñetím jojmi. Jém toto anšajne con siete sello. ² Jesic ánix tum sinyucmipic pixiñ tsam iniit ipimi. Agui jiyapa. Nimpa:

—¿I iniit jém autoridad iga ináypa jém libro iga ijacpa jém sello?

³ Pero da i jém wiapaap ináy. Ni jém sinyucmipic, ni jém naxyucmipic, ni jém más nascimpic da i wiap ináy jém libro ni da i wiap iám. ⁴ Jesic tsam pimi awej porque da quej ni tum pixiñ jém wiapaap ináy jém libro iga imaypa. Ni da i wiap iám. ⁵ Jesic tum de jém wídaytam anímáy:

—Odoy weji. Mannímáypa iga jém León jém tsucumnewiip de jém tribu de Judá, jém rey David iocmanic, icoñwíy itumpiy jém ienemigoyaj. Je wiap ináy jém libro. Wiap ijac jém siete sellos.

⁶ Ánix jém Cordero noco teñ jém anjagooyi icoñcuyana ca jut it jém cuatro vivopic cosa, jém veinticuatro wídaytam iwiñjom. Quejpa iga accaaneta idic jém Cordero, pero siip pisneum. Iniit siete iwan y siete iixcuy. Yíp nimtooba jém siete espíritu jém icutsatnewiip Dios icuwiti yíp naxyucmi. ⁷ Jém Cordero miñ ipic jém libro jut imatspacne inwiciimi jém coñwiiip jém anjagooyi icoñcuyucmi. ⁸ Cuando ipic jém libro, jesic jém cuatro vivopic cosa y jém veinticuatro wídaytam icosteñáypa jém Cordero iwiñjom. Cada tumtum de jém wídaytam iniit tum arpa y tum xanu de oro. Comne jém xanu con jém wibic poma. Jém poma nimtooba jém oraciones jém iwatnewiip jém Dios ipixiñtam. ⁹ Jesic iwanyajpa tum jomipic wañi. Nimyajpa:

Mich wiap impic jém libro.

Wiap injac jém siete sellos.

Porque miccaata iga anyojayta antañca.

Integáy inñipiñ iga injúyayñe para Dios

pixiñtam de itumpiy raza,

jém inmatyajpáppic tunjac anmati,

jém ityajwiiip tunjac naxyucmi y de jém tunjac naciónyaj.

¹⁰ Dios accámta iga anjagooyi y apañijtam

iga ancuyoxatámpa Dios

iga ananjactámpa jém ityajwiiip yíp naxyucmi.

¹¹ Ocmi ánix iga antuumaneyaj tsam jáyan jém sinyucmipic pixiñtam. Ammatónáy ijyi. Icutexetneyaj jém anjagooyi icoñcuy jut it jém cuatro vivopic cosa y jém wídaytam. Ityaj millones y millones de jém sinyucmipic pixiñtam. ¹² Tsam pimi jiyajpa. Nimyajpa:

Tañcujíptámpa jém Cordero jém accaanetawiiip idic porque tsam wiap.

Wi iga ipictsoj itumpiy ipimi

y jém riqueza y jém wibic jixi.

Wi iga jém pixiñtam icujípyajiñ

y ichiiyajiñ gloria.

¹³ Ammatonjim iga jiyajpa itumpiy jém Dios iwati, jém ityajwiiip sinyucmi, jém ityajwiiip naxyucmi, jém ityajwiiip nascim, jém ityajwiiip jém lamar y itumpiy cosa jutinqej. Nimyajpa:

Wi iga tañwíwadaytamiñ jém coñwiiip jém anjagooyi icoñcuyucmi

y jém Cordero para itumpiy tiempo.

Tañcujíptámpa,

tanchiitámpa gloria,

an̄wian̄jamta iga an̄jactámpa.

¹⁴ Jesic jém cuatro vivopíc cosa n̄imyajpa:

—Amén. Itum w̄i.

Jém veinticuatro w̄idaytam costeeñact̄inyaj. Moj ij̄isyaj Dios, jém ðapíc nunca cuyajpa ivida.

6

Jagayta jém libro in̄núccuy

¹ Jesic ánix cuando jém Cordero ijac jém wiñtipíc sello jém libroyucmi. Ammaton̄ iga j̄iy tum̄ jém vivopíc cosa. Agui t̄iñpa jém ij̄iyi juuts majiywiñ. Anímáy:

—¡Miñi, aami!

² Jesic ánám. Ánix tum̄ popcawaj. Jém iquímcanew̄ip jém popcawaj imatspacne tum̄ picxi ic̄ijom. Iccámne icobacyucmi tum̄ corona. Nicpa icoñw̄iy jém ienemigo.

³ Cuando jém Cordero ijac tun̄gac jém sello jém libroyucmi, jesic ammaton̄ iga j̄iy jém tun̄gac vivopíc cosa. Anímáy:

—¡Miñi, aami!

⁴ Jesic put tun̄gac cawaj, tsabatspic. Jém iquímcanew̄ip chiit̄a tum̄ mijpic espada. Chiit̄atim̄ jém p̄imi iga ictsucumpa jém guerra iga tsam̄ áñayajpa jém p̄ixiñtam̄ iga naccaayajtap.

⁵ Cuando jém Cordero ijac tun̄gac jém libro ixello jém trespic, ammaton̄ iga j̄iyipa jém tun̄gac vivopíc cosa. Anímáy:

—¡Miñi, aami!

Jesic ánám. Ánix tum̄ yic cawaj. Jém iquímcanew̄ip inisiiba tum̄ balanza ic̄ijom. ⁶ Jesic ammaton̄ tum̄ j̄iyi jut̄ ityaj jém cuatro vivopíc cosa. Nimpa:

—Muma jama yoxayajpa iga icoñw̄iyipa tum̄ kilo de trigo o tres kilo de cebada. Odoy accaī jém olivos icuy jém pictapaap para aceite ni jém uvas icuy.

⁷ Jesic cuando jém Cordero ijac tun̄gac jém libro ixello jém cuatropic, ammaton̄ iga j̄iyipa tun̄gac jém vivopíc cosa. Anímáy:

—¡Miñi, aami!

⁸ Jesic ánám. Ánix tum̄ cawaj ða w̄i icolor agui cupuchayñe. Jém iquímcanew̄ip in̄iyi jém accaoyapaap. Itún̄iyipa jém Hades, ȳip n̄imtooba jém lugar jut̄ it̄ jém caaneyajw̄ip. Chiijaytā jém p̄imi iga iccaayajiñ tum̄ cuarta parte ȳip naxyucm̄ipic p̄ixiñtam̄ con jém espada, con jém yuu, con jém malopic caacuy y con jém jim̄ni an̄imatyaj jém ityajw̄ip ȳip naxyucmi.

⁹ Jesic cuando jém Cordero ijac tun̄gac jém libro ixello jém cincopic, ánix jém altarcucim̄ jém p̄ixiñtam̄ ianamayaj jém accaneyajtaw̄ip jém Dios in̄mati icuyucmi porque ða in̄néc iga icupicyajpa tán̄omi Cristo. ¹⁰ Jém anamayaj tsam̄ p̄imi j̄iyajpa. Nimyajpa:

—Mán̄omi Dios, tsam̄ miw̄i. Mich miñumapic. ¿Hasta jusan̄ in̄cip̄in̄pa jém malopic p̄ixiñtam̄ jém ityajw̄ip vivo jém naxyucmi iga antségáypa jém an̄c̄obac?

¹¹ Jesic cada tum̄tum̄ jém anama chiit̄a tum̄ yagats yooti tsam̄ popo. N̄imayyajtā iga poyejyajiñ tum̄ rato hasta que capspa jém numero de jém it̄iw̄itam̄ jém accaayajtapáppic juuts jeeyaj, jém icuyoxayajpáppictim̄ jém Cristo.

¹² Jesic cuando jém Cordero ijac jém tun̄gac jém libro ixello jém seispic, ánix iga miñ tum̄ nasyixi tsam̄ p̄imi. Cupiichā jém jama juuts tum̄ punctu tsam̄ yic. Jém poya set̄ juuts n̄ipiñ agui tsabats. ¹³ Jém matsa jém itw̄ip sin̄yucmi act̄in̄ naxyucmi juuts cuando tum̄ mijpic sawa icyojpa jém tsuj it̄im̄ cuando mañiñam. ¹⁴ Jém sin̄ togoypa juuts tum̄ toto cuando tan̄wotpa. Itump̄iy jém cotsic y jém isla accáytā ilugar jut̄ idic it̄. ¹⁵ Jesic itump̄iy jém an̄jagooyiyaj y jém in̄iityajw̄ip ip̄imi ȳip naxyucmi y jém soldado in̄jagooyi y jém ricoyaj

y jém iniitw̄ip ip̄imi con itump̄iy jém esclavo y jém dap̄ic je esclavo, itump̄iy tsam c̄inyajpa, wagayamyajpa jém tsaajosjom y jém tsaanjom jém cotsiganjoj. ¹⁶ In̄imayyajpa jém cotsic y jém tsa:

—Acuchijquettaami, acyami iga odoy aixiñ jém coñw̄ip jém tronoyucmi iga jém Cordero achüba jém tsam mījp̄ic castigo.

¹⁷ Porque núcne jém jama iga chiijajtap castigo jém malop̄ic pixiñtam. ¿I wiap iteeñanjac Dios iwiñjom?

7

Accámayajta sello jém Dios ipixiñtam

¹ Jesic ocmi ánix cuatro siñyucmīpic pixiñtam teñyaj icucuatro esquina de ȳip naxyucmi. Ictēñ jém cuatro sawa iga odoy sujóyiñ ȳip naxyucmi. Da ixujpa ni jém lamar ni jém cuyyaj. ² Jesic ánix tungac jém siñyucmīpic pixiñ quimpa jém anjamquimmi. Iniit jém sello jém vivop̄ic Dios im̄ichi. Jesic p̄imi jiypa jém siñyucmīpic pixiñ. Ij̄iyáy jém tungac cuatro siñyucmīpic pixiñtam jém iniitw̄ip jém p̄imi iga imalwadáypa jém nas y jém lamar.

³ Nimpa:

—Odoy malwadaayi ni jém nas ni jém lamar ni jém cuyyaj hasta que tanaccámáypa jém sello iwiñpacyucmi jém icuyoxayajp̄appic Dios.

⁴ Jesic ammaton̄ iga accámayajta jém sello ciento cuarenta y cuatro mil pixiñtam de itump̄iy jém tribu de jém Israelp̄ic pixiñtam. ⁵ Accámayajta sello doce mil pixiñtam de jém tribu de Judá, y doce mil pixiñtam de jém tribu de Rubén, y doce mil pixiñtam de jém tribu de Gad, ⁶ y doce mil pixiñtam de jém tribu de Aser, y doce mil pixiñtam de jém tribu de Neftalí, y doce mil pixiñtam de jém tribu de Manasés, ⁷ y doce mil pixiñtam de jém tribu de Simeón, y doce mil pixiñtam de jém tribu de Leví, y doce mil pixiñtam de jém tribu de Isacar, ⁸ y doce mil pixiñtam de jém tribu de Zabulón, y doce mil pixiñtam de jém tribu de José y doce mil pixiñtam de jém tribu de Benjamín.

Jáyan jém pixiñtam icámneyaj jém popyooti

⁹ Ocmi ánix iga an̄tuumaneyaj tsam jáyan pixiñtam, da i wiap imay. Ityaj itump̄iy clase de pixiñtam, jém tungac pixiñtam, jém jiyyajp̄appic tungac an̄mat̄imi y jém tungac naxyucmīpic. Teñyaj jém trono iwiñjom y jém Cordero iwiñjom. Icámneyaj yagats yooti tsam popo. Imatspacne ic̄ijjom tum suyat iay. ¹⁰ Itump̄iy tsam p̄imi jiyyajpa. Nimyajpa: Taciacputnetámum jém tan̄jatun̄ Dios

jém coñw̄ip jém tronoyucmi con jém Cordero.

¹¹ Itump̄iy jém siñyucmīpic pixiñtam icuteñx̄etneyaj jém trono. Ityajtim jém w̄idaytam y jém cuatro vivop̄ic cosa. Jesic itump̄iy jém ityajw̄ip jém tocsneact̄inyaj jém trono iwiñjom iga ij̄isyajpa Dios. ¹² Nimyajpa itump̄iy:

¡Amén! Tan̄cujíptampa tan̄jatun̄ Dios.

Tsam w̄ibic an̄jagooyi.

Tann̄imaytampa iga iyucuīpdios.

Je iniit itump̄iy ij̄ixi y itump̄iy ip̄imi.

Wiap iwat itump̄iy cosa.

Wī iga tan̄cujíppa Dios itump̄iy jém siglos. Amén.

¹³ Jesic tum jém w̄idaytam acwác. Anímáy:

—¿Que japaap ȳipyaj pixiñtam jém icámneyajw̄ip jém yagatsyooti tsam popo? ¿Juf miññeyaj?

¹⁴ Jesic ich annímáy:

—Mich iñjodon.

Jesic jém wiḍaya animáy:

—Yípyaj p̄ixiñtam iñascayaj jém mījpic yaachaji. Icheeyaj jém iyooti con jém Cordero iñīpiñ hasta tsíy tsam popo. ¹⁵ Jeeyucmi wiap iñúcyaj jém anjagooyi itrono iwiñjom. Wiap icuyoxayaj Dios tsuucim y siññi jém siñyucmīpic masticjom. Y Dios, jém coññewīp jém tronoyucmi, iyoxpátpa jém ip̄ixiñtam con ip̄imi porque iwaganait. ¹⁶ Jesic da más yuayajpa ni dam níctitsyajpa ni dam iñooba jém jama ni jém p̄iji. ¹⁷ Porque jém Cordero jém itw̄īp cucmi jém trono iwatpa cuenta jém ip̄ixiñtam. Ininicpa jém wībic nīxcuy jūt putpa jém ni jém tachiipáppic vida. Jesic Dios icujicháyáypa itumpiy jém iixcañi.

8

Jacta jém iñajpic libro iñnúccuy

¹ Jesic cuando jém Cordero ijac jém iñajpic libro ixello, jém sietepic, da ti tsigóypa siñyucmi como tum media hora. ² Ocmi ánix siete siñyucmīpic p̄ixiñtam jemum teñyaj jém Dios iwiñjom. Chiijajta siete trompeta. ³ Ánixtim tum siñyucmīpic p̄ixiñ icunúc jém altar de oro, jemum teñ. Inisība tum xanu de oro jūt nootap jém poma. Chiita jáyan jém poma iga iñooba jém altaryucmi jém Dios iwiñjom iganam iwatyajpa oración jém Dios ip̄ixiñtam. ⁴ Jesic jém siñyucmīpic p̄ixiñ imatspacne jém xanu. Joogap jém poma. Químpa jém poma ijoco, waganúcyajpa jém Dios iwiñjom con jém oración jém iwatyajpaap jém Dios ip̄ixiñtam. ⁵ Jesic ipic jém xanu de oro, icucom jém juuy. Itop jūt yótpa jém jucti jém altaryucmi, ipatsquet hasta naxyucmi. Jesic agui tiñpa majiywiñ, tsam nácsóypa, tsam quénpa. Yīspa nas.

Sustap jém cuatro trompeta

⁶ Jesic jém siete siñyucmīpic p̄ixiñtam jém iniityajw̄īp jém siete trompeta moj naw̄itsacyajtaji iga susyajpa.

⁷ Jesic suspa jém wiñtipic siñyucmīpic p̄ixiñ, actiñ naxyucmi jém icxtuj y jucti motne con nīpiñ. Jipsquet tum tercera parte jém nas y jém cuyyaj. Jipsquettim itumpiy jém tsusp̄ic p̄imyaj.

⁸ Ocmi suspa jém tungac siñyucmīpic p̄ixiñ jém wistenpic. Jesic ánix juuts tum mījpic cotsic agui jípspa, patsquetta lamar. Jesic setpa iga nīpiñ tum tercera parte de jém lamar. ⁹ Caayaj tum tercera parte de itumpiy jém ityajw̄īp lamar. Actogoyyajta tum tercera parte de itumpiy jém barcoyaj.

¹⁰ Ocmi suspa jém tungac siñyucmīpic p̄ixiñ jém tucutenpic. Actiñ siñyucmi tum mījpic matsa. Yótpa jém matsa juuts tum jucti. Ictsiy tum tercera parte de jém ríoyaj y de jém nīxcuy. ¹¹ Jém matsa iñiyi jém tam̄pic. Jesic tum tercera parte de jém ríoyaj y jém nīxcuy setpa iga tam. Jesic caayaj jáyan jém p̄ixiñtam porque tam jém ni.

¹² Ocmi suspa jém tungac siñyucmīpic p̄ixiñ jém cuatropic. Pích tum tercera parte jém jama ichoça y jém poya ichoça y jém matsa ichoça. Da p̄imi tsocyajpa. Siññi da jesp̄iy tsocpa jém jama. Tsuucim da jesp̄iy tsocpa jém poya ni jém matsa.

¹³ Jesic ánix tum tajpi quécpa siñyucmi. Ammaton iga p̄imi j̄iypa. Nīmpa:

—Agui uuguytim jém p̄ixiñtam jém ityajw̄īp ȳip naxyucmi. Porque tsíy tucuten jém siñyucmīpic p̄ixiñtam iga ixuspa jém itrompeta.

9

¹ Jesic jém tungac siñyucmīpic p̄ixiñ jém cincopic ixus jém itrompeta. Ánix juuts tum matsa actiñ siñyucmi hasta ȳip naxyucmi. Y jém actiñnewīp naxyucmi chiita jém llave iga iñáypa jém mījpic jos tsam jom̄i. ² Jesic iñáy jém mījpic jos tsam jom̄i. Putpa tum joco

jém josjom juuts joogap tum mijpic horno. Jém joco injoogapac jém jama ichoca, cupiicha icuwiti yip naxyucmi. ³ Jesic jém jocoanjom putyaj jáyan jém awu. Actinpa naxyucmi. Jém awu jex juuts cacwi tsam tibóypa. ⁴ Nímayajta jém awu iga odoy imalwadáyíñ jém pimyaj ni jém ñipñibooyi ni jém cuyyaj jém ityajwip yip naxyucmi. Solamente imalwadáyíñ jém pixiñtam jém dapic ipictsonneyaj jém Dios imarca jém iwiñpacyucmi. ⁵ Dios da ijicpa iga jém awu iccaayajiñ jém pixiñtam no más iyaachwatpa cinco meses. Tsam pimi toypa juuts cuando tatippa jém cacwi. ⁶ Jesic cuando núcpa jém malopic tiempo, tsam caayajtooba jém pixiñtam, pero da wiap. Tsam imétsyajpa jutsap icaayaj, pero da ipátpa.

⁷ Jém awu jex juuts tum cawaj witsacne para jém guerra. Icobacyucmi iniit juuts tum corona de oro. Jém iwiñpac juuts pixiñ. ⁸ Tsam yagats iway juuts yomo. Jém itits juuts tum can. ⁹ Jém imijtayyucmi iccámne juuts tum tinçuy iga iyoxpátpa. Tsam pimi anjyipa jém ixaj juuts cuando nicyajpa jáyan jém carreta jém ijicyajpáppic jém cawaj cuando nicpa añajiyaj. ¹⁰ Jém ituts jex juuts jém cacwi. Iniit itibóycuy. Wiap imalwadáy jém pixiñtam cinco meses. ¹¹ Jém awu iniit tum injagooyi. Miñ jém mijpic josjom. Jém anjagooyi iñiyi Abadón jém anmati hebreo, pero jém anmati griego iñiyi Apolión. Nimtooba jém actogóyopaap.

¹² Nas jém wiñtipic yaachaji. Siip miñpa tungac wisten.

¹³ Jesic jém tungac sinyucmipic pixiñ, jém seispic, ixus jém itrompeta. Jesic ammaton tum jiyi jém altaryucmi de oro jut it jém cuatro wan jém itwip Dios iwiñjom. ¹⁴ Jém jiyi iñimáy jém sinyucmipic pixiñ jém seispic jém iniitwip jém itrompeta:

—Cutsigaayi jém cuatro sinyucmipic pixiñtam jém tsennetawip jém mijpic río anñaca jém Eufates.

¹⁵ Jesic cutsigayta jém cuatro sinyucmipic pixiñtam iga iccaayajiñ jém tercera parte de jém pixiñtam jém ityajwip yip naxyucmi. Witsacnetawum dende wiñgam para jém hora y jém jama y jém meses y jém amtij iga iccaayajpa jém pixiñtam. ¹⁶ Jesic ammaton jutén soldado ityaj, jém cawajyucmipic, doscientos millones.

¹⁷ Jempigam ánix jém cawajyaj cuando ánix jém poñ. Y jém químnayajwip jém cawajyucmi iccámnyaj tum tinçuy ipechoyucmi iga iyoxpátpa. Algunos tsabats jém tinçuy, algunos tsus juuts jém sinpaqui, y algunos puuch. Jém cawajyaj icobac jex juuts can. Putpa jém ijipjom jucti y joco y azufre. ¹⁸ Jém tucuten plagas iccaayaj jém tercer parte de jém pixiñtam jém jucti y joco y azufre jém putpáppic jém cawaj ijipjom. ¹⁹ Yipyaj cawaj con icobac y con ituts wiap icca jém pixiñtam. Porque ituts inquiñi jex juuts tum tsañ icobac agui wasóypa. Imalwadayyajpa jém pixiñtam.

²⁰ Pero jém pixiñtam jém dapic iccaayaj yipyaj plaga da icucacyaj jém ijixi. Seguido ijisyajpa jém watnas jém iwatnewip cimi. Da ichacyajpa iga ijisyajpa jém Wocciwiñ ni jém watnas jém iwatneyajwip de oro, de plata, de bronce, de tsa y de cuy, jém dapic ixixóypa, ni matónóypa, ni witpa. ²¹ Da cucacyaj ijixi jém pixiñtam. Seguido accaóypa, iñawatwadáypa jém itiwitam, pejóypa, númpa.

10

Jém inimiñnewip jém xutu libro

¹ Ocmi ánix tungac sinyucmipic pixiñ tsam iniit ipimi, quet sinyucmi. Anmonne con tum ucsi. Iniit tum júñichi icobacantim. Jém iámooyi tsam pimi tsoepa juuts jama. Jém ipuy juuts tum jucti agui yótpa. ² Imatspacne tum xutu libro añáyñe. Tum jém ipuy jém inwimipic nepteñ jém lamar iwiñpacyucmi y jém añnaymipic ipuy nepteñ naxyucmi. ³ Pimi añwejpa juuts pímpa tum can. Cuando añwejpa, jesic tiñpatim jém siete jém

majiywiñ, ammatónáy ijíyi. ⁴ Cuando yaj jíyi jém siete majiywiñ, anjaycámpa idic ti nimpá. Pero ammaton tum jíyi sinyucmi. Anímáy:

—Anyamí ti nímaj jém siete majiywiñ, odoy anmatí. Odoy jaycaami.

⁵ Jesic jém sinyucmipic pxiñ jém ánixñewip nepteññe jém lamar iwiñpacyucmi y jém naxyucmi, icquím yucmi jém ici jém anwimipic. ⁶ Nimpá:

—Jém vivopic Dios jém dapic nunca cuyajpa, iwat jém sin y itumpiy cosa jém itwip sinyucmi, iwattim jém nas y itumpiy cosa jém itwip naxyucmi, iwattim jém lamar y itumpiy cosa jém ityajwip lamar. Yiptim Dios iwijodon iga da mammigóyáypa cuando mannímáypa iga sip cuyajpa jém tiempo. ⁷ Cuando núcpa jém jama iga jém tungac sinyucmipic pxiñ, jém sietepic, moj ixus jém íjanpigam trompeta, jesic cupacum jém dapic tacjodóñane Dios. Iwatpa Dios juuts inímáy jém profeta jém icuyoxayajpáppic.

⁸ Jesic jém jíyi jém ammatonnewip sinyucmi eybic ajíyáy. Anímáy:

—Nigi pici jém xutu libro jém ánýñewip, jém imatspacnewip jém sinyucmipic pxiñ, jém nepteññewip jém lamar iwiñpacyucmi y jém naxyucmi.

⁹ Jesic anic jut it jém sinyucmipic pxiñ. Annímáy iga achiiñ jém xutu libro. Jesic anímáy jém sinyucmipic pxiñ:

—Yim it. Miñi pici. Cútqueti. Tsam paac inijpjom juuts chiñu. Pero jém impuujom agui taamap.

¹⁰ Jesic ampic jém xutu libro jém sinyucmipic pxiñ icijom. Anjútquet. Numa agui paac anijpjom juuts chiñu. Pero cuando yaj anjút agui tam jém ampuujom. ¹¹ Ocmi anímayta:

—Tienes que eybic ininmadáypa jáyan jém pxiñtam ti miñpa. Ininmadáypa jém tungac pxiñtam, jém ityajwip tungac naxyucmi, jém jiyajpáppic tungac anmatimi y yip naxyucmipic anjagooyaj.

11

Jém wisten testigoyaj

¹ Jesic achiiñ tum quípsóycuy juuts tum waycuy. Anímayta:

—Tsucumi. Nigi quípsi jém Dios imastic. Quípsi jém altar. Mayi juten jém pxiñtam jém ijisyajpáppic Dios jém masticjom. ² Pero odoy quípsi jém mastic íançi. Porque Dios ichiiba iga imichap jém tungac pxiñtam. Iacunepnepquetyajpa jém wibic atebet, jém Dios imichi, cuarenta y dos meses. ³ Ich ancutsatpa wisten testigo jém ichpic ananmatciwiñ iga inmadayajpa jém pxiñtam ich ananquímayooyi. Inmatyajpa tum mil doscientos sesenta jama. Iccámpa tum yicyooti juuts tum pxiñ pimi anyácne.

⁴ Yip wisten testigo je jém wisten olivos icuy, jém wisten jém nooquejucuy tuncuy, jém teññewip Dios iwiñjom. ⁵ Siiga i imalwadáypa yip wisten Dios inmatciwiñ jesic putpa jucti ijipjom, inooquetpa jém ienemigoyaj. Siiga i imalwadáypa, jempigam iccaaba.

⁶ Yip wisten testigo wip inúc jém sin iga odoy chijóyñ jém tuj íganam inmatyajpa jém Dios inmati. Wiptim icset jém ni juuts nipiñ. Wiptim iyaachwat jém pxiñtam con jém malopic caacuy juchixquej juuts je ixunpa. ⁷ Jesic cuando yaj inmatyaj jém Dios inmati, tsucum jém mijpic animat jém Dios ienemigo jém putnewip jém mijpic josjom. Tsam anapa contra jém wisten jém Dios itestigo, icoñwíy. Accaata jém wisten testigo.

⁸ Tsacyajtap jém wisten jém caaneyajwip imijtay jém calle anñaca jém mijpic atebet jut cunúnta cunusyucmi jém iQmi. Tsam malo jém atebet juuts jém Sodoma y Egipto. ⁹ Miñ íamyaj jém accaanetawip tungac pxiñtam, de tungac naxyucmi, jém inmatpáppic tungac anmatimi, de jém tungac naciónyaj. Tucunajama y media íamyajpa jém accaanetawip. Da ijicpa iga cumtap. ¹⁰ Itumpiy jém pxiñtam jém ityajwip yip naxyucmi agui maymayyaj iga ca jém wisten anmatciwiñ. Agui nachiiyajta xaja con itiwitam porque agui pimi

maymay. Tsam ijóyixajpa jém caaneyajwíp porque jém wisten profeta tsam iyaachwat jém pxiñtam. ¹¹ Pero ocmi cuando nas jém tucunajama y media, Dios icpis. Síp vivojam eybictim. Jesic itumpiy jém pxiñtam, jém iixñeyajwíp, tsam pimi cinyaj. ¹² Jesic jém wisten testigo imatonjaj tum jiyi sinyucmi tsam pimi. Nimayta:

—Quiimi yim.

Jesic químyaj sinyucmi, inmon jém ucsi iganam jém ienemigoyaj iixyaj. ¹³ Jeeti rato miñ tum mijpic nasyixi. Iccutiñ jáyan jém tic icuwiti jém mijpic atebet. Iñuntayaj jém décima parte. Accaayajta siete mil pxiñtam. Jesic jém tsíyñeyajwíp tsam pimi cinyaj. Moj icujípyaj jém tanjatun Dios jém itwíp sinyucmi.

¹⁴ Nasneum jém wistenpic yaachaji y da jáyñe miñpa jém tungac yaachaji jém trespic.

Jém inajpic trompeta

¹⁵ Jesic jém tungac sinyucmipic pxiñ, jém sietepic, ixus jém itrompeta. Ammaton mijpic jiyi sinyucmi. Nimyaj:

Síp tanjatun Dios y jém tánomi Cristo imichi itumpiy jém naciónyaj jém ityajwíp yíp naxyucmi.

Síp Dios injacpa yíp mundo para siempre.

¹⁶ Jesic jém wídaytam, jém coñyajwíp jém veinticuatro icóñcuyucmi jém Dios iwiñjom, tocsneactinyaj. Moj ijsiyaj Dios. ¹⁷ Nimyajpa:

Mañcujíppa mánomi Dios jém tsampic miwíap.

Mich miit dende wiñgam,

miittim síp, miit para siempre.

Síp impictsonne impimi, tsam miwíap.

Síp ininjacpa itumpiy cosa.

¹⁸ Tsam mijóyixpa jém pxiñtam jém ityajwíp yíp naxyucmi.

Pero síp núcum jém tiempo iga inçipiñpa jém caaneyajwíp.

Iñchiiba castigo jém malopic pxiñtam.

Pero inwíyojpa jém impixiñtam jém micuyoxayajwíp,

jém mich ininmatcwiñ.

Inwíyojpa jém immichipic jém mitoyyajpáppic,

jém dapic juchan y jém iniitwíp jém mijpic cargo.

Pero iññuntaactogoypa jém malopic pxiñtam jém ictogoytopáppic itumpiy jém michpic immichi jém itwíp yíp naxyucmi.

¹⁹ Jesic ocmi ányaj jém Dios imastic sinyucmi. Masticjom ánix jém baúl juuts jém watnetawíp wiñgam cuando Dios ijiycámáy jém ipixiñtam iga iciacputpa. Jesic tsam quénpa majiywiñ, agui tiñpa. Ammaton mijpic anjjiyi. Agui yispa jém nas. Actiñ tum mijpic icxtuj.

12

Jém yomo y jém dragón

¹ Jesic quejpa sinyucmi tum cosa dapic queman tánix. Tum yomo iccámne jém jama juuts itecxi. It jém poya ipuycim. Iccámne icobacyucmi tum corona, iniit doce jém matsa jém coronayucmi. ² Manicomcane jém yomo. Agui anwejpa porque núcne jém tsixi itoya. Agui yaachap iga naypa jém tsixi. ³ Ocmi quejpatim sinyucmi tungac cosa dapic oyra tánix. It tum mijpic dragón agui tsabats. Siete icobac y diez iwan. Cada tumtum icobacyucmi iccámne tum corona. ⁴ Con ituts ijicmatspa jáyan jém matsa jém tercera parte jém itwíp sinyucmi. Iccutiñpa naxyucmi. Ocmi jém dragón nic teñi jém yomo iwiñjom jém icnaypáppic jém tsixi. Injócpa jém dragón iga icispa jém tsixi cuando nayum. ⁵ Jesic jém yomo icnay tum jaychixi. Jém tsixi chiita pimi iga injacpa itumpiy

jém naciónyaj. Injacpa con tum tñcuy vara. Pero ocmi accáyta jém tsixi, nanicta jém Dios iwiñjom jém mijpic coñcuyucmi. ⁶ Jesic poy jém yomo, nic iti jém titsinaxyucmi jut da iñim. Dios iwitsagáy tum lugar jut nicpa iti, jut icwícpa tum mil doscientos sesenta día.

⁷ Ocmi añayajpa sinyucmi. Jém Miguel con jém ipixiñtam añayajpa contra jém dragón con jém ipixiñtam. ⁸ Pero da wia micoñwíy jém dragón. Dam i lugar para jeeyaj sinyucmi. ⁹ Jesic quebacputta sinyucmi jém dragón, jém wiñicpic tsañ. Iñiyitim Wocciwiñ y Satanás. Imigóyáypa itumpiy jém pxiñtam icuwiti yíp naxyucmi. Quebacputta sinyucmi, acquetta naxyucmi jém Wocciwiñ con itumpiy jém sinyucmic pxiñtam jém itúnyyajpáppic.

¹⁰ Jesic ammaton tum mijpic jiyi sinyucmi. Nimpa:

—Siip núcum jém tiempo iga taciacputpa Dios. Núcne jém ipimi. Siip injacpa yíp naxyucmi. Jém Cristo, jém Dios imichi, ipictsonne jém autoridad. Quejpa iga iniit ipimi porque quebacputta pimimi jém Wocciwiñ jém tsampic icujyypa jém tantiwitam. Tsam iquejajwadáypa jém tantiwitam jém Dios iwiñjom tsuucim y siñi. ¹¹ Pero jém Dios ipixiñtam wiap icoñwíy jém Wocciwiñ porque jém Cordero itegáy iñipiñ iga iyojáy itañca. Icoñwíy con jém wibic añquímayooyi jém inmatyajpáppic. Jeeyaj da cinyajpa iga togoypa ivida, pero ityaj dispuesto iga accaayajtap. ¹² Maymáyaami jém miittanwip sinyucmi. Agui miuuguytim jém miittanwip naxyucmi y jém lamar porque quetneum naxyucmi jém Wocciwiñ jut miit. Tsam pimi jóyñe. Ijodon iga da jáyñe cuyajpa ipimi.

¹³ Jesic cuando jém dragón iix iga patsquetnetawum naxyucmi, moj imalwadáy jém yomo jém icnayñewip jém jaychixi. ¹⁴ Pero jém yomo chiita wisten jém miltampic águila ixaj iga wiap iquec iga nicpa tungac lugar jém titsinaxyucmi jut da iñim, juumi de jém animat. Jemum wiđatap jém yomo tres año y medio. ¹⁵ Jesic jém animat moj icput ni ijipjom iga iwatpa tum mijpic río iga icjídáypa jém yomo. ¹⁶ Pero jém nas iyoxpát jém yomo. Áñáy jém nas, iucquet jém ni jém putnewip jém animat ijipjom. ¹⁷ Jesic jém dragón agui pimi ijóyixpa jém yomo. Nic inña los de más jém yomo imanictam jém dapic ichacpa jém Dios inquímayooyi jém icupicpáppic Jesucristo.

13

Jém tungac wisten animat

¹ Ich atañ jém lamar añaca cuando ánix tum tsam mijpic animat put jém lamar. Iniit siete icobac y diez iwan. Cada tumtum jém iwanycmi iniit tum corona. Cada tumtum icobacyucmi inimiñ tum malopic niyi iga icujyypa tanDios. ² Yíp animat, jém ánixñewip, juuts tum can. Ipuy jex juuts jém oso. Ijip juuts jém león. Jém dragón ichi jém ipimi, iccám juuts tum añjagooyi, ichi mijpic autoridad. ³ Ánix tum jém animat icobac pimi coowane. Iccaatooba jém icoowaji, pero ocmi pis jém icoowaji jém iccaapáppic idic. Jesic itumpiy jém pxiñtam agui ipooñanjamyajpa, ocmi moj itúnyyaj. ⁴ Jesic jém pxiñtam ijisyajpa jém dragón juuts tum dios porque ichiñe ipimi jém mijpic animat jém putnewip jém lamar. Jesic ijisyajpatim jém mijpic animat. Nimyajpa:

—Da i tungac wiapaap juuts yíp animat. Da i wiap icoñwíy siiga añapa.

⁵ Jesic chiita lugar jém animat iga icujyypa tanDios iga tsam pimi imalmalnimáypa. Chiita pimi iga iwatpa juuts je ixunpa para cuarenta y dos meses. ⁶ Jesic ináy ijip, moj imalmalnimáy Dios y imalnimáy jém iñiyi y jém wicom jut it Dios. Imalnimáytim jém ityajwip sinyucmi. ⁷ Chiitatim lugar iga añayajpa con jém Dios ipixiñtam jém imichipic hasta que icoñwíy. Chiitatim jém pimi iga injacpa itumpiy clase de pxiñtam, jém jiyajpáppic jém tungac anmatimi y jém ityajwip tungac naxyucmi. ⁸ Ijisyajpa yíp animat itumpiy jém pxiñtam jém ityajwip icuwiti yíp naxyucmi, jém dapic jaycámnetá iñiyi jém

librojom jém tachiipáppic jém vida. Imiichi jém libro jém Cordero jém accaanetawwip dende moj iti yip mundo.

⁹ Siiga mitatsigiyta, maton̄taami. ¹⁰ Siiga i ipajpa jém itiw̄i, jesic pajtaptim mex je. Siiga i accaóypa con espada, accaataptim con espada mex je. Yimpic quejpa iga iyaachíypa jém Dios ipixiñtam cuando yaachwattap iga da ichacpa, seguido icupicpa iga Dios wíap iyoxpát.

¹¹ Ocmi ánix tungac tsam mijpic animat put nascim. Iniiit wisten iwan̄ jex juuts tum mañborrego, pero jypa juuts jém dragón. ¹² Chiitaim itumpiy jém ipimi jém iniitw̄ip jém wiñtipic animat jém coowanewwip idic icobac y ocmi pis. Yip ocmipic animat ipimíypa itumpiy jém pixiñtam jém ityajw̄ip yip naxyucmi iga ijsiyajiñ jém wiñtipic animat juuts tum dios jém pisnewwip icoowaji. ¹³ Wíaptim iwat jém miltampic milagro. Iquetpa jucti sinyucmi hasta yip naxyucmi jém pixiñtam iwiñjom. ¹⁴ Imigóyáypa jém pixiñtam jém ityajw̄ip yip naxyucmi con jém mijpic milagro jém wíapaap iwat jém wiñtipic animat iwiñjom. Inimáy jém pixiñtam iga iwatyajiñ tum watnas juuts jém wiñtipic animat jém coowanewwip idic con jém espada, pero da ca. ¹⁵ Jesic jém tungac animat, jém putnewwip nascim, iniit ipimi iga ichiiba iverda jém watnas iga wíaiñ iy. Ichi ipimi iga iccaayajpa itumpiy jém pixiñtam jém dapic ijsiyajpa jém watnas. ¹⁶ Jesic ipimíy iga accámaytaiñ tum marca itumpiy jém pixiñtam inw̄icimi o iwiñpacyucmi. Itumpiy accámayyajtap jém marca jém xutupic y jém mijpic, jém rico y jém pobre, jém esclavo y jém dapic je esclavo. ¹⁷ Siiga tum pixiñ da ini jém marca, da wíap imáymáyóy ni juyjúyóypa. Siiga iniit jém marca o jém animat in̄iyi o jém innumero wíap imáymáyóy y wíap ijuyjúyóy. ¹⁸ Yip ixunpa iga mijixiytamiñ. Siiga in̄cutiyíypa, jistaami ti nimtooba jém animat innumero. Yip nimtooba jém numero de jém pixiñtam. Jém innumero seiscientos sesenta y seis.

14

Wanyajpa jém 144,000

¹ Ocmi aámquim, ánix jém Cordero iga teñ jém cotsicyucmi in̄iyi Sión. Iwaganaityaj ciento cuarenta y cuatro mil jém ipixiñtam. Jaycámayta jém ipixiñtam iwiñpacyucmi jém Cordero in̄iyi y jém iJatun̄ in̄iyi. ² Jesic ammaton̄ tum an̄jyiyi sinyucmi juuts jupa jáyan̄ ni, juuts tsam pimi t̄iñpa jém majiywiñ. Ammaton̄ tum an̄jyiyi juuts ticstap tsam jáyan̄ arpa. ³ Jesic jém pixiñtam iwanyajpa tum jomipic wañi jut it jém trono jém Dios iwiñjom jut it jém cuatro vivopic cosa y jém wídaytam. Da i wíap ictsíy jém wañi, solamente jém ciento cuarenta y cuatro mil pixiñtam jém ciacputneyajtawwip yip naxyucmi. ⁴ Yipyaj jém dapic nunca yoomíy, da nunca ijypát yomo. Itun̄yiyajpa jut quej jém Cordero. Icupin̄ Dios entre jém malopic pixiñtam. Iyojáy itan̄ca. Jeeyaj tsíy juuts jém wiñtipic tim. Tsíyyaj juuts Dios imiichi y juuts jém Cordero imiichi. ⁵ Da i migooyi ijipjom. Da tan̄caíy jém tan̄jatun̄ Dios iwiñjom.

Jém tucuten sinyucmipic pixiñtam jém inimiñnewwip an̄matí

⁶ Jesic ánix tungac sinyucmipic pixiñ quecpa sinyucmi. Inisiba jém wibic an̄químayooyi jém dapic cuyajpa iga in̄madáypa jém pixiñtam jém ityajw̄ip yip naxyucmi. An̄madayyajtap itumpiy clase de pixiñtam, jém tungac pixiñtam, jém jyyajpáppic tungac an̄matimi y itumpiy jém ityajw̄ip jém tungacpic naxyucmi. ⁷ Tsam pimi jypa jém sinyucmipic pixiñ. Nimpa:

—C̄iñtaami Dios, cujíptaami. Siip núcneum jém hora iga c̄ipin̄óypa yip naxyucmi. Jistaami Dios jém iwatnewwip jém sin̄, jém nas, jém lamar y jém n̄ixcu y.

⁸ Jesic ocmi miñ tungac sinyucmipic pixiñ. Nimpa:

—Actiñum, actiñum jém mǎjpic atebet jém Babilonia porque ichi jém malopic jǎxi itumpiy jém naciónyay juuts iuquiwat con jém malopic vino iga icpejóypa jém pǎxiñtam.

⁹ Jesic ocmi miñ tunḡac siñyucmǎpic pǎxiñ jém trespic. Tsam pǎmi jǎypa. Nimpa:

—Siiga i ijǎspa jém animat o jém iwatnas juuts tum dios y siiga i ipictsonpa jém animat imarca iwiñpacyucmi o icǎyucmi, ¹⁰ jesic tienes que ipictsonpa tum mǎjpic castigo. Dios ichiiba castigo y da iyaachanjampa ni uxaj. Yaachwattap jém pǎxiñ con jucti y azufre jém siñyucmǎpic pǎxiñtam iwiñjom y jém Cordero iwiñjom. ¹¹ Jemum jut chiitap castigo tsam joogap itumpiy tiempo, da nunca teñpa. Jém pǎxiñtam da nunca jeypa tsuucim ni siññi. Iñascaaba así itumpiy jém ijǎsyajpǎpic jém animat y jém iwatnas y jém ipictsonneyajwǎip jém marca de jém animat iñǎyi. ¹² Yimur queypa jém Dios ipǎxiñtam siiga da ichacpa jém Dios inquímayooyi y seguido icupicpa tánomi Jesús.

¹³ Jesic ammaton tum jǎyi siñyucmi. Anímáy:

—Jaycaami yǎp añmatǎ: Nimpa jém Dios iAnama iga dende siip tsam maymayyay jém pǎxiñtam jém caaneyajwǎip, jém icupicnewǎip jém tánomi Cristo. Siip da yoxap, jeypajpa. Jém icoñwǎyooyi iwaganaít.

Piñtap jém cosecha yǎp naxyucmi

¹⁴ Ocmi aámquím y ánix tum ucsi tsam popo. Jém ucsyucmi coñ tum pǎxiñ juuts jém Miññewǎip Siñyucmi. Iniiit tum corona de oro icobacyucmi. Imatspacne tum tǎncuy tsam tsupa iga ipiñpa jém cosecha. ¹⁵ Jesic tunḡac siñyucmǎpic pǎxiñ put jém mǎsticjom. Tsam pǎmi jǎypa. Iñímáy jém coñwǎip jém ucsyucmi:

—Tǎñi con jém iñhoz, pǎñi jém cosecha. Núcum jém hora iga impiñpa porque cǎñneum yǎp naxyucmi.

¹⁶ Jesic jém coñwǎip jém ucsyucmi moj itǎñ jém cosecha yǎp naxyucmi, ipiñ.

¹⁷ Ocmi put tunḡac siñyucmǎpic pǎxiñ jém mǎsticjom. Imatspacne icǎjom tum hoz tsam tsupa. ¹⁸ Tunḡagam siñyucmǎpic pǎxiñ, jém jucti injagooyi, put de jut it jém altar. Jesic pǎmi ijǎyáypa jém tunḡac siñyucmǎpic pǎxiñ jém iniiitwǎip jém hoz aguipic tsupa. Iñímáy:

—Tǎñi siip jém cosecha con jém hoz aguipic tsupa. Tǎñi jém uvas yǎp naxyucmi porque siip cǎñneum.

¹⁹ Jesic jém siñyucmǎpic pǎxiñ moj itǎñ jém uvas yǎp naxyucmi. Itúc jém uvas, inḡtuumaḡwatpa jut iñepnecotspa iga itobáypa jém uvas iñi. Yǎp nimtooba iga Dios inḡtuumaḡwatpa jém malopic pǎxiñtam iga ichiiba castigo. ²⁰ Jesic micstap jém uvas añsǎcmi de jém atebet. Tsam putpa nǎpiñ jut micstap jém uvas. Tsam jojmǎ jém nǎpiñ, núcpa hasta jém cawaj ifrenoyucmi. Núc tsam juumǎ jém nǎpiñ trescientos kilómetro icuwoyo.

15

Jém siete malopic caacuy

¹ Ocmi ánix siñyucmi tunḡac seña tsam mij, jém tsampic tampooñanjampa. Siete siñyucmǎpic pǎxiñtam inimiñyay siete jém inanjǎgam caacuy. Cuando yaj mǎñi jém siete caacuy, jesic cuyajum jém Dios icastigo.

² Ocmi ánix juuts tum lamar de vidrio namotnetǎ con jucti. Teñyay jém Dios ipǎxiñtam jém lamar wiñpacyucmi. Jeeyaj icoñwǎyyay jém mǎjpic animat y jém animat iwatnas. Icoñwǎytim jém inumero de jém iñǎyi. Inisǎiba jém arpa jém ichiñewǎip Dios. ³ Iwanyajpa jém Moisés iwañi jém icuyoxanewǎip Dios y jém Cordero iwañi. Nimpa: Mánomi Dios, agui mǎjpic cosa mich inḡwat.

Agui tampooñanjampa.

Mich iniiit itumpiy impǎmi.

Tsam miwǎapaap.

Mich tsam inw̄watpa y da mimigóypa.

Mich más mijpic miRey ininjacpa itumpiy jém naciónyaj.

⁴ ¿I da mic̄n̄pa, mán̄omi Dios?

¿I da micuj̄ppa?

Porque solamente mimich jém dapic mitáncaiy.

Itumpiy jém naciónyaj miñpa micosteeñayaj

porque jutquej tsam w̄quejpa jém inin̄quimayooyi.

Quejpa iga inñ̄umc̄ip̄n̄pa itumpiy jém pixiñtam.

⁵ Jesic oc̄mi cuando nasne ȳpyaj cosa, ánix s̄nyuc̄mi iga áñáyñe jém s̄nyuc̄mic̄ mast̄ic hasta jém cuarto más jojm̄i jut̄ it̄ Dios ip̄imi. ⁶ Jém s̄nyuc̄mic̄ mast̄icj̄om̄ putyajpa jém

siete s̄nyuc̄mic̄ pixiñtam jém inimiññew̄ip̄ jém siete malop̄ic caacuy. W̄icuyajneyaj con jém popop̄ic̄ puct̄ucū agui t̄socpa. Iccámneyaj t̄um̄ cinturón de oro jém ipechoyuc̄mi.

⁷ Oc̄mi t̄um̄ de jém cuatro vivop̄ic̄ cosa ichi cada t̄um̄ t̄um̄ jém s̄nyuc̄mic̄ pixiñtam t̄um̄ x̄anu de oro comne de jém mijpic̄ castigo jém icutsatpaap̄ Dios jém itw̄ip̄ itumpiy tiempo.

⁸ Jesic jém s̄nyuc̄mic̄ mast̄icj̄om̄ comne de j̄oco. Tsam̄ it̄ jém j̄oco porque tsam̄ it̄ jém Dios ip̄imi. Dā ī w̄iap̄ it̄iḡiȳ jém mast̄icj̄om̄ hasta cuyajpa jém siete mijpic̄ castigo jém inimiññew̄ip̄ jém siete s̄nyuc̄mic̄ pixiñtam.

16

Jém siete x̄anu comne de castigo

¹ Oc̄mi ammaton̄ t̄um̄ mijpic̄ j̄iyi jém cuartoj̄om̄ jut̄ it̄ Dios ip̄imi. N̄imayt̄a jém siete s̄nyuc̄mic̄ pixiñtam:

—S̄ip̄ nan̄ici jém siete x̄anu jém Dios icastigo. N̄igī cutegaayi naxyuc̄mi.

² Jesic jém wiñtip̄ic̄ s̄nyuc̄mic̄ pixiñ icutegáy jém x̄anu naxyuc̄mi. Itumpiy jém pixiñtam jém iniitw̄ip̄ jém mijpic̄ animat̄ imarca jém ij̄isyajpaap̄ jém animat̄ iwatnas imatsyaj jém malop̄ic̄ puuci tsam̄ toypa, da w̄its̄íypa.

³ Jesic jém tungac̄ s̄nyuc̄mic̄ pixiñ jém wisten̄pic̄ nic̄ icutegáy jém x̄anu lamar. Set̄pa jém lamar juuts̄ jém ts̄uts̄ in̄ipiñ. Jesic itumpiy jém ityajw̄ip̄ lamar caayajpa.

⁴ Jesic jém tresp̄ic̄ s̄nyuc̄mic̄ pixiñ icutegáy jém x̄anu jém n̄ic̄im̄ y jém n̄ixcuy. Itumpiy jém n̄iyaj̄ set̄ iga n̄ipiñ. ⁵ Jesic ammaton̄ iga j̄iȳpa jém s̄nyuc̄mic̄ pixiñ jém icutegayñew̄ip̄ jém x̄anu jém n̄ic̄im̄. N̄impa:

—Mán̄omi Dios, miñ̄umc̄ip̄iñóypa. Mich̄ miit̄ dende wiñigam̄ y miitt̄im̄ hasta s̄ip̄. Mich̄ da mitáncaiy. Agui inw̄ic̄ip̄n̄ jém malop̄ic̄ pixiñtam. W̄ī iga in̄chiiba jém mijpic̄ castigo. ⁶ Porque jeeyaj̄ iccaayaj̄ jém imp̄ixiñtam̄ jém inin̄mat̄c̄iw̄iñ. Itegáyáȳ in̄ipiñ̄ ȳip̄ naxyuc̄mi. Jeeyuc̄mi w̄ī iga in̄ic̄set̄ jém n̄ī juuts̄ n̄ipiñ̄ iga in̄iguc̄pa jém malop̄ic̄ pixiñtam. W̄ī iga ip̄ict̄son̄yajpā j̄exp̄ic̄ castigo.

⁷ Ammaton̄t̄im̄ t̄um̄ j̄iyi jém altaryuc̄mi. N̄impa:

—N̄uma, mán̄omi Dios, mich̄ iniit̄ itumpiȳ imp̄imi, inñ̄umc̄ip̄n̄ juuts̄ iwatneyaj.

⁸ Jesic jém cuatrop̄ic̄ s̄nyuc̄mic̄ pixiñ icutegáy jém x̄anu jém jamyuc̄mi y jém jama chiit̄ā iga más p̄imī pijpa hasta in̄ooba jém pixiñtam̄ con jém ip̄iji. ⁹ Jesic tsam̄ p̄imī j̄ipsyaj̄ jém pixiñtam̄ con jém jamā ip̄iji. Pero da icucacyaj̄ ij̄ixī iga da icuj̄ipyajpā Dios. Moj̄ imalmaln̄imayyaj̄ Dios jém icutsatnew̄ip̄ jém castigo.

¹⁰ Jesic jém cincop̄ic̄ s̄nyuc̄mic̄ pixiñ icutegáy jém x̄anu jém an̄jagooyī ic̄oñcuyuc̄mī jut̄ in̄jacpa jém mijpic̄ animat̄ jém putnew̄ip̄ lamar. Jesic cupiichā icuw̄itī jém naxyuc̄mi. Tsam̄ p̄imī yaachwatt̄ap̄ jém pixiñtam̄ hasta que iwaspā itots̄ con jém toya. ¹¹ Tsam̄ imalmaln̄imáȳ Dios jém itw̄ip̄ s̄nyuc̄mī porque tsam̄ yaachwatt̄ap̄ con jém toya y jém puuci. Pero da icucacyaj̄ ij̄ixī iga imalwatyajpa.

¹² Jesic jém seispic sɨnyucmɨpic pɨxiñ icutegáy jém xanu jém mɨjpic río iñiyi Eufrates. Jesic tits jém ni iga wiap iñasyaj jém anjagooyiyaj jém miñpáppic anjamquím̄mi.

¹³ Jesic ánix tucuten mal espíritu juuts nac. Tum jém nac put jém dragón ijɨpjom. Tum jém nac put jém mɨjpic animat ijɨpjom jém putnewɨp lamar. Y tum jém nac put jém tungac mɨjpic animat ijɨpjom jém putnewɨp nascim jém imigóyaypaap jém pɨxiñtam. ¹⁴ Yíp mal espíritu jém Wocciwiñ imiichi wiaptim iwat milagro. Nicpa in̄tuumawat itumpiy jém anjagooyiyaj icuwɨti yíp naxyucmi iga áñayajpa con Dios jém jama jém icupinnewɨp jém tanjatun Dios jém iniitwɨp itumpiy ipimi.

¹⁵ Nimpa Dios iga sɨp mannímáypa iga miittámiñ al tanto. Ich amiñpa juuts tum númpaap mancupiichciypa. Tsam mimaymay siiga miit listo y siiga iniccámne impuctucu. Jesic da in̄cusici. Da michaap iga miixpa jém pɨxiñtam.

¹⁶ Jesic jém mal espíritu in̄tuumawat itumpiy jém anjagooyiyaj tum lugar iñiyi Armagedón jém an̄mati hebreo.

¹⁷ Jesic jém sietepic sɨnyucmɨpic pɨxiñ icutegáy jém xanu sauyucmi. Jesic jém sɨnyucmɨpic masticjom, jut if Dios jém tronoyucmi, ammaton̄ tum jiyi tsam pimi. Nimpa:
—Cupacneum.

¹⁸ Jesic agui quénpa majywiñ. Agui tiñpa. Tsam nácsóypa. Tsam pimi yispa jém nas. Tsam mɨjpic nasyixi. Da i queman oypa iix jexpic nasyixi tsam mij dende moj iti jém pɨxiñtam yíp naxyucmi. ¹⁹ Jesic jac jém nas jut if jém mɨjpic atebet. Tsíy tres pedazo. Jesic jém tungac atebetay icuwɨti jém naxyucmi cujegayyaj iticyaj. Dios ijispa jém atebet Babilonia iga tsam imalwat jeeyucmi ichiiba jáyan̄ castigo juuts tum vaso comne. ²⁰ Togoyyay itumpiy jém isla jém itwɨp lamar. Togoytim mex jém cotsicyaj. ²¹ También actin̄tim tum mɨjpic icxtuj. Ictsiypa jém pɨxiñtam. Tsam pimi mij jém icxtuj hasta cuarenta kilo ichacxñi tumtum. Jesic jém pɨxiñtam tsam pimi imalmalnímáy Dios porque jém icxtuj tsam pimi iyaachwatyay. Tsam mɨjpic castigo chiijayta.

17

Chiitq castigo jém malopic yomo

¹ Jesic tum de jém siete sɨnyucmɨpic pɨxiñtam jém inimiññewɨp jém siete xanu de oro miñ anímáy:

—Miñi. Manañquejáypa jém castigo jém ipictson̄páppic jém malopic yomo jém pejoypáppic jém coñwɨp jém lamar. ² Yíp naxyucmɨpic anjagooyiyaj tsam pejoyyajpa con yíp malopic yomo. Tsam iuquiwatyaj yíp naxyucmɨpic pɨxiñtam con jém vino de jém malopic cusúniyooyi.

³ Ocmi jém sɨnyucmɨpic pɨxiñ ananigáy jém áñanama tum titsinaxyucmi. Anquejáy juuts tum poñ. Ánix tum yomo iquím̄cane tum mɨjpic animat agui tsabats. Jém animat imijtayyucmi jaycámnetā itumpiy jém malopic an̄mati jém icujiyñewɨp Dios. Jém animat iniit siete icobac y diez iwan̄. ⁴ Jém yomo iccámne tum moradopic puctucu y tsabats. Agui wɨ cuyajne con oro, jém wɨtampic tsa y jém perla. Imatspacne ichijom tum copa de oro comne de jém cosa jém tsampic ijóyixpa Dios con itumpiy jém malajixi iga tsam pejoyñe yíp naxyucmi. ⁵ Jém yomo jaycámnetā iñiyi iwiñpacyucmi jém dapic i wiap icutiyiy. Nimpa así: “Jém mɨjpic atebet Babilonia. Yíp yomo tsíy juuts appic de itumpiy jém malopic yomt̄am y itumpiy jém malopic jixi jém tsampic ijóyixpa Dios yíp naxyucmi.” ⁶ Jesic an̄cutiyiy iga tsam uqui jém yomo. Iuc jém n̄ipiñ jut accaata jém Dios ipixiñtam jém Jesucristo icuyucmi. Jém n̄ipiñ iuquiwat. Cuando ánix jém yomo agui ampoñan̄jampa. ⁷ Jesic jém sɨnyucmɨpic pɨxiñ anímáy:

—¿Tiiga agui impooñanjampa? Siip manañmadáypa jém dapic inçutiíyípa y ti nimtooba jém yomo iga iquímecane jém animat jém iniitwíip siete icobac y diez iwan. ⁸Jém animat jém siipic íñix, it idic wiñic, pero ocni ca. Pero ocni pis, putpa eybic jém mijpic josjom jém tsampic pími jojmi. Nicpa jém lugar jut ipictsonpa castigo jém dapic nunca cuyajpa. Jesic itumpiy jém pixiñtam jém ityajwíip yíp naxyucmi jém dapic i ijaycámayñe íñiyi jém libro de la vida dende moj iwat Dios yíp mundo, jeeyaj tsam ipooñanjamyajpa cuando iixyajpa iga pisneum jém animat jém itwíip idic wiñigam y ocni ca, pero eybic miñpa.

⁹Da itumpiy jém pixiñtam wiap icutiíyí, solamente jém jixiywíip wiap icutiíyí. Jém siete icobac nimtooba jém siete cotsic jut coñ jém yomo. ¹⁰Jém icobac nimtoobatim siete mijpic anjagooyi. Nasneum cinco jém anjagooyi. Tum siibam injac y jém tungac danam tsucumne. Y cuando miñpa jém inañpigam anjagooyi da jáyñe cuyajpa. ¹¹Jém mijpic animat jém itwíip wiñic y siip da i, cuando miñgacpa, tsíypa juuts jém ochopic anjagooyi. Tumti ijixi y tumti ipími con jém tungac sietepic. Ocni nicpatim jém lugar jut ipictsonpa icastigo jut da nunca cuyajpa.

¹²Jesic jém diez iwan, jém íñixñewíip, nimtooba diez anjagooyi jém dapicnam ipictsonne icargo. Tsíypa juuts anjagooyi no más para tum rato iga injacyajpa yíp naxyucmi con jém mijpic animat. ¹³Yíp diez anjagooyi tumti jixi iniityaj. Ichiiyajpa itumpiy ipími jém mijpic animat iga iyoxpátpa. ¹⁴Jesic jeeyaj nicpa añajiyaj contra jém Cordero. Pero jém Cordero iconwíypa. Jém tánomi más wiapaap, je más mijpic anjagooyi que itumpiy jém anjagooyiyaj. Jém ipixiñtam, jém iwaganaitwíip, icupin y inwejay. Y jeeyaj da ichacyajpa iga icupicpa.

¹⁵Jesic jém sinyucmipic pixiñ anímáytim:

—Jém lamar jém íñixñewíip jut coñ jém malopic yomo jém pejoypaap nimtooba itumpiy jém pixiñtam, jém ityajwíip tungac naxyucmi, jém jiyajpáppic jém tungac anmatimi, jém tungac pixiñtam. ¹⁶Jém malopic animat con jém diez iwan, jém íñixñewíip, tsam ijóyixyajpa jém malopic yomo jém pejoypáppic. Ichacyajpa icutum y cusici. Icódayyajpa jém imayi. Íñoquetpa con jucti. ¹⁷Iwatyajpa jempic jém diez anjagooyi porque Dios ichi jém jixi íanamanjom iga iwatyajiñ juuts je ixunpa iga tumti jixi iniityaj iga ichiiyajpa ipími jém mijpic animat hasta que cupacpa itumpiy juuts nimpa jém tanjatun Dios. ¹⁸Jém malopic yomo jém íñixñewíip nimtooba jém mijpic atebet jém injacpáppic itumpiy jém anjagooyiyaj icuwíti yíp naxyucmi.

18

Cuyajpa jém mijpic atebet Babilonia

¹Jesic ocni ánix tungac sinyucmipic pixiñ quet sinyucmi. Agui iniit ipími. Iyicquejpa icuwíti yíp naxyucmi con jém ichoca. ²Tsam pími jíypa. Nimpa:

—Cuyajneum, cuyajneum jém mijpic atebet Babilonia. Tsíy juuts tum lugar jut nicpa íti jém mal espíritu jém Wocciwiñ imíchi, jut siiba jém espíritu dapic wí jém tamalwadaypáppic, jut ityaj jém malopic jonyaj jém tsampic jóyixtap. ³Cuyajne jém atebet porque iuquiwat itumpiy jém naciónyaj con jém vino de jém malopic cusúnyooyi. Jém atebet Babilonia tsam icmalwat jém anjagooyiyaj icuwíti yíp naxyucmi. Tsam wí it jém Babilonia, jeeyucmi jém máymáyoypaap tsam ricojaneyaj icuwíti de yíp naxyucmi porque jém pixiñtam tsam icusúnyyajpa titam iixpa.

⁴Ocni ammaton tungac jiyi sinyucmi. Nimpa:

—Mimichtam mammíchitam, puttaami de jém atebet iga odoy immalwattámiñ juuts jém ityajwíip jém atebet iga odoy impictsontámiñ jém plagas, jém castigo jém Diospic icutsatpa. ⁵Porque jém itánca antuumaneum, núcneum hasta sinyucmi. Siip ijispa Dios iga

tsam imalwatyaj, ichiiba castigo. ⁶ Jempictim acseedaaɣi jém yomo. Wisciy yoji juuts je iwat. Jém copa jém iwatnewiip jém yomo iga íñucpa, siip moɗi más jáyaŋ iga dos veces más íñchiiba. ⁷ Tsam pimi nacujipta iyaac. Tsam wi it para jáyaŋ tiempo. Jesic chiitaami jém yaachaji y jém anyaaqui tsam pimi. Tsam ijspa ijxianjom. Nimpa iga yim acoñ juuts tum reyna. Da nunca atsiypa ancutum juuts cunoya. Da nunca annascaaba jém anyaaqui. ⁸ Jeeyucmi tumti jama miñpa itumpiy jém plagas. Tsam jáyaŋ caayajpa, tsam it jém anyaaqui y jém mijpic yuu. Ocmi jipsquetpa con jucti. Porque agui wiap jém tánomi Dios, icipiñpa jém mijpic atebet, icyojpa jém itañca.

⁹ Tsam weyjajpa yip naxyucmicic anjagooyi, tsam anyácneyaj, porque agui pejóypa idic con jém yomo, agui maymayyaj idic. Pero siip tsam anyácneyaj cuando iix iga químpa jém ijoco jut jipsquetyajpa. ¹⁰ Juumi tsíyyaj jém anjagooyiyaj porque tsam icinyajpa jém castigo. Nimyajpa:

—Agui uuguytim jém mijpic atebet Babilonia, agui iniit idic jém ipimi, pero siip tumti rato núc jém mijpic castigo.

¹¹ Jém máymáyoyajpáppic tsam weyjajpatim. Pimi anyácneyaj iga cuyajneum jém atebet porque da i más ijúyáypa jém imáycuy. ¹² It jém carga de oro y plata y jém wítampic tsa aguipic tsoowiy y jém perla. It jém wibic punctucu jém lino y jém seda. Ittim moradopic y tsabats. It jém wítampic cuy jém cínpáppic y jém cosa watneta de cuy aguipic tsoowiy y jém marfil. Ittim cosa de bronce y tinçuy y mármol jém tsa aguipic wi. ¹³ Ittim carga de canela y jém especia cínpaap, jém poma, jém mirra y jém perfume. Ittim vino y aceite y jém wibic harina y trigo. Ittim bestia mular. Ittim borrego. Ittim cawaj. Ittim carreta. Ittim esclavos. Ittim jém pixiñtam ianama. ¹⁴ Nímayyajta jém ityajwip jém atebet:

—Itumpiy jém wibic tim jém inçusúniypáppic cáyum de mich. Jém wítampic cosa tsampic tsoowiy siip mitogóyay y da nunca impátpa.

¹⁵ Jém máymáyoyapaap tsam ricojaneyaj cuando iwat negocio con jém atebet. Siip juumi tsíyyaj porque icinpa jém yaachaji jém siippic iñasca jém atebet. Tsam weyjajpa, tsam anyácneyaj. ¹⁶ Nimyajpa:

—¡Ay, ay! Agui uuguytim jém mijpic atebet. Tsam wicuyajne idic con jém wibic punctucu morado y tsabatspic. Agui wicuyajnetim con jém oro, jém wítampic tsa y jém perla. ¹⁷ Tumti rato cuyaj itumpiy jém mijpic riqueza.

Itumpiy jém icwitpáppic jém mijpic barco con jém pasajeroyaj con jém yoxayajpáppic lamar, juumi teeñanjacyaj. ¹⁸ Jesic iixyajpa iga químpa jém joco jut jipsquetpa jém atebet, tsam anweyjajpa. Nimyaj:

—¿Jup atebet jex juuts yip mijpic atebet?

¹⁹ Como tsam pimi anyácneyaj iccámayñeyaj pótpót icobacyucmi. Tsam weyjajpa. Pimi anweyjajpa. Nimyaj:

—¡Ay, ay! Agui uuguytim yip mijpic atebet. Je icuyucmi ricojaneyaj itumpiy jém iniitwip ibarco porque tsam tumiñiy jém atebet. Pero siip tumti rato nunta miswatta.

²⁰ Pero mimichtam, miiftanwip sinyucmi, maymáyaataami porque siip Dios ichiiba castigo yip malopic pixiñtam. Mimichtam jém micutsatnewiip Dios y jém iniñmatpáppic jém Dios inmati, siip Dios icyojpa itañca jém mimalwadayñewiip.

²¹ Jesic tum sinyucmicic pixiñ, tsampic pimi, ipin tum mijpic molino icha. Ipatscúm lamar. Nimpa:

—Yicsabam icutin jém mijpic atebet Babilonia. Nunta togoypa. Da eybic íñixtámpa. ²² Yip atebet da i nunca imatonpa jém música ni jém arpa, ni jém trompeta ni flauta. Itumpiy jém pixiñtam jém wiapaap iyoxa, dam más tampátpa yim, ni jém molino da más tammatonpa iga anjiypa. ²³ Jemic da más tsoepa jém jucti. Da más matonpap jém bulla de

jém aṅcoomíyóycuy. Jém máymáyoypaap más wiayajpa idic que jém ityajwɨp icuwɨti yíp naxyucmi. Imígóyáy itumpiy jém naciónyaj con jém iñawadaꝑcuy.

²⁴ Yíp attebet padayta jém profeta iñiipiñ y jém dapic táŋcaíy iñiipiñ y itumpiy jém accaanetaꝑwɨp icuwɨti yíp naxyucmi.

19

¹ Ocmi ammaton tɨm jiyi tsam mij. Pimi jyyajpa jáyan pɨxiñtam sɨnyucmi. Nimyajpa: ¡Aleluya! Jém tanJatun Dios wiap iciacput jém pɨxiñtam.

Tsam wɨ jém tanDios, wiap iwat itumpiy cosa.

² Jém tanJatun Dios iñumcɨpiñ jém malopɨc yomo,

jém pejoypaap jém mɨjpic attebet,

porque tsam icmalwatne jém ityajwɨp yíp naxyucmi con jém malopɨc jixi.

Sɨp Dios ichécum jém ipɨxiñtam iñiipiñ, jém accaataꝑwɨp jem.

³ Jesic eybictim nimyaj:

—¡Aleluya! Jém ijoco químpa itumpiy tiempo.

⁴ Jesic jém veinticuatro wídaytam con jém cuatro vivopɨc cosa tocsne actɨn naxyucmi iga ijisyajpa Dios jém coñwɨp jém anjagooyi icoñcuyucmi. Nimyajpa:

—¡Itum wɨ! ¡Aleluya!

⁵ Jesic put tɨm jiyi de jut it jém anjagooyi icoñcuy. Nimpa:

Cujíptaami jém tanJatun Dios, mimichtam,

jém inꝑuyoxatampáppɨc Dios,

jém inꝑɨntampáppɨc,

mixututampɨc y mimɨjtampɨc.

Jém Cristo ipictsonpa jém ipɨxiñtam

⁶ Jesic ammaton tɨm jiyi tsam mij juuts jyyajpa tsam jáyan pɨxiñtam, tɨm anjjiyi juuts jupa jáyan ni, juuts pimi tiñpa jém majiywiñ. Nimpa:

¡Aleluya! Porque sɨp tsucumneum iga injacpa yíp naxyucmi jém tanOmi Dios jém iniitwɨp itumpiy ipimi.

⁷ Sɨp tamaymáyatámiñ.

Wɨ iga tanaítámiñ jém maymáya jɨ tanañamanjom y tañcujíptampa Dios

porque sɨp núcneum jém jama iga aṅcoomíypa jém Cordero.

Jém iyomo nawitsacnetawom. (Yíp nimtooba jém Dios ipɨxiñtam.)

⁸ Jém yomo agui wɨcuyajne.

Chiíta jém wɨbɨc puctucu, jém lino agui cuáyne, jém agupɨc tsoꝑa.

Jém wɨbɨc puctucu nimtooba iga wɨtsagayñetawum jém Dios ipɨxiñtam itáŋca. Ityajum listo iga nicpa iwaganaityaj Cristo.

⁹ Jesic jém sɨnyucmɨpɨc pɨxiñ anímáy:

—Jaycaami así: “Agui maymay jém pɨxiñ jém inwejayñeyajwɨp Dios iga nicpa sɨñajiyaj cuando aṅcoomíypa jém Cordero.”

Anímáytim:

—Yíbam jém numapɨc aṅmaɨti, jém michiñewɨp Dios.

¹⁰ Jesic acosteñ jém sɨnyucmɨpɨc pɨxiñ ipuyɨcɨm iga anjɨspa. Pero anímáy:

—Odoy wati jemɨc. Ich aṅcuyoxaptim Dios juuts mimich y juuts jém iñtɨwɨtam jém itúñyapáppɨc jém Jesús inquímayooyi, jém numapɨc. Odoy ajɨsɨ aich, jɨsɨ Dios.

Jém numapɨc aṅmaɨti, jém tachiiñewɨp jém tánOmi Jesús, jeetim jixi juuts jém ichiñewɨp Dios jém wiñɨcɨpɨc inmatcɨwiñ.

Jém iquímcanewiip jém popcawaj
(Jn. 1:1; 1 Jn. 1:1)

¹¹ Jesic ánix iga áñáyñe jém siñ. It tum popcawaj. Jém iquímcanewiip jém cawaj da nunca migóypa y siempre iccupacpa juuts nimpa. Numciipíñóypa y áñapa con justicia.

¹² Agui tsocpa jém iixcuy juuts yótpa jucti. Jém icobacyucmi accámayñeta wati jém corona. Jaycámnetā tum niyi, pero da i icutiñiyiypa solamente je mismo. ¹³ Accámayñeta tum yooti mujne con niñpiñ. Jém iñiyi jém Dios Inmañi. ¹⁴ Jém siñyucmipic soldado itñiyiyajpa. Cada tumtum iquímcanē tum popcawaj. Accámayñeyajta jém wibic puctucu agui popo, cuáyñe. ¹⁵ Jém anjagooyi jém iquímcanewiip jém popcawaj putpa iñipjom tum espada agui tsupa. Con yíp espada iccoowap jém naciónay icuwiti yíp naxyucmi. Injacpatim con tum tñcuy vara. Iñepnecotspa jém uvas con ipuy iga itobáypa jém iñi. Yíp nimtooba iga ichiiba castigo itumpiy jém malopic pixiñtam. Porque Dios, jém iniitwip itumpiy ipimi, tsam pimi ijóyixáypa jém pixiñtam itañca. ¹⁶ Jaycámnetā jém iyootyucmi y jém iwitpuyucmi: “Jém Rey de itumpiy reyyaj, jém tánomi Dios itumpiy iomiyaj.”

¹⁷ Ocmi ánix tum siñyucmipic pixiñ teñ jamjom. Pimi jiyapa. Inwejáypa itumpiy jém jonyaj jém quecyajpáppic siñyucmi. Nimpa:

—Miñi miñtuumajitam yim. Miñi miwiiquitam jut iwatpa Dios tum mijpic siñ.

¹⁸ Miñtaami iga inçudáyiñ jém reyyaj imayi y jém capitán imayi, y jém pimipic pixiñ imayi. Inçispa jém icawaj imayi y jém cawaj iomi imayi. Inçispa itumpiy jém pixiñtam imayi jém esclavo jém ñapic je esclavo jém mijpic y jém xutupic.

¹⁹ Ocmi ánix jém mijpic animat con yíp naxyucmipic reyyaj con jém soldadoyaj, an̄tuumaneyaj iga áñayajpa contra jém coñwip jém popcawajyucmi y contra jém soldadoyaj. ²⁰ Matsta jém mijpic animat y jém malopic profeta jém níman̄taayañewiip iga Dios icutsatne. Yípyaj iwatyaj jém milagro jém mijpic animat iwiñjom iga imigóyayajpa jém pixiñtam, jém ipictsoñayñeyajwip jém animat imarca iwiñpacyucmi, jém iñisyajpaap jém animat iwatnas. Icuistic siwiñ cotyajta jém juctjom jém laguna jut naps jucti jém tsampic pimi yótpa con azufre. ²¹ Jesic itumpiy jém pixiñtam jém tsíyñeyajwip, accaaya-jtap con jém espada jém putnewiip jém mijpic anjagooyi iñipjom, jém iquímcanewiip jém cawaj. Jesic itumpiy jém jonyaj cusum icisayaj jém pixiñtam imayi.

20

Cristo injacpa tum mil amt̄iy yíp naxyucmi

¹ Jesic ánix iga quet tum siñyucmipic pixiñ. Inimiñ jém llave iga ináypa jém mijpic jos tsam jojmi. Imatspacne icijjom tum mijpic cadena. ² Jesic imats jém dragón, jém widay tsañ, je jém Wocciwiñ y Satanás. Ichen para tum mil amt̄iy. ³ Ipatscúm jém mijpic josjom tsam jojmi. Jenum ipaj. Iccámáy tum sello jut an̄núcne iga odoy pudiñ. Jesic jém Wocciwiñ da wiap imigóyáy jém pixiñtam jém ityajwip yíp naxyucmi hasta capsapa jém tum mil amt̄iy. Cuando yaj naxi jém mil amt̄iy tienes que cutsigaytap jém Wocciwiñ tum rato.

⁴ Ocmi ánix wati jém anjagooyi icóñcuy jut coñyay jém accámnetawip juuts juez iga ciipíñóypa. Ánixáytim jém pixiñtam ianama jém tñcujagayñetañwip iisci porque inmatyajpa iga Jesús wiap taciaput y iga inmatyajpa jém Dios inmañi. Yíp pixiñtam da queman icosteeñayaj jém mijpic animat ni jém animat iwatnas. Datim ipictson̄ jém animat imarca iwiñpacyucmi ni iciiyucmi. Iwaganaityajpa jém Cristo tum mil amt̄iy. Iwaganjacyajpatim con Cristo. ⁵ Yípyaj jém wiñtipic pisnewiip de jut it jém caaneyajwip. Pero los de más jém caaneyajwip da pisneyaj hasta que cuyajpa jém tum mil amt̄iy. ⁶ Agui wiit jém wiñtipic acpisnetawip. Tsíyyaj juuts Dios im̄chi. Da caaba eybic. Tsíyyaj

juuts panij iga icuyoxap Dios, iga icuyoxap Cristo. Iwagaanjacyajpa jém pixiñtam con Cristo tum mil amtíy.

⁷ Jesic cuando cuyaj jém mil amtíy, cutsigayta jém Wocciwiñ jut pajneta. ⁸ Put iga imigóyayíñ jém naciónayaj, jém pixiñtam jém ityajwíip icuwíti yíp mundo. Nicpa imigóyay jém lugar iñiyi Gog y Magog. In tuumawatyajpa jém pixiñtam iga áñayajpa. Tsam pími jáyan ityaj juuts jém pooy jém itwíip lamar aññaca. ⁹ Miñyajpa icuwíti yíp naxyucmi. Icuwoyxtneyaj jut antuumaneyaj jém Dios ipixiñtam jém atebet jém tsampic itoypa Dios. Jesic Dios icquet jucti naxyucmi. Yaj jípsquetiyaj itumpiy jém ienemigoyaj. ¹⁰ Jesic jém Wocciwiñ, jém tsampic imigóyay jém pixiñtam, patcumta jém juctjom jém laguna jut naps jucti, jemum tsam pími yótpa con azufre. Jemtim patcumneta wiñti jém mijpic animat y jém malopic profeta jém nímanñtaayawíip iga Dios icutsat. Jemigam yaachwattap tsuucim y siññi. Da nunca cuyajpa jém yaachaji.

Cüpiñóyapa jém mijpic anjagooyi jém popopic itrono

¹¹ Jesic ocmi ánix tum tsam mijpic trono agui popo. De jém coññewíip iwiñjom poy jém nas y jém siñ, pero da ipátyaj jut nicyajpa. ¹² Jesic ánix jém caaneyajwíip teñyay Dios iwiñjom. Ittim jém mijpic y jém xutupic. Áñáyta jém libroyaj. Áñáytatim jém tungac libro, jém libro de la vida. Cada tumtum jém caaneyajwíip cüpiñyajtapa juuts jaycámneta librojom juuts iwatneyaj cuando vivo. ¹³ Jém lamar chióy jém caaneyajwíip, icijunçot jém ityajwíip jem. Jém muerte y jém Hades chióytim jém caaneyajwíip. Icijunçot jém ityajwíip jem. Cüpiñyajta cada tumtum juuts iwat cuando vivonam. ¹⁴ Y jém muerte y jém Hades acnicyajta jém juctjom jém laguna jut naps jucti. Yípyaj tanimpa wisciy caaba, yíp laguna jut naps jucti. ¹⁵ Jemtim cotyajta itumpiy jém pixiñtam jém dapic i iñiyi jém librojom jut accámneyajta jém ipictsonpáppic jém vida jém dapic cuyajpa.

21

Jomipic siñ y jém nas

¹ Jesic ánix tum jomipic siñ y tum jomipic nas porque jém wiñicpic siñ y nas cuyajneum. Datim i jém lamar. ² Ich aXiwan ánix jém wibic atebet, jém jomipic Jerusalén, quetpa siñyucmi Dios iwiñjom. Witsacneum juuts tum woñi jém iniitwíip trato iga jáyíypa. Tsam wicuyajne iga ipictsonpa jém iwídaya. ³ Jesic ammaton tum mijpic jiyi siñyucmi. Nimpa: —¡Matonñtaami! Siñ miñ iwaganaitiyaj Dios jém pixiñtam. Jeeyaj tsíy juuts Dios ipixiñtam y Dios tsíy juuts jém pixiñtam iDios. ⁴ Dios icujicháypa jém ipixiñtam iixcañni. Dam más caaba jém pixiñtam. Da i jém anyaaqui. Dam weyjajpa. Dam i jém toya. Cuyajneum jém wiñtipic cosa.

⁵ Jesic jém coñwíip jém mijpic anjagooyi icoñcuyyucmi nimpa:

—¡Matonñtaami! Ich anacjomasetpa itumpiy cosa.

Jesic anímáy:

—Jaycaami porque numa yíp anañmatí, da je migooyi. Tienes que cupacpa juuts mannímayñe.

⁶ Ocmi anímáytim:

—Cupacneum. Ich jém awiñtipic y jém íñanpic, juuts jém letra jém alfa y omega. Siiga i níctitpa, ich anacnícpa. Anchiiba jém ni jém ichiipáppic vida, jém quimpáppic jém wibic niixcuy. Da ammánychiiba, ansáypa. ⁷ Siiga i icoñwíyypa jém malopic jixi tienes que ipictsonpa itumpiy jém wibic cosa juuts tum tsixi imiichap jém ijatun imiichi. Ich atsíypa juuts iDios y je tsíypa juuts ich ammanic. ⁸ Pero jém cuixiyajpic, jém dapic icupicyaj, jém jóyixoyajpaap, jém accaoyajpaap, jém pejoyajpaap, jém nawatyaj, jém ijisyajpaap

jém watnas y itumpiy jém migoyyajpaap, jeeyaj acnicyajtap jém laguna jut naps jucti, jut jipsyajpa con jém azufre. Jém acnicneyajtawhip jem tanimpa iga wisciy caayajpa.

Jém jomipic Jerusalén

⁹ Jesic núc tum jém siete sinyucmipic pixiñtam jém iniitwip idic jém siete xanu de oro comne de jém siete inajpic caacuy. Anímáy:

—¡Miñi yim! Manaquejáypa jém woñi, jém ipicpaap jém Cordero iga ancoomíypa.

¹⁰ Jesic ananigáy ananama tum mijpic cotsicyucmi tsam pimi yucmi. Anquejáy jém mijpic atebet jém wibic Jerusalén. Quetpa sinyucmi Dios iwiñjom. ¹¹ Jém atebet tsam wi tsocpa con jém Dios ichoça. Agui tsocpa juuts tum tsa aguipic tsoowiy juuts jém wibic tsa jém jaspe. Tanquamnaspas juuts tum cristal. ¹² Cutanne jém atebet con tum mijpic taañi tsam pimi yucmi. Iniit doce ipuerta. Cada tumtum jém ipuerta it tum sinyucmipic pixiñ. Cada tumtum jém puertayucmi jaycámayñeta iñiyi cada tumtum de jém doce tribu de jém Israelpic pixiñtam. ¹³ Iniit tres ipuerta anjamquímmi. Iniit tres ipuerta anwixaxumi. Iniit tres ipuerta antsapsaxumi. Iniit tres ipuerta anjamtigiyumi. ¹⁴ Jém atebet iniit doce ibase jut piimane jém taañi. Jaycámayñeta iñiyi cada tumtum jém baseyucmi jém doce apóstolyaj jém icutsatnewhip jém Cordero.

¹⁵ Jém sinyucmipic pixiñ jém anmatpáppic con aich inisiiba tum quípsóycuy de oro iga iquípsa jém atebet y jém puertayaj y jém itaañi. ¹⁶ Jém atebet cuadrada. Jesañtim iyagats jesañtim iwiti. Jesic iquípsa jém atebet con iquípsóycuy. Iyagats dos mil doscientos kilómetros, jesañtim iwiti, jesañtim iyucmi. ¹⁷ Ocmi iquípsa jém atebet itaañi. Iyucmi sesenta y cuatro metros. Jém sinyucmipic pixiñ iquípsa con yip naxyucmipic quípsóycuy.

¹⁸ Jém taañi watneta de jém wibic tsa jém jaspe. Jém atebet watneta naps oro. Agui tsocpa juuts vidrio. ¹⁹ Jém itaañi ibase wiaccuyajneta con jáyan jém witampic tsa. Tum jém base accámayñeta jém jaspe. Jém tungac jém zafiro, jém tungac jém ágata, jém tungac jém esmeralda, ²⁰ jém tungac jém ónice, jém tungac jém cornalina, jém tungac jém crisólito, jém tungac jém berilo, jém tungac jém topacio, jém tungac jém crisoprasa, jém tungac jém jacinto y jém tungac jém amatista. ²¹ Jém doce ipuerta watneta de doce jém perla. Cada tumtum jém puerta watneta de tum perla. Jém atebet icalle naps oro, juuts jém vidrio wiap tanquamnaspas.

²² Da ánix ni tum mastic jém atebet porque jém tánomi Dios, jém iniitwip itumpiy ipimi, con jém Cordero, jeeyaj tsíyyaj juuts jém mastic. ²³ Jém atebet datim ixunpa jém jama ni jém poya iga iyicquejpa porque Dios ichoça iyicquejpa y jém Cordero je jém ijucti. ²⁴ Jém naciónyaj, jém iciacputnewhip, siyaypa jém juctianjtsocajom. Yip naxyucmipic anjagooyiyaj ininicyajpa itumpiy jém ipimi jém atebet jut it Dios. ²⁵ Jém ipuerta da nunca anpajpa siñi, y jemic da nunca piichap. ²⁶ Jém naciónyaj ininicyajpa ipimi jém mijpic atebet iga icujípyajpa Dios. ²⁷ Pero jém malopic cosa da tigiyapa jem. Datim tigiyapa jém jóyixoypaap ni jém migoypaap. Solamente tigiyaypa jém pixiñtam jém jaycámetawhip iñiyi jém Cordero ilbrojom jém ichiñewhip jém vida jém dapic cuyajpa.

22

¹ Ocmi jém sinyucmipic pixiñ anquejáy tum wibic ni jém tachiipáppic vida jém dapic cuyajpa. Tsam cunajne jém ni juuts cristal. Putpa jém anjagooyi iconcuyucim jut injacpa Dios y jut injacpa jém Cordero. ² Cucmi de jém calle de jém atebet y cada lado de jém ni it jém cuyaj jém tachiipáppic vida. Timap doce veces tum antiy. Chióypa itim cada meses. Jém cuy iay wi para icpíspa jém naciónyaj. ³ Jemic da i jém cosa dapic wi, dam i iyicámne jém castigo. Pero it jém atebet jém más mijpic anjagooyi iconcuy jut injacpa Dios y jut injacpa jém Cordero y jém imozoyaj icuyoxayajpa. ⁴ Jeeyaj iixayajpa jém iOmi

íamooyi. Cada tumtum jém imozo jaycámayñeta jém iQmi iñiyi iwiñpacyucmi. ⁵ Jemic dam i piichi. Jém ityajwip jemic da ixunpa jucti iga iyicquejpa. Datim ixunpa jém jama ichoça porque jém tánQmi Dios iyicquejpa jém ipixiñtam y jeeyaj injacyajpa para itumpiy tiempo.

Da jáyñe miñgacpa Jesucristo

⁶ Ocmi jém sinyucmipic pixiñ anímáy:

—Yíp anmati jém numapic. Da je migooyi. Jém tánQmi Dios, jém ichiñewip jixi jém wiñicpic inmatciwiñ, sip icutsat yíp naxyucmi tum jém sinyucmipic pixiñ jém imichipic iga inquejáyiñ jém icuyoxayajpaap ti miñpa da jáyñe.

⁷ —Da jáyñe amiñpa. Jempam nimpa Cristo. Tsam maymay jém icupicpaap jém Dios inmati jém jaycámayñetawip yíp librojom.

⁸ Ich aXiwán. Ánix y ammaton yípyaj cosa. Jesic cuando yaj ánix y ammaton, acosteñ jém sinyucmipic pixiñ ipuycim jém anquejayñewip itumpiy yípyaj cosa iga anjisa. ⁹ Jesic nimpa jém sinyucmipic pixiñ:

—Odoy wati jempic. Ich ancuyoxaptim Dios juuts mimich y juuts jém iñtiwitam jém inmatpáppic jém Dios inmati y juuts jém icupicpáppic jém Dios inmati jém jaycámayñetawip yíp librojom. Jisi Dios.

¹⁰ Anímáytim:

—Odoy anyami yíp anmati jém nimnewip ti miñpa, jém iñjaycámnewip yíp librojom, porque núctooba jém tiempo iga cupacpa juuts miñimayñeta. ¹¹ Jém malopic pixiñ seguido imalwadiñ y jém iniitwip jém malopic jixi seguido iwadiñ jém malopic cosa. Y jém wibic pixiñ wí iga seguido iwíwadiñ. Y jém iniitwip jém wibic jixi ianamanjom wítim siiga seguido iwatpa juuts ixunpa Dios.

¹² Nimpa tánQmi Cristo:

—Da jáyñe amiñpa. Anamiñpa jém coñwiyooyi. Anyojpa cada tumtum según juuts iwatne. ¹³ Ich jém awiñtipic y jém inapic, juuts jém letras alfa y omega.

¹⁴ Agui maymay jém icheenewip ipuctucu. Jeeyucmi chiitap derecho iga icunúcpa jém wibic cuy jém ichiipáppic vida. Chiitapim derecho iga tigíypa jém puerta de jém jomipic Jerusalén. ¹⁵ Pero tsíyyajpa anscim jém chimpa, jém nawatyaj, jém pejoypaap, jém accaoypaap, jém ijspáppic jém watnas y jém tsampic itoypa jém migooyi, jém migoypaap.

¹⁶ —Ich aJesús. Mancutsadáy tum sinyucmipic pixiñ, jém acuyoxapaap, iga inmadáyiñ yíp anmati jém Dios ipixiñtam jut antuumayajpa. Ich jém acobapic de jém rey David y ichtim jém iocmanic imaníc. Ich jém awítmatsa jém tsocpáppic cuquejacim.

¹⁷ Jém Dios iAnama y jém Cordero iyomo, jém ancoomíyoypaap, nimpa: ¡Miñi! Jém imatonjajpaap yíp anmati nimaajpatim: ¡Miñi!

Wí iga míñiñ jém níctitsnewip. Jém iwianjamwip, wí iga iuguiñ jém ni jém tachiipáppic vida. Da tamáychiiba Dios, tasajíypa.

¹⁸ Sip manacjodónap mimichtam, jém immatonpáppic yíp anmati, jém jaycámnetawip yíp librojom. Siiga i incodíypa yíp anmati con tungac anmati, jesic Dios icmatspa jém plagas juuts jaycámnetá yíp librojom. ¹⁹ Siiga i iccáypa uxaj jém Dios inmati jut jaycámnetá yíp librojom, jesic Dios iccáyáypa jém iñiyi jém libro de la vida. Iccáyáypatim jém derecho iga nicpa iti jém wibic atebet. Datim ichiiba jém wibic cosa juuts ijycámayñe Dios yíp librojom.

²⁰ Jém inmatpaap nimpa:

—Numa, da jáyñe amiñpa.

Jesic ich animpa: Itum wí. ¡Miñi, mánQmi Jesús!

²¹ Jém tánQmi Jesucristo miwíwadaytamiñ iñtumpiytam. Amén. Jemum cuyaj.